


Lerérún Búngiu To
Lánina Iséri Darádu



New Testament in Garifuna (HO:cab:Garifuna)

Lerérún Búngiu To Lánina Iséri Darádu
New Testament in Garifuna (HO:cab:Garifuna)

copyright © 2012 Wycliffe Bible Translators, Inc.

Language: Garifuna

Translation by: Wycliffe Bible Translators, Inc.

Garifuna [cab], Honduras

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Garifuna

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

Contents

SAN MATEO	1
SAN MARCOS	63
SAN LUCAS	102
SAN JUAN	166
HECHOS	213
ROMANOS	270
1 CORINTIOS	296
2 CORINTIOS	323
GÁLATAS	340
EFESIOS	350
FILIPENSES	359
COLOSENSES	365
1 TESALONICENSES	371
2 TESALONICENSES	376
1 TIMOTEO	379
2 TIMOTEO	386
TITO	391
FILEMÓN	394
HEBREOS	396
SANTIAGO	415
1 PEDRO	422
2 PEDRO	429
1 JUAN	433
2 JUAN	440
3 JUAN	441
JUDAS	442
APOCALIPSIS	444

UGÁNU BUÍTI LE LABÜRÜJABEI MATÉO LUÁGU JESÚSU

Linébaanfaangu Jesúsu

(Lc 3.23-38)

¹ Niján jíri linébaanfaangu Jesucrístu le jádaangiñebei meja ladügawagun Davíd lúma Abrahám.

² Abrahám lúguchibei Isáac, Isáac lúguchi Jacób, Jacób lúguchi Judá jáu lamúlenu,

³ Judá lúguchi Fáres lúma Zára, Támar tugúya jáguchu, Fáres lúguchi Esróm, Esróm lúguchi Arám,

⁴ Arám lúguchi Aminadáb, Aminadáb lúguchi Naasón, Naasón lúguchi Salmón,

⁵ Salmón lúguchi Booz, Raháb lúguchu, Booz lúguchi Óbed, Rut lúguchu, Óbed lúguchi Isaí,

⁶ Isaí lúguchi urúei Davíd, urúei Davíd túma tó meja lúmari Urías, jagía lagübürigubaña Salomón.

⁷ Salomón lúguchibei Roboám, Roboám lúguchi Abías, Abías lúguchi Ása,

⁸ Ása lúguchi Josafát, Josafát lúguchi Jorám, Jorám lúguchi Uzías,

⁹ Uzías lúguchi Jótam, Jótam lúguchi Ácaz, Ácaz lúguchi Ezequías,

¹⁰ Ezequías lúguchi Manasés, Manasés lúguchi Amón, Amón lúguchi Josías,

¹¹ Josías lúguchi Jeconías jáu lamúlenu lídan dan le janáanwagunbei Israelítagu adáürawagua Babilónia.

¹² Lárigiñe le, Jeconías lúguchibei Salatiél, Salatiél lúguchi Zorobabél,

¹³ Zorobabél lúguchi Abiúd, Abiúd lúguchi Eliaquím, Eliaquím lúguchi Azór,

¹⁴ Azór lúguchi Sadóc, Sadóc lúguchi Aquím, Aquím lúguchi Eliúd,

¹⁵ Eliúd lúguchi Eleázar, Eleázar lúguchi Matán, Matán lúguchi Jacób,

¹⁶ Jacób lúguchi José le túmari María, tugúyati lúguchuboun Jesúsu le gíribei Crístu.

¹⁷ Catoúrusuñanu lubeíti linébaanfaangu Jesúsu lúmagiñe Abrahám lúmoun Davíd, catoúrusu lúmagiñe Davíd lúmoun janáanwagúniwa Israelítagu Babilónioun, catoúrusu lúmagiñe dan ligía lúmoun lagüriajoún Crístu.

Lagüriajoún Crístu

(Lc 2.1-7)

¹⁸ Ítara líña ligáburi lagüriajoún Jesucrístu. María to lúguchu, gadáraduñoun lúma José lun tamáriedun lúma, lubáragiñeti jaganoun jámagua, lubáragiñe lasúbudirunun quei würi, ába tadáriragun túngua láu dagáñu tíña lan láu lubáfu Sífiri Sándu.

¹⁹ Quei ában lubeí wügüri buídu tigáburi José le tadári, májati lasúbudirúniwa le asúseredubei tun María, busénrügüti lígirunun, míchugunga tidúnrun.

²⁰ Dan le niján lubeí arítagua luágu cátei le, ligía larúfudagun ában láni Wabúreme Búngiu ánjeli lúngua lun lídan luwénedi, ába laríñagun lun.

—José, ladügawagun Davíd, manúfudebá lun berésibirunun María queísi búmari, ladüga irájü le lúnbei tagáraüduni, lúmagiñe Sífiri Sándu liábin.

²¹ Tagáraüduba ában irájü, ábame bíchuguni líri Jesúsu. Ítara lúba líri ladüga lasálbarubaña lan lumútuniña lídaangiñe jafígoun.

²² Lasúseredunbei sun cátei le lun lagúnfulirun dimúrei le laríñagubei Wabúreme Búngiu liyúmulugugiñe proféta.

²³ Tadágeinaduba ában irájü, ábame tagáraüdüan ában irájü, Emanuéel, ligíaba líri, líla líri ligía, “Búngiu wáma”.

²⁴ Dan le lagágudunbei José lídaangiñe uwénedi ligía, ába ladügüni le lubeíbei ánjeli ligía lun, ába lerésibirunun María queísi lúmari,

²⁵ masúbudirúngaloún queísi würi darí tagüriajani furúmiñeti tiraü, ába líchuguni líri Jesúsu.

2

Jachülürün chu táu aríjei Jesúsu

¹ Lídan fulásu le gíribei Belén, lumúanrugu Judéa, ñi lagüriajouá Jesúsu dán meja le Heródes lan urúeíbei lídan jageíra juríu. Ábati jachülürün fiú wügüriña chu táu ubúrugin Jerusalén lueígiñe oubaü le ñígiñe lubeí laboucha wéyu.

² Ába jálügüdjagan.

—¿Jageísan jarúeite juríu le agüriajoubei? Aríja wamáaru luwáruguman le ñígiñe lubeí láfuara wéyu, wayábiñati lun wájuduragin lun.

³ Dan le lagáambuni urúei Heródes cátei le, ába medéraguagüdünjaali lan, jáu sun Jerusalénna.

⁴ Ábati lagúarun joun sun jábutigu fádirigu lídan jafíñen juríu, jáma ja arúfudajabalin lilúruden Moisés joun gürígia, ába lálügüdaguniña jalíabei lan libíti fulásu lagüriajouá Crístu.

⁵ Ába jaríñagin lun.

—Belén, le lumúanrugubei Judéa, ladüga ítara líña labürüdüni proféta.

⁶ Amürü Belén, lumúanruguna Judéa, amürü ában lídaangiñe ubúrugu weírigutimaati lídan múa le, láu sun biñüraü, ladüga láfuriduba ában ábuti bídaangiñe le lúnbei loúnigiruniña numútuniña ja Israelítagu.

⁷ Ábati lagúarun Heródes joun chu táu arámudaguarügü, ába lálügüdüniña luágutima dan le tarúfudaguagüle warúguma túngua joun.

⁸ Ábati loúnajaniña Belén, laríñaga joun.

—Jeíba, ábame jáluajani irájü le buídu, dánme le darí jumaali, jawísaraname, ñüdüñ námuga gíñe ájuduragua lun.

⁹ Lárigiñe jagáambuni chu táu lerérun urúei, ába jóudin. Warúguma bugáti to jaríjuboun le ñígiñe lubeí láfuara wéyu, ába tídin jabá jabá, darí taráramun loúgiñe fulásu le ñí lubei irájü le.

¹⁰ Dan le jaríjinun chu táu ja warúguma, ába jagúndaaragin sarágu.

¹¹ Dánti le jebélurun tídon múna, ába jaríjini irájü le túma lúguchu to María. Ábati jájuduragin, ába jabúluchagin lun. Ába jánjunrenchunun jagáfun, ába jedéweejan gólu lúma cupáli jémeti lun, lúma ában luwúyeri árani gífiti.

¹² Lárigiñe, ába jawísarúniwa lídan jawénedi lun magíribudun jamá ñígiñe lubeí Heródes, ába jagíribudun jageíroun lídaangiñe ámu úma.

Anúrajani lun Ejíptoun

¹³ Lárigiñe jóudin chu táu jagía, ába larúfudagin ába láni Búngiu ánjeli lúngua lun José lídan luwénedi, ába laríñagin lun.

—Sarába, barübei irájü le táu sun lúguchu, anúrabá Ejíptoun, ábame beréderun ñi daríme nawísarunibu, ladüga lálujajaali Heródes irájü le lun láfaruni jilágubei.

¹⁴ Ábati lásaarun José, ába lanügüni irájü táu sun lúguchu áriebu ligía, ába lídin jáu Ejíptoun.

15 Ába jeréderun ñi darí loúnwen Heródes. Lasúseredunbei sun le lun lagúnfulirun le laríñagubei Búngiu liyúmugugiñe proféta. “Sagá numuti Niraü Ejíptogiñe.”

Láfaraguágüdüniña Heródes irájüñü

16 Dan le ladáriragun Heródes lúngua luágu yéegua jamá lan chu táu, ába lagáñidun, ába loúnajan áfaraguaña sun irájüñü ja biáma tíña irúmu jáu lun ünabun, ja aganoúbaña Belén lúma sun fulásu geyégua láu, según dan le jaríñagubei chu táu luágu lagüriajóuniwa irájü ligía.

17 Ítara líña lagúnfulirun le labürüjabei proféta Jeremías.

18 Agaambúati lagúarajan ában umálali Ramá láu oúnwenbun igárigu, umálali ligía tumálali Raquél, to ayájuboun jarígi tirájüñü, mabúseeruntu lun támalijoún ladüga jilágua jamá.

19 Lárigiñe loúnwen Heródes, ába liábin ába láni Búngiu ánjeli lun José lídan luwénedi yágüta Ejípto, ába laríñagun lun.

20 —Sarába, barübei irájü le táu sun lúguchu, giríbu jumá jageíroun Israelítagu ladüga jilágua ja abúseerubaña meja jáfaruni irájü le.

21 Ába lásaarun José, ába lanügüni irájü táu sun lúguchu jageíroun Israelítagu.

22 Dan le lasúbudiruni José luágu Arqueláo lan agúmadijabei Judéa lewéñegua Heródes le lúguchi, ába lanúfudedun lídin ñíjin, ába laríñawagúniwa lun lídan uwénedi lun lídin Galiléoun.

23 Lachülürün ñi, ába lídin agánawa lídan fulásu le gíribei Nazarét, le lumúanrugubei Galiléa. Lasúseredunbei sun cátei le lun lagúnfulirun le jaríñagubei profétagu luágu Nazarétna lan Jesús.

3

*Lapúrichijan Juan le abásteragüdjabei lídan fulásu mageírawati
(Mr 1.1-8; Lc 3.1-9, 15-17; Jn 1.19-28)*

1 Lídoun dan ligía, ába liábin Juan le abásteragüdjabei apúrichija lídan fulásu mageírawati, Judéa,

2 ába laríñagun lídan lapúrichijan.

—Sáansi jumeí jouúserun, ladüga yaráfaali larúeijan Búngiu.

3 Juan le, ligía le uágubei meja labürüja proféta Isaías ítara.

Agaambúati lumálali ában güriágu agúaraja lídan fulásu mageírawati ítara.

“Aráanse jumoún janígi lubá liábin Wabúreme, queísi ladárarúniwa üma surúti.”

4 Lanáangun Juan, láutu lúra caméyu, liábin lagürüga liránaagua, guéru, chigángaru leígubaña lúma síruudu le áraabuna.

5 Ábaja jayábin ubúrugugiñe Jerusalén, lúma Judéagiñe, lúma lubádugiñe dúna Jordán agáambe lapúrichijan,

6 dántija le jagúfesseruni jafígoun, ába labásteragüdüniña lídan dúna le gíribei Jordán.

7 Dan le laríjin Juan luágu sarágu jáña lan güriágu lídaangiñetiña jadámurin fariséogu jáma saduséogu ñübintiña lun jabásterun, ába laríñagun joun.

—¡Jarásan jéwe jugúya le! ¿Ca awísarubadün lun janúrajan lueí lanárime afáyeiragülei luágu figou le lúnbei liábin?

8 Oúsera jumá buídu, arijúa lámuga furáangu luágu sáansigua lan ligáburi jouúserun.

9 Mapántajan jugúyame, aríñaga jídaangua. “Linébaanfaangu Abrahám wagía”, ladüga nariñajare jun luágu gayára lan ladügün Búngiu linébaanfaangu Abrahám lídaangiñe dübü le.

¹⁰ Madíseeli lagúnfulirun le laríñagubei Búngiu, luágu yaráfaali lan lidáani abeichúni luágu figoú, aráanseeru jaráwa lun lánchujóun wéwe, áni sun wéwe le mabuídunti lin, chaünwati, ába lagudún.

¹¹ Áu, láu dúna nabásteragüdaün, arúfudei luágu sáansi jumáali lan ligáburu jouserun, ánjeinti le lúnbei liábin nárigi, labásteragüdübadün láu Sífiri Sándu, áni lafáyeiragüdübadün luágu figoú queísi láu wátu geméti. Gabáfuti nueí darí lun madüna nan ni lun narágachunun ligeídin.

¹² Nújeinjaru lichóbulin lújaburugu, larúmadagüdübei türígu, ábame lanúadiruni lídaangiñe sagádi mábeijali. Ábame lareíduni türígu, ábame láguduni sagádi le mábeijali lídan wátu geméti le méñeguchadibeí.

Labásterun Jesúsu

(Mr 1.9-11; Lc 3.21-22)

¹³ Dan le liábin Jesúsu Galiléagiñe, ába lachülürün luágun dúna le gíribei Jordán le ñí lubei Juan lun labásteragüdüni.

¹⁴ Májati yebéti Juan labásteragüdüni, ába laríñagun lun Jesúsu.

—Nugúya lúnbei babásteragüdünina, ¿amürü lubeí ñübin nun lun nabásteragüdünibu?

¹⁵ Ába laríñagun Jesúsu lun.

—Ítara lúba guetó, ladüga lúnti wadügüni le lubeíbei Búngiu.

Ába labásteragüdüni Juan Jesúsu,

¹⁶ lárigiñe labásterun Jesúsu, ába láfuridun dúnarugugiñe. Sódini ába lánjunrenchagun siélu, ába laríjini Jesúsu Sífiri Sándu larárirun camá ában únjun liábin luágun.

¹⁷ Ába lagaambún ába umálali siélugiñe le aríñagubei.

—Niraü le jínsiñebei nun le, le áubei oúnwenbun lan nugúndan.

4

Loúchaguni Máfia Jesúsu

(Mr 1.12-13; Lc 4.1-13)

¹ Ába lanügüni Sífiri Sándu Jesúsu lídoun fulásu mageírawati lun loúchaguni Máfia.

² Lárigiñe leréderun Jesúsu bián-wein wéyu lúma bián-wein áriebe meíginga, ába lalámachun.

³ Ábati liábin Máfia lubádun, ába laríñagun lun lun loúchaguni.

—Ánjein liraü bubei Búngiu, salíguagüdabeí dübü le feínme.

⁴ Ába loúnabun Jesúsu.

—Taríñajare Lerérun Búngiu. “Mámarügübei táu fein labágarida gürígia, labágariduba gíñe láu sun dimúrei le laríñagubei Búngiu.”

⁵ Ábati lanügüni Máfia Jesúsu Jerusaléoun, ubúругu le sándubei joun juríu, ába laweínragüdüni tábulugun témpulu,

⁶ ába laríñagun lun.

—Ánjein liraü bubei Búngiu, chubába yágiñe lun ünabun, ladüga taríñajare Lerérun Búngiu.

Laríñaguba Búngiu joun láni ánjeligu lun jóunigirunibu.

Janügübadibu jájaburugu lun machúgeragun lan bugúdi luágu dübü.

⁷ Ába loúnabuni Jesúsu.

—Aríñagatu gíñe Lerérun Búngiu. “Moúchaguabeí Babúreme Búngiu.”

⁸ Ába lanügüni Máfia Jesúsu luágun ában wübü íñuti, ába larúfuduni sun arúejani le ubóuagubei lun, lúma buri luweírigun,

⁹ ába laríñagun lun.

—Níchugubei sun le bun ánjabu ájuduragua nun.

¹⁰ Ábati laríñagun Jesúsu lun.

—¡Beíba nueí, Máfia! ladüga tariñajare Lerérun Búngiu. “Lúnrüğüba Babúreme Búngiu bájuduragua, lúnrüğüba giñe besériwida.”

¹¹ Ábati ladísedun Máfia lueí, ába jayábin ánjeligu esériwidei.

Lagúmeseruni Jesúsu luwádigimari, Galiléa

(Mr 1.14-15; Lc 4.14-15)

¹² Dan le lagáambunbei Jesúsu luágu níjein lan Juan furísunrugu, ába lídin lárigoún Galiléoun.

¹³ Merédeti Nazarét, ába lídin agánawa Capernaúm, ában fulásu le lárubei dúna lídan jageíra rása le Zabulón lúma Neftalí.

¹⁴ Lasúseredunbei sun le lun lagúnfulirun le labürüjabeí meja Isaías, lé meja proféta.

¹⁵ Lageíra Zabulón lúma Neftalí,

lídan üma lubádu barána, lueígiñe oúbaü le ñígiñe lubeí láfuara wéyu libíti Jordán,

Galiléa le ñí lubei jagánawa ja mámabaña juríu.

¹⁶ Jugúya lé meja lídaanbei lubúriga aríjaadün ában oúnwenbun larúgounga,

jugúya lé meja lídaanbei lamúñounga le lánina oúweni,

jarúgoungagüdawaali jáu.

¹⁷ Lúmagiñe dan ligía, ába lagúmeserun Jesúsu apúrichija ñi ítara.

—Sáansi jumeí jigáburi, ladüga yaráfaali larúeijan Búngiu.

Lagúarun Jesúsu joun gádürü esénijatiña lun lánime disípulugu

(Mr 1.16-20; Lc 5.1-11)

¹⁸ Eíbugeina líña Jesúsu lárú lárú dúna Galiléa, ligía laríjin bián gamúlenuguátiña, ában jádaangiñe, Simón le méme gíribei Pédro, le ában, Andrés. Esénijani jabágaribei, jáguruñati.

¹⁹ Ábati laríñagun Jesúsu joun.

—Falá jumana, ábame mesénijanjadün lan úduraü, anáajarügaadünme gürígia nun lun nánigume.

²⁰ Furése furése ába jígirunun jasénin, ába jóúdin lúma.

²¹ Lubáruaguoun mémeraü Jesúsu, ábaya laríjin bián gamúlenuguátiña, Jacóbo lúma Juan, lirájüñü Zebedéo. Tídaañanu ában ugúnein lúma jáguchi arámada joun jasénin. Ába lagúarun Jesúsu joun lun lánime disípulugu,

²² lídan óra ligía ába jígirunun ugúnein, ígira jáguchi, ába jóúdin lúma Jesúsu.

Larúfudajan Jesúsu joun sarágu gürígia

(Lc 6.17-19)

²³ Ábajei leíbuguni Jesúsu sun Galiléa arúfudajeina tídan buri jalígilisin juríu to lídaanboun ságü fulásu. Ábaja lapúrichijani ugánu buíti luágu larúeijan Búngiu, areídaguagüda ligía sun luwúyeri sándi le jawáguti gürígia.

²⁴ Ába lagaambúniwa luágu Jesúsu lídan sun Síria, ába janügüniña sun ja asúfurirubaña láu ámuñegueinarügü sándi, igárigu, ja gawágubaña lagübüri espíritu, ja goúwejadibaña, jáma ja derégüdaaña úgubu, ába lareídaguagüdüniña.

²⁵ Sarágu jáña gürígia afálaruti Galiléagiñe, lídaangiñe buri fulásu Decápolisna, Jerusaléngiñe, loúbawagugiñe Judéa, lúma lueígiñe oúbaü le ñígiñe lubeí labóucha wéyu libíti Jordán.

5

Lapúrichijan Jesúsu wübüwaügügiñe

¹ Dan le laríjinbaliña Jesúsu sun gürígia jagía, ába laweínrun luágun ában wübü, ába lañúurun ñi. Ábati joúndaragun láni disípulugu geyégua láu,

² ába lagúmeserun arúfudaja joun ítara.

³ –Fuleíseiwatün jugúya le asúbudirubalin luágu mégei jumáni lídejan Búngiu lun jadügüni le labúseerubei, ladüga méreengunbei jun lun jebélurun lídoun larúeijan Búngiu siélu.

⁴ ‘Fuleíseiwatün jugúya le jírubei, ladüga líchuguba Búngiu gurásu jun.

⁵ ‘Fuleíseiwatün jugúya le ünabugubei, ladüga jerésibirubei le uágubei laríñaga Búngiu luágu líchugubei lan jun.

⁶ ‘Fuleíseiwatün jugúya le weírubei jabúseerun lúaradagun jabágaridun, ladüga líderagubadün Búngiu lun jadügüni.

⁷ ‘Fuleíseiwatün jugúya le gudémejabubei, ladüga gudémegradün gíñe lun Búngiu.

⁸ ‘Fuleíseiwatün jugúya le jarúmabeí anígi, ladüga jaríjubei Búngiu.

⁹ ‘Fuleíseiwatün jugúya le áfaagubei lun jámalijan sun cátei, ladüga lagúarubadün Búngiu queísi lirájüñü.

¹⁰ ‘Fuleíseiwatün jugúya le asúfurirubei eíbaajoúni luágu lúaragun jibágari, ladüga jebéluruba lídoun larúeijan Búngiu siélu.

¹¹ ‘Fuleíseiwatün dan le janábagunün gürígia, eíbaaja jamaün, aríñaga jagía sun luwúyeri iyéeni juágu, nueígiñe.

¹² Gúndaañu jumá, ladüga jerésibiruba ában oúnwenbun fáyeiti siélu, ítara liñá meja gíñe jeíbaajoúniwa profétagu ja ñübinbaña jubáragiñe.

*Ítara jíña queísi sálu lúma lámpu lun ubouú
(Mr 9.50; Lc 14.34-35)*

¹³ Ába lasígirun Jesúsu aríñaga.

–Ítara jíña quei sálu joun lílana ubouú le lun jeréderuniña lueí jagádeirun, ánjein lefériDIRA sálu lubásuan, ¿cábago un ju lan? Úaalime ju lan ni ca un lueídügüya lun lágurúniwa, ábame jadügüraguni gürígia.

¹⁴ ‘Ítara jíña quei lámpu joun lílana ubouú le. Ában ubúругu le luáguti ában wübü siñáti larámudagun, furáanguti larijoúniwa.

¹⁵ Mebedúnti gíñe ában lámpu lun líchugúniwa tábugiñe ában gáfu, luágu dábula líchugúa lun larúgoungadágüdün jáu sun ja múnadabaña.

¹⁶ Ítara jumá gíñe, durúnguagüda jumeí jilámpun jádan gürígia, lun dánme lan jaríjini buíti le jadügübei, ábame gíñe jadímurejan buíti luágu Wáguchi Búngiu le siélubei.

Larúfudajan Jesúsu luágu lilúrudun Moisés

¹⁷ ‘Marítagua jumátia luágu niábiña lan agídarei lilúrudun Moisés, ni le jarúfudajabei profétagu, máma niábiña agídarei, niábiña arúfudei líla le tímatimaati.

¹⁸ Ninárün lubeíti jáu luágu níjeingua rügáli ligía lan siélu lúma ubouú, magídarúnwabei ni ában púntu, ni ában létüra lídaangiñe lilúrudun Moisés daríme suséreeli le lúnbei lasúseredun.

¹⁹ Ligía, le lubeí íchuguti mebéreseni luágu furúmierügü gumádi lídaangiñe lúrudu, íbini le lan ñúraütimaabei lídaangiñe, arúfudaja ligía joun gürígia lun jadügüni líbe le ladügübei, ñúraüraübei lanügüniwa yágüta siélu lídan larúeijan Búngiu. Ánjeinti le ñüdüñbei láu sún buri gumádi lídan lúaragun, ítara gíñe larúfudajan, weírubei lanügüniwa yágüta siélu.

²⁰ Naríñajare jun luágu ánjein lan mabuídun ligáburu jóuserun sarágu weíyaasu jaweí arúfudajatiña lilúrudun Moisés, jáma fariséogu, mebélubadün lídoun larúeijan Búngiu siélu.

Larúfudajan Jesúsu luágu igáñi
(Lc 12.57-59)

²¹ ‘Agáamba jumáali luágu aríñawagúa lán meja joun binádu jagübürigu lun máfarajan jamá, ladüga furúmieguaügü lan le áfarajati, lagúseragüdüwaba.

²² Wel, naríñajare jun luágu furúmieguaügü lan le agáñiduti lúma gürígia líledi lagúseragüdüwaba. Le anábuti gürígia líledi lagúseragüdübei luweírín-ágei lúrudu, le aríñaguti lun gürígia líledi, “íbídiougua táu”, luáguñein üma lun máfiougatin.

²³ Ítara líña lubeíti, ánjein banüga bedéweejan luágun lání Búngiu latárü, báu ñi ába barítaguni luágu níjein lan cátei lídan furúmieguaügü gürígia bubá,

²⁴ Ígirabeí le lúnbei bedéweejani ñi ligíbugiñe latárü, ábame bídin aráandara lúma gürígia ligía. Lárigiñemeti, gayáraajalíme bagíríbudun luágun latárü íchigei bedéweejan.

²⁵ ‘Ánjein abúseera ában gürígia lanügünibu ligíbugiñoun lúrudu, belúba lídoun úarani lúma luágu jeíbuguniwagu lueí ledéregerunibu lun agúseragüdüti, ledéregerabume agúseragüdüti lun polisía, ábame badaürün.

²⁶ Ninárün báu, máfuridunbadibu ñígiñe darí bafáyeiruni lagúmujoún gáwanün.

Larúfudajan Jesúsu luágu adultériu

²⁷ ‘Agáambaadün luágu aríñawagúa lán meja. “Magámarida jumá jámari ámu, adultériu líra.”

²⁸ Áu naríñajare jun luágu furúmieguaügü lan le awámadirutu ában würi, adügaali adultériu túma tídan lanígi.

²⁹ ‘Ánjabu lubeíti lafígoungüda bágu le lueígiñebei boúnwenren, sagábei, fíbei díse, buítimaati lun beféridirun ában lídaangiñe umégeguni le buágubei sügü láu bídin láu sun búgubu máfiougatin.

³⁰ Ánjein bújabu lubeí le boúnwenren afígoungüdübadibu, dürübei, fíbei díse, buítimaati lun leféridirún ában lídaangiñe umégeguni le buágubei sügü láu bídin láu sun búgubu máfiougatin.

Larúfudajan Jesúsu luágu ígiraguni
(Mt 19.9; Mr 10.11-12; Lc 16.18)

³¹ ‘Aríñawagúati meja gíñe luágu furúmieguaügü lan le ígirutu lúmari lúnti líchugun gárada lánina ígiraguni tun.

³² Áu naríñajare jun luágu furúmieguaügü lan wügüri ígirutu lúmari, ánjein máma lubeí ladüga tagámaridun ligíbuagun, ába taganoún lúma ámu wügüri, adügagüda lumútu furúmiñeti wügüri adultériu. Le gíñe agámaridutu würi ígiraguaaru ladügüña gíñe adultériu.

Larúfudajan Jesúsu luágu áfiñuruni

³³ ‘Agáambaadün gíñe luágu aríñawagúa lán meja joun binádu agübürigu lun jagúnfulirun láu le jaríñagubei láu áfiñuruni ligíbugiñe Búngiu.

³⁴ Áu naríñajare jun luágu moún lumuti lan jáfiñurun ni ca uágu—ni luágu siélu ladüga ñi lan lañúura Búngiu,

³⁵ ni luágu múa ladüga ñi lan líchigei Búngiu lugúdi, ni luágu Jerusalén ladüga ligía lubúrugutebei Warúeite Búngiu le weírígubei,

³⁶ ni luágu jichügü ladüga siñáti ni jájarudagüdün ni jáuridagüdün ában ídiburi.

³⁷ Aríñagarügü jumá “ánja” o “uá”, máfiñurunga ni ca uágu, ámu cátei lueí líra lúmagiñeti Máfia.

*Larúfudajan Jesúsu luágu láguyugüdüniwa wuríbani
(Lc 6.29-30)*

³⁸ ‘Agáambaadün luágu aríñawagúa lán meja. “Águu luágu águu, ári luágu ári.”

³⁹ Áu naríñajare jun lun máguyugüdün jumá wuríbani luágu wuríbani, lubáragiñe líra, ánjein íchiga mútu agúfudein luágu ában louba jigíbu, rúya jumeí le ában oúbaü lun.

⁴⁰ Le áluguti lanügünün ligíbugiñoun lúrudu tueígiñe jisímisin, ígira jumeí lun gíñe lanügünun jabíte.

⁴¹ Ánjaün lafósura ában gürígia lun janügün ában anügüni ában máili, barújumei bián máili.

⁴² Furúmieguarügü le amúriajati ában cátei júma, rújumei lun, míchiga jumeí gíñe janágun luágun le afúredeijati júma.

*Ísiñejabuni joun áganiñu
(Lc 6.27-28, 32-36)*

⁴³ ‘Agáambaadün gíñe luágu aríñawagúa lán meja. “Jínsiñelá bumáda bun, liyéreegudame bágani bun.”

⁴⁴ Áu naríñajare jun. Jínsiñe jamá jáganiñu jun, buídulá jayúmajan jabá ja wuríbabei jayúmajan jubá, adüga jumá buíti joun ja iyéreejabúbaña jun, ayúmuragua jumá lun Búngiu jawágu ja anábagubadün, ja wuríbabei oúserunün.

⁴⁵ Ítara lúba jagáburiduña lan queísi lirájüñü Jóguchi Búngiu le siélubei, ligía oúnaja lumúti wéyu joun buítiña jáma wuríbatiña, oúnajaleí júya dándu joun múaraantiña queísi joun úaratiña.

⁴⁶ Ánjein já rügübaña lubeí jínsiñejabúbaña jun ínsiñeda jun, ¿cábago fáyeiti jerésibira luágu líra? Adüga jamúti gíñe ja agúburajabalin liseínsuna gumádi ítara.

⁴⁷ Ánjein jóun rügüñein lubeí jumádagu jayoúragua, ¿ca buíti jadügübei láu líra? Íbini ja ibídiñejabubaña lun Búngiu adüga jamúti líra.

⁴⁸ Úaragua jumá le gumúti queísi úaragua lan Jóguchi Búngiu le siélubei.

6

Larúfudajan Jesúsu luágu ladügün cátei buíti

¹ Ába lasígirun Jesúsu arúfudaja joun gürígia wübüwaügügiñe, laríñaga.

–Toúnigi jumá lueí jadügün cátei buíti jagíbugiñe gürígia lúnrügü jaríjinün. Ánjein jadüga ítara, míchubei Jóguchi Búngiu le siélubei fáyeiti buíti jun.

² Ligía, dánme lubeí jíderagun ában gudémeti, masúbudiragüda jumeí lun sun ubou quei jadüga ja biánguabaña igíbu ligílisirugu lúma úmadarugu. Jagía, jadügüni líra lúnrügü jadímurejan gürígia buídu jawágu. Ninárün jáu luágu láu lan jadügüni líra, ibíja jamáali jafáyeiruája.

³ Dan le jíchugun ában cátei lun gudémeti, masúbudiraleí ni lubuídun-ágei jumáda,

⁴ adüga jumeí lábugiñe libídiñewa. Jóguchi Búngiu le aríjubalin le jadügübei lábugiñe libídiñewa, líchuguba jafáyeiruája.

*Larúfudajan Jesúsu luágu ligáburi ayúmuraguni lun Búngiu
(Lc 11.2-4)*

⁵ ‘Dan gíñe le jayúmuragun lun Búngiu, mítaran jumá quei ja biánguabaña igíbu ja jínsiñebei joun lun jayúmuragun rára tídan jalígilisin juríu lúma lídan legéyedun

üma lun jaríjiniña gürígia. Ninárün jáu luágu láu lan jadügüni líra ibíja jamáali jafáyeiruája.

⁶ Dan le jayúmuragun lun Búngiu, belújuma jirúmurugun, darú jumeíme jubéneri, ábame jayúmuragun lun Júguchi Búngiu le lábuguabei júma ñi. Júguchimeti Búngiu, le aríjubalin le jadügübei lídan límanin, líchuguba jafáyeiruája.

⁷ Lídan le jayúmuragun, mágyuguagüda jumá luágu dimúrei le málati quei jadüga ja ibídiñejabubaña lun Búngiu, jarítaguatiñati luágu lagáambubaña lan Búngiu ladüga líbe jadímurejan.

⁸ Mítaran jumá lubeíti quei jagía, ladüga lubáragiñe jayúmuragun lun Búngiu subúdi láali ca lan jabúseerubei.

⁹ Ítara lúba lubeíti jayúmuragun.

Wáguchi Búngiu le siélubei,
inébewalá bíri.

¹⁰ Nübínlá bidáani lun barúeijan ya uboúagu,
adügüwalá bugúndan uboúagu quei ladügüniwa bugúndan siélu.

¹¹ Rúba fein buídurügütu woun lun wéyu le ugüñebei,

¹² ferúdunabeí wuríbati le adüga wamáalibei quei ferúduna wamániña ja adügübaña wuríbati woun.

¹³ Mígira báwa lun wáburujan lídoun wuríbani,
dísegüdarügü báwa lueí,

ladüga amürü le arúejabei, amürü le Súntibei Gabáfu, amürü le weírigubei lun sun dan. Ítaralá.

¹⁴ ‘Ítara líña lubeíti, ánjaña ferúduna jumá ámu luágu wuríbati le adüga jamáalibei jun, ferúduna lubádün giñe Júguchi Búngiu le siélubei,

¹⁵ ánjein úa ferúduna jumá ámu, úabei giñe ferúduna láani Júguchi Búngiu jifígoun.

Larúfudajan Jesúsu luágu ayúnaruni

¹⁶ Ába laríñagun Jesúsu.

—Jugúya, dánme le jayúnarun, marúfuda jumá lírun igíbu quei jadüga biángua tigíbu, jagía jadügünbalin ítara lun jaríjini gürígia luágu jayúnaruña lan. Ninárün jáu luágu láu lan jadügüni líra ibíja jamáali jafáyeiruája.

¹⁷ Ánjein jugúya, dan le jayúnarun, amúriga jumeí jídiburi, chibá jumeíme jigíbu,

¹⁸ meféen jamámuga gürígia luágu jayúnaruña lan. Júguchirügüba Búngiu le jumabei ñi geféen luágu jayúnaruña lan, ábameti líchugun jafáyeiruája.

Írisini siélu (Lc 12.33-34)

¹⁹ ‘Moúndaragua jumá írisini ya uboúagu le ñí lubei gayára lan jájüchün jamútiri áni gayára ligía lagájüdüñ ámu luwúyeri írisini, le giñe ñíjin lubei gayára lan jebélurun jíwerutiña lun jíwerujan.

²⁰ Oúndaragua jumá írisini siélu, le ñí lubei siñá lan jájüchün jamútiri, magájüdadadi ni cáta, mebélú jagía jíwerutiña íweruja ñi.

²¹ Le ñí lumuti jirisin, ñíñoun giñe janígi.

Lilámpun úgubu (Lc 11.34-36)

²² ‘Ítara líña bágu quei ában lámpu lun búgubu, ánjein lubeíti buídu lubei bágu, aríja ligía luágun írisini siélu, camá jamuga jarúgoungabei giñe láu sun búgubu, áni buídubei giñe sun bigáburi.

²³ Ánjein sánda lubeí bágu, aríja ligía luágun irísini ya ubouágu, camá jamuga lídaanbei lubúriga sun búgubu, áni wuríbabei gíñe bigáburi. Ánjein ñúbin larúgouna le bídaanbei lun lubúrigame, ¡luweírin méfuna líwurin lubúriga ligía!

Búngiu lúma seínsu
(Lc 16.13)

²⁴ ‘Úati ni ában gayáraati lesériwidun joun biáma iyúbudirigu, ladüga lísiñeduba ában jádaangiñe lun, liyéreegudáme le ában lun, úaraguabei lúma ában jádaangiñe, líchigame mebéreseni luágu le ában. Siñáti lesériwidúniwa lun Búngiu lúma lun seínsu.

Toúnigi lumútiña Búngiu lirájüñü
(Lc 12.22-31)

²⁵ ‘Nariñajare lubeíti jun, madíjeri jumá luágu cába lan jeíga o cába lan játa lun jabágaridun, ni tuágu anáanguni to lúnboun jadáurunun. ¿Máfunagi gebégitimaati ibágari sügü láu eígini, gebégi úgubu sügü táu anáanguni?

²⁶ Aríja jumá joun dunúru ja ájamajabaña garábalirugu. mábunagun jáña, malúbajan, mareídun jameí alúbajani lídan lágei, láu sun líra, rúti Júguchi le siélubei eígini joun. ¡Sarágu gebégitima jumá sügü jáu dunúru!

²⁷ ¿Cáteigi jádaangiñe gayáraabei líchugun bián ugúdi lánwoun lúgubu, ca lan lanárimebei láfaagun luágu?

²⁸ ‘¿Ca uágu jadíjerida tuágu anáanguni? Aríja jumá ída líña lan laweínamudun fulúri. láu sun mawádigimari lan, madügün ligía gamísa,

²⁹ ni méja urúei Salomón láu sun luwéndegun, mawéndentí meja ladáüragun quei fulúri.

³⁰ Ánjeinti daüguagüda lubálin Búngiu jíduru ítara le ugúñebei lájücha, jarúgabei yebe lagudúña, ¿gúbumesan líderaguajün loúgua tafíñen jugúya le?

³¹ Madíjerida jumá lubeíti aríñaga. “¿Cába weíga?” o “¿Cába wáta?” o “¿Cába wadáüra?”

³² Gürígia ja lánigu ubou le, luágu rügüñeín buri cátei le jarítagua, ánjein jugúya, níjein júguchi Búngiu siélu le subúdiabúbei cátei lan jemegeirubei.

³³ Seríwi jumá lun Búngiu furúmiñe, áluaja jumeí ibágari surúti le áubei lagúndaara, ábame líchuguni sun le jemegeirubei jun.

³⁴ Madíjerida jumá lubeíti luágu jarúga, ladüga barü lumuti gíñe jarúga lidíjeridüna lúmagua. Ságu ában wéyu gíbeti cátei lun.

7

Míchiga jumá jadúnrun ámu
(Lc 6.37-38, 41-42)

¹ Ába lasígirun Jesúsu aríñaga joun gürígia wübüwaügügiñe.

—Míchiga jumá jadúnrun ámu, míchugun lámuga gíñe Búngiu jidúnrun,

² ladüga quei ligáburi jíchugun jadúnrun ámu, ítara lúba gíñe líchugun Búngiu jidúnrun, le áubei jamísuraja, láuba gíñe lamísurajaün Búngiu.

³ ¿Ída lubásan gayára lan jaríjini liraüraü ífei le lídaanbei lágu jamúlen áni masánda jumúti durúsu le lídaanbei jágu?

⁴ ¿O ída lúba gayára lan jaríñagun lun jamúlen. “Sagánei liraüraü ífei le lídaanbei bágu,” áni níjein ában durúsu lídan jágu?

⁵ ¡Biángua tigibu jugúya le! Sagájumei durúsu le lídaanbei jágu furúmiñe, ítara lúba gayára lan jaríjin buídu lun jaságaruni liraüraü ífei le lídaanbei lágu jamúlen.

⁶ ‘Míchiga jumeí arúfudajani luáguti asálbaruni joun gürígia ja gáñitiña, garábagua jáñein juágun quei óunli lun jágürünün. Míchiga jumeí gíñe

arúfudajani ligía le gebégibei sarágu joun gürígia ja búiurjuduátiña, dügügua jañálin.

Agáamba lumúti Búngiu wamúriajan lúma
(Lc 11.9-13, 6.31)

⁷ ‘Jamúriaja lúma Búngiu, ábame líchugun jun, jáluaja, ábame jadárirun, daúnjuma luágu béna, ábame lánjunrenchún jun.

⁸ Ladüga le amúriajati, abíjati, le áluguti, daríti, le adaúnjati luágu béna, jurénwati lun.

⁹ ‘¿Níjein funági ában jídaangiñe gayáraati líchugun ában dübü lun lisáani dan le lamúriajan fein lúma?

¹⁰ ¿o líchugun lan ában jéwe lun dan le lamúriajan úduraü lúma?

¹¹ Ánjein lubeíti láu lubeí sun wuríba jumá, gíchigaditün cátei buíti joun jisáanigu, igúbuméti líchiga Júguchi Búngiu le siélubei cátei buíti joun ja amúriajatiña lúma!

¹² ‘Súnwandanlá lubeíti jadügün joun ámu quei le jabúseerubei lun jadügüni jun, ladüga ligía lariñagubei lilúrudun Moisés túma jalíburun profétagu.

Bürüraüti lubéneri siélu
(Lc 13.24)

¹³ ‘Belújuma lídaangiñe béna le Bürüraübei. Béna lúma üma le anügübei gürígia lídoun féridi, tuléburi líña, gabáranouga ñi, áni sarágu jáña ebélurutiña lídaangiñe.

¹⁴ Ánjeinti béna lúma üma le anügübei gürígia lídoun ibágari le magúmuchaditi, Bürüraü líña, murúgua, míbetiñati adáriruti.

Luágu cátei le wadügübei lasúbudirúa cátawa lan
(Lc 6.43-44)

¹⁵ ‘Tounigi jumá jaweí yéetiña ja aríñagubaña luágu lerérun lan Búngiu jadímureja. Jayábin jun quei mudún bougudigiñe jabíti, ánjein múnadagiñe, ítara jáña quei anímaalu gáñitiña.

¹⁶ Jugúya, gayáraabei jasúbudiruniña luágu le jadügübei, malúbajoúntu beíbei lídaangiñe jíyu, ni ígo lídaangiñe guríbiyuwa.

¹⁷ Sun lubeíti wéwe le buíti, buíti lin, wéwe le wuríbati, wuríbati lin.

¹⁸ Wéwe le buíti, siñáti wuríba lan lin, wéwe le wuríbati, siñáti gíñe buídu lan lin.

¹⁹ Sun wéwe le mabuídunti lin, chaúnwati, ába lágudúniwa.

²⁰ Jasúbudirubaña lubeíti yéetiña jagía luágu le jadügübei.

Másubaña ebélura lídoun arúejani le siélubei
(Lc 13.25-27)

²¹ ‘Máma sun ja aríñagutiña nun. “Nabúreme, Nabúreme,” jebéluruba lídoun arúejani le siélubei,’ líña Jesús. ‘Ja rügübaña adügübalin lugúndan Nüguchi Búngiu le siélubei ebélura.

²² Dánme lachülürün wéyu lánina agúseragüdüni, sarágubaña aríñagutiña nun. “Wabúreme, Wabúreme, apúrichijatiwa mejátia luágu bíri, sagá wagía espíritugu wuríbatiña lídan bíri, adüga wagía sarágu miláguru lídan bíri.”

²³ Ábamei nariñagun joun. “Ibidiñegubeiñadün nun, díse jumá nueí, jugúya le adüga jumáalibei le wuríbabei.”

Jawúyeri gürígia ja agáambubalin lerérun Búngiu
(Lc 6.47-49; Mr 1.22)

²⁴ ‘Le agáambutina, adügaleí le nubeíbei, ítara líña quei ában wügüri gunfaráandati le adügübei lúban ligíbuagu dübü.

²⁵ Ába liábingua júya, ába liñúrun dúna, fúgua garábali tuágun múna tugúya, meíguaduntu ladüga luáguñein lan dübü tuágaburi.

²⁶ Ánjeinti le agáambutina, madügün lumúti le nubeíbei, ában wügüri ibídiougua táu ligía, le ábunagubei ligíbuagu ságoun.

²⁷ Ába liábingua júya, iñúra dúna, fúgua garábali tuágun múna tugúya, ¡ma lanárime táburujan!

²⁸ Dan lásurun ladímurejan Jesúsu, ¡ma luweírin janígi gürígia láu le larúfudajabei!

²⁹ ladüga láu lan ubáfu larúfudaja, máma quei arúfudajatiña lilúrudun Moisés.

8

*Lareídaguagüdün Jesúsu ában gawáuti gumeín le mareídaguadibei
(Mr 1.40-45; Lc 5.12-16)*

¹ Dan le larárirunbei Jesúsu lueígiñe wübü, sarágu jáña gürígia afálaruti.

² Ába liábin ában wügüri gawáuti gumeín le mareídaguadibei, ába lájuduragun ligíbugiñe Jesúsu, ába laríñagun lun.

—Nabúreme, ánjabu busén, gayáraati bareídaguagüdünina.

³ Ábati lagúurun Jesúsu luágu láu lújabu, aríñageina ligía.

—Buséntina, areídaguagüda numútibu.

Quei laríñagun ítara, ába lareídagun sánditi ligía.

⁴ Ába laríñagun Jesúsu lun.

—Maríñaga beítia ni ca un, ñüdünrügübá arúfudagua búngua lun fádiri, rubeíme edéweejani le uágubei laríñaga Moisés, lun jaríjini gürígia luágu areídaguadibu lan.

*Lareídaguagüdüni Jesúsu lumúsun ában gumándan Rómana
(Lc 7.1-10)*

⁵ Dan le lebélorun Jesúsu lídoun fulásu le gíribei Capernaúm, ába liábin ában gumándan Rómana lubároun,

⁶ ába layúmuragun lun ítara.

—Nabúreme, níjein numúsun roun láu sándi le derégüdaü, lúma sarágu gáriti luágu.

⁷ Ába laríñagun Jesúsu lun.

—Neíbuga agáranija lun.

⁸ Ába loúnabun gumándan.

—Nabúreme, madünatina lun bebélurun núbiñoun, aríñagarügübeí dimúrei, ábame lareídagun numúsun.

⁹ Naríñagubaalin líra ladüga nugúya lábugiñeñadina gíñe gumádi le íñutimaati, áni añájein gíñe súdaara lábugiñe nagúmadijan. Dan le naríñagun lun ában jádaangiñe lun lídin, ñüdünti, dan le naríñagun lun ában lun liábin, ñübinti, dan le naríñagun lun numúsun lun ladügün furúmieguaügü cátei, adüga lumúti. Ítara lúba, luágu berérun mósu lídin sándi lueí numúsun.

¹⁰ Dan le lagáambunbalin Jesúsu le laríñagubei gumándan ligía ába laweíridun lanígi, ába laríñagun joun ja afálarubalin.

—Nínárün jáu luágu madárigidina lan wügüri weíri tafiñen ni jádan numútuniña Israelítagu quei wügüri le.

¹¹ Naríñajare jun luágu sarágujaba lan já meja ibídiñejabubaña lun Búngiu ñübintiña lueígiñe oubaü le ñígiñe lubeí laboucha wéyu, jáma le ñígiñe lubeí lálüda, ábame jañúurun eíga lúma Abrahám, Isáac lúma Jacób lídan arúejani le lánina siélu.

12 Ánjeinti já yebe lúnbaña lídan jamá arúejani ligía jaságarúba bougudín, ábame jádarúniwa lídoun luweírín-ágei lubúriga, ábame jayájuajan, ábame lacúnrinjan jári le luweírín jagárigu.

13 Ába laríñagun Jesúsu lun gumándan ligía.

—Beíba búbiñoun, le uágubei bafíñera, ladügüba bun.

Ába lareídagun músu ligía lídan óra ligía.

*Lareídaguagüdünnun Jesúsu límenidi Pédro
(Mr 1.29-31; Lc 4.38-39)*

14 Ába lídin Jesúsu lúbiñe Pédro, ába ladárirunun límenidi Pédro roun láu abíruaü.

15 Ába lagúurun luágu tújabu, ába lagídarun abíruaü tueí, ába tásaarun, ába tagúmeserun esériwidaña.

*Lareídaguagüdünnun Jesúsu sarágu sánditiña
(Mr 1.32-34; Lc 4.40-41)*

16 Dan le lagúñedunbei, ába janügün sarágu gürígia ja gawágutiña espíritugu wuríbatiña lun Jesúsu, ába laságajaniña espíritugu wuríbatiña jagía jaweí láurügü ában dimúrei, areídaguagüda láña sun ja sándibaña.

17 Lasúseredunbei sun le lun lagúnfulirun lé meja uágubei ladímureja proféta Isaías dan le laríñagunbei luágu Jesúsu. “Barü lumuti wadébilin, gidálei wasándigu.”

*Já yebe abúseerubaña jafálaruni Jesúsu
(Lc 9.57-62)*

18 Dan le laríjin Jesúsu luágu sarágu jáña lan gürígia geyégu láu, ába líchugun dimúrei lun jájiñuragun ligía jáma láni disípulugu loubáfurugun dúna.

19 Ába layárafadun ában arúfudajati lilúrudun Moisés lun Jesúsu, ába laríñagun lun.

—Maésturu, buséntina nafálarunibu le ñíjin lumúti bídin.

20 Ába loúnabuni Jesúsu.

—Darítiña gasígamu júyu lun jaganoun ñi, gádibutiña gíñe dunúru, ánjeinti áu le Wügüri Garaüwarügüti, madáritina ni jalíaba lan nabálachagüdei nichügü.

21 Laríñaga ában jádaangiñe láni disípulugu lun.

—Nabúreme, buséntina nafálarunibu, lárigiñeme loúnwen nóguchi, buná neíme, ábame nafálarunibu.

22 Ába loúnabuni Jesúsu.

—Falábana guetó, ígira báña ja jiláñubaña lun cátei le lánina larúejan Búngiu lun jábununiña jegéburu.

*Lagálumaruni Jesúsu garábali lúma lugúdi barána
(Mr 4.35-41; Lc 8.22-25)*

23 Ába ládinun Jesúsu tídoun ugúnein, ába jóúdin láni disípulugu lúma.

24 Sódini ába láfuragun ában garábali jéreti, ába lebélujan lugúdi barána tídoun ugúnein. Larúmuguñati Jesúsu.

25 Ába jagágudajani láni disípulugu, ába jaríñagun lun.

—¡Wabúreme, séfu báwa! ¡Wadíbiragua!

26 Ába loúnabuniña.

—¿Cásan uágu janúfudeda? ¡Loúgua tafíñen jugúya le!

Ába lásaarun, ába ladeínjan lun garábali lúma barána, ába lagálumadun.

27 Ába laweíridun janígi, ába jaríñagun.

—¿Cáteisan wügüri le, agáamba lubálin garábali lúma barána?

*Laságarun Jesúsu espíritugu wuríbatíña jádaangiñe bián wügüríña Gadárana
(Mr 5.1-20; Lc 8.26-39)*

²⁸ Dan le lachülürün Jesúsu loubáfurugu dúna, jageíroun Gadárana, ába jáfuridun bián wügüríña lídaangiñe buri umúajaü achigíti luágu dübü, ába jayábin luágun. Biángubei jagía, jáuñanu espíritugu wuríbatíña áni janárimetiti jagáñi darí lun siñá lan jásügürün gürígia lídaangiñe üma ligía.

²⁹ Ábati jagúarajan ítara.

—¿Cásan uágu bemétera wámoun, Jesúsu Liraü Búngiu? ¿Biábiña asúfuriragüdawa lubáragiñe dan le lánina asúfuriruni?

³⁰ Ñíñanu sarágu büüruju eíga madíse ñígiñe,

³¹ ába jayúmuragun espíritugu wuríbatíña ja lun Jesúsu, jaríñaga lun.

—Ánjawa baságara, ígirabá lun webélurun jádoun büüruju ja.

³² Ába laríñagun Jesúsu joun.

—¡Jeíbati jádoun!

Ába jáfuridun espíritugu wuríbatíña jagía jádaangiñe wügüríña jagía, ába jebélurun jádoun büüruju, ába jáguragun büüruju jagía joúngua lueígiñe ában gudúngu, ába jáburujan dúnarugun, ába jañáradagun.

³³ Ába janúfudedagun ja oúnigirubaliña büüruju, ába jeíbaagun, jachülün aüdübü, ába jabájüdaguni le asúseredubei joun büüruju lúma joun wügüríña já buga jáubaña espíritugu wuríbatíña.

³⁴ Ábati jayábin sun lílana fulásu ligía lúmoun Jesúsu, ába jayúmuragun lun lun láfuridun jageíragiñe.

9

*Lareídaguagüdüün Jesúsu ában wügürí derégüdaali
(Mr 2.1-12; Lc 5.17-26)*

¹ Ábati ládinun Jesúsu tídoun ugúnein tugúya, ába lánjiñuragun loubáfurugun dúna, ába lachülürün lageíroun.

² Ába janügün ában wügürí derégüdaali lun, roun tídan lubárari. Dan le laríjinbalin Jesúsu luweírín jafiñen, ába laríñagun lun sánditi ligía.

—Ragúba gurásu, niraü, ferúdunawati bifígoun.

³ Ñíñanutí jádaangiñe arúfudajatiña lilúrudun Moisés, aríñagutiña joúnguarügü. “Lanábaguñeigan wügürí le Búngiu láu dimúrei le laríñagubei.”

⁴ Queítí subúdi lubálin Jesúsu le uágubei jasáminara, ába laríñagun joun.

—¿Cásan uágu luríbanbei jisáminan ítara?

⁵ ¿Cátimasan ménreengúnbei laríñawagúniwa. “Ferúdunawati bifígoun”, ódi “Sarába, beíbuga”?

⁶ Narúfudaaliti jun luágu gabáfu nan, áu le Wügürí Garaüwarügüti, lun ferúduna nan figóu.

Ába laríñagun lun sánditi ligía.

—Sarába, budáboun bubárari, beíba búbiñoun.

⁷ Ába lásaarun sánditi ligía, ába lídin lúbiñoun.

⁸ Dan le jaríjinbaalin gürígia cátei le, ába laweíridun janígi, ába jadímurejan buítí luágu Búngiu luágu líchuguni ubáfu le joun wügüríña.

*Lagúarun Jesúsu lun Matéo lun lánime disípulu
(Mr 2.13-17; Lc 5.27-32)*

⁹ Ába lídin Jesúsu ñígiñe, ába laríjinina, áu le gíríbei Matéo, le abürüjabarun líburu to. Agúburajatina meja liseínsuna gumádi, ñun níña lídan nubára lánina agúburajani wéyu ligía dán le lásügürünbei Jesúsu ñígiñe. Ába laríñagun nun.

–Falábana, queímoun núma queísi náni disípulu.

Ába násaarun, ába nafálaruni.

¹⁰ Lárigiñe, ñun líña Jesúsu eíga, sarágu jáña giñéti ja agúburajabalin liseínsuna gumádi jáma ámu gafígountiña eíga lúma úara jáma láni disípulugu.

¹¹ Dánti le jaríjini fariséogu cátei le, ába jaríñagun joun láni Jesúsu disípulugu.

–¿Ída liñásan leíginbei jumáesturun jáma agúburajatiña liseínsuna gumádi lúma jáma ámu gafígountiña?

¹² Ába lagáambuni Jesúsu, ába laríñagun joun.

–Ja magádiebaña mabúseeruntiña surúsia, ja sándibaña, jagía busénbaña surúsia.

¹³ Furéndeí jumeí ca lan laníchigubei le uágubei laríñaga Búngiu tídan Lerérun. “Buséntina lun gudémejabu jumá, máma lun jadágaragüdün anímaalu nun.” Máma niábiña áluajaña ja magádiebaña ligíbugiñe Búngiu, niábiña áluajaña gafígountiña lun jasáansiruni ligáburi jouserun.

Jálügüdüni Jesúsu libügürü ayúnaruni

(Mr 2.18-22; Lc 5.33-39)

¹⁴ Ábati jayábin ja láni Juan le abásteragüdajabei disípulugu, ába jaríñagun lun Jesúsu.

–¿Ánsan wagía jáma fariséogu ayúnara wabeí sarágu, ánjaña báni disípulugu mayúnaruntiña?

¹⁵ Ába líchuguni Jesúsu jémpulu le joun luágu iséri larúfudajan lúma binádu, laríñaga.

–¿Gayáraati funági jíruñu jamá ja amísurajoúbaña lídoun ában maríei dan le niján lan adári jáma ñi? Lachülürüba wéyu lun lúadun adári jáma, ligíaalime jayúnarun.

¹⁶ ‘Siñáti táfadajoún gamísa ñulújaru táu murúsun to derégiru ladüga dánme le tacháwaragun to derégiruboun ábame tajeíridagun to ñulújaruboun, ábatimámeti laweíridun jeíríti.

¹⁷ Siñáti giñe léserúniwa bínu le isérigili lídoun guéru le binádujali, ánjein adügüwa ítara, ábame lafaünchün guéru dánme le liñúrun bínu, féridiwa ligíameti guéru, féridiwa bínu. Ligía lúnti lubeí léserúniwa bínu iséri lídoun guéru iséri, ítara lúba lesériwidun biángubei.

Liraü Jáiro túma würi to agúurubarun lanáangun Jesúsu

(Mr 5.21-43; Lc 8.40-56)

¹⁸ Dan ñíñein lan Jesúsu arúfudajei sún buri cátei le, ligía liábin ában ábuti jádaangiñe juríu, ába lájuduragun ligíbugiñe, ába laríñagun lun.

–Sun líña touñwen nisáani, ánjabu ñüdüñ lun bíchuguni bújabu tuágu, táguyuguba.

¹⁹ Ába lásaarun Jesúsu, ába lídin lúma ñi jáma láni disípulugu.

²⁰ Ñíñounti ában würi úmada sánditu, dúusu irúmu táu láu lésejan jítaü tídaangiñe, ába tayárafadun lun Jesúsu lanáangiñe, ába tagúurun luágu táru lanáangun,

²¹ taríñaga túnguarügü. “Láurügü nagúurun tuágu lanáangun nareídaguba.”

²² Ába lagáragun Jesúsu, ába laríjinun, ába laríñagun tun.

–Ragüba gurásu niraü, areídaguaadibu ladüga bafíñen.

Lúmagiñe óra ligía ába tareídagun.

²³ Dan le lachülürün Jesúsu lúbiñoun buga ábuti ligía, dan le laríjiniña íñaajatiña aráanseña lun ábunajani, añája gürígia areíncha,

²⁴ ába laríñagun joun.

—Furíjuma yágiñe, moúnwengiru irájü to, tarúmuguña.

Ába jéjerajan láu.

²⁵ Dan le furígüda láaña sun gürígia, ába lebélorun, ába lárügüdüni tújabu irájü tugúya, ába tásaarun.

²⁶ Ába labúruchagun luágu le asúseredubei lídan sun fulásu ligía.

Lareídaguagüdün Jesúsu bián maríjintiña

²⁷ Dan láfuridun Jesúsu ñígiñe, ába jóudin bián wügüriña maríjintiña lárigi, agúarajeina ítara.

—¿Gudéme wamá bun, amürü le ladügawagun Davíd!

²⁸ Dan lebélorun Jesúsu múnadoun, ába jachülürün maríjintiña jagía lúmoun, ába laríñagun joun.

—¿Afiñetün luágu gayára lan nareídaguagüdünün?

Ába jaríñagun.

—Ánja, afiñetiwa, Wabúreme.

²⁹ Ába lagúuruni Jesúsu jágu, ába laríñagun joun.

—Ítaralá quei ligáburi jafíñen.

³⁰ Ába léfegechun jágu, ába léredun Jesúsu jawágu lun jóuchun lun masúbudirúniwa lan luágu ligía lan agáranijabei joun.

³¹ Quei jáfuridun ñígiñe, ába jabájüdaguni le ladügübei Jesúsu lídan sun fulásu geyégua láu.

Lareídaguagüdün Jesúsu ában meréngaditi

³² Dan le áfurideina jamá, ligía jayábin fiú gürígia láu ában wügüri meréngaditi, gawáguti ában espíritu wuríbati, ába jayábin láu lun Jesúsu.

³³ Lárigiñe laságaruni Jesúsu espíritu wuríbati ligía lueí meréngaditi ligía, ába lagúmeserun adímureja. Ába laweíridun janígi gürígia, ába jaríñagun.

—Maríjiñajágidiwa líbe le jageíra Israelítagu.

³⁴ Jaríñagaídan sun fulásu geyégua ti fariséogu luágu láu lan lubáfu Máfia le jábuti espíritugu wuríbatiña laságaja Jesúsu espíritugu wuríbatiña.

Lugúdemejabu Jesúsu joun gürígia

³⁵ Eíbuga lumúti meja Jesúsu sun fulásu arúfudajeina tídan jalígilisin juríu, apúrichijeí ugánu buíti luáguti arúejani le lánina siélu, areídaguagüdeina sun luwúyeri sándi lúma gáriti.

³⁶ Dan laríjiniña gürígia, ába jagúdemedagun lun, ladüga nidíjeri jamá, magúraasun jagía, camá mudún ja moúniritiña.

³⁷ Ába laríñagun joun láni disípulugu jabügürü gürígia jagía.

—Sarágu jáña gürígia buséntiña jagáambuni ugánu luáguti asálbaruni, ítara jáña quei nádü lun lalúbajoún, áni loúguatiña ñadágimeintiña.

³⁸ Lúnti lubeíti jamúriajan lúma Labúreme nádü lun loúnajan ñadágimeintiña lun japúrichijan joun.

10

Láni Jesúsu dúusu disípulugu (Mr 3.13-19; Lc 6.12-16)

¹ Ába lagúarun Jesúsu joun dúusu láni disípulugu, ába líchugun ubáfu joun lun gayára lan jaságajan espíritugu wuríbatiña jaweí gürígia lúma lun jareídaguagüdün sun luwúyeri sándi lúma gáriti.

² Niján jiri dúusu láni Jesúsu disípulugu jagía. Furúmiñeti, Simón le méme giribei Pédro, lúma Andrés le lamúlen, Jacóbo lúma Juan le lamúlen—lirájüñü Zebedéo,

³ Felípe, Bartolomé, Tomás, núma, áu Matéo le agúburajabeí meja liseínsuna gumádi, Jacóbo le liraü Álfeo, Lébeo, le méme giribei Tadéo,

⁴ Simón—ában meja wügüri áfaaguti lun jawáanserun juríu, lúma Júdas Is-caríote, le alúgurubalin Jesúsu.

*Loúnajaniña Jesúsu disípulugu apúrichija
(Mr 6.7-13; Lc 9.1-6)*

⁵ Dan loúnajabaliña Jesúsu dúusu ja apúrichija, ába laríñagun joun ítara. —Mídin jumá le ñí jamuti ja mámabaña juríu, mebélú jugúyame lídoun buri fulásu le láni Samária,

⁶ jabügürülá gürígia féridijaña ja Israelítagu jídin.

⁷ Jeíba, apúrichijeina luágu yaráfaali lan larúeijan Búngiu.

⁸ Areídaguagüda jumáña ja gawágutiña gumeín luágu jára, jáma ja gawágutiña ámu luwúyeri sándi, sarágüda jumá jiláaña, sagá jumaña espíritugu wuríbatíña. Mafáyeijántün lun jibíjini ubáfu le, magúburaja jumá gíñe luágu.

⁹ ‘Manüga jumá seínsu,

¹⁰ manügün jugúyame lágei ni cáta. Ábanrügütá simísi janüga, manügün jugúyame sabádu ni bádun, ladüga le ñadágimeinbei garíchatí lun leígin lídaangiñe luwádigimari.

¹¹ ‘Dánme le jachülürün lídoun ában ubúругu o ában lan liraüraü fulásu, ábame jálugun gürígia ja ánjatiña lun jerésibirunün ñí, ábame jeréderun jáma jábiñe darí jídin.

¹² Dánme jebélurun tídoun ában múna, ábame jabúsurun, ayúmuragueina magádiei jawágu tílana múna tugúya.

¹³ Ánjaün jerésibira tílana múna tugúya, ígira jumeí jabúsurun jáma, ánjaün merésibirun jamá, giríbugüda jumeí busúguaü ligía lun úa lan magádiei joun.

¹⁴ Ánjaünti merésibirun jamá, mája jagía jagáambunün, ábame jáfuridun tídaangiñe múna tugúya o lídaangiñe lan fulásu ligía, ábame jáfuruduni calíqui lueígiñe jugúdi lun jarúfuduni luágu mabuídun lan jagáburi gürígia jagía, ígira jumáña quei jadáriragun jóungua.

¹⁵ Ninárün jáu luágu dánme lan le lachülürün wéyu lánina agúseruni, weírítimaabei jasúfurirun lílana fulásu ligía sügü láu jasúfurirun lílana Sodóma lúma Gomórra.

Eíbaajoüni le lúnbei jasúfuriruni láni Jesúsu disípulugu

¹⁶ ‘Noúnajaadüntia quei mudún jagánaguóún anímaalu gáñitiña. Aráanseñu jumá lubeíti ítara quei jéwe, áni ítara jumá quei únjun madügünga wuríbani.

¹⁷ Toúnigi jumá ladüga j juríu.

¹⁸ Janügüwaba jagíbugiñoun gumádimatiña lúma jagíbugiñoun urúeigu lueígiñe jesériwidun nun, ítara lúba gayára lan jadímurejan nuágu jagíbugiñe, lúma jagíbugiñe ja mámabaña juríu.

¹⁹ Dánme le jedéregérúniwa joun lúrudugu, májüchüra jumá luágu cába lan jaríñaga o ída lúba lan jaríñaguni, ladüga dánme lachülürün óra lun jadímurejan, líchugubei Búngiu le lúnbei jaríñaguni jun.

²⁰ Mámaba jugúya adímureja, láni Júguchi Búngiu Espíritu, ligíaba adímureja jídaangiñe.

²¹ ‘Jalúgurubaña wügüriña jabíriña guánarü lun jafarún jilágubei, alúgura jamáñame agübürigu jasáanigu, garábagua jagíame isáanigu jawágun jagübürigu lun jáfaragüdüniña.

22 Jeyéereegudúba lun sun ubouú nueígiñe, áni le derégüdaguati darí lúmoun lagúmuchun libágari, lebéloruba siélun.

23 Dánme le jeibaajoún lídan ában fulásu, ábame janúrajan lídoun ámu, ninárün jáu, niábinyaba, áu le Wügüri Garaüwarügüti, lubáragiñe jeíbuguni sún buri jabúrugute Israelítagu.

24 ‘Úati disípulu íñuguti lueí lumáesturun ni músu lueí liyúbudiri, ánjana asúfurira, lúnti gíñe jasúfurirun.

25 Lúnti gúndan lan disípulu láu lachülürün ítarada quei lumáesturun, lúma músu quei liyúbudiri. Ánjein aríñawagúa lubeí nuágu luágu jábutiná máfianu, gúbume janábawagua ja afálarubalina.

Cába lan ueí lanúfudedúa

(Lc 12.2-9)

26 ‘Ligía manúfudeda jumá lubeí jaweí gürígia,’ líña Jesúsu joun láni disípulugu lubáragiñe loúnajaniña apúrichija. ‘Úati cátei darúguati láu lun machülaagunbei lan, úa ni cáta le arámudagúati lun masúbudirúnwabei lan.

27 Le nariñagubei jun lídan lubúriga aríñaga jumeí lídan larúgounga, le nariñagubei jun ibídiñoun joun ámu, wágua jumeí íñugiñe tibíti múna.

28 Manúfudeda jumá jaweí ja gayáraabei jáfaruni úgubu jilágubei áni siñáti jáfarunun uwáni, Búngiu le gayáraabei lasúfuriragüdüni úgubu túma uwáni máfiougati lun sun dan, ligía lúnbei janúfudedun lueí.

29 ‘¿Malúgurúntiña funági bián jarájüñü dunúru luágu ában liraüraü seínsu? Áni máburujantu ni ában jádaangiñe múarugun ánjein mabúseerun lubeí Júguchi Búngiu.

30 Ásta ídiburi le jábulugubei, abájüdüwati ában ában.

31 Manúfude jumá lubeíti, gebégitün sügü jáu dunúru.

Ja mayéedagúnbaña láu Jesúsu jagíbugiñe gürígia

(Lc 12.8-9)

32 ‘Sun ja arúfudagutiña jóungua jagíbugiñe gürígia luágu númagiñeñánu lan, nariñaguba gíñe ligíbugiñe Núguchi Búngiu le siélubei luágu nánigu jamá.

33 Ja ayéedagutiña náu jagíbugiñe gürígia, nayéedaguba gíñe jáu ligíbugiñe Núguchi Búngiu le siélubei.

Le busénbei lun lafálaruni Jesúsu

(Lc 12.51-53, 14.26-27)

34 ‘Marítagua jumátia luágu niábiña lan lúnrügü níchugun gáluma ubouágu, máma niábiña íchiga gáluma, niábiña íchiga wuríbu.

35 Láu niábin, jafánreinraguba ja mafiñebaña nuágu jáma ja afíñebaña nuágu, lawúribujaba wügüri lúma lúguchi, isáani túma túguchu, ídiñu túma tágürü,

36 lagáganiraguba cáda ában jáma lidújeñu.

37 ‘Le jínsiñejabuti lun lúguchi o lúguchu sügü láu nísíñe lun, madüna lumúti nánigu lan, le jínsiñejabuti joun lirájüñü sügü láu nísíñe lun, madüna lumúti gíñe nánigu lan.

38 Le mawándunti asúfuriruni líbe lasúfurirúniwa luágu gurúwa lun lafálarunina, madüna lumúti nánigu lan.

39 Le busénbei leséfuragun lúngua ya ubouágu leféridirubei ibágari le magúmuchadibei siélu, ánjein le ánjabei leféridiragun lúngua ya ubouágu nueígiñe, libíjubei ibágari magúmuchaditi siélu.

Ja lúnbaña jerésibiruni jafáyeiruaja lúmagiñe Búngiu

(Mr 9.41)

40 'Le erésibirutün resíbi lumútina, le erésibirutina resíbi lumúti le oúnajabalina.

41 Le erésibiruti ában proféta ladüga liábin láu líri Búngiu, lerésibirubei afáyeiruajaü le libíjubei ában proféta, le erésibiruti ában wügüri buíti ladüga lubuídun, lerésibirubei afáyeiruajaü le lerésibirubei ában wügüri buíti.

42 Furúmieguarügü le íchuguti ában wéru dúna dilíti lun ában jádaangiñe ünabugutiña ja ladüga nánigu jamá, libíjuba lafáyeiruaja lúmagiñe Búngiu.

11

Ja loúnajabaña Juan le abásteragüdejabei adímureja lúma Jesúsu (Lc 7.18-35)

1 Dan le lásurunbei laríñaguni Jesúsu le lúnbei jadügüni láni disípulugu, ába lídin ñígiñe lun larúfudajan, apúrichija ligíame lídan buri fulásu geyégua láu ubúrugü le Capernaúm.

2 Dan ligía, furísunruguñein Juan, ába lagáambun luágu sun le ladügübei Crístu.

3 Ába loúnajan biáma jádaangiñe láni disípulugu aríjei Jesúsu lun jálügüdüni ítara.

—¿Amürü Crístubei le lúnbei liábin ódi lúnti wagúrabajan ámu?

4 Ába laríñagun Jesúsu joun.

—Jeíba jaríñageime le jaríjubei lúma le jagáambubei lun Juan.

5 Jabájüdagüame lun luágu aríjaaña lan já meja maríjinbaña, eíbuga já meja meíbugunbaña, areídagua jagía já meja gawágubaña gumeín luágu jára, agáamba já meja magáambubaña, sará jagía jiláaña, apúrichijoúa luágu ugánu buíti le lánina asálbaruni joun gudémetiña.

6 Áni fuleíseiwati le meféridirunbalin lafíñen nuágu.

7 Dan le jóúdin, ába lagúmeserun Jesúsu adímureja joun güriña luágu Juan, ába laríñagun.

—¿Cásan jídinbei meja aríja lídan fulásu le mageírawati? ¿Ában wügüri le medéragüdünti larítangun queísi ában mabúru le lánjingichun garábali?

8 Ánjein máma lubeí líña, ¿cáti jídinbei aríja? ¿Ában wügüri wéndeti ladáüragun? Subúsi jun luágu ja lan wéndeña adáüragun, tídaañanu lan jában urúeigu.

9 ¿Cáteiti jídinbei aríja? ¿Ában proféta? Ánja, ligía, áni ában wügüri weíriguti sügü láu ában proféta Juan.

10 Ligía le uágubei tariñaga Lerérun Búngiu.

Noúnajañein noúnagüle bubáragiñe, lun laráansejani üma bubá.

11 Ninárün jáu, jádan sun güriña, úagili ni ában weíriguti lueí Juan le abásteragüdejabei, láu sun líra, le ünabutimaabei lídan arúejani le siélubei weíritimaati lueí le anügarügübalin ugánu luágu arúejani ligía.

12 'Lúmagiñe dan le liábinbei Juan le abásteragüdejabei darí lúmoun dan le, murúgu jáña güriña áluga jebélurun lídoun larúejan Búngiu. Ja ebélurubaña, ragü jamuti jabára ñi queísi ában cátei le gebégiti sarágu.

13 Lilúrudun Moisés jáma sun profétagu, adímurejatiñá meja luágu larúejan Búngiu, láu liábin Juan, ába lagúmeserun jerérun profétagu jagía luágu larúejan Búngiu agúnfulira.

14 Ánjeinti busén jubeí jafíñerun, Juan ligía proféta Elías lé meja lúnbei liábin lubáragiñe liábin arúejani ligía.

15 Ja garígeirugubaña lun jagáambun, agáamba jamá.

16 ‘¿Cábasan úma núaradaguágüdaña gürígia ja lánina dan le? Magúndaatiña ni ca áu, ítara jáña quei irájüñü ja añúurubaña adíbirija mágidirugu, ába jagúarajan joun jibirigu ítara.

17 “Íñaajatiwa fídu jun, mabínajantün, erémuja wagía urému jírtu jun, mayájuntün.”

18 Ladüga liábin Juan meígin líña buídu quei leígin furúmieguarügü, mátun, ába jariñagun luágu níjein lan espíritu wuríbati lídan.

19 Lárigiñe, ába niábin, áu le Wügüri Garaüwarügüti, jou áu quei leígin furúmieguarügü, gurá, ába jariñagun luágu geígadi nan, gátadi, jamáda áu gafígountiña jáma agúburajatiña liseínsuna gumádi. Wel, ja chúbaña áu, subúdi jamúti luágu buídu lan le ladügübei Búngiu láu lichú láu.

*Lílana buri fulásu ja magáambadibaña
(Lc 10.13-15)*

20 Ábati lagúmeserun Jesúsu adeínja joun gürígia lídan fulásu buri le ñi lubeí meja ladügei líbe-ágei láni miláguru, ladüga masáansirun jamágili lan jóuserun. Ába laríñagun.

21 —¡Fugiábu jugúya Corazínna! ¡Fugiábu jugúya Betsáidana! Lun jamúga lídan lan ubúru le giríbei Tíro lúma Sidón ladügüwa miláguru buri le adügübei jagánagua, binárü jamúga lasáansiragua jagáburi lílana, ába jamúga jarúfuduni láu jadáuragun lúdu lúma balígi.

22 Naríñajare jun luágu dánme lan lachülürün wéyu lánina agúseraguni, weírítimaabei jabeichún sügü jáu ja Tírobaña jáma ja Sidónbaña.

23 Amürüti ubúru le Capernaúm, ¿jarítaguatibu luágu weírígubadibu lan queísi siélu? Maweírígúnbadibu ítara quei maweírígún lan máfiougati. Ladüga lun jamúga lídan lan ubúru Sodóma ladügüwa miláguru le adügübei bídan, níjeingua jamúga fulásu ligía lúmoun dan le.

24 Naríñajare jun luágu lídan lánme wéyu lánina agúseraguni, weírítimaabei jabeichún sügü jáu Sodómana.

*Jigoúgu lun Jesúsu, eméraagua jumámuga
(Lc 10.21-22)*

25 Lídan dan ligía, ába laríñagun Jesúsu lun Búngiu.

—Adímurejatina buíti buágu, Nóguchi le Labúremebei siélu lúma ubou, ladüga barámuduni buri cátei le jaweí chu táu jáma gunfarándatiña, ába barúfuduni joun ja mafúnrendeirungiñábaña queísi irájüñü.

26 Ánja, Nóguchi, ladüga ítara líña lan babúseeruni.

27 ‘Derége láali Nóguchi sun cátei nun. Ibídíñeti Búngiu Irájü ni ca un buídu buídu lueídügüya lun Búngiu Úguchili, ibídíñeti gíñe Búngiu Úguchili ni ca un buídu buídu lueídügüya lun Búngiu Irájü jáma ja únbaña labúseera Búngiu Irájü lasúbudiragüdüni.

28 Jigoúgu númoun, sun jugúya ja bucháañabaña uágu lárigi juwádigimari lúma lijürü janügün, eméraaguagüda námugaün.

29 Resíbi jumeí narúfudajan, furéndei jugúyame númagiñe, láu gagúraasun nan, ñulú tugúya nanígi, ábame jadárirun eméraaguni tun juwáni.

30 Ménreengunti lun jesériwidun nun, juáliti gíñe anügüni le níchugubei jun lun janügüni.

12

*Játünjan disípulugu türígu lídan wéyu le eméraaguagülei
(Mr 2.23-28; Lc 6.1-5)*

¹ Luágu ában wéyu le eméraaguagülei eíbugeina líña Jesúsu jáma láni disípulugu labádinagua nádü. Ába jalámachun láni disípulugu, ába jätünjan lílewe türígu, ába jeígini líla.

² Dan le jaríjini fariséogu cátei le, ába jaríñagun lun Jesúsu.

—Añájatia báni disípulugu adüga wadágimanu le moún lumuti ladügün lídan wéyu le eméraaguagülei.

³ Ába laríñagun joun.

—¿Malíjangidün luágu lé meja ladügübei Davíd luágu ában dan, dan le lálámachunbei, ligía jáma ja úarabaña lúma?

⁴ Ába lebélorun tídoun lúban Búngiu, ába leígin tídaangiñe fein to sagráuboun to moun lubouñ yebe leíginun, ni ligía ni ja úarabaña lúma, fádirigu rügüñanu lun jeíginun fein tugúya según lilúrudun Moisés, áni mámati figou le ladügübei Davíd ligíbugiñe Búngiu.

⁵ ¿Ódi malíjangidün lídan lilúrudun Moisés luágu ñadágimein jamá fádirigu tídan lúban Búngiu lídan wéyu le eméraaguagülei áni máma figou?

⁶ Naríñajare jun luágu níjein lan ában weíriguti sügü táu lúban Búngiu ya, áu.

⁷ Jugúya, úagili gunfaráanda jumáni le laríñagubei Búngiu tídan Lerérun. “Jímein numúti lun gudémejabu jumá sügü láu jadágaragüdün anímaalu nun.” Lun jamúga gunfaráanda jumáni, madímurejaantün jamúga wuríbati jawágu gürígia ja madügünbaña ni cáta wuríbati.

⁸ Gabáfutina gíñe, áu le Wügüri Garaüwarügüti, lun naríñagun cába lan gayára ladügüniwa lídan wéyu le eméraaguagülei.

Wügüri le jiláalibei ában lújabu

(Mr 3.1-6; Lc 6.6-11)

⁹ Ába lídin Jesúsu ñígiñe, ába lebélorun tídoun jalígilisin juríu.

¹⁰ Ñíñein ában wügüri jiláali ában lújabu, queíti busén jamá fariséogu jáma arúfudajatiña lilúrudun Moisés jadárirun lichára Jesúsu, ába jaríñagun lun.

—¿Gayáraatísan lagáranijouñ lun ában sánditi lídan wéyu le eméraaguagülei?

¹¹ Ába laríñagun Jesúsu joun.

—¿Ca jídaangiñe, ánjein galügün lubei ában mudún, ába teíguadun lídoun ában wélu wéyu le eméraaguagülei, lun mídinbei lan aságaroun?

¹² ¡Ma gebégitimaati ában wügüri sügü táu ában mudún! Gayáraati lubeíti ladügün buíti lídan wéyu le eméraaguagülei.

¹³ Ába laríñagun lun wügüri ligía.

—Tulébei bújabu.

Dan le látuleruni, ába lareídagun quei le ában.

¹⁴ Ába jáfuridunga fariséogu, ába jagúmeserun áluaja ída lúba lan jáfaruni Jesúsu jilágubei.

Lé meja laríñagubei Isaías luágu Jesúsu

¹⁵ Dan lasúbudirunbalin Jesúsu cátei le, ába lídin ñígiñe, ába jafálaruni sarágu gürígia, ába lareídaguagüdüniña sun sánditiña.

¹⁶ Ábaja laríñagun joun lun maríñagun jamáni cáteiñein lan.

¹⁷ Lasúseredunbei líra lun lagúnfulirun lé meja laríñagubei proféta Isaías.

¹⁸ Niján numútun le nanúadirubei lun lesériwidun nun, le jínsiñebei nun, le áubei nagúndaara, líña Búngiu.

Níchugubei náni Espíritu luágu,

ábame larúfudajani joun ja mámabaña juríu ída lúba lan gayára lan júaradun nigíbugiñe.

¹⁹ Mageíndagunbei, magúaragun,

mareínjabei ùmada.

²⁰ Gudémejabubei joun gürígia ja gudémebaña queísi ában mabúru le barúguaali, lúma joun ja débilibaña lídan jafíñen queísi ában lámpu le ñegúmemeeli.

Ítara méme lúba daríme adüga láali larúeijan le úaraguabei.

²¹ Ábame jíchuguni ja mámabaña juríu jeménigi luágu.

*Laríñawagún luágu lubáfu lan Máfia lúmabei Jesúsu
(Mr 3.19-30; Lc 11.14-23, 12.10)*

²² Ábati lanügüniwa ában wügüri lun Jesúsu, maríjin líña, madímurejan, láuñein ában espíritu wuríbati. Ába laságaruni Jesúsu espíritu wuríbati lídaangiñe, ába laríjin, adímureja ligía.

²³ Ába laweíridun janígi sun ja ñíbaña, ába jaríñagun.

—¿Niján funásan ladügwagunbei David?

²⁴ Dan le jagáambunbalin fariséogu cátei le, ába jaríñagun.

—Wügüri le, láu lubáfu Beelzebú, le Máfia, le jábuti espíritugu wuríbatiña laságajaña.

²⁵ Quei subúdi láani Jesúsu le jarítagubei, ába laríñagun joun.

—Furúmieguarügü arúeijani le afánreinraguti lun jageíndagun jámagua, lagünrinchaguba, ánjaña gíñe afáreinragua lílana ában ubúругu o ában lan famíliá ladüga wuríbu, siñábei jadúrarun.

²⁶ Ítara líña giñéti, ánjein laságara Máfia máfia guánarügü, ligía guánarügü afánreinragubei, áni ¿ída lubáti ladúrarun lubáfu ítara?

²⁷ Jugúya, aríñagatün luágu láu lan lubáfu Beelzebú, o Máfia, naságaja espíritugu wuríbatiña, ánjein ítara líña lubei, ¿cáti íchugubei ubáfu joun ja jánigu jugúya lun jaságajaniña, Máfia ódi Búngiu? Jagía guánarügü arúfuda jamúti luágu bulíeigua jumá.

²⁸ Áu, láu lubáfu láni Búngiu Espíritu naságaja espíritugu wuríbatiña. Arúfuda lumúti líra luágu chülújali lan larúeijan Búngiu jídoun.

²⁹ ¿Ída lubági gayára lan lebélorun ában gürígia lúbiñoun ában wügüri jéreti lun lanügüni lílagu ánjein magúragun lan furúmiñe? Ítara rügüñein lun gayára lan lanügüni lílagu.

³⁰ Le mámabei númagiñe, náganiñein, le míderagun lumútina, güríngua lumúti le nadügübei.

³¹ Jugúya aríñagatün luágu láu lan lubáfu Máfia naságaja espíritugu wuríbatiña, áni láu lubáfu Sífiri Sándu naságajaña. Ligía naríñagunbei jun luágu gayára lan ferúdunawa lan sun figou lúma sun wuríbati le jaríñagubei gürígia, ánjein lun jadímurejan wuríbati luágu Sífiri Sándu, siñábei ferúdunawa lan figou líra.

³² Furúmieguarügü gíñe le aríñaguti furúmieguarügü cátei wuríbati nuágu, áu le Wügüri Garaúwarügüti, gayáraati ferúdunawa lan, ánjeinti le adímurejati wuríbati luágu lubáfu Sífiri Sándu le nídaanbei, úabei ferúdunawa lan ni lídan ubou le, ni lídan le ában.

*Luágu lin ídibu lasúbudirúa ca lan luwúyeribei
(Lc 6.43-45)*

³³ ‘Ánjein buídu lubei ídibu, buídubei gíñe lin, ánjein mabuídun lubei ídibu, mabuídunbei gíñe lin. Luágu lin ídibu lasúbudirúa ca lan luwúyeribei.

³⁴ ¡Jarásan jéwe jugúya le! Siñáti jadímurejan cátei buíti, wuríbatüngan. Cátei le buínbei tídan anígi, ligía laríñagubei iyúmaü.

³⁵ Wügüri le buídubei, cátei buíti laríñagubei ladüga tídaañein lan lanígi ubuíduni, wügüri le wuríbabei, cátei wuríbati laríñagubei ladüga tídaañein lanígi wuríbani.

³⁶ Naríñajare jun luágu dánme lan lachülürün luwéyuri agúseruni, sun gürígia geféenbaña luágu sun dimúrei málati le jaríñagubei,

³⁷ ladüga luáguba le baríñagubei bagúseragüdüwa, ligíaba arúfudei ánjein gadúnrun bubeí lúmoun madúnrun ban.

*Jamúriqjan gürígia wuríbatiña seíni láuti miláguru
(Mr 8.12; Lc 11.29-32)*

³⁸ Ába jaríñagun jádaangiñe fariséogu jáma arúfudajatiña lilúrudun Moisés lun Jesúsu.

—Maésturu, buséntiwa waríjin badügün ában seíni le láuti miláguru luágu lúmagiñe lan Búngiu biábin.

³⁹ Ába laríñagun Jesúsu joun.

—Gürígia wuríbatiña áni magúnfuliruntiña amúriajatiña seíni láuti miláguru, míchugúnbei ámu seíni joun lueí le asúseredubei lun proféta Jonás.

⁴⁰ Ladüga queí leréderun Jonás ürüwa wéyu ürüwa áriebu lurágeirugu údu, ítara lúba gíñe neréderun, áu le Wügüri Garaúwarügüti, lídan numúaja ürüwa wéyu, ürüwa áriebu, según ligáburi jabájüdüni juríu dan.

⁴¹ Já meja aganóubaña Nínive jásaaruba lídan luwéyuri agúseruni dánme jagúseragüdüniwa gürígia ja lánina dan le, ábame jíchugun jadúnrun ladüga sáansiguati jagáburi Nínivena dan le lapúrichijanbalin Jonás lugánute Búngiu joun, áni anája áu, ában weíriguti sügü láu Jonás, áni májatün jagáambunina.

⁴² Tásaaruba gíñe lurúeitena Súru lídan luwéyuri agúseruni dánme le jagúseragüdüniwa gürígia ja lánina dan le, ábame tíchugun jadúnrun, ladüga ñübintu lídaangiñe lidíse-ágei ubouú lun tagáambuni lichú láu Salomón, áni anája áu, ában weíriguti sügü láu Salomón, áni májatün jagáambunina.

*Espíritu wuríbati le agíribuduti
(Lc 11.24-26)*

⁴³ ‘Dan le láfuridun ában espíritu wuríbati lídaangiñe ában gürígia, ába eíbugañaja lan lídan fulásu mábeiti áluaja leméraagun, dan madári láani, ába laríñagun lúnguarügü.

⁴⁴ “Nagíribuda tídoun núban to ñígiñe lubeí náfurida.” Dan le lagíribudun, ába ladáriruni gürígia buga ligía queísi ában múna to málatu, abuídajoúaarú, aráanserúa.

⁴⁵ Ábati lídin, ába liábin jáu sédü espíritugu wuríbatimaatiña sügü láu, ába jebélurun sun jagía agánawa lídan gürígia ligía, wuríbatimájaliti le gádaanbalin sügü láu meja furúmiñe. Ítara lúba gíñéti lasúseredun joun gürígia wuríbatiña ja lánina dan le.

*Lúguchu Jesúsu jáma lamúlen
(Mr 3.31-35; Lc 8.19-21)*

⁴⁶ Ñígili Jesúsu adímureja joun gürígia, ligía tiábin lúguchu jáu lamúlenu. Ába jeréderun bougudi, buséntiña yébe jadímurejan lúma.

⁴⁷ Ába laríñawagún lun Jesúsu.

—Nuján búguchu jáma bamúlenu ya bougudi, buséntiña jadímurejan búma.

⁴⁸ Ába laríñagun Jesúsu lun le awísarubalin.

—¿Ca nóguchuboun, ca namúlenubaña?

⁴⁹ Ába larúfudun jawágun láni disípulugu, ába laríñagun.

—Añája nóguchubaña, jagía gíñe namúlenubaña,

⁵⁰ ladüga furúmieguarügü le adügüti lugúndan Nüguchi le siélubei, ligía namúlenbei, nítu, nüguchu.

13

*Jémpulu luáguti ábunaguti
(Mr 4.1-9; Lc 8.4-8)*

- ¹ Wéyu ligía, ába láfuridun Jesúsu múnadagiñe, ába lañúurun láru dúna.
² Quei jagibedagun güriía le ñí lubei, ába ládinun tídon ában ugúnein, ába lañúurun, ába jeréderun sun güriía láru dúna.
³ Ába larúfudajan sarágu cátei joun láu jémpulu, ába laríñagun.
 —Ñíñein ában ábunaguti, ába láfuridun ábunagua.
⁴ Lídan afúrujeina láani líla nádü, ába láburojan lídaangiñe luágun üma, ába jayábin dunúru, ába jeígini.
⁵ Líbiri, ába láburojan labádinaguóún dübü le ñí lumuti úa lan sarágu múa, ába labouchun furése ladüga majúlilin lan múa.
⁶ Dan le lásüdün wéyu, ába lásaurün queíti málagüle lan, ába loúnwen.
⁷ Líbiri ílaü, ába láburojan labádinaguóún jíyu, ába laweínamudun jíyu úara lúma, ába láfaruni.
⁸ Ñíñein lídaangiñe, áburujati lídon múa buíti, alúbajóuati buídu, níjein lídaangiñe, íchuguti san águu luágu cáda ában águu, líbiri rúti ürüwa-wein, líbiri daráandi.
⁹ Jugúya le garígeirugubei lun jagáambun, agáamba jumána.

*Ca lan laníchigubei jémpulu le
(Mr 4.10-12; Lc 8.9-10)*

- ¹⁰ Ábati jayábin disípulugu, ába jaríñagun lun Jesúsu.
 —¿Cásan uágu badímureja joun güriía láu jémpulu?
¹¹ Ába laríñagun joun.
 —Jugúya, subúdigüda láali Búngiu sun cátei arámudaguati le lánina larúeijan jun, ánjein jagía, siñáti jasúbudiruni.
¹² Le agúnfuliruti lúma inárüni le lagáambubei, líchugúba lánwoun lun, ánjein le maténirunti lun, gidáwarügübei murúsun larúgounga le lúmabei lueí.
¹³ Ligía nadímurejanbei joun láu jémpulu ladüga aríja jamáni le nadügübei, ába jeréderun camá maríjintiña, agáamba jameí le naríñagubei, ába jeréderun úaga gunfaráanda jamá camá jamuga magáambuntiña.
¹⁴ Jawágu lagúnfulira lé meja laríñagubei proféta Isaías dan laríñagunbei.
 Jugúya, jagáambuba, úabei gunfaráanda jumá,
 jaríjuba, ibídiñebei jun ca lan lílabei le jaríjubei,
¹⁵ ladüga deréeru janígi,
 wuríbaaliti jagáambun,
 murúñu líña jágu,
 lun maríjin jumá láu,
 magáambun láu jarígeirugu,
 úa gunfaráanda jumá táu janígi,
 magáragun jugúyame nun lun nareídaguagüdünün.
¹⁶ Ánjeinti jugúya le nánigubei, fuleíseiwatün ladüga aríjatün láu jágu, agáamba jugúya láu jarígeirugu.
¹⁷ Ninárün jáu, sarágu jañá meja profétagu jáma ámu güriía gúnfulitiña lúma Búngiu abúseerutiña jamúga jaríjinina quei jaríjinina jugúya guetó, maríjin jamútina, buséntiña jamúga meja jagáambuni le jagáambubei jugúya, magáambun jamúti.

*Lafúnraanguagüdüni Jesúsu jémpulu luáguti ábunaguti
(Mr 4.13-20; Lc 8.11-15)*

¹⁸ ‘Agáamba jumeíti le lílabei jémpulu luáguti ábunaguti.

¹⁹ Ja agáambubalin ugánu luáguti arúejani le lánina siélu áni úati gunfaráanda jamáni, itara jáña quei ũma le ídounbei láburuja lídaangiñe líla nádü, ába liábin Máfia, ába laságaruni ugánu buíti le ábunúbei tídaangiñe janígi.

²⁰ Dübü le ñíjin lubeí láburuja ílaü, itara líña quei gürígia ja agáambubalin ugánu, ába jerésibiruni láu ugúndani,

²¹ quei márügüdün lubeí buídu tídan janígi, madúрати jádan. Dánti le lachülürün dan lun jóuchawagún lúma jeíbaajoún lueígiñe ugánu ligía, ába leíguadun jarüna.

²² Jíyu le ñíjin lubeí láburuja ílaü, itara líña quei gürígia ja agáambubalin ugánu, weíritimaati jafúudun luágu cátei le lánina íbágari le, ába leyéeduniña írisini. Sun le, ába láfaruni ugánu tídaangiñe janígi, mígiruntiti lun lalúbajoún jádan gürígia jagía.

²³ Múa buíti le ñíjin lubeí láburuja ílaü, itara líña quei gürígia ja agáambubalin ugánu, ába gunfaráanda jamáni, ába jíchugun ában alúbajoúni buíti. Añájein, itara jáña quei ílaü le íchugubei san águu luágu ában, jíbiri quei le íchugubei ürüwa-wein, jíbiri quei le íchugubei darándi.

Jémpulu luáguti jíduru wuríbati labádinagua türígu

²⁴ Ábaya íchuguni Jesúsu jémpulu le joun.

—Arúejani le lánina siélu, itara líña quei ában wügüri le ábunagubei ílaü buíti lídan lufúlasun,

²⁵ dan añája lan sun ja ñíbaña arúmuga, ába lebélorun ában lágani labúreme fulásu ligía, ába lábunun jíduru wuríbati labádinagua türígu, ába lídin.

²⁶ Dan le laweínamudun türígu ába legélewejan, ába gíñe lachülaagun jíduru wuríbati.

²⁷ Ába jóudin músu, ába jaríñagun lun jayúbudiri. “Wayúbudiri, ánjein buídu lubeí ílaü le bábunagubei bumúanrugu, ¿jalíagiñésan lasálira jíduru wuríbati le?”

²⁸ Ába laríñagun iyúbudiri joun. “Ladüga ában ágani le.” Ábati jaríñagun músu lun. “¿Buséntibu lun wájulajani jíduru wuríbati le?”

²⁹ Ába laríñagun joun. “Uá, ladüga dánme jájulajani jíduru wuríbati, julá jíñein lin gíñe türígu úara lúma.

³⁰ Ígiragubei jumeí lun laweínamudun úara daríme lidáani alúbajani, ábame nariñagun joun ñadágimeintiña lun jájulajani jíduru wuríbati furúmiñe, ábame jagüraguni lun lágudúniwa, lárigiñeme, ábame jareíduni türígu tídan lágei.”

*Jémpulu luáguti tíla mostása
(Mr 4.30-32; Lc 13.18-19)*

³¹ Rúlumuti gíñe Jesúsu jémpulu le joun.

—Ítara líña arúejani lánina siélu quei ában tíla mostása le lábunubei ában wügüri lufúlasunrugu.

³² Tíla mostása, ligía ílaü ñúraütimaabei lídaangiñe sun ílaü, áni dan labouúchun, ligía weíritimaabei lídaangiñe sun nádü, ába liábin lun ábanbei lan wéwe weíriti darí lun jayábin dunúru adüga jádibu luágu lilímun.

*Jémpulu luáguti ísi
(Lc 13.20-21)*

³³ Rúlumuti gíñe jémpulu le joun.

—Ítara líña arúejani le lánina siélu quei ísi le tagúbudubei ában würi tídan ürüwa líburu fulúwaaru, ába terésirun sun fulúwaaru tugúya.

*Ca lan lébunabei líchuguni Jesúsu jémpulu buri le
(Mr 4.33-34)*

³⁴ Láu jémpulu laráñagei Jesúsu sun cátei le joun gürígia, maríñagunti ni cáta joun mayúsurunga jémpulu.

³⁵ Sun cátei le, lun lagúnfulirun le laráñagubei meja Búngiu liyúmulugugiñe proféta.

Nadímurejaba láu jémpulu jun,
nafúnraanguagüdübei cátei lé buri meja arámudaguabei jun lúmagiñe nadügüni ubouú.

Lafúnraanguagüdüni Jesúsu jémpulu le luáguti jíduru wuríbati labádinagua tüürígu

³⁶ Ába loúnajaniña Jesúsu gürígia jábiñoun, ába lebélorun múnadoun, ába jayábin láni disípulugu, ába jaríñagun lun.

—Furáanguagüdübei jémpulu le luáguti jíduru wuríbati woun.

³⁷ Ába laráñagun Jesúsu joun.

—Áu le Wügüri Garaüwarügüti, áu le ábunagubalin ílaü buíti,

³⁸ múa, ligía ubouúbei, ílaü buíti, jagía gürígia ja lílana larúeijan Búngiu, jíduru wuríbati, jagía gürígia ja lánigu Máfia,

³⁹ áganiti le ábunubalin jíduru wuríbati, Máfia méme, alúbajani, ligía lagúmunchunbei ubouú, ja alúbajabaña, ánjeligu.

⁴⁰ Ítara quei labúdajoúniwa jíduru wuríbati ába lágurún wáturugun lun lágudun, ítara lúba gíñe lasúseredun dánme lagúmunchun ubouú,

⁴¹ áu le Wügüri Garaüwarügüti, noúnajabaña náni ánjeligu aságaraña sun ja afígoungüdübaña ámu, jáma ja adügübaña wuríbati, lídaangiñe narúeijan,

⁴² ábame jácharaguniña lídoun wátu geméti lánina máfiougati. Ábame jayájuajan ñi, ábame lacünrinjan jári.

⁴³ Jámeti adügübalin le lubeíbei Búngiu, ábame jámiridun quei wéyu lídan larúeijan Wáguchi Búngiu. Agáamba jumána, jugúya le garígeirugubei lun jagáambun.

Jémpulu luáguti irísini le arámudúañubei

⁴⁴ Ítara líña arúeijani le lánina siélu quei irísini le arámudúañubei lábugiñe múa. Ladárirei ában wügüri irísini ligía, ábaya larámuduni ñi méme, le luweírin lugúndan, ába lídin, ába lalúguruni sun le lúmabei, ába lagáñijani fulásu ligía.

Jémpulu luáguti pérla le weíribei ebégi

⁴⁵ Ítara líña gíñe arúeijani le lánina siélu quei ában alúgurajati le eíbugañajabei áluaja pérla fínuti,

⁴⁶ dánti ladárirun ában le weíriri lebégi, ába lídin, ába lalúguruni sun le lúmabei, ába lagáñijani pérla ligía.

Jémpulu tuáguti séni

⁴⁷ Ítara líña gíñe arúeijani le lánina siélu quei ában séni to agurúboun baránaja, ába tañúgun sun jawúyeri úduraü.

⁴⁸ Dan tabuínchun, ába jacháwarunun esénijatiña lárún béya, ába jañúurun ñi anúadajaña úduraü, ába jareíduniña ja buídubaña, ába jachágaruniña ja wuríbabaña.

⁴⁹ Ítara lúba dánme lagúmunchun ubouú, jayábiba ánjeligu lun jafánreinruniña ja buídubaña jádaangiñe ja wuríbabaña.

⁵⁰ Ábame jádaruniña ja wuríbabaña lídoun wátu geméti lánina máfiougati, ñíba lubeí jayájuaja, acünrijame jári.

Írísini buri iséri lúma binádu

⁵¹ Ábati lálügüdüniña Jesúsu, laríñaga joun.

—¿Gunfaráanda jumútisan sun cátei le?

Ába jaríñagun.

—Ánja, Wabúreme.

⁵² Ábati laríñagun joun.

—Dan le liábin ában arúfudajati lilúrudun Moisés lun gunfaráanda láni luáguti arúejani le lánina siélu, ába ítara lan quei ában iyúbudiri le gaságaraditi cátei iséri buri lúma cátei binádu buri lídaangiñe lirisin lun líchuguni joun tílana lúban dan le jemégeiruni, queígubeirügü, gayáraati larúfudajan joun gürígia luágu lilúrudun Moisés lúma giñe luágu cátei le narúfudajabei, áu le Jesúsu.

Jesúsu lídan fulásu le gíribei Nazarét

(Mr 6.1-6; Lc 4.16-30)

⁵³ Dan lagúmunchunbei líchuguni Jesúsu jémpulu buri le, ába lídin ñígiñe,

⁵⁴ ába lachülürün lageíroun. Ába lagúmeserun arúfudaja tídan jalígilisin juríu to lídaanboun fulásu ligía, ába laweíridun janígi gürígia, ába jaríñagun.

—¿Jalíasan lafúnrendeirei wügüri le sun lichú áu le? ¿Ída liñásan gayára láani miláguru buri le adüga?

⁵⁵ Liraüga saráfangei le, María lúguchuboun, líbugaña Jacóbo, José, Simón lúma Júdas,

⁵⁶ ya giñe jagánawa lamúlenu jáma lítunu wádan. ¿Jalíagiñeti lasúbudirei sun le?

⁵⁷ Ába jamájarun lun jerésibiruni. Ába laríñagun Jesúsu joun.

—Sun gürígia jínsiñeti ában proféta joun, mámarügaali ligía lídaangiñeti fulásu le ñí jabeí o tílana lan jában.

⁵⁸ Madügüntiti sarágu miláguru ñi ladüga mafíñen jamá luágu.

Loúnwen Juan le abásteragüdjabei

(Mr 6.14-29; Lc 9.7-9)

14

¹ Lídan dan ligía, ába lagáambun Heródes, le gumándan lídan fulásu le gíribei Galiléa, luágu Jesúsu,

² ába laríñagun joun ja lúmabaña.

—Juan le abásteragüdjabei le, sará jádaangiñe jiláaña, ligía gabáfu lubeí lun ladáagun miláguru.

³ Lé meja susérelibei, daülumuti meja Heródes Juan, ába lagüraguágüdüni láu güríngüri tueígiñe Heródias tó meja lúmari Felípe, le lamúlen.

⁴ Aríñagaalí meja Juan lun Heródes luágu moun láni lagámaridunun lúmari lamúlen, madügünti Heródes gásu láu.

⁵ Busénti yebéti Heródes láfaruni Juan jilágubei, ladüga lanúfude jaweí gürígia, madügun lumúti ladüga sun lan gürígia afíñetiña luágu proféta lan Juan.

⁶ Dánti le efédujani luágu lagúnfulirun Heródes irúmu, ába tiábin tiraü Heródias, ába tabínajan jagíbugiñe amísurajoútiña, léti línsiñe tabínajan lun Heródes,

⁷ ába laríñagun tun láu fiñún luágu líchugubei lan furúmieguaügü cátei le tamúriajan lúma tun.

⁸ Ábati taríñagun túguchu tun lun tamúriajani lábulugu Juan le abáste jilágubei, ladüga, lun jíchuguni tun lídan ában asíedu, ába tamúriajani lúma ítara.

⁹ Ába lírudagun Heródes lueígiñe cátei le, quei aríñaga láali lan láu fiñún, agáamba jameí amísurajoútiña, ába laríñagun lun líchugúniwa tun.

10 Ábati laríñagun lun ladürürüniwa lábulugu Juan furísunrugu,
 11 ába janügüni lídan ában asíedu, ába líchugúniwa tun irájü tugúya, ába tíchuguni tun túguchu.

12 Ábati jayábin l-íñagun tun láu fiñún luágu lanigu Juan, ába janügüni lúgubu, ába jábununi, lárigiñe, ába jóúdin awísarei Jesúsu.

*Líchugun Jesúsu eígini joun seíngü mílu wügüriña
 (Mr 6.30-44; Lc 9.10-17; Jn 6.1-14)*

13 Dan lagáambuni Jesúsu cátei le, ába lídin ñígiñe jáurügü láni disípulugu tídan ában ugúnein lídoun ában fulásu mageírawati. Ába jasúbudiruni güri-gia, ába jáfuridun lídaangiñe buri aüdü, ába jóúdin lárigi, eíbu.

14 Dan larárirun Jesúsu tídaangiñe ugúnein, ába laríjin luágu sarágu jaña lan güri-gia jagía, ába jagúdemedagun lun, ába lareídaguagüdüniña ja sándibaña jádan.

15 Queíti agüñedeinaali lubeí, ába jaríñagun láni Jesúsu disípulugu lun.
 –Dárüjalitia áni úatiña güri-gia aganoútiña lídan fulásu le. Oúnaja báña güri-gia ja, ñüdüñ jamámuga lídoun buri lirájüñü fulásu yaráfa agáñija eígini lun jeígin.

16 Ába laríñagun Jesúsu joun.
 –Mídinbaña, rújuma eígini joun.

17 Ába jaríñagun lun.
 –Seíngü rügüñoun fein wáma ya, jáma bián úduraü.

18 Ába laríñagun Jesúsu joun.
 –Barüjumoun nun ñájoun.

19 Ába laríñagun joun güri-gia lun jañúurun luágu jíduru. Ába lanügünun seíngü fein jáma bián úduraü jagía lújaburugu, ába laríjin siélun, ába leteíngiruni Búngiu tuágu. Ábati lagúbachagunun fein, ába líchugunun joun láni irun Jesúsu tídaangiñe ugúneidisípulugu, ába jáfánreinjanun jádan güri-gia.

20 Sun jagía jóútiña quimúle, lárigiñe, ába jabuínchagüdüñ dúusu faníñe táu to ígiragutu.

21 Seíngüñanu mílu wügüriña eígitiña, mabájüdünga würiña jáma irájüñü.

*Leíbugun Jesúsu ligíbuagu dúna
 (Mr 6.45-52; Jn 6.16-21)*

22 Ába loúnajaniña Jesúsu láni disípulugu lubá tídan ugúnein tugúya lun jáñjiñuragun loubáfurugun sun niján lan oúnajaña güri-gia águyu.

23 Lásun loúnajaniña, ába laweínrun lábugua luágun wúbü ayúmuragua lun Búngiu. Dan le lagúñedunbei, ñíñein Jesúsu lábugua,

24 sun núnguran tan ugúnein lamídan dúna. Ába láfarajan lugúdi barána tuágu ugúnein ladüga tubárouñein lan garábali.

25 Ába liábin Jesúsu jawágun lubá larúgan, eíbugeina ligíbuagu dúna.

26 Dan jaríjini láni disípulugu eíbugeina ligíbuagu dúna, ába janúfudedagun, ába jagúaragun láu anúfudei.

–¡Úfiaü!

27 Ába ladímurejan Jesúsu joun, ába laríñagun joun.

–¡Ragújuma anígi, áu le, manúfueda jumá!

28 Ába laríñagun Pédro lun.

–Nabúreme, ánjein amürü lubeí, eíbugagüda bána gíñe ligíbuagu dúna chülü le ñí bubei.

29 Ába laríñagun Jesúsu lun.

–Jigábuti.

Ába larárirun Pédro tídaangiñe ugúnein, ába lagúmeserun eíbuga le ñíjin lubeí Jesúsu ligíbuagu dúna.

³⁰ Dan le lasándiruni lére garábali ába lanúfudedagun, ába lagúmeserun abúlucha, ába lagúaragun.

—¡Séfu bána Nabúreme!

³¹ Ába lárügüdüni Jesúsu lújabu, ába laríñagun lun.

—¡Loúguati gíñe bafíñen! ¿Ca uágu laloúguada bafíñen?

³² Dan jádinun tídoun ugúnein, ába lagálumadun garábali.

³³ Játi buga tídaanbaña ugúnein, ába jájuduragun ligíbugiñe Jesúsu, ába jaríñagun.

—Inárüni luágu Liraü ban Búngiu.

Lareídaguagüdüniña Jesúsu sánditiña Genésaret

(Mr 6.53-56)

³⁴ Ába jánjiñuraguni dúna, ába jachülürün Genésaret.

³⁵ Dan le jíchugunbei lílana fulásu fe luágu Jesúsu lan, ába jabúrchaguagüdüni lídan sun fulásu ligía, ába janügüniña sun sánditiña le ñíjin lubeí.

³⁶ Ába jayúmragun lun lun lígirun lúnrügü jagúuruni táru lanáangun, sun ja agúurubarun, areídaguátiña.

15

Cátei le marúmadaguädünbaliña güriña ligíbugiñe Búngiu

(Mr 7.1-23)

¹ Ába jayábin fiú fariséogu jáma arúfudajatiña lilúrudun Moisés, ñübintiña ubúrugugiñe Jerusalén lúmoun Jesúsu, ába jaríñagun lun.

² —¿Ánsan jájalachagunbalin báni disípulugu binádu jagáburi weíyaaña mútu? Magúnfuliruntiña láu lachibúniwa újabu lubá eígini, según wagáburi.

³ Ába laríñagun Jesúsu joun.

—¿Ánti gíñe jájalachagunbalin lerérun Búngiu lun jafálaruni binádu jigáburi?

⁴ Laríñajare Búngiu. “Inébe jamá bagübürigu bun, le anábagubaliña lagübürigu, jilála.”

⁵ Ánjeinti jugúya, aríñagatün luágu gayára lan laríñagun ában güriña lun lúguchi o tun lúguchu. “Siñáti níderagunibu ladüga sun le nómabei, aríñagaadina luágu lun lan níchuguni lun Búngiu”,

⁶ luágu furúmieguarügü lan le aríñaguti ítara, mámaali lan lúnti líderaguniña lagübürigu. Láu líra mebégigüda jumáali lagúmadijan Búngiu lun jafálaruni binádu jigáburi.

⁷ ¡Biángua tigíbu jugúya le! Linárün proféta Isaías laríñagunbei juágu ítara.

⁸ Jayumárurügü güriña ja jíchiga inébesei nun, líña Búngiu, ánjein tídan janígi, mebéresentiña náu.

⁹ Málatai jájuduragun nun,

ladüga le rügüñein jagúmadijan wügüriña jarúfudaja.

¹⁰ Ábati lagúarun joun güriña, ába laríñagun joun.

—Agáamba jumá, gunfaráanda jugúyame.

¹¹ Máma eígini le leígubei güriña adügübalin lun marúman lan ligíbugiñe Búngiu, dimúrei wuríbati le laríñagubei wügüri, ligía adügübalin lun marúman lan.

¹² Ábati jayábin disípulugu lúmoun Jesúsu, ába jaríñagun lun.

—¿Subúditisan bun luángiu lun jafálaruni binádu jiggu wuríba lan láburujan dimúrei le baríñagubei joun fariséogu?

13 Ába laríñagun joun.

—Furúmieguarügü nádü to máma lábunun Núnguchi Búngiu le siélubei, lájulúba láu sun lílagüle.

14 Ígira jumáña, maríjintiña ja adúndejatiña maríjintiña jáledi jagía. Áni ánjein adúndeja ában maríjinti ában maríjinti líledi, jeíguaduba biángubei jagía lídoun ában júyu.

15 Ábati laríñagun Pédro lun Jesúsu.

—Furáangugüdabeí jémpulu le woun.

16 Ába laríñagun Jesúsu.

—¿Úati gíñe gunfaráanda jumá?

17 ¿Úati gunfaráanda jumá luágu sun lan le ebélurubei lídoun iyúmaü, ába lídin lídoun urágei, lárigiñe ába láfuridun lídaangiñe úgubu?

18 Ánjein dimúrei le áfuridubei lídaangiñe iyúmaü, tídaangiñe anígi liábin, ligíati adügübalin wügüri lun marúman lan ligíbugiñe Búngiu,

19 ladüga tídaangiñe anígi láfurida samínaü wuríbati, áfarajani, adultériu, salúfuri, íweru, iyéeni, marásualugu.

20 Ligía buri cátei le adügübalin wügüri lun marúman lan, ánjeinti leigíniwa machibúnga újabu según jagáburi juríu marúmadagüdün lumúti ligíbugiñe Búngiu.

*Ában würi teréncha to afíñeruboun luágu Jesúsu
(Mr 7.24-30)*

21 Ába láfuridun Jesúsu ñígiñe, ába lídin lídoun buri fulásu geyégua láu fulásu le Tíro lúma Sidón.

22 Ñíñoun ában würi jádaangiñetu Cananítagu aganoúti lídan fulásu ligía, ába tiábin luágun Jesúsu agúarajeina.

—¡Nabúreme, ladügawagun Davíd, gudémená bun! Níjein ában espíritu wuríbati tuágu nisáani, weíriti tasúfurirun lurúma.

23 Moúnabun lumútu Jesúsu. Ábati jayábin disípulugu, ába jayúmuragun lun, ába jaríñagun.

—Adügabeí le tamúriajabei búma, ladüga nuteíntia agúarajeina wárigi.

24 Ába laríñagun Jesúsu.

—Joun rügüñein gürígia féridijaña ja Israelítagu loúnajana Búngiu lun níderaguniña.

25 Ába tiábin würi tugúya, ába tájuduragun ligíbugiñe, ába taríñagun.

—¡Nabúreme, íderagua bána!

26 Ába laríñagun Jesúsu tun.

—Lúnti níderaguniña numútuniña ja juríu furúmiñe, mabuídunti lun tagídarúniwa fein jaweí isáanigu lun tíchugúniwa joun oúnli.

27 Ába taríñagun.

—Ánja, Nabúreme, láu sun líra, gayáraati jeígini oúnli ífei le áburujati lueígiñe jadábulan jabúriña.

28 Ábati laríñagun Jesúsu tun.

—Würi, ¡weíriti gíñe bafíñen! Susérelá le babúseerubei.

Lúmagiñe óra ligía, ába tareídagun tisáani.

Lareídagugüdün Jesúsu sarágu sánditiña

29 Ába láfuridun Jesúsu ñígiñe, ába lachülürün lárún dúna Galiléa, lárigiñe, ába laweínrun luágun ában wübü, ába lañúurun ñi.

³⁰ Ába jayábin sarágu gürígia le ñijin lubei barüina jagía meíbuguntiña, maríjintiña, maríñaguntiña, danímaati jarüna, jáma sarágu jawúyeri sánditiña. Ába jíchuguniña lubádu lugúdi Jesúsu, ába lareídaguagüdüniña.

³¹ Ába laweíridun janígi gürígia láu jaríjin adímurejaña jamá já meja maríñagadibaña, areídagua ja danímaabaña arüna, eíbuga ja meíbuguñajabaña, aríja ja maríjiñajabaña. Ába jagúmeserun adímureja weírigu luágu Jabúngiute Israelítagu.

*Líchugun Jesúsu eígini joun gádürü mílu wügüriña
(Mr 8.1-10)*

³² Ábati lagúarun Jesúsu joun láni disípulugu, ába laríñagun joun.
—Gudémetiña gürígia ja nun ladüga ürüwaali wéyu jáu núma ya áni úaali ni cáta jáma lun jeígin. Mabúseeruntina nouñajaniña jábiñoun meíginga, dagá líñein falálaü jawágu ümada.

³³ Ábati jaríñagun láni disípulugu lun.
—¿Ída lubáti wadárirun eígini joun sarágu gürígia ya lídan fulásu le ñí lumuti úa jamá aganouítiña?

³⁴ Ába lálügüdüniña Jesúsu.
—¿Átiriñoun fein júma?
Ába jaríñagun.
—Sédü, jáma biánraü úduraü.

³⁵ Ába laríñagun joun gürígia lun jañúurun múarugu,
³⁶ ába lanügünun sédü fein jáma úduraü jagía lújaburugu, ába leteíngiruni Búngiu. Ába lagúbachagunun fein, ába líchugunun joun láni disípulugu jáu sun úduraü, ába jafánreinjanun joun gürígia.

³⁷ Jouítiña súngubei quimúle, buíngüda gíñe sédü faníñe táu to ígiraguboun.
³⁸ ¡Gádürüñanu mílu wügüriña eígitiña, mabájüdünga würíña jáma irájüñü!
³⁹ Lárigiñe, ába louñajaniña Jesúsu gürígia águyu, ába ladinun tídoun ugúñein, ába lídin loubawagun Mágdala.

16

*Jamúriajan fariséogu jáma saduséogu ában seíni le láuti miláguru
(Mr 8.11-13; Lc 12.54-56)*

¹ Ába jóudin fariséogu jáma saduséogu aríjei Jesúsu. Lun jáburugüdüni tídoun sádara, ába jaríñagun lun lun larúfudun ában seíni láuti miláguru le siélugiñeti joun, afíñe jamámuga luágu lúmagiñe lan Búngiu liábin.

² Ába laríñagun joun.
—Rábounwéyu, ába jaríñagun. “Buídubei dan ladüga funáti siélu.”
³ Bináafin, ába jaríñagun. “Wuríbabei dan ugúñe ladüga funáñu líña siélu áni jamúñounga.” ¡Biángua tigíbu jugúya le! Subúdi luáguti ligáburi dan jun, áni íbídiñeti jun luágu chülüjali lan lidáani asálbaruni.

⁴ Gürígia wuríbatiña, múaraantiña ja, amúriajatiña seíni láuti miláguru lun jafíñerun luágu áu lan anügübei asálbaruni joun gürígia. Wel, marúfudúnbei ámu seíni joun lueí liseíni Jonás.

Ába lígiruniña, ába lídin.

*Ítara líña jarúfudajan fariséogu quei ísi
(Mr 8.14-21)*

⁵ Dan le jájiñuragunbei disípulugu lúma Jesúsu loubáfurugun dúna, bulíei jamúti janügün fein.

⁶ Ábati laríñagun Jesúsu joun.

—Tounigigua jumátia júngua lueí jísite fariséogu jáma saduséogu.

⁷ Ába jagúmeserun disípulugu aríñaga jámagua.

—Ladügatia manügün wamá fein laríñagunbei ítara.

⁸ Ába lasúbudiruni Jesúsu, ába laríñagun joun.

—¿Ca uágu jadíjerida luágu úa tan fein júma? ¡Louguati gíñe jafíñen!

⁹ ¿Úagili gunfaráanda jumá, marítangun jugúya tuágu seíngü fein to nafánreinjaboun jádan seíngü mílu wügüríña lúma átiriñein lan faníñe táu ígiragutu?

¹⁰ ¿Bulíeiguatün funásan tuágu sédü fein to nafánreinjaboun jádan gádürü mílu wügüríña lúma átiriñein lan faníñe táu ígiragutu?

¹¹ ¿Ída liñági mefeen jubeí luágu máma lan tuágu fein nadímureja dan le naríñagunbei jun lun jounigiragun júngua lueí jísite fariséogu jáma saduséogu?

¹² Ába gunfaráanda jamáni luágu máma lan luágu tísitena fein laríñaga joun, lueí lan arúfudajaní le jáni fariséogu jáma saduséogu lawéridiraña.

Laríñaguni Pédro luágu Jesúsu lan Crístubei

(Mr 8.27-30; Lc 9.18-21)

¹³ Dan le lachülürün Jesúsu ubúrugu Cesaréa le Filípo ába lálügüdüniña láni disípulugu.

—¿Cátanatan lídan jarítangun gürígia, áu le Wügüri Garaüwarügüti?

¹⁴ Ába jaríñagun.

—Añájein aríñagutiña luágu Juan lan lé meja abásteragüdajabei amürü, jíbiri aríñaga luágu Elías ban, añájeingua aríñagutiña luágu Jeremías ban o ámu lan proféta.

¹⁵ Ábati laríñagun joun.

—Ánti jugúya, ¿cátanati lídan jarítangun?

¹⁶ Ába laríñagun Simón Pédro lun.

—Crístu le Liraü Búngiu le wínwanbei amürü, le ñübinbei asálbaraña gürígia ubouágu.

¹⁷ Ába laríñagun Jesúsu lun.

—Fuleiseiwatibu Simón, liraü Jonás, ladüga máma lasúbudirágüdün ni ába gürígia cátei le bun, lasúbudiragüdün Nüguchi Búngiu le siélubei bun.

¹⁸ Naríñajare bun luágu Pédro lan amürü, líla íri ligía, “dübü”, luáguba ébuu le nábunaguoun nilígilisin, áni ni íbini ouweni mabáfubei tuágu.

¹⁹ Níchugubei ligélen arúejani le lánina siélu bun, le cátei le uáguti baríñaga luágu moun lan jadügüni afíñetiña, ligía gíñe uágubei laríñaga Búngiu luágu siñá lan ladügüniwa, le cátei le uáguti baríñaga luágu gayára lan ladügüniwa, ligía gíñe le uágubei laríñaga Búngiu luágu gayára lan ladügüniwa.

²⁰ Ábati laríñagun Jesúsu joun láni disípulugu lun maríñagun jamá ni ca un luágu ligía lan Crístubei.

Ladímurejan Jesúsu luágu loúnwen

(Mr 8.31-9.1; Lc 9.22-27)

²¹ Lúmagíñe dan ligía, ába lagúmeserun Jesúsu aríñaga joun láni disípulugu furáangu luágu lúnti lan lídin Jerusalén, luágu gíñe jasúfuriragüdübei lan wügüríña weirigutiña lídan jafíñen juríu, jáma jábutigu jafádirigun juríu, jáma arúfudajatiña lilúrudun Moisés. Aríñagati joun luágu láfarúba lan jilágubei, áni lásaaruba lan luágu lürüwan wéyu.

²² Ába ladíñurun Pédro láu Jesúsu ñígíñe murúsun, ába laríñagun lun táu sun lanígi.

—¡Mabúseeraleí Búngiu líra, Nabúreme! ¡Siñáti lasúseredun cátei le bun!

²³ Ába lagáragun Jesúsu, ába laríñagun lun Pédro.

—¡Dísebá nueí, Máfia! Babúseerúña beréderuni ladügüniwa lugúndan Búngiu. Masáminaruntibu quei Búngiu, basáminarun quei wügüri.

²⁴ Ábati laríñagun Jesúsu joun láni disípulugu.

—Le busénti lafálarunina, bulíeileí cáteiñein lan, awándaleí sun luwúyeri asúfuriruni le lúnbei liábin lun nueígiñe queísi lanügüni ában wügüri lugúruwan, falálana.

²⁵ Ladüga le abúseeruti leséfuragun lúngua ya ubouágu leféridirubei ibágari le magúmuchaditi, ánjein le ánjabei leféridiruni libágari ya ubouágu nueígiñe, libíjubei ibágari le magúmuchaditi siélu.

²⁶ ¿Cági ju lan lun güriága lagáñeiruni sun le lánina ubou le, leféridireime lubára siélu? Úati ni cáta lánina ubou le áuti gayára lan lagáñijan güriága ubáraü siélu.

²⁷ Nagíribuduba, áu le Wügüri Garaüwarügüti, úara jáma náni ánjeligu, niábinba láu uweírighuni le meme láni Núguchi. Ábameti nafáyeiruniña güriága quei ligáburu le adüga jamáalibeí.

²⁸ Ninárün jáu luágu añájein lan jádaangiñe ja yábaña guetó, mouñwenbaña daríme jaríjini liábin narúeijan, áu le Wügüri Garaüwarügüti.

17

Lámuñedagun laríjín Jesúsu

(Mr 9.2-13; Lc 9.28-36)

¹ Sísi wéyu lárighiñe, ába lanügüniña Jesúsu Pédro, Jacóbo, lúma Juan le lamúlen Jacóbo, ába lídin jáu luágu ában wübü íñuti, jagía rügüñanu ñi.

² Ába lámuñedagun laríjín Jesúsu ñi jagíbugiñe, ába lámiridun ligíbu quei wéyu, ába tájarudun lanáangun quei larúgounga.

³ Sódini ába jaríjini Moisés lúma Elías (já meja abágaridubaña lídan dan le sügüjalibeí) ayánuja lúma Jesúsu.

⁴ Ába laríñagun Pédro lun Jesúsu.

—Nabúreme, ¡lídan dan awánja lan ya! Ánjabu busén, adüga wagíame ürüwa dibásein ya, ában bun, ában lun Moisés, ában lun Elías.

⁵ Dan niján lan Pédro adímureja, ába liábin ában juánriñu miríti, ába louburaguniña, ába lagaambúniwa ában umálali lídaangiñe juánriñu ligía le aríñagubei.

—Niján niraü le jínsiñebei nun, le aúbei oúnwenbun lan nugúndan, adüga jumeí le lubeíbei.

⁶ Dan jagáambuni disípulugu, ába jabúluchagun láu jagíbu múarugu le luweírín janáfude.

⁷ Ába liábin Jesúsu jawágun, ába lagúrurun jawágu, ába laríñagun joun.

—Sarájuma, manúfudeda jumá.

⁸ Dan le jaríjinbei, maríjinjaña ámu lueídügü Jesúsu.

⁹ Dan le arárireina jamáni wübü, ába laríñagun Jesúsu joun.

—Mabájudagua jumeítia cátei le aríja jumáalibeí lun ni ában daríme saráadina, áu le Wügüri Garaüwarügüti, lídaangiñe ouweni lúnya nabágaridun.

¹⁰ Ábati jaríñagun disípulugu lun Jesúsu.

—Guetó subúdi wamáali luágu amürü lan Crístubei. Quei ítara líña lubeí, ¿cáti uágu jaríñaga arúfudajatiña lilúrudun Moisés luágu lúnti lan liábin Elías lubáragiñe liábin Crístu?

¹¹ Ába laríñagun Jesúsu joun.

—Inárüni luágu liábinba lan Elías, ábame líchugun sun cátei lídoun lubúdubu,
¹² áni naríñajare jun luágu ñübinjali lan Elías, masúbudirun jamúti gürígia, adügarügü jamúti sun le jabúseerubei láu. Ítara lúba gíñe jasúfuriragüdüna, áu le Wügüri Garaüwarügüti.

¹³ Ábati jasúbudiruni disípulugu luágu Juan lan lé meja abásteragüdjabei, ligía lan Elíasbei le uágubei ladímureja Jesúsu.

*Lareídagugüdüni Jesúsu ában irájü goúwejaditi
 (Mr 9.14-29; Lc 9.37-43)*

¹⁴ Dan le jachülürünbei le ñíjin jabeí gürígia, ába liábin ában wügüri lúmoun Jesúsu, ába lájuduragun ligíbugiñe, ába laríñagun lun.

¹⁵ —Nabúreme, gudémelá nisáani bun, goúwejaditi, weírititi lasúfurirun, níjein dan jeíguati wáturugun, níjein dan dúnarugun.

¹⁶ Barü numuti ñájoun joun báni disípulugu, siñá jamuti areídagugüda.

¹⁷ Ába loúnabun Jesúsu.

—¿Gürígia mafíñeraditiña, gürígia wuríbatíña! ¿Átiribeísan dan lun neréderuni júma lubá gayára lan jafíñerun nuágu? ¿Ídame lagúmucha mafíñeni le jídaanbei? Barújumei irájü ligía ñájoun.

¹⁸ Ábati ladeínjan Jesúsu lun espíritu wuríbati ligía, ába láfuridagüdüni lídaangiñe lúmagiñe óra ligía, ába lareídagun irájü le.

¹⁹ Lárigiñe, ába jadímurejan disípulugu lúma Jesúsu jábugua, ába jálügüdüni.

—¿Cásan uágu siñá wabalin espíritu wuríbati ligía aságara?

²⁰ Ába laríñagun Jesúsu joun.

—Ladüga liloúguan jafíñen. Ninárün jáu luágu ánjein lan ibíja jubeí fe íbini ñüraüraü lan quei ában tágu mostása, jaríñaguba lun wübü le. “Gidába yágiñe, beíba lídoun ámu fulásu”, ábame lagídarun wübü ligía. Úabei ni cáta jásiñerun ánjein ibíja jubeí fe le tímatimaati.

²¹ Ánjeinti jíbe espíritugu ja, láu rügüñein ayúmuraguni lun Búngiu lúma ayúnaruni gayára lan jaságarúniwa.

*Ladímurejaanya Jesúsu luágu loúnwen
 (Mr 9.30-32; Lc 9.43-45)*

²² Dan le eíbugeina jamá úara loúbawagu Galiléa, ába laríñagun Jesúsu joun luágu ledéregurába lan, ligía le Wügüri Garaüwarügüti, jájaburugun wügüriña wuríbatíña,

²³ ábame jáfaruni jílagubei, áni lásaaruba lan lídaangiñe ouweni luágu lürüwan wéyu. Ába jírudagun sarágu dan le jagáambuni cátei le.

Lafáyeirúniwa tiseínsuna témpulu

²⁴ Dan lachülürün Jesúsu jáma láni disípulugu Capernaúm, ába jóudin ja agúburajabalin tiseínsuna témpulu to Jerusalénboun lúmoun Pédro, ába jaríñagun lun.

—¿Mafáyeijantisan jumáesturun tiseínsuna témpulu?

²⁵ Ába loúnabun Pédro, ába laríñagun lun.

—Afáyeijati.

Dánti lebélorun Pédro múnadoun, ába lálügüdüni Jesúsu Pédro lubáragiñe gayára lan ladímurejan.

—¿Ída líña baríjin lun líra, Simón? ¿Cátaña jagúburajabaña urúeigu ja lánina ubou le, jásan lílana fulásu ódi ja teréncha?

²⁶ Ába laríñagun Pédro lun.

—Ja teréncha.

Ába laríñagun Jesúsu lun.

—Játi lílana fulásu jáledi moún lumuti lubeíti jafáyeijan, áu le Liraü Búngiu, moún lumuti nafáyeijan tiseínsuna lúban Nóguchi.

²⁷ Lun magáñidagüdün wamá ni ában, beíba, ábame bachúrurunun bürünjüre dúnarugun, ábame badígini furúmiñeti úduraü le eígiti bun. Badáriruba ában seínsu liyúmulugu úduraü ligía, buídurügübei lun bafáyeijan wawougua láu, ábame bafáyeiruni.

18

¿Cáteisan weírigutimaabei lídan larúeijan Búngiu?

(Mr 9.33-37; Lc 9.46-48)

¹ Lídan dan ligía, ába jayábin disípulugu lúmoun Jesúsu, ába jálügüdüni.

—¿Cáteisan weírigutimaabei lídan larúeijan Búngiu?

² Ába lanügün Jesúsu ában irájü, ába líchuguni jamídan jámagua,

³ ába laríñagun.

—Nínárün jáu luágu ánjaün lan mayábin lun jítaradun quei irájüñü, mebélubadün lídoun larúeijan Búngiu.

⁴ Ítara líña lubeíti, le ñúraüti lanáangun lúngua, ñübin ligía lun ítarabei lan quei ában irájü, ligía weírigutimaabei lídan arúeijani le lánina siélu.

⁵ Gürígia giñe le erésibiruti ában irájü lídan níri resíbi lumútina giñe.

Luríban lafígoungüdüniwa ában gürígia

(Mr 9.42-48; Lc 17.1-2)

⁶ ‘Furúmieguarügü le afígoungüdüti ában jádaangiñe ja isérigiñabaña lídan jafiñen nuágu, buítimaati jamúga lun lun lagurúniwa baránajoún láu ában oúnwenbun dúbü le amúligülei güráñu luágu ligíina sügü láu ladügüni cátei líra.

⁷ ¡Wuríbati lun ubouú, níjein lán buri cátei le afígoungüdübaliña gürígia! Súnwandan ñíbei lan, áni ¡fugiábu le wügüri le lébunabei!

⁸ ‘Ligía ánjein lubeí lafígoungüdübadibu lubeí bújabu o bugúdi lan, dürübei, fíbei díse buáriua, buítimaati lun bebélurun siélun májabuga o magúdiga, sügü láu badarún láu biángubei bújabu lúma biángubei bugúdi máfiougatin le ñí lubei wátu le méñeguchadibei.

⁹ Ánjein bágu lubeí afígoungüdübadibu, sagábei, fíbei díse buáriua, buítimaati lun bebélurun siélun máguga sügü láu badarún láu biángubei bágu máfiougatin.

Jémpulu tuáguti mudún to eféridiruboun

(Lc 15.3-7)

¹⁰ ‘Manúga jumá ni ában jádaangiñe ja ünabugububaña ja quei ni cáta. Naríñajare jun luágu ligíbugiñeñanu lan Nóguchi Búngiu le siélubei ánjeligu ja aríjubaña jáu afíñetiña ja súnwandan.

¹¹ Ladüga asálbarei le féridijalibei yebe niábin, áu le Wügüri Garaüwarügüti.

¹² ‘¿Ída líña jaríjin lun? Ánjein añájein lubeí san mudún lúma ában wügüri, teféridira ában jádaangiñe, ¿ma lígirubaña jíbiri luágu wübü, ábame lídin áluajoun to ayúridaguboun?

¹³ Ánjounti ladárira, choúruti luágu gúndaabei lan táu sügü jáu ja mayúridagunbaña.

¹⁴ Ítara líña giñéti, mabúseerunti Júguchi Búngiu le siélubei lun leféridirun ni ában jádaangiñe ünabugutiña ja.

Ligáburí ferúduawa jamá idújeñu lueígiñe Jesucrístu

(Lc 17.3)

15 ‘Ánjein adüga bidúje ában wuríbani bun, badímureja lúma jábuguarügü, ábame basúbudiragüdüni lidúnrun lun. Ánjein adüga gásu báu, gamádaguayáadün.

16 Ánjein madügün gásu báu, ábame banügün ában o bián gürígia jánwoun lun sun lan le aríñawagúti, añájein jamámuga ámu geféentiña luágu.

17 Ánjein madügün gásu jáu, ábame baríñaguni lun jadámurin affíñetiña, ánjein madügün gásu láu adámurini, ábame banügüni quei ában maffíñeti luágu Búngiu o quei lan ában agúburajati liseínsuna gumádi, gayára lámuga lasáansiruni luríban ligáburu.

18 ‘Ninárün jáu luágu le lan cátei le uáguti jaríñaga jugúya disípulugu luágu moun lan jadügüni affíñetiña, ligía gíñe uágubei laríñaga Búngiu luágu siñá lan ladügüniwa, le cátei le uágubei jaríñaga luágu gayára lan ladügüniwa, ligía gíñe le uágubei laríñaga Búngiu luágu gayára lan ladügüniwa.

19 ‘Naríñajare gíñe jun luágu ánjaña lan úarada biáma jídaangiñe ya ubouágu lun jamúriajan ában cátei lúma Búngiu le siélubei, líchugubei jun,

20 ladüga le ñí jamuti biáma o ürüwa oundaragu lídan níri, anájein ñi jamídaangua.

21 Ába layárafadun Pédro lun Jesúsu, ába laríñagun lun.

—Nabúreme, ¿átiribeísan weíyaasu ladügün nibíri ában wuríbani nun lun ferúduna méme náani? Darí sédü weíyaasu?

22 Ába laríñagun Jesúsu lun.

—Maríñaguntina bun luágu darí lan sédü weíyaasu lúnti ferúduna báani, darí ürüwa-wein-dísi weíyaasu sédü.

Jémpulu luáguti músu le májabei ferúduna lan

23 ‘Ligía ítara líña lubei arúejani le lánina siélu quei ában urúei le ñübinbei lun laráansejan luágu seínsu jáma lumúsuniña.

24 Lagúmesera adügei, ába janügün ában le adúweirubalin sarágu míñun fiádürü,

25 quei maseínsun lan lun lafáyeijan, ába laríñagun urúei lun lalúgurúniwa idámunime táu sun lúmari, lirájüñü, lúma sun le lúmabei lun lafáyeiruni ladúweijan.

26 Ába lájuduragun músu ligía ligíbugiñe urúei, ába layúmuragun lun ítara. “Nabúreme, gagúraasunbá nubá, nafáyeirubei sun le nadúweirubei bun.”

27 Ába lagúdemedagun lun urúei, ába ferúduna láani ladúweiruni, ába lígiragüdüni.

28 Quei láfuridun músu ligía ñígiñe, ítara ladúnragun lúma ában músu líledi le adúweirubalin átiri fiádürü. Ába lárügüdüni lueígiñe ligíina, ába lagúmeserun achócurei, ába laríñagun lun. “Fáyeibeí le badúweirubalina.”

29 Ábati lájuduragun ligíbugiñe, ába layúmuragun lun ítara. “Gagúraasunbá nubá, nafáyeirubadibu.”

30 Májati le ában, ñüdünrügü ligía ába ladaruni furísunrugun darí lafáyeiruni ladúweijan.

31 Dan le jaríjinbaalin ja jíbiri músu cátei le, ába lagáridun joun sarágu, ába jóúdin, ába jabájüdaguni lun urúei.

32 Ába louñajan urúei ougei, ába laríñagun lun. “¡Músu wuríbatí! Ferúduna numúti sun badúweijan ladüga bayúmuragun nun.

33 Lúnti yebe gíñe gudéme lan bouba bun quei bagúdemedun nun.”

34 Ába lagáñidun urúei sarágu, ába líchugun dimúrei lun jasúfuriragüdüni daríme lafáyeiruni sun ladúweijan.

³⁵ Ába lásurun Jesúsu aríñageina.

—Ítara lúba gíñe ladüga Núnguchi Búngiu le siélubei jun ánjaün úa ferúduna láani cáda ában jídaangiñe libíri tídaangiñe lanígi.

19

*Larúfudajan Jesúsu libügürü ígiraguni
(Mr 10.1-12; Lc 16.18)*

¹ Lárigiñe laríñaguni Jesúsu sun cátei le, ába lídin Galiléagiñe lun loúbawagun Judéa le lueígiñebei oúbaü le ñígiñe lubeí labouúcha wéyu libíti Jordán.

² Sarágu jáña gürígia afálaruti, ába lareídaguagüdüniña sánditiña ñi.

³ Ábati jayábin fiú fariséogu lúmoun Jesúsu áluga jáburugüdüni tídoun sádara, ába jálügüdüni.

—¿Según barítagun, gayáraatísan lígirunun gürígia lúmari lueígiñe furúmiegurügü cátei?

⁴ Ába loúnabun Jesúsu.

—¿Malíjangidün tídan Lerérun Búngiu luágu lúmagiñe lan furúmiñeti dan, dan le ladügünbaliña Búngiu gürígia, adüga lumúti wügüri, adüga würi?

⁵ Aríñagati gíñe. “Ligía lígirubei lubeí wügüri lúguchi túma lúguchu lun laganoúniwa túma lúmari, ábame jeréderun quei ábanrügü.”

⁶ Mámaaña lubeíti biáma, ábanrügaaña. Ligía moún lubei lafánreinraguni wügüri le ladúnraguagüdübei Búngiu.

⁷ Ábati jálügüdüni.

—¿Cáti uágu laríñaga lilúrudun Moisés lun lan tíchugúniwa gárada lánina ígiraguni tun würi lun tigrún?

⁸ Ába laríñagun Jesúsu joun.

—Ladüga tidére janígi lánjarunbei Búngiu lun jígiragun jáma júmarigu, máma líña meja furúmiñe.

⁹ Naríñajare jun luágu furúmiegurügü lan le ígirutu lúmari ába lagámaridun ámu, ladügüña adultériu, mámarügaali ligía ladüga tagámaridun ligíbuagun, le gíñe agámariduti würi to ígiraguaaru, ladügüña gíñe adultériu.

¹⁰ Ábati jaríñagun láni disípulugu lun.

—Ánjein ítara líña lubeí luáguti wügüri túma lúmari, buítimaati lubeí lun magámaridun jamá gürígia.

¹¹ Ába laríñagun Jesúsu joun.

—Másutiña gayára jabágaridun mámariga, ja rügüñanu únbaña rújali lan Búngiu ubáfu.

¹² Ámuñegueinarügüti lébuna magámaridun jamá wügüriña, añájein, ítaragubeíñanu lúmagiñe jagüriajóun, jíbiri, adügüwarügüti joun, jíbiri, reídeitiña magámaridunga lun jedéregeragun jóungua le gumúti lun jesériwidun lun Búngiu. Le gabáfubei lun magámaridun lan, magámaridalá.

*Labíniruniña Jesúsu irájüñü
(Mr 10.13-16; Lc 18.15-17)*

¹³ Ába janügüniwa irájüñü lun Jesúsu lun líchuguni lújabu jawágu lúma lun layúmuragun lun Búngiu jawágu, ába jagúmeserun disípulugu adeínja joun ja anájabaliña.

¹⁴ Ába laríñagun Jesúsu joun.

—Ígira jumá lun jayábin irájüñü nun, mamájara jumá, ladüga ja jarúmabaña afíñe quei irájüñü, jagía lílana arúejani le lánina siélu.

15 Ába líchuguni lújabu jawágu irájüñü jagía, lárigiñe, ába lídin lídaangiñe fulásu ligía.

*Ladímurejan ában wügüri ñüraügili lúma Jesúsu
(Mr 10.17-31; Lc 18.18-30)*

16 Ába lídin ában wügüri ñüraügili aríjei Jesúsu, ába laríñagun lun.
—Maésturu buíti, ¿cásan cátei buíti lúnbei nadügüni lun nibíjini ibágari le magúmuchaditi?

17 Ába laríñagun Jesúsu lun.
—¿Ca uágu baríñaga nun “buíti”? Ában rügüñein buíti, Búngiu. Ánjein busén bubei bibíjini ibágari magúmuchaditi, gúnfulibá lúma gumádi.

18 Ába laríñagun wügüri ligía lun.
—¿Cáteigi buri?
Ába laríñagun Jesúsu lun.
—Máfarajabá, magámaridabá würi gámaritu, míwerujabá, madímurejabá iyéeni luágu ni ában,

19 inébe jamá bagübürigu bun, jínsiñe jagíame gürígia bíledigu bun quei bínsiñegua búngua.

20 Ába laríñagun lun.
—Gúnfuli numúti sun le lúmagiñe ñüraügidina, ¿cági ámu nemégeirubei?

21 Ába laríñagun Jesúsu lun.
—Ánjein busén bubei buídu ban le gumúti, alúgurabeí sun le búmabei, ábame bíchuguni lebégi joun gudémetiña, ábame bibíjin irísini siélu, ábamei biábin, ábame bafálarunina.

22 Dan lagáambunbalin wügüri ligía cátei le, májati, ladüga weíribalin Jesúsu cába lan ladügti lirísini, ába lídin láu íruni.

23 Ábati laríñagun Jesúsu joun láni disípulugu.
—Nínárün jáu luágu jénreengu lan lun lebélorun ában rísiti lídoun arúejani le lánina siélu.

24 Aríñagaya numúti jun luágu ménreenguntima lan lásügürün ában caméyu lídaangiñe lujúyun ában agúsa, sügü láu lebélorun ában rísiti lídoun arúejani le lánina siélu.

25 Dan jagáambuni disípulugu cátei le, ába laweíridun jan-balin Jesúsu cába lan ladügigi sarágu, ába jálügüdagun jámagua.

—¿Cáteiti gayáraabei lasálbarun?
26 Ába laríñaguniña Jesúsu, ába laríñagun joun.
—Siñáti jasálbaragun gürígia jóungua, ánjein Búngiu, gayára lumúti sun cátei adüga.

27 Ábati laríñagun Pédro lun.
—Nabúreme, wagía, ígira wamáali sun lé meja wámabei lun wafálarunibu. ¿Cábasanti wabíja?

28 Ába laríñagun Jesúsu joun.
—Nínárün jáu luágu lídan lánme dan ligía dánme iséri lan sun cátei, dánme le nañúrun, áu le Wügüri Garaüwarügüti luágu nála yágüta siélu lun narúejan láu sun nuweírigun, jugúya le afálarubalina jañúuruba giñe luágu dúusu jalaü lun jagúseragüdüniña dúusugubei láni Israél türíbu.

29 Súnti ja ígiraañábaña jában, o jamúlenu, o játunu, o jagübürigu, o jasánigu, o jamúan, nuágu, jerésibiruba san weíyaasu lánwoun, resíbi jameíme ibágari magúmuchaditi.

30 Áni sarágu jáña ja furúmiñetiñábaña guetó, jagíaba agúmujoúni, sarágu ja agúmujoúnibaña guetó, jagíaba furúmiñe.

20

Jémpulu jawágoti ñadágimeintiña

¹ Ába laríñagun Jesúsu.

—Ítara líña arúejani le lánina siélu quei ában labúreme ichári le áfuridubei bináafingua áluaja ñadágimeintiña lun talúbajoún linádirigu.

² Ába ladügün darádu jáma ñadágimeintiña lun líchugun fiádürü joun luágu wéyu, ába loúnajaniña ñadágimein lichárirugu.

³ Lárigiñe, ábaya láfuridun quei buri ladaünrün néfu bináafin, ábaya ladárirun ámu wügüriña mafísiutetiña, mágidirugu.

⁴ Ába laríñagun joun. “Jeíba giñe ñadágimein nichárirugu, ábame nafáyeiruni lebégi juwádigimari jun.” Ába jóudin.

⁵ Ábaya láfuridun amídirugu, furí ligía ladaünrün ürüwa rábounwéyu, ligía méme ladüga.

⁶ Quei buri ladaünrün seíngü rábounwéyu, ábaya lídin mágidirugu, ábaya ladárirun wügüriña mafísiutetiña ñi, ába laríñagun joun. “¿Cásan uágu yá jubei sun wéyu mawádigimariga?”

⁷ Ába jaríñagun lun. “Úagili ni ában álugutiwa.” Ába laríñagun joun. “Jeíba giñe ñadágimein nichárirugu, ábame nafáyeiruni lebégi juwádigimari jun.”

⁸ Dan le lagúñedunbei, ába laríñagun labúreme ichári lun jábuti ñadágimeintiña. “Wába joun ñadágimeintiña, fáyei bámugaña, bagúmeserame jámagiñe ja atátirubaña agúmujoúni, bagúmuchame jáma ja atátirubaña furúmiñe.”

⁹ Ábati jayábin ja atátirubaña ñadágimein quei buri ladaünrün seíngü rábounwéyu, ába jibíjin fiádürü cáda ában.

¹⁰ Lárigiñe, dan le lachülürün jadáani ja atátirubaña furúmiñe, ába jarítangun luágu gíbetimaabei lan jabíjin. Ába giñe jabíjin fiádürü cáda ában.

¹¹ Dan le jerésibiruni jaseínsun, ába magúndan jamá lúma labúreme ichári,

¹² ába jaríñagun. “Ja ñübinbaña agúmujoúni, ában rügüñein óra jawádigimari, ában lábu bafáyeiruniña quei wagía, wagía le awándubalin wadágimanu lúma lísüga sun wéyu.”

¹³ Ába loúnabun labúreme ichári, ába laríñagun lun ában jádaangiñe. “Numáda, máma nadügüña ni murúsun maríchaü jun. ¿Ma funági luágu ában fiádürü jadüga darádu núma?”

¹⁴ Barújumei jiseínsun, jeíba. Nafáyeiruñanu ja atátirubaña agúmujoúni quei nafáyeirunün ladüga ítara líña lan nabúseerun.

¹⁵ ¿Maríchatina funági lun nadügüni le nabúseerun láu niseínsun? ¿Ódi gimúgatün ladüga nubúidun?”

¹⁶ Ítara líña lubeíti, sarágu jáña ja agúmujoúnibaña guetó, jagíaba furúmiñetiña, sarágu jáña giñe ja furúmiñetiñábaña guetó, jagíaba agúmujoúni. Ladüga sarágu jáña agúarútiña áni míbetiña anúadirútiña.

Ladímurejaanya Jesúsu luágu loúnwen

(Mr 10.32-34; Lc 18.31-34)

¹⁷ Dan le niján lan Jesúsu luágu üma lun Jerusaléoun, ába ladíñurun jáu lání dúusu disípulugu jaweí ja jíbiri gürígia ja luágubaña üma úara jáma, ába laríñagun joun.

¹⁸ —Quei lubeí jaríjini, aweínreina wáña Jerusaléoun le ñíba lubeí nedéregera, áu le Wügüri Garaüwarügüti, joun jábutigu jafádirigun juríu lúma joun arúfudajatiña lilúrudun Moisés, ja lúnbaña jasíadirunína lun noúnwen.

19 Ábame jedéregerunina joun ja mámabaña juríu lun jéjerajan náu, áfara jamáname, ábame jádaragunina luágu gurúwa, áni násaaruba lídaangiñe ouweni luágu lürüwan wéyu.

*Le tamúriajabei jáguchu Jacóbo láu Juan lúma Jesúsu
(Mr 10.35-45)*

20 Ábati tiábin jáguchu Jacóbo láu Juan, ja lisáanigu Zebedéo, lúmoun Jesúsu jáu tisáanigu, ába tájuduragun lun tamúriajan ában fuleísei lúma.

21 Ába laríñagun tun.

—¿Ca babúseerubei?

Ába taríñagun lun.

—Aríñagabá lun jañúurun bián nisáanigu ja, ában lueígiñe bouñwenren, ában lueígiñe bubaña yágüta lídan barúeijan.

22 Ába laríñagun Jesúsu joun.

—Ibídíñeti jun ca lan jamúriajabei. ¿Gayáraati jawánduni luweírín igárigu le lúnbei nawánduni, gayára ligíame júaradun núma lídan nasúfurirun?

Ába jaríñagun.

—Gayára wabeí.

23 Ába laríñagun joun.

—Inárüni, lúnti jawánduni igárigu le lúnbei nawánduni, úara jugúyame núma lídan nasúfurirun, ánjeinti lun jañúurun lueígiñe nouñwenren lúma lueígiñe nubaña, máma áu lúnbei níchuguni, líchugúaba joun ja ubáabaña laráanserei Búngiu.

24 Dan le jagáambunbalin jíbiri díisi disípulugu cátei le, ába jagáñidun jáma bián amúlenugu jagía.

25 Ába lagúarun Jesúsu joun, ába laríñagun joun.

—Queísi jasúbudiruni, ja agúmadijabaña jádan ja mámabaña juríu arúfudaguatiña jóungua camá jamuga jabúriña lílana fulásu ligía, játi weínamubaña jádan, arúfuda jamúti jabáfu.

26 Ánjein jídan, máma lúba, le abúseeruti lun weíri lan jídan, lúnti lesériwiduniña jíbiri.

27 Furúmieguarügü jídaangiñe le abúseeruti lun ligíaba lan furúmiñeti, lúnti idámuni lan joun jíbiri

28 Ítara quei máma lan niábiña, áu le Wügüri Garaüwarügüti, lun nesériwidúniwa, niábiña lun nesériwidun lúma lun níchuguni nibágari lebégame jasálbarun sarágu.

*Lareídaguagüdüin Jesúsu bián maríjintiña
(Mr 10.46-52; Lc 18.35-43)*

29 Dan le áfurideina jabeí Jesúsu jáma láni disípulugu Jericógiñe, sarágu jáña gürígia afálaruti Jesúsu.

30 Ñíñanu bián maríjintiña ñun láru üma, dan le jagáambun luágu Jesúsu lan le ásügürübei, ába jagúaragun.

—¡Wabúreme, ladügawagun David, gudéme wamá bun!

31 Ába jadeínjan gürígia joun lun jámanichun, ligíatima jagúaragun.

—¡Wabúreme, ladügawagun David, gudéme wamá bun!

32 Ába leréderagun Jesúsu, ába lagúarun joun, ába laríñagun joun.

—¿Ca jabúseerubei nadügün jun?

33 Ába jaríñagun lun.

—Wabúreme, buséntiwa waríjin.

³⁴ Ába jagúdemedagun lun Jesúsu, ába lagúurun luágu jágu. Lúmagiñe óra ligía ába jaríjin, ába jafálaruni.

21

Lebélorun Jesúsu Jerusaléoun

(Mr 11.1-11; Lc 19.28-40; Jn 12.12-19)

¹ Dan le yaráfaaña lubei lun Jerusalén, ába jachülürün ligíbugiñe fulásu le gíríbei Betfajé, le ünabubei libíti wübü le Olívos,

² ába laríñagun Jesúsu joun biáma jádaangiñe láni disípulugu.

—Jeíba lídan liraúraü fulásu le wagíbugiñebei, jadáriruba ában burígü güráñu ñi láu ában liraúraü burígü túma, ábame jafáragaduniña, ábame janügüniña nun.

³ Ánjein ñi adímurejati jun lueígiñe jadügüni, ábame jaríñagun lun luágu busén lániña Jesúsu, luágu láguyugüdübaña lan.

⁴ Lasúseredunbei líra lun lagúnfulirun lé meja laríñagubei proféta dan le labürüjanbei ítara.

⁵ Aríñaga jumá lun ubúrugü Sión.

“Niteín Burúeite bun láu ünabuni,

waríñu lanágawagu ában burígü,

waríñu luágu ában liraúraü burígü, anímaalu anájati ílaü.”

⁶ Ába jóudin disípulugu, ába jadügüni quei laríñaguni Jesúsu joun.

⁷ Ába janügünun burígü tugúya láu sun tiraü, ába jíchugunun janáangun jawágu, ába lawárirun Jesúsu.

⁸ Sarágu jañáti gürígia, ába jábudunun janáangun luágu üma, jíbiri, ába jáchuajan tilímun wéwe, ába jíchaajani luágu üma.

⁹ Dánda gürígia ja ubáraübaña quei ja árigibaña, ába jagúmeserun agúaraja.

—¡Uweíriguni lun ladügawagun urúei Davíd! ¡Biníwati wügüri le ñübinbei lídan líri Wabúreme Búngiu! ¡Uweíriguni lun Búngiu!

¹⁰ Dan lebélorun Jesúsu ubúrugun Jerusalén, ába jafúudun sun ja ñíbaña, ába jaríñagun sarágu.

—¿Cáteisán gürígia le?

¹¹ Ába jaríñagun gürígia.

—Jesúsu le, le Nazarétna, fulásu le lídaanbei Galiléa. Ligía ában proféta.

Larúmadagüdünnun Jesúsu témpulu

(Mr 11.15-19; Lc 19.45-48; Jn 2.13-22)

¹² Lárígiñe, ába lebélorun Jesúsu tídon láni Búngiu témpulu, ába labúgaguniña sun alúgurajatiña jáma agáñijatiña ja ñíbaña. Ába lagáragaguni dábula buri le jadábulan asáansijabaña seínsu ñi joun gürígia, lúma jála ja alúgurajabaña únjun.

¹³ Ába laríñagun joun.

—Laríñajare Búngiu tídan Lerérun. “Núban fulásu le ñí lubei gayára lan jayúmragun gürígia nun”, ánjein jugúya, barü jumaaru quei jában jíwerutiña.

¹⁴ Ába jayábin fiú maríjintiña jáma danímaatiña lúmoun Jesúsu ñi témpulurugu, ába lareídaguagüdüniña.

¹⁵ Dan le jaríjinbaalin jábutigu fádirigu jáma arúfudajatiña lilúrudun Moisés miláguuru buri le ladágubei, lúma dan le jagáambuni jagúarajan irájüñü témpulurugu. “¡Uweíriguni lun ladügawagun urúei Davíd!”, ába jagáñidun.

¹⁶ Ába jaríñagun lun Jesúsu.

—¿Agáamba bumútisan le jaríñagubei ja?

Ába laríñagun Jesúsu joun.

—Ánja, agáamba numúti. ¿Malíjan jumágili tídan Lerérun Búngiu le ní lubei laríñawagúa lun Búngiu.

Adügaadibu lun jerémujan ñübürigiña jáma irájüñü ja machülaagiña, cátei buíti buágu?

¹⁷ Ába lígiriña, ába lídin ubúrugugiñe lun Betánioun, ába lásügürüni áriebu ñi.

Líñaragunun Jesúsu tídibu ígo to mínboun

(Mr 11.12-14, 20-26)

¹⁸ Larúgan bináafin, dan le lagíribudun Jesúsu ubúrugun, ába lálámachun.

¹⁹ Ába laríjin ában tídibu ígo láru üma, ába lídin tuágun, madáriti ni cáta tuágu lueídügüya ubánaü. Ába laríñagun tun tídibu ígo tugúya.

—¡Magíindadügüyabá!

Lídan óra ligía ába tásaürün.

²⁰ Dan jaríjini disípulugu cátei le, ába laweíridun janígi, ába jaríñagun lun Jesúsu.

—¿Ída liñásan tásaürübei tídibu ígo to ítara oufun?

²¹ Ába laríñagun Jesúsu joun.

—Nínárün jáu, ánjaün afíñe le gumúti, mámarügübei líbe le nadügübei tun tídibu ígo to gayára jumá adüga, gayáraabei jaríñagun lun wübü le. “Gidába yágiñe, dabúba baránajoun”, ábame lasúseredun.

²² Súnme giñe cátei le jamúriajan lúma Búngiu, ánjein afíñe jubeí, jibíjubei.

Lubáfu Jesúsu

(Mr 11.27-33; Lc 20.1-8)

²³ Ábati lebélorun Jesúsu témpulurugun, dan niján lan arúfudaja ñi, ába jayábin jábutigu fádirigu jáma wügüríña ábutigu lídan jafíñen juríu, ába jaríñagun lun.

—¿Aríñagabeí woun ca lan biríchabei lun badügüni cátei le? ¿Ca íchugubalin ubáfu le bun?

²⁴ Ába laríñagun Jesúsu joun.

—Nálügüdaadün giñe ában cátei, ánjein jóunaba nun, ábame naríñaguni jun ca lan áu ubáfu nadügei buri cátei le.

²⁵ ¿Ca óunajabalin Juan abásteragüdaja? ¿Búngiu, ódi wügüríña?

Ába jagúmeserun adímureja jámagua, ába jaríñagun.

—Ánjawa aríñaga luágu Búngiu lan óunajabalin, laríñaguba woun ca lan uágu mafíñerun wabeí lun.

²⁶ Ánjawa aríñaga luágu jóunajan lan wügüríña, jóuserubadiwa gürígia wuríba ladüga súngebei afíñetiña luágu proféta lán.

²⁷ Ábati jaríñagun lun Jesúsu.

—Ibídíñeti woun.

Ába giñeti laríñagun joun.

—Maríñagun nubeí giñéti jun ca lan áu ubáfu nadügei buri cátei le.

Jémpulu jawáguti bián isáanigu

²⁸ Ába laríñagun Jesúsu joun.

—Nabájüdagua ában cátei jun, jaríñageime nun ída líña lan jaríjin lun. Níñein ában wügürí, biámañanu lisáanigu. Ába laríñagun lun ában jádaangiñe. “Niráü, beíba ñadágimein ugúñe lídan talúbajoún ninádirigu.”

²⁹ Ába laríñagun lisáani lun. “Mabúseeruntina nídin.” Lárigiñe, ába lasáansiragun larítangun, ába lídin ñadágimein.

³⁰ Lárigiñe, ába lídin úguchili aríjei le ában, aríñageinaleí le méme laríñagubeí buga lun le furúmiñeti lun. Ába loúnabun le. “Ánja, nídiba.” Mídinti.

³¹ Aríñaga jumeí nun, ¿cági jádaangiñe biángubei adügübalin le labúseerubei úguchili?

Ába jaríñagun.

—Le furúmiñebei.

Ábati laríñagun Jesúsu joun.

—Nínárün jáu luágu choúrutima lan jebélurun agúburajatiña liseínsuna gumádi jáma jórugu lídoun larúeijan Búngiu sügü jáu,

³² ladüga ñübinti Juan le abásteragüdajabei arúfudaja jun ída lúba lan ligáburi jabágaridun, mafíñeruntün lun, ánjañati ja agúburajabaña liseínsuna gumádi jáma jórugu, afíñeratiña lun. Jugúya, láu sun aríja jumáni sun líra, masáansiragunti jigáburi lun jafíñerun lun.

Jémpulu jawáguti ñadágimeintiña ja wuríbabaña

(Mr 12.1-12; Lc 20.9-19)

³³ ‘Agáamba jumeí ábaya jémpulu le. Luáguti ában wügüri labúreme ában ichári, ában lábunagun tídibu beíbei lichárirugu, ába ladügün baríeru láu, adüga ligía ában ágei lun laríbichawagún tíra beíbei lídoun lúma ában wáyelesi lun gayára lan loúnigiruni sun cátei.

‘Ába lájayajani ichári joun ñadágimeintiña, ába lídin adüga weíyaasu.

³⁴ Dan le lachülürün dan lun alúbajani, ába loúnajan jádaangiñe lumúsuniña amúriaiei lufánran jámagiñe ñadágimeintiña.

³⁵ Ábarüga járügüdüniña ñadágimeintiña músu jagía, buleísei jameí ában, áfara jameí ában jilágubei, rúgua jagía dübü luágu le ában.

³⁶ Ábaya loúnajan labúreme ichári gíbetimaajaña sügü jáu ja loúnajabaña furúmiñe, ligía méme jadüga ñadágimeintiña joun.

³⁷ ‘Agúmujoúni, ába loúnajani liraü, ába laríñagun lúnguarügü. “Inébebei niraü joun.”

³⁸ Dan le jaríjinbaalin ñadágimeintiña liraü, ába jaríñagun jámagua. “Nijánba le erésibirei alágan, wáfaraali jilágubei, reídei wamámuga láu alágan.”

³⁹ Ábati járügüdüni, ába jaságaruni lídaangiñe ichári, ába jáfaruni jilágubei.

⁴⁰ Ába lálügüdajan Jesúsu.

—Dánmeti líabin labúreme ichári, ¿cábagi ladüga jáu ñadágimeintiña ja?

⁴¹ Ába jaríñagun lun.

—Láfaragubaña wuríbatiña jagía jilágubei, magúdemedagúnbaña lun, ábame lájayajani ichári joun ámu ñadágimeintiña ja lúntiña jedéregeruni lufánran lun lídaangiñe alúbajani lídan dan.

⁴² Ábati laríñagun Jesúsu joun.

—¿Malíjañaja jumágiru Lerérun Búngiu? Taríñajare nuágu.

Le meja dübü le mabúseerun jabeí ábunagutiña, ligíaali furúmiñeti.

Wabúreme Búngiu adügübalin lun furúmiñebei lan, áni aríja wamúti quei ában cátei weíriguti.

⁴³ Ligía naríñagunbei jun luágu lagídarúaba lan larúeijan Búngiu jueí, jugúya le weírigubei lídan jafíñen juríu, ábame líchugúniwa joun gürígia ja edéregeruti alúbajani le láni larúeijan Búngiu.

⁴⁴ Ánjeinti áu, le dübü ligía, furúmieguarügü le eíguaduti nuágun lañaürudagúba, léti uáguti leíguada nigáñi, lagúmuchaguagüdübei. Ligíaba asúsereda joun gürígia ja májabaña nun.

⁴⁵ Dan le jagáambunbalin jábutigu fádirigu jáma fariséogu jémpulu buri le líchugubei Jesúsu, ába jasúbudiruni luágu jawágu lan ladímureja.

⁴⁶ Ábati jabúseerún yebe járügüdüni, madügün jamúti ladüga janúfude jawei güriá, ladüga affíne jamá güriá luágu proféta lan.

22

Jémpulu luáguti maríei

¹ Ábaya lagúmeserun Jesúsu adímureja joun láu jémpulu, ába laríñagun joun.

² —Nijánya ában jémpulu luáguti arúejani le lánina siélu. Níñein ában urúei adügüti ában fédu lubá lamárieidun lisáani.

³ Ába loúnajaniña lumúsuniña ougaña amísurajoútiña, májatiña amísurajoútiña jayábin.

⁴ Ábaya loúnajan ámu músu, ába laríñagun joun. “Aríñaga jumá joun amísurajoútiña luágu aráanseeli lan eígini. Áfaragüda náaña bágasu jáma nilügüniña anímaalugu dibúnetiña, aráanseeli sun cátei, lun jayábin maríeirugu.”

⁵ Madügüntiña amísurajoútiña gásu. Ába lídin ában jádaangiñe lichárigu, ñüdün ában adüga ámu wadágimanu,

⁶ ja jíbiri, ába járügüdüniña lumúsuniña urúei, ába jóuseruniña wuríba, ába jáfaraguniña jilágubei.

⁷ Ábati lagáñidun urúei sarágu, ába loúnajaniña lisúdaaranigu áfaraguaña gáfarajatiña jagía jilágubei lúma águdei jageíra.

⁸ Ába laríñagun joun lumúsuniña. “Aráanseeli sun cátei lun maríei, áni amísurajoútiña jagüra madúnamatiña lun jamísurajoúniwa.

⁹ Jeíba lubeíti luágu buri larígei úma, ábame jamísurajaniña sun ja úmatiña jadúnragua.”

¹⁰ Ába jóudin músu luágu buri úma, ába jóúndaruniña sun ja úmabaña jadúnragua, buítiña jáma wuríbatiña, ába tabuínchun múna jáu güriá.

¹¹ ‘Ábati lebélorun urúei aríjaña amísurajoútiña, ába laríjin ában wügüri le madáüragunti quei lun ában maríei ñi.

¹² Ába laríñagun lun. “Numáda, ¿ida liñági bebélorunbei ñájoun madáüragunga quei lun ában maríei?” Maní ligía.

¹³ Ába laríñagun urúei joun ja eténirubaña lún buri dábula. “Gürágua jumeí lugúdi lúma lújabu, fíjumei lídoun lubúriga le bougudibe, le ñíba lubeí layájua, acúnrijame lári.”

¹⁴ Ába laríñagun Jesúsu joun ja agáambubalin.

—Gíbetiña agúarútiña lun jebélorun lídoun larúeijan Búngiu, míbetiña anúadiruña.

Luáguti lafáyeirun liseínsuna gumádi

(Mr 12.13-17; Lc 20.20-26)

¹⁵ Ába jóudin fariséogu, ába júaradun aríja cába lan gayára lan jadügün lun jaríñagagüdüni Jesúsu cátei le uáguti gayára lan jadárirun lidúnrun.

¹⁶ Ábati jóúnajan jádaangiñe jánigu úara jáma jádaangiñe lánigu Heródes, aríñaga lun Jesúsu.

—Maésturu, subúdi wamúti luágu inárüni lan baríñagubei, luágu gíñe arúfuda báani lémeri Búngiu láu inárüni, manúfudeiga lueí ni ában, ladüga ni cáta lan luweírigun güriá bun.

¹⁷ Rúbei lubeíti barítangun woun. ¿Buítisan lun lafáyeirúniwa seínsu lun urúei Rómána ódi mabuíduntí?

¹⁸ Aríagu líña Jesúsu lun luríba jayúmajan, ába laríñagun joun.

—¡Biángua tigíbu jugúya le! ¿Ca uágu jíchaaja sádara nubá?

¹⁹ Arúfuda jumeí seínsu le áubei lafáyeijoúa liseínsuna gumádi nun.

Ába janügün ában seínsu le denáriu lun.

²⁰ Dan laríjini, ába lálügüdüniña.

—¿Ca iyáwa le luágubei seínsu le, lúma íri le bürüwañubei luágu?

²¹ Ába jaríñagun lun.

—Láni urúei Rómana.

Ábati laríñagun Jesúsu joun.

—Rújumeiti láni urúei lun urúei, rújumeime láni Búngiu lun Búngiu.

²² Dan jagáambunbalin le, ába laweíridun janígi, ába jígiruni, ába jóudin.

Áliügüdajani libügürü ásaaruni lídaangiñe oúweni

(Mr 12.18-27; Lc 20.27-40)

²³ Wéyu méme ligía, ába jóudin fiú saduséogu aríjei Jesúsu. Jaríñajare saduséogu luágu úa lan ásaaruni lídaangiñe oúweni. Ábati jaríñagun lun Jesúsu.

²⁴ —Maésturu, aríñagatí meja Moisés luágu ánjein lan oúwe ában wügürí le maríeiti masáaniguga táu lúmari, lúnti lan lamárieidun lamúlen túma würi to ueíboun louwe, lun gasáanigu lan táu lun líbugaña le oúwebei.

²⁵ Wel, ñíñanu méjati sédü gamúlenuguátiña ya wádan, ába lamárieidun le furúmiñeti, ába loúnwen. Quei masáanigu lubeí táu lúmari, ába lígirunun lun lamúlen.

²⁶ Ligía méme suséreti lun jabíaman, lárigiñe lun jürüwan darí lúmoun jasédün.

²⁷ Lárigiñe, ába gíñe toúnwen würi.

²⁸ Dánmeti jásaarun lídaangiñe oúweni, ¿cábati úmari würi tugúya jádaangiñe sédü gamúlenuguátiña ja, lárigiñe maríei jamá sun jagía túma?

²⁹ Ába laríñagun Jesúsu joun.

—Bulíeiguatün ladüga libídiñe tuáguti Lerérun Búngiu jun, ni luáguti lubáfu Búngiu.

³⁰ Dánme le jásaarun jiláaña lúnya jabágaridun, ámujalime jabágari, magámaridun jába, míchugun jamáñame jasáanigu lun maríei, queísi magámaridun jamá ánjeligu siélu.

³¹ Ánjeinti luágu sará jamá jiláaña lúnya jabágaridun, ¿malíijan jumágili le laríñagubei Búngiu gúanarü jun? Ítara líña laríñagun.

³² “Áu Lubúngiutebei Abrahám, Lubúngiute Isáac, Lubúngiute Jacób.” Ítara líña lubeíti, ánjein jamúga jiláañu jáña lubeí wügüríña jagía lun sun dan, maríñagunti jamúgati Búngiu luágu Jabúngiute lan, ladüga máma Jabúngiute jiláguaaña Búngiu, Jabúngiute wínwangiña.

³³ Dan jagáambunbalin gürígia cátei le, ába laweíridun janígi láu le larúfudajabei.

Gumádi le weírigutimaabei

(Mr 12.28-34)

³⁴ Dan le jasúbudirunbalin fariséogu luágu manígüda láaña lan Jesúsu saduséogu, ába jóundaragun,

³⁵ ñíñein ában jádaangiñe le arúfudajati lilúrudun Moisés, abúseeruti laríjin lábun Jesúsu, ába laríñagun lun.

³⁶ —Maésturu, ¿cásan gumádi weírigutimaabei lídan lilúrudun Búngiu?

³⁷ Ába laríñagun Jesúsu lun.

—“Jínsiñelá Babúreme Búngiu bun táu sun banígi, táu sun buwáni, láu sun bisáminan.”

³⁸ Niján gumádi weírigutimaabei, furúmiñeti gíñe lídaangiñe sun lugúmadin Búngiu.

³⁹ Áni le libíaman lídan uweíriguni lenége le, ítara líña. “Jínsiñe jamá bíbirigu bun quei bínsiñegua búngua.”

⁴⁰ Bián gumádi le, ligía ébuubei lun sun lilúrudun Moisés lúma jarúfudajan profétagu.

*¿Ca adügawagun Crístu?
(Mr 12.35-37; Lc 20.41-44)*

⁴¹ Sun añája lan fariséogu oúndaragu,

⁴² ába laríñagun Jesúsu joun.

—¿Cásan jarítagebei libügürü Crístu le lanúadirubei Búngiu lun lasálbaruniña gürígia? ¿Cásan adügawagun?

Ába jaríñagun lun.

—Ladügawagun David.

⁴³ Ábati laríñagun Jesúsu joun.

—¿Ída liñáti lagúarunbalin David quei Abúremein, láu lubáfu Sífiri Sándu? Aríñagatiga David.

⁴⁴ Laríñajare Búngiu lun Nabúreme.

“Ñurúba núma lueígiñe nouñwenren daríme níchuguniña báganiñu bújaburugun.”

⁴⁵ ¿Ída lubáti ladügawagun lan David Crístu ánjein wá lubali David guánarü Crístu Nabúreme?

⁴⁶ Úati ni ában gayáraati loúnabun ni ában dimúrei, lúmagiñeti wéyu ligía, manígiti ni ában lun liábin álügüdaguei.

23

*Líchugun Jesúsu jadúnrun fariséogu jáma arúfudajatiña lilúrudun Moisés
(Mr 12.38-40; Lc 11.37-54, 20.45-47)*

¹ Ábati laríñagun Jesúsu joun láni disípulugu jáma jíbiri gürígia ja ñibaña.

² —Gabáfutiña arúfudajatiña lilúrudun Moisés jáma fariséogu lun jafúnraanguagüdüni líla lilúrudun Moisés.

³ Agáamba jumáña lubeiti, adüga jumeíme sun le jaríñagunbei jun, le jadügübei, mafálara jumei ladüga aríñagatiña ában cátei, jadüga ámu.

⁴ Rújamuti gumádi joun gürígia queisi anügüni jürüti le siñábei lanügüniwa, ánjein jagía, madügüntiña ni cáta lun jíderaguniña gürígia luágu buri anügüni lánina lúrudu le jíchugubei jawágu.

⁵ Jadügüni sun cátei lun jaríjiña gürígia. Jínsiñeti joun lun jíchugun tirájüñü gáfu táu Lerérun Búngiu jeréberugu lúma luágu buri jarüna, lúma lun jadáüragun anáanguni to durúrutu.

⁶ Buséntiña járügüdüni lubuídun-ágei ubáraü lídan eígini lúma jalaü le jala weírigutiña tídan jalígilisin.

⁷ Buséntiña lun jabúsurun gürígia joun láu sarágu inébesi úmada, lun gíñe lagúarúniwa joun, “maésturugu”.

⁸ “Ánjein jugúya, mígira jumá lun laríñawagúniwa jun, “maésturugu”, ladüga sun jugúya ában jáu, áni ában rügüñein gíñe Jumaésturun, áu le Crístubei.

⁹ Mariñaga jumá gíñe “núguchi” lun ni ában wügüri ubouágu lídan ligáburu jagúaruni Búngiu le siélubei “Núguchi”.

¹⁰ Mígirun jugúyame lun laríñawagúniwa jun “ábutigu” ladüga Crístu rügüñein Jábuti.

¹¹ Le esériwidubei joun jíbiri, ligía weírigutimaabei jídan,

12 ladüga le anáanguti lúngua weíri, lúnabudagüdüwaba, ánjein le anáanguti lúngua ünabu, laweíridagüdüwaba.

13 ‘¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu!, ladüga darú jumuti lubéneri arúejani le lánina siélu lueí jebélurun ámu, mebélu jugúyati, mígirun lun jebélurun ja busénbaña jebélurun.

14 ‘¡Fugiábugu jugúya, arúfudajatiña lilúrudun Moisés jáma fariséogu! ¡Biángua tigíbu! Gidá jumutu jában würiña ja jiláaña úmari jaweí, lúnti ibídiñewa lan, ába jadáagun ayúmuraguni lun Búngiu le migínaguti. Ligía weíritimaabei lubeí jasúfurirun lueígiñe.

15 ‘¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Eíbuga jumúti múa, áfayaja jumeí barána áluaja gürígia lun jánigume, dánti le ibíja jumáli le jabúseerubei, ába jadügüniña gürígia jagía bián weíyaasu lúntima jóúdin máfiougati sügü jáu.

16 ‘¡Fugiábugu jugúya, adúndejetiña maríjintiña! Aríñagatün luágu le lan gürígia íchuguti dimúrei, ánjein áfiñura tuágu témpulu mála lan líra, áni ánjein lan áfiñura luágu tigóluna témpulu, aná lan líra, lúnti lan lagúnfulirun.

17 ¡Ibídiongua líña jáu, maríjin! ¿Cági weírigutimaabei, gólu ódi témpulu to adügüboun lun sagráubei lan gólu?

18 Aríñagatün gíñe luágu ánjein lan íchiga gürígia dimúrei lun láfiñurun luágu latárü, mála lan líra, áni ánjein lan áfiñura luágu cátei le adágaragüdüwabei luágu latárü, aná lan líra, lúnti lan lagúnfulirun.

19 ¡Ibídiongua líña jáu, maríjin! ¿Cági weírigutimaabei, cátei le luágubei latárü ódi latárü le adügübalin cátei ligía lun sagráubei lan?

20 Le áfiñurubei luágu latárü, máma rügüñein luágu latárü láfiñurun, láfiñuruña gíñe luágu sun le ligíbuagubei latárü.

21 Le gíñe áfiñurubei tuágu témpulu, máma rügüñein gíñe tuágu témpulu láfiñura, láfiñuruña gíñe luágu Búngiu le aganoúbei tídan.

22 Le gíñe áfiñurubei luágu siélu, láfiñuruña gíñe luágu lála Búngiu, lúma gíñe luágu Búngiu le añúurubei luágu jalaü ligía.

23 ‘¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Adügatün díisi fáreinti láu jíduru le ménta, anísi, lúma comíno lun jíchugun ában fáreinti lun Búngiu, áni mebéresentün láu arúfudajani le weírigutimaabei lídan lilúrudun Búngiu, queí buri lun jadügüni sun cátei láu úraguni, lúma lun jagúdemedun gürígia jun, lúma lun jagúnfulirun lúma Búngiu. Ligía buri cátei le lúnbei jadügüni, mígirunga jumeíme jadügüni le líbiri.

24 ¡Jugúya, adúndejetiña maríjintiña jugúya le, áseija jumúti ában mínímini áni julútün ában caméyu!

25 ‘¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Adügatün lun jarítangun gürígia luágu buídu lan jigáburi. Ítara jíña quei wéru lúma asíedu le jachíbubei bougudigiñe libíti, ánjein múnadagiñe jibíti, buin jíña láu buri luweínamu-águu lúma íweruni.

26 Fariséogu maríjintiña. jarúmagüda jumeí wéru lúma asíedu lurágeirugugiñe furúmiñe, ábame gíñe larúmadun bougudigiñe libíti.

27 ‘¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Ítara jíña quei umúajaü le afeíndijóuti láu jarúti bougudigiñe libíti, buídumeraüti larijín, ánjein lurágeirugugiñe, buin líña láu jábu jiláaña lúma sun luwúyeri iwíyei.

28 Ítara jíña, bougudigiñe jibíti, ma lubuúdu jaríjiniwa jagíbugiñe gürígia, ánjein múnadagiñe, buin jíña láu iyéerejabuni lúma wuríbani.

²⁹ ¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Rújumuti dúbü arítaguagüleime luágu jamúaja profétagu, wéndegüda jumeí umúajaü le jáni gürígia já meja buídubaña.

³⁰ Ábati jariñagun. “Lun jamúga meja awánjeinjadiwa lan le jadáni binádu wagübürigu, míderagun wamútiña jamúga áfaraguaña profétagu.”

³¹ Láu líra, subúdiguatün júngua luágu jádaangiñetün lan ja áfaragubaliña profétagu jagía.

³² ¡Gumújumeiti jadügüni lé meja jagúmeserubei binádu jagübürigu adüga!

³³ ¡Jéwegu! ¡Jarásan jéwegu! ¿Ída lubásan jeséfurun lueí asúfuriruni le lánina máfiougati?

³⁴ Ligía nouñajaba lubeí profétagu, jáma ja chúbaña áu, jáma arúfudajatiña, jun. Áni jugúya, jáfaragubaña jádaangiñe, dágua jumáñame jíbiri luágu gurúwa, bei jumáñame jíbiri tídan jalígilisin juríu, eíbaaja jumáñame lídan sun fulásu.

³⁵ Ítara lúba láburujan dúru juágun luágu sun jítaü le áwiurubei jádaangiñe sun wügüríña buítiña ja jáfarawagúbaña, lúmagiñé meja Abél le richáguabei darí lúmoun Zacarías, liraü Berequías lé meja jáfarubei tabádinagua témpulu lúma latárü.

³⁶ Ninárün jáu luágu láburujaba lan dúru jawágun gürígia ja lánina dan le luágu buri sun cátei le.

*Layájun Jesúsu jawágu lílana Jerusalén
(Lc 13.34-35)*

³⁷ ¡O jugúya Jerusalénna! ¡Áfaragua jumáaña profétagu, chügua jugúya dúbü jawágun ja loñajabaña Búngiu láu ugánu buíti jun! ¡Sarágu weíyaasu nálugun natoúnigirunün quei tatoúnigiruniña gáyu tirájüñü lábugiñe tarüna, májatün!

³⁸ Ígira láadün Búngiu,

³⁹ áni naríñajare jun luágu maríjindügüya jumáadina lan queísi jasálbaragüle daríme lachülürün dan lun jariñagun. “Biníwati le ñübinbei lídan líri Wabúreme Búngiu.”

24

*Lariñagun Jesúsu luágu tagünrinchawagúba lan témpulu
(Mr 13.1-2; Lc 21.5-6)*

¹ Dan le láfuridun Jesúsu témpulurugugiñe, leíbuga yebe, ligía jayábin láni disípulugu lúmoun, ába jarúfudun tuágun témpulu lun.

² Ába lariñagun Jesúsu joun.

—¿Aríja jumútu sun to? Ninárün jáu luágu merédebei lan ni ában dúbü ligíbuagu dúbü, tagünrichawagúba sun to.

*Seíni buri lubáragiñe lagúmuchun uboú
(Mr 13.3-23; Lc 21.7-24, 17.22-24)*

³ Ábati jóudin luágu wübü Olívos, dánti ñun lan Jesúsu ñi, ába jóudin láni disípulugu agülülüja lúma, ába jariñagun lun.

—Buséntiwa lun bariñaguni woun ídaba lan tagünrinchawagúba témpulu. ¿Cába liseíni bagíribudun uboúagun, lúma lagúmuchagüle?

⁴ Ába lariñagun Jesúsu joun.

—Toúnigi jumá lun úa lan ayéedutün,

⁵ ladüga sarágujaba ñübintiña aríñageina. “Áu Crístubei”, áni sarágujaba jayéedun.

⁶ Jugúya jagáambuba lamúri wuríbu yaráfa jun lúma ugánu luágutí buri wuríbu díseti jueí, manúfudedagua jumá. Lúnti ítara lan, mámagilíme lagúmuchagüle uboú líra.

⁷ Lageíndaguba ában ageíraü lúma ában, lawúribujaba ában fulásu lúma ában, ñíbei ilámaü, sándi, járabaganáli lídan sarágu fulásu.

⁸ Sun líra lagúmesejarügügili le lúnbei lasúfurirúniwa.

⁹ ‘Jugúyati, jedéregerúaba lun lúru du lun jasúfurirawagüdün, lun gíñe jáfarawagúniwa jilágubei, jiyéereegudúba lun sun uboú nueígiñe.

¹⁰ Lídaanme dan ligía, sarágujaba eféridiruti jafíñen nuágu, ábame jeyéereegudún joúniwagua, ábame jalúguragun joúniwagua.

¹¹ Jachúlaaguba sarágu yéetiña aríñaga luágu profétagu jamá áni sarágujaba gürígia jayéedun.

¹² Ñíbei sarágu wuríbani daríme lun jeféridiruni sarágu jádaangiñe lánigu Búngiu ínsiñejabuni jádaangua.

¹³ Le asígiruti derégüdagu darí lúmoun lagúmujoún, lasálbarúba.

¹⁴ Lapúrichijoúba ugánu buíti le luáguti larúeijan Búngiu lídan sun uboú lun lasúbudirúniwa lídan sun fulásu, ligíaalímeti lagúmuchun uboú.

¹⁵ ‘Abürüjatí meja proféta Daniél luágu cátei iyéereguti le gagünrinchaguagüdadabei, dánme le jaríjin chülújali lan cátei le lídoun fulásu le sánduti—le alíjabei, gunfaráandalá—,

¹⁶ jámeti Judéabaña, lúntime janúrajan luágun buri wübü.

¹⁷ Léme tábulugubei lúban wéyu ligía, marárialá aságara ni cáta múnadagiñe,

¹⁸ le áraabubei, magíribudalá ni abúdoun lanáangun.

¹⁹ ¡Fugiábugume würíña ja dageínatiña o ja lan gasáanigutiña ja gurágiña lídounme wéyu ligía!

²⁰ Amúriaja jumá lúma Búngiu lun máma lan lídan lidíliga ni lídan luwéyuri eméraaguni janúraja.

²¹ Ladüga ñíbei sarágu súfuri le úagili líbe lúmagiñe lagúmeserun uboú, úabei gíñe lárigiñe.

²² Lun jamúga madúraagun lubeí lan Búngiu dan ligía, úati jamúga ni ában asálbaruti, ladúraagubei jawágurügü ja lanúadirubaña lun lánigu jamá.

²³ ‘Ánjein lubeíti aríñawagua jun. “Niján Crístu” o “Ningítan lan”, mafíñera jumá,

²⁴ ladüga jayábinba ayéejatiña lun jarúfudagun joúngua camá Crístu, camá buri profétagu, áni jadáaguba oúnwenbun buri seíni lúma miláguru lun jeyéedaguniña ja anúadira láañabaña Búngiu ánjaña gayára.

²⁵ Aríñaga náali le jun lubáragiñe lasúseredun,

²⁶ ligía lubeíti, ánjein aríñawagua jun. “Níjein Crístu yára lídan fulásu le mageírawati”, mídin jumá ñi, ánjaña aríñaga jun. “Niján ya rúmurugu”, mafíñera jumá.

²⁷ Quei larijiniwa labírichagun lueígiñe ában oúbaü libíti siélu lun luágun le ában, ítara lúba dánme le niábin, aú le Wügüri Garaüwarügüti.

²⁸ Ábame láburujan ligáñi Búngiu jawágun gafígountiña quei wadúbi luágun úgubu jiláali.

Seíni buri lubáragiñe lagíribudun Crístu uboúagun

(Mr 13.24-37; Lc 21.25-33, 17.26-30, 34-36)

²⁹ ‘Lárigiñerügüme lásügürün wéyu buri lánina súfuri ligía, ábame labúrigadun wéyu, marúnijalime játi, ábame jeíguadúnga warúguma ja siélubaña, ábame ladádagun sun siélu.

³⁰ Ábameti jaríjini niseíni siélu, súnme gürígia wuríbatíña uboúagu, jayájuaajaba láu jaríjini niábinya, áu le Wügüri Garaüwarügüti, lídan juánriñu siélugiñe láu oúnwenbun ubáfu lúma uweíríguni.

³¹ Dánme línwirúniwa fídu rein, ábame noúnajaniña nání ánjeligu ja siélubaña lun joúndaruniña nánigu ja anúadira náañabaña lídaangiñe gádürü larígei uboú.

³² ‘Furéndeí jumeí jémpulu le tuáguti tídibu ígo. Dan le ñulúgili tilímun, ába laboúchun tubána, subúdi jumúti luágu yaráfaali lan lubáchouga.

³³ Ítara méme, dánme gíñe jaríjini sún buri cátei le, subúdi jumeí luágu yaráfaali lan niábin.

³⁴ Ninárün jáu, luágu lagünrinchawagúba lan sun ubúrugu le Jerusalén lubáragiñe joúwegun gürígia ja lánina dan le.

³⁵ Lagúmuchaguba siélu lúma uboú, ánjein nerérun, merédebei magúnfulirúnga.

³⁶ ‘Ánjeinti luágu wéyu lúma óra le lúnbei nagíribudun uboúagun, ibídiñeti ni ca un, ni joun ánjeligu ja siélubaña, ni nun, áu le Liraü Búngiu, Búngiu rügüñein Úguchili asúbudirei.

³⁷ ‘Ítara queí meja lasúseredun lídan meja lidáani Noé, ítara lúba gíñe dánme le niábin, áu le Wügüri Garaüwarügüti.

³⁸ Lídan meja dan ligía, lubáragiñe ladíbirun uboú, jerédera meja gürígia eíga, áta, amárieidagua, íchaajaña jasánigu lun maríei, darí wéyu le lebéllurunbei Noé tídoun ugúnein.

³⁹ Meféentiña, darí ladíbirun uboú, ába jañáradagun súngubei. Ítara lúba gíñe dánme niábinya, áu le Wügüri Garaüwarügüti uboúagun.

⁴⁰ Lídaanme dan ligía, ñíbaña bián wügüriña áraabu, lanügüba ában, igirúame le ában según jafíñen nuágu.

⁴¹ Ñíbaña bián würiña amúlija, tanügüba ában, igirúame to ában.

⁴² ‘Agágudúañu jumá, ladüga ibídiñeti jun cába lan óra niábin, áu le Jabúreme.

⁴³ Subúdi jumeí le, luágu ánjein lan jamúga lasúbudira tabúreme ában múna cába lan óra liábin jíweruti áriebu, leréderuña jamúga marúmugunga, mígirunti jamúga lun lebéllurúniwa íweruja lúbiñe.

⁴⁴ Ligía aráanseñu jumá lubeí, ladüga léme óra magáradajan jumá, ligíame niábin, áu le Wügüri Garaüwarügüti.

*Músu le úaraguabei, lúma le múaragúnbei
(Lc 12.41-48)*

⁴⁵ ‘Ítara jumá queísi músu úaraguati, gunfaráanda ligía, le lígirubei liyúbudiri lun laríjin jáu ja lúbiñebaña lun líchugun eígini joun lídan dan.

⁴⁶ Gúndaabei músu le dánme le liábin liyúbudiri ánjein ladárrira agúnfulira lúma lifísiute.

⁴⁷ Ninárün jáu luágu líchugubei lan liyúbudiri lun laríjin láu sun lumégen.

⁴⁸ Ánjein ában lubeí wügüri wuríbatí músu ligía, ábame larítagun luágu lügili lan liábin liyúbudiri,

⁴⁹ ábame lagúmeserun oúserañe jíbiri músu wuríba, reídei ligíame eíga lúma áta jáma bacháruatiña,

⁵⁰ ábameti liábin liyúbudiri lídan wéyu le magúrabun láani, lídan óra le ibídiñeti lun.

⁵¹ Ábame líchuguni luweírín-ágei abeichúni luágu, lasíadireime lun máfiougatin úara jáma biángua tigíbu, ábame layájun, acünrijame lári.

25

Jémpulu jawáguti dísi würiña irájüñü

1 Ába laríñagun Jesúsu.

—Ítara lubáti arúejani le lánina siélu quei díisi würíña irájüñü ja anügübaña jalámpun le gálati gási, ába jáfuridun lun jadúnragun lúma adári, ñüdüñ jamámuga úara lúma maríeirugun.

2 Seíngü jádaangiñe, maráanseruntiña, seíngü aráansetiña.

3 Ja maráanserunbaña, dan le janügünbalin jalámpun, manügüntiña ámu gási lueí le lídaanbei jalámpun,

4 ánjañati ja aráansebaña, barütiña jabúdein láu gási bougudin lueí le lídaanbei jalámpun.

5 Queísiti ladárasarun adári, ába ladábudunga jágu súngubei, ába jarúmugun.

6 Queí buri luágu amídi áriebe, ligía lagaambúniwa agúaraguni. “Niteín adári, furíjuma adúnraguei.”

7 Sun würíña irájüñü jagía, ába jásaarunga, ába jagúmeserun aráansejei jalámpun.

8 Ába jaríñagun ja maráanserunbaña joun ja aráansebaña. “Rújuma murúsun lídaangiñe jigásin woun, ladüga léñeguchuña walámpun.”

9 Ába jaríñagun ja aráansebaña joun. “Siñáti, ladüga louguabei woun, louguame jun. Jeíbagubei le ñí lubei lalúgurajoúa agáñija jumámuga júngua.”

10 Léti añángüra lan ja maráanserunbaña agáñija gási, ligía liábin adári. Játi aráansebaña, ába jebélurun lúma maríeirugun, ába ladaurúniwa béna.

11 Lárigiñe, ligía jachülürün jíbiri würíña irájüñü jagía, ába jaríñagun. “¡Wabúreme, wabúreme, darábei béna wabá!

12 Ába laríñagun joun. “Nínárün jáu, ibídiñetün nun.”

13 Ábati laríñagun Jesúsu joun.

—Agágudúañu jumá, ladüga ibídiñeti jun cába lan wéyu, ni cába lan óra nagíribudun, áu le Wügüri Garaüwarügüti, ubouágun.

Jémpulu luáguti seínsu

14 Ítara líña arúejani le lánina siélu quei ában wügüri le dan lébei laráansejan lun ladügün weíyaasu lídoun ámu fulásu, ába lagúarun joun lumúsuniña, ába líchuguni líseínsun lábugiñoun jaríaaan.

15 ‘Lun ában jádaangiñe, rúti queí buri seíngü-mílu fiádürü, queí buri bián-mílu lun ában, queí buri mílu lun ában. Lafánreinjani joun quei jabáfu lun jawádigimariduni. Ábati lídin luágu luweíyasun.

16 Le músu le erésibirubei seíngü-mílu fiádürü, ába luwádigimariduni, ába lagáñeirun seíngü-mílu fiádürü ligíbuagun.

17 Ítara méme le erésibirubei bián-mílu, gáñeiti bián-mílu lánwoun.

18 Ánjeinti le erésibirubei mílu, ába lídin, ába lachígin ában júyu, ába larámuduni líseínsun liyúbudiri ñi.

19 ‘Sarágu dan lárigiñe, ába lagíribudun iyúbudiri, ába lagúmeserun aráanseja jáma luágu seínsu.

20 Furúmiñe, ába liábin le erésibirubei seíngü-mílu fiádürü, ába ledéregeruni lun liyúbudiri láu seíngü-mílu le lagáñeirubei ligíbuagun, ába laríñagun lun. “Niyúbudiri, seíngüñein-mílu fiádürü bíchugun nun, niján seíngü-mílu nagáñeirun ligíbuagun.”

21 Ába laríñagun iyúbudiri lun. “Buíti, ában músu buíti amürü, úaragua, quei úaragua bubeí lídan le murúsunrügüti, níchiga gíbetimaati lábugiñe baríaaan. Queímoun, gúnda amürüme úara núma.”

22 Lárigiñe, ába liábin le erésibirubei bián-mílu fiádürü, ába laríñagun. “Niyúbudiri, biámañein-mílu fiádürü bíchugun nun, niján bián-mílu nagáñeirun ligíbuagun.”

23 Ába laríñagun liyúbudiri lun. “Buíti, ában músu buíti amürü, úaragua, quei úaragua bubei lídan le murúsunrügüti, níchiga gíbetei lábugiñe baríajaan. Queímoun, gúnda amürüme úara núma.”

24 Ligía liábin le erésibirubei mílu fiádürü, ába laríñagun lun liyúbudiri. “Niyúbudiri, subúdigubei numúti luágu wügüri ban jéreguti, alúbaja ban le ñí lumuti mábunagun ban, abúdaja amürü le ñí lumuti machágarun ban ni cáta.

25 Ligía nanúfudedunbei, ába nídin arámudei biseínsun lábugiñe múa. Niján le báni.”

26 Ába laríñagun iyúbudiri lun. “Músu wuríbati, moúnti. Subúdigubei bíñein luágu alúbaja nan le ñí lubei mábunagun nan, abúdaja áu le ñí lubei machágajan nan ni cáta.

27 Ligía lúnti lubei jamúga bíchuguni niseínsun báncürugun lun dan lan jamúga nagíribudun, nerésibiruni le náni láu agáñeiruni.”

28 Ába laríñagun joun ja ñíbaña. “Gidájumei seínsu le lúmabei lueí, rújumei lun le láubei dísi-mílu,

29 ladüga le adügübei buíti láu le lúmabei, líchugúba lánwoun lun, ábanme lígiragun lun, ánjein le madügübei buíti láu murúsun le lúmabei, lagídarúaba lueí.

30 Músuti moúnti le, fíjumei lídoun lubúriga le bougudibei, le ñíba lubei layájuaja, acünrijame lári.”

Jagúseragüdüniwa sun gürígia

31 ‘Dánme nagíribudun, áu le Wügüri Garaüwarügüti, ubouágun, niábinba quei urúei geyégu ánjeligu náu, ábame nañúurun luágu nála láu uweiriguni lun nagúseragüdüniña sun gürígia.

32 Ábame jóundaragun gürígia ja lílana sun fulásu nigíbugiñe, ábame nafánreinraguniña jawáriuagua quei lafánreinraguniña jóuniri mudún, mudún jádaangiñe gábara.

33 Ja richáguabaña ligíbugiñe Búngiu, ábame níchuguniña lueígiñe noúnwenren, ja wuríbabaña ligíbugiñe Búngiu, lueígiñebaña nubaüna.

34 Naríñagame joun ja lueígiñebaña noúnwenren. “Jigoúgu, jugúya le biní laalíbei Núguchi, resíbi jumeí arúejani le aráanserúbei jubá lúmagiñe ladügüni Búngiu ubou.

35 Ladüga dan le nalámachunbei, rütün eígini nun, dan le namágürabudunbei, rütün dúna nun, dan le eíbugañaja nubei quei chülüdügüti, rütün múna nun.

36 Dagáti manáanguni nuágu, rütün anáanguni nun, dan le nasándirunbei, ñüdüntün aríjana, dan le nadaürünbei, ñüdüntün aríjana.”

37 Ábameti jaríñagun richáguatiña jagía nun. “Wabúreme, ¿ída bugagí waríjabu láu ilámaü, ába wíchugun eígini bun? ¿ída bugagí waríjabu láu mágürabu, ába wíchugun dúna bun?

38 ¿Ída bugagí waríjabu quei chülüdügüti, ába wíchugun múna bun? ¿o manáangunga, ába wíchugun anáanguni bun?

39 ¿Ída bugagí waríjabu láu sándi o furísunrugu, ába woúdin aríjabu?”

40 Ábame naríñagun joun. “Nínárün jáu, furúmieguarügü cátei le jadügübei lun ában jádaangiñe namúlenu, ca lan lúnabunbei, nun méme jadügei.”

41 ‘Naríñagameti joun ja lueígiñebaña nubaüna. “Díse jumá nueí, jugúya le lúnbei jasúfurirun lun sun dan, jeíba lídoun wátu geméti le méñeguchadibei, le aráanserúbei lubá Máfia jáu lánigu.

42 Ladüga dan le nalámachunbei, míchutün eígini nun, dan le namágürabudunbei, míchutün dúna nun.

43 Eibugatina quei chülüdügüti, míchutün múna nun, mégeitina anáanguni, míchutün nun, sánditina, daüwa áu, mídintün aríjana.”

44 Ábame jaríñagun wuríbatiña jagía nun. “Wabúreme, ¿ída bugagí waríjabu láu ilámaü o mágürabu, o quei chülüdügüti, o manáangunga, o láu sándi, o furísunrugu, míderagun wamútibu?”

45 Nariñagame joun. “Ninárün jáu, luágu furúmieguarügü lan cátei le madügün jubei joun gürígia, ca lan lünabunbei, madügün jumúti gíñe nun.”

46 Ábameti jóudin ja máfiougatin lun jasúfurirun ñi lun sun dan, jámeti richáguabaña ligíbugiñe Búngiu, ábame jóudin siélun lun jagúndaarun ñi lun sun dan.

26

Aráansejani lun lárügüdüniwa Jesúsu

(Mr 14.1-2; Lc 22.1-2; Jn 11.45-53)

1 Dan aríñaga láali Jesúsu sun cátei le, ába laríñagun joun láni disípulugu.

2 —Quei jasúbudiruni, bián wéyu lárigiñe le, ligíame fédu le páscua, áni nedéregerúaba, áu le Wügüri Garaüwarügüti, lun nádarawagún luágu gurúwa.

3 Ába jóúndaragun jábutigu fádirigu, arúfudajatiña lilúrudun Moisés, jáma wügüriña weírigutiña lídan jafiñen juríu tigíbugiñe lúban Gáifasi, fádiri le íñutimaabei.

4 Ñi jaráanseja luágu Jesúsu lun járügüdüni láu yéguau, lun jáfaruni jilágubei.

5 Jaríñagati.

—Máma látia fédurugu luei jachágaragun gürígia.

Tájuduraguni ában würi lábulugu Jesúsu

(Mr 14.3-9; Jn 12.1-8)

6 Betániañein Jesúsu, lúbiñe Simón lé meja gawágubei gumeín luágu sun lúra,

7 ába tiábin ában würi luágun, gámeina tugúya ában lágei ibíñei le weíriti lisérun. Dan luáguñein lan dábula Jesúsu, ába téseruni ibíñei ligía lábulugun.

8 Dan jaríjinbaalin disípulugu cátei le, ába jamágundarun, ába jaríñagun.

—¿Cámesan leféridirúa le ítara?

9 Gayáraati jamúgagu lalúgurúniwa le luágu sarágu seínsu lun jíderawagún gudémetiña.

10 Ába lagáambuni Jesúsu le jaríñagubei, ába laríñagun joun.

—¿Ca uágu jañáwuriya tun würi to? Cátei buíti le tadügübei.

11 Súnwandan yábaña lan gudémetiña júma, ánjein áu, mámaba súnwandan júmanan.

12 Le tadügübei würi to láu téseruni ibíñei le nuágun, taráanseruñádina lubá nábunúniwa.

13 Ninárün jáu luágu le lan ñi lumuti lapúrichijoúa ugánu luáguti asálbaruni lídan sun ubou, labájüdawagúaba gíñe le tadügübei würi to, lun larítawagún tuágu.

Lalúguruni Júdas Jesúsu

(Mr 14.10-11; Lc 22.3-6)

14 Ába lídin ában jádaangiñe dúusu disípulugu, le gíribei Júdas Iscarióte, adímureja jáma jábutigu fádirigu.

15 Ába laríñagun joun.

—¿Atiribei jíchugun nun ánjein nedéregera Jesúsu jun?

Ába jíchugun darándi murúsun pláta lun.

16 Lúmagiñeti óra ligía, ába lálujan Júdas ída lúba lan luwúyeri ledéregeruni Jesúsu joun.

Lagúmujoún leígin Jesúsu jáma lánigu

(Mr 14.12-25; Lc 22.7-23; Jn 13.21-30, 1 Co 11.23-26)

17 Le furúmiñeti wéyu lídan fédu le ñí lubei teigúa fein magánatu ísi, ába jayábin disípulugu lúmoun Jesúsu, ába jaríñagun lun.

—¿Jalía babúseera waráanserun lun ñíba lan wadúgei eígin le lánina páscua?

18 Ába laríñagun joun.

—Jeíba ubúru, lúbiñe ítaga wügüri, ábame jaríñagun lun. “Ítara líña laríñagun Maésturu. Yaráfaali nórate, búbiñeba nefédujei páscua jáma náni disípulugu.”

19 Ába jadügüni disípulugu quei laríñaguni Jesúsu joun, ába jaráanseruni eígin le lánina páscua.

20 Dan le lagúñedunbei, ába lañúurun Jesúsu luágu dábula jáma láni dúusu disípulugu,

21 súnti añája lan eíga, ába laríñagun joun.

—Nínarün jáu luágu lalúgurubadina lan ában jídaangiñe.

22 Ábati jajírudagun, ába jagúmeserun álügüdei ában ában.

—Nabúreme, ¿nugúya funásan?

23 Ába laríñagun joun.

—Le éderutu leígan fein núma lídan asíedu, ligiába alúgurana.

24 Nídiña, áu le Wügüri Garaüwarügüti, luágu úma le uágubei taríñaga Lerérun Búngiu, áni ¡fugíabutia wügüri le alúgurutina! Buítimaati jamúga lun magüriajouágubei lan.

25 Ábati ladímurejan Júdas, ába lálügüdajan.

—Maésturu, ¿nugúya funásan?

Ába laríñagun Jesúsu lun.

—Ánja, bugúya.

26 Dan añája lan eíga, ába lanügünun Jesúsu fein lújaburugu, ába leteíngiruni Búngiu tuágu, lásun lagúbachagunun, ába líchugunun joun láni disípulugu, aríñageina.

—Joújuma, núgubu le.

27 Lárigiñe, ába lárügüdün ában wéru buin táu diweín lújaburugu, ába leteíngiruni Búngiu tuágu, ába lásügüragüdüni joun, aríñageina.

—Gurájuma lídaangiñe le, sun jugúya.

28 Níta le, le añúuragüdübalin iséri darádu, le gíñe áwiyurubei joun sarágu gürígia lun ferúdunawa lan jafígoun.

29 Naríñajare jun luágu mátundügüyaadina lan diweín daríme wéyu le lúnbei nátunun iséri tuwúyeri diweín júma lídan larúeijan Nóguchi Búngiu yágüta siélu.

Laríñaguni Jesúsu luágu leyéedaguba lan Pédro láu

(Mr 14.26-31; Lc 22.31-34; Jn 13.36-38)

30 Lárigiñe jerémujani urému luágu Búngiu, ába joúdin luágu wübü Olívos.

31 Ába laríñagun Jesúsu joun láni disípulugu.

—Sun jugúya, jasándiraguba júngua láu magúraasuni nuágu áriebu le, ladüga laríñajare tidan Lerérun Búngiu. “Náfarubei joúniri mudún jilágubei, ábame jeréderun mudún chagágu.”

32 Lárigiñeme násaarun lídaangiñe ouweni lúnya nabágaridun, nídiiba Galiléa jubáragiñe.

33 Ába laríñagun Pédro lun.

—Gayáraati járügüdün súngubei magúraasuni buágu, nugúya no.

³⁴ Ábati laríñagun Jesúsu lun.

—Nínárün báu luágu áriebu méme lan le, lubáragiñe layúgurujan gáyu, beyéedaguba náu úrúwa weíyaasu.

³⁵ Ába laríñagun Pédro lun.

—Gayáraati nouñwen búma, meyéedagunbadina báu.

Ligía méme giñe jariñaga sun disípulugu.

Layúmuragun Jesúsu lun Búngiu, Getsemani

(Mr 14.32-42; Lc 22.39-46)

³⁶ Ábati lachúlürün Jesúsu jáu láni disípulugu lídoun ában fulásu gíriti Getsemani, ába laríñagun joun.

—ñurújuma ya, neíbuga ayúmuragua lun Búngiu yára.

³⁷ Ába lanüğüni Pédro jáma bián lirájüñü Zebedéo lúmagua, ába jagúmeserun asándira íruni lúma tigári anígi.

³⁸ Ábati laríñagun joun.

—Sandítina ában íruni le lánina ouweni tídan nuwáni. Reídei jumá ya, agágudúañu jugúyame núma.

³⁹ Ábati lídin Jesúsu lubáruaguoun mémeraü, ába lájuduragun láu ligíbu múarugun, ába layúmuragun lun Búngiu ítara.

—Núguchi, ánjein gayára lubei, adügabá lun masúfurirun náani cátei le lúnbei nasúfuriruni, mámalá quei nabúseerun, queilá babúseerun.

⁴⁰ Ábati lagíribudun le ñíjin jabeí láni disípulugu, ába ladáriruniña arúmuga, ába laríñagun lun Pédro.

—¿Siñátísán buga jeréderun agágudúañu núma ni ában óra?

⁴¹ Agágudúañu jumá, ayúmuragua jugúyame, máburujan jumámuga lídoun ínchajoúni lun jeféridiruni jafiñen nuágu. Inárüni luágu ánja tan juwáni lun cátei le buídubei, ánjeinti júgubu, débiliti.

⁴² Ábaya lídin luágu libíaman weíyaasu, ába layúmuragun ítara.

—Núguchi, ánjein siñá lubei masúfurirun náani le lúnbei nasúfuriruni, adügüwalá bugúndan.

⁴³ Ábaya lagíribudun, ábaya ladáriruniña láni disípulugu arúmuga ladüga weírijali lidábu jágu.

⁴⁴ Ába lígiruniña, ábaya lídin ayúmuragua luágu lürüwan weíyaasu, aríñageina méme dimúrei ligía.

⁴⁵ Ábati lídin le ñíjin jabeí láni disípulugu, ába laríñagun joun.

—¿Jarúmuguña mémesan, eméraagua jugúya? Chülüjali óra lun nedéregeruniwa, áu le Wügüri Garaüwarügüti, jájaburugun gafígountiña.

⁴⁶ Sarájuma, queímoun lubároun le lúnbei lalúgurunina, níteeli.

Janüğüni Jesúsu adáüra

(Mr 14.43-50; Lc 22.47-53; Jn 18.2-11)

⁴⁷ Ñígili Jesúsu adímureja, ligía liábin Júdas, le ábanbei jádaangiñe dúusu disípulugu, jáu sarágu güriquia táu efeín lúma wéwe. Jayábin lueigiñe jóubadina jábutigu fádirigu jáma wügüriña weírigutiña lídan jafiñen juríu.

⁴⁸ Aríñagaaliti buga Júdas joun.

—Le nachúurun, ligía, járügüdeime.

⁴⁹ Ábati layarafadun lun Jesúsu, ába laríñagun.

—¿Buíti gúñoun, maésturu!

Ába lachúuruni.

50 Ába laríñagun Jesúsu lun.

—Numáda, ¿ca bálugubei?

Ábati jayábin, ába járügüdüni Jesúsu, ába janügüni adáüra.

51 Ábati laságarunun ában jádaangiñe láni Jesúsu disípulugu lefeínte, ába láchuguni ában larígei lumúsun fádiri le íñutimaabei.

52 Ába laríñagun Jesúsu lun.

—Areídaboún befeínte, ladüga sun ja áfarajatiña táu efeín, táuba gíñe efeín jáfarúa.

53 ¿Íbidiñeti bun luágu ánjana lan jamúga busén, gayára lan namúriajan ürüwa-wein-dísi-mílu jádaangiñe láni Nüguchi ánjeligu, áni loúnajañanu lan jamúga?

54 Lun jamúga nadügüni ítara, ¿ída lubági lagúnfulirun le tídaanbei Lerérun Búngiu to aríñaguboun luágu lúnti lan lasúseredun le ítara?

55 Ábati laríñagun Jesúsu joun mútu jagía.

—¿Jiábin táu efeín lúma wéwe lun járügüdünina camá jamuga jíwerutina? Ságuñaja wéyu nañúurun témpulurugu jagánagua arúfudaja, madaü jumútina.

56 Wel, lasúseredunbei sun le lun lagúnfulirun le jaríñagubei profétagu tídan Lerérun Búngiu.

Ábati jígiruni sun disípulugu Jesúsu lábugua, ába janúrajan.

Jesúsu ligíbugiñe líñun-ágei lúrudu

(Mr 14.53-65; Lc 22.54-55, 63-71; Jn 18.12-14, 19-24)

57 Ja adáürübalin Jesúsu, ába janügüni ligíbugiñoun Gáifasi, fádiri le íñutimaabei, le ñí lubei adámurigu jamá arúfudajatiña lilúrudun Moisés jáma wügüríña weírígutiña lídan jafíñen juríu.

58 Ánjeinti Pédro, falá lumuti dísegiñe darí túbürürürugun lúban fádiri le íñutimaabei le ñíjin lubei lebélera, ába leréderun ñun jáma oúnigirutiña témpulu lun laríjin jalába lan lébeda cátei le.

59 Jáluajati jábutigu fádirigu, jáma sun jíbiri líñun-ágei lúrudu lidúnrun Jesúsu láu iyéeni lun gayáraabei lan jasádiruni lun loúnwen,

60 madáritiña, láu sun sarágu jáña lan gürígia ñúdüntiña aríñaga iyéeni luágu. Agúmujoúni, ligía jayábin biáma yéetiña íchiga fe luágu,

61 ába jaríñagun.

—Aríñagati wügüri le luágu gayára lan lagúnrichagunun láni Búngiu témpulu, ábaya lánme laráramagüdünun lídan ürüwa wéyu.

62 Ábati laráramun fádiri le íñutimaabei, ába laríñagun lun Jesúsu.

—¿Moúnabuntíbusan ni cáta? ¿Cáteigi le, le aríñawagúbei buágu?

63 Reídeiti Jesúsu maníñu. Ábati laríñagun fádiri le íñutimaabei lun.

—Luágu líri Búngiu le wínwanbei báfiñura lun baríñaguni inárüni. Aríñagabeí woun ánjein amürü lubei Crístubei le Liraü Búngiu, le lanúadirubei Búngiu lun lasálbaruniña gürígia uboúagu.

64 Ába laríñagun Jesúsu lun.

—Ánja, áu, quei baríñaguni. Aríñagatina gíñe jun luágu jaríjubadina lan, áu le Wügüri Garaüwarügüti, ñun lueígiñe loúnwenren Búngiu le Súnti Gabáfu, jaríjubei gíñe niábin lídan juánriñu siélugiñe.

65 Ábati lajeíridagunun fádiri le íñutimaabei lanáangun, le ligáñi, ába laríñagun.

—¡Anába láali wügüri le Búngiu láu lerérun! Mabúseerunjadiwa ámu lun líchugun fe luágu, agáamba jumáali anábuni le laríñagubei,

66 ¿ída líña jaríjin lun?

Ába jaríñagun.

—Gadúnrunti, lúnti loúnwen.

⁶⁷ Ábati jásuereguni ligíbu, buleísei jameí, jíbiri, ába jagáyujajan ligíbuagun,

⁶⁸ ába jaríñagun lun.

—Quei amürü lan Crístubei, jaríñaga beígia ca lan agáyujabei buágu!
Jaríñagunbei lun ítara ladüga gürágu líña lan lágu.

Laríñagun Pédro luágu ibídiñe lan Jesúsu lun

(Mr 14.66-72; Lc 22.56-62; Jn 18.15-18, 25-27)

⁶⁹ Súnti lasúseredun sun cátei le, ñun líña Pédro bougudi tübürürüru luában fádiri le íñutimaabei, ába tiábin ában esériwijatu luágun, ába taríñagun lun.

—Bugúya, lúmañadibútia giñéñaja Jesúsu le Galiléana.

⁷⁰ Ába leyéedagun Pédro jagíbugiñe súnubei, ába laríñagun.

—Ibídiñeti nun ca lan uágu badímureja.

⁷¹ Leíbuga yebe Pédro luágun béna, ligía taríjini ábanya, ába taríñagun joun ja ñíbaña.

—Eyéri le, lúmañajañein giñe Jesúsu le Nazarétna.

⁷² Ábaya leyéedagun Pédro láu fiñún, ába laríñagun.

—Ibídiñeti wügüri ligía nun.

⁷³ Murúsun lueígiñe, ába jayábin ja ñíbaña lúmoun Pédro, ába jaríñagun lun.

—Inárüni luágu ában lan jádaangiñe amürü, arijúati luágu ligáburi badímurejan.

⁷⁴ Ába lagúmeserun íñaragua lúngua aríñaga láu fiñún.

—¡Ibídiñeti gürígia ligía nun!

Lídan méme óra ligía, ába layúgurujan ában gáyu.

⁷⁵ Ábati laríttagun Pédro luágu le laríñagubei Jesúsu lun. “Beyéedaguba náu ürüwa weíyaasu lubáragiñe layúgurujan gáyu.” Ába láfuridun Pédro ñígiñe, ába layájujajan láu igárigu.

27

Ledéregerúniwa Jesúsu lun Piláto

(Mr 15.1; Lc 23.1-2; Jn 18.28-32)

¹ Dan larúgadunbei, ába jadámuridagun sun jábutigu fádirigu jáma wügüriña weírigutiña lídan jafíñen juríu aríja cába lan jadüga lun lasíadirúniwa Jesúsu.

² Ába janügüni gürágu, ába jedéregeruni lun Póncio Piláto le gumádimati.

Loúnwen Júdas

³ Dan le laríjinbei Júdas, le alúgurubalin Jesúsu, luágu siádi jamáli lan Jesúsu lun loúnwen, ába laságürijan, ába láguyugüdüni daráandi murúsun pláta ligía joun jábutigu fádirigu lúma joun wügüriña weírigutiña,

⁴ ába laríñagun joun.

—Afígounjaadina láu nedéregerun ában wügüri madúnrunti lun loúnwen.

Ába jaríñagun lun.

—¿Cámegi le warúma? ¡Bugúya lun baríjini líra!

⁵ Ába lachágaruni Júdas seínsu ñi témpulurugu, ába lídin átigiragua lúngua.

⁶ Ába jabúduni jábutigu fádirigu seínsu ligía, ába jaríñagun.

—Siñáti wíchuguni seínsu le tídon gáfu to lágei liseínsuna Búngiu ladüga lebégi oúweni.

⁷ Ába júradun lun lagáñijoún lufúlasun ában wügüri le adáagubei barámbi láu seínsu ligía lun jábunajoún teréncha ñi.

⁸ Ligía Lufúlasun Jítaü lubeí lírabei fulásu ligía chülü lúmoun dan le.

⁹ Ítara líña lagúnfulirun lé meja laríñagubei proféta Jeremías. “Barũ jamuti daránda murúsun pláta ligía, ebégi le jíchugubei Israelítagu luágu wügüri ligía,
¹⁰ ába jagáñijani lufúlasun ában wügüri le adáagubei barámbi láu, quei laríñaguni Nabúreme nun.”

Jesúsu ligíbugiñe Piláto
(Mr 15.2-5; Lc 23.3-5; Jn 18.33-38)

¹¹ Barüwati Jesúsu ligíbugiñoun gumádimati, le gíribei Piláto, le álügüdúbalin.
 —¿Amürüsan Jarúeitebei Juríu?

Ába laríñagun Jesúsu lun.

—Ánja, áu quei baríñaguni.

¹² Dán buriti jíchugun jábutigu fádirigu jáma wügüriña weírigutiña lidúnrun, mouñabuntija Jesúsu ni cáta.

¹³ Ábati laríñagun Piláto lun.

—¿Magáambun bumútisan le jaríñagubei buágu?

¹⁴ Mouñabunti Jesúsu ni cáta, ábati laweíridun lanígi gumádimati.

Lasiádirún Jesúsu lun loúnwen
(Mr 15.6-20; Lc 23.13-25; Jn 18.38-19.16)

¹⁵ Gagáburi lumúti mejáti gumádimati lígiragüdün ában adaürüti joun güri-gia lídan fédu, furúmieguarügü adaürüti le jamúriajan lúma.

¹⁶ Níñeinti ában adaürüti, díseti leíbaajan líri, gíriti Barabási,

¹⁷ dánti le adámuriñujaña lan sun güri-gia, ába lálügüdüniña Piláto.

—¿Ca jabúseerubei nígiragüdün jun, Barabási, ódi Jesúsu le únbei laríñawagua Crístu?

¹⁸ Liridubalin gíñe Jesúsu ladüga subúdi láali lan luágu ladüga lan jagímugan lun jedéregerei.

¹⁹ Sun ñun lan Piláto luágu lála le lánina agúseruni, ába toúnajan lúmari aríñaga lun. “Madügabá ni cáta láu güri-gia úraguati le, ladüga gewéreditina buga ában uwénedi wuríbati áriebuga ladüga güri-gia le.”

²⁰ Ába jádaruni jábutigu fádirigu jáma wügüriña weírigutiña jádoun güri-gia lun jamúriajan lun láfuridun Barabási, lun lafarún Jesúsu.

²¹ Ábaya ladímurejan gumádimati joun sun güri-gia jagía, ába laríñagun joun.

—¿Ca jádaangiñe biángubei jabúseerubei lun nígiragüdüni jun?

Ába jaríñagun.

—Barabási.

²² Ába laríñagun Piláto joun.

—¿Cábatí nadüga láu Jesúsu le únbei laríñawagúa Crístu?

Ába jóunabun súngubei.

—¡Dáguabeí luágu gurúwa!

²³ Ába laríñagun Piláto joun.

—¿Cáti wuríbati ladügübei?

Ábatima jagúaragun.

—¡Dáguabeí luágu gurúwa!

²⁴ Dan le laríjinbalin Piláto luágu siñá lan ladügün ni cáta lueídügüya chagáguaü, ába lamúriajan dúna, ába lachíbuni lújabu jagíbugiñe güri-gia, aríñageina.

—Máma áu lúnbei naríjin láu loúnwen wügüri madúnrunti le, jugúya lun jaríjini ñi.

²⁵ Ába jaríñagun sun güri-gia.

—¡Wagía jáma warájüñü, wanügüba furúmieguarügü dúru wawouguoun luágu loúnwen!

²⁶ Ábati lígiragüdüni Piláto Barabási, ába loúnajan abeíchei Jesúsu, ába ledéregeruni lun ládarawagún luágu gurúwa.

²⁷ Lárigiñe, ába janügüni lisúdaaranigu gumádimati Jesúsu tídoun lúban Piláto, ába joúndaraguagüdüniña sun súdeara geyégua láu.

²⁸ Ába jarágachunun lanáangun, ába jíchugun ában anáangun funátu luágu,

²⁹ ába jíchugun ában rídi láuti jíyu lábulugu, lúma ában mabúru lújaburugu le loúnwenren. Ábati jájuduragun ligíbugiñe, ába jéjerajan láu, ába jaríñagun lun.

—¡Gabágarilá Jarúeite Juríu!

³⁰ Ába gíñe jásuereguni, janügeija mabúru ligía, jíchaaguei lábulugu.

³¹ Lárigiñe jéjerajan láu ítara, ába jagídarunun anáangun funátu lueí, ába jadáürünun lanáangun luágu. Ába janügüni lun ládarawagún luágu gurúwa.

Ládarawagún Jesúsu luágu gurúwa

(Mr 15.21-32; Lc 23.26-43; Jn 19.17-27)

³² Dan le áfurideina jáña lan, ába jadúnragun lúma ában wügüri Cirénena, gíriti Simón, ába jafósurunun lun lanügüni lugúruwan Jesúsu.

³³ Ítara líña jachülürün lídoun ában fulásu gíriti Gólgota, líla líra, Lufúlasun Lábu Ichügü.

³⁴ Ñi jíchiga diweín láu árani tídan lun Jesúsu lun látunun, joúcharügü lumútu, mátun lumútu.

³⁵ Dan le dágua jamáli luágu gurúwa, ába jájurerun súdeara ubúnurunun lun jafánreinjanun lanáangun Jesúsu jádaangua. Ítara líña lagúnfulirun lé meja labürüjabei proféta. “Ájureratiña ubúnurunun lun jaríjin cába lan jádaangiñe erédera táu nanáangun.”

³⁶ Ába jañúurun ñi lun joúnigiruni.

³⁷ Ába jíchugun ában abürüjoúni lougiñe lichügü le ñi lubei laríñaga ca lan lidúnrunbei. Abürüjoúni ligía ítara líña. “Jesúsu le, le jarúeitebei juríu.”

³⁸ Dáwaguatiña gíñe bián jíwerutiña luágu gurúwa lúma, ában lueígiñe loúnwenren, ában lueígiñe lubaúna.

³⁹ Já buriti ásügürübaña ñígiñe, ába janábuni, ába jánjingichuni jachügü,

⁴⁰ aríñageina.

—Bugúya le gayáraabei bágurunun témpulu ábaya baráramagüdünnun lídan ürüwa wéyu, sálbagueabá búngua. Ánjein Liraü bubei Búngiu, raríba lueígiñe gurúwa.

⁴¹ Ítara líña gíñe jéjerajan jábutigu fádirigu jáma arúfudajatiña lilúrudun Moisés, fariséogu, jáma wügüriña weírigutiña, láu, ábaja jaríñagun jámagua.

⁴²—Sálbati ámu, ánjein lúngua, siñáti lasálbaragun. Ánjein ligía lubeí Jarúeitebei Israelítagu, raríla lueígiñe gurúwa, afíñe wamámuga luágu.

⁴³ Rúlaali lafíñen luágu Búngiu, sálbaleíti Búngiu guetó ánjein inárüni lubeí luágu jínsiñe lan lun, quei aríñagaali lan woun luágu Liraü lan Búngiu.

⁴⁴ Anába jamúti gíñe jíwerutiña ja dáwaguñubaña luágu jagúruwan úara lúma.

Loúnwen Jesúsu

(Mr 15.33-41; Lc 23.44-49; Jn 19.28-30)

⁴⁵ Ábati labúrigadun sun fulásu lúmagiñe amídirugu darí ladaünrún ürüwa rábounwéyu.

⁴⁶ Queí buri óra méme ligía, ába lagúaragun Jesúsu jére.

—Elí, Elí, ¿láma sabáctani? —líla líra. Nubúngiute, Nubúngiute, ¿cásan uágu bígirana?

⁴⁷ Níñanu agáambuti jádaangiñe ja ñíbaña, ába jaríñagun.

—Lagúajaña wügüri le lun proféta Elías.

⁴⁸ Ába lídin ában jádaangiñe eíbaagueina anüga ában mudúsi, lárigiñe ladüdüragüdüni táu diweín garüjütu ába líchuguni luágu ában wéwe, ába línchunun lun lun lachúrunun. Ába lachúrunun.

⁴⁹ Ába jaríñagun ja jíbiri.

—Ígirabei, waríja ánjein ñübin Elías asálbarei.

⁵⁰ Ábaya ladügün Jesúsu ában agúaraguni jéreti, ábati loúnwen.

⁵¹ Lídan óra ligía, ába tajeíridagun tubélun témpulu lídan bián murúsun, íñugiñe lun ünabun. Ába ladágarun ában járabaganáli, ába láwarajan dübü.

⁵² Ába lánjunrenchúnga umúajaü, águyuguatiña sarágu jádaangiñe afíñetiña luágu Búngiu já meja jiláguaañábaña.

⁵³ Ába jáfuridunga lídaangiñe jamúaja lárigiñe lásaarun Jesúsu lídaangiñe ouweni. Ába jebélurun lídoun ubúrugu Jerusalén le biníwabei, le ñí lubei jaríjaña sarágu gürígia.

⁵⁴ Léti jábuti súdaara jáma súdaara ja oúnigirubalin Jesúsu, dan jasándirunbalin járabaganáli lúma dan jaríjinbaalin líbiri buri cátei le asúseredubei, ába janúfudedagun sarágu, ába jaríñagun.

—Inárüni, Liraü Búngiu wügüri le.

⁵⁵ Níñanu sarágu würíña aríagua dísegiñe, ja afálarubalin Jesúsu lúmagiñe Galiléagiñe íderagua jameí.

⁵⁶ Níñoun María Magdaléna jádan, María to lúguchu Jacóbo lúma José, túma jáguchu lirájüñü Zebedéo.

Labunúniwa Jesúsu

(Mr 15.42-47; Lc 23.50-56; Jn 19.38-42)

⁵⁷ Dan le agúñedeina líña lubei, ába liábin ában wügüri rísiti gíriti José, lídaangiñeti fulásu le gíribei Arimatéa, jádaangiñeti gíñe ja afálarubalin Jesúsu.

⁵⁸ Ábati lídin aríjei Piláto, ába lamúriajani lúgubu Jesúsu lúma. Ábati laríñagun Piláto lun líchugúniwa lun,

⁵⁹ ába lanügüni José, ába louburaguni tídan ában gamísa jarúmatu.

⁶⁰ Ába líchuguni lídoun lumúaja iséri lé yebe lachígagüdübei lubárua luágu dübü. Lárigiñe ladáuruni umúajaü láu ában dübü weíriti luágu lubéneri, ába lídin.

⁶¹ Níñounti María Magdaléna túma to ában María ñun ligíbugiñe umúajaü.

Oúnigirutiña ligíbugiñe lumúaja Jesúsu

⁶² Larúgan, lárigiñe aráansejani lubá luwéyuri eméraaguni, ába jóúdin jábutigu fádirigu jáma fariséogu aríjei Piláto,

⁶³ ába jaríñagun lun.

—Wábuti, jarítagua wamúti luágu aríñaga lán meja yéeti ligíra dán meja mouñwengili luágu lásaaruba lan luágu lürüwan wéyu lárigiñe loúnwen.

⁶⁴ Oúnajagubeibá achoúrurei umúajaü daríme lürüwan wéyu, mayábin jamámuga láni disípulugu áriebe íwerujei lúgubu, ábame jaríñagun joun gürígia luágu saráli lan. Weíritimaajalímeti lagúmujoún iyéeni le sügü láu le furúmiñeti.

⁶⁵ Ába laríñagun Piláto joun.

—Barüjuma fiú súdaara, jeíba choúru jumeí umúajaü le lubuídun-ágei juáraati.

⁶⁶ Ábati jóúdin, ába jachoururuni dúbü le luágubei umúajaü, ába jígruniña súdaara lun jóúnigiruni.

28

*Lásaarun Jesúsu lídaangiñe ouweni
(Mr 16.1-8; Lc 24.1-12; Jn 20.1-10)*

¹ Dan le lásügürünbei luwéyuri eméraaguni áni arúgadeina líña dimáasu, ába jóúdin María Magdaléna túma to ában María aríjei umúajaü.

² Sódini, ába ladágarun ában járabaganáli jéreti óra ligía láu larárirun ában láni Wabúreme ánjeli siélugiñe, ába liábin luágun umúajaü, ába lagídaruni dúbü le áubei ladaurúa, ába lañúurun luágu.

³ Miríti ánjeli ligía quei ában labírijanoúga, tiábin lanáangun, jarú jarú.

⁴ Dan le jaríjinbalin súdaara, ába jadádagarun láu anúfudei, ába jeréderun camá jiláguaaña.

⁵ Ábati laríñagun ánjeli ligía joun würíña jagía.

—Manúfude jumá. Subúsi nun luágu jáluajañein lan Jesúsu le ádarawagúbei luágu gurúwa.

⁶ Úati ya, saráli quei laríñaguni. Jigoúgu jaríjei fulásu le ñíjin lubeí líchugúa,

⁷ ábame jídin furése, ábame jaríñagun joun láni disípulugu luágu saráli lan, luágu níngiran lan jubá jubá Galiléoun, ñíba jaríjei. Niján ugánu lé buga lúnbei naríñaguni jun.

⁸ Ába jóúdin würíña jagía oufudagueina, láu anúfudei lúma sarágu ugúndani, ába jóúdin eíbaagueina aríñagei joun disípulugu.

⁹ Súnti añája lan luágu ũma, ligía larúfudagun Jesúsu lúngua joun, ába labúsurun joun. Ábati jayárafadun lun, ába jájuduragun lun, ába jóúburuni lugúdi.

¹⁰ Ába laríñagun joun.

—Manúfude jumá. Jeíba awísaraña nánigu lun jóúdin Galiléoun, luágu ñíba lan jaríjana.

Cátei le jabájüdagubei súdaara

¹¹ Dan le jóúdiña lubeí würíña, ligía jóúdin jádaangiñe súdaara ja ounigirubaña, ába jóúdin ubúругu, ába jabájüdaguni le asúseredubei joun jábutigu fádirigu.

¹² Ába jóúdin ábutigu ja adímureja jáma wügüríña weírigutiña lídan jafíñen juríu lun jebélurun jáma lídoun ában úarani, ába jíchugun sarágu seínsu joun súdaara,

¹³ ába jaríñagun joun.

—Jaríñagame luágu dan lan le anjünja lan arúmuga áriebu, ába lan jayábin láni Jesúsu disípulugu, ába jíwerujani lúgubu.

¹⁴ Ánjein lasúbudira gumádimati cátei le, wadímurejaba luágu jáni fuleísei lúma lun madügün lan ni cáta jáu.

¹⁵ Ábati jerésibiruni súdaara jagía seínsu, ába jóúdin adúgei le uágubei laríñawagúa joun. Ítara liñáti jaríñaguni juríu chülü lúmoun dan le.

*Líchugun Jesúsu jadásin disípulugu
(Mr 16.14-18; Lc 24.36-49; Jn 20.19-23)*

¹⁶ Ába lubeíti jóúdin únsu disípulugu Galiléoun luágu wübü lé meja uágubei laríñaga Jesúsu joun lun jóúdin.

¹⁷ Dánti le jaríjinbalin Jesúsu, ába jájuduragun lun, láu sun añájein lan jádaangiñe, louguati jafíñen luágu ligía lan.

¹⁸ Ába liábin Jesúsu jawágun, ába laríñagun joun.

—Rúaali sun ubáfu nun siélu lúma ubouagu.

¹⁹ Jeíbati jabügürü gürígia ja lílana sun fulásu, adüga jumáña nánime disípulugu, badíseigüda jumáña lídan líri Búngiu Úguchili, Búngiu Irájü, lúma líri Sífiri Sándu.

²⁰ Arúfudaja jugúyame joun lun gagáambadi jamá lun sun le uágubei naríñaga jun. Subúdi jumeí luágu anájein lan júma ságü wéyu daríme lagúmuchun uboú. Ítaralá.

UGÁNU BUÍTI LE LABÜRÜJABEI MÁRCOS LUÁGU JESÚSU

Lapúrichijan Juan

(Mt 3.1-12; Lc 3.1-9, 15-17; Jn 1.19-28)

¹ Niján ugánu buíti luágu Jesucrístu, le Liraũ Búngiu,

² latátira láu lagúnfulirúniwa dimúrei lé meja labürüjabei proféta Isaías, laríñaga.

Niján noúnagüle, líña Búngiu, noúnajañein bubáragiñe, amürü le Niraũ, lun laráansejanun janígi gürígia lubá biábin.

³ Lagúarajaba lídan fulásu mageírawati.

“Aráanse jumóun janígi lubá liábin Wabúreme, queísi ladárarúniwa ũma surúti.”

⁴ Lun lagúnfulirúniwa dimúrei ligía liábinbei Juan lídoun fulásu mageírawati, ábaja laríñagun joun gürígia ja ñübinbaña lun luágu lúnti lan jasáansiruni ligáburi jóuserun lun ferúdunawa lan jafígoun, badísei jagíame.

⁵ Ábatija jayábin lídaangiñe sun Judéa lúma sun Jerusalén agáambeí lapúrichijan. Dántija le jagúfeseruni jafígoun, ábajeí labásteragüdúniña Juan lídan dúna le gíribei Jordán.

⁶ Mebégitu lanáangun Juan, láutu lúra caméyu, lagürüga lamídan, guéru, chigángaru leígibaña lúma síruudu le áraabuna.

⁷ Laríñagaja joun gürígia lídan lapúrichijan.

—Liábinba ában le gabáfutimaati nárigiñe, weíriti lubáfu nueí darí lun madúna nan ni lun nélemuchun afáragadeí tagürüga ligeídin.

⁸ Áu, láu dúna nabásteragüdaün, ánjein ligía, labuínchagüdübadün láu lubáfu Sífiri Sándu.

Labásterun Jesúsu

(Mt 3.13-17; Lc 3.21-22)

⁹ Lídoun buga dan ligía, ába lídin Jesúsu Nazarétgiñe, fulásu le lídaanbei lumúan Galiléa, ába labásteragüdúni Juan lídan dúna le Jordán.

¹⁰ Dan le láfuridunbei dúnarugugiñe, ába lánjunrenchagun siélu lun, ába laríjini Juan larárirun Sífiri Sándu luágu Jesúsu queí jamúga ában únjun.

¹¹ Ában lagaambúniwa ában umálali siélugiñe aríñaguti.

—Amürü niraũ le jínsiñebei nun, gúndaatina báu.

Loúchaguni Máfia Jesúsu

(Mt 4.1-11; Lc 4.1-13)

¹² Lárigiñe, ába lanügüni Sífiri Sándu Jesúsu lídoun fulásu mageírawati,

¹³ ába leréderun Jesúsu bián-wein wéyu ñi jagánagua anímaalugu janárimetiña. Sun dan le láubei ñi, ába loúchaguni Máfia, lárigiñe, ába jayábin ánjeligu lun jeténirun lun.

Lagúmeseruni Jesúsu luwádigimari lídan fulásu le gíribei Galiléa

(Mt 4.12-17; Lc 4.14-15)

¹⁴ Lárigiñe ladaürüniwa Juan, ába lídin Jesúsu Galiléa apúrichijeí ugánu buíti lúmagiñeti Búngiu.

¹⁵ Ába laríñagun.

—Chülüjali dan lun lagúmeserun larúeijan Búngiu, sáansi jumeí ligáburi jóuserun, afíñe jumá luágu ugánu le lánina asálbaruni lídaangiñe figou.

*Lagúarun Jesúsu joun gádürü esénijatiña lun jafálaruni
(Mt 4.18-22; Lc 5.1-11)*

¹⁶ Luágu ában wéyu, eíbugeina líña Jesúsu láru láru dúna le gíribei Galiléa, ába laríjini Simón lúma Andrés le lamúlen. Esénijani lubeígia jawádigimaribei, jáguruñati óra ligía.

¹⁷ Ába laríñagun joun.

—Jigóugu nárigi, falá jumana, madíajanjadünme úduraü, gürígiajañame jadía ja nun.

¹⁸ Ába jígirunun jasénin furése furése, ába jóúdin lúma.

¹⁹ Ábati leíbugun Jesúsu murúsunraüya, ába laríjini Jacóbo le liraü Zebedéo, láu sun Juan le lamúlen, tídaañanu ában ugúnein arámadajoun jasénin.

²⁰ Ába lagúarun joun, ába jígiruni jáguchi tídan ugúnein jáma ja íderagubaliña, ába jóúdin lúma Jesúsu.

*Ában gürígia gawáguti ában espíritu wuríbati
(Lc 4.31-37)*

²¹ Ába jachülürün lídoun fulásu le gíribei Capernaúm lídan wéyu le eméraguagülei, ába lebélorun Jesúsu tídoun jalígílin juríu, ába lagúmeserun arúfudaja joun.

²² Weíríti janígi gürígia láu sun le laríñagubei Jesúsu joun ladüga larúfudajan joun láu ubáfu, máma quei arúfudajatiña lilúrudun Moisés.

²³ Ñíñein ában wügüri tídan ligílini tugúya láu ában espíritu wuríbati, ába lagúaragun.

²⁴ —¿Cámesan bemétera wámoun, Jesúsu Nazarétna? ¿Biábíñasan lun bagünrichaguníwa? Subúdi numúti cátabu lan, láu amürü lan Búngiu Irájü le sándubei.

²⁵ Ába ladeínjan Jesúsu lun espíritu wuríbati ligía, ába laríñagun lun.

—¡Maníba, furíba lídaangiñe gürígia le!

²⁶ Ába louwejagüdüni espíritu wuríbati gürígia ligía, ába láfuridun lídaangiñe, wágueina.

²⁷ Sun ja ñíbaña, ába laweíridun janígi, ába jálügüdagun jámagua.

—¿Cáteisan le? ¿Cáteisan iséri arúfudajani le? ¡Gürígia le, gabáfuti lun gíñe lagúmadiruniña espíritu wuríbatiña áni agáamba jamúti!

²⁸ Ába lagaambúniwa luágu Jesúsu lídan sun Galiléa furése.

*Lareídaguagüdünnun Jesúsu límenidi Simón Pédro
(Mt 8.14-15; Lc 4.38-39)*

²⁹ Dan le jáfuridunbei tídaangiñe ligílini tugúya, ába lídin Jesúsu lúma Jacóbo láu Juan jábiñe Simón lúma Andrés.

³⁰ Roun tiñati límenidi Simón, tabíruajaña, ába jaríñagun lun Jesúsu luágu sándiñoun lan.

³¹ Ábati lídin tuágun, ába lárügüdüni tújabu, ába liñúragunun, lídan meme óra ligía ába tareídagun, ába tásaarun, ába teténirun joun.

*Lareídaguagüdünnun Jesúsu sarágu sánditiña
(Mt 8.16-17; Lc 4.40-41)*

³² Dan le lálüdünnun wéyu, gúñeeli, ába janügüniwa sun sánditiña jáma sun ja gawágubaña espíritugu wuríbatiña lun Jesúsu,

³³ ába jóúndaragun sun lílana fulásu lubádu béna.

³⁴ Areídaguagüdati Jesúsu sarágu sánditiña ja láutiña ámuñegueinarügü luwúyeri sándi, sagá ligía sarágu espíritugu wuríbatiña jaweí gürígia.

Mígiruntijati lun jadímurejan espíritugu jagía, ladüga subúdi jamáni cáteiñein lan.

Lapúrichijan Jesúsu Galiléa
(Lc 4.42-44)

³⁵ Lubá larúgan, dan le búrigagili, ába lásaarun Jesúsu, ába láfuridun boúgudin lueí ubúругu lídoun ában fulásu le mageírawati lun layúmuragun lun Búngiu ñi.

³⁶ Ába lídin Simón jáma líbirigu áluajei.

³⁷ Dan le jadáriruni, ába jaríñagun lun.

—Añájeintia sarágu gürígia áluajabu.

³⁸ Ába laríñagun joun.

—Queímoun lídoun buri líbiri fulásu le yaráfabei, apúrichija námuga gíñe ñi, ladüga lun napúrichijan lídan sun fulásu niábin ubouágun.

³⁹ Ítara líña lubeíti eíbuga lumúti Jesúsu sun Galiléa apúrichijeina tídan buri jalígilisin juríu lídan sun fulásu, aságajeina ligía espíritugu wuríbatíña jaweí gürígia.

Lareídaguagüdüni Jesúsu ában gawáguti gumeín luágu sun lúra
(Mt 8.1-4; Lc 5.12-16)

⁴⁰ Ába liábin ában gürígia sánditi láu gumeín luágu sun lúra, ába lájuduragun ligíbugiñe Jesúsu, ába layúmuragun lun, laríñaga.

—Gayáraati bareídaguagüdüni ánjabu busúen.

⁴¹ Ába lagúdemedagun lun Jesúsu, ába lagúuruni láu lújabu, ába laríñagun.

—Láu sun nugúndan, areídaguabá.

⁴² Quei laríñagun ítara, ába lareídagun sánditi ligía.

⁴³ Ábati loúnajani Jesúsu ñígiñe láu ában furése, aríñageina lun.

⁴⁴ —Mabájüdaguaeítia lun ni ában, ñüdünrügüba arúfudagua búngua lun jafádirin juríu, ábame bíchuguni badágaragüdüni luágu barúmadun queísi laríñaguni lilúrudun Moisés. Ítara lúba jaríjini gürígia luágu areídaguadibu lan.

⁴⁵ Ábarüga lídin, ába labájüdaguni sun le asúseredubei lun joun sun gürígia, ligía lébubei siñá lan leréderun Jesúsu furáangu lídan ni ában fulásu, ába leréderun le ñí lumuti úa jamá gürígia. Láu sun líra, ñübin mémetiña lídaangiñe sun fulásu aríjei.

2

Lareídaguagüdüni Jesúsu ában wügüri le derégüdaali lúgubu
(Mt 9.1-8; Lc 5.17-26)

¹ Átiri wéyu lárigiñe, ába lagíribudun Jesúsu Capernaúm, ába jagáambun gürígia luágu giríbujali lan.

² Ába jóúndaragun sarágu gürígia darí lun mabáraaña lan ni bénabu, ába lapúrichijani ugánu buíti lúmagiñeti Búngiu luágu jasálbarun joun.

³ Ñíñein apúrichija, ligía jayábin gádürü wügüriña barúina jagía ában wügüri le derégüdaali lúgubu.

⁴ Queísiti siñá lubei jachülürün le ñí lubei Jesúsu ladüga jíbe gürígia, ába jagídarun murúsun lueígiñe tábulugu múna lougiñe le ñí lubei Jesúsu, ába jarárigüdüni sánditi ñígiñe tídan lubárari.

⁵ Dan le laríjinalin Jesúsu jafíñen, ába laríñagun lun le sándibe.

—Niraü, ferúduawaali bifígoun.

⁶ Ñíñanu jádaangiñe arúfudajatiña lilúrudun Moisés ja ñúnbaña ñi, ába jasáminarun.

7 “¿Cásan uágu ladímureja gürígia le ítara? Lanábaguñeiga le Búngiu, ladüga úati ni ában gayáraati ferúduna lan figou lueídügüya Búngiu.”

8 Subúdi lumúti Jesúsu le jasáminarubei, ába laríñagun joun.

—¿Cásan uágu jasáminara ítara?

9 ¿Cáteitimasan ménreengunbei laríñawagún lun sánditi le. “Ferúdonawaali bifígoun”, o laríñawagún lun. “Sarába, budáboun bubárari, beíba”?

10 Narúfudaaliti jun luágu gabáfu nan, áu le Wügüri Garaúwarügüti lun ferúduna nan figou.

Ába laríñagun lun sánditi.

11 —Sarába, budáboun bubárari, beíba águyu.

12 Ába lásaarun sánditi lídan óra ligía, ába labúdunun lubárari, ába láfuridun ñígiñe, aríagu sun ja ñíbaña lun. Weíriti janígi ja ñíbaña luágu cátei le, ába jíchugun uweíríguni lun Búngiu, aríñageina.

—¡Maríjiñajágidiwa cátei ítara buriti!

Lagúarun Jesúsu lun Leví lun lánigume

(Mt 9.9-13; Lc 5.27-32)

13 Ñígiñe, ábaya lídin Jesúsu láru dúna, dan le jayárafadun sarágu gürígia lubádun, ába larúfudajan joun.

14 Lásun larúfudajan joun, ába lasígiruni leíbugun, ába laríjini Leví, le liraü Álfeo, ñun líña le ñí lubei lagúburajoúa liseínsuna gumádi. Ába laríñagun lun.

—Falábana, queímoun núma queísi náni disípulu.

Ába lásaarun Leví, ába lafálaruni.

15 Murúsun óra lárígiñe, ñíñein Jesúsu eíga lúbiñe Leví, ñíñanu gíñeti sarágu agúburajatiña liseínsuna gumádi, jáma ámu gafígountiña ñun luágu dábula úara lúma, jáma láni disípulugu, ladüga sarágu jáña afálaruti.

16 Ja arúfudajatiña lilúrudun Moisés, jáma fariséogu, dan le jaríjinbalin eíga jáma sun wuríbatiña jagía (según jagía), ába jaríñagun joun láni disípulugu.

—¿Ída liñásan leíginbei jumáesturun áni gurá ligía jáma agúburajatiña liseínsuna gumádi lúma jáma ámu gafígountiña?

17 Dan le lagáambunbalin Jesúsu cátei le, ába laríñagun.

—Ja magádiebaña mabúseerúntiña surúsia, ja sándibaña, jagía busénbaña surúsia. Máma lubeíti niábiña áluaja gürígia buítiña ligíbugiñe Búngiu, niábiña áluajaña ja gafígounbaña lun lasáansirún jóuserun.

Jálügüdüni Jesúsu luágu ayúnaruni

(Mt 9.14-17; Lc 5.33-39)

18 Luágu ában wéyu, dan le jayúnarun lánigu Juan jáma jánigu fariséogu lun jagúnfulirun lúma Búngiu, ába jayábin fiú gürígia álügüdei Jesúsu.

—¿Cásan uágu jayúnara lánigu Juan jáma jánigu fariséogu lun jagúnfulirun lúma Búngiu, ánjaña báni disípulugu mayúnaruntiña?

19 Ába loúnabun Jesúsu láu jémpulu luágu iséri larúfudajan lúma binádu, laríñaga.

—¿Gayáraati funági jayúnarun amísurajoútiña lídan ában maríei dan le níjein lan adári ñi jáma? Ánjein níjein lubeí adári ñi, siñáti jayúnarun, lúnti jeígin.

20 Lachülürüba dan lun lanügüniwa adári jámagiñe, ligíameti jadáni lun jayúnarun.

21 ‘Máfadajoúntu anáanguni binádujaru táu gamísa to macháwaragungiru, ladüga le méme tífe gamísa to macháwaragungiru tajeíridaguboun to binádujaruboun dánme le tacháwaragun, laweíridatimaabati jeíríti.

²² Meserúnwati gíñe bínu le isérigili lídoun ában ágei guéru le binádujali ladüga labouchagubei bínu iséri guéru binádu dánme le liñúrun. Féridimeti bínu, féridi guéru. Bínu iséri lúnti leserúniwa lídoun guéru iséri.

Játüjan disípulugu türígu lídan wéyu le eméraaguagülei
(Mt 12.1-8; Lc 6.1-5)

²³ Ában wéyu le eméraaguagülei, eíbugeina líña Jesúsu jáu láni disípulugu labádinagua bunáguaü, ába játüjan láni disípulugu türígu dan le já sügürün.

²⁴ Ába jaríñagun fariséogu lun Jesúsu.

—¡Aríjabá joun bánigu! ¿Cásan uágu jadüga wadágimanu le moún lumuti ladügüniwa lídan wéyu le eméraaguagülei?

²⁵ Ába laríñagun joun.

—¿Malíjangidün luágu le ladügübei Davíd luágu ában dan, dan le lálámachunbei, ligía jáu sun líbirigu?

²⁶ Ába lebélorun ligílisirugun dan le Abiatár lan fádiri le íñutimaabei, ába leíginun fein to sagraúboun, to majouáboun jeíginun ámu güri-gia jaweídügüya fádirigu según lilúrudun Moisés, áni ru ligía joun güri-gia ja lúmabaña. Mámami figóu le ladügübei Davíd ligíbugiñe Búngiu.

²⁷ Ába gíñe laríñagun Jesúsu joun.

—Lun wügüri ladügüwa wéyu le eméraaguagülei, máma wügüri adügüwabei lun wéyu ligía.

²⁸ Ligía gabáfutina gíñe, áu le Wügüri Garaüwarügüti, lun naríñagun cába lan gayára ladügüniwa lídan wéyu le eméraaguagülei.

3

Ában wügüri jiláali ában lújabu
(Mt 12.9-14; Lc 6.6-11)

¹ Ábaya lebélorun Jesúsu tídoun ában jalígílisin juríu, ñíñeinti ában wügüri jiláali ában lújabu.

² Jaríjati ja ñíbaña ánjein lagáranijaba lubeí Jesúsu lun lídan wéyu le eméraaguagülei, lun jadárirun lidúnrun.

³ Ába laríñagun Jesúsu lun le jiláalibei újabu.

—Sarába, ráramabá ya jagíbugiñe súngubei.

⁴ Ába lálügüdüniña ja jíbiri.

—¿Cátei lúnbei ladügüniwa lídan wéyu le eméraaguagülei, lun jíderawagüniwa güri-gia ódi lun ladügüniwa wuríbati joun, lun leséfurúniwa jabágari ódi lun jígirúniwa lun joúnwen?

Sun jagía, ába jámanichun.

⁵ Ábati laríaguniña Jesúsu láu igáñi lúma íruni ladüga tidére janígi. Ába laríñagun lun wügüri ligía.

—Tulébei bújabu.

Ába látuleruni, ába lareídagun.

⁶ Ába jáfuridun fariséogu, ába jagúmeserun adímureja jámagua jáma gíñe lánigu Heródes ída lúba lan jáfaruni Jesúsu jilágubei.

Sarágu güri-gia láru dúna

⁷ Ába lídin Jesúsu jáu láni disípulugu lárún dúna, ába jafálaruni sarágu güri-gia Galiléana.

⁸ Dan le lagaambúnbei luágu oúnwenbun buri cátei le ladügübei, ába jayábingua güri-gia Judéagiñe, Jerusaléngiñe, Iduméagiñe, loubáfurugugiñe dúna le Jordán, Tírogiñe, lúma Sidóngiñe lun jaríjini.

⁹ Ligía larinñagunbei Jesúsu joun láni disípulugu lun aráanseñu jamá ában ugúnein lubá lueí jámuruduni sarágu gürígia jagía,

¹⁰ ladüga queí gíbeeña lan lareídaguagüdün, sun sánditiña, ába jáguragun jóungua luágun lúnrügu jagúuruni lun lareídaguagüdüniña.

¹¹ Dántija le jaríjini ja gawágubaña espíritugu wuríbatíña, ábaja jájuduragun ligíbugiñe, ába jagúaragun espíritugu jádaangiñe.

—Liraü Búngiu amürü.

¹² Ába lewéridiruniña Jesúsu lun maríñagun jamá cáteiñein lan.

*Lanúadiruniña Jesúsu dúusu apóstolugu
(Mt 10.1-4; Lc 6.12-16)*

¹³ Lárigiñe, ába lamúdeirun Jesúsu luágun ában wübü ñí lubei lagúara joun ja labúseerubaña queísi loúnagülegu, ába jayábin lun.

¹⁴ Ába lanúadirun dúusu jádaangiñe lun lúmabaña lan súnwandan lúma lun japúrichijani ugánu buíti lánina asálbaruni.

¹⁵ Ába líchugun ubáfu joun lun jareídaguagüdün sánditiña lúma lun jaságajan espíritugu wuríbatíña.

¹⁶ Niján jíri dúusu wügüríña jagía. Simón, le únbei lagúaja Jesúsu Pedro,

¹⁷ Jacóbo láu Juan le lamúlen, ja lirájüñü Zebedéo, ja únbaña lagúaja Jesúsu Boanérges—míni lan líra, Lirájüñü Wayújururu,

¹⁸ Andrés, Felípe, Bartolomé, Matéo, Tomás, Jacóbo le liraü Álfeo, Tadéo, Simón—ában meja wügüri le áfaaguti lun jawáanserun juríu,

¹⁹ lúma Júdas Iscarióte le alúgurubalin Jesúsu.

*Aríñagatiña luágu lubáfu lan Máfia lúmabei Jesúsu
(Mt 12.22-32; Lc 11.14-23, 12.10)*

Lárigiñe, ába jagíribudun járiogún, ába jebélurun tídoun ában múna,

²⁰ ábaya jóundaragun sarágu gürígia ñí darí lun madáni jamá ni lun jeígin.

²¹ Dan le jasúbudirunbalin lidújeñu Jesúsu ca lan ásügürübei, ába jayábin lún yebe janügüni, ladüga jaríñagun gürígia luágu wuríbaali lan lichügü.

²² Ñíñanu arúfudajatiña lilúrudun Moisés ja achülürübaña Jerusaléngiñe, ába jaríñagun.

—Wügüri le, níjein Beelzebú, le Máfia, le jábuti espíritugu wuríbatíña, lúma, láu lubáfu Máfia laságaja espíritugu wuríbatíña.

²³ Ábati lagúarun Jesúsu joun lun jayárafadun lubádun, ába líchugun ában jémpulu joun, ába larinñagun.

—¿Ída lúba gayára lan laságaruni Máfia Máfia guánarügü?

²⁴ Furúmiegurügü arúejani le afánreinraguti lun jageíndagun jámagua, lagünrinchaguba,

²⁵ áni ánjein fánreingujaña lubeí idújeñu ladüga wuríbu jádaangua, siñábei jadúrarun idújeñu jagía queísi idújeñu.

²⁶ Ánjein lubeí jamúgati afáreinragua Máfia, lageíndaguame lúmagua, siñábei ladúrarun, lagúmuchagülerügübei le.

²⁷ Úati ni ában lun lebélorun lúbiñoun ában wügüri le jéreti lun lanügüni lílagu ánjein magúragun lan wügüri jéreti ligía furúmiñe. Ítara rügüñein gayára lan lanügüni lílagu.

²⁸ Láu sun ninárün naríñagun jun luágu gayára lan ferúdunawa lan sun figóu lúma sun wuríbani le larinñagubei gürígia,

²⁹ lueídügüya lun jadímurejan wuríbati luágu Sífiri Sándu, siñábei ferúdunawa lan figóu líra, leréderuba lidúnrun lun sun dan.

³⁰ Laríñagunbalin Jesúsu líra, ladüga jariñagun luágu lubáfu lan Máfia lubáfu Sífiri Sándu le luágubei.

*Lúguchu Jesúsu jáma lamúlenu
(Mt 12.46-50; Lc 8.19-21)*

³¹ Lárigiñe, ába tachülürün lúguchu Jesúsu jáu lamúlenu tubádun múna to ñí lubei Jesúsu, ába jeréderun bougudi, ába jóunagüdün luágu.

³² Játi ñúnbaña geyégu láu Jesúsu, ába jariñagun lun.

—Nurántia búguchu jáu bamúlenu bougudi, jáluajañádibu.

³³ Ába laríñagun joun.

—¿Cági nóguchuboun jáu namúlenu?

³⁴ Ába laríagun jawágun ja ñúnbaña geyégu láu, ába laríñagun.

³⁵ —Añája nóguchu jáu namúlenu, ladüga furúmieguaügü ja adügüti lugúndan Búngiu, jagía namúlenubaña, nítunu, nóguchu.

4

*Jémpulu luáguti ábunaguti
(Mt 13.1-9; Lc 8.4-8)*

¹ Ábaya lagúmeserun Jesúsu arúfudaja láru dúna, ába jóundaragun sarágu gürígia le ñí lubei. Quei gíbeyaaña lan gürígia ñi, ába ladinun Jesúsu tídon ában ugúnein to ñíboun dúnarugu. Ába lañúurun ñi, ába jeréderun sun gürígia láru béya.

² Ábati larúfudajan sarágu cátei joun láu jémpulu, laríñaga joun.

³ —Agáamba jumána. Ñíñein ában ábunaguti, ába láfuridun ábunagua.

⁴ Lídan afúrujeina láani líla nádü, ába lábburujan murúsun lídaangiñe luágun üma, ába jayábin dunúru, ába jeígini.

⁵ Líbiri, ába lábburujan labádinaguóún dübü le ñí lumuti úa lan sarágu múa, ába labouchun furése ladüga majúlilin lan múa.

⁶ Dan le lásüdün wéyu, ába lásaurün, queíti málagüle lan, ába loúnwen.

⁷ Líbiri ílaü, ába lábburujan labádinaguóún jíyu, ába laweínamudun jíyu úara lúma, ába lañáradaguagüdüni, magínduntiti nádü ligía.

⁸ Níjeinti lídaangiñe, áburujati lídon múa buíti, ába labouchun, ába laweínamudun, ¡ma lubuídun alúbajoúti lídaangiñe! Níjein lídaangiñe, íchuguti darándi águu luágu cáda ában águu, líbiri rúti ürüwa-wein, líbiri, san.

⁹ Ábati laríñagun joun.

—Ja garígeirugubaña lun jagáambun, agáamba jamá.

*Le lébubei larúfudajan Jesúsu joun gürígia láu jémpulu
(Mt 13.10-17; Lc 8.9-10)*

¹⁰ Lárigiñe, dan le leréderunbei Jesúsu lábugua, ába jayábin láni dúusu disípulugu jama jíbiri lánigu, ába jálügüdüni ca lan lílabei jémpulu le.

¹¹ Ába laríñagun joun.

—Jugúya, subúdigüda láali Búngiu cátei arámudaguati le lánina larúeijan jun, ánjaña ja mebéresenbaña láu lerérun, láu jémpulu laríñawagúa cátei luáguti larúeijan joun,

¹² lun dánme lan jaríjin, ibídiñe lámuga joun ca lan laníchigubei cátei le jaríjubei, dánme jagáambun, úa lámuga gunfaráanda jamá, lun lásiñerun jagíribudun lun Búngiu lun ferúdunawa lan jafígoun.

*Lafúnraanguagüdüni Jesúsu jémpulu luáguti ábunaguti
(Mt 13.18-23; Lc 8.11-15)*

¹³ Ába laríñagun joun.

—¿Úatisan gunfaráanda jumáni le? ¿Ída lubági gunfaráanda jumáni líbiri jémpulu?

¹⁴ Le ábunagubalin líla nádü, ítara líña quei le apúrichijabalin Lerérun Búngiu.

¹⁵ Añájein güri-gia, ítara jáña quei üma le uágunbei láburuja lídaangiñe líla nádü, ába jagáambuni Lerérun Búngiu, lárigiñe jagáambuni, ába liábin Máfia, ába lagídaruni dimúrei le abunúbei tídan janígi.

¹⁶ Jíbiri güri-gia, ítara jáña quei dübü le abádinaguóunbei láburuja lídaangiñe líla nádü, ába jagáambuni Lerérun Búngiu, ába jerésibiruni láu ugúndani.

¹⁷ Quei márügüdün lubeí Lerérun Búngiu tídan janígi buídu, madúrati jádan, dánti le larijíniwa jábun, o jeíbaajóuniwa lan lueígiñe Lerérun Búngiu, magúraasuntiña.

¹⁸ Jayábin jíbiri, ítara jáña quei jíyu le abádinaguóunbei láburuja lídaangiñe líla nádü, ába jagáambuni Lerérun Búngiu,

¹⁹ weíritimaati jafúudun luágu cátei le lánina ibágari le, ába leyéeduniña irisini. Sun le, ába láfaruni Lerérun Búngiu tídaangiñe janígi, mígiruntiti lun lalúbajoún jádan güri-gia jagía.

²⁰ Añájein gíñe güri-gia, ítara jáña quei múa buíti le ídounbei láburuja lídaangiñe líla nádü, ába jagáambuni Lerérun Búngiu, ába jerésibiruni, alúbajoúati cátei buíti jádaangiñe. Buíti jagáburi quei líla nádü le íchugubei daránda águu luágu ában, o úrüwa-wein, o san.

*Jémpulu luáguti lámpu
(Lc 8.16-18)*

²¹ Ába laríñagun joun.

—¿Béwati funági ában lámpu lun líchugúniwa tábugiñe ában gáfu o tábugiñe lan gabána? ¡Uá! Luágu dábula líchugúa lun larúgoundagüdü múnada.

²² Úati lubeíti ni cáta le arámudaguati lun mafúnraangudúnbei lan, úa ligía ni cáta le ibídiñewati lun masúbudirúnwabei lan.

²³ Agáamba jumána, jugúya le garígeirugubei lun jagáambun.

²⁴ Aríñagati gíñe joun.

—Toúnigi jumátia lun jagúnfulirun lúma inárüni le jagáambunbei. Láuba jagúnfuliruni, gunfaráandatima jumáni le naríñagubei jun.

²⁵ Ítara líña, güri-gia le aténirubei buídu lun nerérun, gunfaráandatima lumúti, ánjeinti le meténibeí lun, labúleidubei sun le agáamba lálalibeí.

Jémpulu luáguti nádü le aweíridubei

²⁶ Aríñagati gíñe Jesúsu.

—Ítara líña larúeijan Búngiu quei le asúseredubei lun ában wügüri le ábunubei líla nádü lábugiñe múa,

²⁷ áriebu buri lúma wéyuagu lídan le larúmugun ábunaguti ligía, sará ligía quei léchun, chülü dan ába labouchun nádü, ába laweíridun, ibídiñeti lun ábunaguti ída líña lan lasúseredun.

²⁸ Múa guánarügü aráandarati, furúmiñe ába láfuridun ídibu, ñígiñe ába legélewejan, ñígiñe ába labuínchun ílewei láu ílaü.

²⁹ Dánti le funáli líla nádü, ába látüjóuniwa ladüga chülüjali lan dan lun lalúbajoún.

*Jémpulu luáguti tía mostása
(Mt 13.31-32; Lc 13.18-19)*

³⁰ Aríñagati gíñe Jesúsu.

—¿Cásan lenégebei larúeijan Búngiu, o ca jamúga jémpulu gayáraabei wíchuguni lúmoun?

³¹ Ítara líña quei ában tíla mostása le abunúti lábugiñe múa. Tíla mostása, ligía ában lídaangiñe ílaü le ñúraütimaabei ubouágu,

³² dan le labunún, ába laweíridun, ligía weíritimaabei tídaangiñe sun nádü, weínamuti lilímun darí lun gayára lan jeméraagun dunúru lábugiñe lamúñounga le líchugubei.

Layúsuruni Jesúsu jémpulu
(Mt 13.34-35)

³³ Ítara liñájei larúfudajan Jesúsu luágu larúeijan Búngiu joun láu sarágu jémpulu líbe le darí le ñí lumuti gayára lan gunfaráanda jamá.

³⁴ Marúfudajaanti ni cáta joun luágu larúeijan Búngiu mayúsurunga jémpulu. Ába lafúnraanguagüdüni sun jémpulu joun láni disípulugu dan le jagíarügü lan lúma.

Lagálumaruni Jesúsu garábali lúma lugúdi barána
(Mt 8.23-27; Lc 8.22-25)

³⁵ Wéyu méme ligía, dan le lagúñedunbei, ába laríñagun Jesúsu joun láni disípulugu.

—Queímoun loubáfurugun dúna.

³⁶ Ábati jígiruniña bürübünu gürígia jagía, ába janügüni Jesúsu tídan ugúnein to gádaanbaliña. Níñoun buri gíñe ámu ugúnein úara jáma.

³⁷ Ába láfuragun ában garábali jéreti, ába lebélujan lugúdi barána tídoun ugúnein darí lún yebe tabuínchun láu dúna.

³⁸ Larúmuguñati Jesúsu tiyúna ugúnein baláñu tuágu ában ichügübarari. Ába jagágudajani, ába jaríñagun lun.

—¡Maésturu! ¿Mebéreseguntibusan láu wadíbiragua lan?

³⁹ Ába lásaarun Jesúsu, ába ladeínjan lun garábali, ába laríñagun lun barána.

—¡Maníba! ¡Derégüdaguabá!

Ába lagálumadun garábali, ába darángila lan sun cátei.

⁴⁰ Ábati laríñagun joun láni disípulugu.

—¿Cásan uágu luweírinbei janúfude? ¿Cásan uágu mafíñen jubeí?

⁴¹ Ába jeréderun láu luweírin janígi, ába jálügüdagun jámagua.

—¿Cátei funásan le, garábali lúma barána ñüdüntiña láu le lubeíbei?

5

Ában wügüri Gadárana le gawágubei máfianu
(Mt 8.28-34; Lc 8.26-39)

¹ Ába jachülürün loubáfurugun dúna lídoun fulásu le gíribei Gadára.

² Lárigiñerügü láfuridun Jesúsu tídaangiñe ugúnein, ába liábin ában gürígia lídaangiñe ában umúajaü achigíti luágu dübü luágun, wügüri ligía gawáguti ában espíritu wuríbati.

³ Lídan jabára jiláaña lagánoua áni úati ni ában gayáraati lagüraguni, ni láu güríngüri.

⁴ Güráguañája jamáli láu güríngüri luágu lugúdi lúma luágu lújabu, súnwandan látumuraguni, úati ni ában gayáraati lámuruduni.

⁵ Súnwandanja leíbugun áriebu wéyuagu agúarajeina luágu buri wübü lúma buri lídan jabára jiláaña íbiagua lúngua láu dübü.

⁶ Dan le laríjinbalin gürígia ligía Jesúsu dísegiñein, ába leíbaagun lubároun, ába lájuduragun ligíbugiñe,

⁷ ába lagúaragun lun.

—¿Cásan uágu bemétera númoun, Jesúsu Liraü Búngiu le Íñutimaabei? Ayúmuraguatina bun luágu líri Búngiu lun masúfuriragüdün bánina.

⁸ Laríñagunbei ítara ladüga guméseeli lan Jesúsu aríñaga lun.

—¡Espíritu wuríbati, ígirabeí gürígia le!

⁹ Ába lálügüdüni Jesúsu.

—¿Ca bíri?

Ába loúnabun.

—Lejión níña ladüga gíbetiwa.

¹⁰ Ába jayúmuragun espíritugu jagía lun Jesúsu lun moúnajan lániña bougudin lueí fulásu ligía.

¹¹ Queíti ñíñanu lan sarágu büüruju eíga ñi luágu wübü,

¹² ába jayúmuragun espíritugu wuríbatiña jagía lun.

—Oúnaja báwa jádoun büüruju jára, rúba üma woun lun webélurun jádoun.

¹³ Ábati líchugun Jesúsu üma joun, ába jáfuridun lueí gürígia ligía, ába jebélurun jádoun büüruju. Níñanu jawára bián-mílu büüruju. Ába jáguragun büüruju jagía jóungua lueígiñe ában gudúngu, ába jáburujan baránajoun, ába jañáradagun.

¹⁴ Ábati janúfudedagun ja oúnigirubaliña büüruju jagía, ába jeíbaagun abájüdaguei le asúseredubei ubúruгу lúma áraabu. Ába jayábingua gürígia aríjei ca lan asúseredubei.

¹⁵ Dan le jachülürünbei le ñí lubei Jesúsu, ába jaríjini gürígia lé meja gawágubei espíritugu wuríbatiña ñun líña, táuñein gíñe lanáangun, areídaguaali, ába janúfudedagun.

¹⁶ Játi aríjubalin, ába jabájüdaguni le asúseredubei lun gürígia lé buga gawágubei espíritugu wuríbatiña lúma jawáguti büüruju, joun.

¹⁷ Ábati jayúmuragun lun Jesúsu lun láfuridun lídaangiñe jageíra.

¹⁸ Dan le ládinun Jesúsu tídoun ugúnein, ába layúmuragun wügüri lé buga gawágubei espíritugu wuríbatiña lun lun lídin lúma,

¹⁹ májati Jesúsu, aríñagarügüti lun.

—Beíba júbiñoun jámoun bidújeñu, ábame babájüdaguni sun le ladügübei Babúreme Búngiu báu, ída líña lan bagúdemedun lun.

²⁰ Ába lídin, ába lagúmeserun abájüdaguei sun le ladügübei Jesúsu láu lídan sun fulásu Decápolis, ába laweíridun janígi súngebui.

*Liraü Jáiro, túma würi to agúurubarun lanáangun Jesúsu
(Mt 9.18-26; Lc 8.40-56)*

²¹ Dan le lagíribudunbei Jesúsu tídan ugúnein loubáfurugun dúna, ába jayábingua бүрүбүну gürígia le ñíjin lubeí, ába leréderun ñi láru dúna.

²² Ábati liábin ában jádaangiñe tábuti jalígilisin juríu, gíríti Jáiro. Dan le laríjinbalin wügüri le Jesúsu, ába lájuduragun lubádu lugúdi,

²³ ába layúmuragun lun ítara.

—Nújein niraü touwe, queímoun bíchigei bújabu tuágu, areídagua támuga, moúnwen támuga.

²⁴ Ába lídin Jesúsu lúma, sarágu jáña gürígia afálarutiña, ába buriti jámurudaguni Jesúsu.

²⁵ Jádaanti sarágu gürígia ja, ñíñoun ában würi sánditu, dúusu irúmu táu láu lésejan jítaü tídaangiñe.

²⁶ Súfurijaru sarágu jámagiñe surúsiagu áni gásta táali sun le túmati, mareídaguntu, gáwoun gueíñarügü.

²⁷ Ligía tagáambun ladímurejóun luágu Jesúsu, ába tiábin lanáangiñe jádan sarágu gürígia, ába tagúurunun lanáangun,

28 ladüga tariñagun túnguarügü. “Laurügüme nagúurunun lanáangun nareídaguba.”

29 Lídán óra ligía, ába leréderun lésejan jítaü tueí, ába tasándiragun túngua luágu areídaguaaru lan.

30 Ábati lasándiruni Jesúsu luágu areídaguagüdaali lan gürígia láu lubáfu, ába lagáragun jawágun gürígia ja lanágangiñébaña, ába lálügüdajan.

—¿Ca agúurubei tuágu nanáangun?

31 Ába jaríñagun láni disípulugu lun.

—Aríagu biñátia lun jíbe gürígia ya luágu murúgu jáña lan, ¿álügüdajágidibu ca lan agúurubei buágu?

32 Ába laríaajan Jesúsu áluaja ca lan agúurubei luágu.

33 Ába tiábin würi tugúya adádagareina láu anúfudei, subúdiñuteí le asúseredubei tun, ába tájuduragun ligíbugiñe, ába tariñaguni sun inárüni lun.

34 Ába laríñagun Jesúsu tun.

—Niraü, areídaguaadibu ladüga bafíñen. Beíba láu darángilaü, areídaguañu lídaangiñe bisándi.

35 Nígili Jesúsu adímureja, ligía jayábin lúbiñegiñe wügüri lé buga ñüdünbei óugei luágu tisándi liraü, ába jaríñagun lun túguchi irájü tugúya.

—Jilátia biraü, ¿ca uágu bebéreseja lun maésturu guetó?

36 Agáamba lumúti Jesúsu le jaríñagubei, ába laríñagun lun wügüri ligía.

—Manúfudedabá, afíñerügübá.

37 Májatiti jóudin ámu lúma lueídügüya Pédro, Jacóbo lúma Juan le lamúlen Jacóbo.

38 Dan le lachülürünbei lúbiñoun wügüri ligía, ába laríjini chagáguaü jáma gürígia ja ayájubaña, agúaraja.

39 Ába lebélorun, ába laríñagun joun.

—¿Cásan uágu jareíncha, ayájua buri jugúya ítara? Moúnwentutia irájü to, tarúmuguña.

40 Ába jéjerajan láu. Ábati láfuridagüdüniña Jesúsu súngubei ñígiñe, ába lanügüni túguchi irájü túma túguchu jáma ja ñüdünbaña lúma, ába lebélorun le ñíjin tubeí irájü.

41 Ába lárügüdüni tújabu, ába laríñagun tun.

—Talíta, cúmi—lila líra. Niraü, sarába.

42 Lídán óra ligía, ába tásaarun irájü tugúya, ába teíbugun. Weíyaraüjaru, dúusu irúmu táu. Ába laweíridun janígi gürígia ja ñíbaña.

43 Ába líchugun Jesúsu dimúrei derégüdati joun lun mabájüdagun jamáni ni ca un, ába laríñagun joun lun jíchugun eígini tun.

6

Jesúsu lídan fulásu le Nazarét (Mt 13.53-58; Lc 4.16-30)

1 Ába lídin Jesúsu ñígiñe, ába lagíribudun lageíroun, ába jóudin láni disípulugu lúma.

2 Dan lachülürün wéyu le eméraguagülei, ába larúfudajan tídan jalígilisin juríu, sarágu jáña gürígia agáambeí, ába laweíridun janígi láu larúfudajan, ába jaríñagun.

—¿Jalía funásan lafúnrendeirei gürígia le sun le? ¿Cáteisán lichú áu le luágubei? ¿Ída liñásan gayára lubeí ladágun miláguru?

³ Saráfangéiga le tiraü María le, líbugaña Jacóbo, José, Júdas, lúma Simón, ñáñanu gíñe lítunu wáma.

Ába jíchugun mabájüdüni luágu.

⁴ Ába laríñagun Jesúsu joun.

—Sun gürígia, gúndaatiña láu ában proféta jaweídügüya ja lupaísanun jáma lidújeñu, jáma ja tílana lúban, jagía rügüñanu íchiga mabájüdüni luágu.

⁵ Ligía lásiñerunbei ladügün ámu miláguru ñi lueídügüya líchugun lújabu jawágu biñáraü sánditiña, ába lareídaguagüdüniña.

⁶ Weírititi lanígi láu mafíñen jamá. Lárigiñe, ába leíbuguni lirájüñü fulásu, arúfudajeina.

*Loúnajaniña Jesúsu láni disípulugu apúrichija
(Mt 10.5-15; Lc 9.1-6)*

⁷ Ába loúnajan jawágu láni dúusu disípulugu lun lagúmeserun oúnajaña bián bián, ába líchugun ubáfu joun lun gayára lan jaságarun espíritugu wuríbatíña.

⁸ Rúti dimúrei joun lun manügün jamá ni cáta luágu jeíbugun lueídügüya bádun, moún lumuti janügün ni fein, ni ságü, ni seínsu,

⁹ lun geídi tan jasábadun, lun mabíaman tan jasímisin.

¹⁰ Ába gíñe laríñagun joun.

—Dánme le jebélurun lídoun ában fulásu apúsaraja, reídei jumá ñi tídan ában méme múna darí jáfuridun lídaangiñe fulásu ligía.

¹¹ Ánjaünti merésibirúniwa lídan ában fulásu, mája jagía jagáambunün, furíjuma ñígiñe, ábame jáfuruduni calíqui lueígiñe jugúdi, liseínime magúndani jáu lílana fulásu ligía, ígira jumáña quei jadáriragun jóungua. Le ninárün jáu luágu dánme lan lachülürün luwéyuri Búngiu lun lagúseragüdüniña sun gürígia, maweíribei jabeichúniwa Sodómana jáma Gomórrana quei lílana fulásu le merésibirunbalün.

¹² Ábati jáfuridun, ába japúrichijan joun gürígia luágu lúnti lan jasáansiruni ligáburu jóuserun.

¹³ Sagátiña gíñe sarágu espíritugu wuríbatíña jaweí gürígia, jurúgua jagía aáli jawágu sarágu sánditiña, ába jareídaguagüdüniña.

*Loúnwen Juan le abásteragüdjabei
(Mt 14.1-12; Lc 9.7-9)*

¹⁴ Queíti eíbaajali lubeí luáguti Jesúsu lídan sun fulásu, ába gíñe lachülürün lábun lagáambun urúei Heródes. Sarágu jáña aríñagutiña.

—Saráya Juan le abásteragüdjabei lídaangiñe ouweni, ligía luweírinbei lubáfu.

¹⁵ Jaríñaga jíbiri.

—Elías lé meja proféta le.

Jíbiri aríñaga.

—Ában proféta quei ja binádu.

¹⁶ Dan le lagáambunbalin Heródes sun le, ába laríñagun.

—Juan le, le nadürüragüdübei ichügü, saráya lídaangiñe ouweni.

¹⁷ Lé meja asúseredubei, oúnajali meja Heródes adáürei Juan, ába lagüraguni láu güríngüri furísunrugu tadüga Heródias. Würi tugúya, lúmari meja Felípe, le lamúlen Heródes, ába lanügünun Heródes lúmarime.

¹⁸ Ába meja laríñagun Juan lun Heródes.

—Moún lumuti bagámaridunun lúmari bamúlen.

¹⁹ Ába liyéreegudun Juan tun Heródias, ába tabúseerun táfaruni jilágubei,

²⁰ siñá tumuti ladüga subúdi lan lun Heródes luágu ában lan wügüri le eíbuguti buídu lúma Búngiu Juan, áni ában lan wügüri esériwiduti lun Búngiu,

janúfudetiti lueí. Ligía mája lubeí lun tadügün ni cáta láu. Láu sun úa lan gunfaráanda láani Heródes le laríñagubei Juan lun buídu, agáamba lumúti láu ugúndani.

²¹ Ába tadáriruni Heródias ticháansin dan le lagúnfulirun Heródes irúmu, ába ladügün fédu joun gumádimatiña jáma jábutigu súaara jáma ámu buri güriña weírigutiña ja Galiléabaña.

²² Ába tebélorun tiraü Heródias ñí lubei fédu le, ába tabínajan, gúndaatiti Heródes jáma sun ja ñíbaña eíga lúma láu tabínajan irájü to, ába laríñagun tun.

—Amúriajabeí le babúseerun núma, níchugubei bun.

²³ Rúlumuti lerérun tun luágu líchugubei lan furúmieguarügü cátei le tamúriajan lúma tun, gayára lan lamídan lan fulásu le ñí lubei larúeijan tamúriaja.

²⁴ Ába táfuridun, ába taríñagun tun túguchu.

—¿Cábasan namúriaja lúma?

Ába taríñagun tun.

—Amúriajabeí lábulugu Juan le abásteragüdajabei lúma.

²⁵ Ába tebélorun irájü to furése le ñíjin lubeí urúei, ába taríñagun lun.

—Buséntina lun bíchuguni lábulugu Juan le abásteragüdajabei nun lídan ában asíedu guelé guelé.

²⁶ Ába lajírudagun urúei sarágu, quei rúlaali lan lerérun áni agáambagu jáña amísurajóutiña lun, májati lun míchu lubeí lan le tamúriajabei lúma tun.

²⁷ Furése furése, ába loúnajan urúei ában súaara láu dimúrei lun lanügüni lábulugu Juan lun.

²⁸ Ába lídin súaara ligía furísunrugu, ába ladürürüni lábulugu Juan, ába lanügüni lídan ában asíedu. Ába líchuguni tun irájü tugúya, ába tíchuguni tun túguchu.

²⁹ Dan le jagáambunbalin lánigu Juan, ába jayábin lun janügüni lúgubu, ába jábununi.

Leígagüdüni Jesúsu seíngü mílu wügüriña

(Mt 14.13-21; Lc 9.10-17; Jn 6.1-14)

³⁰ Lárigiñe jagíríbudun láni Jesúsu apóstolugu, ába jóúndaragun lúma, ába jabájüdaguni sun le jadügübei lúma le jarúfudajabei, lun.

³¹ Ába laríñagun Jesúsu joun.

—Jigóúgu, queímoun weméraagua lídan ában fulásu le mageírawati.

Laríñagubaalin líra ladüga ñíñanu sarágu güriña, jíbiri ñüdü, jíbiri ñübin, darí lun madáani lan Jesúsu jáma láni disípulugu ni lun jeígin.

³² Ába jóúdin tídan ába ugúnein lídoun ában fulásu mageírawati.

³³ Sarágu jáña aríjiti jóúdin, dan le jasúbudiruni luágu níjein lan Jesúsu jádan, ába jeíbaagun geyégua láu lagúnu lídaangiñe sun lirájüñü fulásu, ába jachülürün lubáragiñe lachülürün Jesúsu jáu láni disípulugu.

³⁴ Dan le larárirunbei Jesúsu tídaangiñe ugúnein, ába laríjin sarágu güriña jagúrabajañein, ába jagúdemedagun lun ladüga ítara jáña lan quei mudún ja móuniritiña. Ába lagúmeserun arúfudaja sarágu cátei joun.

³⁵ Dan le dárüjali, ába jayábin láni disípulugu, ába jaríñagun lun.

—Dárüjalitia áni úatiña aganoútiña lídan fulásu le.

³⁶ Oúnaja báña güriña ja lun jóúdin lídoun buri lirájüñü fulásu le yaráfabei lun jagáñijan fein, ladüga úati ni cáta ya lun jeígin.

³⁷ Ába laríñagun Jesúsu.

—Rújuma eígini joun.

Ába jaríñagun lun.

—¿Gayáraati funági wouðin agáñija fein joun? Busénwati jamúga lebégi bián-san wéyu wadágimanu lun wabíjini seínsu lun wíchugun fein joun súngebei.

³⁸ Laríñaga Jesúsu joun.

—¿Átiriñoungi fein júma? Jeíba aríjoun.

Dan le jaríjinun, ába jaríñagun lun.

—Seíngü fein jáma bián úduraü.

³⁹ Ába lañúuragüdüniña gürígia sagádirugu.

⁴⁰ Ába jañúurun san san lúma dimí dimí san, queísi laríñagun joun.

⁴¹ Ába lanügünun Jesúsu seíngü fein to lújaburugu jáma bián úduraü ja, ába laríjin siélun, ába leteíngiruni Búngiu tuágu, ába lagúbachagúnun, lárigiñe, ába lamúrusujanun lun líchugunun joun láni disípulugu lun jafánreinjanun jádan gürígia jagía, fánrein jamáña giñe bián úduraü jagía jádan súngebei.

⁴² Jouítiña sun jagía químule.

⁴³ Lárigiñe, ába jabuínchagüdüniña dúusu faníñe láu tífe fein lúma úduraü ígiragúti.

⁴⁴ Seíngüñanu mílu wügüríña eígitiña, mabájüdünga würíña jáma irájüñü.

Leibugun Jesúsu ligíbuagu dúna
(Mt 14.22-27; Jn 6.16-21)

⁴⁵ Ába ládinagüdüniña Jesúsu láni disípulugu tídoun ugúnein lun jánjiñuragun lubá lun jachülürün Betsáida, sun niján lan ayoúragua joun gürígia.

⁴⁶ Dan le ñüdünjaña, ába lídin luágu wübü ayúmuragua lun Búngiu.

⁴⁷ Dan le lagüñedunbei, lamídaanjaru dúna ugúnein jáu disípulugu, Jesúsu rugáali lábugua múarugu.

⁴⁸ Ába laríjin luágu jénreenguja lan joun lun jénjunjan ladüga jabárouñein lan garábali. Lubá larúgan, ába lídin Jesúsu jawágun eíbugeina ligíbuagu dúna, lásügürá yebe jáu.

⁴⁹ Dan le jaríjini eíbuga ligíbuagu dúna, ába jarítangun luágu úfiaü lan, ába jagúaragun,

⁵⁰ ladüga sun jagía aríja jamúti, ába janúfudedagun. Ába ladímurejan joun, ába laríñagun.

—¡Ganígi jumá! ¡Manúfude jumá, áu le!

⁵¹ Ába ládinun tídoun ugúnein jámoun, ába lagálumadun garábali. Ába laweíridun janígi láu,

⁵² ladüga úagili lan gunfaráanda jamáni miláguru le ladügübei táu fein, luágu gabáfu lan lun sun cátei, derégili jachügü.

Lareídagugüdüniña Jesúsu sánditiña Genésaret
(Mt 14.34-36)

⁵³ Ába jánjiñuraguni dúna, ába jachülürün Genésaret, ába jagürünun ugúnein láru dúna.

⁵⁴ Quei jaráriragun tídaangiñe ugúnein, ítara jasúbudiruni lílana fulásu luágu Jesúsu lan.

⁵⁵ Ába jeíbaagun lídoun sun fulásu aríñaga luágu chülújali lan, ába jagúmeserun gürígia anáaja sánditiña tídan jabárrari le ñíjin lubeí jagáamba luágu níjein lan Jesúsu ñi.

⁵⁶ Súnti fulásu ñíjin lumúti lebélura, ubúrugü yebe, lirájüñü yebe fulásu, áraabu yebe, ába jíchaajoún sánditiña úmada, ába jamúriajan lúma lun lígiruniña lúnrüğü jagúurun sánditiña jagía luágu táru lanáangun. Súnti ja agúurubaña luágu, areídaguatiña.

7

Cátei le adügübalin güriúa lun marúman lan ligíbugiñe Búngiu
(Mt 15.1-20)

¹ Ába jayábin fariséogu jáma jádaangiñe arúfudajatiña lilúrudun Moisés ja ñübinbaña Jerusaléngiñe, luágun Jesúsu.

² Ába jaríjin luágu añájein lan jádaangiñe disípulugu machíbun jamúti jájabu lubá jeigin según jagáburi juríu.

³ (Falá jamuti fariséogu jáma jíbiri juríu binádu jagáburi binádu jagübürigu lun meigin jamá, machíbunga jameí jájabu sarágu weíyaasu.

⁴ Dan le jayábin mágidirugugiñe, meiginbaña magúnfulirunga jagía láu jachíbuni jájabu. Níjein buri giñe sarágu luwúyerigu igáburi jafálarun, queí buri lachibúniwa wéru, soúdiéru, boulu, asíedu.)

⁵ Ábati jálügüdüni fariséogu jáma arúfudajatiña lilúrudun Moisés jagía, Jesúsu.
—¿Cásan uágu mafála jabálin báni disípulugu binádu jagáburi binádu wagübürigu, jeiginbei láu liwíye jájabu?

⁶ Ába loúnabuniña Jesúsu.
—Linárün proféta Isaías, dan le laríñagunbei juágu luágu ámu lan jigáburi lueí le áubei jarúfudagua júngua. Aríñagati.
Gürígia ja, jayumárurügü jíchiga inébesei nun, líña Búngiu, ánjein tídan janígi, mebéresentiña náu.

⁷ Málati jájuduragun nun, ladüga lé rügüñein jagúmadijan wügüriña jarúfudaja.

⁸ Ába laríñagun Jesúsu.
—Ígira jumáli lagúmadijan Búngiu lun jafálaruni binádu jagáburi binádu güriúa. lachibúniwa soúdiéru, wéru, lúma cátei líbeina líra.

⁹ ¡Maésturugu giñe buítiña jugúya, ígira jumúti lagúmadijan Búngiu lun jafálaruni binádu jigáburi!

¹⁰ Aríñagatí meja Moisés. “Inébe jamá bagübürigu bun, le anábagubaliña lagübürigu, jilála.”

¹¹ Ánjeinti jugúya, aríñagatün luágu gayára lan laríñagun ában güriúa lun lúguchi o tun lúguchu. “Siñáti níderagunibu ladüga sun le nómabei, aríñagaadina luágu lun lan níchuguni lun Búngiu”,

¹² Luágu furúmieguarügü lan le aríñaguti ítara, mámaali lan lúnti líderaguniña lagübürigu.

¹³ Láu líra, mebégigüda jumáli lagúmadijan Búngiu lun jafálaruni binádu jigáburi, adüga jugúya sarágu cátei líbeina líra.

¹⁴ Ábaya lagúarun Jesúsu joun güriúa ja ñibaña, ába laríñagun joun.
—Agáamba jumána, sun jugúya, gunfaráanda jumáname.

¹⁵ Úati ni cáta ebéluruti lídoun güriúa lun laríbadagüdüni ligíbugiñe Búngiu, le áfuridubei tídaangiñe lanígi güriúa, ligía aríbadagüdübalin ligíbugiñe Búngiu.

¹⁶ Jugúya le garígeirugubei lun jagáambun, agáamba jumána.

¹⁷ Dan le lígiruniña Jesúsu güriúa jagía, ába lebélorun múnadoun, ába jálügüdüni láni disípulugu luágu jémpulu le.

¹⁸ Ába laríñagun joun.
—¿Úati lubeí giñe gunfaráanda jumá? ¿Úati gunfaráanda jumáni luágu sun lan le ebélurubei bougudigiñe lídoun güriúa siñá lan laríbadagüdüni

¹⁹ ladüga mebéluti tídoun lanígi, lurágeirugun lebéloru, ñígiñe ábaya láfuridun lídaangiñe?

Láu líra laríñaguña luágu sun lan eígin, jarúmati.

20 Aríñagati gíñe.

—Le áfuridubei lídaangiñe gürígia, anáti líra, wuríbagüda lumúti,

21 ladüga lídaangiñe gürígia o tídaangiñe lanígi láfurida lagübüri samínaü, adultériu, salúfuri, áfarajaní,

22 íwerujaní, wámajabúni, iyéreejabúni, iyéeni, marícharagun lan ibágari, gimúgaü, marásualugú, anáanguni únguaü, medéraaguaguduni.

23 Sún buri cátei wuríbati le, tídaangiñe lanígi gürígia liábin, ligíati mabuídundagüdübalin ligíbugiñe Búngiu.

*Ában würi teréncha to afíñeruboun luágu Jesúsu
(Mt 15.21-28)*

24 Ába lídin Jesúsu ñígiñe louúbawagun Tíro lúma Sidón. Ába lebélorun tídoun ában múna áni mabúseerunti yebe lun lasúbudiruni ni ában. Siñáti larámudagun,

25 furése, ába tagáambun ában würi luágu, túguchu ában irájü gawágutu ában espíritu wuríbati. Ába tiábin, ába tájuduragun ligíbugiñe Jesúsu.

26 Würi tugúya, máma juríu, Síro-Feniciána. Ába tamúriajan lúma Jesúsu lun laságaruni espíritu wuríbati le tueí tiraü.

27 Ába laríñagun Jesúsu tun.

—Lúnti níderaguniña numútuniña ja juríu furúmiñe, mabuídunti lun tagídarúniwa fein jaweí isáanigu lun tíchugúniwa joun oúnli.

28 Ába touñabuni.

—Ánja Nabúreme, oúnli ja lábugiñebaña dábula gayáraati gíñe jeígin tídaangiñe tífe fein to jágujaboun isáanigu.

29 Ábati laríñagun Jesúsu tun.

—Adímurejadibu buídu, gayáraajali bídin, furíja espíritu wuríbati tídaangiñe biraü.

30 Dan le tachülürün múnada, ába tadárirunun irájü tídan gabána, furíjali espíritu wuríbati tídaangiñe.

Lareídaguagüdüni Jesúsu ában magáambaditi, maríñagadi

31 Ába láfuridun Jesúsu louúbawagugiñe Tíro, ába lásügürün Sidóngiñe lúma lídaangiñe buri fulásu lánina Decápolis, ába lachülürün luágun barána Galiléa.

32 Ñi janüga ában wügüri magáambaditi, dagádaga lerérun lun, ába jamúriajan lúma lun líchuguni lújabu luágu lun lareídaguagüdüni.

33 Ába ladíñurun Jesúsu ñígiñe láu jaweí gürígia, ába ládaruni bián lirájüñü lújabu larígeirugun, ába lásuerun, ába lájurudunun liñéñe láu arürei.

34 Ába laríjin siélun, ába lawáragun, ába laríñagun.

—¡Efata! —míni lan líra. ¡Junrénba!

35 Ába lánjunrenchun larígeirugu magáambaditi ligía, ába tánjingichun liñéñe lun ladímurejan buídu.

36 Ába laríñagun Jesúsu joun lun mabájüdagun jamáni ni ca un, létima laríñagun joun lun mabájüdagun jamáni, ligíatima jabájüdaguni.

37 Ábati buri laweíridun janígi sarágu, ába jaríñagun.

—Adüga lumúti sun cátei buídu, darí lun lagáambagüdüniña magáambaditiña, adímuregüda láña maríñagaditiña.

8

*Leígagüdüni Jesúsu gádürü mílu gürígia
(Mt 15.32-39)*

¹ Lídán dan ligía, ábaya joúndaragun sarágu gürígia áni úati ni cáta jáma lun jeígin. Ába lagúarun Jesúsu joun láni disípulugu, ába laríñagun joun.

² —Gudémetiña gürígia ja nun ladüga ürüwa wéyu jáu núma ya áni úaali ni cáta jáma lun jeígin.

³ Ánjaña nouñaja águyu meíginga, ladágaruba falálaü jawágu ümada, ladüga añájein jádaangiñe, díseti ñígiñe lumúti jayábin.

⁴ Ába joúnabuni láni disípulugu.

—¿Ída lubáti jeígagüdüniwa ya lídan fulásu le mageírawaguti?

⁵ Ába lálügüdüniña Jesúsu.

—¿Átiriñoun fein júma?

Ába jaríñagun lun.

—Sédü.

⁶ Ába lañúuragüdüniña gürígia múarugu, ába lanügunun sédü fein tugúya lújaburugu, ába líchugun eteíngiruni lun Búngiu. Ába lagúbachagunun, ába lamúrusujanun, ába líchugunun joun láni disípulugu, ába jafánreinjanun jádan gürígia jagía.

⁷ Níñanu gíñe átiri jarájüñü úduraü jáma, ába líchugun eteíngiruni jawágu, ába lafánreinragüdüniña.

⁸ Jouítiña sun jagía químule, buíngüdagíña sédü faníñe táu tífe to ígiraguboun.

⁹ Yarafañanu joun gádürü mílu wügüríña. Ába louñajaniña Jesúsu águyu,

¹⁰ ába ládínun tídoun ugúnein jáma láni disípulugu, ába joúdin Dalmanutoún.

Jamúriajan fariséogu miláguru lúma Jesúsu
(Mt 16.1-4; Lc 12.54-56)

¹¹ Ába jayábin fariséogu, ába jagúmeserun asígeneja lúma Jesúsu. Lúnti jaríjin lábun, ába jamúriajan lun larúfudun ában miláguru joun, siélugiñe.

¹² Ába lawáragun Jesúsu weíri, ába laríñagun.

—¿Cásan uágu jamúriaja gürígia ja lánina dan le ában miláguru? Ninárün jáu luágu marúfudúnbei lan miláguru jun.

¹³ Ába lígiruniña Jesúsu, ábaya ládínun tídoun ugúnein, ába lídin loubáfurugun dúna.

Jarúfudajan fariséogu quei ísi
(Mt 16.5-12)

¹⁴ Bulíei jamútiti disípulugu janügun eígin, ában rügüñoun fein jáma tídan ugúnein.

¹⁵ Ába lewéridiruniña Jesúsu, laríñaga joun.

—Toúnigi jumátia lueí jísite fariséogu lúma lísite Heródes.

¹⁶ Ába jaríñagun disípulugu jádaangua.

—Ladügatia meígan wamá fein laríñagubei ítara.

¹⁷ Ába lasúbudiruni Jesúsu jarítangun, ába laríñagun joun.

—¿Ca uágu jaríñaga luágu meígan jumá fein? ¿Üagili gunfaráanda jumá, meféen jugúya? ¿Ítara lidére jichügü?

¹⁸ ¿Maríjintün láu jágu, magáambun jugúya láu jarígeirugu? ¿Marítangun jumáli?

¹⁹ Dan le nafánreinjanbarun seíngü fein jádan seíngü mílu wügüríña, ¿átiriñoun faníñe táu tífe jabúdu?

Ába jaríñagun.

—Dúusu.

20 —Ángi dan le nafánreinjanun sédü fein jádan gádürü mílu, ¿átiriñeingi faníñe buin jabúdun?

Ába jaríñagun.

—Sédü.

21 Ába laríñagun joun.

—¿Úagili gunfaráanda jumá luágu máma lan tuágu fein nadímureja?

Lareidaguagüdüin Jesúsu ában maríjinti Betsáida

22 Lárigiñe, ába jachülürün Betsáidoun, ába lanügüniwa ában marijinti lun Jesúsu, ába jayúmragun lun lun lagúurun luágu.

23 Ítara líña lárügüdüni Jesúsu maríjinti ligía, ába lanügüni bougudín lueí fulásu ligía. Ába lájurudagun arürei luágu lágu, ába líchuguni lújabu luágu, ába lálügüdüni ánjein gayáaraäü lubeí laríjin.

24 Ába laríjin, ába laríñagun.

—Aríja numútiña wügüriña, naríjiniña quei tídibu wéwe, eíbugeina.

25 Ábaya líchuguni Jesúsu lújabu luágu lágu, ába laríjin güriña ligía láu goúnigi, ába lareidagun, ába laríjini sun cátei furáangu.

26 Ába loúnajani Jesúsu águyu, aríñageina lun.

—Mebélurabátia ubúrugun, maríñagunbeíme lun ni ában ñi.

Laríñaguni Pédro luágu Jesúsu lan Crístubei

(Mt 16.13-20; Lc 9.18-21)

27 Lárigiñe, ába lídin Jesúsu jáu láni disípulugu lídoun buri lirájüñü fulásu le geyéguabei láu ubúrugun Cesaréa le Filípo. Úmada, ába lálügüdüniña láni disípulugu, laríñaga joun.

—¿Cátanasan jaríñagun güriña?

28 Ába joúnabun.

—Añájein aríñagutiña luágu Juan lan le abásteragüdjabei lan amürü, jíbiri aríñaga proféta Elías ban, añájeingua aríñagutiña luágu ámu lan proféta amürü.

29 Ába laríñagun.

—Ánti jugúya, ¿cátanati lídan jarítangun?

Ába laríñagun Pédro lun.

—Amürü Crístubei, le loúnajabei Búngiu lun lasálbaruniña güriña lídaangiñe jafígoun.

30 Ába laríñagun Jesúsu joun lun maríñagun jamáni lun ni ában.

Ladímurejan Jesúsu luágu loúnwen

(Mt 16.21-28; Lc 9.22-27)

31 Ába lagúmeserun Jesúsu, le Wügüri Garaüwarügüti, arúfudaja joun luágu lúnti lan lasúfurirun sarágu, luágu weíribei lan jíchugun wügüriña weírigutiña lídan jafíñen juríu mebéreseni láu, ítara lúba gíñe jóuseruni jábutigu fádirigu jáma arúfudajatiña lilúrudun Moisés. Aríñagati joun luágu láfarúaba lan jilágubei, áni lásaaruba lan lídaangiñe ouweni lúnya labágaridun luágu lürüwan wéyu.

32 Furánguti laríñaguni le joun. Ábati lanügüni Pédro Jesúsu ñígiñe, ába lagúmeserun adeínja lun.

33 Ába lagáragun Jesúsu, ába laríjin jawágun láni disípulugu, ába lébechuni Pédro, ába laríñagun lun.

—¡Díseba nueí, Máfia! Bugúya, masáminaruntibu quei Búngiu, basáminarun quei wügüriña.

34 Ábati lagúarun Jesúsu joun láni disípulugu jáma jíbiri güriña lun jayárafadun lun, ába laríñagun joun.

—Le busénti lafálarunina, bulíeileí cáteiñein lan, awándaleí sun luwúyeri asúfuriruni le lúnbei liábin lun nueígiñe queísi lanüğüni ában wüğüri lugúruwan, falálana.

³⁵ Ladüga le abúseeruti leséfuragun lúngua ya ubouágu leféri-dirubei ibágari le magúmuchaditi, ánjeinti le ánjabei leféri-diruni libágari ya ubouágu nueígiñe, libíjubei ibágari le magúmuchaditi siélu.

³⁶ ¿Cági ju lan lun güri-gia lagáñeiruni sun le lánina ubou, leféri-direime lubára siélu?

³⁷ Úati ni cáta lánina ubou le áuti gayára lan lagáñijan güri-gia lubára siélu.

³⁸ Le anüğüti busíganu nuágu lúma luágu nerérun jagíbugiñe güri-gia múaraantiña áni gafígountiña ja, nanüğüba giñe busíganu láu, áu le Wüğüri Garaüwarüğüti, dánme le niábin siélugiñe láu luweírigun Núguchi, geyégu jáu ánjeligu ja sándubaña.

9

¹ Aríñagati giñe Jesúsu joun.

—Nínárün jáu, luágu añájein lan jádaangiñe ja yábaña guetó, mouñwenbaña darí jaríjini lachülürün larúeijan Búngiu láu ubáfu.

*Lámuñedagun laríjin Jesúsu
(Mt 17.1-13; Lc 9.28-36)*

² Sísi wéyu lárigiñe, ába lanüğüni Jesúsu Pédro, Jacóbo, lúma Juan, ába lídin jáu luágu ában wübü íñuti le ñí lumuti gayára lan jábugua jamá, ába lámuñedagun laríjin ñi jagíbugiñe.

³ Ába támiridun lanáangun jarú quei jeméreedu, weíriti tíjarun chülü lúmoun úa jamá ni güri-gia ubouágu gayáraati jachíbun gamísa lun tájarudun ítara.

⁴ Ába jaríjini Elías lúma Moisés ayánuja lúma Jesúsu,

⁵ ába laríñagun Pédro lun Jesúsu.

—Maésturu, ¡lídán dan awánja lan ya! Adüga wamá ürüwa dibásein, ában bun, ában lun Moisés, ában lun Elías.

⁶ Laríñagubaalin líra ladüga janúfude disípulugu, áni ibídiñeti lun Pédro ca lan laríñagubei.

⁷ Ába larárirun ában juánriñu le ñíjin jabeí, ába ladáuragun jáu, ába la-gaambúniwa ában umálali lídaangiñe juánriñu ligía le aríñagubei.

—Níján Niraü le jínsiñebei nun, jeíba láu le lubeíbei.

⁸ Lídan óra ligía, dan le jaríjin geyégu ñi, maríjinjaña ámu ñi lueídügya Jesúsu.

⁹ Dan le arárireina jamá lueígiñe wübü, ába léredun Jesúsu jawágu lun mabájüdagun jamáni le jaríjibeí lun ni ában daríme saráli lídaangiñe oúweni lúnya labágaridun, ligía le Wüğüri Garaüwarüğüti.

¹⁰ Ligía jareídunbalin jádaangua, álügüdajárüğütiña jámagua cátei lán funa ásaarunibeí lídaangiñe oúweni.

¹¹ Ábati jálügüdüni Jesúsu.

—¿Cásan uágu jaríñaga arúfudajatiña lilúrudun Moisés luágu lúnti lan liábin Elías furúmiñe lubáragiñe liábin le Crístubei?

¹² Ába loúnabuniña.

—Inárüni le jaríñagubei luágu Elíasba lan ñübin furúmiñe áni laráanserubei lan sun cátei. ¿Cági taríñagubei Lerérun Búngiu nuágu, áu le Wüğüri Garaüwarüğüti? Aríñagatu luágu nasúfuriruba lan sarágu áni mabájüdünbadina lan.

¹³ Nariñajare jun luágu ñübinjali lan Elías, ába jadüğüni güri-gia sun le jabúseerunbei láu, quei taríñaguni Lerérun Búngiu luágu ítara lúba lan lasúseredun lun.

*Lareídaguagüdüin Jesúsu ában irájü gawáguti espíritu wuríbati
(Mt 17.14-21; Lc 9.37-43)*

¹⁴ Lárigiñe, ába jagíribudun le ñíjin jabeí jíbiri disípulugu, ába jaríjin sarágu gürígia geyégu jáu. Níñanu gíñe arúfudajatiña lilúrudun Moisés asígeneja jáma.

¹⁵ Dan le jaríjinbalin Jesúsu, ába laweíridun janígi láu jaríjini ñi, ába jeíbaagun abúsura lun.

¹⁶ Ábati lálügüdüniña, laríñaga joun.

—¿Ca uágu jasígeneja jáma?

¹⁷ Ába loúnabun ában jádaangiñe ja ñíbaña, ába laríñagun.

—Maésturu, niján niraü nanügün bun, níjein ában espíritu wuríbati luágu, merérunjali ladüga.

¹⁸ Ní lumuti lárügüdei espíritu wuríbati ligía, lájuchuruni múarugun, ába láfurijan jacútaü liyúmulugugiñe, ába lacúnrinjan lári. Ledébiliduñati ítara. Amúrijaadina jáma báni disípulugu lun jaságaruni espíritu wuríbati le lueí, siñá jamuti.

¹⁹ Ába loúnabun Jesúsu, ába laríñagun.

—¿Gürígia mafíñeraditiña! ¿Átiribeísan dan lun neréderuni júma lubá gayára lan jafíñerun nuágu? ¿Ídame lagúmucha mafíñeni le jídaanbei? Barüjumei irájü ligía ñájoun.

²⁰ Ába janügüni lun. Dan le laríjinbalin espíritu wuríbati ligía Jesúsu, ába louwejugüdüni irájü ligía, ába leíguadun múarugun, ába lagárabajan, ába láfurijan jacútaü liyúmulugugiñe.

²¹ Ába lálügüdüni Jesúsu lúguchi, ába laríñagun lun.

—¿Átiri dan lueígiñe ítara lan?

Ába laríñagun lúguchi.

—Lúmagiñe ñúraügili.

²² Gíbeeli weíyaasu lájuchuruni espíritu wuríbati ligía wáturugun o dúnarugun lan lún yebe láfaruni jilágubei. Ánjein lubeíti níjein lubeí gayára bumúti adüga, gudéme wamá bun, íderagua báwa.

²³ Ába laríñagun Jesúsu lun.

—¿Ca uágu baríñaga ítara? Inárüni luágu gayára lan nadügüni. Sun cátei gayáraati lun le afíñebei.

²⁴ Ába lagúaragun lúguchi irájü ligía.

—¿Afíñetina, íderagua bána lúntima nafíñerun!

²⁵ Dan le laríjinbei Jesúsu luágu furésetimájali lan jagíbedun gürígia, ába ladeínjan lun espíritu wuríbati ligía, ába laríñagun.

—Espíritu magáambaditi, maríñagadi, aríñagatina bun lun báfuridun, ígirabei irájü le áni mebéluradügüyabá lídoun.

²⁶ Ába lagúaragun espíritu, ábaya louwejugüdüni irájü ligía, ába láfuridun, ába leréderun irájü ligía camá jiláali. Sarágu jáña aríñagutiña luágu jilá lan.

²⁷ Ába lárügüdüni Jesúsu lueígiñe lújabu, ába liñúraguni, ába laráramun.

²⁸ Ábati lebélurun Jesúsu múnadoun, ába jálügüdüni láni disípulugu dan le jábuguarügaña lúma, ába jaríñagun lun.

—¿Cásan uágu siñá wabalin espíritu wuríbati ligía aságara?

²⁹ Ába laríñagun joun.

—Ladüga líbe espíritu le, láu rügüñein ayúmuraguni lun Búngiu lúma ayúnaruni gayára lan láfuridun.

Ladímurejaanya Jesúsu luágu loúnwen
(Mt 17.22-23; Lc 9.43-45)

³⁰ Dan le jóudin ñígiñe, ába jásügürün Galiléagiñe,

³¹ mabúseeruntiti Jesúsu lun lasúbudirúniwa jalíñañein lan ladüga larúfudajaña lan joun láni disípulugu, aríñageina ligía luágu ledéregerúaba lan, ligía le Wügüri Garaúwarügüti, jájaburugun wügüriña wuríbatíña áni jáfarubei lan jilágubei, ábame lásaarun lídaangiñe óúweni luágu lürüwan wéyu lúnya labágaridun.

³² Úati gunfaráanda jamáni le laráñagubei joun, áni janúfudetiña lun jálügüdüni.

¿Cátima weírigubei?
(Mt 18.1-5; Lc 9.46-48)

³³ Ába jachülürün ubúruugu Capernaúm, múnada, ába lálügüdüniña Jesúsu.
—¿Cásan buga uágu jadímureja le eíbugeina jumá?

³⁴ Ába jeréderun maníñu ladüga úmada adímurejeina jañá buga luágu ca lan jádaangiñe weírigutimaabei.

³⁵ Ábati lañúurun Jesúsu, ába lagúarun joun dúusugubei disípulugu lubádun, ába laríñagun joun.

—Le abúsueruti ligía lan furúmiñeti, lúnti agúmujóuni lan jádan súngubei, lun gíñe lesériwidun joun súngubei.

³⁶ Ába lanügün ában irájü, ába líchuguni jamídaangua, ába lanügüni lújaburugu, ába laríñagun joun.

³⁷—Gürígia le erésibiruti ában irájü quei le lídan níri, resíbi lumútina, áni máma rügüñein áu lerésibira, resíbi lumúti gíñe Núguchi le óúnajabalina.

Le mámabei wágani, wámagiñeñein
(Lc 9.49-50; Mt 10.42)

³⁸ Ába laríñagun Juan lun.

—Maésturu, aríjatiwa ában wügüri aságajati espíritugu wuríbatíña lídan bíri, quei máma lan wámañein, ába wawéridiruni lun madügündügüya láani.

³⁹ Ába laríñagun Jesúsu.

—Mawéridira jumeí, ladüga úati ni ában le adügüti miláguru lídan níri lun ladímurejan wuríba nuágu.

⁴⁰ Le mámabei wágani, wámagiñeñein.

⁴¹ Ninárün jáu luágu furúmieguarügü lan le íchuguti ában wéru dúna jun lídan níri ladüga láni jumá Crístu, libíjuba afáyeiruajaü buíti.

Goúnigi lueí leíquadúniwa lídoun figóu
(Mt 18.6-9; Lc 17.1-2)

⁴² ‘Furúmieguarügü le afígoungüdüti ában jádaangiñe ja isérigiñabaña lídan jafíñen nuágu, buítimaati jamúga lun lun lágurúniwa baránajoún láu ában óúnwenbun dübü le amúligüleí güráñu luágu ligína sügü láu ladügüni cátei líra.

⁴³ Áñjabu lafígoungüda bújabu guánarü, buítimaati jamúga lun báchuguni, ladüga buítimaati jamúga bídin siélun láurügü ában újabu sügü láu jamúga badarún láu biángubei bújabu máfiougatin,

⁴⁴ ñí lubei moúnwen jamá jéweraü ja eígibalin jágubu jiláaña, méñeguchadi wátu.

⁴⁵ Áñjabu gíñe lafígoungüda bugúdi guánarü, buítimaati jamúga gíñe lun báchuguni, ladüga buítimaati jamúga bebélurun siélun láu ában ugúdi sügü láu badarún máfiougatin láu biángubei bugúdi,

⁴⁶ le ñí lubei moúnwen jamá jéweraü, méñeguchadi ligía wátu.

⁴⁷ Ánjabu gíñe laffigoungüda bágu, buítimaati lun baságaruni, ladüga buítimaati jamúga bebélurun lídoun larúeijan Búngiu láu ában águu sügü láu jamúga badarún máfiougatin láu biángubei bágu,

⁴⁸ le ñí lubei moúnwen jamá jéweraü, méñeguchadi ligía wátu.

⁴⁹ ‘Sun gürígia ja lánigubaña Búngiu, jouchúaba quei lau wátu geméti jawágu lun jarúmadagüdüniwa, queísigubeirügü líchugúniwa sálu luágu cátei adágaragüdüwati lun Búngiu, arúfuda lámuga luágu jarúma lan, buídu ligía lun lareidúniwa.

⁵⁰ Buíti sálu, ánjein leféridira lubásuan, ¿cábago un ju lan? Ítara líña lubeíti, awánda jumeí sun ouchúni lubá jarúmadun ligíbugiñe Búngiu, lídan jumá úraguni júmaga.

10

Larúfudajan Jesúsu luágu ígiraguni (Mt 19.1-12; Lc 16.18)

¹ Ába láfuridun Jesúsu Capernaúmgíñe, ába lídin loúbawagun Judéa lúma luágun oubaü le ñígiñe lubei láfuacha wéyu libíti dúna le Jordán. Ábaya jóúndaragun gürígia le ñí lubei, ábaya larúfudajan joun queíñaja ligáburi.

² Ábati jayábin jádaangiñe fariséogu luágun Jesúsu áluga járügüdüni tídan jasádarán láu jálügüdüni ánjein maríban lubei lun lafánreinragun wügüri túma lúhari.

³ Ába laríñagun Jesúsu joun.

—¿Cá mejagi laríñagubei Moisés jun?

⁴ Ába jaríñagun lun.

—Aríñagati Moisés luágu gayára lan tíchugúniwa gárada lánina ígiraguni tun úhari.

⁵ Ába laríñagun Jesúsu joun.

—Líchugunbaalin Moisés gumádi líra jun ladüga tidére janígi.

⁶ Ánjein méja, dan le ladügünbalin Búngiu sun cátei, “adüga lumútiña wügüri túma würi”.

⁷ “Ligía lígirubei lubei wügüri lúguchi túma lúguchu lun laganóuniwa túma lúhari,

⁸ ábame jeréderun quei ábanrügü.” Mámáña lubeíti biáma, ábanrügaaña.

⁹ Ligía moún lubei lafánreinraguni wügüri le ladúnraguagüdübei Búngiu.

¹⁰ Dan le múnada jamá, ábaya jálügüdüni disípulugu luágu cátei le,

¹¹ ába laríñagun Jesúsu joun.

—Le ígirutu lúhari, ába lagámaridun ámu, ladügüña adultériu.

¹² Ánjein gíñe tígira würi túhari, ába tagámaridun ámu, tadügüña gíñe adultériu.

Labíniruniña Jesúsu irájüñü (Mt 19.13-15; Lc 18.15-17)

¹³ Ába janáajan gürígia irájüñü lun Jesúsu lun lagúurun jawágu, ába jagúmeserun disípulugu adeínja joun ja anájabaliña.

¹⁴ Dan le laríjini Jesúsu, magúndaati láu, ába laríñagun joun.

—Ígira jumá lun jayábin irájüñü númoun, mamájara jumá, ladüga ja jarúmabaña afíñe quei irájüñü, jagía lílanabaña larúeijan Búngiu.

¹⁵ Ninárün jáu luágu le lan marúfudunti ában igáburi ünabugubuti queísi ában irájü, siñábei lebélorun lídoun larúeijan Búngiu.

¹⁶ Ába lanügüniña lújaburugu, ába labíniruniña láu lújabu jawágu.

*Ladímurejan ában rísiti lúma Jesúsú
(Mt 19.16-30; Lc 18.18-30)*

¹⁷ Dan le lasígirunbalin Jesúsú luweíyasun, ába liábin ában wügüri eíbaagueina lubároun, ába lájuduragun ligíbugiñe, ába lálügüdüni ítara.

—Maésturu buíti, ¿cásan cátei buíti lúnbei nadügüni lun nibíjini ibágari le magúmuchaditi?

¹⁸ Ába laríñagun Jesúsú lun.

—¿Ca uágu baríñaga nun “buíti”? Ában rügüñein buíti, Búngiu.

¹⁹ Subúditi gumádi bun. “Maganouábá túma ában gámaritu ámu, máfarajabá, míwerujabá, madímurejabá iyéeni luágu ni ában, mayéeda báña gürígia, inébe jamá bagübürigu bun.”

²⁰ Ába laríñagun wügüri ligía.

—Maésturu, gúnfulitina láu sun le lúmagiñe ñüraügidina.

²¹ Ába laríaguni Jesúsú láu ínsiñeni, ába laríñagun lun.

—Ában cátei mégeibei lun badügüni. beíba, alúgurabeí sun le búmabei, ábame bíchuguni lebégi joun gudémetiña, ábame bíbíjin irísini siélu. Ábame bagíribudun, ábame bafálarunina.

²² Dan le lagáambunbalin gürígia le cátei le, ába lírudagun, ába lídin láu íruni ladüga rísiti buídu.

²³ Ába laríjin Jesúsú geyégu jawágun súngubei, ába laríñagun joun láni disípulugu.

—jénreenguti lun jebélurun rísitiña lídoun larúeijan Búngiu!

²⁴ Ába laweíridun janígi disípulugu láu le laríñagubei, ábaya laríñagun joun.

—Nirájüñü, jénreenguti lun jebélurun ja íchubalin jafíñen luágu jarísin lídoun larúeijan Búngiu!

²⁵ Méreenguntimaati lun ában caméyu lun lásügürün lídaangiñe lujúyun ában agúsa sügü láu lebélorun ában rísiti lídoun larúeijan Búngiu.

²⁶ Dan jagáambunbalin cátei le, ába laweíridun janígi, ába jálügüdagun jámagua.

—¿Cáteiti gayáraabei lasálbarun?

²⁷ Ába laríaguniña Jesúsú, ába laríñagun joun.

—Siñáti jasálbaragun gürígia jóungua, ánjein Búngiu, gayáraati, ladüga úati ni cáta siñáti lun Búngiu.

²⁸ Ábati laríñagun Pédro.

—Wabúreme, wagía, ígira wamáalitia sún meja le wámabei lun wafálarunibu.

²⁹ Ába laríñagun Jesúsú.

—Nínárün jáu luágu furúmiegurügü lan le ígirutu lúban, o lamúlenu, o líbugañanu, o lítunu, o lúguchi, o lúguchu, o lirájüñü, o lufúlasun nueígiñe o lueígiñe lan ugánu le lánina asálbaruni,

³⁰ Ierésibiruba san weíyaasu sügü láu guetó lídan uboú le. múna, amúlenu, íbugañanu, ítunu, úguchurunu, isáanigu, lúma fulásu, láu sun leíbaajoúniwa, resíbi ligíame ibágari magúmuchaditi siélu.

³¹ Sarágu jáña ja furúmiñetiñábaña guetó, jagíaba agúmujoúni yágüta siélu, áni sarágu ja agúmujoúnibaña, jagíaba furúmiñetiña.

*Ladímurejaanya Jesúsú luágu louñwen
(Mt 20.17-19; Lc 18.31-34)*

³² Luáguñanu ũma lun Jerusaléoun, Jesúsú jabá jabá láni disípulugu, láuñanu luweírin anígi, áni jíbiri gürígia ja afálarubaliña, láuñanu anúfudei. Ábayati ladíñurun Jesúsú jáu láni dúusu disípulugu jaweí jíbiri gürígia, ába lagúmeserun aríñagei le lúnbei lasúseredun lun joun.

³³ Ába laríñagun joun.

—Quei lubeí jaríjini, luáguñadiwa üma lun Jerusaléoun, le ñíba lubeí nedéregerúa, áu le Wügüri Garaüwarügüti, joun jábutigu jafádirigun juríu lúma joun arúfudajatiña lilúrudun Moisés, ja lúnbaña jasíadirunina lun noúnwen.

³⁴ Ábame jedéregerunina joun ja mámabaña juríu lun jéjerajan náu, jabeíchubadina, jásueregubadina, ábame jáfarunina jilágubei, luágume lürüwan wéyu, ábame násaarun lídaangiñe ouweni lúnya nabágaridun.

Jamúriajan Jacóbo lúma Juan ában fuleísei
(Mt 20.20-28)

³⁵ Ábati jayábin Jacóbo lúma Juan, ja lirájüñü Zebedéo, ába jaríñagun lun Jesúsu.

—Maésturu, buséntiwa lun badügün ában fuleísei woun.

³⁶ Ábati laríñagun joun.

—¿Cági jabúseerubei lun nadügün jun?

³⁷ Ába jaríñagun lun.

—Lun dánme lan barúeijan láu sun buweírigun, lun bañúuragüdüníwa, ában lueígiñe boúnwenren, ában lueígiñe bubaúna.

³⁸ Ába laríñagun Jesúsu joun.

—Ibídíñeti jun ca lan jamúriajabei. ¿Gayáraabei jawánduni luweírín igárigu le lúnbei nawánduni, gayára ligíame júaradun núma lídan nasúfurirun?

³⁹ Ába joúnabun.

—Gayára wabeí.

Ába laríñagun joun.

—Lúnti jawánduni igárigu le lúnbei nawánduni, úara jugúyame núma lídan nasúfurirun,

⁴⁰ ánjein lun jañúurun ában lueígiñe noúnwenren, ában lueígiñe nubaúna, máma áu lúnbei níchuguni, líchugúba joun ja ubáabaña laráanserei Búngiu.

⁴¹ Dan le jagáambunbalin ja jíbiri díisi disípulugu, ába jagáñidun lúma Jacóbo láu Juan.

⁴² Ába lagúarun Jesúsu joun súngubei lubádun, ába laríñagun joun.

—Quei jasúbudirun, ja agúmadijabaña jádan ja mámabaña juríu, arúfudaguatiña joúngua camá jamuga jabúriña lílana fulásu ligía, játi weínamubaña jádan, arúfuda jamúti jabáfu.

⁴³ Ánjein jídan, máma lúba, le abúseeruti lun weíri lan jídan, lúnti lesériwiduniña jíbiri.

⁴⁴ Furúmieguarügü jídaangiñe le abúseeruti lun ligíaba lan furúmiñeti, lúnti idámuni lan joun jíbiri,

⁴⁵ ítara quei máma lan niábiña, áu le Wügüri Garaüwarügüti, lun nesériwidúniwa, niábiña lun nesériwidun lúma lun níchuguni nibágari lebégame jasálbarun sarágu gürígia.

Lareídaguagüdüni Jesúsu Bartiméo, le maríjinbei
(Mt 20.29-34; Lc 18.35-43)

⁴⁶ Ábati jachülürün Jericó. Dan le áfurideina lan Jesúsu lídaangiñe fulásu ligía jáu lání disípulugu jáma sarágu gürígia, ñíñein ában maríjinti gíríti Bartiméo, liraü Timéo, ñun láru üma amúriaja seínsu.

⁴⁷ Dan le lagáambunbei luágu yaráfaali lan Jesúsu le Nazarétna, ába lagúmeserun maríjinti ligía agúaraja.

—¡Jesúsu, ladügawagun Davíd, gudémená bun!

⁴⁸ Sarágu jáña adeínjatiña lun lun lámanichun, ligíatima lagúaragun.

—¡Ladügawagun David, gudémená bun!

⁴⁹ Ába leréderagun Jesúsu, ába laríñagun.

—Wájuma lun lun liábin nun.

Ába jagúarun lun maríjinti ligía, ába jaríñagun lun.

—Ragúba gurásu, sarába, lagúajaña bun.

⁵⁰ Ába lachüürunun labíte, ába ladügün ában chubaü, ába layárafadun lun Jesúsu.

⁵¹ Ába lálügüdüni Jesúsu.

—¿Ca babúseerubei nadügün bun?

Ába loúnabun maríjinti ligía.

—Maésturu, buséntina naríjin.

⁵² Ába laríñagun Jesúsu lun.

—Gayáraati bídin, areídaguaadibu ladüga afíneedibu nuágu.

Lídan óra ligía, ába gayára lan laríjin maríjinti ligía, ába lídin lárigi Jesúsu.

11

Lebélorun Jesúsu Jerusaléoun

(Mt 21.1-11; Lc 19.28-40; Jn 12.12-19)

¹ Dan le yaráfaaña lubei lun Jerusalén, ába jachülürün ligíbugiñe fulásu buri le Betfajé lúma Betánia, le ünabubei libíti wübü le Olívos, ába laríñagun Jesúsu joun biáma jádaangiñe láni disípulugu.

² —Jeíba lídan liraüraü fulásu le wagíbugiñebei, dánme le jachülürün ñi, jadáriruba ában burígü güráñu le maweinjoúngili ni ában weíyaasu. Jafáragadeíme, ábame janügüni ñájoun.

³ Ánjaün álügüdüwa ca lan uágu jadügei le, jaríñagame lun luágu busén láni Jesúsu, luágu láguyugüdübei lan furése.

⁴ Ába jóudin, ába jadáriruni burígü ligía güráñu lubádu ában béna, bougudi lídan üma, ába jafáragaduni.

⁵ Ába jaríñagun jádaangiñe ja ñíbaña ümadarugu joun.

—¿Ca jadügübei? ¿Cáme jafáragadei burígü le?

⁶ Ába jóunabuniña quei laríñaguni Jesúsu joun, ába jígiruniña lun jóudin láu.

⁷ Ába janügüni burígü lun Jesúsu, ába jíchugunun jabíte luágu burígü ligía, ába laweínruni Jesúsu.

⁸ Sarágu jáña átulerutu jabíte luágu üma, jíbiri, ába jánchujan tilímun wéwe, ába jachágajani luágu üma lubá lásügürün Jesúsu ligíbuagugiñe.

⁹ Ja ubáraübaña jáma ja árigibaña, ába jagúmeserun agúaraja.

¡Glória! ¡Biníwati wügüri le ñübinbei lídan líri Wabúreme Búngiu!

¹⁰ Biníwati arúejani le ñübinbei, le lúnbei ítara lan queísi meja larúeijan wáguchi David.

¡Uweíriguni lun Búngiu lídan líñun-ágei siélu!

¹¹ Lárigiñe, ába lebélorun Jesúsu Jerusaléoun, belú ligía témpulurugun, lárigiñe laríjini sun cátei, ába lídin Betánia jáu dúusu disípulugu ladüga dárüjali lan.

Líñaraguni Jesúsu tídibu ígo to mínboun

(Mt 21.18-19)

¹² Larúgan, dan le jáfuridunbei Betániagiñe, ába lalámachun Jesúsu.

¹³ Dísegiñe, ába laríjin ában tídibu ígo gabánatu. Ába lídin aríja ánjein gin tubei, ubánaü rügüñein ladárrira tuágu ladüga mámagili lan tidáani ígo.

¹⁴ Ábati laríñagun Jesúsu lun tídibu ígo ligía.

—Magíndadügüyabá.

Ába jagáambuni láni disípulugu.

Larúmadagüdünnun Jesúsu témpulu

(Mt 21.12-17; Lc 19.45-48; Jn 2.13-22)

¹⁵ Lárigiñe, ába jachülürün Jerusaléoun, ába lebélorun Jesúsu témpulurugun, ába laságajaniña ja alúgurajabaña jáma ja agáñijabaña ñi. Ába lagárabajani jadábulan ja asáansijabaña seínsu joun gürígia lúma jála ja alúgurajabaña únjun.

¹⁶ Mígirun lumútu témpulu lun ümame.

¹⁷ Ába laríñagun lídan larúfudajan joun.

—Laríñajare Búngiu tídan líburu to Lerérun. “Núban, fulásu le ñí lubei gayára lan jayúmuragun sun gürígia nun, ánjein jugúya, barü jumaaru quei jában jíwerutiña.”

¹⁸ Ába jagáambun jábutigu fádirigu jáma arúfudajatiña lilúrudun Moisés luágu le laríñagubei, ába jagúmeserun áluaja ída lúba lan jáfaruni jilágubei, ladüga janúfudetiña lueí, quei sun lan gürígia weíruti janígi luágu le larúfudajabei.

¹⁹ Dan le lagúñedunbei, ába láfuridun Jesúsu fulásurugugiñe.

Tídibu ígo to ásaurüboun

(Mt 21.20-22)

²⁰ Larúgan bináafin, sügüti Jesúsu jáma láni dúusu disípulugu lueígiñe méme üma ligía, ába jaríjinun tídibu ígo saüja lúmagiñe tílagüle.

²¹ Ába larítaguni Pédro, ába laríñagun lun Jesúsu.

—Maésturu, jaríjabá tun tídibu ígo to bíñaraguboun gúñaarü, saüja!

²² Ába laríñagun Jesúsu joun súnigubei.

—Afiñe jumá luágu Búngiu.

²³ Ninárün jáu luágu furúmieguarügü lan le aríñaguti lun wübü le. “Gidába yágiñe, dabúba baránajoun”, ánjein úa lubei liloúguan afíñeni tídan lanígi áni afíñe ligía luágu lagúnfuliruba lan le laríñagubei, ítara lúba.

²⁴ Ligía naríñagunbei jun luágu sun lan le jamúriajan lúma Búngiu, ánjein afíñe jubei luágu resíbi jumáli lan, ítara lúba.

²⁵ Dan le jayúmuraguña lan lun Búngiu, ánjein níjein lubei ladüga ában gürígia jun le mísiñeti jun, ferúduna jumei lun gíñe ferúduna lánün Jóguchi Búngiu le siélubei.

²⁶ Ánjein úa ferúduna jumá, úabei gíñe ferúduna láani Jóguchi Búngiu le siélubei jífigoun.

Lugúmadin Jesúsu

(Mt 21.23-27; Lc 20.1-8)

²⁷ Ába jagíribudun Jerusaléoun. Dan le eíbugeina lubei Jesúsu témpulurugu, ába jayábin jábutigu fádirigu, arúfudajatiña lilúrudun Moisés, jáma ámu wügüriña ja weírígutiña lídan jafíñen juríu,

²⁸ ába jálügüdüni.

—¿Cáteisan biríchabei lun bádaragun búngua lídoun cátei le tánina témpulu? ¿Ca íchugubalin ubáfu le bun?

²⁹ Ába loúnabuniña Jesúsu, aríñageina ligía joun.

—Nálügüdaadün gíñe ában cátei, ánjana jóúnaba, naríñagubei jun ca lan áu gumádi nadügei buri cátei le.

³⁰ ¿Ca oúnajabalin Juan abásteragüdaja? ¿Búngiu, ódi wügüriña?

³¹ Ába jagúmeserun adímureja jámagua, ába jaríñagun.

—Ánjawa aríñaga luágu Búngiu lan oúnajabalin, laríñaguba woun ca lan uágu mafíñerun wabei lun Juan.

³² ¿Ódi waríñaguba funági luágu jóúnajan lan wügüriña?

Lun jamúga jóunabun ítara, janúfudetiña jaweí gürígia, ladüga subúdi jamáni sun gürígia luágu proféta lán Juan.

³³ Ábati jaríñagun lun Jesúsu.

—Ibidiñeti woun.

Ábati gíñe laríñagun Jesúsu.

—Maríñagun nubeí gíñe jun ca lan áu gumádi nadügei cátei le.

12

*Jémpulu jawágu ti ñadágimeintiña wuríbatíña
(Mt 21.33-46; Lc 20.9-19)*

¹ Ábati lagúmeserun Jesúsu adímureja joun gürígia ja ñíbaña láu jémpulu, ába laríñagun joun.

—Ñíñein meja ában wügüri, ábunaguti tídibu beíbei lufúlasunrugu. Ába ladügün bariéru láu, adüga ligía ában ágei lun laríbichawagún tíra beíbei lídoun lúma ában wáyelesi lun gayára lan loúnigiruni sun cátei.

Ába lájayajani lichári joun ñadágimeintiña, ába lídin adüga weíyaasu.

² Dan le lachülürünbei dan lun alúbajani, ába loúnajan ában lumúsun amúriajei lufánran jámagiñe ñadágimeintiña.

³ Ábarüga járügdüni músu ligía, ába jabúleiseiruni, ába jóunajani lárigoún, míchutiña ni cáta lun.

⁴ Ábaya loúnajan labúreme ichári ábanya músu, ába jíchaagun dúbü luágu, bougua jameí lábulugu, anába.

⁵ Ábaya loúnajan labúreme ichári ábanya, ába jáfaruni jilágubei. Lárigiñe, ába loúnajan sarágu, ában lárigi ában, buleísei jamáña jíbiri, áfaragua jíbiri jilágubei.

⁶ Níjeinguati ában lun loúnajani, ában liraü jínsiñeti lun buídu, lagúmujoún óra ába loúnajani, ába laríttagun luágu inébebei lan joun ladüga liraü lan.

⁷ Ába jaríñagun ñadágimeintiña jámagua. “Niján le lúnbei libíjini alágan, wáfaraali jilágubei, wagía lámuga labúriña sun cátei.”

⁸ Ábati járügdüni, ába jáfaruni jilágubei, ába jaságaruni lúgubu lídaangiñe fulásu ligía.

⁹ Ábati lálügüdajan Jesúsu.

—¿Cábatí ladüga labúreme ichári? Liábinme, ábame láfaraguniña ñadágimeintiña jilágubei, ábame líchuguni ichári joun ámu.

¹⁰ ¿Malíjan jumágilisan le taríñagubei Lerérun Búngiu nuágu? Taríñajare.

Lé meja dúbü le mabúseerun jabeí ábunagutiña, ligíaali furúmiñeti.

¹¹ Wabúreme Búngiu adügübalin lun furúmiñetibeí lan, áni aríja wamúti quei ában cátei weíriguti.

¹² Ába jabúseerún yebe jadáürüni Jesúsu ladüga jasúbudiruni luágu jawágu lan layúsurei jémpulu le. Quei janúfudebei jaweí gürígia, ába jígiruni lúngua, ába jóúdin.

*Luágu ti lafáyeijoún seínsu lun gumádi
(Mt 22.15-22; Lc 20.20-26)*

¹³ Lárigiñe, ába jóunajoúniwa jádaangiñe fariséogu jáma jádaangiñe lánigu Heródes lúmoun Jesúsu lun jaríñagagüdüni som cátei le lúnti gayára lan jíchuguni lidúnrunme.

¹⁴ Ába jayábin, ába jaríñagun lun.

—Maésturu, subúditi woun luágu aríñaga báani inárüni, manúfudeiga lueí ni ában ladüga ni cáta lan luweírigun gürígia bun, áni barúfudajani lémeri Búngiu

láu inárüni. Árínagabá ában cátei woun. ¿Buítisan lun lafáyeijoun seínsu lun warúeite le Rómana ódi mabuídunti?

¹⁵ Subúdi lumúti Jesúsu luágu biánguañein lan jagíbu, ába larínagun joun.

—¿Cámesan jíchaajan sádara nubá? Barüjuma ában lídaangiñe seínsu ligía nun, aríja námugei.

¹⁶ Ába janügüni lun. Dan le laríjini, ába lálügüdüniña.

—¿Cági iyáwa lúma íri le luágubei?

Ába jarínagun lun.

—Láni urúei Rómana.

¹⁷ Ába larínagun joun.

—Rújumeiti láni urúei lun urúei, rújumeime láni Búngiu lun Búngiu.

Ába laweíridun janígi láu ligáburi loúnabuniña.

*Álügüdajani libügürü ásaaruni lídaangiñe ouweni
(Mt 22.23-33; Lc 20.27-40)*

¹⁸ Ába joudin fiú saduséogu aríjei Jesúsu. Afíñetiña saduséogu luágu úa lan ásaaruni lídaangiñe ouweni. Ába lubeíti jarínagun lun.

¹⁹ —Maésturu, arínagatí meja Moisés luágu ánjein lan ouwe ában wügüri le maríeiti masáaniguga táu lúmari, lúnti lan lamárieidun lamúlen túma würi to ueíboun louwe, lun gasáanigu lan táu lun líbugaña le ouwebei.

²⁰ Níñanu mejati sédü gamúlenuguátiña, le furúmiñeti, ába lamárieidun, ába loúnwen marájüñüga.

²¹ Le jabíaman, ába lamárieidun túma würi tó buga lúmari líbugaña, ába gíñe loúnwen marájüñütiña, ligía méme asúsereda lúma le jürüwan.

²² Maríeitiña sédügubei jagía túma, úati ni ában garaúti táu. Lagúmujoún óra, ába gíñe toúnwen würi tugúya.

²³ Niján le uágubei wálügüdaja. Dánme le jásaarun jiláaña lídaangiñe ouweni lúnya gabágari jamá, ¿cábago úmari würi tugúya jádaangiñe sédü gamúlenuguátiña ja, lárigiñe maríei jamá sun jagía túma?

²⁴ Ába larínagun Jesúsu joun.

—Bulíeiguatün ladüga libídiñe tuáguti Lerérun Búngiu jun, ni luáguti lubáfu Búngiu.

²⁵ Dánme le jásaarun jiláaña lúnya jabágaridun, ámujalime jabágari, magámaridun jába, míchugun jamáñame jasáanigu lun maríei, queísi magámaridun jamá ánjeligu siélu.

²⁶ Ánjeinti luágu sará jamá jiláaña lúnya jabágaridun, ¿malíjan jumágiru lilíburun Moisés luágu ladímurejan Búngiu lun lídaangiñe ában búbugati durúngu umúti? Larínajare lun. “Áu Lubúngiutebei Abrahám, Lubúngiute Isáac, Lubúngiute Jacób.”

²⁷ Ítara líña lubeíti, ánjein jamúgati jiláañu jáña wügüriña jagía lun sun dan, marínagunti jamúga Búngiu luágu Jabúngiute lan, ladüga máma Jabúngiute jiláguaaña Búngiu, Jabúngiute wínwangiña. Ítara líña lubeíti, jugúya weíríti jabúlieidágun.

*Gumádi le weírigutimaabei
(Mt 22.34-40)*

²⁸ Níñein ában jádaangiñe arúfudajatiña lilúrudun Moisés le agáambubalin jadímurejan, queíti subúdi láani luágu oúnaba lániña Jesúsu buídu, ába liábin lubároun, ába lálügüdüni.

—¿Cáteisan lídaangiñe lilúrudun Búngiu weírigutimaabei?

²⁹ Ába larínagun Jesúsu lun.

—Niján le weírigutimaabei. “Agáamba jumána, jugúya Israelítagu, Wabúreme Búngiu, ligía rügüñein Abúremein.

³⁰ Jínsiñelá lubeíti Babúreme Búngiu bun táu sun banígi, táu sun buwáni, láu sun bisáminan, láu sun bére.” Ligía gumádi le weírigutimaabei,

³¹ áni le libíaman lídan uweíriguni lenége le furúmiñeti. “Jínsiñe jamá bíbirigu bun quei bínsiñegua búngua.” Úati ámu gumádi weíriguti lueí biáma le.

³² Ába laríñagun arúfudajati ligía lun.

—Buíti baríñaguni, maésturu. Binárün luágu ában rügüñein lan Búngiu, luágu úa lan ámu,

³³ áni lúnti jínsiñe lan Búngiu woun táu sun wanígi, láu sun wasáminan, táu sun wawáni, láu sun wére, lun gíñe jínsiñe jamá wíbirigu woun queisi wínsiñegua woúngua. Gebégiti sun líra ligíbugiñe sügü láu sun wadágaragüdün lun lúma sun cátei le agudúbei luágu latárü.

³⁴ Dánti le lagáambun Jesúsu loúnabun láu lichú áu, ába laríñagun lun.

—Madíseedibu lueí lílana ban larúeijan Búngiu.

Manígijaña lun jálügüdajan.

¿Ca adügawagun Crístu?

(Mt 22.41-46; Lc 20.41-44)

³⁵ Larúfudajaña Jesúsu témpulurugu, laríñaga.

—¿Ída liñásan jaríñagunbei arúfudajatiña lilúrudun Moisés luágu ladügawagun lan Davíd Crístu?

³⁶ Davíd guánarügü láu lubáfu Sífiri Sándu aríñagati ítara.

Laríñajare Abúremein lun Nabúreme.

“Ñurúba núma lueígiñe noúnwenren daríme níchuguniña báganiñu bújaburugun.”

³⁷ ¿Ída lubáti ladügawagun lan Davíd Crístu ánjein wa lubálin Davíd guánarü Crístu, “Nabúreme”?

Ába jagáambuni bürübünu gürígia jagía láu ugúndani.

Ladárirun Jesúsu jadúnrun arúfudajatiña lilúrudun Moisés

(Mt 23.1-36; Lc 11.37-54, 20.45-47)

³⁸ Ábaja laríñagun Jesúsu joun lídan larúfudajan.

—Toúnigi jumátia jaweí arúfudajatiña lilúrudun Moisés, jínsiñeti joun lun jeíbugun táu anáanguni durúrutu lúma lun labúsurúniwa joun úmada láu sarágu inébesei.

³⁹ Áluaja jamúti jalaü le jála weírigutiña tídan jalígilisin juríu, lúma lubuídun-ágei ubáraü lídan eíginí.

⁴⁰ Gidá jamutu jában würíña ja jiláaña úmari jaweí, lúnti jadáuragun láu sun líra, ába jadügün afúrieiduni le migínaguti. Weíribei jasúfurirun luágu sun le jadügübei.

Tedéweejan fugiábu würi to jiláali túmari, lun Búngiu

(Lc 21.1-4)

⁴¹ Luágu ában wéyu, ñun líña Jesúsu témpulurugu tigíbugiñe gáfu to lágei seínsu, aríaguei jíchaajan gürígia seínsu tídoun. Gíbetiña rísitiña íchugutiña sarágu seínsu.

⁴² Ligía tiábin ában fugiábu würi to jiláali túmari, ába tíchugun bián gáwanün tídoun gáfu tugúya.

⁴³ Ába lagúarun Jesúsu joun láni disípulugu lubádun, ába laríñagun joun.

—Nínárün jáu luágu gíbetima lan tíchugun würi to sügü jáu sun ja íchugubaña seínsu tídoun gáfu to,

⁴⁴ ladüga sun jagía, lídaangiñe le ígiragubei jáma jíchiga, ánjoun tugúya, láu tugúdemegun rútumuti sun lé túmabei lun tawínwandun.

13

Laríñagun Jesúsu luágu tagünrinchawagúba lan témpulu
(Mt 24.1-2; Lc 21.5-6)

¹ Dan le láfuriduña lan Jesúsu témpulurugugiñe, ába laríñagun ában jádaangiñe láni disípulugu lun.

—¡Maésturu, aríjabá tun tubuídun watémpulun lúma buri dübü le áubei tadügüwa! ¡Máma tanárime buri!

² Ába loúnabuni Jesúsu.

—¿Aríagu jíña tun tanárime témpulu to? Merédebeítia ni ában dübü ligíbuagu ában, lagünrinchaguba sun le.

Seíni buri lubáragiñe lagúmuchun ubou
(Mt 24.3-28; Lc 21.7-24, 17.22-24)

³ Ábati jóudin luágu wübü le gírubei Olívos le tigíbugiñebei témpulu. Dánti le ñun líña lan Jesúsu ñi, ába jayábin Pédro, Jacóbo, Juan lúma Andrés, ába jaríñagun lun, jagíaguarügü.

⁴ —Buséntiwa lun baríñaguni woun ídame lan lasúsereda sun le tun témpulu to. ¿Cábasan seíni luágu chülüjali lan dan lun lagúnfulirun sún buri cátei le?

⁵ Ába laríñagun Jesúsu joun.

—Toúnigi jumá, mayéedagualaün ni ában,

⁶ ladüga sarágujaba ñübintiña, jaríñagame. “Áu Crístubei”, áni sarágujaba jayéedun.

⁷ Jugúya, dánme le jagáambuni lamúri wuríbu yaráfa jun lúma ugánu luágutí buri wuríbu díseti jueí, manúfudedagua jumá, ladüga ñíbei wuríbu súnwandan, mámagili lagúmuchun ubou líra.

⁸ Lageíndaguba ában fulásu lúma ában, awúribuja ligíame ában ageíraü lúma ámu. Ñíbei jarabaganáli lídan sarágu fulásu, ilámaü, chagáguau, áni súnme buri cátei le, lagúmesejarügügilime le lúnbei lasúfurirúniwa.

⁹ ‘Toúnigigua jumá júngua ladüga jedéregerúaba lun lúrudu, ábame jabúleiseirunün tídan buri jalígilisin juríu, janügüba lun jagúseragüdüniwa jagíbugiñe gumádimatiña lúma jagíbugiñe urúeigu, nueígiñe, itara lúba gayára lan jadímurejan nuágu, jagíbugiñe.

¹⁰ Lubáragiñe lagúmuchun ubou, lapúrichijoúba ugánu luáguti asálbaruni lídan sun fulásu.

¹¹ Dánmeti le janügüniwa lun jedéregerúniwa joun lúrudugu, magíbedalá jarítangun luágu cába lan jaríñaga, masáminaragubei jumeí. Aríñaga jumeí le laríñagun Búngiu jun lídan óra ligía, ladüga mámaba jugúya adímureja, Sífiri Sándu, ligíaba adímureja.

¹² Jedéregerubaña wügüriña jamúlenu jáma jábugaña lun jáfarúniwa jilágubei, deréga jamáñame agübürigu jasáanigu, jagáraabaguba isáanigu jawágun jagübürigu lun jedéregerúniwa lun jáfaruniwa jilágubei.

¹³ Jiyéereguduba lun sun ubou nueígiñe, le asígiruti úaragu darí lúmoun lagúmujouñ, lasálbaruba.

¹⁴ ‘Abürüjati proféta Daniél luágu cátei iyéereguti le gagünrinchaguagüdadabei, dánme le jaríjini cátei ligía le ñí lubei moun lan lun ñi lan—le alíjabei, gunfaráandalá—jámetia Judéabaña, lúntimétia janúrajan luágun wübü.

¹⁵ Le gürígia le bougudubei, mebélura látia múnadoun aságara ni cáta,

16 le áraabubei, magíribudalá águyu ni anügoun lanáangun.

17 Fugíábugume würiña ja dageínatiña lídoun wéyu ligía jáma ja garájüñütiña ja gurágiña.

18 Amúriaja jumá lúma Búngiu lun máma lan lídan lidáni lidíliga jeíbaagua,

19 ladüga lidáanibei asúfuriruni quei le masúseredungili lúmágiñe ladügüni Búngiu ubou, masúseredundügüyaalime giñe lárigiñe.

20 Ánjein jamúga madúraagun lánme Jabúreme Búngiu dan ligía, úabei jamúga ni ában eséfuruti, ladúraagubei luágu jínsiñe lánigu lun, ja anúadaja láañabaña.

21 ‘Ánjeinti aríñawagua jun. “Aríja jumá, niján Crístubei”, o “Nirán”, mafíñera jumá,

22 ladüga jayábiba eyéejatiña aríñaga jawougua luágu Crístu lan jagía, jíbiri, aríñaga jagíame luágu profétagu jamá, áni jayéeni. Jadügüba seíni lúma miláguru lun jayéedaguniña ásta ja anúadaja láañabaña Búngiu ánjein gayára.

23 Aráanseñu jumá, rúnaadün luágun jugúdi.

Ída lúba lan ligáburi lagíribudun Crístu ubouagun

(Mt 24.29-35, 42-44; Lc 21.25-36)

24 ‘Lídounme wéyu ligía, lárigiñeme dan ligía le lánina asúfuriruni, ábame labúrigadun wéyu, marúnidunjálime játi.

25 Jeíguaduba warúguma siélugiñe, ábame ladádagarun sun siélu.

26 Ábameti narijiniwa, áu le Wügüri Garaüwarügüti, niábin lídan juánriñu láu ouñwenbun ubáfu lúma uweíriguni,

27 ábame nouñajaniña ánjeligu ouñdaraña sun ja nanúadajabaña lídaangiñe gádürü larígei ubou, lúmágiñe lidíse-ágei ubou darí lúmoun lidíse-ágei siélu.

28 ‘Gunfaráanda jumei jémpulu le tuáguti tídibu ígo. Dan le ñúlúgili tilímun, ába labouchun tubána, subúdi jumúti luágu níteeli lan lidáni lubáchouga.

29 Ítara meme, dánme giñe jaríjini sún buri cátei le, subúdi jumei luágu yaráfaali lan niábin.

30 Ninárün jáu, luágu lagünrinchawagüba lan sun ubúrgu le Jerusalén lubáragiñe jóúwegun gürígia ja lánina dan le.

31 Lagúmuchaguba siélu lúma ubou, ánjein nerérun, merédebei magúnfulirunga.

32 ‘Ánjeinti wéyu lúma óra le lúnbei lasúseredun sun cátei le, ibídiñeti ni ca un, ni joun láni Búngiu ánjeligu ja siélubaña, ni lun Liraü, Búngiu rügüñein le Úguchili asúbudirei.

33 Lúnti lubeíti agágudúañu jumá, aríaaja, ayúmuragua lun Búngiu, ladüga ibídiñeti jun ídame lan lachülüra óra ligía.

34 Ítara lúba quei ában wügüri le ñüdünbei luágu ában weíyaasu díse, lubáragiñe láfuridun lúbiñegiñe, ába líchuguni sun cátei jájaburugun lumúsuniña áni ru ligía jawádigimari, aríñaga ligía lun le luágubei béna lun loúnigirun.

35 Áu queísi tabúreme múna tugúya, furésebei nagíribudun. Agágudúañu jumá lubeíti, ladüga ibídiñeti jun cába lan óra nachülüra, ánjein güñounba lubei lúmoun áriebuba lan, o lubá lan larúgan o bináafin lan,

36 ñübíndügü níñein sódini, ábame nadárirunün arúmuga.

37 Le naríñagubei jun aríñaga numúti joun súngubei. Agágudúañu jumá.

14

Lalédawagúniwa lubá Jesúsu

(Mt 26.1-5; Lc 22.1-2; Jn 11.45-53)

¹ Bián rügáali wéyu lubá fédu le arítaguagülei luágu meja dan le lásügürünbei láni Búngiu ánjeli áfaraguáña jarájüñü Ejípton, máfarawaguntiña jarájüñü Israelítagu, lidáani gíñe fédu le ñí lubei teigúa fein to magánatu ísi. Ábanti jáluajan jábutigu fádirigu jáma arúfudajatiña lilúrudun Moisés ída lúba lan járügüdüni Jesúsu láu eyéerawaguni lun jáfaruni jilágubei.

² Ába jaríñagun.

—Márügüda wameí fédurugu lueí jafúudun gürígia.

Tájurudaguni ában würi Jesúsu

(Mt 26.6-13; Jn 12.1-8)

³ Betániañein Jesúsu lúbiñe Simón lé meja gawágubei gumeín luágu lúra, dánti le ñun líña lan luágu dábulu, ába tiábin ában würi láu ában budeín buin láu ibíñei le jémeti, le séruti. Ába tájalachuni ligíina budeín, ába téseruni ibíñei lábulugun Jesúsu.

⁴ Ába jagáñidun jádaangiñe ja ñíbaña, ába jaríñagun jámagua.

—¿Cámesan leféridirúa ibíñei jémeti le?

⁵ Gayáraati jamúgagu lalúgurun luágu sügü láu lebégi ában irúmu wadágimanu, lun jíderawagún gudémetiña.

Ába jébechunun,

⁶ ába laríñagun Jesúsu.

—Ígira jumouñ. ¿Ca uágu jañáwurija tun? Ában cátei buíti le tadügübei nun.

⁷ Súnwandan ñíbaña lan gudémetiña júma lun jíderaguniña dan le jabúseerun, ánjein áu, mámaba súnwandan júma nan.

⁸ Adüga táali würi to le tíaraabei, jurúguaaru ibíñei luágu núgubu lubá nábunajoún,

⁹ áni ninárün jáu luágu lídan lan furúmieguaarügü fulásu lídan sun ubou le ñí lumuti lapúrichijoúa ugánu le lánina asálbaruni labájüdawagúba gíñe le tadügübei würi to lun jarítangun tuágu.

Lalúguruni Júdas Jesúsu

(Mt 26.14-16; Lc 22.3-6)

¹⁰ Ábati lídin Júdas Iscarióte, le ában jádaangiñe dúusu láni Jesúsu disípulugu, adímureja jáma jábutigu fádirigu lun ladügün darádu jáma lun ledéregeruni Jesúsu joun.

¹¹ Dan le jagáambubalin, ába jagúndaaragun, ába jaríñagun lun luágu jíchuguba lan seínsu lun. Ába lagúmeserun Júdas áluaja ída lúba lan ledéregeruni Jesúsu joun.

Lagúmujoún leígin Jesúsu jáma lánigu

(Mt 26.17-29; Lc 22.7-23; Jn 13.21-30, 1 Co 11.23-26)

¹² Le furúmiñeti wéyu lídan fédu le ñí lubei teigúa fein to magánatu ísi, luwéyuri lafarún mudún le lánina fédu le páscua, ába jálügüdüni disípulugu Jesúsu.

—¿Jalíagi babúseera lun wouñdin aráansera wabárua lun weígini eígini le lánina fédu?

¹³ Ába louñajan biáma jádaangiñe láni disípulugu, ába laríñagun joun lubáragiñe jóúdin.

—Jeíba ubúrugü, jadúnraguba lúma ában wügüri ñi táu ában dináa láu dúna,

¹⁴ jídinme lárigi le ñíjin lumúti lebélura, ábame jaríñagun lun tabúreme múna. “Ítara líña maésturu, ¿jagoún nege rúmu to lúnboun ñi lan leígei eígini le lánina fédu jáu láni disípulugu?”

15 Ábame larúfudun ában rúmu weírítu jun, tougiñegua múna, to aráanseñu tíña, ábameti jaráanseruni eígini woun ñi.

16 Ába jáfuridun disípulugu, ába jachülürün ubúrugun, ába jadáriruni súnigubei quei laríñaguni Jesúsu joun, ába jaráanseruni eígini lánina fédu ñi.

17 Dan le lagúñedunbei, ába lachülürün Jesúsu jáu dúusu disípulugu.

18 Dánti le luágu jamá dábula eíga, ába laríñagun joun.

—Nínárün jáu luágu lalúgurubadina lan ában jídaangiñe le eígibeí núma.

19 Ábati jajírudagun, ába jagúmeserun álügüdaguei ában ában.

—¿Áu funásan?

20 Ába laríñagun Jesúsu joun.

—Ában jídaangiñe jugúya dúusu le éderutu leígan fein lídan asíedu.

21 Anángüraadina lubeíti, áu le Wügüri Garaüwarügüti, luágu üma le uágubei tariñaga Lerérun Búngiu, áni jfugiábutia wügüri le alúgurutina! Buítimaati jamúga lun wügüri ligía lun magüriajóuniwa lan.

22 Dan le añája lubeí eíga, ába lanügünun Jesúsu jeígan fein lújaburugu, ába leteíngiruni Búngiu tuágu, lárigiñe lagúbachagunun ába líchugunun joun, ába laríñagun joun.

—Joujuma, núgubu le.

23 Lárigiñe, ába lanügün ában wéru táu diweín lújaburugu, lárigiñe leteíngiruni Búngiu tuágu, ába líchugunun joun, ába játun sun jagía tídaangiñe diweín tugúya.

24 Ába laríñagun joun.

—Níta le, le añúuragüdübalin iséri darádu, le gíñe áwiyurúabei joun sarágu gürígia lun ferúdunawa lan jafígoun.

25 Nínárün jáu luágu mátundügüyaadina lan diweín daríme wéyu le lúnbei nátunun iséri tuwúyeri diweín lídan larúeijan Búngiu siélu.

Laríñaguni Jesúsu luágu leyéedaguba lan Pedro láu

(Mt 26.30-35; Lc 22.31-34; Jn 13.36-38)

26 Lásun jerémujani urému luágu Búngiu, ába jóudin luágun wübü le gíríbeí Olívos.

27 Ábati laríñagun Jesúsu joun.

—Sun jugúya janúrajaba, ígira jumáname áriebe le, ladüga tariñajare Lerérun Búngiu. “Náfarubei jóuniri mudún jilágubei, ábame jeréderun mudún chagágu.”

28 Lárigiñeme násaarun lídaangiñe ouweni lúnya nabágaridun, nídiba Galiléa jubáragiñe.

29 Ábati laríñagun Pedro lun.

—Gayáraati jígirunibu sun ja, nugúya, mígirun nubádibu.

30 Ába laríñagun Jesúsu lun.

—Nínárün báu, áriebe meme le, lubáragiñe layúgurujan gáyu bián weíyaasu, ürüwaalime weíyaasu baríñagun luágu ibídiñe nan bun.

31 Ába laríñagun.

—Ni ánjein lun lubeí noúnwen búma, maríñagubadina luágu ibídiñe ban nun. Ligía méme gíñe jaríñaga súnigubei.

Layúmuragun Jesúsu lun Búngiu, Getsemaní

(Mt 26.36-46; Lc 22.39-46)

32 Ábati jachülürün lídoun ában fulásu gírítu Getsemaní, ába laríñagun Jesúsu joun lání disípulugu,

—Ñurújuma ya, neíbuga ayúmuragua lun Búngiu.

33 Ába lanügüniña Pedro, Jacóbo, lúma Juan lúmagua. Ába ladíjeridun larítangun buídu, sandí ligía ában igárigu weírítu tídan lanígi.

34 Ába laríñagun.

—Sandítina ában íruni weíruti le lánina ouweni tídan nuwáni. Reídei jumá ya, áni agágudúañu jumá.

35 Ábati lídin Jesúsu lubáruaguoun mémeraü, ába labúluchagun múarugun, ába lamúriajan lúma Búngiu ánjein gayára lubei masúfurirun láani le lúnbei lasúseredun lun lídan óra ligía.

36 Ába laríñagun lídan layúmragun.

—Núguchi, gayára bumúti sun cátei, séfu bána luei nasúfuriruni cátei le, máma quei nabúseerun, quei babúseerun.

37 Ába lídin, ába ladáriruniña disípulugu arúmuga, ába laríñagun lun Pédro.

—Simón, ¿barúmuguñasan? ¿Siñátisan buga beréderun ni ában óra agágudúañu?

38 Agágudúañu jumá, ayúmragua jugúyame luei jeíguadun lídoun íchajoúni lun jeféridiruni jafíñen nuágu. Inárüni luágu benéfa lan jáni espíritu lun le buídubei, ánjein júgubu, débiliti.

39 Ábaya lídin ayúmragua lun Búngiu, aríñageinalei méme dimúrei le laríñagubei furúmiñe.

40 Danya lagíribudun, ábaya ladáriruniña arúmuga ladüga luweírin lidábu jágu. Ibídiñetiti joun cába lan jounabagüle lun.

41 Ábaya lídin lürüwan weíyaasu, ába laríñagun joun.

—¿Jarúmuguña mémesan, eméraagua jugúya? Buídürügaali, chülüja óra lun nederegerúniwa, áu le Wügüri Garaúwarügüti, jájaburugun gafígountiña.

42 Sarájuma, queímoun, níteeli le lúnbei lederegerunina.

Janügüni Jesúsu adáüra

(Mt 26.47-56; Lc 22.47-53; Jn 18.2-11)

43 Nígili Jesúsu adímureja, ligía lachülürün Júdas, le ában jádaangiñe dúusu disípulugu, liábin jáu sarágu mútu táu efeín lúma wéwe. Jounajan jábutigu fádirigu, arúfudajatiña lilúrudun Moisés, jáma ámu wügüriña weírigutiña lídan jafíñen juríu.

44 Aríñagalíti buga Júdas joun ítara.

—Le wügüri le nachúurun, ligía, ábame járügüdüni, ábame janügüni, jounigireime buídu.

45 Ítara líña lubeíti, dan le lachülürünbei, ába layárafadun Júdas lun Jesúsu, ába laríñagun lun.

—Maésturu.

Ába lachúuruni.

46 Ábati járügüdüni Jesúsu, ába janügüni adaürüwa.

47 Níñein ában jádaangiñe ja níbaña, ába láluguchunun lefeínte, ába líbuguni ában larígei lumúsun fádiri le íñutimaabei.

48 Ábati laríñagun Jesúsu joun mútu jagía.

—¿Jiábin táu efeín lúma wéwe lun janügünina adáüra, camá jamuga jíwerutina?

49 Ságüñaja wéyu júma nan témpulurugu arúfudaja jun, madaü jumútina. Wel, lasúseredunbei le lun lagúnfulirun Lerérun Búngiu.

50 Ábati jígiruni sun disípulugu Jesúsu lábugua, ába janúrajan.

Wügüri ñüraügili le anúrajabei

51 Níñein ában wügüri ñüraügili afálaruti Jesúsu, darúgu loúgua táurügü ában sídi, ában járügüdüni.

52 Ába lasáfarun jaweí, ába leíbaágun surúsu, ígira sídi.

Jesúsu ligíbugiñe líñun-ágei lúrodu
(Mt 26.57-68; Lc 22.54-55, 63-71; Jn 18.12-14, 19-24)

⁵³ Ábati janügüni Jesúsu ligíbugiñoun fádiri le íñutimaabei, ába joúndaragun sun jábutigu fádirigu jáma arúfudajatiña lilúrudun Moisés, jáma ámu wügüríña ja weírigutiña lídan jafíñen juríu.

⁵⁴ Ábati lafálaruni Pédro Jesúsu dísegiñe chülú tübürürürugun lúban fádiri le íñutimaabei, ába leréderun ñun jáma oúnigirutiña témpulu abácharagua larügürügü wátu.

⁵⁵ Jáluajati jábutigu fádirigu lúma sun líñun-ágei lúrodu lidúnrun Jesúsu lun gayáraabei lan jasiádiruni lun láfarúniwa jilágubei, madáritiña lidúnrun.

⁵⁶ Sarágu jáña yebe adímurejatiña iyéeni luágu, múaradúntiña láu le jaríñagubei.

⁵⁷ Ñíñanu yéetiña ásaarutiña aríñaga.

⁵⁸ —Agáambatiwa laríñagun. “Nagünrinchaguboun témpulu to, to jadügüboun wügüríña, ábame naráramagüdün ában témpulu lídan úrúwa wéyu to máma jadúga wügüríña.”

⁵⁹ Ni ítara, múaradúntiña láu le jaríñagubei.

⁶⁰ Ábati lásaarun fádiri le íñutimaabei jádaangiñe sun jagía, ába laríñagun lun Jesúsu.

—¿Moúnabuntibusan ni cáta? ¿Cáteisán le, le jaríñagubei buágu?

⁶¹ Ába leréderun Jesúsu maníñu, moúnabunga ni cáta. Ábaya lálügüdüni fádiri íñutimaati.

—¿Amürüsan Crístubei le Liraü Búngiu, le lúnbei lasálbaruniña gürígia lídaangiñe jafígoun?

⁶² Ába laríñagun Jesúsu lun.

—Ánja, áu. Áni jugúya, jaríjubadina, áu le Wügüri Garaüwarügüti, ñun lueígiñe loúnwenren Súnti Gabáfu, aríja jumeíme niábin lídan juánriñu siélugiñe.

⁶³ Ábati lajeíridagunun fádiri íñutimaati lanáangun, le ligáñi, ába laríñagun.

—¿Ca ámu wabúseerubei lun líchugun fe luágu guetó?

⁶⁴ Agáamba jumúti lanábaguni Búngiu láu lerérun. ¿Ída líña jaríjin lun líra?

Ába jabúdujan súngubei lun láfarúniwa jilágubei.

⁶⁵ Ábati buri jagúmeserun jíbiri ásueraguei, adáuragua láu ligíbu, abúleiseirei, jaríñagati.

—¡Aríñaga beígia cátei lan áfarubalibu!

Ába buri jagáyuañan súdeara luágu.

Laríñagun Pédro luágu ibídiñe lan Jesúsu lun
(Mt 26.69-75; Lc 22.56-62; Jn 18.15-18, 25-27)

⁶⁶ Ñíñein Pédro бүрүрүругу, ligía tiábin ában lumúsun fádiri le íñutimaabei.

⁶⁷ Dan le taríjini abácharagua larügürügü wátu, ába taríaguni, ába taríñagun lun.

—¿Ma giñe buga lúmañadibu Jesúsu le Nazarétna?

⁶⁸ Ába leyéedagun Pédro, laríñaga.

—Ibídiñeti gürígia ligía nun, ibídiñegubeíti nun ca lan uágu badímureja.

Ába lígiruni fulásu le ñí lubei labácharagua lun yaráfa lan lun lebéneri baríeru, ábati layúgurujan ában gáyu.

⁶⁹ Ábaya taríjini músu tugúya, ába taríñagun joun ja ñíbaña.

—Ába giñétia jádaangiñe lánigu Jesúsu le.

⁷⁰ Ábaya leyéedagun. Murúsun óra lueígiñe, ábaya jariñagun ja ñíbaña lun Pédro.

—Inárüni, amürü ában jádaangiñe, ladüga Galiléana amürü, ítara líña badímurejan quei jagía.

⁷¹ Ába líñaragun Pédro lúngua ánjein máma lubei inárüni le laríñagubei. Ábaya laríñagun.

—Ibídiñeti gürígia le uágubei jadímureja nun.

⁷² Lídan óra ligía, ába layúgurujan gáyu libíaman weíyaasu. Ábati larítangun Pédro luágu le laríñagubei buga Jesúsu lun. “Lubáragiñe layúgurujan gáyu bián weíyaasu, beyéedaguba náu ürüwa weíyaasu.” Dánti le larítangun luágu, ába layájun.

15

Jesúsu ligíbugiñe Piláto

(Mt 27.1-2, 11-14; Lc 23.1-5; Jn 18.28-38)

¹ Larúgan bináafin, ába jóundaragun jábutigu fádirigu jáma arúfudajatiña lilúrudun Moisés, jáma ámu wügüríña ja weírígutiña lídan jaffínen juríu lúma sun líbiri líñun-ágei lúrudu, aríja cába lan jadüga lun lasíadirúniwa Jesúsu. Ába janügüni gürágu, ába jedégeruni lun Piláto.

² Ába lálügüdüni Piláto Jesúsu.

—¿Amürü Jarúeitebei Juríu?

Ába loúnabun Jesúsu.

—Ánja, ítara líña quei baríñaguni.

³ Ába buríti jíchugun jábutigu fádirigu sarágu lidúnrun.

⁴ Ábayati lálügüdüni Piláto, ába laríñagun lun.

—¿Moúnabuntíbusan ni cáta? ¿Aríjabá átiriñein lan bidúnrun íchuguti?

⁵ Moúnabun mémeti Jesúsu ni cáta, ába laweíridun lanígi Piláto láu líra.

Lasíadirúniwa Jesúsu lun óuweni

(Mt 27.15-31; Lc 23.13-25; Jn 18.38-19.16)

⁶ Jéchutiti Piláto ígiragüda ában adaürüti ságü fédu le lánina páscua, le jamúriajan gürígia jádaangiñe adaürütiña.

⁷ Ñíñeinti ában adaürüti gíríti Barabási úara jáma ámu ja áfarajabaña gürígia jilágubei lídan iñúraguni luágu gumádi.

⁸ Ábati jayábin gürígia, ába jariñagun lun Piláto lun ladügüni queíñaja ladüga.

⁹ Ába lálügüdüniña.

—¿Buséntün lun nígiragüdüni Jarúeite Juríu?

¹⁰ Laríñagubaa lin Piláto líra ladüga busén lán yebe lígiragüdüni Jesúsu, subúdi lumúti luágu ladüga lan gimúgaü jedégererei jábutigu fádirigu.

¹¹ Fügüda jamáña jábutigu fádirigu gürígia, jariñaga joun lun jamúriajan lun lígiragüdüni Barabási, máma Jesúsu.

¹² Ábati laríñagun Piláto.

—¿Cáti jabúseerubei nadügün láu le uágubei jariñaga Jarúeite Juríu?

¹³ Ába jagúaragun.

—¡Dáguabeí luágu gurúwa!

¹⁴ Ába laríñagun Piláto joun.

—¿Cáti wuríbati ladügübei?

Ábaya jagúaragun.

—¡Dáguabeí luágu gurúwa!

15 Queíti busúen lan Piláto leréderun buídu jáma gürígia, ába lígiragüdüni Barabási, lárigiñeti loúnajan abeíchei Jesúsu, ába ledéregeruni lun ládarawagún luágu gurúwa.

16 Ábati janüğüni súdeara lídoun tübüürü lúban urúei, ába jóúndarúniwa sun súdeara.

17 Ába jadáüraguagüdüni táu ában anáanguni funátu, ába jadügün ában rídi láuti jíyu, ába jíchuguni leréberugu.

18 Ába jagúmeserun agúaraja lun.

—¡Gabágarilá Jarúeite Jurú!

19 Ába jagáyuajan lábulugun láu ában wéwe, ába jásuereguni, ába jájuduragun abúsura lun.

20 Lárigiñe jéjerajan láu ítara, ába jarágachunun anáanguni to jadáürüboun luágu lueí, ába jadáürünun lanáangun luágu. Ába jaságaruni lun jádaraguni luágu gurúwa.

Ládarawagún Jesúsu luágu gurúwa

(Mt 27.32-44; Lc 23.26-43; Jn 19.17-27)

21 Níñein ában wügüri Ciréna, gírity Simón, lúguchi Alejandro lúma Rúfo, liábiña áraabugiñe, dan le lásügürün ñigiñe, ába jafósuruni lun lanüğüni lugúruwan Jesúsu.

22 Ába janüğüni Jesúsu lídoun ában fulásu gírity Gólgota, míni lan líra, Lufúlasun Lábu Ichüğü.

23 Ába jíchugun diweín láu ában luwúyeri árani gírity mírra tídoun lun, mátun lumútu.

24 Ábati jádaraguni luágu gurúwa, ába jájurerun súdeara ubúnuruni lun jaríjin cába lan jádaangiñe erédera táu lanáangun.

25 Ladaünrün néfu bináafin, ligía jádaraguni luágu gurúwa.

26 Ába labürüdüniwa lidúnrun ñi. “Jarúeite Jurú.”

27 Dáguatiña giñe bián jíwerutiña luágu gurúwa úara lúma, ában lueígiñe loúnwenren, ában lueígiñe lubaüna.

28 Láu líra lagúnfulira le tariñagubei Lerérun Búngiu. “Abájüdüwati jáma wuríbatíña.”

29 Dan le buríti jásügürün gürígia, ába jájinjani jachüğü láu, ába janábuni, jaríñaga.

—¡Bugúya le aríñagubei luágu fíbounme lan témpulu, ábaya lánme baráramagüdünnun lídan ürüwa wéyu,

30 séfuguabá búngua, raríba lueígiñe gurúwa!

31 Ába giñe jéjerajan jábutigu fádirigu jáma arúfudajatiña lilúrudun Moisés láu, ába jaríñagun jámagua.

—¡Séfuti ámu, ánjein ligía, siñáti leséfuragun lúngua!

32 ¡Raríla Crístu, Jarúeite Israelítagu, lueígiñe gurúwa guetó wagíbugiñe, afíñe wamámuga luágu!

Ja dáwaguñubaña luágu gurúwa úara lúma, anába jamúti giñe.

Loúnwen Jesúsu

(Mt 27.45-56; Lc 23.44-49; Jn 19.28-30)

33 Amídirugu, ába labúrigadun sun ubou darí ladaünrün ürüwa rábounwéyu.

34 Ligía lagúaragun Jesúsu.

—Eloí, Eloí, ¿láma sabáctani? —míni lan líra. Nubúngiute, Nubúngiute, ¿cásan uágu bígirana?

35 Níñanu jádaangiñe ja ñíbaña agáambuti, ába jaríñagun.

—Agáamba jumá, lagúajaña lun proféta Elías.

³⁶ Ába leíbaagun ában jádaangiñe, ába ladüdüragüdün ában mudúsi táu diweín garüjütu, ába líchuguni luágu ában wéwe, ába línchuni lun Jesúsu lun lachúurunun, ába laríñagun.

—Ígira wameí guetó, waríja ánjein ñübin Elías aráriragüdei.

³⁷ Ábati ladügün Jesúsu ában agúaraguni jéreti, ába loúnwen.

³⁸ Ába tajeíridagun tubélun témpulu lídan bián murúsun íñugiñe lun ünabun.

³⁹ Dan lagáambuni jábuti súaara Rómana le rárabei ligíbugiñe Jesúsu lagúaragun, aríjaleí ída líña lan loúnwen, ába laríñagun.

—Inárüni luágu Liraü lan Búngiu wügüri le.

⁴⁰ Ñíñanu gíñe würiña, aríagutiña dísegiñe, ñíñoun María Magdaléna, María to lúguchu Jacóbo le ñúraütimagilíbei, lúguchu gíñe José, ñíñoun gíñe Salomé.

⁴¹ Würiña ja, falá jamuti Jesúsu áni íderagua jamúti dán meja le Galiléañein lan. Ñíñanu gíñe sarágu ámu würiña ja ñübinbaña Jerusaléoun úara lúma Jesúsu.

Lábunajoún Jesúsu

(Mt 27.57-61; Lc 23.50-56; Jn 19.38-42)

⁴²⁻⁴³ Lubáragiñe lálüdün wéyu, ába liábin José, ában wügüri inébewati jádaangiñe líñun-ágei lúrudu, le agúrabajabaalin lagúmeserun larúeijan Búngiu táu sun lanígi, lílana fulásu le gíríbei Arimatéa. Queíti luwéyuri lubeí lan aráansejani, le ában wéyu lubá wéyu le eméraaguagülei, ába lebélorun le ñíjin lubeí Piláto amúriajei lúgubu Jesúsu, úouga ni murúsun anúfudei lídan.

⁴⁴ Ába laweíridun lanígi Piláto dan le lagáambun luágu jilá lan Jesúsu, ába loúnajan luágu ában jábuti súaara lun lálügüdüni ánjein inárüni lubeí luágu jilá lan.

⁴⁵ Dan le laríñagunbei lun luágu inárüni lan, ába líchuguni Piláto lúgubu Jesúsu lun José.

⁴⁶ Ábati lagáñijan José ában gamísa fínutu, ába larárigüdüni lúgubu Jesúsu lueígiñe gurúwa, ába loúburaguni táu. Ába líchuguni lídoun ában umúajaü achigíti luágu dübü, ába ladáuruni láu ában dübü.

⁴⁷ Ába tídin María Magdaléna túma María to lúguchu José aríjei fulásu le ñí lubei labunúa Jesúsu.

16

Lásaarun Jesúsu lídaangiñe ouweni

(Mt 28.1-10; Lc 24.1-12; Jn 20.1-10)

¹ Dan le lásügürünbei wéyu le eméraaguagülei, ába jagáñijan María Magdaléna, María to lúguchu Jacóbo, túma Salomé ibíñei lun jóúdin ájurudei luágu lúgubu Jesúsu.

² Dimáasu, láfunaduña larúgan, ába jóúdin luágu lumúaja,

³ ábati jaríñagun jámagua.

—¿Cábasan agídarei dübü lueígiñe lubéneri umúajaü?

⁴ Dan le jaríjinbei, úaali oúnwenbun dübü ligía lídan lilúgaarun.

⁵ Ába jebélorun lídoun umúajaü, ába jaríjin ában wügüri ñúraügili ñun ñi lueígiñe loúnwenren táu ában goúnu jarútu. Ába janúfudedagun,

⁶ ába laríñagun joun.

—Manúfudedagua jumá, jáluajañein Jesúsu le Nazarétna le ádarawagübei luágu gurúwa, úati ya, sará lídaangiñe ouweni. Aríja jumeísan fulásu le ñí lubei líchugúa.

⁷ Jeíba, jaríñagame joun láni disípulugu, lúntima Pédro, luágu níngiran lan luágu ũma lun Galiléoun jubáragiñe. Jaríjibei ñi quei laríñaguni jun.

⁸ Ába jóudin wūríña jagía anúrajeina ñígiñe ladüga lebélorun ában luweírín anúfudei joun. Maríñaguntiñati ni cáta ni ca un ladüga janúfude.

Larúfudagun Jesúsu lúngua tun María Magdaléna
(Jn 20.11-18)

⁹ Lárígiñe lásaarun Jesúsu lídaangiñe oúweni, dimáasu bináafin, ába larúfudagun lúngua furúmiñe tun María Magdaléna, to méja ueíboun laságara sédü espíritugu wuríbatíña.

¹⁰ Ába tídin, ába tawísaruniña ja eíbugubaña meja lúma. Dan le tadárirunbáliña, jayájuaña ladüga lanárime írúni jádan luágu loúnwen.

¹¹ Dan le jagáambun luágu wínwanya lan, luágu aríja táani, mafíñetiña.

Larúfudagun Jesúsu lúngua joun biáma jádaangiñe disípulugu
(Lc 24.13-35)

¹² Lárígiñe, ába larúfudagun Jesúsu lúngua joun biáma jádaangiñe já meja eíbugubaña lúma, jóúdiña áraabun. Ibídiñeti yebe joun luágu Jesúsu lan.

¹³ Ába jóudin, ába jawísaruniña ja jíbiri, ni jagía, mafíñetiña.

Líchugun Jesúsu jadásin disípulugu
(Mt 28.16-20; Lc 24.36-49; Jn 20.19-23)

¹⁴ Lárígiñe, ligía larúfudagun Jesúsu lúngua joun únsu disípulugu jagía dan le ñun jamá luágu dábula, ába celadeínjan joun luágu liloúguan jafíñen lúma lidére jachügü, ladüga mafíñen jamá joun ja aríjubalin lárígiñe lásaarun.

¹⁵ Ába laríñagun joun.

—Jeíba lídan sun fulásu apúrichija jumeí ugánu le luáguti asálbaruni joun sun gürígia.

¹⁶ Ja afíñerutiña luágu, badísei jagíame, jasálbaruba, ja mafíñetiña, jeféridiruba lídaanme luwéyuri agúseragüdüni.

¹⁷ Niján cátei le lúnbei jarúfuduni ja afíñebaña nuágu, lun lasúbudirúniwa luágu Búngiu lan oúnajabaliña. Jaságaruba espíritugu wuríbatíña jaweí gürígia lídan níri, jadímurejaba ámu dimúrei lueí jerérun,

¹⁸ ánjaña árügüda jéwe jájaburugu o ánjaña lan áta cátei le gáfarajati, madügünbei wuríbani joun, lánwoun sun líra, jíchugubei jájabu jawágu sánditiña, ábame jareídagun.

Lamúdeirun Jesúsu siélun
(Lc 24.50-53)

¹⁹ Lárígiñe ladímurejan joun, ába líñurúniwa Jesúsu siélun, ába lañúurun lueígiñe loúnwenren Búngiu.

²⁰ Ába jáfuridun disípulugu, ába japúrichijani ugánu le lánina asálbaruni lídan sun fulásu. Jesúsu méme íderagua lumútiña, áni chourugüdaleí ugánu le japúrichijabei láu miláguru lé buri jadügübei.

UGÁNU BUÍTI LE LABÜRÜJABEI LÚCAS LUÁGU JESÚSU

Labürüjani Lúcas lé meja asúseredubei

¹ Lun Teófilo le weírigubei. Gíbeeña gürígia ouchutiña jabürüjani cátei lé buri luáguti wasálbarun lé meja asúseredubei wagánagua lídan lúaragun,

² áfaaguatiña jabürüjani ítara quei jarúfudajani ja aríjubalin buri cátei ligía lúmagiñe lagúmeserun, apúrichija jagía luágu, woun.

³ Áu giñe, álügüdaadina giñe buídu buídu libügürü sun cátei le asúseredubei lúmagiñe lagúmeserun, áni afiñetina luágu maríban lan lun nabürüjanun gárada to bun quei lubúdubu,

⁴ subúdi bámugei linárün cátei le arúfudúalibe bun buídu buídu. Niján le asúseredubei.

Lasúbudiragüdüni ában ánjeli luáguti lagüriajóun Juan le abásteragüdjabe

⁵ Dán meja le Heródes lan urúeibe Judéa, ñiñein meja ában fádiri lánina jafiñen juríu, gíruti Zacarías, jádaangiñeti fádirigu ja lánigu Abías. Elisabét tíribe lúmari, jádaangiñetu giñe ladügawagun Aarón.

⁶ Biángubei jagía, richáguatiña ligíbugiñe Búngiu, gúnfulitiña lúma, adüga jamei sun le lubeibe darí lun siñá lan laríñawagún ni cáta wuríbati jawágu.

⁷ Masánigutiña ladüga siñá lan tagáragüdün Elisabét, áni derébugaaña giñe jagía biángubei.

⁸ Luágu ában wéyu, lídan lidáani jesériwidun lánigu Zacarías quei fádirigu ligíbugiñe Búngiu,

⁹ ába jabúdujan según jagáburi fádirigu juríu, lun jasúbudiruni cába lan ebélura lídoun fulásu le sándutimaabei témpulurugu águdaja cupáli ligíbugiñe Búngiu, ába láburujan luágun Zacarías.

¹⁰ Sun niján lan cupáli águdajoúa, añája gürígia bougudi ayúmuragua lun Búngiu.

¹¹ Ábati lasáliragun ában láni Wabúreme ánjeli lun Zacarías, rára lueígiñe loúnwenren latárü le ñi lubei cupáli.

¹² Dan le laríjini Zacarías ánjeli ligía, ába laweíridun lanígi, ába lebéllurun anúfudei lídoun.

¹³ Ába laríñagun ánjeli ligía lun.

—Manúfudebá, Zacarías, ladüga agáamba láali Búngiu bayúmuragun, tagáraüduba búmari ában irájü, ábame bíchuguni líri Juan.

¹⁴ Tabuínchuba banígi láu ugúndani luágu, áni sarágujaba giñe agúndaarutiña láu lagüriajóun,

¹⁵ ladüga weírigubei biraü ligíbugiñe Búngiu. Mátunbei diweín ni bínu, áni ñibe Sífiri Sándu lúma lúmagiñe lubáragiñe lagüriajóun lun ladúndejani lídan sun cátei.

¹⁶ Ladügüba lun jagíribudun sarágu jádaangiñe Israelítagu lun jagáambuni Jabúngiute,

¹⁷ lesériwiduba lun Búngiu láu sarágu ubáfu quei meja ladügüni Elías. Laráansejaba lubá Jesúsu láu laráandaragüdüniña agübürigu jáma isánigu, láu giñe larúfudajan joun ja magáambadibaña lun Búngiu lun júaradun lúma queisi gürígia richáguatiña. Ítara lúba laráanseruniña lubá jerésibiruni Jabúreme Jesúsu.

¹⁸ Ába laríñagun Zacarías lun ánjeli ligía.

—¿Ída lubági nachoúruni cátei le? Áu táu sun númeri, derébugugaadiwa.

¹⁹ Ába laríñagun ánjeli ligía lun.

—Gabriél áu, áni nesériwiduña lun Búngiu, ligía oúnajabalina adímureja bun lun níchuguni ugánu buíti le bun.

²⁰ Guetó, quei mafíñerun bubeí luágu le naríñagubei bun, berédera merérunga, siñábei badímurejan daríme lagüriajoun biraũ. Lagúnfuliruba cátei le lídan lídáani.

²¹ Sun dan le, añájati buga gürígia boúgudi agúrabajei Zacarías, weirititi janígi luágu lílü témpulurugu.

²² Dan le láfuridunbei, siñá ladímurejan joun, ábati jasúbudiruni luágu salígua lan som cátei lun, témpulurugu. Ladímurejati joun láu seíni, meréngadijaali.

²³ Dan le lagúmuchun dan le lúnbei lesériwidun Zacarías témpulurugu, ába lídin líbiñoun.

²⁴ Lárigiñe cátei le, ába tadágeinadun Elisabét, to lúmari, ába máfuridun tan jábiñegiñe luágu seíngü játi, teréngati túnguarügü.

²⁵ “Ladügüñein Búngiu lubuídun cátei le nun guelé lun lagídaruni nibúsigari jagíbugiñe gürígia.”

Lasúbudiragüdüni ában ánjeli luáguti lagüriajoun Jesúsu

²⁶ Sísi játi lárigiñe, ába loúnajani Búngiu ánjeli Gabriél lídoun ában ubúrugú lání Galiléa, gíriti Nazarét,

²⁷ lun lídin bisídoun ában würi irájügiru, gíritu María. Würi tugúya, gadáraduñoun lúma ában wügüri gíriti José lun tamárieidun lúma, wügüri ligía, linébaanfan urúei Davíd.

²⁸ Ába lebélorun ánjeli ligía le ñíjin tubeí, ába laríñagun tun.

—¡Báfaguagüle, María! Níjein Búngiu búma, binílaadibu sügü jáu sun würíña.

²⁹ Dan le tagáambuni ánjeli ligía, ába tájüchürün láu le laríñagubei, ába tálügüdagun túngua ca lan uágu labúsura tun ítara.

³⁰ Ábati laríñagun ánjeli ligía tun.

—Manúfudebá María, fuleísei láadibu Búngiu,

³¹ badágeinada, ábame bagüriajan ában irájü, ábame bíchuguni líri Jesúsu.

³² Weirigubei, Liraũ Búngiu le íñubei lúba lagúarúniwa, áni larúeigüdübei Wabúreme Búngiu quei larúeigüdüni Davíd, le binádu lidúje.

³³ Lagúmadirubei linásiñun Israel lun sun dan, áni magúmuchadibei lagúmadijan.

³⁴ Ábati taríñagun María lun ánjeli ligía.

—¿Ída lubági lasúseredun cátei le, mámarigidinagu?

³⁵ Ába laríñagun ánjeli tun.

—Liábinba Sífiri Sándu buágun, ábame loúburagunibu lubáfu Búngiu. Ligía sándubei lubeí irájü le lúnbei bagüriajani, Liraũ Búngiu lúba lagúarún.

³⁶ Tiábin bidúje to Elisabét, dageínaaru giñe lau sun weíyaaru lan, tagáraüdüba ában wügüri irájü, ítara líña lubeíti, tó meja uáguboun jaríñaga luágu siñá lan tagáraüdü, níjein sísi játi dageínaü tuágu.

³⁷ Úati ni cáta siñáti lun Búngiu.

³⁸ Ábati taríñagun María.

—Lidámun Nabúreme Búngiu nugúya, adügaleí le baríñagubei náu.

Lárigiñe, ába lídin ánjeli.

Tídin María bisídoun Elisabét

³⁹ Lídoun dan ligía, ába tídin María furése lídoun ában ubúrugú le labádinaguabei buri wübü Judéa,

⁴⁰ ába tebélorun líbiñoun Zacarías, ába tabúsurun tun Elisabét.

⁴¹ Dan le tagáambuni Elisabét tabúsurun, ába lánjingichagun tiraü turágeirugu, ába liábin Sífiri Sándu tuágun.

⁴² Ábati taríñagun láu umálali le jéreti.

—Binílaadibu Búngiu sügü jáu sun jiñáriñu, binílaali gíñe biraü.

⁴³ ¿Cátanañadina lun tiábin lúguchu Nabúreme bisídana?

⁴⁴ Láu nagáambuni babúsurun, ába lánjingichagun niraü nurágeirugu láu ugúndani.

⁴⁵ Gúndaatibu bugúya le afíñerubei, luágu lagúnfuliruba lan cátei le laríñagubei Wabúreme bun.

⁴⁶ Ábati taríñagun María.

Rútu nuwáni uweíriguni lun Nabúreme,

⁴⁷ gúndaagua tugúya nanígi luágu Búngiu le Nasálbaragüle,

⁴⁸ lugúndun gudémejabujaali nun, nugúya le lidámun.

Lúmagiñe guelé, jariñaguba sun gürígia luágu fuleíseiwaadina lan,

⁴⁹ ladüga adügaali Búngiu, le Súnti Gabáfu, cátei weínamuti nun, sánduti líri.

⁵⁰ Súnwandan gudémebaña lan ja inébejabúbaña lun, lun.

⁵¹ Adügaali oúnwenbun buri cátei,

adügaali lun ni cáta jamá ja barüguabaña jóungua.

⁵² Gidálaaña ja gabáfubaña lídaangiñe jaweírigun,

ja ünabubaña, ába ladügüniña lun weírigu jamá.

⁵³ Já buga lamábaña, quimúlegüda lumútiña,

ánjeinti ja rísibaña, míchugunti ni cáta joun.

⁵⁴ Íderagua lumútiña linásiñun Israél, ja esériwidubaña lun,

mabúlieidun lumúti lun gudémejabu lan,

⁵⁵ queí meja lidáradun jáma binádu wagübürigu—

Abrahám jáma ladügawagun—lun gudémejabu lan joun lun sun dan.

⁵⁶ Ába teréderun María ürüwa játi ñi, lárigiñe, ába tagíribudun jábiñoun.

Lagüriajóun Juan le abásteragüdjabei

⁵⁷ Ába lagúnfulirun dan lun tagüriañan Elisabét, ába tagüriañan ában wügüri irájü.

⁵⁸ Dan le jagáambun tubésinanigu jáma tidújeñu luágu lubuídun cátei le ladügübei Búngiu tun, ába jagúndaarun úara túma.

⁵⁹ Luágu liwídun wéyu, ába lerésibiruni circuncisión, le liseíni luágu láni lan Búngiu irájü ligía. Buséñtiña yebéti jíchuguni líri lúguchi luágu, le Zacarías,

⁶⁰ ába taríñagun lúguchu.

—Uá, Juánba líri.

⁶¹ Ába jaríñagun tun.

—¿Cági uágu? Úati ni ában jádaangiñe binébaanfaangu gíriti Juan.

⁶² Ába jálügüdüni lúguchi irájü láu seíni ca lan íri labúseerubei líchugun luágu.

⁶³ Ába lamúriañan ában murúsun fuláansu, ába labürüdün luágun. “Juan líribei.” Ába laweíridun janígi súngebui láu cátei le.

⁶⁴ Lídan méme óra ligía, ába gayáraajaali lan ladímurejan Zacarías, ába líchugun uweíriguni lun Búngiu.

⁶⁵ Ába laweíridun janígi besínagu láu cátei le, ába labájüdawagún cátei le lídan sun fulásu geyégu jáu.

⁶⁶ Sun ja agáambubalin, ába jeréderun asáminara, ába jálügüdagun jámagua, jaríñaga.

—¿Cáteibeí funasan irájü le?

Ladüga biní lumútija Búngiu le tímatimaati.

Lerémujan Zacarías

⁶⁷ Ába liábin Sífiri Sándu luágun Zacarías, le lúguchi irájü ligía, ába ladímurejani Zacarías dimúrei le laríñagubei Búngiu lun, ába laríñagun.

⁶⁸ Buídulá ladímurejoún luágu Wabúreme le Jabúngiutebei gürígia ja Israelítagu, ladüga ñübinjali woun, wagía le lánigu, áni sálba láadiwa.

⁶⁹ Rújali ában Asálbaragülei le gabáfuti woun jádaangiñe linébaanfaangu Davíd, lé meja esériwidubei lun.

⁷⁰ Ítara líña meja laríñaguni Búngiu jádaangiñe láni profétagu ja edéregeragubaña joúngua lun, lúmagiñe meja binádu dan,

⁷¹ luágu lasálbarubádiwa lan jaweí wáganiñu lúma jaweí sun ja iyéreejabúbaña woun.

⁷² Ítara líña gudémejabu lan Búngiu joun binádu wagübürigu, arúfudaleí luágu mabúlieidagun lan lueí lidáradun le sándubei jáma.

⁷³ Niján lé meja laríñagubei lun wáguchi Abrahám.

⁷⁴ luágu leséfurubadíwa lan jaweí wáganiñu, lun gayáraabei lan wesériwidun lun manúfudeiga,

⁷⁵ láu úarani, derégeguñu wagía woúngua lun, sun dan le wabágaridubei.

⁷⁶ Áni bugúya nisáaniraü, láni Búngiu le íñubei proféta lúba bagúarúniwa, ladüga baráansejaba lubá Wabúreme,

⁷⁷ subúdi lámuga üma lánina asálbaruni joun lánigu, le áubei ferúdunawa lan jafígoun.

⁷⁸ Wabúngiute, láu lísiñejabu lúma lugúdemejabu, loúnajabei Crístu wámoun siélugiñe

⁷⁹ lun larúgoungadágüdün jáu ja lídaanbaña lubúriga lúma jáu ja luágubaña üma le ouwenibei lébeja,

lúma lun ladúndejani wapásun lídoun üma le anügüwaliwa lídoun darángilaü.

⁸⁰ Aweírdeina ligíati irájü ligía, afáragadagueina giñe lídan láni espíritu. Ába laganouún lídan fulásu mageírawati darí lúmoun wéyu le lagúmeserun luwádigimari lun Búngiu jagánagua lumútuniña Búngiu ja Israelítagu.

2*Lagüriajouniwa Jesúsu
(Mt 1.18-25)*

¹ Lídoun buga dan ligía, ába laríñagun urúei Augústo lun jabájüdün sun gürígia ja Rómabaña.

² Furúmiñe meja jadügüni cátei le, dán meja le Cirénio lan agúmadijabei Síria.

³ Súnti gürígia mósu joúdin jageíra lun ñi lan jabájüdüwa.

⁴ Ligía láfuridunbei José Nazarétgiñe, loúbawagugiñe Galiléa, ába lídin loúbawagun Judéa lídoun fulásu le gíribei Belén, le ñi lubei lagüriajoua Davíd, quei linébaanfan lubei Davíd José.

⁵ Ába lídin Belén lun labájüdün úara túma María to gadáradunboun lúma lun jamárieidun, áni dageíñañoun.

⁶ Dánti le añája lan ñi Belén, ába lachülürün dan lun tagüriajan María.

⁷ Ába tagüriajani furúmiñeti tiraü ñi, ába touburaguni tídan lágei, ába taróunragüdüni ñi tídan jában anímaalu ladüga úati ubáraü joun tídan jában chülüdügütiña.

Ánjeligu jáma ouñigirutiña mudún

⁸ Lídan áraabu bougudi lueí Belén, ñiñanu joúniri mudún, bou larúgan jáu ouñigiraña jalügüniña mudún.

⁹ Sódini, ába lasáliragun ában láni Wabúreme Búngiu ánjeli siéluigiñe joun, ába jaríjin ában oúnwenbun larúgounga le lánina Búngiu geyégua jáu, ába janúfudedagun.

¹⁰ Ába laríñagun ánjeli ligía joun.

—Manúfudeda jumá, ladüga níjein ugánu buíti nanügün jun, lébunabei sarágu ugúndani joun sun gürígia.

¹¹ Luágu agüriajouáali lan ában asálbaragülei jun ugúñe, lageíra David, Crístu le Jabúreme.

¹² Jadárirubei irájü ligía jouburagu tídan lágei, roun tídan jában anímaalu.

¹³ Lídan óra ligía, ába jasáliragun sarágu ánjeligu lubádu furúmiñeti ánjeli, ába jíchugun uweíriguni lun Búngiu, jaríñaga.

¹⁴ ¡Uweíriguni lun Búngiu lídan líñutima siélu, darángilaü múarugu jádan gürígia ja ibíjubalin lufúleisein!

¹⁵ Dánti le jagíribudun ánjeligu jarigoún siélun, ába jaríñagun jouniri mudún jámagua.

—Queímoun Belén aríjei cátei le asúseredubei, le uágubei lasúbudiragüda Wabúreme Búngiu woun.

¹⁶ Ába jouéin furéseguina, ába jadárirunun María lúma José, lúma irájü roun tídan jában anímaalu.

¹⁷ Dan le jaríjibalin, ába jabájüdaguni le laríñagubei ánjeli joun libügürü le.

¹⁸ Súnti ja agáambuliña, weíriti janígi láu le jaríñagubei.

¹⁹ Áni María, areídañu tíñein sun cátei le tídan tanígi, arítagua luágu.

²⁰ Ábati jagíribudun jouniri mudún, adímurejeina weíri luágu Búngiu, luágu sun le jagáambubei lúma le jaríjibe, ladüga suséreti ítara quei laríñawagúniwa joun.

Larúfudúniwa Jesúsu témpulurugu

²¹ Luágu liwídun wéyu, ába lerésibiruni circuncisión, ába jíchuguni líri Jesúsu, íri méme le líridubei ánjeli tun María lubáragiñe tadágeinadun.

²² Dan le lagúnfulirunbei lidáni jarúmadun lagübürigu Jesúsu según igáburi lídan lilúrudun Moisés, ába janügüni irájü ligía ubúrugun Jerusalén lun jedéregeruni lun Búngiu.

²³ Jadügünbalin líra ladüga laríñajare tídan lilúrudun Búngiu. “Sun furúmiñeti wügüri irájü agüriajouáali lúnbei Búngiu.”

²⁴ Ába lubeíti jouéin adágaragüda le uágubei laríñaga lilúrudun Búngiu. bián wagúgua o bián lan únjun.

²⁵ Lídan meja dan ligía, ñíñein meja ában wügüri Jerusalén gíriti Simeón. Wügüri ligía ában wügüri buíti, weíriti ledéregeragun lúngua lun Búngiu, áni agúraba lumúti liábin Crístu, le lúnbei lasálbaruniña Israelítagu. Ñíñein Sífiri Sándu lúma Simeón,

²⁶ áni arúfuda láali lun luágu mouñwenbei lan maríjingleí Crístu le lúnbei loúnajani Wabúreme Búngiu.

²⁷ Ába lídin wügüri ligía témpulurugun, ladúndegan Sífiri Sándu. Dánti le janügünbalin lagübürigu Jesúsu Jesúsu témpulurugun lun jadügüni le laríñagubei lúru láu,

²⁸ ába louyuajani Simeón, ába líchugun eteíngiruni lun Búngiu, aríñageina ligía.

²⁹ Nabúreme, gayáraajali bígirunina lun nouñwen láu darángilaü, nugúya le esériwidubei bun,

ladüga gúnfuli báali le baríñagubei nun.

³⁰ Aríja náali Wasálbaragüle láu nágu,

³¹ Asálbaragülei le bouñajabei joun sun gürígia.

³² Ítara lúba queísi ában lámpu lun larúfuduni inárüni joun ja mámabaña juríu,

ru ligíame uweíríguni joun Israelítagu, ja bánigu.

³³ Ába laweíridun lanígi José táu sun María láu le laríñagubei Simeón luágu irájü le.

³⁴ Ábati labíniruniña Simeón, ába laríñagun tun María, to lúguchu Jesúsu.

—Irájü le, lébunabei achúgeraguni joun sarágu Israelítagu, lébunabei gíñe asálbaruni joun jíbiri. Ítara lúba queísi ában seíni le lúnbei gíbe jamá májatiña jerésibiruni.

³⁵ Ítara lúba lasúbudirúniwa le larítagubei cáda ában tídan lanígi luágu Crístu. Áni ítara lúba sun cátei le bun quei ában efeín to ácharurutu tuágu buwáni.

³⁶ Ñíñoun gíñe ában würi proféta, gíritu Ána, würi tugúya liraü Fanué, jádaangiñe ladügawagun Áser. Weíríyaaru würi tugúya, ñúraügiru meja tamárieidunbei, sédüñein irúmu táu lúma túmari, ába loúnwen,

³⁷ guetó, gádürü-weín-gádürü irúmu táu. Máfuriduntuti témpulurugugiñe, terédera ñi esériwida lun Búngiu áriebu wéyuagu, ayúnara lúma ayúmuragua lun Búngiu.

³⁸ Ába tiábin Ána jawágun María, José, lúma Jesúsu lídan méme óra ligía, ába teteíngiruni Búngiu luágu irájü ligía, adímureja tugúya luágu Jesúsu joun sun ja agúrabajabaalin lasálbarún Jerusalén.

Agíribuduni Nazarétün

³⁹ Lárigiñeti jagúnfulirun láu sun le laríñagubei lilúrudun Búngiu, ába jagíribudun María, José, lúma Jesúsu Galiléoun lídoun jabúrugute le Nazarét.

⁴⁰ Aweírideina ligíati irájü le, éredeina ligía, afáragadagueina lídan lichú áu, biní lumútijati Búngiu sarágu.

Jesúsu témpulurugu

⁴¹ Ságüja irúmu jóúdin lagübürigu Jesúsu ubúrugun Jerusalén lubá fédu le páscua,

⁴² áni dan le lagúnfulirunbei Jesúsu dúusu irúmu, ába jóúdin súngubei Jerusalén quei le jagáburi lídan fédu ligía.

⁴³ Dánti le jagíribudun lárigiñe lagúmuchagun fédu, ába leréderun irájü ligía Jerusalén, ibídiñoun tun lúguchu ni lun José,

⁴⁴ jarítagún yebe luágu níten lan jádan gürígia ja jámarigubaña luágu üma. Ítara líña jadügün ában wéyu eíbuguni, dan le jáluajani jádan jadújeñu lúma jádan jasúbudiraagun,

⁴⁵ madári jamúti. Ábati jagíribudun ubúrugun Jerusalén áluajei ñi.

⁴⁶ Ürüwa wéyu lueígiñe, ligía jadáriruni témpulurugu ñun jádan arúfudajatiña lilúrudun Moisés, agáambajaña, álügüdaguaña.

⁴⁷ Súnti ja agáambubalin, weíríti janígi luágu lichú láu lúma luágu buri loúnabagüle.

⁴⁸ Dan le jaríjnbalin lagübürigu, ába laweíridun janígi, ába taríñagun lúguchu lun.

—¿Cáme badügei cátei le woun, niraü? Nugúya lúma búguchi, wáluajañadibutia láu idíjeri.

⁴⁹ Ábati laríñagun Jesúsu joun.

—¿Cági uágu jáluajana? ¿Ibídiñeti jun luágu lúnti lan neténirun lun cátei le láni Nóguchi?

⁵⁰ Úati gunfaráanda jamáni le laríñagubei joun.

⁵¹ Ábati lagíribudun jáma, Nazarétün, ába lasígirun láu meme lagáambadi joun. Ábatí buri tareíduni lúguchu sun cátei le tarítangunrugun.

⁵² Niján mémeti Jesúsu aweírdeina dándu lúgubu queísi lisáminan, áni buítiti dándu ligíbugiñe Búngiu quei jagíbugiñe gürígia.

3

*Lapúrichijan Juan le abásteragüdjabei, lídan fulásu mageírawati
(Mt 3.1-12; Mr 1.1-8; Jn 1.19-28)*

¹ Lídan liqueínsin lirúmuduri lagúmadijan Tibério César, Póncio Piláto ligía meja gumándanbei Judéa, Heródes gumándan Galiléa, Felípe, le lamúlen, ligía gumándan Itúrea lúma Traconíte, Lisanías gumándan Abilínia,

² Anás lúma Gáifasi, jagía fádirigu íñutimáabaña lídan jafíñen juríu. Ábati líchugun Búngiu ában ugánu lun Juan, le liraü Zacarías, lídan fulásu mageírawati,

³ ába leíbuguni Juan sun fulásu buri le lubádubei dúna le Jordán, aríñagueina joun gürígia luágu lúnti lan jaságürijan luágu jafígoun, sáansi jameíme jagáburi lun ferúdunawa lan jafígoun, badísei jagíame.

⁴ Suséreti cátei le ítara queí meja labürüdüni proféta Isaías, laríñaga. Agaambúati lumálali ában agúarajati lídan fulásu mageírawati ítara.

“Aráanseja jumoún janígi lubá liábin Wabúreme, queísi ladárarúniwa ũma surúti.

⁵ Labuínchagüdüwaba sun gudúngu, sun wübü, lagurúaba, ũma buri le segéti, lásururuba, ũma buri le múaragunti, lúwaradaguba.

⁶ Larijúbei sun uboú Wasálbaragüle, le loúnajabei Búngiu woun.”

⁷ Ñübintiña sarágu gürígia lun Juan lun labásteragüdüniña, ába laríñaga joun. —¡Jarásan jéwe jugúya le! ¿Ca awísarubalün lun jeíbaagun lueí lanárime lafáyeiragüle figoú le yaráfaalibei?

⁸ Ígira jumeí binádu jigáburi, abágarida jumá lun gayára lan larijín buídu luágu sáansiguaali lan jigáburi. Maríñaga jumá jídaangua. “Linébaanfaangu Abrahám wagía”, ladúga quei naríñaguni jun, gayáraati ladügün Búngiu linébaanfaangu Abrahám lídaangiñe buri dübü le.

⁹ Yaráfaali dan lun jafáyeijan luágu jifígoun queísi taráanserún jaráwa lun tánchuguni tídibu wéwe. Sun ídibu le mabuídunti lín lánchugúba, ábame lagudún.

¹⁰ Ábati jaríñagun gürígia jagía lun.

—¿Cáteiti lúnbei wadügüni?

¹¹ Ába laríñagun Juan joun.

—Le biámabei isímisin, lúnti líchugun ában lun le úaboun ni ában lúma, le geíginbei, lúnti lafánreinraguni lúma le meíginbei.

¹² Ñübintiña gíñe agúburajatiña liseínsuna gumádi lun jabásterun, ába jaríñagun lun.

—Maésturu, ¿ca cátei lúnbei wadügüni?

¹³ Laríñaga Juan joun.

—Magúburaja jumá loúgiñe le uágubei laríñaga lúrodu.

¹⁴ Aríñagatiña gíñe fiú súdeara lun.

—Ángi wagía, ¿cági lúnbei wadügüni?

Laríñaga joun.

—Magídara jumá ni cáta ni ca ueí, ni láu siádi, ni láu jíchugun lidúnrun mútu le madügün lumúti, gufúruma jumá láu jafáyeiruaja.

¹⁵ Añájati gürígia madéraguagüdünja arítagua luágu fágua lan Juan Crístubei,

¹⁶ ába laríñagun Juan joun sùngubei.

—Áu, láu dúna nabásteragüdaün, nítenbei ában le lúnbei labásterágüdünün láu Sífiri Sándu lúma láu queísi wátu geméti, ligía Crístubei. Gabáfutimaati nueí dari lun madüna nan ni lun nafáragaduni tagürüga ligeídin.

¹⁷ Dánme liábin, jafánreinrúaba gürígia ja lánigubaña jádaangiñe ja wuríbabaña queísigubeirügü lagídarúniwa ífei lídaangiñe türígu buíti, ába loundarún türígu buíti tídoun lágei, ába lagudún ífei lídan wátu geméti le méñeguchati.

¹⁸ Láu igáburi le lúma láu buri ámu ewéridijani líchigei Juan ugánu buíti joun gürígia luágu wasálbaragüle.

¹⁹ Erérati gíñe lun gumándan Heródes luágu laganoun túma Heródias, to lúmari Felípe, le lamúlen, lúma luágu ámu buri cátei wuríbati le ladügübei.

²⁰ Lubáragiñe ladügün Heródes gásu láu, adúgarügü ligía ában cátei wuríbatimaati. ládaruni Juan furísunrugun.

Labásterun Jesúsu

(Mt 3.13-17; Mr 1.9-11)

²¹ Lubáragiñe ladaürüniwa Juan, dan le labásteragüdüniña gürígia, badíseiti gíñe Jesúsu. Dánti le niján lan Jesúsu ayúmuragua lun Búngiu, ába lánjunrenchagun juánriñu,

²² ába larijiniwa larárirun Sífiri Sándu luágun camá jamuga ában únjun, ába lagaambúniwa laríñagun ában umálali siélugiñe.

—Amürü Niraü le jínsiñebei nun, gúndaatina báu.

Linébaanfaangu Jesúsu

(Mt 1.1-17)

²³ Queí burí darándi irúmu láu Jesúsu dan le lagúmeserunbalin luwádigimari le uágubei louñajei Búngiu. Jarítawagúati luágu liraü lan José, José, liraü Elí,

²⁴ Elí, liraü Matát, Matát, liraü Leví, Leví, liraü Melquí, Melquí, liraü Jána, Jána, liraü José,

²⁵ José, liraü Matatías, Matatías, liraü Amós, Amós, liraü Nahúm, Nahúm, liraü Eslí, Eslí, liraü Nagái,

²⁶ Nagái, liraü Maat, Maat, liraü Matatías, Matatías, liraü Semeí, Semeí, liraü José, José, liraü Judá,

²⁷ Judá, liraü Joána, Joána, liraü Résa, Résa, liraü Zorobabél, Zorobabél, liraü Salatiél, Salatiél, liraü Néri,

²⁸ Néri, liraü Melquí, Melquí, liraü Adí, Adí, liraü Cosám, Cosám, liraü Elmodám, Elmodám, liraü Er,

²⁹ Er, liraü Josué, Josué, liraü Eliézer, Eliézer, liraü Jorím, Jorím, liraü Matát,

³⁰ Matát, liraü Leví, Leví, liraü Simeón, Simeón, liraü Judá, Judá, liraü José, José, liraü Jonán, Jonán, liraü Eliaquím,

³¹ Eliaquím, liraü Meléa, Meléa, liraü Mainán, Mainán, liraü Matáta, Matáta, liraü Natán,

³² Natán, liraü Davíd, Davíd, liraü Isaí, Isaí, liraü Obéd, Obéd, liraü Booz, Booz, liraü Salmón, Salmón, liraü Naasón,

³³ Naasón, liraü Aminadáb, Aminadáb, liraü Arám, Arám, liraü Esróm, Esróm, liraü Fáres, Fáres, liraü Judá,

³⁴ Judá, liraü Jacób, Jacób, liraü Isáac, Isáac, liraü Abrahám, Abrahám, liraü Taré, Taré, liraü Nacór,

³⁵ Nacór, liraü Serúg, Serúg, liraü Ragáu, Ragáu, liraü Pelég, Pelég, liraü Héber, Héber, liraü Sála,

³⁶ Sála, liraü Cainán, Cainán, liraü Arfaxád, Arfaxád, liraü Sem, Sem, liraü Noé, Noé, liraü Laméc,

³⁷ Laméc, liraü Matusalén, Matusalén, liraü Enóc, Enóc, liraü Jaréd, Jaréd, liraü Mahalaléel, Mahalaléel, liraü Cainán,

38 Cainán, liraü Enós, Enós, liraü Set, Set, liraü Adán, Adán, liraü Búngiu.

4

Loúchawagúniwa Jesúsu (Mt 4.1-11; Mr 1.12-13)

¹ Ába lígiruni Jesúsu fulásu loúbawagu dúna Jordán, buin láu lubáfu Sífiri Sándu, ába lanügüni Sífiri Sándu lídoun fulásu mageírawati.

² Reídeiti Jesúsu bián-wein wéyu ñi láu Máfia oúchaguei ánjein áburuja lídoun wuríbani. Meíginti ni cáta lídan sun bián-wein wéyu ligía, ába lasándirun ában oúnwenbun ilámaü.

³ Ábati laríñagun Máfia lun.

—Ánjein Liraü bubei Búngiu, salíguagüdadeí dübü le feínme.

⁴ Laríñaga Jesúsu lun.

—Tariñajare Lerérun Búngiu. “Mámarügüba táu fein jabágarida gürígia, jabágariduba giñe láu jagúnfulirun láu sun dimúrei le laríñagubei Búngiu.”

⁵ Lárigiñe, ába lanügüni Máfia Jesúsu luágun ában wübü íñuti, ába larúfuduni sun fulásu le ubouágubei lun lídan ában.

⁶ Ába laríñagun Máfia lun.

—Níchugubei sun ubáfu lúma sun uweíriguni le bun

⁷ ánjabu ájuduragua nun lun banügünina quei bubúngiute, báníbei súngubei, ladüga ibíja náali sun le, áni gayáraati níchuguni lun le únti nabúseera.

⁸ Ába laríñagun Jesúsu lun.

—Dísebá nueí, Máfia, ladüga tariñajare Lerérun Búngiu. “Judúguabá lun Búngiu le Babúreme, lúnrügüla besériwida.”

⁹ Lárigiñe, ába lanügüni Máfia ubúrugun Jerusalén, ába laweínragüdüni tábulugu témpulu, ába laríñagun lun.

—Ánjein Liraü bubei Búngiu, chüguabá búngua yágiñe lun ünabun,

¹⁰ ladüga tariñajare Lerérun Búngiu.

Loúnajabaña Búngiu láni ánjeligu lun jóunigiruníbu,

¹¹ janügübadibu jájaburugu lueí labúleiseirun bugúdi luágu dübü.

¹² Ába laríñagun Jesúsu lun.

—Tariñajare giñe Lerérun Búngiu. “Moúchaguabeí Búngiu le Babúreme.”

¹³ Dánti le madárijali Máfia cába lan luwúyeri oúchawagúni ladüga lun Jesúsu, ába lígiruni lúngua luágu átiri dan.

Lagúmeseruni Jesúsu luwádigimari Galiléa (Mt 4.12-17; Mr 1.14-15)

¹⁴ Ába lagíribudun Jesúsu Galiléoun buin láu lubáfu Sífiri Sándu, ába buríti ladímurejoún luágu lídan sun fulásu geyégua.

¹⁵ Arúfudajatija tídan jalígilisin juríu lídan sun fulásu, buíti jadímurejan sun gürígia luágu.

Jesúsu lídan ubúrugun Nazarét (Mt 13.53-58; Mr 6.1-6)

¹⁶ Ábati lídin Jesúsu Nazarétün, le fulásu le ñi lubei lagüriajoúa, ába lebélorun tídoun jalígilisin juríu lídan wéyu le eméraaguagülei quei ligáburi yebu, ába laráramun lun lalíjan tídan Lerérun Búngiu.

¹⁷ Ába jíchugunun lilíburun proféta Isaías lun, dan le ladárunun, ába ladáriruni le ñi lubei laríñaga ítara.

¹⁸ Níjein láni Búngiu Sífiri Sándu nuágu,

ladüga anúadaja láadina lun níchuguni ugánu buíti joun gudémetiña,

ounaja láadina lun námaliyaniña ja nidíjeribaña tídan janígi,
 lun náfuridagüdüniña adaürütiña,
 lun níchugun aríjini joun maríjintiña,
 lun neséfuruniña ja ouserúabaña wuríba,

19 lun nadímurejan luágu dan le fuleíseijabu lan Búngiu joun gürígia.

20 Ába ladáurunun Jesúsu líburu, ába líchugunun lun ídejati tánina ligílisi, ába lañúurun. Queíti jasígirun sun ja ñíbaña aríaguei,

21 ába lagúmeserun adímureja, laríñaga.

—Ugúñe guánarü gúnfulijali cátei le jigíbugiñe.

22 Adímurejatiña sun jagía buíti luágu Jesúsu, weírititi janígi luágu lubuídun buri dimúrei le laríñagubei. Jálügüdagua buríti jámagua.

—¿Mámasan le liraü José le?

23 Ába laríñagun Jesúsu joun.

—Subúsi nun luágu jaríñagubei lan cátei le nun. “Surúsia, agáraniguabá búngua”, jaríñaguba giñe nun. “Agáambaadiwa luágu buri cátei le adüga báalibe Capernaúm, adügabeí giñe ya bageíra.”

24 Ába lasígirun adímureja, laríñaga.

—Nínarün jáu luágu úa lan ni ában proféta erésibirúati buídu lageíra.

25 Chóuru numúti luágu añajein lán meja sarágu würíña ja jiláguañábaña jámarigu jádan Israelítagu lídan meja lidáni proféta Elías, dan le májuyun lubei júya luágu ürüwa irúmu dimí, ába ñi lan sarágu ilámaü fulásurugu,

26 áni mouñajan lumúti Búngiu Elías túmoun ni ában jádaangiñe würíña jiláguaaña jámarigu jagía ja aganoubaña Israel, louñajei túmoun ában to aganouboun Sarépta, yaráfa lun ubúrugu Sidón.

27 Ñíñanu meja giñe sarágu gawágutiña gumeín luágu jára ñi Israel lídan lidáni proféta Eliséo, úati ni ában jádaangiñe areídawaguagüdüti lueídügüya Naamán le Síriana.

28 Dan le jagáambunbalin sun ja ñíbaña ligílisirugu cátei le, ába jagáñidun sarágu.

29 Ába jásaarun, ába jaságaruni Jesúsu bougudín lueí fulásu, ába janügüni lábulugun wübü le gagíbuagubalin fulásu lun jájuchuruni ñígiñe.

30 Ába lásügürün Jesúsu jamídaanguágiñe jámagua, ába lídin.

*Ában wügüri gawáguti espíritu wuríbati
 (Mr 1.21-28)*

31 Ábati lídin Jesúsu Capernaúm, ában fulásu le lídaanbei Galiléa, ába larúfudajan joun gürígia ñi lídan wéyu le eméraaguagülei.

32 Weírititi janígi láu ligáburi larúfudajan, ladüga láu ubáfu ladímureja.

33 Ñíñeinti ában wügüri ligílisirugu, gawáguti espíritu wuríbati, ába lagúaragun ítara.

34 —Ígira báwa, ¿ca uágu bemétera wámoun, Jesúsu le Nazarétna? ¿Biábiña agünrinchaguawa? Subúdi numútibu, áni subúdi numúti luágu amúrü lan Liraü Búngiu le sándubei.

35 Ába ladeínjan Jesúsu lun espíritu wuríbati ligía, ába laríñagun lun.

—¡Maníba, furíba lídaangiñe gürígia le!

Ábati jájuchuruni espíritu wuríbati wügüri ligía múarugun jagíbugiñe súngubei, ába láfuridun lídaangiñe, mabúleiseirunga.

36 Ába laweíridun janígi súngubei, ába jaríñagun jámagua.

—¿Cáteisán buri dimúrei le? ¡Adímurejati wügüri le láu gumádi lúma ubáfu joun espírituwuríbatiña, ába jáfuridun!

³⁷ Adímurejoúatiti buri luágu Jesúsu lídan sun fulásu geyégua.

Lareídaguágüdünun Jesúsu límenidi Pédro
(Mt 8.14-15; Mr 1.29-31)

³⁸ Ábati láfuridun Jesúsu tídaangiñe jalígilisin juríu, ába lídan lúbiñoun Simón. Sándiñounti límenidi Simón, tabíruajaña, ába jayúmuragun lun Jesúsu lun lareídaguágüdünun.

³⁹ Ába lélemuchun Jesúsu tuágun, ába ladeínjan lun abíruaü, ába lagídarun abíruaü tueí. Lídan méme óra ligía ába tásaarun, ába tagúmeserun eténira joun.

Lareídaguágüdün Jesúsu sarágu sánditiña
(Mt 8.16-17; Mr 1.32-34)

⁴⁰ Sun ja añájeinbaña sánditiña jábiñe, dan le láfuachun wéyu ába janügüniña lun Jesúsu, ába líchuguni lújabu jawágu cáda ában jádaangiñe, ába lareídagun furúmieguaügü sándi le jawáguti.

⁴¹ Sarágu jaña gíñe ja gawágutiña espíritugu wuríbatiña, ába jagídarúniwa jaweí, ába buri jagúaragun ítara.

—Amürü le Liraübei Búngiu.

Ába ladeínjan Jesúsu joun espíritugu wuríbatiña, mígirun lumútiña lun jadímurejan, ladüga subúdi jamúti luágu ligía lan Crístubei.

Lapúrichijan Jesúsu Galiléa
(Mr 1.35-39)

⁴² Dan le larúgadunbei, ába láfuridun Jesúsu bougudín lueí ubúru luágu lídoun ában fulásu mageírawati. Ába jáluajani gürígia, ába jachülürün le ñíjin lubeí, buséntiña yebe jeréderuni lueí lídin,

⁴³ ába laríñagun joun.

—Gásu gíñe níchuguni ugánu le luáguti larúeijan Búngiu joun lílana líbiri fulásu, ladüga lun líra nouñajoúa.

⁴⁴ Ítara líña lídin apúrichijeina tídan buri jalígilisin juríu, Galiléa.

5

Esénijani le láubei miláguru
(Mt 4.18-22; Mr 1.16-20)

¹ Luágu ában dan, ñíñein Jesúsu láru dúna le Genesarét, ábati jayábingua sarágu gürígia darí lun jámurudaguni, ladüga busén jamá jagáambuni lerérun Búngiu.

² Ába laríjin Jesúsu bián ugúnein málatu dúnarugu yaráfa lun láru béya, raríguaaña esénijatiña tídaangiñe, jachíbuñounti jasénin.

³ Ábati ládinun Jesúsu tídoun ában tídaangiñe ugúnein tugúya to lugúneboun Simón, ába laríñagun lun lun ladísedun murúsun lueí láru béya. Ábati lañúurun Jesúsu tídan ugúnein, ába lagúmeserun arúfudaja joun gürígia ñígiñe.

⁴ Dan le lásurunbei ladímurejan, ába laríñagun lun Simón.

—Jeíba méme anágün, ábame jágurun ñi.

⁵ Laríñaga Simón lun.

—Maésturu, ñadímeinjadiwa sun áriebe, mañúguntiwa ni cáta, quei amürü lubeí aríñagubalin, wágura.

⁶ Ába jágurun, dan le jiñúragunbárun séni, ñíñanu sarágu úduraü tídan darí yebe lun tajeíridagun.

⁷ Ábati jadügün seíni joun jíbirigu ja tídaanbaña to ában ugúnein lun jayábin íderaguaña. Ába jayábin, ába jabuínchagüdünun biángubei ugúnein darí yebe lun tadíbiragun.

⁸ Dan le laríjini Simón Pédro cátei le, ába lájuduragun ligíbugiñe Jesúsu, ába laríñagun lun.

–Ígira bána, Nabúreme, ladüga ában wügüri gafígounti nugúya.

⁹ Laríñagubaaalin Simón líra ladüga laweíridun lanígi, jáu sun ja úarabaña lúma, luágu añúguni le jadügübei.

¹⁰ Weíríti gíñe janígi Jacóbo lúma Juan, ja lirájüñü Zebedéo, ja lúmabaña Simón. Ába laríñagun Jesúsu lun Simón.

–Manúfudebá, lúmagiñe guetó buwádigimarida adíaja gürígia nun.

¹¹ Lárigiñeti játürün, ába jígiruni sun cátei, ába jóúdin lúma Jesúsu lun láni jamá disípulugu.

Lareídagugüdüni Jesúsu ában gawáguti gumeínluágu sun lúra
(Mt 8.1-4; Mr 1.40-45)

¹² Luágu ában dan, lídaañein ában fulásu Jesúsu, le ñí lubei ában wügüri gawáguti gumeín luágu sun lúra. Dan le laríjinbalin wügüri ligía Jesúsu, ába lájuduragun dagá ligíbu múarugun, ába layúmuragun lun ítara.

–Nabúreme, ánjabu busén, gayáraati bareídagugüdüni.

¹³ Ábati lagúruruni Jesúsu láu lújabu, ába laríñagun.

–Buséntina, areídaguabá.

Quei laríñagun ítara, ába lagídarun gumeín luei wügüri ligía,

¹⁴ ábati laríñagun Jesúsu lun lun mabájüdagun láani cátei le ni ca un. Laríñaga lun.

–Ñüdünrügüba, arúfudagua búngua lun fádiri, rubeíme edéweejani le uágubei laríñaga lilúrudun Moisés luágu barúmadun, aríja jamámugei gürígia luágu areídaguaadibu lan.

¹⁵ Eíbu dan, eíbu labúrchaguntima luágu Jesúsu, sarágu jañátija gürígia oúndaragutiña lun jagáambuni lúma lun lareídagugüdüni jasánde.

¹⁶ Ábaja lídin Jesúsu le ñíjin lumúti úa jamá gürígia lun layúmuragun lun Búngiu.

Lareídagugüdüni Jesúsu ában fadáguaali
(Mt 9.1-8; Mr 2.1-12)

¹⁷ Luágu ában wéyu, ñíñein Jesúsu arúfudaja, ñíñanuti fariséogu jáma arúfudajatiña lilúrudun Moisés, ñübintiña lídaangiñe lirájüñü buri fulásu le láni Galiléa, Judéa lúma Jerusalén. Nijánti lubáfu Búngiu arijúa luágu Jesúsu láu lareídagugüdüniña sánditiña.

¹⁸ Ábati jayábin fiú wügüriña barüina ában wügüri fadáguaali tídan ában ubárari, jálugati jebélaagüdüni le ñíjin lubei Jesúsu lun laríjini.

¹⁹ Madáritiña jalíagiñeba lan jebélura ladüga jíbe gürígia, ábati jaweínrun tábulugun múna, ába jagídarun murúsun lueigiñe lougiñe le ñí lubei Jesúsu, ába jarárigüdüni sánditi tídan lubárari ligíbugiñoun.

²⁰ Dan le laríjinbalin Jesúsu afíñeni le jawágubei, ába laríñagun lun sánditi ligía.

–Wügüri, ferúdnawaali bifígoun.

²¹ Ábati jaríñagun arúfudajatiña lilúrudun Moisés jáma fariséogu jóúnguarügü.

–¿Cáteisán gürígia le, le minébenejabubei lun Búngiu láu ligáburi ladímurejan?

Úati ámu gayáraati ferúduna lan figóu lueídügüya Búngiu.

²² Subúdi lumúti Jesúsu ca lan jasáminabei, ába laríñagun joun.

–¿Ca uágu jasáminara ítara?

²³ ¿Cátima méreengúnbei laríñawagun. “Ferúdnawaali bifígoun”, ódi “Sarába, beíbuga”?

24 Narúfudaaliti jun luágu gayára lan ferúduna nan figoú, áu le Wügüri Garaüwarügüti.

Ábati laríñagun lun le sándibei.

—Sarába, barüboun bubárari, beíba búbiñoun.

25 Lídan óra ligía, ába lásaarun sánditi ligía jagíbugiñe, ába labúdunun lubárari tó buga ídaanboun laroúnra, ába lídin lúbiñoun adímurejeina luágu luweírigun Búngiu.

26 Ába laweíridun janígi súngubei, ába jadímurejan luágu luweírigun Búngiu, ába jaríñagun láu luweírin janígi.

—Aríjaadiwa cátei weíriguti ugúñe.

Lagúarun Jesúsu lun Leví lun lánime disípulu
(Mt 9.9-13; Mr 2.13-17)

27 Lárigiñe cátei le, ába láfuridun Jesúsu lídaangiñe fulásu ligía, ába laríjin ában agúburajati liseínsuna gumádi, gíríti Leví, ñun líña lídan fulásu le ñí lubei lagúburaja, ába laríñagun Jesúsu lun.

—Falábana, queímoun núma queísi náni disípulu.

28 Ába lásaarun Leví, ába lígiruni sun cátei lánina binádu libágari, ába lídin lúma Jesúsu queísi láni disípulu lúmagiñe óra ligía.

29 Lárigiñe, ába ladügün Leví ában oúnwenbun fédu lun Jesúsu, lúbiñe, ñíñanuti sarágu agúburajatiña liseínsuna gumádi jámaya ámu gürígia ñun luágu dábula jáma.

30 Ába jagúmeserun fariséogu jáma arúfudajatiña lilúrudun Moisés adímureja luágu Jesúsu jáma láni disípulugu, ába jaríñagun joun.

—¿Cásan uágu jeíginbei jáma agúburajatiña liseínsuna gumádi lúma jáma ámu gafígountiña?

31 Laríñaga Jesúsu joun.

—Ja magádiebaña, memégeirúntiña surúsia, aná ja sándibaña.

32 Máma niábiña áluaja magádietiña ligíbugiñe Búngiu, niábiña áluaja gafígountiña lun lasáansirún jóuserun.

Jálügüdüni Jesúsu luágu ayúnaruni
(Mt 9.14-17; Mr 2.18-22)

33 Ábati jaríñagun lun Jesúsu.

—¿Ída liñasan ayúnara jabeí lánigu Juan jáma fariséogu, ayúmuragua jagía sarágu lun Búngiu, ánjaña báni disípulugu, jóutiña, gurá jagía súnwandan?

34 Ába laríñagun Jesúsu joun.

—¿Gayáraati funági jayúnaragüdüniña gürígia ja jamísurajan lídoun ában maríei sun niján lan adári jáma ñí?

35 Lachülürüba dan lun lídin adári, ligíameti jayúnarun.

36 Rúti gíñe Jesúsu ában jémpulu joun luágu iséri larúfudajan lúma binádu, laríñaga.

—Úati íbuguti murúsun gamísa tueígiñe ában anáanguni isérigiru lun láfadajan ában anáanguni ñulújaru, ánjein ladüga ítara, lagádeiruboun to isérigiruboun, áni merédebei gíñe murúsun gamísa iséri ligía buídu tuágu anáanguni ñulújaru tugúya.

37 Michugúntu gíñe diweín iséri lídoun guéru ñulújali, ánjein adügüwa ítara, tajeíridagubei diweín iséri guéru ñulújali, féridiméti diweín, féridi guéru.

38 Ligía lúnti lubeí tíchugún diweín iséri lídoun guéru iséri, ítara lúba lesériwidun guéru, seríwi diweín.

39 Úati gíñe átuti diweín to binádu lun labúseerunun to iséri lárigiñe, laríñaguba. “Buítimaatu to binádu.”

6

Jabúdajan disípulugu türígu lídan wéyu le eméraguagülei

(Mt 12.1-8; Mr 2.23-28)

¹ Luágu ában wéyu le eméraguagülei, eíbugeina líña Jesúsu labádinagua nádü jáma láni disípulugu, átüjeina jagíati disípulugu lin türígu, ába jéferejani láu jájabu, ába jeígini líla.

² Ábati jaríñagun jádaangiñe fariséogu joun.

—¿Cásan uágu jadüga wadágimanu le moún lumuti ladügün lídan wéyu le eméraguagülei?

³ Laríñaga Jesúsu joun.

—¿Malíjangidün luágu le ladügübei Davíd luágu ában dan, dan le lálámachunbei jáu sun ja úarabaña lúma?

⁴ Ába lebélorun tídoun lúban Búngiu, ába lanügün tídaangiñe fein to sagraúboun, jou ligía tídaangiñe, ru ligía joun ja úarabaña lúma, láu sun fádirigu rügüñanu lán yebe lúnbaña jeígin tídaangiñe fein tugúya, según lilúrudun Moisés, áni máma figóu le ladügübei Davíd ligíbugiñe Búngiu.

⁵ Aríñagati gíñe joun.

—Gabáfutina, áu le Wügüri Garaüwarügüti, lun naríñagun cába lan gayára ladügüniwa wéyu le eméraguagülei.

Wügüri le jiláalibei újabu

(Mt 12.9-14; Mr 3.1-6)

⁶ Lídaanya ában wéyu le eméraguagülei, ába lebélorun Jesúsu tídoun jalígilisin juríu, ába lagúmeserun arúfudaja. Níñein ában wügüri jiláli lújabu le loúnwenren,

⁷ añájati arúfudajatiña lilúrudun Moisés jáma fariséogu aríaajei Jesúsu ánjein lagáranijaba lubei lun lídan wéyu le eméraguagülei, lun jadárirun lidúnrun.

⁸ Subúdi lumúti ca lan jarítagebei, ába laríñagun lun wügüri le jiláalibei újabu.

—Sarába, ráramabá wagíbugiñe.

Ába lásaarun, ába laráramun ñi.

⁹ Ábati laríñagun Jesúsu joun jíbiri.

—Nálügüdaadün ában cátei. ¿Ca cátei gayáraabei ladügün lídan wéyu le eméraguagülei, buídu ódi wuríbani, lasálbarun ibágari ódi lagídarún?

¹⁰ Ábati laríaguniña Jesúsu sun ja geyégubaña láu, ába laríñagun lun wügüri ligía.

—Tulébei bújabu.

Ába látuleruni, ába lareídagun.

¹¹ Ja jíbiri, ába jagáñidun sarágu, ába jagúmeserun álügüdagua jámagua ída lúba lan gayára lan jagúmochun láu Jesúsu.

Lanúadajaniña Jesúsu dúusu apóstolugu

(Mt 10.1-4; Mr 3.13-19)

¹² Lídoun dan ligía, ába lídin Jesúsu luágun ában wübü ayúmuragua lun Búngiu.

¹³ Dan le larúgadunbei, ába lagúarun joun láni disípulugu, ába lanúadajan dúusu jádaangiñe, ja únbaña lagúara apóstolugu.

¹⁴ Niján jíribei. Simón, le méme líchubei Pédro, Andrés, le lamúlen Simón, Jacóbo lúma Juan, Felípe lúma Bartolomé,

¹⁵ Matéo lúma Tomás, Jacóbo, le liraü Alféo, Simón, le áfaaguti lun jawáanserun juríu,

16 Júdas, le lamúlen Jacóbo, lúma Júdas Iscarióte, le alúgurubalin Jesúsu.

*Larúfudajan Jesúsu joun sarágu gürígia
(Mt 4.23-25)*

17 Ába larárirun Jesúsu jáu lueígiñe wübü, ába leréderagun jáu láni disípulugu lídan ában fulásu le ñí lumuti sagádi wásati, ñíñanu gíñe sarágu gürígia ñübintiña loúbawagugiñe Judéa, Jerusalén, lúma lárurugugiñe Tíro lúma Sidón. Sun gürígia ja, jayábiña lun jagáambuni lapúrichijan Jesúsu lúma lun lareídaguagüdüni jasáandi.

18 Já buri asúfurirubaña jáu espíritugu wuríbatíña, areídaguátiña gíñe.

19 Álugatiña sun gürígia jagúrurun luágu Jesúsu, ladüga areídaguagüda lumútiña súnubei láu lubáfu.

*Fuleíseiwatiña jáma fugiábugu
(Mt 5.1-12)*

20 Ábati laríjin Jesúsu jawágun láni disípulugu, ába laríñagun joun.

—Fuleíseiwatün, jugúya le mégeibe, ladüga ménreengúnbei jun lun jebélurun lídoun larúeijan Búngiu.

21 ‘Fuleíseiwatün, jugúya le áfaagubei ilámaü guetó, ladüga jaquímuleduba.

‘Fuleíseiwatün, jugúya le ayájubei guetó, jéjerajaba lárigiñe.

22 ‘Fuleíseiwatün dan le iyéreegu jumá joun gürígia nueígiñe, dan le jabúgagunün jawáriu, dan le janábagunün, dan le janügüni jíri queí ni cáta, queí cátei wuríbatí, nueígiñe, áu le Wügüri Garaüwarügüti.

23 Gúnda jumá sarágu, buin jumá láu ugúndani lídan wéyu ligía, ladüga jibíjuba ában oúnwenbun afáyeiruaajaü siélu, ítara méme líña meja jadüga binádu jagübürigu gürígia ja joun profétagu.

24 ‘Fugiábugu jugúya, jugúya le rísibe, ladüga ibíja jumáli sun ugúndani le lúnbei jibíjini.

25 ‘Fugiábugu jugúya, jugúya le químulebei, ladüga jalámachuba.

‘Fugiábugu jugúya le éjerajabei guetó, ladüga jayájuajaba láu íruni.

26 ‘Fugiábugu jugúya dan le sun jamá gürígia adímureja buíti juágu, ítara líña meja jadímurejan binádu jagübürigu buíti jawágu profétagu yéetiña.

*Jínsiñe jamá jáganiñu jun
(Mt 5.38-48, 7.12)*

27 ‘Niján nerérun jun, Jugúya le agáambubalina. Jínsiñe jamá jáganiñu jun, adüga jumá buíti joun ja iyéreejabúbaña jun,

28 biní jumaña ja íñaragutün, ayúmuragua jumá jawágu ja anábagutün.

29 Ánjabu láfara ában gürígia luágu ában loúba bigíbu, rúbei gíñe le ában loúba lun, le anügütu babíte bueí, rúboun gíñe bisímisin lun.

30 Furúmieguarügü le amúriajati búma, rúba lun, le anügüti bumégen, máluajabeí lúma.

31 Le cátei le babúseerubei ladügün bun, ligíalá badüga joun ámu.

32 ‘Ánjein já rügüñanu lubeí jínsiñejabúbaña jun jínsiñe jun, ¿ca buíti jadügübei láu líra? Ásta gafígountiña, ítara líña jadüga.

33 O ánjaün lan adüga buíti jóunrügü ja adügübaña buíti jun, ¿ca buíti jadügübei láu líra? Ítara líña gíñe jadügün gafígountiña.

34 Ánjaün afúredeija jóunrügü ja úmagiñebaña jarítagua jibíjin som cátei, ¿ca buíti jadügübei láu líra? Afúredeijatiña gíñe ja wuríbabaña joun wuríbatíña jáledi, agúrabañu jagía gíñe jabíjin som cátei jámagiñe.

35 Ánjein jugúya, lúnti jínsiñe jamá jáganiñu jun, adüga jugúyame buíti, afúredeija jugúyame, magúrabajaanga ni cáta lewéñegua. Ítara lúba weíri

lan jafáyeiruaaja lúmagiñe Búngiu le íñugubei, áni lirájüñübadün giñe le tímatimaati, ladüga ligía, fuleísejabúti giñe joun ja meteíngiradibaña lúma joun ja wuríbabaña.

³⁶ Gudémejabu jumá, quei gudémejabu lan júguchi Búngiu.

Madímureja jumá wuríba jawágu ámu
(Mt 7.1-5)

³⁷ ‘Madímureja jumá wuríba jawágu ámu, ábame giñe maríñagun lan Búngiu luágu wuríba lan jigáburi. Míchiga jumá jadúnrun ámu, míchun lámuga giñe Búngiu jidúnrun. Ferúduna jumá, ferúduna lámugaün giñe Búngiu.

³⁸ Rújuma joun ámu, ru lámuga giñe Búngiu jun. Líchuguba Búngiu sarágu jun, ladügüba jun queígubeirügü jadüga joun ámu.

³⁹ Rúlumuti Jesúsu jémpulu le joun.

—¿Gayáraati funági ladúndejan ában maríjinti ában maríjinti líledi? ¿Ma jeíguaduba biángubei lídoun ában meme júyu?

⁴⁰ Úati ni ában disípulu weíriguti lueí lumáesturun, íbini ánjein lagúmucha latúriaajan, chülürügübei quei lumáesturun.

⁴¹ ‘¿Ída líña gayára bubálin liraüraü ífei le lídaanbei lágu bíbugaña aríja, áni masándi bumúti durúsu le lídaanbei bágu?

⁴² ¿Ída líña gayára lubeí baríñagun lun bíbugaña. “Sagánei liraüraü ífei le bágurugubei”, áni masándi bumúti durúsu le bágurugubei? ¿Biánguañein bigíbu! Sagábei durúsu le bágurugubei furúmiñe, gayára lámuga baríjini liraüraü ífei le lágurugubei bíbugaña buídu lun baságaruni.

Luágu lin tídibu wéwe tasúbudirúa
(Mt 7.17-20, 12.34-35)

⁴³ ‘Úati tídibu wéwe buíti lun wuríba lan lin, úati giñe tídibu wéwe wuríbati lun buídu lan lin.

⁴⁴ Sun tídibu wéwe subúdiwati luágu lin, mátüjoúntu ígo lueígiñe jíyu, ni beíbei lueígiñe guríbiyuwa.

⁴⁵ Gürígia le buídubei, cátei buíti laríñagubei ladüga cátei lan buíti tídaanbei lanígi, gürígia le wuríbati, cátei wuríbati laríñagubei ladüga cátei lan wuríbati tídaanbei lanígi. Luágu le laríñagubei gürígia lasúbudirúa ca lan tídaanbei lanígi.

Bián ébuu
(Mt 7.24-27)

⁴⁶ ‘¿Ca uágu jariñaga luágu áu lan Jabúremebei áni madügün jumúti le nubeíbei?

⁴⁷ Naríñagaali jun ída líña lan le ñübinbei nun áni adügaleí le nubeíbei.

⁴⁸ Ítara líña quei ában wügüri le ábunagubei ában múna, achíajati julíli furúmiñe, ába lábununi wagábu labádinagua dübü derébuguti. Dan le liñúrunbei dúna, ába liábin fulúdu láu érei tuágun múna tugúya, siñá lumutu ánjingicha ladüga luáguñoun lan ébuu derébuguti.

⁴⁹ Ánjeinti le agáambubalina áni madügün lumúti le nubeíbei, ítara líña quei ában wügüri le ábunagubei lúban ligíbuagu ságoun, mawágaburiga, dánti le liñúrunbei dúna, ába liábin fulúdu láu érei tuágun, ába teíguadun, ába tagünrinchagun le gumúti.

7

Lareídaguagüdüni Jesúsu lumúsun ában gumándan Rómana
(Mt 8.5-13)

¹ Dan le lásurunbei ladímurejan Jesúsu joun gürígia, ába lídin Capernaúm.

2 Ñĩnein ában gumándan Rómana ñi, láu ában lumúsun jínsiñeti lun sarágu, sándiñein músu ligía, yaráfa lun loúnwen.

3 Dan le lagáambunbei gumándan ligía luágu Jesúsu, ába loúnajan fiú jádaangiñe wügüriña weírigutiña lídan jafiñen juríu lun jayúmuragun lun Jesúsu lun lídin areídaguagüdei lumúsun.

4 Ába jóudin lúmoun Jesúsu, ába jagúmeserun ayúmuragua lun táu sun janígi, jaríñaga lun.

–Buíti lun bíderaguni gumándan le,

5 ladüga jínsiñetiwa wagía juríu lun, ligía guánarügü ábunaguagüdubarun walígilisin.

6 Ábati lídin Jesúsu jáma, dan le yaráfaaña tun lúban gumándan ligía, ába loúnajan gumándan jádaangiñe lumádagu aríñaga lun Jesúsu.

–Nabúreme, ítara líña gumándan lun manügün ban bubéresegun ñüdüñ lúbiñe, luágu nege madüna lan lun bebélurun lúbiñoun,

7 ligía nege mídin lubei lúngua álugabu. Rúrügübei dimúrei, ábame lareídagun lumúsun.

8 Ladüga ligía nege gíñe lábugiñeñein gumádi íñutimaati, áni añájein gíñe súaara lábugiñe lagúmadijan. Dan lé nege laríñagun lun ában jádaangiñe lun lídin, ñüdüñti, dan le laríñagun lun le ában lun liábin, ñübinti, áni dan le loúnajani lumúsun adüga som cátei, adüga lumúti. Ítara lúba nege, luágu berérun mósu lídin sándi luei lumúsun.

9 Dan le lagáambunbalin Jesúsu cátei le, weíríti lanígi láu wügüri ligía, ába laríjin jawágun gürígia ja afálarubalin, aba laríñagun joun.

–Nínárün jáu, ni íbini jádan Israelítagu madárigidina afiñeni weíríti quei lafiñen wügüri le.

10 Dánti le jachülürünbei wügüriña ja ñüdüñbaña álugei Jesúsu járigoún lúbiñoun gumándan, areídagu aali lumúsun.

Láguyuaguädüni Jesúsu tiraü ában jiláali túmari

11 Lárígiñe cátei le, lídiña Jesúsu lídoun ában ubúругu gíríti Naín, úareina jáña láni disípulugu lúma, jáma sarágu gürígia.

12 Dan le lachülürünbei yaráfa lun lubéneri ubúругu ligía, ába laríjin jóudin ábunaja ában jiláali le ligíarügüti tiraü lúguchu to jiláali túmari. Sarágu jáña lílana fulásu ñüdüñ ábunaja túma.

13 Dan le laríjinbarun Wabúreme Jesúsu, ába tagúdemedagun lun, ába laríñagun tun.

–Mayájuabá.

14 Ába layárafadun, ába lagúrurunun gánjoun, ába jaráramagun ja anügübaña. Ába laríñagun lun jiláali.

–Írájü, ¡naríñaguña bun lun básaarun!

15 Ábati lásaarun lé buga jiláalibei, ába jagúmeserun adímureja. Ába ledéregeruni Jesúsu tun lúguchu.

16 Dan le jaríjinbalin gürígia cátei le, ába laweíridun janígi, ába jagúmeserun adímureja buíti luágu Búngiu, jaríñaga.

–Chülúgua ában proféta weíriguti wádoun.

Aríñagatiña gíñe.

–Ñübinja Búngiu íderaguawa, wagía le lumútuniña.

17 Ába lagaambúniwa cátei le ladügübei Jesúsu lídan sun Judéa lúma geyégua láu.

*Loúnagülegu Juan le abásteragüdejabei
(Mt 11.2-19)*

18 Agáambati Juan luágu sun cátei le, abájüdagua jamúti lánigu lun. Ábati lagúarun joun biáma jádaangiñe,

19 ába loúnajaniña álügüdei Wabúreme Jesúsu ánjein ligía lubeí Crístubei le lúnbei liábin, o ánjein jagúrabajaba lubeí ámu.

20 Dan le jachülürünbei le ñí lubei Jesúsu, ába jayárafadun, ába jaríñagun lun. —Loúnajañadiwa Juan le abásteragüdjabei álügüdjabu ánjein amürü lubeí Crístubei le lúnbei liábin, o ánjein lun lubeí wagúrabun ámu.

21 Lídan méme óra ligía, areidaguagüdati Jesúsu sarágu gürígia lídaangiñe jasáandi lúma jasúfurirun, lúma jádaangiñe espíritugu wuríbatíña, aríjagüda ligía gíñe sarágu maríjintiña.

22 Ába lubeíti laríñagun joun.

—Jeíba, jaríñageime le jaríjubei lúma le jagáambubei lun Juan. Jabájüdagúame lun luágu jaríjin maríjintiña, jeíbugun meíbuguntiña, jareídagun láutiña gumeín luágu jára, jagáambun magáambaditiña, jáguyugun jiláaña, lúma luágu líchugún ugánu luáguti asálbaruni joun gudémetiña.

23 Gúndaati gíñe gürígia le meféridirun lumúti lafíñen nuágu.

24 Lárigiñe jóudin já buga loúnajabaña Juan, ába lagúmeserun Jesúsu adímureja luágu Juan joun gürígia, laríñaga.

—¿Cásan jídinbei aríja lídan fulásu mageírawati? ¿Ában mabúru le lánjinjan garábali?

25 Ánjein máma lubeí ítara líña, ¿cáti jídinbei aríja? ¿Ában wügüri táu anáanguni wéndegutu? Máma ligía, subúdi jumúti luágu ja lan wéndegubaña adáüragun, agánawa jagía buídu, tídaañanu jában urúeigu.

26 Lídan linárün cátei, ¿ca jídinbei aríja? ¿Ába proféta? Ánja, inárüni, áni ában weíriguti sügü láu proféta.

27 Juan, ligía oúnagülei le uágubei taríñaga Lerérun Búngiu. Noúnajañein noúnagüle bubáragiñe lun laráansejani üma bubá.

28 Quei naríñaguni jun, jádan sun gürígia, úagili proféta weíriguti lueí Juan, áni láu sun líra, weíriguti le ünabutimaabei lídan larúeijan Búngiu sügü láu le anügarügübalin ugánu luágu arúeijani ligía.

29 Dan le jagáambunbalin sun gürígia, ásta ja agúburajabaña liseínsuna gumádi, cátei le, ába jaríñagun luágu richá lan Búngiu láu laríñagun liyúmulugugiñe Juan luágu lúnti lan jasáansiraguni jagáburi. Gürígia jagía, resíbi jamáali meja labásteragüdjajan Juan,

30 ánjañati jíbe-ágei fariséogu jáma arúfudajatiña lilúrudun Moisés, májatiña meja lun jadügüni le lubeíbei Juan, merésibirun jamúti lé yebe labúseerubei Búngiu ladügün luágu jafúleisein.

31 Ába laríñagun Jesúsu.

—¿Ída liñásan jagáburi gürígia lánina dan le? ¿Cásan lenégebei?

32 Ítara jáña quei irájüñü ja añúurubaña mágidirugu ájurera, ába jagúaragun joun jíbegu. “Íñaajatiwa fídu jun, mabínajantün, erémujatiwa urému jírti jun, mayájuntün.”

33 Ladüga ñübinti Juan le abásteragüdjabei, lé meja meíginbei fein, mátun ligía diwein, aríñagatün luágu gawágu lan espíritu wuríbatí.

34 Lárigiñe, ába niábin, áu le Wügüri Garaüwarügüti, jóutina áni gurá áu. Jaríñaga luágu geígadina, gátadi, jamáda áu nege gaffígountiña jáma agúburajatiña liseínsuna gumádi.

35 Wel, ja chúbaña áu, subúdi jamúti luágu buídu lan le ladügübei Búngiu láu lichú láu.

Jesúsu lúbiñe Simón le fariséo

³⁶ Ába lamísurajani ában jádaangiñe fariséogu Jesúsu lun lídin eíga lúbiñe, ába lídin Jesúsu lúbiñe fariséo ligía, ába lañúurun eíga luágu lidábulan.

³⁷ Níñounti ában würi wuríbati témeri lídan ubúругu ligía, dan le tagáambunbei luágu lídin Jesúsu eíga lúbiñe fariséo ligía, ába tídin láu ában lágei ibíñei jémeti.

³⁸ Ába taráramun lanágangiñe Jesúsu, lubádu lugúdi, ába tadüdüragüdüni lugúdi láu táguira. Nuján ayájuaja, nuján arágajei láu tídiburi, nuján achújei lugúdi, ába téseruni ibíñei luágun.

³⁹ Dan le laríjinbalin fariséo le amísurajabalin Jesúsu cátei le, laríñaga lúnguarügü. “Lun jamúga inárüni lan luágu proféta lan wügüri le, lasúbudiruñein jamúga ca lan to agúruruboun luágu lúma ca lan tuwúyeri gürígia tugúya, luágu wuríba lan témeri.”

⁴⁰ Ábati laríñagun Jesúsu lun fariséo ligía.

—Simón, níjein ában cátei lun naríñaguni bun.

Laríñaga fariséo.

—Aríñagabeí nun, maésturu.

⁴¹ Laríñaga Jesúsu lun.

—Níñanu bián wügüriña dúweitiña seínsu lun ában afúredeijati. Ában jádaangiñe, dúweiti seíngü-san denáriu, le ában, dimí-san.

⁴² Queíti siñá lubei jafáyeiruni, ába ferúduna láani afúredeijati ligía jadúweijan biángubei. Aríñagabeíti nun. ¿cábagi jádaangiñe jínsiñejabutima lun afúredeijati ligía?

⁴³ Laríñaga Simón lun.

—Lídan narítangun, le gíbetimaabei adúweijan.

Laríñaga Jesúsu lun.

—Richátibu.

⁴⁴ Ába laríjin Jesúsu tuágun würi tugúya, ába laríñagun lun Simón.

—¿Ariágu bíña tun würi to? Belútina búbiñoun, míchutibu dúna nun lun nachíbuni nugúdi, ánjounti würi to, ágawagüda tumúti nugúdi láu táguira, ába tamábeidagüdüni láu tídiburi.

⁴⁵ Machú bumútina, ánjoun tugúya, lúmagiñe nebélurun, merédegili tachújani nugúdi.

⁴⁶ Míchutibu aáli nábulugu, ánjoun tugúya, túguatu ibíñei jémeti luágu nugúdi.

⁴⁷ Ligía naríñagunbei bun luágu arúfuda láani luweírin tínsiñejabu luágu ferúdnawa lan líbe tifígoun, ánjeinti gürígia le míbeti ferúdnawa lan, míbeti ínsiñeni larúfudun.

⁴⁸ Ábati laríñagun Jesúsu tun würi tugúya.

—Ferúdnawaali bífígoun.

⁴⁹ Ábati jagúmeserun amísurajouítiña ja ñúnbaña lúma ñi aríñaga jámagua.

—¿Cáteisán wügüri le, ferúdnawa lubeí gíñe figóu?

⁵⁰ Ába laríñagun Jesúsu tun würi tugúya.

—Sálbawádibu lídaangiñe bífígoun ladúga bafíñerun nuágu, beíba darángilañu.

8

Würiña já buri meja íderaguti Jesúsu

¹ Lárigiñe cátei le, ñüdünti Jesúsu lídoun sarágu ubúругu lúma buri lirájüñü fulásu íchigei ugánu buíti luágu larúeijan Búngiu.

² Nñüdütiña dúusu apóstolugu lúma jáma würiña ja lareídaguagüdübaña jádaangiñe espíritugu wuríbatiña lúma sándi. Níñoun María to gíriboun Magdaléna jádan, to ídaangiñeboun jáfurida sédü espíritugu wuríbatiña,

³ ñiñoun giñe Juána, to lúmari Chúza, le oúnigirubarun lúban Heródes, ñiñoun Susána, jámaya sarágu ámu ja íderagubálin láu le jámati.

Jémpulu luáguti ábunaguti
(Mt 13.1-9; Mr 4.1-9)

⁴ Sarágu jáña gürígia ñübinburitiña lídaangiñe sarágu fulásu lun jaríjini Jesúsu, dánti le oúndaraguaaña, ába ladímurejan Jesúsu joun láu jémpulu. Lariñaga joun.

⁵ –Furíti ában ábunaguti ábunagua líla nádü, dan le afúrujeina láani, ába láburojan lídaangiñe luágun üma, ába jadügüraguni ásügürütiña, ába jeígini dunúru.

⁶ Líbiri, ába láburojan labádinaguóún dübü, dánti le labouúchun, ába lásaürün ladüga lumábei fulásu.

⁷ Ába láburojan líbiri labádinaguóún jíyu, ába láfaruni jíyu le ájüchübei úara lúma.

⁸ Ñiñein giñe lídaangiñe, áburujati lídoun múa buíti, dan le laweínamudun, gin ligía, buíti lalúbajoún, cáda ílaü rúti san águu.

Lárigiñe lariñaguni Jesúsu cátei le, ába lariñagun joun láu umálali jéreti.

–Jugúya le garígeirugubei lun jagáambun, agáamba jumána.

Le lébubei ladímurejan Jesúsu láu jémpulu
(Mt 13.10-17; Mr 4.10-12)

⁹ Ábati jálügüdüni láni disípulugu ca lan lílabei jémpulu le.

¹⁰ Lariñaga joun.

–Jugúya, subúdigüda láali Búngiu cátei arámudaguati le luágutibeí larúeijan jun, ánjaña ja mebéresenbaña láu lerérun, láu jémpulu lariñawagúa cátei luáguti larúeijan joun lun ibídiñebei lan líla cátei le jaríjibeí joun, lun giñe úa lan gunfaráanda jamáni cátei le jagáambubei.

Lafúnraanguagüdüni Jesúsu jémpulu luáguti ábunaguti
(Mt 13.18-23; Mr 4.13-20)

¹¹ Ába lariñagun Jesúsu joun.

–Niján líla jémpulu ligía. Líla nádü, ligía lerérun Búngiu,

¹² üma le ñíjin lubeí láburoja lídaangiñe líla nádü, jagía gürígia ja agáambubalin lerérun Búngiu, ába liábin Máfia, ába lagídaruni tídaangiñe janígi lun mafíñerun jamá, masálbarun jagíame.

¹³ Dübü le ñíjin lubeí láburoja líbiri líla nádü, jagía gürígia ja agáambubalin lerérun Búngiu, ába jerésibiruni láu ugúndani, áni márügüdünti jádan buídu, afíñetiña luágu murúsun dan, áni dan le jóuchawagún, mawándun jamúti, ába jeféridiruni jafíñen luágu Búngiu.

¹⁴ Jíyu le ñíjin lubeí láburoja líbiri líla nádü, jagía gürígia ja agáambubalin lerérun Búngiu, ába jasígiruni binádu jagáburi, ába jasígirun arítagua luágu irísini lúma ugúndani le lánina ubou le, úati fulásu jarítaturugun lun lerérun Búngiu, siñátiti laságarún cátei buíti jádaangiñe.

¹⁵ Ánjeinti múa buíti le ñíjin lubeí láburoja líbiri líla nádü, jagía gürígia ja agáambubalin lerérun Búngiu táu anígi buítu, adüga jagía gásu láu lerérun, eíbuga jagía quei lubúdubu, sagáwati cátei buíti jádaangiñe.

Jémpulu luáguti lámpu
(Mr 4.21-25)

¹⁶ Ába lariñagun Jesúsu.

–Úati gürígia ébeduti lámpu, ába ladáuragun láu láu som cátei o líchuguni lan tábugiñe gabána, íñu líchigei lun larúgoungadágüdün múnada, lun gayára lan jaríjin ja ebélurubaña jabárua.

17 Úati lubeíti ni cáta arámudaguati lun mafúnraangudun lan, úa ni cáta le ibídiñewati lun machülürün lan dan lun lasúbudirúniwa lúma lun lafúnraangudun.

18 ‘Gagáambadi jumá lubeíti buídu lun lerérun Búngiu, le gámati lerérun Búngiu tidan lanígi, libíjuba lánwoun le lúmabei, ánjeinti le úabei ni cáta lídaangiñe lerérun Búngiu tidan lanígi, íbini le uágubei larítagua luágu níjein lan lúma, lagídarúaba lueí.

Lúguchu Jesúsu jáma lamúlenu
(Mt 12.46-50; Mr 3.31-35)

19 Ábati tachülürün lúguchu Jesúsu jáma lamúlenu le ñíjin lubeí Jesúsu, siñáti jayárafadun lun ladüga jíbe gürígia.

20 Ába laríñawagún lun.

—Nujántia búguchu jáma bamúlenu boúgudi áni buséntiña jaríjinibu.

21 Ába laríñagun joun.

—Ja agáambubalin lerérun Búngiu, úara jagía lúma, jagía nóguchubaña jáma namúlenu.

Lagálumaduni Jesúsu lérougá
(Mt 8.23-27; Mr 4.35-41)

22 Luágu ában wéyu, ába ládinun Jesúsu tídoun ában ugúnein jáu láni disípulugu, ába laríñagun joun.

—Queímoun loubáfurugun lagúnu.

Ába jóúdin.

23 Dan le añája lan ánjiñuragua, ába larúmugun Jesúsu. Ába láfurun ában garábali jéreti jáu, lagúnurugu, ába lagúmeserun dúna ebéluja tídoun jagúne yaráfa lun jadíbiragun.

24 Ábati jóúdin agágudajei Jesúsu, ába jaríñagun lun.

—¡Maésturu! ¡Maésturu! ¡Wadíbiragua!

Ábati lásaarun Jesúsu, ába ladeínjan lun garábali lúma lugúdi barána, ába lagálumougadun, ába darángila lan sun cátei.

25 Ábati laríñagun joun disípulugu.

—¿Ca susérebei lun jafíñen?

Ába jálügüdagun jámagua láu anúfudei lúma luweírin anígi, jaríñaga.

—¿Cátei funásan wügüri le, gumádi lubáli garábali lúma lugúdi barána áni agáamba jameí?

Wügüri Gadárana le gawágubei espíritugu wuríbatíña
(Mt 8.28-34; Mr 5.1-20)

26 Ába jachülürün loubawagun Gadára, le loubáfurugubei lagúnu, ligíbugiñe Galiléa.

27 Dan le larírirunbei Jesúsu, ába liábin ában wügüri lílana fulásu ligía lubádun. Lújali wügüri ligía gawágu espíritugu wuríbatíña. Madáüti anáanguni, maganoun ligía tidan muna, lídan buri jabára jiláaña le achigíti luágu dübü lagánawa.

28 Dan le laríjinbalin wügüri ligía Jesúsu, ába lájuduragun ligíbugiñe, ába lagúaragun.

—¿Ca uágu bemétera númoun, Jesúsu Liraü Búngiu le Íñugutimaabei? Ayúmuraguatina bun lun masúfuriragüdün bánina.

29 Laríñagunbei ítara ladüga lagúmadiruñein lan Jesúsu espíritugu ligía lun láfuridun lídaangiñe. Saráguja weíyaasu lárügüdüni espíritugu wuríbatí ligía, ábaja jagúraguni gürígia lújabu lúma lugúdi láu güríngüri lun ledéraguagüdün, ábaja látumuraguni, ába lanúragüdüni espíritugu lídoun fulásu le mageírawati.

30 Ába laríñagun Jesúsu lun.

—¿Ca bíri?

Ába laríñagun.

—Lejión níribei.

Laríñagunbei luágu ligía lan líribei ladüga gíbeeña espíritugu wuríbatíña ja ebélurubaña lídoun.

31 Ába jamúriajan espíritugu jagía lúma Jesúsu lun moúnajan lániña máfiougatin.

32 Queíti ñíñanu jamá sarágu büüruju eíga luágu ában wübü yaráfa, ába jayúmuragun espíritugu jagía lun lun loúnajaniña jádoun büüruju jagía, ába lánjarun Jesúsu.

33 Ábati jáfuridun espíritugu wuríbatíña jagía lueí wügüri ligía, ába jebélurun jádoun büüruju, ábati jáguragun büüruju jagía jóungua lueígiñe ában gudúungu, ába jáburujan lídoun lagúnu, ába jañáradagun.

34 Dan le jaríjinbalin ja oúnigirubaliña büüruju cátei le asúseredubei, ába janúfudedagun, ába jeíbaagun abájüdaguei ubúругu lúma áraabu.

35 Ábati jóúdingua güri-gia aríjei cátei le asúseredubei. Dan le jachülürünbei le ñí lubei Jesúsu, ába jadáriruni wügüri le ídaangiñebei jáfurida espíritugu wuríbatíña ñun lubádu lugúdi Jesúsu, táu lanáangun, areídagu-aali, ába janúfudedagun.

36 Játi buga aríjubalin, ába jabájüdaguni luáguti lareídagun wügüri lé buga gawágubei espíritugu wuríbatíña joun,

37 ába jayúmuragun lílana fulásu ligía lun Jesúsu lun lídin ñígiñe, ladüga janúfude. Ábati ládinun Jesúsu tídoun ugúnein lun lídin,

38 ába layúmuragun wügüri le ídaangiñebei jáfurida espíritugu lun lun lídin lúma, ába laríñagun Jesúsu lun lun leréderun, laríñaga lun.

39 —Giríbubá búbiñoun, ábame babájüdaguni sun le ladügübei Búngiu bun.

Ába lídin, ába labájüdaguni le ladügübei Jesúsu lun lídan sun fulásu ligía.

Liraü Jáiro túma würi to agúrurubarun lanáangun Jesúsu

(Mt 9.18-26; Mr 5.21-43)

40 Dan le lagíribudunbei Jesúsu loubáfurugun lagúnu, ába jerésibiruni güri-gia láu ugúndani ladüga sun jagía agúrabañu jáñein.

41 Ábati liábin ában wügüri gíríti Jáiro, le ábanbei jádaangiñe tábutigu jalígilisin juríu, ába lájuduragun lubádu lugúdi Jesúsu, ába layúmuragun lun lun lídin lúbiñe,

42 ladüga ában rügüñoun liraü, quei buri dúusu irúmu táu, touwe. Dan le lídinbei Jesúsu, ába jafálaruni sarágu güri-gia darí lun jámurudaguni.

43 Ñíñounti ában würi jádan, dúusu irúmu táu láu lésejan jítaü tídaangiñe. Gásta táali sun tiseínsun jawágu surúsiagu, siñá jamutu areídaguagüda.

44 Ába tayárafadun lun Jesúsu lanágangiñe, ába tagúruruni táru lanáangun, lídan méme óra ligía ába tareídagun.

45 Ábati laríñagun Jesúsu.

—¿Ca agúrurubei nuágu?

Quei sun lan jagía aríñaga luágu magúrurúnwa lan luágu, ába laríñagun Pédro jáma líbirigu.

—Maésturu, murúgu wañátia ya lurúma jíbe güri-gia, ¿álügüdagidibu ca lan agúrurubei buágu?

46 Ába laríñagun Jesúsu.

—Gurúwaali nuágu, ladüga sandí numuti luágu areídaguagüdaadina lan güri-gia láu nubáfu.

47 Dan le tasúbudiruni würi tugúya luágu subúdiwaali lan, aba tiábin adádagareina, ába tájuduragun lubádu lugúdi Jesúsu, ába tagúfesserun lun jagíbugiñe sun gürígia ca lan lébubei tagúrurun luágu áni ába lan tareídagun lídan méme óra ligía.

48 Ábati laríñagun Jesúsu tun.

—Niraü, areídaguaadibu ladüga baffíñerun nuágu. Beíba darángilañu.

49 Ñígili Jesúsu adímureja, ligía lachülürün ában lúbiñegiñe Jáiro, ába laríñagun lun Jáiro.

—Jilá biraü, mebérésejadügüyabá lun Maésturu.

50 Dan le lagáambunbalin Jesúsu le, ába laríñagun lun.

—Manúfudedabá, afíñerügübá, ábame tareídagun biraü.

51 Dan le lachülürünbei Jesúsu lúbiñoun Jáiro, mígirunti lun jebélurun ámu lúma lueídügüya Pédro, Jacóbo lúma Juan jáma tagübürigu irájü tugúya.

52 Jayájuña sun ja ñíbaña tárigi, ába laríñagun Jesúsu joun.

—Mayájua jumá, moúnwentu, tarúmugarügüña.

53 Ába jéjerajan láu ladüga subúdi jamáni luágu jilá tan.

54 Ábati lárügüdüni Jesúsu tújabu, ába laríñagun láu umálali jéreti.

—Irájü, sarába.

55 Ába tágyugun, ába tásaarun lídan méme óra ligía, ába laríñagun Jesúsu lun jíchugun eígini tun.

56 Weíríti janígi tagübürigu, ába laríñagun Jesúsu joun lun mabájüdagun jamáni le asúseredubei ni ca un.

9

Loúnajaniña Jesúsu dúusu apóstolugu apúrichija (Mt 10.5-15; Mr 6.7-13)

1 Ába loúndaruniña Jesúsu dúusu láni apóstolugu, ába líchugun ubáfu joun lun jaságarun sun jawúyeri espíritugu wuríbatíña lúma lun jareídagugüdüñ sánditiña.

2 Ába loúnajaniña apúrichijeí ugánu luáguti larúeijan Búngiu lúma areídagugüdaña sánditiña.

3 Laríñaga joun.

—Manüga jumá ni cáta júmagua luágu juweíyasun—ni bádun, ni ságü, ni fein, ni seínsu. Ábanrügütá símisi janügün.

4 Furúmieguarügü múna to ñíjin lumúti jachülüra, reídei jumá ñi darí jídin lídaangiñe fulásu ligía.

5 Le ñí lumuti merésibirúniwa jumá, dánme le jáfuridun lídaangiñe fulásu ligía, ábame jáfuruduni calíqui lueígiñe jugúdi, arúfuda jumámugei luágu magúndan jumá láu jagáburi lílana fulásu ligía, ígira jumáña quei jadáriragun jóungua.

6 Ábati jáfuridun apóstolugu jagía, ába jeíbuguni sun lirájüñü fulásu apúrichijeinei ugánu luáguti asálbaruni, areídagugüdeina jagía sánditiña lídan sun fulásu le ñí lumuti jóúdin.

Loúnwen Juan le abásteragüdjabei (Mt 14.1-12; Mr 6.14-29)

7 Ába lagáambun gumádimati Heródes luágu sun cátei le ladügübei Jesúsu, ibídiñetiti lun cába lan larítagua, ladüga ñíñanu aríñagutiña luágu saráli lan Juan lídaangiñe oúweni,

8 jíbiri aríñaga luágu proféta Elías lan achülaagubei, jíbiri aríñaga luágu ában lan jádaangiñe jíbiri binádu profétagu le ásaaruti lídaangiñe oúweni.

⁹ Ába laríñagun Heródes.

—Áu guánarügü oúnajabei adürürei lichügü Juan. ¿Cátei funáti le, le uágubei nagáamba labájüdawagún sarágu cátei?

Ábati louchun Heródes laríjini Jesúsu.

*Leíagüdün Jesúsu seíngü mílu wügüriña
(Mt 14.13-21; Mr 6.30-44; Jn 6.1-14)*

¹⁰ Dan le jagíribudun apóstolugu, ába jabájüdagun lun Jesúsu luágu sun le jadügübei. Ábati lanügüniña lídoun fulásu mageírawati yaráfa lun Betsáida.

¹¹ Dan le jasúbudirunbalin güriña, ába jafálaruni, ába lerésibiruniña Jesúsu, ába ladímurejan joun luágu larúeijan Búngiu, areídaguagüda láña sánditiña.

¹² Dan le lagúmeserunbei adárüda, ába jayábin láni Jesúsu dúusu apóstolugu lúmoun, ába jaríñagun lun.

—Oúnaja báña güriña ja, ñüdüñ jamámuga áluga jabára lun jeméraagun, áluaja jagíame eígini lídan buri lirájüñü aüdü lúma lídan buri fulásu yaráfati, ladüga úati ni cáta ya.

¹³ Laríñaga Jesúsu joun.

—Rújuma eígini joun.

Jaríñaga lun.

—Seíngü rügüñoun fein wáma jáma bián úduraü, ánjawa gubeírügü ñüdüñ agáñija eígini joun sun güriña ja.

¹⁴ Yaráfañanu jóun seíngü mílu wügüriña ñi, mabájüdunga würiña jáma irájüñü. Ába laríñagun Jesúsu joun láni disípulugu.

—Ñurügüda jumáña dimí dimí-san.

¹⁵ Ába jadügüni ítara, ába jañúurun súngubei.

¹⁶ Ábati lanügünun Jesúsu seíngü fein lújaburugu jáma bián úduraü, ába laríjin siélun, ába líchuguni eteíngiruni lun Búngiu. Láriñe lagúbachagunun fein lúma úwi, ába líchuguni joun láni disípulugu lun jafánreinjani jádan güriña.

¹⁷ Jóutiña súngubei quimúle, dan le jabúdajanun ígiragutu, buíngüdatiña dúusu faníñe láu.

*Laríñaguni Pédro luágu Jesúsu lan Crístubei
(Mt 16.13-19; Mr 8.27-29)*

¹⁸ Luágu ában wéyu dan le layúmuruña lan Jesúsu lábugua, ñíñanu láni disípulugu díseraü lueí, ába laríñagun joun.

—¿Ída liñásan jarítagn güriña nuágu? ¿Cátanasan, según jagía?

¹⁹ Ába jaríñagun lun.

—Añájein, aríñagutiña luágu Juan lan le abásteragüdejabei amürü, jíbiri, aríñaga Elías, añájeingua aríñagutiña luágu ában lan jádaangiñe binádu profétagu ásaaruti lídaangiñe oúweni amürü.

²⁰ Ábati laríñagun joun.

—Ángi jugúya, ¿cátanagi lídan jarítagn?

Laríñaga Pédro lun.

—Crístu, le louñajabei Búngiu lun lasálbaruniña güriña, amürü.

*Ladímurejan Jesúsu luágu louñwen
(Mt 16.20-28; Mr 8.30-9.1)*

²¹ Ába laríñagun Jesúsu joun láu éregu lun maríñagun jamáni cátei le ni ca un.

²² Ába laríñagun joun.

—Nasúfuriruba sarágu, áu le Wügüri Garaüwarügüti. Janügübadina wügüriña weírigutiña lídan jafíñen juríu, jábutigu fádirigu, jáma arúfudajatiña

lilúrudun Moisés, quei ni cáta. Nafarúaba jilágubei, ábame násaarun lídaangiñe ouweni luágu lürüwan wéyu lúnya nabágaridun.

²³ Lárigiñe, ába laríñagun joun súngubei.

—Le busénti nánigu lan, buléilei cáteiñein lan, awándalei sun luwúyeri asúfuriruni le lúnbei liábin lun, nueígiñe, queísi lanüğüni ában wüğüri lugúruwan, falálana.

²⁴ Ladüga le abúseeruti leséfuragun lúngua ya ubouágu leféridirubei ibágari le magúmuchaditi, ánjein le ánjabei leféridiruni libágari ya ubouágu nueígiñe, libíjubei ibágari le magúmuchaditi siélu.

²⁵ ¿Cági ju lan lun güriğia lagáñeiruni sun le lánina ubouú, leféridireime lubára siélu o lagünrinchaguba lan lúngua?

²⁶ Le anüğüti busíganu nuágu lúma luágu nerérun, áu le Wüğüri Garaüwarüğüti, nibúsigaribadina giñe láu dánme le niábin quei urúei láu luweírigun Nüguchi jáma ánjeligu ja sándubaña.

²⁷ Ninárün naríñaguni jun luágu añájein lan jádaangiñe ja yábaña guetó, mouñwenbaña maríjina jamei larúeijan Búngiu.

Lámuñedagun laríjin Jesúsu

(Mt 17.1-8; Mr 9.2-8)

²⁸ Queíburi wídü wéyu lárigiñe laríñaguni Jesúsu cátei le, ába laweínrun luágun ában wübü ayúmuragua lun Búngiu, barú lumútiña Pédro, Jacóbo, lúma Juan lúmagua.

²⁹ Dan le niján lan Jesúsu ayúmuragua, ába lámuñedagun ligíbu, ába tájarudun lanáangun, ába támiridun.

³⁰ Ábati jasábiragun Moisés lúma Elías ayánuja lúma,

³¹ geyégu líña ában larúgouna weíríti jáu, jayánujaña libüğürü ouweni le lúnbei lasúfuriruni Jesúsu, Jerusalén.

³² Láu sun luweírin lidábu lágu Pédro jáma líbirigu, marúmuguntiña, aríja jamúti luweírigun Jesúsu jáma bián wüğüriña ja lúmabaña.

³³ Dan le adísedeinaña bián wüğüriña jagía luei Jesúsu, ába laríñagun Pédro lun.

—Maésturu, ¡lídan dan awánja lan ya! Adüga wamá ürüwa dibásein ya—ában bun, ában lun Moisés, túma ában lun Elías.

Ibídiñeti lun Pédro ca lan laríñagubei.

³⁴ Súnti niján lan adímureja, ába liábin ában juánriñu ouburaguaña, ába janúfudedagun ladüga jadáriragun jóungua lurágeirugu juánriñu ligía.

³⁵ Ábati jagáambun ában umálali aríñaguti lídaangiñe juánriñu ligía.

—Niraü le jínsiñebei nun le, agáamba jumei le lubeíbei.

³⁶ Lárigiñe ladímurejan umálali ligía, ába jaríjin disípulugu luágu lábugua rügáali lan Jesúsu. Reídeitiña maníñu, maríñagun jamúti cátei le jaríjubei lun ni ában lídan dan ligía.

Lareídaguagüdüni Jesúsu ában irájü gawáguți espíritu wuríbatu

(Mt 17.14-21; Mr 9.14-29)

³⁷ Larúgan, dan le jarárirunbei lueígiñe wübü, sarágu jáña güriğia ñüdüntiña lubároun Jesúsu.

³⁸ Ábati lagúaragun ában wüğüri jádaangiñe láu umálali jéreti, laríñaga.

—Maésturu, fuleísejabubá nun, aríjabeí niraü le ligía rüğüñeíbei,

³⁹ níjein ában espíritu wuríbatu luágu, dan le larüğüdüni, ába lagúaraguagüdüni, ába loúwejan, ába láfurijan jacútaü liyúmulugugiñe. Añáwuriya lumúti, májati lígiruni.

40 Ayúmuraguaadina joun báni disípulugu lun jaságaruni espíritu wuríbati le lueí, siñá jamuti.

41 Ába loúnabun Jesúsu, laríñaga.

—¡Jugúya gürígia maffíneraditiña, wuríbatiña! ¿Átiribeísan dan lun neréderuni júma lubá gayára lan jaffínerun nuágu? ¿Ídame lagúmucha maffíneni le jídaanbei? Barübei biraü ñájoun.

42 Dán yebe le lídin irájü ligía lun, ába lájuchuruni espíritu wuríbati múarugún, ába loúwejugüdüni, ába ladeínjan Jesúsu lun espíritu wuríbati ligía, ába lareídaguagüdüni irájü, ába ledéregeruni lun lúguchi.

43 Ába laweíridun janígi súngubei láu luweírigun Búngiu.

Ladímurejaanya Jesúsu luágu loúnwen
(Mt 17.22-23; Mr 9.30-32)

Sun añája lan láu luweírin janígi láu le ladügübei Jesúsu, ába laríñagun joun láni disípulugu.

44 —Agáamba jumeí cátei le buídu. nedéregerúaba, áu le Wügüri Garaüwarügüti, jájaburugun náganiñu.

45 Úati gunfaráanda jamáni disípulugu le laríñagubei, ladüga darúñu líña jasáminan lun cátei le, áni janúfudetiñati lun jaríñagun lun lun lafúnraanguagüdüni le laríñagubei, joun.

¿Ca weírigutimaabei?
(Mt 18.1-5; Mr 9.33-37)

46 Ábati jagúmeserun disípulugu asígeneja jámagua luágu ca lan weírigutimaabei jádan,

47 quei lasúbudiruni Jesúsu jasáminan, ába lanügün ában irájü lubáduagun,

48 ába laríñagun joun.

—Le erésibiruti ában irájü queísi irájü le lídan níri, resíbi lumútina, le erésibirutina, resíbi lumúti gíñe le oúnajabalina. Le lubeíti ünabugutimaabei jídan, ligía weírigutimaabei.

Le mámabei wágani, wámagiñeñein
(Mr 9.38-40)

49 Ábati laríñagun Juan lun Jesúsu.

—Maésturu, aríjatiwa ában wügüri aságajati espíritugu wuríbatiña lídan bíri, ába wewéridiruni ladüga máma lan ában wádaangiñe.

50 Laríñaga Jesúsu lun.

—Mewéridira jumeí, ladüga le mámabei wágani, wámagiñeñein.

Ladeínjan Jesúsu lun Jacóbo lúma Juan

51 Dan le layárafadun dan lun lanügüniwa Jesúsu siélun, ába ladügüni luweíyasun Jerusaléoun láu anígi.

52 Ába loúnajan loúnagülegu lubá, ába jóudin lídoun ában liraüraü fulásu láni Samária lun jáluajan múna lubá,

53 májatiña Samariána jerésibiruni ladüga jaríjin luágu leíbuga lan Jerusaléoun.

54 Dan le jaríjinbalin Jacóbo lúma Juan luágu mája jamá Samariána jerésibiruni, ába jaríñagun lun.

—Wabúreme, ¿buséntibu lun wamúriajan lun larárirun wátu geméti siéluigiñe lun lagúmunchun jáu queí meja ladügüni proféta Elías?

55 Ábati ladígiragun Jesúsu jawágun, ába ladeínjan joun, laríñaga.

—Ibidiñeti jun luágu wuríba lan cátei le jayúmajabei.

⁵⁶ Máma niábiña, áu le Wügüri Garaüwarügüti, agünrinchaguei jabágari gürígia, niábiña asálbarei.

Ábati jóúdin lídoun ámu liraüraü fulásu.

Já yebe busénbaña jafálaruni Jesúsu

(Mt 8.19-22)

⁵⁷ Dan le luágu jamá úma, ába laríñagun ában wügüri lun Jesúsu.

—Nabúreme, buséntina nafálarunibu le ñíjin lumúti bídin.

⁵⁸ Laríñaga Jesúsu lun.

—Darítiña gasígamu júyu lun jaganoún ñi, gádibu jagía dunúru, ánjein áu le Wügüri Garaüwarügüti, úati ni jalíaba lan nabálachagüdei nichügü.

⁵⁹ Laríñagaya Jesúsu lun ában.

—Falábana.

Laríñaga lun.

—Nabúreme, lárigiñeme loúnwen nóguchi, buná neíme, ábame neíbugun búma.

⁶⁰ Ába loúnabuni Jesúsu.

—Falábana guetó, ígira báña ja jiláñubaña lun cátei le lánina larúeijan Búngiu lun jábununiña jegéburi, ánjein bugúya, beíba apúrichijeí ugánu luáguti larúeijan Búngiu.

⁶¹ Ábayati laríñagun ában lun.

—Nabúreme, buséntina nafálarunibu, neíba yebe ayóuragua joun ja wábiñebaña.

⁶² Laríñaga Jesúsu lun.

—Le íchuguti lújabu luágu awoújagülei, lárigiñe ába laríjin lárigoún, mabuídunti lun lílaname larúeijan Búngiu.

10

Loúnajaniña Jesúsu ürüwa-wein-díisi disípulugu apúrichija

¹ Lárigiñe cátei le, ába lanúadajan Jesúsu ürüwa-wein-díisi jádaangiñe lánigu, ába loúnajaniña lubá, bián bián, lídoun sun ageíraü luma fulásu le lúnbei lídin ñi.

² Laríñaga joun.

—Inárüni, gíbetiña gürígia ja aráanseñabaña lun jagáambuni ugánu luáguti asálbaruni, jagía, ítara jáña queísi nádü le lúnbei lalúbajoúniwa, áni louguatiña ñadágimeintiña. Ligía lúnti lubeí jamúriajan luma Búngiu lun loúnajan ñadágimeintiña jagánaguoun.

³ Jeíba, nouñajañadün quei mudún jádoun anímaalu gáñitiña.

⁴ Manüga jumá ságü júmagua, ni seínsu, ni geídí, meréderagun jugúyame ayánuja ni ca úma luágu úma.

⁵ Dánme le jebélurun tídoun ában múna, busújuma furúmiñe, jaríñagame. “Darángilaü joun tílana múna to.”

⁶ Ánjein añájein lubeí gürígia jínsiñejabutiña lun darángilaü tídan múna tugúya, jerésibirubadün láu ugúndani, jóunbei abúsuruni lánina darángilaü. Ánjein úa jabeí gürígia jínsiñejabutiña lun darángilaü tídan múna tugúya, giríbugüda jumeí abúsuruni.

⁷ Reídei jumá tídan múna tugúya to ñí lubei jerésibirúa, jou jumeíme, gurá le íchugúti jun úouga busíganu, ladüga garíchatí ñadágimeinti lun lafáyeiruaia. Masáansija jumá múna.

⁸ Dánme le jachülürün lídoun ában ageíraü le ñí lumuti jerésibirúa, jóújumei le íchugúti jun,

⁹ areídaguagüda jumáña sánditiña ja ñítiña, jaríñagame joun lílana fulásu ligía. “Subúdigúdawaali luáguti larúeijan Búngiu jun.”

10 Ánjaün achülüra lídoun ában ageíraü le ñí lumuti merésibirúniwa jumá, furíjuma lídoun buri üma, jaríñagame.

11 “Ásta licáliquin jageíra le luágubei wagúdi furú wamuti lun warúfuduni jun luágu magúndan wamá láu jigáburi, áni subúdi jumeí luágu subúdigüdáwaali lan luáguti larúeijan Búngiu jun.”

12 Nariñajare jun luágu lídan lánme luwéyuri lagúseragüdüniña Búngiu gafígountiña, janárimetimaabei jabeichúniwa lílana fulásu le merésibirunbadün sügü láu jabeichún lílana ubúругu le Sodóma.

*Lílana ageíraü buri magáambaditiña
(Mt 11.20-24)*

13 ¡Fugiábu jugúya lílana Corazín! ¡Fugiábu jugúya lílana Betsáida! Ladüga lun jamúga ubúругu lan Tíro o Sidón ladügüwa buri miláguru le adügübei lídan jubúrugute, binárü jamúga lasáansiragua jagáburi lílana, ába jamúga jarúfuduni láu jadáüragun lúdu lúma balígi.

14 Ánjein jugúya, lídaanme luwéyuri agúseruni, weíritimaabei jabeichúniwa sügü jáu gürígia Tírona jáma Sidónna.

15 Amürüti, ubúругu le Capernaúm, ¿jarítaguatibu luágu liñurúaba lan bíri queísi líñun siélu? Larárirawagüdüwaba bíri ünabun queísi lünabun máfiougati.

16 Ába laríñagun Jesúsu joun ürüwa-wein-díisi disípulugu ja loúnajañabaña apúrichija luágu larúeijan Búngiu.

—Le agáambutün, agáamba lumútina, le májati lagáambunün, májati gíñe lagáambunina, áni le májati lagáambunina, májati gíñe lagáambuni Nóguchi le oúnajabalina.

Jagíribudun ürüwa-wein-díisi disípulugu

17 Ába jagíribudun ürüwa-wein-díisi disípulugu jagía lídaangiñe jaweíyasun láu ugúndani, aríñageina jagía.

—Wabúreme, ásta espíritugu wuríbatíña agáamba jamútiwa dan le waságaruniña lídan bíri.

18 Laríñaga Jesúsu joun.

—Ánja, aríja numúti ligáburi leíguadun Máfia siéluñe quei ában labírijanouga.

19 Rújadina ubáfu jun lun jadügüragun jéwe jáma águru, masúfurirunga ni cáta, lúma lun jére lan jubáfu lueí lubáfu Máfia.

20 Láu sun líra, magúndaara jumá luágu jagáambunün espíritugu, gúnda jumá luágu níjein lan jíri bürüwañu tídan lílburun Búngiu siélu.

*Lagúndaarun Jesúsu
(Mt 11.25-27, 13.16-17)*

21 Lídan óra ligía, ába labuínchagüdüni Sífiri Sándu Jesúsu láu ugúndani, ába laríñagun.

—Nóguchi, le Labúremebei siélu lúma múa, iñúragüda numúti bíri, ladüga arámuda báali cátei luáguti barúeijan jaweí chútiña áu jáma furéndeitiña, ába bafúraanguagüdüni joun ja loúguabaña ufúrendeí queísi irájüñü. Ánja, Nóguchi, ladüga ítara líña babúseeruni.

22 ‘Derége láali Nóguchi sun cátei nun. Úati ni ában subúdijabuti cáтана lan lueídügüya Nóguchi, úati gíñe ni ában subúdijabuti cáteiñein lan Nóguchi nueídügüya jáma ja úntiña nabúseera nasúbudiragüdüni.

23 Ábati ladígiragun adímureja jóunrügü láni disípulugu, laríñaga.

—Fuleíseiwatiña ja aríjubalin cátei le jaríjubei jugúya,

24 ladüga nariñajare jun luágu sarágu jáña urúeigu jáma profétagu abúseerutiña yebe meja jaríjini le jaríjubei jugúya guetó, maríjin jamúti, busén jagía yebé meja jagáambuni le jagáambubei guetó, magáambun jamúti.

Jémpulu luáguti Samariána le buídubei

25 Lídan ában guríriguaü, ñíñein ában arúfudajati lilúrudun Moisés, abúseeruti louchaguni Jesúsu, ába lásaarun, ába laríñagun lun.

—Maésturu, ¿cábasan nadüga lun gayára lan nibíjini ibágari magúmuchaditi?

26 Laríñaga Jesúsu lun.

—¿Cáteigi bürüwañubei lídan lilúrudun Moisés? ¿Ída liñágia balíjan ñi?

27 Ába louñabun, laríñaga.

—Jínsiñelá Babúreme Búngiu bun táu sun banígi, táu sun buwáni, láu sun bére, lúma láu sun bisáminan, jínsiñe jagíame bíbirigu bun quei bínsiñegua búngua.

28 Ábati laríñagun Jesúsu lun.

—Oúnabaadibu buídu, ánjein badüga ítara, bibíjubei ibágari magúmuchaditi.

29 Queíti busén lan arúfudajati ligía larúfuduni luágu buídu lan lálügüdajan, ába laríñagun lun Jesúsu.

—¿Cátañagi níbirigubaña?

30 Ábati louñabuni Jesúsu, laríñaga lun.

—Ñíñein ában wügüri arágachuti Jerusaléngiñe lun ubúrugun Jericó, luágu luweíyasun ába járügüdüni jíwerutiña, ába jíwerujani sun le lúmabei ásta lanáangun, buleísei jameí, ába jígiruni jilá mémeeli.

31 Ába lásügürün ában jafádirin juríu lídaangiñe méme üma ligía, dan le laríjinbalin wügüri ligía, mebéresenti láu, ába lasígiruni leíbugun loubáfurugugiñe üma.

32 Sügü ligía ában jádaangiñe ladügawagun Leví ñígiñe, dan gíñe le laríjini wügüri buleíseiwaali ligía, ába gíñe lasígiruni leíbugun loubáfurugugiñe üma, mebéresenga gíñe láu.

33 Ábati lásügürün ában wügüri Samariána aweíyasujati lídaangiñe üma ligía, dan le laríjinbalin, ába lagúdemedagun lun.

34 Ába liábin, ába lagáranijan lun bíti buri le luágubei láu aáli túma diweín, ába lagüraguni. Ába laweínragüdüni luágu lilügün burígü, ába lanügüni tídoun jában chülüdügütiña, ába ladügüni le liyáraati lun.

35 Larúgan, dan le leíbuga lan Samariána ligía, ába láluguchun bián seínsu le denáriu, ába líchuguni lun tabúreme múna, laríñaga lun. “Toúnigibeí wügüri le, ánjabu agástara ámu lueí le níchugubei bun luágu, nafáyeirubei bun dánme le nagíribudun.”

36 Ábati lálügüdüni Jesúsu arúfudajati ligía.

—¿Cáteiti jádaangiñe ürüwa wügüriña ja líbiribeí le ueíbeí líwerujoúa, lídan barítangun?

37 Laríñaga lun.

—Le gudémejabubei lun.

Laríñagati Jesúsu lun.

—Ítaralá gíñe badüga.

Jesúsu jábiñe Márta túma María

38 Ába lasígirun Jesúsu luágu luweíyasun jáma lánigu, ába lachülürün lídoun ában liraüraü fulásu le ñí lubei terésibirei ában würi gíritu Márta, túbiñe.

39 Ñíñoun ában tamúlelua Márta gíritu María, ába tañúurun lubádu lugúdi Jesúsu lun tagáambuni le laríñagubei,

⁴⁰ ánjounti Márta, weíriti teténirun lun tubéresegun. Ába tariñagun Márta lun Jesúsu.

—Nabúreme, ¿mebéresentibusan láu tígirunina namúlelua adúgei sun berésegu nábugua? Aríñagabá tun lun tíderagunina.

⁴¹ Ába loúnabunun Jesúsu, laríñaga tun.

—Márta, bafúuduña luágu sarágu cátei,

⁴² buídurügüti murúsun lun weígin. Anúadaja táali María lubuídun-ágei cátei le lúnbei ladügüniwa, áni úabei ni ában lun lagídaruni tueí.

11

Larúfudajani Jesúsu ayúmuraguni lun Búngiu

(Mt 6.9-15, 7.7-11)

¹ Luágu ában wéyu, layúmuraguña Jesúsu lun Búngiu lídan ában fulásu, dan le lásurun, ába laríñagun ában jádaangiñe láni disípulugu lun.

—Nabúreme, arúfudajabá ayúmuraguni woun quei larúfudajan Juan joun láni disípulugu.

² Laríñaga Jesúsu lun.

—Dánme le jayúmuragun lun Búngiu, jaríñagame ítara.

Wáguchi Búngiu le siélubei, inébewalá bíri.

Nübinlá bidáani lun barúejan ya ubouágu, adügüwalá bugúndan ubouágu quei ladügün bugúndan siélu.

³ Rúboun fein buídurügütu woun lun wéyu le ugúñebei.

⁴ Ferúdunabeí wuríbati le adüga wamáalibeí quei ferúduna wamániña ja adügübaña wuríbati woun.

Mígira báwa lun wáburujan lídoun wuríbani, dísegüdarügü báwa lueí.

⁵ Aríñagati gíñe Jesúsu joun.

—Niján ában jémpulu jun. lídin jamúga ában jádaangiñe lúbiñe ában lumáda amídi áriebe, ába laríñagun lun. “Numáda, furédeibá úrúwa fein nun,

⁶ ladüga sun líña lachülürün ában numáda núbiñoun áni úati ni cáta núma lun níchugun lun.”

⁷ Ába jamúgati loúnabun le ában múnadagiñe, laríñaga jamúga. “Mebéreseja bána, darúnaali nubéneri, áni roúnjadina jáu sun nisáanigu, siñáti násaarun íchiga ni cáta bun.”

⁸ Nariñaguña jun luágu íbini lan jamúga másaarun lan íchigoun lun ladüga lumáda lan, lásaaruña jamúga íchigoun lun lueí lasígirun ebéreseja lun.

⁹ Aríñagatina lubeíti jun. Jamúriaja, ábame líchugun Búngiu jun, jáluaja, ábame jadárirun, jadaúnja luágu béna, ábame lánjunrenchúniwa jun.

¹⁰ Ladüga sun le amúriajati, ibíjati, le áluajati, daríti, le adaúnjati luágu béna, junrénwati lun.

¹¹ ‘¿Gayáraabei funági líchugun ában úguchili jádaangiñe dübü lun liraü dan le lamúriajan fein lúma? ¿o líchugun lan ában jéwe lun dan le lamúriajan úduraü?

¹² ¿o líchugun lan ában águru lun dan le lamúriajan gañeín?

¹³ Gíchigadijadün ligía cátei buíti joun jirájüñü láu sun juríban, igúbumeti líchigei Júguchi Búngiu le siélubei Sífiri Sándu joun ja amúriajati!

Laríñawagún luágu njein lan lubáfu Máfia lúma Jesúsu

(Mt 12.22-30; Mr 3.19-27)

¹⁴ Níñein Jesúsu aságara ában espíritu wuríbati lueí ában wügüri le madímuregüdün láalibeí yebe espíritu ligía, dánti le láfuridunbei espíritu wuríbati

ligía, ába gayára lan ladímurejan meréngaditi ligía. Ába laweíridun janígi gürígia láu cátei le.

¹⁵ Níñanu gíñe, aríñagutiña.

–Láu lubáfu Beelzebú, le Máfia, le jábuti máfianu, laságaja wügüri le espíritugu wuríbatíña.

¹⁶ Jíbiri, lun jóuchaguni, ába jamúriajan miláguru lúma lun larúfuduni luágu lúmagiñe lan Búngiu liábin lubáfu.

¹⁷ Queíti subúdi láani le jarítagubei, ába laríñagun joun.

–Furúmieguarügü arúejani le afánreinraguti lun jageíndagun jámagua, lagünrinchaguba, ában gíñe famíliá fánreinguatiña ladüga wuríbu, jagünrinchaguba gíñe.

¹⁸ Ánjein gíñe níjein lubei fánreinguaü jádan Máfia jáma lánigu, ¿ída lubági ladúrarun lubáfu? Naríñagunbalin le, ladüga jaríñagun luágu láu lan lubáfu Máfia naságaja espíritugu wuríbatíña ja ebélagüdübaña Máfia guánarügü jádoun gürígia,

¹⁹ áni ánjein ítara líña lubei, ¿cági íchugubei ubáfu joun ja jánigu jugúya lun jaságajan espíritugu wuríbatíña, Máfia ódi Búngiu? Láu líra, jagía guánarügü arúfuda jamúti luágu bulíeigua jumá.

²⁰ Le inárünibei, láu lubáfu Búngiu naságaja espíritugu wuríbatíña, áni arúfuda lumúti líra luágu chülújali lan larúejan Búngiu lídoun fulásu le.

²¹ ‘Ába wügüri jéreti, dan le aráanseñu lan, toúnigi lúban buídu, sun le lúbiñebei choúruti.

²² Ánjein ñübin ában jéretimaati luei ába lásiiraguni, lagídaruboun sun lárumate to uáguboun leménigida luei, ábame lanügüni le labúseerun, ába lafánreinraguni jáma lumádagu.

²³ ‘Le mámabei númagiñe, náganiñein, le míderagun lumútina, güríngua lumúti le nadügübei.

Espíritu wuríbatí le agíribudúbei
(Mt 12.43-45)

²⁴ Ába laríñagun Jesúsu.

–Dan le láfuridun ában espíritu wuríbatí lídaangiñe ában gürígia, eíbugañajadügü líña lídan buri fulásu mábeiti áluaja leméraagun, dánti le madári láani, ába laríñagun lúnguarügü. “Nagíribudayá tídoun núban to nígiñe lubei náfurida.”

²⁵ Dánti le lagíribudun, ába ladáriruni gürígia buga ligía quei ában múna to buídawaru, aráanserúa.

²⁶ Ábati lídin, ába liábin jáu sédü espíritugu wuríbatimaatiña luei, ába jebélurun agánawa lídan gürígia ligía, wuríbatimaajaliti le gádaanbalin wügüri ligía luei buga furúmiñe.

Ugúndani le tímatimaati

²⁷ Dan le niján lubei Jesúsu aríñagei cátei le, ába tagúaragun ában würi jádaangiñe gürígia, taríñaga.

–¡Fuleiseiwatu jiñáru to agúriajabalibu, fuleiseiwatu to átagüdübalibu!

²⁸ Ába laríñagun Jesúsu.

–¡Fuleiseiwatimaatiña ja agáambubalin le lubei Búngiu áni abájüda jamei!

Amúriajatiña gürígia wuríbatíña miláguru lúma Jesúsu
(Mt 12.38-42; Mr 8.12)

²⁹ Añája méme gürígia oúndaragua geyégu láu Jesúsu, ába lagúmeserun adímureja, laríñaga.

–Wuríbatíña gürígia ja lánina dan le, áni jamúriaja miláguru núma lun narúfuduni luágu Búngiu lan oúnajabalina, wel, míchugúnbei ámu seíni joun lueí le luáguti meja proféta Jonás.

³⁰ Ítara queí meja le asúseredubei lun Jonás ában seíni joun ja aganoúbaña Nínive luágu Búngiu lan oúnajabalin, ítara lúba gíñe le lúnbei lasúseredun nun, áu le Wügüri Garaüwarügüti, ligíaba ában seíni joun gürígia ja lánina dan le luágu Búngiu lan oúnajabalina.

³¹ Dánme le lidáani agúseruni, dánme le lagúseragüdüniña Búngiu gürígia ja lánina dan le, ábame tásaarun lurúeite Súru lun tasíadiruniña, ladüga tugúya, ñübintu lídaangiñe lidíse-ágei ubouú lun tagáambuni lichú láu Salomón, áu, weírigutimaatina sügü láu Salomón áni májatün jagáambunina.

³² Lídan mémeme agúseruni ligía, ábame gíñe jásaarun já meja aganoúbaña ubúrugü Nínive, ábame jasíadiruniña ja lánina dan le, ladüga sáansiguati jagáburi Nínivena lárigiñe lapúrichijani Jonás ugánu le láni Búngiu joun, áni áu ában le weíriguti sügü láu Jonás, áni májatün lun jagáambunina.

Lilámpun úgubu
(Mt 5.15, 6.22-23)

Ába lasígirun Jesúsu aríñaga.

³³ –Úati ébeduti ában lámpu líchigei lídan fulásu arámudaguati, ni tábugiñe ában gáfu, íñuba líchigei lun larúgoungadun joun ja ebélurutiña.

³⁴ Ítara líña águu quei ában lámpu lun úgubu, ánjein buídu lubei bágu, aríja ligía luágun cátei lánina Búngiu, camá jamuga jarúgoungabei gíñe láu sun búgubu, áni buídubei gíñe sun bigáburi. Ánjein sándi lubei bágu, aríja ligía luágun cátei lánina ubouú, camá jamuga lídaanbei lubúriga sun búgubu, wuríbabei gíñe bigáburi.

³⁵ Toúnigibá lun mabúrigadun lan bilámpun.

³⁶ Ánjein jarúgounga lubei láu sun búgubu, úaga ni murúsun lubúriga, baríjubei sun cátei furáangu quei dan le durúngu líña lan lámpu báu.

Líchugun Jesúsu jadúnrun fariséogu jáma arúfudajatiña lilúrudun Moisés
(Mt 23.1-36; Mr 12.38-40; Lc 20.45-47)

³⁷ Dan le lagúmuchunbei ladímurejan Jesúsu, ába lamísurajani ában fariséo eíga lúbiñe. Ába lebélorun Jesúsu, ába lañúurun luágu dábula.

³⁸ Ába laweíridun lanígi fariséo ligía láu magúnfulirun lan Jesúsu láu igáburi le lánina lachibún újabu lubá eígini.

³⁹ Ába laríñagun Wabúreme Jesúsu lun.

–Jugúya fariséogu ragá jumuti wéru lúma asíedu bougudigiñe libíti, múnadagiñe jibíti, wíyetün, buin jíña láu luweínamu águu lúma sarágu luwúyeri wuríbani.

⁴⁰ ¡Deré tagáambun jugúya le! ¿Ibídíñeti jun luágu le lan adügübalin le bougudigiñebei, ligía lan gíñe adügübalin le múnadagiñebei?

⁴¹ Jarúma jumá múnadagiñe jibíti láu jíchugun joun gudémetiña, ítara lúba jarúma jumá gíñe bougudigiñe jibíti.

⁴² ‘¡Fugiábugu jugúya fariséogu! Adügatün dísi fánreinti láu jíduru le ménta, rúda, lúma ámu luwúyeri nádü lun jíchugun ában fánreinti lun Búngiu, áni madügüntün gásu láu ísuruni lúma línsiñejabu Búngiu. Ligía lúnbei jadügüni, mígirunga jumeíme jadügüni le ában.

⁴³ ‘¡Fugiábugu jugúya fariséogu! Buséntün járügüdüni ubáraü le jabára ja weírigutimaabaña tídan jíligilisin, busén jugúya lun labúsurún jun láu sarágu inébesi úmada.

⁴⁴ ‘Fugiábugu jugúya fariséogu, biángua tigíbul, ladüga ítara jíña quei umúajaü le marijinti, sügü jagía gürígia ligíbuagugiñe ibídiñoun joun.

⁴⁵ Ábati loúnabun ában jádaangiñe arúfudajatiña lilúrudun Moisés, laríñaga.
—Maésturu, banábaguñadiwa gíñetia dan le baríñaguni le.

⁴⁶ Ába laríñagun Jesúsu.

—¡Fugiábugu gíñe jugúya, arúfudajatiña lilúrudun Moisés! Jíchigei lilúrudun Búngiu queişi ában anüğüni jürüti joun ámu, áni jugúya, májatün janüğüni ni murúsun lídaangiñe.

⁴⁷ ‘Fugiábugu jugúya!, ladüga rújumuti dübü arítaguagüleime luágu jamúaja profétagu já meja jáfaragubaña binádu jagübürigu.

⁴⁸ Láu líra, arúfuda jumúti luágu gúnda jumá láu le jadüğübei binádu jagübürigu, jagía áfaragubaliña, jugúya wéndegüda jumúti jamúaja.

⁴⁹ ‘Ligía laríñagunbei meja Búngiu láu lichú láu. “Noúnajaba profétagu jáma apóstolugu joun, ábame jáfaraguniña jíbiri jilágubei, eíbaaja jamáñame jíbiri.”

⁵⁰ Ligía lagúseragüdübaña lubeí Búngiu gürígia ja lánina dan le luágu játa profétagu ja áfarawagübaña lúmagiñe ladüğüni ubou,

⁵¹ lúmagiñe líta Abél lúmoun líta Zacarías le jáfarubei labádinagua latárü túma témpulu. Ligía naríñagunbei jun luágu lagúseragüdübaña lan Búngiu gürígia ja lánina dan le luágu jóüwegun profétagu.

⁵² ‘Fugiábugu jugúya arúfudajatiña lilúrudun Moisés!, ladüga ragü jumaali ligélen lubéneri subúdi, mebélurun jíña, mígirun jugúya lun jebélurun ja busénbaña jebélurun.

⁵³ Dan le laríñagunbalin Jesúsu cátei lé buri joun arúfudajatiña lilúrudun Moisés jáma fariséogu, ába jagáñidun lúma, lárigiñe láfuridun lúbiñegiñe fariséo ligía, ába jagúmeserun ebéresejei láu sarágu buri álügüdjani

⁵⁴ lun jaríjin ánjaña adárira lidúnrun.

12

Larúfudajan Jesúsu luágu mabuídun lan biángua lan igíbu

¹ Ába jóúndaragun sarágu mílu gürígia, gíbetiña darí lun jachúinragun jóúngua. Ába lagúmeserun Jesúsu aríñaga jóúntima láni disípulugu.

—Toúnigi jumátia jaweí fariséogu, ítara líña jagáburi quei ísi—biánguañein jagíbu.

² Úati ni cáta lábugiñeti lubúriga lun mafúnraangudunbei lan, úa ni cáta arámudaguati lun masúbudirúnwabei lan.

³ Ítara líña lubeíti, sun le jaríñagubei lábugiñe lubúriga, lagaambúaba lídan larúgounga, le jaríñagubei lanágangiñe béna, lagúarajoúba tábulugugiñe múna.

Ca lan ueí lúnbei janúfudewa lan

(Mt 10.28-31)

⁴ ‘Naríñajare jun, numádagu, moún lumuti janúfudedun jaweí gürígia ja gabáfubaña lun jáfarunün jilágubei, lárigiñe líra siñá jadüğüni ámu cátei jun.

⁵ Naríñagaali jun ca lan ueí lúnbei janúfudedun. Janúfude jumá lueí Búngiu le gabáfugilibei lun loúnajanun juwáni máfiougatin lárigiñe lagídaruni jibágari. Lueílá janúfudeda.

⁶ ‘¿Ma alúgurúatiña seíngü dunúru luágu bián gáwanün? Láu sun mebégi jamá sarágu, mabúlieidunti Búngiu ni ában jádaangiñe.

⁷ Ánjeinti jugúya, íbini ídiburi le jábulugubei abájüda láali Búngiu ában ában. Manúfude jumá lubeíti, gebégitün sügü jáu sarágu dunúru ligíbugiñe Búngiu, áni loúnigiruñádün.

*Ja meyéedagunbaña luágu Jesúsu jagíbugiñe gürígia
(Mt 10.32-33, 12.32, 10.19-20)*

⁸ ‘Nariñajare jun luágu sun lan ja aríñagubaña jagíbugiñe gürígia luágu nánigu jamá, nariñaguba gíñe luágu nánigu jamá jagíbugiñe láni Búngiu ánjeligu.

⁹ Ánjaña ja aríñagubaña jagíbugiñe gürígia luágu máma jamá nánigu, nariñaguba gíñe jagíbugiñe láni Búngiu ánjeligu luágu máma jamá nánigu.

¹⁰ ‘Furúmieguarügü le aríñaguti cátei wuríbati nuágu, áu le Wügüri Garaüwarügüti, gayáraati ferúdunawa lan, ánjein le anábaguti Sífiri Sándu, siñáti ferúdunawa lan.

¹¹ ‘Dánme le janügün ligíbugiñoun lúru lu jagúserun, o jagíbugiñoun lan tábutigu jalígilisin juríu, madíjerida jumá luágu cába lan jounaba o cába lan jaríñaga,

¹² dánme le lachülürün óra lun jadímurejan, larúfudubei Sífiri Sándu le lúnbei jaríñaguni jun.

Ewéridjani lueí leténirún sarágu lun irísini

¹³ Ába laríñagun ában jádaangiñe gürígia jagía lun Jesúsu.

—Maésturu, aríñagabá lun níbugaña lun líchuguni nufánran nun lídaangiñe alágan.

¹⁴ Laríñaga Jesúsu lun.

—¿Cági íchubalina quei agúseragüdüti o quei afánreinjati jídan?

¹⁵ Aríñagati gíñe ítara.

—Toúnigigua jumá júngua lueí luweínamu águu, ladüga máma lueígiñe líbe lúmati gürígia labágarida sarágu dan.

¹⁶ Ábati líchuguni jémpulu le joun, laríñaga.

—Ñíñein méja ában wügüri rísiti, ába líchugun lichári alúbajoúni buíti.

¹⁷ Ábati laríñagun rísiti le lúnguarügü. “¿Cábasán funa nadüga? Ibídiñeti nun jalíaba lan nareídei sun le nalúbajabei.”

¹⁸ Ába lasáminarun, ába laríñagun. “Subúdi náali cába lan nadüga, nagünrinchaguaru sun náni lágei líla nádü, ábame nadügün ámu weínamutimaatu, ábame nareíduni nalúbajan lúma sun le númabei tídan.

¹⁹ Ábamei nariñagun núniwagua. Buíti dan bun, níjein sarágu cátei areídañu búma lun sarágu dan, eméraaguabá, jóuba, gurába, gúndaabá.”

²⁰ Laríñaga Búngiu lun. “Wügüri deré tagáambun, bouwe áriebe le, sun le búmabei areídañu, ¿cábasan un lerédera?”

²¹ Ítara líña lasúseredun lun gürígia le adámuridaguagüdüti irísini lánina ubou le lúngua, ába leréderun gudémeñu lídan cátei le luáguti Búngiu, líña Jesúsu.

*Toúnigi lumútiña Búngiu lirájüñü
(Mt 6.25-34)*

²² Ába laríñagun Jesúsu joun láni disípulugu.

—Aríñagatina lubeíti jun. Madíjerida jumá luágu cába lan le lúnbei jeígini lun jawínwandun, ni tuágu anáanguni to lúnboun jadáürünun.

²³ Gebégitimaati íbágarí sügü láu eígini, gebégi úgubu sügü táu anáanguni.

²⁴ Aríja jumá joun dunúru. mábunaguntiña, malúbajan, mágei ligía jeígin, láu sun líra, jóügüda lumútiña Búngiu. ¡Gebégitimaatün sügü jáu dunúru!

²⁵ Úati ni ában jídaangiñe gayáraati líchugun lánwoun libágarí láu sun luweírín lidíjeri luágu.

²⁶ Ánjein lubeíti siñá lubei jadügüni le míbebei, ¿ca uágu jadíjerida luágu buri líbiri cátei?

27 'Aríja jumá ída líña lan laboúchun buri fulúri. mawádigimariti, májüchagun ligía lanáangun, áni láu sun líra, quei naríñaguni jun, ni urúei Salomón láu sun luwéndegun, mawéndedunti quei ában fulúri.

28 Ánjeinti ítara líña lubeí ladáüraguagüdüni Búngiu jíduru, le níjeinbei ugúñe, jarúga lagudúña, ¡ladáüraguagüdatimabadün, loúgua tafíñen jugúya le!

29 Madíjerida jumá lubeíti luágu ni cáta, ni luágu cába lan jeíga, ni luágu cába lan játa.

30 Ladüga lirájüñü uboú le, lárigiñanu buri cátei le, ánjein jugúya, níjein ában Jüguchi le subúdíjabúbei lun sun jemégeirun.

31 Áluaja jumá lun jesériwidun lun furúmiñe, ábame líchuguni sun le jemégeirubei jun.

*Írisini siélu
(Mt 6.19-21)*

32 'Manúfude jumá, nirájüñü, láu sun míbe jumá, gúndaati Búngiu lun líchugun ában ubáraü jun lídan larúeijan.

33 Alúgura jumeí le júmati, jíhigeime lebégi joun gudémetiña, láu líra, jadügüñoun lágei seínsu to maweíyadaditu, írisini siélu le magúmuchaditi, le ñí lubei siñá lan jebélurun jíwerutiña anúgei jirísín, úa jagía jamútiri ñi lun jeígini.

34 Naríñagubalin le jun ladüga le ñí lumuti jirísín, ñíñoun gíñe janígi.

Aráanseñu jumá, agúrabaja

35 'Aráanseñu jumá lubá nagíribudun siélugiñe, durúngu jilámpun.

36 Ítara jumá quei músu ja agúrabañubaña liábin jayúbudiri lídaangiñe ában maríei lun jadáraruni béna lubá, óra lagúarun.

37 Buídubei dan joun músu ja ladárirubaña jayúbudiri agágudúañu dan le lachülürün, ninárün jáu, iyúbudiri meme ligía laráanseruba, ábame lañúuragüdüniña luágu dábulá, ábame lesériwiduni jeígin joun.

38 Íbini amídi áriebu lan lachülüra o lubá lan larúgan, ánjaña ladárra agágudúañu, buídubei dan joun músu jagía.

39 Subúdi jumeí luágu lun lan jamúga subúdi láni tabúreme múna cába lan óra lachülüra jíweruti íweruja, leréderuña jamúga agágudúañu, mígirunti jamúga lun tadárarún lúban lun líwerujoún lumégegún.

40 Jugúya, aráanseñu jumá gíñe, ladüga lídaanme magáradajan jumá ligíame nagíribudun, áu le Wügúri Garaüwarügüti, uboúagun.

*Músu le úarabei, lúma le múaraanbei
(Mt 24.45-51)*

41 Ábati lálügüdüni Pédro Jesúsú, laríñaga lun.

—Nabúreme, ¿woúnrügü bíchigei jémpulu le ódi joun súngubei?

42 Laríñaga Wabúreme Jesúsú lun.

—Lun furúmieguarügü oúnigiruti úarati, gunfaráanda ligía, le lígirubei liyúbudiri lun laríjin jáu tílana lúban, lun leígagüdüniña lídan dan.

43 Buídubei dan lun músu le ladárirubei liyúbudiri agúnfulira láu luwádigimari dan le lachülürün.

44 Ninárün jáu, luágu líchugubei lan liyúbudiri lun ligía lan aríja láu sun le libíjubei.

45 Ánjein arítagua músu ligía luágu lügili lan liábin liyúbudiri, ábame lagúmeserun ouserañá jíbiri músu ja lábugiñebaña laríaajan wuríba, leréderame eíga, áta, abácharuada,

⁴⁶ ligíame liábin liyúbudiri lídan magáradajan lan, lídan ában óra le ibídiñeti lun. Ábame líchuguni luweírin-ágei abeíchuni luágu, lasíadireime lun lasúfuriruni le jasúfurirubei ja múaraanbaña, máfiougati.

⁴⁷ ‘Músu le subúdijabúbei lun ca lan labúseerubei liyúbudiri áni maráanserunti, mabájüdünleí, labeichúba sarágu.

⁴⁸ Ánjeinti músu le ibídiñeti lun, ába ladügün cátei lé buri lúnti labeichún lueígiñe, maweíribei labeichún. Le únti líchugúa gíbeti, gíbebei amúriajoúti lúmagiñe, le gíbeti ígirúti lábugiñe laríaaan, gíbetimaabei amúriajoúti lúmagiñe.

Jesúsu lébunabei fánreinguaü

(Mt 10.34-36)

⁴⁹ ‘Láu niábin ubouágun, ñíbei fánreinguaü ubouágu queísi wátu geméti. ¡Busénjadina jamúga durúnguaali lan wátu ligía!

⁵⁰ Lúnti nasúfurirun le gumúti, ¡meménija nanígi lagúmuchun!

⁵¹ ¿Jarítaguatúnsan luágu barú nán meja darángilaü númagua dan le niábinbei ubouágun? Manügütina darángilaü, fánreinguaü nanügübei. Jafánreinraguba ja mafíñebaña nuágu jáma ja afíñebaña nuágu,

⁵² lúmagiñe guetó, seíngügua tídan ában múna, jafánreinraguba úrüwa jaweí biáma, biáma jaweí úrüwa, nueígiñe.

⁵³ Lagáraguba úguchili luágun liraü, isáani luágun úguchili, úguchuru tuágun tiraü, isáani tuágun túguchu, ímenidi tuágun ágürü, ágürü tuágun ímenidi.

Liseíni buri dan

(Mt 16.1-4; Mr 8.11-13)

⁵⁴ Aríñagati gíñe Jesúsu joun gürígia ítara.

—Dan le jaríjin labúrigadun siélu, ába jaríñagun luágu lájuya lan júya, áni ligía asúsereda.

⁵⁵ Dánti le láfurun garábali lueígiñe suédi, ába jaríñagun luágu lárougada lan, áni ligía asúsereda.

⁵⁶ ¡Biángua tigíbu jugúya le! Subúdi jumúti luáguti ligáburi lasáansiragun dan siélu lúma múarugu, ¿ca uágu ibídiñe lubeí luáguti ligáburi dan le gádaanbalün jun?

Jóucha jumá lun lídan jumá dan jáma jáganiñu

(Mt 5.25-26)

⁵⁷ ‘¿Ca uágu siñá lubei jasúbudiruni cátei le úraguabei júngua?

⁵⁸ Ánjein agúaragüda ában gürígia buágu, ába bídin lúma ligíbugiñe lúruudu, jóuchabá baráanseragun búngua lúma luágu úma lubáragiñe jachülürün, manügün lámugabu ligíbugiñoun agúseragüdüti, lueí ledéregerunibu agúseragüdüti lun polisía, ábame ládarunibu furísunrugun.

⁵⁹ Naríñajare bun luágu máfuridunbadibu lan ñígiñe darí bafáyeiruni lagúmujoün bigáwanün.

13

Ca lan uágu lúnti lubeí lasáansirún igáburi

¹ Lídoun méja dan ligía, ába jayábin gürígia abájüdagua lun Jesúsu jawágu wügüríña Galiléana ja láfaragubaña Piláto úara jáma anímaalu ja áfarawagúbaña lun adágaragüdüni lun Búngiu.

² Ába laríñagun Jesúsu joun.

—¿Jarítaguatúnsan luágu ladüga lan luweírin jafígoun Galiléana jagía sügü jáu ja jíbiri lílana jageíra lasúseredunbei le joun?

³ Máma lueígiñe líra, láu sun líra, naríñajare jun luágu ánjein lan masáansirun jumá jigáburi, jóüweguba gíñe sun jugúya.

⁴ Ángi díisi-wídü jagüra ja ouwegubaña dan le láburujanbei wáyelesi le Siloébei jawágun — ¿jarítaguatün luágu weíritima lan jadúnrun sügü jáu ja jíbiri ja aganoúbaña Jerusalén?

⁵ Mára líña gíñe, láu sun líra, nariñajare jun luágu ánjein lan masáansirun jumá jigáburu, jóuweguba gíñe sun jugúya.

Jémpulu tuáguti tídibu ígo to múnboun

⁶ Ábati labájüdaguni Jesúsu jémpulu le joun, lariñaga.

—Ñíñein ában wügüri, ganádiriti ában tídibu wéwe to ígo, ába lídin aríja ánjein gín tubei, madáriti ni cáta tuágu.

⁷ Ábati lariñagun lun le oúnigirubalin ichári. “Aríjabásan, úrúwaali irúmu gabügürügua niábin áluaja ígo tuágu ídibu to, madáritina. Chaünboun, ¿cába uágu terédera ñi luágu ni cáta?”

⁸ Ába louñabuni le oúnigirubalin ichári, ába lariñagun. “Niyúbudiri, ígirayaboún irúmu le, nañúludagüdalí múa táu, awoúja áume táu.

⁹ Fágua tagíindun ítara, ánjoun magíindun, ábame tánychugún.”

Lareídaguagüdünnun Jesúsu ában würi sebúti tanágan lídan wéyu le eméraaguagülei

¹⁰ Luágu ában wéyu le eméraaguagülei, ñíñein Jesúsu arúfudaja tídan jalígílin juríu,

¹¹ ñíñounti ában würi, díisi-wídü irúmu táu láu ában espíritu wuríbati tuágu, ígira láaru espíritu ligía lemúñu, siñá tásururun ni murúsun.

¹² Dan le lariñinbarun Jesúsu, ába lagúarun tun, ába lariñaga tun.

—Würi, areídaguadibu.

¹³ Ábati líchuguni lújabu tuágu, lídan óra ligía ába tásururun, ába tagúmeserun adímureja buíti luágu Búngiu.

¹⁴ Ábati lagañidun tábuti ligílini ladüga lareídaguagüdünnun Jesúsu lídan wéyu le eméraaguagülei, ába lariñagun joun gürígia ja ñíbaña.

—Níjein sísi wéyu lídan dimáasu lun gayára lan luwádigimaríniwa, lídan sísi wéyu ligía lun jiábin lun lagáranijoún jun, máma lídan wéyu le eméraaguagülei.

¹⁵ Ába lariñagun Wabúreme Jesúsu lun.

—¿Bíangua tigíbu jugúya le!, ¿ma farára jumúti sun jugúya jilügün bágasu o jilügün lan burígü lun janügün áta dúna lídan wéyu le eméraaguagülei?

¹⁶ Würi to, linébaanfan Abrahám, ragúlaaru Máfia láu sándi, díisi-wídü irúmu táu láu, ¿moún lumuti funági yebe lun tareídawaguagüdünnun lídan wéyu le eméraaguagülei?

¹⁷ Dan le lariñagunbalin Jesúsu cátei le, ába nibúsigarigua jamá sun láganiñu, ánjaña sun jíbiri gürígia, gúndaatiña láu cátei lé buri weíriguti le ladügübei Jesúsu.

Jémpulu luáguti tíla mostása

(Mt 13.31-32; Mr 4.30-32)

¹⁸ Ábati lariñagun Jesúsu.

—¿Ída líña ligáburu laruéijan Búngiu? ¿ca cátei úmounbei gayára lan níchuguni?

¹⁹ Ítara líña quei ában liraúraü tíla mostása le lábunubei ában wügüri lichárirugu, ába labóuchun, ába laweíridun darí lun liábin lun ábanme lan tídibu wéwe weíriti, darí lun jadügün dunúru jádibu luágu tuburébu.

Jémpulu luáguti ísi

(Mt 13.33)

²⁰ Ábaya lariñagun Jesúsu.

—¿Ca cátei úmounbei gayára lan níchuguni larúeijan Búngiu?

²¹ Ítara líña quei ísi le tíchugubei ában wúri tídoun úrúwa líburu fulúaarú, ába terésirun súngubei.

*Béna le bürüraübei
(Mt 7.13-14, 21-23)*

²² Ába lasígiruni Jesúsu luweíyasun Jerusaléoun, arúfudajeina ligía lídan buri sun aüdü lúma lirájüñü fulásu le ídaangiñebei lásügüra.

²³ Ába laríñagun ában wügüri lun Jesúsu.

—Nabúreme, míbetiñásan ja lúnbaña jasálbarun?

Ába loúnabun Jesúsu, ába laríñagun.

²⁴ —Bürüraüti lubéneri siélu, jóucha jumá lun gayáraabei lan jebélurun lídaangiñe, ladüga quei nariñaguni jun, sarágujaba busúentiña jebélurun, siñábei.

²⁵ Lárigiñe ladáuruni tabúreme múna lubéneri, jugúya le bougudibei jadaünjaba luágu béna, jariñagame. “Wabúreme, darába béna wabá.” Ábame loúnabunün, lariñagame jun. “Ibídinetün nun, ibídiñe gíñe nun jalána jumá.”

²⁶ Ábameti jagúmeserun aríñaga. “Jóujadiwa, gurá wagía búma, arúfudaja amürü woun úmadarugu.”

²⁷ Ábameti loúnabunün, lariñagame. “Aríñaga náali jun luágu ibídiñe jumá nun, ibídiñe nun jalána jumá. Díse jumá nueí, sun jugúya le adügübei wuríbani.”

²⁸ Ligíaba jayájuaan, acünrijame jári dánme jaríjini Abrahám, Isáac, lúma Jacób, jáma jíbiri profétagu lídan larúeijan Búngiu, jugúyame aságarúa bougudin.

²⁹ Jayábiba gürígia lueígiñe oubáü le ñígiñe lubeí láfuara wéyu lúma lueígiñe le ñígiñe lubeí lálüda, lueígiñe núru lúma lueígiñe suédi lun jañúurun eíga lídan larúeijan Búngiu.

³⁰ Ñíbañati jádaangiñe ja agúmujoúnibaña guetó, jagíaba furúmiñetiña, jámeti furúmiñetiña guetó, jagíaba agúmujoúni.

*Layájun Jesúsu jawágu lílana Jerusalén
(Mt 23.37-39)*

³¹ Lídan méme wéyu ligía, ába jayábin fariséogu, ába jariñagun lun Jesúsu.

—Beíba yágiñe, ladüga busénti Heródes láfarunibu jilágubei.

³² Ába laríñagun joun.

—Jeíba, jariñagame lun wügüri bíbuti ligía. “Ugúñe lúma jarúga naságajan espíritu wuriñetiña jádaangiñe gürígia, areídaguagüda áu sánditiña, lárigiñe jarúga, lásurun nuwádigimari.

³³ Lúnti nasígiruni nuweíyasun ugúñe, jarúga, lúma lárigiñe jarúga, ladüga máma lúnti lafarúniwa ában proféta jilágubei bougudi lueí Jerusalén.

³⁴ Ába layájun Jesúsu jawágu lílana Jerusalén ítara.

—¡O jugúya Jerusalénna! Áfaragua jumáaña profétagu, chügua jugúya dübü jawágun ja loúnajabaña Búngiu láu ugánu buíti jun! ¡Sarágu weíyaasu nálugun natoúnigirunün quei tatoúnigiruniña gáyu tirájüñü lábugiñe tarúna, májatün!

³⁵ Ígira láadün Búngiu, áni nariñajare jun luágu maríjindügüya jumáadina lan daríme lachülürün dan lun jariñagun. “Biníwati le ñübinbei lídan líri Wabúreme.”

14

Lareídaguagüdün Jesúsu ában wügüri lújali larúna lúma liyáda

¹ Luágu ában wéyu le eméraaguagülei, ába lídin Jesúsu eíga lúbiñe ában fariséo weíriguti, sun ja ñíbaña, jaríaguñein Jesúsu.

² Ñíñein gíñe ában wügüri láu sándi le ílu,

³ ábati lálügüdüniña Jesúsu arúfudajatiña lilúrudun Moisés jáma fariséogu, laríñaga joun.

—¿Gayáraati lareídawaguágüdün ában wügüri lídan wéyu le eméraaguagülei ódi siñáti?

⁴ Ába jeréderun maníñu. Ábati lanügüni Jesúsu sánditi ligía, ába lareídaguagüdüni, ába laríñagun lun lun lídin.

⁵ Ába laríñagun joun fariséogu.

—Furúmiegurügü jídaangiñe, ánjein eíguada lilügün bágasu o lilügün lan burígü lídoun ában wélu lídan wéyu le eméraaguagülei, laságarubei ñígiñe furése.

⁶ Maríñagun jáña ni cáta.

Ja amísurajoúbaña lídoun maríei

⁷ Dan le laríjini Jesúsu janúadajani amísurajoútiña ubáraü buri le jounbei ja weírigubaña, ába laríñagun joun.

⁸ —Dánme le bamísurajoún lídoun ában fédu lánina maríei, máluajabei lubuídun-ágei ubáraü, ñübin liñeín ábanya amísurajoúti weírigutimáati bueí,

⁹ ábame liábin le amísurajabalün, laríñagame bun. “Rúbei bubára lun wügüri le.” Ábamei bídin láu busíganu añúura lídan lünabun-ágei ubáraü.

¹⁰ Dánme le bamísurajoún lídoun ában fédu, ñurúba lídan lünabun-ágei ubáraü, lun dánme lan le liábin le amísurajabalibu, laríñagame bun. “Numáda, sügüba lídoun ában ubáraü weírigutimaati.” Ítara lúba berésibirun inébesei jagíbugiñe sun ja ñúnbaña luágu dábula.

¹¹ Le anáanguti lúngua weíri, lünabudúba, le ünabuti lanáangun lúngua, weírubei lanügün.

¹² Ariñagati gíñe lun wügüri le amísurajabalin.

—Dánme le bíchugun ában adíneruni o fédu, mamísuraja báña bumádagu, ni bamúleno, ni bíbugañanu, ni jíbiri bidújeñu, ni bubésinanigu ja rísitiña, ladüga jamísurajabadibu gíñe, bibíjubati bafáyeiruaja.

¹³ Dánme le badügün fédu, amísuraja báña gudémetiña, siñáguatiña úngua, danímaatiña, maríjintiña.

¹⁴ Ábame gúnda ban, ladüga siñáti jafáyeirunibu, bibíjubeiti bafáyeiruaja lídaanme le jásaarun ja richáguabaña ligíbugiñe Búngiu lídaangiñe ouweni.

Jémpulu luáguti oúnwenbun adíneruni

¹⁵ Dan le lagáambunbalin ában jádaangiñe ja ñúnbaña luágu dábula cátei le, ába laríñagun lun Jesúsu.

—Gúndaabaña gürígia ja eígibaña lídan larúeijan Búngiu.

¹⁶ Ábati laríñagun Jesúsu lun.

—Ñíñein ában wügüri, íchuguti ában oúnwenbun adíneruni, ába loúnajan amísuraja sarágu gürígia.

¹⁷ Óra lun adíneruni, aba loúnajani lumúsun aríñaga joun amísurajoútiña. “Queímoun, aráanseeli sun cátei.”

¹⁸ Súngubei, ába jaríñagun luágu siñá lan jóudin. Laríñaga furúmiñeti. “Sun líña nagáñijan ában fulásu, mósu nídin aríjei, ferúduna bána, siñáti nídin.”

¹⁹ Laríñaga ában. “Agáñijaadina seíngü féru bágasu lánina wadágimanu, neíbuga ouchaña, adügabá fuleísei nun, ferúduna bána, siñáti nídin.”

²⁰ Laríñagaya ában. “Sun líña namárieidun, ligía siñá lubei nídin.”

21 Dan le lagíribudun músu, ába labájüdaguni sun cátei le lun liyúbudiri. Ábati lagáñidun liyúbudiri, ába lariñagun lun músu. “Beíba lídan sun üma le ubúrugubei, banügañame gudémetiña, siñáguatiña úngua, danímaatiña, jáma maríjintiña.”

22 Lárigiñe ladügüni, ába lariñagun músu lun liyúbudiri. “Nabúreme, adüga náali le bubeíbei nun, níjein mémegua ubáraü.”

23 Ábati lariñagun iyúbudiri lun músu ligía. “Beíba lídan sun üma boúgudin lueí ubúrugü, lúma sun fulásu geyégua láu, ábame bafósuruniña sun ja badárirun lun jayábin lídoun nufédun, buin támuga núban.

24 Ladüga naríñajare jun luágu úabei lan ni ában jádaangiñe ja namísurajabaña eígiti lídan nadíneragüdün.”

Lúnti lígirúniwa sun cátei lun lánibei lan Crístu

25 Sarágu jáña gürígia afálaruti Jesúsu, ába lagáraragun, ába lariñagun joun.

26 —Siñáti nánigubei lan le jínsiñejabutimaati lun lúguchi, o lúguchu, o lúmari, o lisáanigu, o líbugañanu jáma lamúlenu, o lítunu, o libágari guánarügü, sügü náu.

27 Le gíñe májabei lasúfurirun nueígiñe queisigubeirügü jamúga ában wügüri le anügüti lugúruwan, siñáti náni lan disípulu.

28 Ánjein arítagua ában jádaangiñe ladügün ában wáyelesi, ¿ma funági lañúuruba furúmiñe asáminara átiribei lan lagástarun lun laríjini ánjein gabáfu lubeí lun lagúmuchuni?

29 Ladüga ánjein líchiga ébuu, lárigiñeme lásiñerei wadágimanu agúmucha, jéjerajaba ja aríjubalin láu,

30 jaríñagame. “Guméseti wügüri le ában wadágimanu, siñá lumuti agúmucha.”

31 Ánjein lawúribuja lubeí ában urúei lúma ámu urúei, ¿ma funági ñurúti furúmiñe lun lasáminarun ánjein gayáraabei lubeí lageíndagun jáu díisi mílu súdaara lúma le jáubei wein mílu?

32 Ánjeinti arítagua luágu siñábei lan, dánme le dísegili le ában urúei, ábame loúnajan aríñaga lun lun mawúribujan jamá, lun jebélurun lídoun idíli.

33 Ítara líña lubeíti, furúmieguarügü jádaangiñe le mígirunti sun le lúmabei lun lafálarunina, siñáti nánibei lan disípulu.

Dan le leféridiruni sálu lubásuan

(Mt 5.13; Mr 9.50)

34 ‘Buíti sálu, ánjein leféridira lubásuan, ¿cábago un ju lan?

35 Mabuídunjali ni lun lábunawagún nádü lídan, ni lun lidérebugu múa, fíwarügaalime. Agáamba jumána, jugúya le garígeirugubei lun jagáambun.

15

Jémpulu tuáguti mudún to eféridiruboun

(Mt 18.10-14)

1 Luágu ában wéyu, ába jayárafadun sarágu agúburajatiña liseínsuna gumádi jáma gafígountiña lun Jesúsu lun jagáambuni.

2 Ába jadímurejan fariséogu jáma arúfudajatiña lilúrudun Moisés luágu Jesúsu lueígiñe cátei le, jaríñaga.

—Wügüri le, resíbi lumútiña gafígountiña, jou ligía jáma.

3 Ábati líchuguni Jesúsu jémpulu le joun, lariñaga.

4 —¿Ca jádaangiñe, lun jamúga galügüniña lan san mudún, leféridira ában jádaangiñe, mígirun lubáña gádürü-wein-díisi-néfu ñi, lubárua, lun lídin áluajoun mudún to eféridiruboun?

⁵ Dan le ladárirunun, ába lanügünun légewagu láu ugúndani.

⁶ Dan le lachülürün lúbiñoun, ába louúndaruniña lumádagu jáma lubésinanigu, laríñaga joun. “Gúnda jumá úara núma, ladüga darína nilügün mudún tó yebe eféridiruboun nueí.”

⁷ Naríñajare jun luágu ítara méme líña weíritima lan ugúndani siélu luágu ában gafígounti le asáansirutu luríban ligáburi lun lafálaruni Búngiu, sügü láu jawágu gádürü-wein-díisi-néfu güriquia richágutiña ligíbugiñe Búngiu ja memégeirunbaña jasáansiruni jagáburi.

Jémpulu luáguti seínsu le eféridirubei

⁸ ‘¿Ca würi to níjeinti jamúga díisi murúsun seínsu túma, leféridira ában lídaangiñe tueí, lun mébedun tan lámpu, ába tabuídajanun múna áluajei buídu darí lun tadáriruni?’

⁹ Dan le tadáriruni, ába touúndaruniña tumádagu jáma tubésinanigu, taríñaga joun. “Gúnda jumá núma, ladüga darína seínsu lé yebe neféridirubei.”

¹⁰ Naríñajare jun luágu ítara líña lan giñe ugúndani jádan láni Búngiu ánjeligu luágu ában gafígounti le asáansiraguti luríban ligáburi lun lafálaruni Búngiu.

Jémpulu luáguti irájü le acháragadubei

¹¹ Rúlumuti giñe Jesúsu jémpulu le joun, laríñaga.

—Ñíñein méja ában wügüri jáu bián lirájüñü.

¹² Ába laríñagun le amúleñein lun lúguchi. “Núguchi, rúbei alágan le yúbei nun nun guetó.” Ába lafánreinjani úguchili alágan jádan biángubei.

¹³ Málüti lueígiñe, ába louúndaruni amúleñein sun lumégegún, ába lídin díse lídoun ámu fulásu, ába lagástaruni liseínsun ñi lídan ában íbágaru mabuídunti.

¹⁴ Dan le gumújali sun liseínsun, ába ladágarun ában lemégeirun eígini lídan fulásu ligía, ába ladáiragun lúngua lídan ában oúnwenbun mégei.

¹⁵ Ábati lídin áluaja wadágimanu lúma ában lílana fulásu ligía, ába louúnajani wügüri ligía oúnigiraña lilügüniña büüruju.

¹⁶ Weíríti liláma darí lun lawámadun lun lun leígini jeígin büüruju, míchugúnwati lun.

¹⁷ Ábati lasáminarun, laríñaga lúnguarügü. “¡Sarágu ñadágimeintiña lúbiñe núguchi ígiraguati eígini joun, áu ya, ouwe niláma!”

¹⁸ Nagíribuda le ñíjin lubei núguchi, naríñagame lun. Núguchi, afígounjaadina ligíbugiñe Búngiu lúma bigíbugiñe.

¹⁹ Madúnaali lun nanáangun núngua quei biraü, barübana quei ában jádaangiñe ñadágimeintiña búma.”

²⁰ Ába lárügüdün üma lun lagíribudun lúbiñoun lúguchi.

‘Dísegi líña, ába laríjini úguchili irájü le, ába lagúdemedun lun. Ába leíbaagun lubároun, ába louúburuni, ába lachúuruni.

²¹ Ábati laríñagun isáani lun. “Núguchi, afígounjaadina ligíbugiñe Búngiu lúma bigíbugiñe, madúnaali lun nanáangun núngua quei biraü.”

²² Ába laríñagun úguchili joun lumúsuniña. “Sagájumoun tubuídun-ágei anáanguni furése, daüguagüda jumeí. Daújuma giñe ában bágü luágu lújabu túma geídi luágu lugúdi.

²³ Áfara jumeí liraüraü bágasu le dibúnetimaabei. ¡Weíga, eféduja wagiame!,

²⁴ ladüga niraü le, rúnaali yebe quei jiláali áni chülúguaya, féridijalí yebe áni daríwama.” Ába jagúmeserun eféduja.

²⁵ ‘Súnti buga dan le, níjeinti buga íbugañäü áraabu. Dánti le lagíribudun, dan le lachülürün tubádun múna, ába lagáambuni áfaruni lúma abínajani.

²⁶ Ábati lagúarun lun ában jádaangiñe músu, ába lálügüduni ca lan susérebei.

27 Ába laríñagun lun. “Chülŭjali bamúlen, áfaragüdalá búguchi liraŭraü bágasu le dibúnetimaabei, ladüga lachülŭrŭn láu magádiei.”

28 Ába lagáñidun íbugañaü, májaali lebélorun. Ába láfuridun lŭguchi, ába layúmuragun lun lun lebélorun.

29 Ába laríñagun lun lŭguchi. “Subúdi bumúti luágu seríwíjadina lan bun sarágu dan, madúraagunganeí le bubeíbei ni ában weíyaasu, míchugidibu ni ában liraŭraü gábara nun lun nefédujan jáma numádagu.

30 Guetóti, láu liábin biraü le, le achágarubalin biseínsun jáma wŭríña wuríbatíña, jáfaragüdalá bágasu le dibúnetimaabei!”

31 Ábati laríñagun úguchili lun. “Niraü, amŭrŭ númañadibu súnwandan, sun le náni, báni.

32 Ánjein guetó, lúnti wadŭgŭn fédu lúma lun wagúndaarun ladüga bamúlen lé yebe rúwamaalíbei quei jiláali, chŭlŭguaya, féridijalí yebe, áni daríwama.”

16

Jémpulu luáguti oúnigiruti le múaraanbei

1 Aríñagati gíñe Jesúsu joun láni disípulugu.

—Ñíñein méja ában iyúbudiri rísiti, ñíñein gíñe ában loúniri lumégegun, ába jayábin aríñaga lun luágu lachágaruñein lan oúnigiruti ligía lirísín.

2 Ábati lagúarun iyúbudiri lun, ába laríñagun lun. “Ída liñásan cátei le, le aríñawagúbei nun buágu? Rúba fe nun luágu buwádigimari, ladüga masígijadibu oúnigirei nílagu.”

3 Ábati leréderun oúnigiruti ligía asáminara, laríñaga lúnguarŭgü. “¿Cábati nadüga guetó lárigiñe gidála lan niyúbudiri wadágimanu nueí? Méretina lun nadŭgŭn wadágimanu jŭrŭti, áni nibúsigaritina lun namúriajan.

4 Subúdi náali cába lan nadüga lun ñí jama erésibirutina jábiñe dánme mawádigimarijadina.”

5 Ába loúnajan jawágu ja adúweirubalin liyúbudiri lun jayábin lun ában ában. Ába lálŭgüdŭni le furúmiñeti, laríñaga lun. “¿Átiri badúweiruni niyúbudiri?”

6 Ába laríñagun lun. “Dúwei numúti san barín agŭlei.” Ábati laríñagun oúnigiruti ligía lun. “Nuján bigáradan, ñurúba furése, badŭgame ában luágurŭgü dimí-san.”

7 Lárigiñe, ábaya lálŭgüdŭn ában, laríñaga lun. “Ángi amŭrŭ, ¿átiri badúweijan?” Laríñaga lun. “San ságü türígu.” Laríñagati lun. “Nuján bigáradan, adŭgabá ában luágurŭgü gádŭrŭ-wein.”

8 Ába lasúbudiruni iyúbudiri luágu chu lan láu oúnigiruti ligía lídan ligáburi ladŭgŭni cátei.

Ligía laríñagun Jesúsu.

—Gürígia wuríbatíña ja lánina ubou le, chŭti jáu lídan jáni jáma ámu sügŭ jáu ja lánina larúgounga, ja lirájŭñŭ Búngiu.

9 Siñáti leménigidŭn luágu irisini lánina ubou le, aríñagatina lubeíti jun lun jayúsuruni jirísín lun jadŭgŭn buíti, lun dánme lan le lagúmuchun jibágari, jerésibirúba tídan múna to magúmuchaditu, yágŭta siélu.

10 ‘Le adŭgŭti buíti láu le murúsunrŭgŭti, ladŭgŭba gíñe buíti láu le gíbeti, le madŭgŭnti buíti láu le murúsunrŭgŭti, madŭgŭnbei gíñe buíti láu le gíbeti.

11 Ánjaŭn lubeíti madŭgŭn buíti láu buri irisini le láni ubou le, le uágubei siñá lan leménigidŭn, ¿cábago afíñera juágu lun ledéregerun irisini inárŭniti lábugiñe jaríaajan?

12 Ánjaünti madügün buíti láu jemégen ámu, ¿cábagi íchigei le jáni guánarügü jun?

13 ‘Siñáti lesériwidun ában güri-gia joun bián iyúbudirigu, ladüga liyéereguduba ában lun, línsiñedame le ában lun, o úarabei lan lun ában, lanügeime le ában quei ni cáta. Siñáti lesériwidúniwa lun Búngiu lúma lun seínsu.

14 Agáambagu jáña fariséogu lun sun cátei le, ába jéjerajan láu Jesúsu, ladüga jínsiñe lan seínsu joun.

15 Ábati laríñagun Jesúsu joun.

–Jugúya güri-gia ja arúfudagubaña jóungua quei buítiña jagíbugiñe güri-gia, ánjeinti Búngiu, subúdi lumútu janígi luágu wuríba tan. Le cátei le janügübei güri-gia quei weíríti cátei, iyéereguti lun Búngiu.

Lúrudu lúma larúeijan Búngiu

16 ‘Níjein meja lilúrudun Moisés lúma jarúfudajan profétagu darí lúmoun lidáani Juan. Lúmagiñe dan ligía, lapúrichijoún ugánu buíti le luáguti larúeijan Búngiu, sun güri-gia jóuchatiña lun jebélurun lídoun.

17 ‘Méreenguntimaati lun lagúmuchagun siélu lúma ubouú, máma lun magúnfulirun lan liñúraü-ágei dimúrei lídaangiñe lilúrudun Búngiu.

Larúfudajan Jesúsu luágu ígiraguni (Mt 19.1-12; Mr 10.1-12)

18 ‘Ánjoun lígira ában wügüri lúmari, lagámarida ámu, ladügüñein figou le gíribei adultériu, le gíñe agámariduti ában würi to ígiraguaaru, ladügüña gíñe adultériu.

Wügüri le rísibei, lúma Lázaro

19 Aríñagati gíñe Jesúsu.

–Ñíñein méja ában wügüri rísiti, anáanguni fínutu to wéndegutu ladáüraguboun, ságüja wéyu ladáagun fédu láu sarágu wéndegu.

20 Ñíñein gíñe ában gudémeti gíríti Lázaro, sun lúra láu gumeín,

21 lañúurati buri múarugu tubéneri lúban rísiti ligía áluga leígini lífe eígini le eíguaduti lueígiñe lidábulan rísiti. Weíríti lasúfurirun darí lun lawánduni jayábin ouñli éjelujei lugúmein.

22 Luágu ában wéyu, ába loúnwen fugiábu ligía, ába janügüni ánjeligu lúmoun Abrahám, le ñíjin jabeí jiláaña buítiña, ába gíñe loúnwen rísiti, ába lábunajoún.

23 Dan le lasúfuriruña lan rísiti ligía lídan fulásu le ñíjin jabeí jiláaña wuríbatiña, ába liñúruni laríjin, ában laríjini Abrahám dísegiñe, láu Lázaro lúma.

24 Ábati lagúaragun, laríñaga. “¡Núguchi Abrahám, gudémená bun! Oúnajabeí Lázaro lun ladüdüragüdüni ligíbu lújabu láu dúna, ñübin lámuga éderei tuágu niñéñe, ladüga nasúfuriruña sarágu lídan wátu geméti le.”

25 Ába laríñagun Abrahám lun. “Niraü, jarítaguabá luágu buídu lán meja dan bun lídan bibágari, ánjein lun Lázaro, wuríbati meja dan. Guetó, buíti dan lun ya, bugúya asúfurira.

26 Bougudigiñe lueí sun le, níjein ában baráangu afánreinraguáwa júma, ja jamúga busentiña jóúdin yágiñe lun ñíjin, siñáti, ni ja ñíbaña, siñáti jayábin ñájoun.”

27 Ábati laríñagun rísiti. “Amúriajatina búma, Núguchi Abrahám, lun bouñajani Lázaro lúbiñe núguchi,

28 añájein seíngü namúlenu ñi, lun ladímurejan joun, mayábin jamámuga gíñe lídoun fulásu lánina asúfuriruni le.”

29 Ába laríñagun Abrahám lun. “Níjein le labürüjabei Moisés jáma profétagu jáma ñi, ¡adüga jamá gásu láu!”

³⁰ Ába loúnabun rísiti, ába laríñagun. “Binárün, nóguchi Abrahám, láu sun líra, ánjein ñúdün ában jádaangiñe jiláaña adímureja joun, lasáansiraguba jagáburi.”

³¹ Laríñaga Abrahám lun. “Ánjein mája jabeí jadügün gásu láu le laríñagubei Moisés jáma profétagu, mafíñebaña giñe láu sun lásaarun ában jádaangiñe jiláaña lun lídin adímureja joun.”

17

Luríban lafígoungüdüniwa ában güri-gia
(Mt 18.6-7, 21-22; Mr 9.42)

¹ Ába laríñagun Jesúsu joun láni disípulugu.

—Súnwandan níjeinbei lán buri cátei afígoungüdüti güri-gia, jáni fugiábu güri-gia le afígoungüdüti ámu!

² Buítimaati jamúga lun lun lagurún baránajoun láu ában dübü le lamúlija awási güráñu luágu ligína sügü láu lafígoungüdüniwa ában jádaangiñe ja ñübürigiñabaña lídan jafiñen nuágu.

³ Ítara líña lubeíti toúnigi jumá.

‘Ánjein adüga bamúlen o bíbugaña wuríbani bun, wéridibeí, ánjein asáansiragua ligáburi, ferúdunabeí,

⁴ ánjein adüga wuríbani bun sédü weíyaasu lídan ában wéyu, sédü weíyaasu liábin aríñaga bun luágu madügüdüngüya láali lan, lúnti ferúduna báni.

Lubáfu afiñeni

⁵ Ába jaríñagun apóstolugu lun Jesúsu.

—Wabúreme, rúba lánwoun wafiñen.

⁶ Ábati laríñagun Wabúreme Jesúsu joun.

—Lun jamúga níjein lan murúsuraü afiñeni jídan—gayáraati jamúga ñúraüraü lan queísi ában tíla mostása—gayáraati jamúga jaríñagun tun tídibu wéwe to. “Gidába yágiñe láu sun bílagüle, beíba ájücha baránaja”, áni lasúsereduña jamúga.

Wesériwidun lun Búngiu máma ában cátei lun lateíngiruníwa luágu

⁷ ‘Ánjein níjein lubeí lumúsun ában jídaangiñe, dan le lagíribudun áraabugiñe lárigiñe lawouñan o loúnigirun lan anímaalu, ¿laríñaguba funági lun músu ligía. “Belúba, ñurúba eíga”?

⁸ Uá, aríñagarügübei lun. “Aráansebeí neígin, aráanseñu amürüme lun beténirun nun sun anája lan eíga lúma áta, lárigiñeme, gayáraajalíme beígin lúma bátun.”

⁹ ¿Teínqui lumúti funági iyúbudiri músu luágu ladügüni le lubeíbei lun? Uá.

¹⁰ Jugúya giñéti, dánme lásurun jadügüni le uágubei laríñaga Búngiu jun lun jadügüni, lúnti jaríñagun. “Músu mouñtiña wagía, ladüga lé rügüñein lúnbei wadügüni wadüga.”

Lareídaguagüdüniwa Jesúsu dísi gawágutiña gumeín

¹¹ Lídan lasígiruni Jesúsu luweíyasun Jerusaléoun, ába lásügürün labádinaguagiñe Samária lúma Galiléa.

¹² Dan le lachülürünbei lídan ában liraüraü fulásu, ába jayábin dísi wügüriña gawágutiña gumeín, lubároun. Ába jeréderun díse lueí,

¹³ ába jagúaragun lun ítara.

—¡Jesúsu, Maésturu, gudéme wamá bun!

¹⁴ Dan le laríñagun Jesúsu, ába laríñagun joun.

—Jeíba arúfudagua júngua joun fádirigu.

Dánti le ídirina jamá, ába jareídagun.

15 Ñíñeinti ában jádaangiñe, dan le laríjinbei luágu areídaguaali lan, ába lagíribudun le ñíjin lubeí Jesúsu, adímurejeina buíti luágu Búngiu láu umálali jéreti.

16 Ába lájuduragun dagá ligíbu múarugu lun líchuguni eteíngiruni lun. Áni Samariána wügüri ligía.

17 Ábati laríñagun Jesúsu.

—¿Ma díisiñanu areídagutiña? ¿Jagáñagi ja jíbiri néfu?

18 ¿Niján gubeírügü teréncha le agíribuda eteíngirei Búngiu?

19 Ábati laríñagun lun wügüri ligía.

—Sarába, beíba, areídaguaadibu ladüga bafíñen.

*Ída lúba lan ligáburi liábin larúeijan Búngiu
(Mt 24.23-28, 36-41)*

20 Ába jálügüdüni fariséogu Jesúsu ídaba lan lagúmesera larúeijan Búngiu, ába laríñagun joun.

—Dánme le lagúmeserun larúeijan Búngiu, marijínbei,

21 mariñawagúabei. “Niján”, o “Níngitan”, ladüga lídan linárün cátei, níjeinjali larúeijan Búngiu jagánagua.

22 Ábati laríñagun joun lání disípulugu.

—Lachülürüba dan lun meménija lánme janígi lun júmabadina lan, íbini luágurügü ában wéyu, masúseredunbei lídan dan ligía.

23 Lariñawagúba jun. “Niján Crístu ya”, o “Níngitan yágüta.” Iyéenibei, mídin jumá járigi, mafálarun jumáñame.

24 Ladüga ítara quei larijín ában labríjaníga lueígiñe ában louba siélu lun luágun le ában, ítara lúba dánme le nagíribudun ubouágun, áu le Wügüri Garaüwarügüti.

25 Lúnti nasúfurirun sarágu furúmiñe, mebéresen jagíame gürígia ja lánina dan le náu.

26 Queí meja lasúseredun lídan lidáani Noé, ítara lúba gíñe lasúseredun lídan búrime wéyu le niábingüle, áu le Wügüri Garaüwarügüti.

27 Dán meja ligía, jerédera meja gürígia eíga, áta, agámarida, íchaajaña jarájüñü lun jamárieidun darí wéyu le lebélorun Noé tídon ugúnein to árca. Ába liábin gúnran, ába jañáradagun súngubei.

28 Ítara lúba gíñe quei lasúseredun lídan lidáani Lot. jerédera gürígia eíga, áta, agáñija, alúguraja, ábunagua, adáagua múna.

29 Dan le láfuridunbei Lot ubúrugugiñe Sodóma, ába láburujan wátu geméti lúma sáfuru siélugiñe, ába láfaraguniña súngubei.

30 Ítara lúba dánme le niábin, áu le Wügüri Garaüwarügüti.

31 ‘Lídaanme wéyu ligía, le gürígia le bougudibei tueí lúban, ánjein níjein lubeí lumégegún múnada, mebéluralá aságarei. Le gürígia le áraabubei lídan óra ligía, magíribudalá lúbiñoun.

32 Jarítagua jumá luágu le asúseredubei tun lúmari Lot.

33 Le áluguti leséfuruni libágari ya ubouágu, leféridirubei ibágari magúmchaditi, le ánjabei leféridiruni libágari ya ubouágu, nueígiñe, libíjuba ibágari magúmchaditi.

34 ‘Nariñajare jun luágu árieibu lánme ligía, ñíbaña biáma gürígia arúmuga tídan ában meme gabána, lanügüba ában jádaangiñe, ígirúame le ában según jafíñen nuágu.

35 Ñíbaña biáma würíña amúlíja lídan ában, tanügüba ában jádaangiñe, ígirúame to ában.

- ³⁶ Ñíbaña biáma wügüríña áraabu, lanügüba ában jádaangiñe, igirúame le ában.
³⁷ Dan le jagáambunbalin cátei le, ába jálügüdüni, jaríñaga lun.
 —¿Jalíabasan lasúsereda buri cátei le, Wabúreme?
 Laríñaga joun.
 —Le ñí lumuti lúgubu jiláali, ñíba jóúndaragua wadúbi.

18

Jémpulu tuáguti würi to jiláali túmari, lúma agúseragüdüti

- ¹ Ába labájüdagun Jesúsu ában jémpulu joun, lun larúfudajan joun luágu lúnti lan jayúmuragun lun Búngiu súnwandan, láu gurásu.
² Laríñaga joun.
 —Ñíñein meja ában agúseragüdüti lídan ában fulásu, minébe líña Búngiu lun, mebéresen ligía láu ni ában gürígia.
³ Ñíñoun gíñe ában würi lídan fulásu ligía, jilá meja túmari, ságü wéyu tídin lúmoun agúseragüdüti le lun líchuguni tirícha tun luágu ában tuwúribun lúma tágani.
⁴ Luágu sarágu dan, májati yebe leténirun tun, lárigiñe, ába laríñagun lúnguarügü. “Láu sun minében lan Búngiu nun, mebéresen áu láu ni ában,
⁵ quei nuján méme lan würi to ásüdagüda nichügü, neséfuraaru, jebé lámuga tiábin, gumú líñein nugúraasun.”
⁶ Ába laríñagun Jesúsu.
 —Niján laríñagubei agúseragüdüti le wuríbabei,
⁷ gúbumeti leséfuraña Búngiu lánigu ja ayúmuragutiña lun wéyuagu, áriebu. ¿Lübei lubá líderaguniña?
⁸ Uá, madárasanbei. Láu sun le, dánme le nagíribudun, áu le Wügüri Garaüwarügüti, ubouágun, ¿nadáriruba funásan afíñeni jádan gürígia ja yábaña, nuágu?

Jémpulu luáguti fariséo lúma agúburajati liseínsuna gumádi

- ⁹ Rúyati Jesúsu ában jémpulu joun ja jarítaguabaña luágu richágua jamá ligíbugiñe Búngiu, janügaña ámu gürígia quei ni cáta. Laríñaga.
¹⁰ —Ñüdütiña bián wügüríña témpulurugu ayúmuragua lun Búngiu, ában fariséo, ában agúburajati liseínsuna gumádi.
¹¹ Le fariséo, rára líña layúmuragun, laríñaga. “Búngiu, teínqui numútibu luágu mítaran nan quei jíbiri gürígia—jíwerutiña, wuríbatiña, salúfuritiña, mítaraantina gíñe quei agúburajati liseínsuna gumádi le.
¹² Ayúnaratina bián weíyaasu lídan dimáasu lun nagúnfulirun búma, rúnumuti gíñe díisi gáwanün lídaangiñe ságü fiádürü le ebélurubei nun, bun.”
¹³ Ánjeinti agúburajati liseínsuna gumádi, ába leréderun díse, mabúseerunti ni lun liñúrui laríjin siélun, le luweírín lúnabun lanáangun lúngua. Aboújarügüleí laníguagu láu igárigu, laríñaga. “¡Búngiu, gudémená bun, nugúya le gafígounti!”
¹⁴ Naríñajare jun luágu giríbu lan agúburajati ligía lúbiñoun, resíbiñuleí Búngiu, máma fariséo ligía. Ladüga le anáanguti lúngua weíri, ñúraübei lanügün, ánjein le ñúraübei lanáangun lúngua, weíribei lanügün.

Labíniruniña Jesúsu irájüñü (Mt 19.13-15; Mr 10.13-16)

- ¹⁵ Anaajouátiña gíñe irájüñü lun Jesúsu lun lagúrurun jawágu, dan le jaríjinbalin disípulugu cátei le, ába jadeínjan joun ja anáajabaliña irájüñü.
¹⁶ Ába laríñagun Jesúsu joun lun jasígirun anáajaña jarájüñü lun, ába laríñagun joun lánigu.

—Ígira jumá lun jayábin irájüñü nun, mewéridija jumá lueí, ladüga ja itarabaña quei jagía, jagía lílanabaña larúeijan Búngiu.

¹⁷ Ninárün jáu luágu le lan merésibirun lumúti larúeijan Búngiu láu afíñeni jarúmati líbe jafíñen irájüñü, mebélubei lídoun.

*Layánujan ában wügüri rísiti lúma Jesúsu
(Mt 19.16-30; Mr 10.17-31)*

¹⁸ Ába lálügüdüni ában jádaangiñe ábutigu Jesúsu, laríñaga lun.

—Maésturu buíti, ¿ca lúnbei nadügüni lun gayára lan nibíjini ibágari le magúmuchaditi?

¹⁹ Laríñaga Jesúsu lun.

—¿Ca uágu bariñaga nun “buíti”? Ában rügüñein buíti, Búngiu.

²⁰ Subúdi bumúti gumádi. Maganouábá túma würi gámaritu, máfarajabá, míwerujabá, mayéejabá luágu ni ában, inébe jamá bagübürigu bun.

²¹ Laríñaga wügüri ligía lun.

—Gúnfulitina láu sun le lúmagiñe ñúraügidina.

²² Lídan le lagáambunbalin Jesúsu cátei le, ába laríñagun lun.

—Mégeigili ában cátei lun badügüni. alúgurabeí sun le búmabei, ábame bíchuguni lebégi joun gudémetiña, ábame garísin ban siélu. Ábame bagíribudun, ábame bafálarunina.

²³ Dan le lagáambunbalin wügüri ligía cátei le, ába lírudagun, ladüga rísiti buídu.

²⁴ Dan le laríjini Jesúsu lírudagun, ába laríñagun.

—¡Jénreenguti lun jebélurun rísitiña lídoun larúeijan Búngiu!

²⁵ Méreenguntimaati lun lásügürün ában caméyu lídaangiñe lujúyun ában agúsa sügü láu lebélorun ában rísiti lídoun larúeijan Búngiu.

²⁶ Ába jaríñagun ja agáambubalin.

—¿Cáteiti gayáraabei lasálbarun?

²⁷ Laríñaga Jesúsu joun.

—Le jásiñerubei gürígia adüga, gayára lumúti Búngiu, ladüga úati ni cáta siñáti lun Búngiu.

²⁸ Laríñaga Pédro lun.

—Wabúreme, wagía, ígira wamáali sun le wámati lun wafálarunibu.

²⁹ Ába laríñagun Jesúsu joun.

—Ninárün jáu luágu furúmieguaügü lan le ígiruti lúban, o lagübürigu, o líbugañanu, o lamúlenu, o lúmari, o lirájüñü luágu larúeijan Búngiu,

³⁰ libíjubatíma sarágu weíyaasu lougiñe lídan ubouú le, ibíjaleíme ibágari magúmuchaditi yágüta siélu.

*Ladímurejaanya Jesúsu luágu louñwen
(Mt 20.17-19; Mr 10.32-34)*

³¹ Ába lagúarun Jesúsu joun láni dúusu apóstolugu jábugua, ába laríñagun joun.

—Weíbuga Jerusalén guetó, le ñíba lubeí lagúnfulira sun le jabürüjabei profétagu nuágu, áu le Wügüri Garaüwarügüti.

³² Jedéregerubadina joun ja mámabaña juríu, jéjerajaba náu, anába jamáname, suégua.

³³ Jabeíchubadina, larigiñeme, ábame jáfarunina jilágubei, áni násaaruba lídaangiñe ouweni luágu lürüwan wéyu lúnya nabágaridun.

³⁴ Úati gunfaráanda jamá ni cáta lídaangiñe cátei le, ibídiñegubeíti joun ca lan uágu ladímureja joun, darúguati laníchigu cátei le laríñagubei, joun.

*Lareídaguagüdüün Jesúsu ában Jericóna maríjinti
(Mt 20.29-34; Mr 10.46-52)*

³⁵ Dan le achülüreinaali Jesúsu ubúrugun Jericó, ñíñein ában maríjinti ñun láru üma amúriaja.

³⁶ Dan le lagáambunbei maríjinti ligía jásüüjan sarágu gürígia, ába lálügüdajan ca lan susérebei.

³⁷ Ába jaríñagun lun luágu niján lan Jesúsu Nazarétna ásügüra ñígiñe.

³⁸ Ábati lagúaragun, laríñaga.

—¡Jesúsu, le ladügawagun David, gudémená bun!

³⁹ Ja lubá lubáabaña, ába jadeínjan lun lun lámanichun, ligíatima lagúaragun.

—¡Ladügawagun David, gudémená bun!

⁴⁰ Ábati laráramagun Jesúsu, ába loúnajan anügei. Dan le yaráfaali lun, ába laríñagun lun.

⁴¹ —¿Ca babúseerubei nadügün bun?

Ába laríñagun lun.

—Nabúreme, buséntina naríjin.

⁴² Laríñaga Jesúsu lun.

—¡Ibíjabeí baríjin! Areídaguaadibu ladüga bafiñen.

⁴³ Lídan meme óra ligía, ába laríjin maríjinti ligía, ába lafálaruni Jesúsu adímurejeina buíti luágu Búngiu. Sun gürígia ja aríjubalin cátei le, ába gíñe jadímurejan buíti luágu Búngiu.

19

Jesúsu lúma Zaquéo

¹ Ábati lebélorun Jesúsu fulásurugun Jericó, ába lásügürün ubúrugugiñe.

² Ñíñein ában wügüri rísiti, gíriti Zaquéo, jábuti agúburajatiña liseínsuna gumádi.

³ Buséntiti Zaquéo laríjini Jesúsu lun lasúbudiruni, siñáti laríjini ladüga ñúraüraüti lúgubu, áni gíbetiña gürígia.

⁴ Lúnti gayára lan laríjini, ába leíbaagun ubáraü, ába laweínrun tuágun ában tídibu wéwe sicómoro yaráfa lun le ñígiñeba lubeí lásügüra Jesúsu.

⁵ Dan le lásügürün Jesúsu ñígiñe, ába laríjin íñun, ába laríñagun lun Zaquéo.

—Zaquéo, raríba furése, ladüga lúnti neréderun búbiñe ugúñe.

⁶ Ábati larárirun Zaquéo furése, ába lerésibiruni Jesúsu lúbiñe láu ugúndani.

⁷ Dánti le jaríjini jíbiri gürígia cátei le, ába jagúmeserun adímureja luágu lídin Jesúsu erédera lúbiñe ában gafígounti.

⁸ Ábati laráramun Zaquéo, ába laríñagun lun Jesúsu.

—Nabúreme, níchiga lamídan le nómabei joun gudémetiña, áni ánjein íwerujaadina lubeí lueí ában gürígia láu eyéeraguni, náguyugüdüba gádürü weíyaasu sügü láu lun.

⁹ Laríñaga Jesúsu lun.

—Sálbañu jáña tílana múna to ugúñe, ladügawagun gíñe Abrahám amürü.

¹⁰ Ligía niábinbei uboúagu, áu le Wügüri Garaüwarügüti, lun náluajaniña lúma asálbaraña já yebe féridijañabaña.

Jémpulu luáguti díisi murúsun seínsu

¹¹ Dan le añája lubeí gürígia agáambajei laríñaguni buri Jesúsu cátei le, ába labájüdagun ában jémpulu joun, ladüga ayárafadeinaali lan lun Jerusalén áni jarítaguatiñáti luágu lagúmesera lan larúeijan Búngiu dan ligía.

¹² Ábati laríñagun joun.

—Ñíñein ában wügüri íñugutiña lidújeñu, leíbugati wügüri ligía lídoun ámu fulásu díseti lun líchugúniwa lurúeiteme lageíra, ábayame lagíribudun.

¹³ Lubáragiñe láfuridun, ába loúnajan jawágu dísi jádaangiñe lumúsuniña, ába ledéregerun ában seínsu le gebégiti sarágu lun cáda ában, ába laríñagun joun. “Agárabaja jumeí seínsu le darí nagíribudun.”

¹⁴ Queíti liyéreegunbei wügüri ligía joun lílana fulásu, ába joúnajan lárigi lun jaríñagun lun le lúnbei líchuguni ubáraü lun luágu mabúseerun jamáni lun jarúeiteme.

¹⁵ Láu sun líra, resíbiwati lun urúeime, ába lagíribudun lageíroun. Dan le lachülürün, ába loúnajan jawágu lumúsuniña já buga únbaña líchigei seínsu lun lasúbudiruni átiriñein lan lagáñirun cáda ában.

¹⁶ Ába liábin le furúmiñeti, ába laríñagun. “Nabúreme, gáñeitina dísi weíyaasu ligíbuagun biseínsun.”

¹⁷ Laríñaga urúei lun. “Buíti, ában músu buíti bugúya. Quei úara bubeí lídan le murúsunrügüti, níchigaadibu agúmadija lídan dísi fulásu.”

¹⁸ Ábaya liábin ában, ába laríñagun. “Nabúreme, gáñeitina seíngü weíyaasu ligíbuagun biseínsun.”

¹⁹ Ába gíñe laríñagun lun. “Bagúmadija lídan seíngü fulásu.”

²⁰ Ábati liábin ában, ába laríñagun. “Nabúreme, niján biseínsun, areída numúti tídan ában músue ladüga nanúfude bueí,

²¹ ladüga ában ban wügüri derégüdati, reídeitibu láu cátei le mawádigimaritibu luágu, alúbaja amürü le ñí lumuti mábunagun ban.”

²² Ábati laríñagun urúei lun. “Músu wuríbati, luágu guánarügü berérun nagúseragüdábu. Quei subúdi bubálin luágu ában nan wügüri derégüdati, luágu reídei nan láu cátei le mawádigimaritina luágu, alúbaja áu le ñí lumuti mábunagun nan,

²³ ¿cáti uágu míchububalin niseínsun báncürugun lun jamúga lagánwoundun dan le nagíribudun?”

²⁴ Ába laríñagun joun ja ñíbaña. “Gidájumei seínsu lueí, rújumei lun le díisibeí lúma.”

²⁵ Ába jaríñagun lun. “Wabúreme, níjeinga dísi seínsu lúma.”

²⁶ Ába laríñagun urúei. “Naríñajare jun luágu sun lan le adügati buíti láu le lúmabei, libíjuba lánwoun, ánjein le madügünti ni cáta buíti láu murúsun le lúmabei, lagídarúaba murúsun ligía lueí.

²⁷ Játi náganiñu, já yebe mabúseerúnbaña lun urúei nan, barüjumaña ñájoun, áfaragua jumáña jílágubei nigíbugiñe.”

Lebélorun Jesúsu Jerusaléoun

(Mt 21.1-11; Mr 11.1-11; Jn 12.12-19)

²⁸ Lárigiñe laríñaguni Jesúsu cátei le, ába lasígiruni luweíyasun Jerusaléoun jáu lánigu, ligía jabá jabá.

²⁹ Dan le chülü mémeeli lídoun buri fulásu le Betfajé lúma Betánia, yaráfa lun wübü le gíribei Olívos,

³⁰ ába laríñagun joun biáma jádaangiñe láni disípulugu.

—Jeíba lídan liraúraü fulásu le wagíbugiñebei, dánme le jachülürün ñi, jadáriruba ában burígü güráñu le maweinrúngili. Jafáragadeíme, ábame janügüni ñájoun.

³¹ Ánjaün álügüdüwa ca lan uágu jafáragadei, jaríñagame luágu busén láani Jabúreme.

³² Ába joúdin, ába jadáriruni ítara quei laríñaguni Jesúsu joun.

³³ Dánti le añája lubei afáragadei burígü, ába jálügüdüniña labúriña, jaríñaga joun.

—¿Ca uágu jafáragadei burígü le?

³⁴ Ába joúnabuniña.

—Ladüga busén láani Wabúreme.

³⁵ Ábati janügüni lun Jesúsu, ába jíchugunun janáangun lanágawagun burígü, ába jaweínragüdüni Jesúsu luágun.

³⁶ Quei awáansereina lan Jesúsu, átulejeina jamoún janáangun luágu üma lubá.

³⁷ Dan le jayárafadun lun larárirún wübü le Olívos, ába jagúmeserun sun lánigu Jesúsu ja afálarubalin agúaraja láu ugúndani lúma adímureja luágu luweírigun Búngiu, luágu buri miláguru le jaríjibe.

³⁸ Jaríñaga.

—¡Biníwati urúei le ñübinbei lídan líri Wabúreme Búngiu! ¡Níjein ñurúguaü siélu, lúma uweírigu lun Búngiu!

³⁹ Ábati jaríñagun fariséogu ja ñíbaña jádan gürígia lun.

—Maésturu, aríñagabá joun bánigu lun jámanichun.

⁴⁰ Laríñaga Jesúsu joun.

—Nínárün jáu luágu ánjaña lan ámanichaja ja, lagúarajaba lán buri dübü nuágu.

⁴¹ Dan le layárafadun lun Jerusalén, dan le laríjini ubúругu ligía, ába layájuajan jawágu lílana fulásu ligía, laríñaga.

⁴² —¡Lun jamúga gunfaráanda jumáni ugúñe luágu áu lan ümabei lun ñurúguaü jun, buíti jamúga! Májatün.

⁴³ Ligía lachülürüba lubei wéyu buri wuríbati jun, jadügame jáganiñu ában bariéru geyégua láu jubúrugute lun siñá lan jáfuridun ñígiñe, ábame jageíndagun júma lídaangiñe sun oúbaü.

⁴⁴ Jagünrinchagubei jufúlasun le gumúti, mígirunbaña ni ában dübü ligíbuagu dübü, jáfarúaba sun jugúya, ladüga mebéresen jumá láu óra le liábinbei Búngiu asálbaraün.

Larúmadagüdünnun Jesúsu témpulu

(Mt 21.12-17; Mr 11.15-19; Jn 2.13-22)

⁴⁵ Ábati lebélorun Jesúsu témpulurugun, ába laságaruniña ja alúgurajabaña jáma ja agáñijabaña ñi.

⁴⁶ Laríñaga joun.

—Laríñajare tídan Lerérun Búngiu. “Núban, fulásu le ñí lubei gayára lan jayúmuragun gürígia nun”, ánjein jugúya, barüjumaaru quei jában jíwerutiña.

⁴⁷ Ságü buri wéyu larúfudajan Jesúsu témpulurugu, añájati jábutigu jafádirigun juríu jáma arúfudajatiña lilúrudun Moisés, jáma gíñe lábutigu fulásu áluaja ída lúba lan jáfaruni jilágubei,

⁴⁸ madáritiña ída lúba lan jadügüni ladüga weíri lan jóurabajoúniwa sun gürígia lun jagáambuni lerérun.

20

Lirícha Jesúsu témpulurugu

(Mt 21.23-27; Mr 11.27-33)

¹ Luágu ában wéyu, dan le témpuluruguñein lubei Jesúsu arúfudaja joun gürígia, apúrichije ugánu luáguti asálbaruni, ligía jayábin jábutigu jafádirigun juríu, jáma arúfudajatiña lilúrudun Moisés, jáma wügüriña weírigutiña lídan jafíñen juríu,

² ába jaríñagun lun.

—Aríñagabeí woun ca lan biríchabei lun badügüni cátei le. ¿Ca íchugubalin ubáfu le bun?

³ Ábati laríñagun Jesúsu joun.

—Nálügüdáadün gíñe ában cátei, oúnaba jumána.

⁴ ¿Ca oúnajabalin Juan abásteragüdaja? ¿Loúnajan Búngiu ódi jóúnajan wügüriña?

⁵ Ába jagúmeserun aríñaga jámagua.

—¿Cába waríñaga? Ánjawa aríñaga luágu loúnajan lan Búngiu, laríñagame woun ca lan uágu mafíñerun wabeí lun.

⁶ Ánjawa aríñaga luágu jóúnajan lan wügüriña, jachámuraguba gürígia dübü wawágun, ladüga choúru jamúti luágu proféta lán meja Juan.

⁷ Ábati jaríñagun luágu ibídiñe lan joun ca lán meja oúnajabalin Juan abásteragüdaja.

⁸ Ábati laríñagun Jesúsu joun.

—Maríñagun nubeí gíñe jun ca lan áu ubáfu nadügei buri cátei le.

*Jémpulu jawáguti ñadágimeintiña wuríbatíña
(Mt 21.33-44; Mr 12.1-11)*

⁹ Ába lagúmeserun Jesúsu adímureja joun gürígia, ába labájüdagun ában úraga le gíbebei laníchigu, joun. Niján úraga ligía.

—Ñíñein meja ában wügüri ábunaguti beíbei lichárirugu, lárigiñe, ába lájayajani lichári joun ñadágimeintiña, ába lídin lídoun ámu fulásu luágu sarágu dan.

¹⁰ Dan le lachülürün lidáani alúbajani, ába loúnajan ában lumúsun anügei lufánran, ába jabúleiseiruni ñadágimeintiña músu ligía, ába jóúnajani lárigoún, míchugunga ni cáta lun.

¹¹ Ábayati loúnajan ábanya músu, ába gíñe janábuni, buleísei jameí, oúnaja jameí, míchugunga ni cáta lun.

¹² Ábaya loúnajan ábanya, ábaya gíñe jabúleiseiruni, ába jabúguni ñígiñe.

¹³ ‘Ába laríñagun labúreme ichári lúnguarügü. “¿Cábasán funa nadüga? Nounajaali niraü le jínsiñebei nun, dánme le jaríjini, fágua inébebei joun.” Ába loúnajani.

¹⁴ Dan le jaríjinbalin, ába jaríñagun jámagua. “Niján le lúnbei lerésibiruni alágan, wáfaraali jilágubei, wagía lámuga labúriña sun cátei.”

¹⁵ Ábati jaságaruni lídaangiñe fulásu ligía, ába jáfaruni jilágubei.

Ábati lálügüdajan Jesúsu, laríñaga.

—¿Cábatí ladüga labúreme ichári?

¹⁶ Liábinme, ábame láfaraguniña ñadágimeintiña jagía jilágubei, ábame líchuguni ichári joun ámu.

Dan le jagáambunbalin cátei le, ába jaríñagun.

—¡Masúsereda lámuga ítara!

¹⁷ Ába laríaguniña Jesúsu, ába laríñagun joun.

—¿Cáti lílabei le bürüñubei tídan Lerérün Búngiu le ní lubei laríñaga.

Lé meja dübü le mabúseerun jabeí ábunagutiña, ligíaali furúmiñeti?

¹⁸ Furúmieguarügü le achúgeraguti luágu dübü ligía lagünrinchaguba, léti uágunti láburuja, labúrechagúbei. Áu dübü ligía.

*Luáguti líseínsuna gumádi
(Mt 21.45-46, 22.15-22; Mr 12.12-17)*

19 Lídán meme óra ligía, ába jálugun jábutigu jafádirigun juríu jáma arúfudajatiña lilúrudun Moisés járügüdüni Jesúsu, ladüga jasúbudiruni luágu jawáguti lan jémpulu le lariñagubei, madügün jamúti ladüga janúfude jaweí gürígia. Ábati jagúrabajan ámu dan.

20 Ábati joúnajan gürígia ja ásügürütiña joúngua camá jamuga jarúmatiña lun jaríaajani Jesúsu, lun jariñagagüdüni cátei le gawáguti gayára lan jíchugun lidúnrun lun jedéregeruni lun gumádimati.

21 Ligía jálügüdünbalin, jariñaga lun.

—Maésturu, subúdi wamúti luágu richá lan le bariñagubei lúma gíñe le barúfudajabei, manúfudetibu gíñe lueí ni ában, ladüga ni cáta lan luweírigun gürígia bun, áni láu inárüni barúfudajei lémeri Búngiu.

22 Aríñagabá ában cátei woun. ¿buíti lun lafáyeijoún seínsu lun warúeite César ódi mabuídunti?

23 Ába lasúbudiruni Jesúsu luríban jarítangun, ába lariñangun joun.

—¿Ca uágu jabúseera jíchugun sádara nubá?

24 Arúfuda jumá ában lídaangiñe seínsu ligía nun. ¿Cá iyáwa lúma íri le bürüñubei luágu?

Jariñaga lun.

—Láni César.

25 Ábati lariñangun joun.

—Le láni César rújumei lun César, le láni Búngiu rújumei lun Búngiu.

26 Siñá jamútiti áburugüda tídon jasáðaran láu lé buri lariñagubei jagíbugiñe gürígia, weírügüti janígi láu loúnabagüle joun. Ába jámanichun.

*Álügüdjani lübügürü ásaaruni lídaangiñe ouweni
(Mt 22.23-33; Mr 12.18-27)*

27 Lárigiñe, ába jóudin saduséogu aríjei Jesúsu. Jariñajare saduséogu luágu másaarunbaña lan jiláaña lídaangiñe ouweni lúnya jabágaridun. Ábati jariñangun lun Jesúsu.

28 —Maésturu, lariñajare Moisés woun tídan lilíburun, luágu ánjein lan ouwe ában wügüri, ába lígirunun lúmari marájüñüga ligía táu, lúnti lan lamáriedun lamúlen túma lun garájüñü lan táu, gadügawagun lámuga líbugaña le ouwebei.

29 Wel, ñíñanu mejáti sédü wügüriña gamúlenuguátiña, ába lamáriedun le furúmiñeti, ába loúnwen marájüñüga.

30 Ába lamáriedun le jabíaman túma buga lúmari íbugañaü, ába gíñe loúnwen marájüñüga.

31 Ábati lamáriedun le jürüwan túma, chülü lúmoun le jasédün, jilágua meme jagía, marájüñüga táu.

32 Ába gíñe touñwen würi tugúya.

33 Aríñagabá ában cátei woun. dánmeti le jásaarun lídaangiñe ouweni lúnya jabágaridun, ¿cábatu úmari würi to jádaangiñe, quei maríei tubeí jáma sédügubei?

34 Ába lariñangun Jesúsu joun.

—Lídán ubou le, maríeitiña wügüriña jáma würiña,

35 ánjein lídaanme dan le lúnbei liábin, úabei agámariduni siélu jádan ja garíchabaña lun ásaaruni lídaangiñe ouweni lúma lun jebélurun siélun agánawa ñi lun sun dan. Magámaridubaña ñi, míchaajan jamáñame jarájüñü lun maríei,

36 ladüga mouñwendügüyaaña gürígia siélu, ítaraañame quei ánjeligu, lirájüñü jañáme Búngiu ja saráaña lídaangiñe ouweni.

³⁷ Moisés guánarügü arúfuda lumúti luágu níjein lan ásaaruni lídaangiñe ouweni lídan le labürüjanbei luágu búbugati geméti. Laríñajare ñi luágu Búngiu lan Lubúngiutebei Abrahám, Isáac lúma Jacób.

³⁸ Láu dimúrei ligía, arúfuda lumúti Moisés luágu wínwangiña lan Abrahám, Isáac lúma Jacób, láu sun jilá lan jágubu, ladüga máma Jabúngiute jiláaña Búngiu, Jabúngiute ja wínwangiñabaña. Wínwangiña lanügüniña Búngiu sun güri-gia.

³⁹ Ábati jaríñagun arúfudajatiña lilúrudun Moisés.

—Buíti baríñaguni, Maésturu.

⁴⁰ Ába málügüdagun jamáali lan.

¿Ladügawagunsan David Crístu?

(Mt 22.41-46; Mr 12.35-37)

⁴¹ Ába laríñagun Jesúsu joun.

—¿Ída liñásan jaríñagunbei luágu ladügawagun lan David Crístu?

⁴² Laríñajare David guánarügü tídan líburu to gíriboun Sálmos.

Aríñagati Búngiu lun Nabúreme. “Ñurúba lueígiñe noúnwenren,

⁴³ daríme níchuguniña báganiñu bújaburugun.”

⁴⁴ ¿Ída lubáti ladügawagun lan David Crístu, áni aríñagati David guánarügü lun Crístu “Nabúreme”?

Ladárirun Jesúsu jadúnrun arúfudajatiña lilúrudun Moisés

(Mt 23.1-36; Mr 12.38-40; Lc 11.37-54)

⁴⁵ Ñíñanu sarágu güri-gia agáambajei Jesúsu, ába jagáambun laríñagun joun láni disípulugu.

⁴⁶ —Tounigigua jumá júngua jaweí arúfudajatiña lilúrudun Moisés, ganígitiña jeíbugun táu anáanguni durúrutu, busén jagía lun labúsurún joun láu inébesi úmadarugu, áluaja jameí ubáraü le jabára weírigutiña tídan ligílisi, lúma lubuídun-ágei ubáraü lídan eígni.

⁴⁷ Gidá jamutu gíñe jában würiña ja jiláaña úmari jaweí, lúnti jadáuragun láu, ába jadügün furíeigi migínaguti. Weíribei jasúfurirun luágu sun le jadügübei.

21

Seínsu le tíchugubei ában fugiábu würi témpulurugu

(Mr 12.41-44)

¹ Ába laríjin Jesúsu jíchaajan rísitiña seínsu tídoun buri gáfu to lágei seínsu témpulurugu,

² aríja lumúti gíñe tíchugun ában würi jiláali túmari, gudémetu, bián gáwanün tídoun gáfu.

³ Ába laríñagun Jesúsu.

—Nínárün jáu luágu gíbetima lan tíchugun fugiábu würi to sügü jáu sún-gubei, ladüga sun jagía, lídaangiñe le ígiragubei jáma jíchiga,

⁴ ánjoun tugúya, láu tugúdemegun tíchigei sun le túmabei lún yebe tawínwandun.

Laríñagun Jesúsu luágu tagünrinchawagüba lan témpulu

(Mt 24.1-2; Mr 13.1-2)

⁵ Jadímurejaña fiú güri-gia tuágu témpulu, luágu tubuídunmeraü láu lubuídun buri tidübüri lúma buri cátei le jíchugubei güri-gia lun tawéndedun. Ábati laríñagun Jesúsu.

⁶ —Lachülürüba wéyu lun lagünrinchawagún sun le jaríagubei tuágu témpulu to guetó, merédebei ni ában dübü ligíbuagu dübü.

*Seíni buri lubá lagúmuchun uboú
(Mt 24.3-28; Mr 13.3-23)*

⁷ Ábati jálügüdüni, jaríñaga lun.

—Maésturu, ¿ídamé san lasúseredá buri cátei le? ¿Cábasan seíni waríja luágu dánjali lan lun lasúseredun?

⁸ Ába laríñagun Jesúsu.

—Toúnigi jumá, mayeedúa jumá. Jayábinba sarágu aríñageina luágu áu lan jagía, jaríñagame. “Áu Crístubei”, “Niján dan ligía.” Mafiñera jumá joun, mafálara jumáña.

⁹ Dánme le jagáambun ladímurejoún luágu awúribujani lúma jawágu gürígia agárabagua luágun jarúeite, manúfudedagua jumá, lasúsereduba le furúmiñe, mámagilíme lagúmuchun uboú líra.

¹⁰ Ába lasígirun aríñaga joun.

—Lageíndaguba ában fulásu lúma ában, awúribuja ligíame ában ageíraü lúma ámu.

¹¹ Ñíbei oúnwenbun buri jarabaganáli, ilámaü, sándi, lídan ámuñegueinarügü fulásu, laríjüba buri cátei janúfunati siélu lúma oúnwenbun buri seíni.

¹² ‘Lubáragiñe lasúseredun sun le, jarüjoúba, eíbaajoúa jugúyame. Janügüba agúsera tídan jalígilisin juríu, jádarawagúba furísunrugun, barüwa jugúyame jagíbugiñoún urúeigu jáma gumádimatiña, nueígiñe, lun jagúseragüdünün,

¹³ ligíame jidáani lun jadímurejan luágu nufúleisein.

¹⁴ Aráanse jumeí jarítangun lun madíjeri jumá cába lan jaríñaga jueígiñegua,

¹⁵ níchuguba dímuñe lúma lichú áu jun le lásíñerun ní ában jádaangiñe jáganiñu asígenara ní oúnaba.

¹⁶ Jalúgurubadün jagübürigu guánarügü, jíbugañanu, jamúlenu, jidújeñu, jumádagu. Jáfarúba jídaangiñe,

¹⁷ jiyéreeguduba joun sun gürígia, nueígiñe.

¹⁸ Lídaanme sun líra, latoúnigirubadün Búngiu le gumúti,

¹⁹ áni ánjaün meme derégüdagua lídan jafíñen nuágu, jibíjibeí ibágari magúmuchaditi.

²⁰ ‘Dánme jaríjin geyégua jamá lan súaara ubúругu Jerusalén, subúdi jumeí luágu yaráfaali lan lagúnrinchagun ubúругu ligía.

²¹ Jámeti gürígia ja Judéabaña, lúnti janúrajan luágun buri wübü, ja ubúrugubaña Jerusalén, lúnti jáfuridun ñígiñe, ja áraabubaña, magíribuda jamá ubúrugun.

²² Luwéyuri buríbei jafáyeirun gürígia luágu wuríbati le jadügübei, dánme le lagúnfulirún sun le bürüwañubei tídan Lerérun Búngiu.

²³ ¡Fugiábugume würíña ja dageínatiña lídan dan ligía, o ja lan garájüñütiña ja gurágiña! Ladüga ñíbei sarágu igárigu uboúagu, larúfudubei Búngiu luweírín ligáni luágu jafígoun gürígia ja juríu.

²⁴ Ñíbaña ouwegutiña wuríburugu, jíbiri janáawaguba adáürawagua lídoun ámu ageíraü, ábame jagúnrinchaguni ja mámbabaña juríu ubúругu Jerusalén daríme lagúmuchun dan le íchugúbei joun lun jadügüni.

*Ligáburi ída lúba lan liábin Crístu
(Mt 24.29-35, 42-44; Mr 13.24-37)*

²⁵ ‘Lasáligagubáti buri seíni luágu wéyu, luágu játi lúma jawágu warúguma, ábame laweírídun janígi néchaanigu uboúagu, ábame janúfudedagun luágu lanárime lajúujan lúma laboúnjan lugúdi barána.

²⁶ Ladágaruba falálaü jawágu gürígia láu anúfudei, láu jasáminarun luágu cátei le lúnbei lasúseredun, ladüga jarügüdüba lan warúguma ámu üma.

²⁷ Ábameti larijín niábin, áu le Wügüri Garaüwarügüti, lídan juánriñu láu sun nubáfu lúma oúnwenbun nuweírigun.

²⁸ Dánme le lagúmeserún buri cátei le asúsereda, ragüjuma dügüdaguaü, iñúra jumeíme jichügü, ladüga madíseelime jasálbarun.

²⁹ Rúlumuti giñe jémpulu le joun.

—Aríja jumoún tídibu ígo, o furúmieguarügü tídibu wéwe.

³⁰ Dan le jaríjin labouchun tubána, subúdi jumúti luágu yaráfaali lan lidáani lubáchouga.

³¹ Dánme giñe le jaríjini lasúseredun buri cátei le, subúdi jumeí luágu madíseeli lan lidáani Búngiu lun larúeijan.

³² ‘Nínarün jáu luágu lagünrinchawagúba lan sun ubúrugu le Jerusalén lubáragiñe jóúwegun güriía ja lánina dan le.

³³ Lagúmuchaguba siélu lúma ubouú, ánjein nerérun, ladúraruba lun sun dan.

³⁴ ‘Touñigi jumá, mígira jumá lun tabuínchun janígi láu cátei málati quei sarágu afúuduni, bacháruaü, lúma buri idíjeri luágu buri cátei lánina íbágari le, márügüdün lámugaün wéyu nagíribudagüle ubouúgun lídan magáradajan jumá,

³⁵ quei ában sádara to adárurutu. Ladüga ítara lúba liábin wéyu ligía jawágun sun ja aganoúbaña lídan sun fulásu ya ubouúgu.

³⁶ Aráanseñu jumá lubeíti, ayúmuragua jumá lun Búngiu sun dan, gayára lámuga jibíjin ubáfu lun jawánduni sún buri cátei le lúnbei lasúseredun, lun giñe gayáraabei lan jarúfudagun júngua nigíbugiñe táu tarúman anígi.

³⁷ Ábaja larúfudajan Jesúsu témpulurugu wéyuagua, árieibu, ábaja lídin erédera luágu wúbü le Olívos.

³⁸ Ábaja chülügiñe jamá güriía témpulurugun ságü bináafin lun jagáambuni.

22

Jelédegun áganiñu lubá Jesúsu

(Mt 26.1-5, 14-16; Mr 14.1-2, 10-11; Jn 11.45-53)

¹ Yaráfaali fédu le lidáani teigíniwa fein to magánatu ísi, fédu le jarítaguagüle juríu luágu meja dan le lásügürünbei láni Búngiu ánjeli áfaraguaña jígirama Ejíptona, máfaragun lumútiña jígirama Israélitagu.

² Ábati jáluajan jafádirigun juríu jáma arúfudajatiña lilúrudun Moisés ída lúba lan jáfaruni Jesúsu jilágubei, íbidiñounga joun güriía, ladüga janúfude jaweí.

³ Ábati lagáñeiruni Máfia larítagun Júdas Iscarióte, le ában jádaangiñe láni Jesúsu dúusu apóstolugu,

⁴ ába lídin adüga darádu jáma jábutigu jafádiriñegu juríu jáma jábutigu tisúdaarana témpulu lun ledéregeruni Jesúsu joun.

⁵ Ába jagúndaaragun, ába jaríñagun lun Júdas luágu jíchuguba lan seínsu lun,

⁶ ába lañúurun darádu, ába lagúmeserun áluaja ída lúba lan gayára lan ledéregeruni joun dánme le úa jamá güriía.

Lagúmujoún leígin Jesúsu jáma lánigu

(Mt 26.17-29; Mr 14.12-25; Jn 13.21-30, 1 Co 11.23-26)

⁷ Ába lachülürün fédu le ídaanbei teigúa fein magánatu ísi, ñí lubei giñe ladágarawagüdüwa mudún le lánina fédu.

⁸ Ába lariñagun Jesúsu lun Pédro lúma Juan.

—Jeíba aráanserei eíginí le lánina fédu.

⁹ Ába jálügüdüni.

—¿Jalíagi babúseera waráanseruni?

¹⁰ Lariñaga joun.

—Dánme le jebélurun ubúrugun, jadúnraguba lúma ában wügüri táu ában dináa láu dúna, jafálareime chülü tídoun múna to ñíjin lumúti lebélera.

¹¹ Jaríñagame lun tabúreme múna. “Laríñajare Maésturu. ¿Jigóun rúmu to ñí lubei gayára lan neígini eígini le lánina fédu jáu náni disípulugu?”

¹² Ábame larúfudun ában rúmu weírítu jun tougiñegua múna, aráanseñu tíña, jaráansereime eígini ñi.

¹³ Ába jóudin, ába jadáriruni sun cátei quei laríñaguni Jesúsu joun, ába jaráanseruni eígini lánina fédu ñi.

¹⁴ Dan le lachülürünbei óra, ába lañúurun Jesúsu jáu láni disípulugu luágu dábula,

¹⁵ ábati laríñagun joun.

—¡Oúnwenbun nabúseerun neígini eígini lánina fédu le júma lubáragiñe noúnwen!

¹⁶ Ladüga naríñajare jun luágu meígindügüya náali lan eígini lánina fédu le daríme lagúnfulirún laníchigu lídan larúeijan Búngiu.

¹⁷ Ábati lanügün ában wéru táu diweín lújaburugu, ába leteíngiruni Búngiu, laríñaga.

—Barüjumei le, fánreingua jumei jídaangua,

¹⁸ naríñajare jun luágu mátundügüyaadina lan diweín daríme liábin larúeijan Búngiu.

¹⁹ Lárigiñe, ába lanügünun fein lújaburugu, ába leteíngiruni Búngiu tuágu, ába lagúbachagunun, ába líchugunun joun, aríñageina.

—Núgubu le, le lúnbei ledéregerún juágu. Lúmagiñe guetó, adüga jumei le, jarítaguagüleme nuágu.

²⁰ Ítara meme giñe, lárigiñe jeígin, ába lanügüni wéru táu diweín, ába laríñagun.

—Niján níta le lúnbei láwiyurun lídaangiñe núgubu juágu, lun lañúurun iséri darádu.

²¹ ‘Niján wügüri le lúnbei ledéregerunina wáma ya luágu dábula,

²² luáguñadina üma le lúnbei nanügüni, áu le Wügüri Garaüwarügüti, áni ¡fugiábutia wügüri le lúnbei lalúgurunina!

²³ Ábati jagúmeserun álügüdagua jádaangua cába lánfuna alúgurei.

Ladímurejoún luágu cába lan weírigutima

²⁴ Ába jasígenejan lánigu luágu cába lan jádaangiñe weírigutimá.

²⁵ Ába laríñagun Jesúsu joun.

—Lídan arúeijani lánina ubou le, agúmadijatiña já buri lurúeitena fulásu, camá jamuga labúreme jagía, já buri lábutigu fulásu, aríñawagúati jawágu luágu wügüriña jamá ja gadügatiña fuleísei joun gürígia.

²⁶ Ánjein lídan narúeijan, mítaraanti, lubáragiñe líra, le weírigutimaabei le tímatimaati jídan lúnti lanáangun lúngua quei le ünabutimaabei, le agúmadijabei, lúnti ítara lan quei le esériwijabei.

²⁷ ¿Cági weírigutimaabei, le añúurubei eíga luágu dábula, ódi le esériwijabei? ¿Ma le añúurubei luágu dábula? Áni áu, ítara níña jídan quei le esériwijabei.

²⁸ ‘Jugúya úarabañája núma lídan nouchawagun,

²⁹ ligía níchugunbadün lun jarúeijan quei líchugunina Núguchi lun narúeijan.

³⁰ Jeígiba, gurá jugúyame luágu nidábulan yágüta siélu lídan narúeijan, ñurú jugúyame luágu buri lála urúei lun jagúseragüdüniña jadügawagun dúusu lirájüñü Israél.

*Laríñaguni Jesúsu luágu leyéedaguba lan Pédro láu
(Mt 26.31-35; Mr 14.27-31; Jn 13.36-38)*

³¹ Aríñagati gíñe Wabúreme Jesúsu.

—Simón, Simón, amúriajaali Máfia üma lúma Búngiu lun gayáraabei lan loúchagunün quei lawánijoún türígu,

³² ibíja lumúti, áni ayúmuraguaadina buágu lun Búngiu lun meféridirun báani bafíñen nuágu lídaanme óra ligía. Áni dánme le bagíribudun nun, rúba dűgűdaguaü joun bíbirigu.

³³ Laríñaga Simón lun.

—Nabúreme, aráansetina lun nídin búma furísunrugun, o lun lan noúnwen búma.

³⁴ Laríñaga Jesúsu lun.

—Pédro, ugúñe méme, beyéedaguba náu ürüwa weíyaasu lubáragiñe layúgurujan gáyu, baríñaguba luágu ibídiñe nan bun.

Layárafadun lórate oúchawaguni

³⁵ Ábati laríñagun Jesúsu joun.

—Dan le noúnajanbalün maságűteiga, ni láu lágei seínsu, ni geídi, ¿níñein funági jemégeirun?

Ába jaríñagun.

—Uá Maésturu, memégeiruntiwa ni cáta.

³⁶ Ábati laríñagun joun.

—Ánjeinti guetó, le gaságűteti, barüloun, barü ligíame lágei seínsu, le mefeínteti, alúguraloún labíte lun lagáñijan lefeínte, ladűga wuríbati dan le.

³⁷ Naríñajare jun luágu lagúnfuliruba lan le taríñagubei Lerérun Búngiu nuágu. “Ába jabájűdüni jádan wuríbatiña.” Sun le bűrűwañubei nuágu lagúnfuliruña guetó.

³⁸ Ábati jaríñagun.

—Wabúreme, nuján bián efeín ya.

Ába laríñagun joun.

—Buíti.

*Layúmuragun Jesúsu Getsemaní
(Mt 26.36-46; Mr 14.32-42)*

³⁹ Ábati láfuridun Jesúsu, ába lídin luágun wűbü le Olívos quei ligáburiñaja, ába jóúdin láni disípulugu lúma.

⁴⁰ Dan le jachűlűrűn lídan fulásu ligía, ába laríñagun joun.

—Jayúmuragua, meféridirun jumámugei jafíñen nuágu.

⁴¹ Ába ladísesdun Jesúsu jaweí murúsunraü, ába lájuduragun ayúmuragua lun Búngiu,

⁴² laríñaga.

—Nűguchi, ánjabu busén, séfu bána lueí oúnwenbun asúfuriruni le lúnbei nasúfurirun, madűgűwalá le nabúseerubei, le la babúseerubei adűgűwa.

⁴³ Ábati liábin ában ánjeli siélugiñe lun líchugun érei lun.

⁴⁴ Dan létima laweíridun ligárigu, ligíatima layúmuragun láu érei, lédedejati lísűga lueí camá jamuga oúnwenbun lédedejan jítaü, múarugun.

⁴⁵ Dan le lásaarun lídaangiñe layúmuragun, ába ladáriruniña disípulugu arúmuga, larúmagűdűn íruni.

⁴⁶ Ábati laríñagun joun.

—¿Ca uágu jarúmuga? Sarájuma, jayúmuragua, meféridirun jumámugei jafíñen nuágu.

*Janüğüni Jesúsu adáüira**(Mt 26.47-56; Mr 14.43-50; Jn 18.2-11)*

47 Ñígili Jesúsu adímureja, ligía jayábin sarágu güriía, Júdas, le ában jádaangiñe dúusu disípulugu, jabá jabá. Aba layarafadun lun Jesúsu lun lachúuruni.

48 Ábati laríñagun Jesúsu lun.

—Júdas, ¿láu ában chúuti balúgurana, áu le Wügüri Garaúwarügi?

49 Játi lúmabaña Jesúsu, dan le jaríjinbalin cába lan asúsereda, ába jaríñagun lun.

—Wabúreme, ¿ageíndagua wamáña táu efeín?

50 Ába lánchuguni ában jádaangiñe lánigu Jesúsu larígei lumúsun fádiri íñutimaati, le loúnwenren.

51 Ába laríñagun Jesúsu.

—Ígira jumáña, buídurügaali.

Ábati lagúruruni Jesúsu larígei músu ligía, ába lareídagun.

52 Ába laríñagun joun jábutigu fádirigu, joun wügüriña weírigutiña lídan jafíñen juríu, lúma joun jábutigu tisúdaarana témpulu, ja ñübinbaña anügei.

—¿Jiábin nuágu táu efeín lúma wéwe camá jamuga jíwerutina?

53 Dan lé meja júma nan témpulurugu ságü wéyu, magúrugubeitün nuágu, wel, niján jidáani lun jadüğüni jugúndan náu, óraali lun lagúmadijan le labúremebei lubúriga.

*Laríñagun Pédro luágu ibídiñe lan Jesúsu lun**(Mt 26.57-58, 69-75; Mr 14.53-54, 66-72; Jn 18.12-18, 25-27)*

54 Ábati jarüğüdüni Jesúsu, ába janüğüni lúbiñoun fádiri le íñutimaabei, ábati lafálaruni Pédro dísegiñe.

55 Ába jáfuragun wátu ñi lamídaangua baríeru, ába jañúurun geyégu láu, ába gíñe lañúurun Pédro jádan.

56 Queíti taríjini ában músu ñun larüğürügü wátu, ába teréderun aríaguei, ába taríñagun.

—Lúmañein buga gíñe Jesúsu güriía le.

57 Ába leyéedagun Pédro, laríñaga.

—Ibídiñeti wügüri ligía nun.

58 Murúsun lueígiñe, ábaya laríjini ában, ába laríñagun.

—Jánigu gíñe amürü.

Ába laríñagun Pédro.

—Máma jánigu áu.

59 Queí buri ában óra lárigiñe, ábaya laríñagun ában.

—Inárüni luágu lúmañajañein lan wügüri le ladüga Galiléana gíñe.

60 Ábati laríñagun Pédro.

—Ibídiñeti nun ca lan uágu badímureja.

Lídan meme óra ligía, dan le nijángua lan Pédro adímureja, ába layúgurujan ában gáyu.

61 Ába ladígiragun Wabúreme Jesúsu aríja luágun Pédro, ába larítangun Pédro luágu lé buga laríñagubei Jesúsu lun. “Lubáragiñe layúgurujan gáyu ugúñe, beyéedaguba náu ürüwa weíyaasu.”

62 Ábati láfuridun Pédro, ába layájun láu igárigu.

*Jéjerajan láu Jesúsu**(Mt 26.67-68; Mr 14.65)*

63 Ja wügüriña ja ónigirubalin Jesúsu, ába jéjerajan láu, bei jameí.

⁶⁴ Ába jagüraguni lágu, ába jagáyuajan ligíbuagun, aríñageina jagía.
—¿Bugúya le profétabei, aríñagabeígia ca lan agáyuajabei buágu!

⁶⁵ Ába buri jaríñagun sarágu ámu cátei anábei.

Jesúsu ligíbugiñe líñun-ágei lúrudu
(Mt 26.59-66; Mr 14.55-64; Jn 18.19-24)

⁶⁶ Dan le larúgadunbei, ába joúndaragun wügüriña weírigutiña lídan jafíñen juríu, jábutigu jafádirigun juríu, jáma arúfudajatiña lilúrudun Moisés, ába janügüni Jesúsu ligíbugiñoún jadámurin le líñun-ágei lúrudu. Ába jaríñagun lun ñi.

⁶⁷ —Aríñagabeí woun, ¿amürüsan Crístubei le lúnbei lasálbaruniña güri-gia?

Ába laríñagun joun.

—Ánjan aríñaga jun luágu ánja lan, mafíñebadün nun,

⁶⁸ ánjaün nálügüdagua, moúnabun jubádina, mígiragüdün jumáname.

⁶⁹ Naríñaga ában cátei jun. lúmagiñe guetó, nañúuruba, áu le Wügüri Garaüwarügüti, lueigiñe loúnwenren Búngiu le Súnti Gabáfuti.

⁷⁰ Ábati jálügüdüni súngubei.

—¿Amürü lubeíti Liraübei Búngiu?

Ába laríñagun Jesúsu joun.

—Ánja, áu, quei jaríñaguni jugúya guánarügü.

⁷¹ Ábati jaríñagun.

—Mabúseerunjadiwa geféen jamá ámu woun, agáamba wamáali lídaangiñe guánarügü liyúma.

23

Jesúsu ligíbugiñe Piláto
(Mt 27.1-2, 11-14; Mr 15.1-5; Jn 18.28-38)

¹ Ábati jásaarun sun líñun-ágei lúrudu, ába janügüni Jesúsu ligíbugiñoún Piláto,

² ába jagúmeserun íchiga lidúnrun, jaríñaga.

—Darí wamaali wügüri le achágaraguágüdaña güri-gia, laríñajare luágu moun lan lun wafáyeijan seínsu lun urúei Rómána, aríñagati gíñe luágu ligía lan Crístubei le lanúadirubei Búngiu lun lasálbaruniña güri-gia, aríñaga ligía luágu urúei lan ligía.

³ Ábati laríñagun Piláto lun.

—¿Amürüsan Jarúeitebei Juríu?

Laríñaga Jesúsu lun.

—Ánja, ítara líña quei baríñaguni.

⁴ Ábati laríñagun Piláto joun jábutigu fádirigu lúma joun jíbiri güri-gia.

—Madáritina dúru luágu wügüri le.

⁵ Ábatima jaríñagun jére.

—Lachágaraguágüdüñanu sun güri-gia Judéana láu ligáburi larúfudajan, lagúmesera Galiléagiñe, niján mémegua adúgei chülü ñájoun.

Jesúsu ligíbugiñe Heródes

⁶ Dan le lagáambunbalin Piláto cátei le, ába lálügüdajan ánjein Galiléana lubeí wügüri ligía.

⁷ Dánti le jaríñagun lun luágu Galiléana lan, ába loúnajani lun Heródes, le gumándan Galiléa, ladüga ñíñein Heródes Jerusalén lídan dan ligía.

⁸ Ába lagúndaaragun Heródes dan le laríjini Jesúsu, ladüga agáambañajaali lan luágu áni lüja labúseerun laríjini, agúrabatiti laríjin ladügün ában miláguru.

⁹ Ába lálügüdaguni luágu sarágu cátei, moúnabunti Jesúsu ni cáta.

¹⁰ Ñíñanu jábutigu fádirigu jáma arúfudajatiña lilúrudun Moisés, magúmuti jíchugun lidúnrun.

¹¹ Ábati louuseruni Heródes jáu lisúdaaranigu quei ni cáta, éjeraja jagía láu. Ábati jadáüraguagüdüni táu anáanguni wéndegutu quei lanáangun urúei, ábaya loúnajani Heródes lun Piláto.

¹² Wéyu ligía, ába gamádagua lan Heródes lúma Piláto, lubáragiñe líra, gáganiguañajatiña.

Lasíadirúniwa Jesúsu lun loúnwen

(Mt 27.15-26; Mr 15.6-15; Jn 18.39-19.16)

¹³ Ábati loúndaruniña Piláto jábutigu fádirigu jáma lúrudugu, jáma buri ámu gürígia,

¹⁴ ába laríñagun joun.

—Jugúya anügübalin wügüri le nun, jaríñaga luágu chagáguagüda lániña gürígia, álügüdagua náali jigíbugiñe, áni aríja jumúti luágu madári nan ni murúsun dúru luágu lídaangiñe le jaríñagubei luágu.

¹⁵ Madáriti giñe Heródes lidúnrun, giríbugüdalá woun. Aríja jumáli luágu madügün lan ni cáta le lúnti lafarún jilágubei lueígiñe,

¹⁶ nabeíchagüdalí lubeíti, lárigiñeme, ábame nígiragüdüni.

¹⁷ Gagáburititi Piláto lúnja lígiragüdün ában adaürüti fédurugu,

¹⁸ ába jagúarajan súngubei lídan ában.

—¡Áfarabeí le! ¡Ígiragüdabeí Barabási!

¹⁹ Barabási ligía, ladaürüña lueígiñe ligía lan ában jádaangiñe ja iñúragubaña jóungua luágu gumádi, lúma lueígiñe láfarajan.

²⁰ Busénti yebe Piláto lígiragüdüni Jesúsu, ábaya ladímurejan joun,

²¹ ligíatima jagúaragun.

—¡Dáguabeí luágu gurúwa! ¡Dáguabeí luágu gurúwa!

²² Ába laríñagun Piláto joun luágu lürüwan weíyaasu.

—¿Cáti wuríbati ladügübei? Madáritina ni cáta le lúnti lafarún jilágubei lueígiñe. Nabeíchagüdalí, ábame nígiragüdüni.

²³ Ábatima jagúarajan lun ládarawagún luágu gurúwa, jéretiti jagúarajan jagía jáma jábutigu fádirigu, ába jabíjini le jabúseerubei.

²⁴ Ábagubeíti ladügüni Piláto le jabúseerubei,

²⁵ ábati lígiragüdüni wügüri le jabúseerubei, le adaürübei lueígiñe iñúraguni lúma áfarajani, ábati ledéregeruni Jesúsu joun lun jadügüni jagúndan láu.

Ládarawagún Jesúsu luágu gurúwa

(Mt 27.32-44; Mr 15.21-32; Jn 19.17-27)

²⁶ Dan le jóúdiña lan láu Jesúsu lun ládarawagún luágu gurúwa, ába járügüdün ában wügüri Cirénena gíriti Simón, liábiña áraabugiñe, ába janügagüdüni gurúwa lun, ába lídin láu lárigi lárigi Jesúsu.

²⁷ Sarágu jáña gürígia afálaruti jáma sarágu würiña jádan ayájuajeina, agúarajeina láu írui luágu.

²⁸ Ába ladígiragun Jesúsu jawágun, ába laríñagun joun.

—Würiña Jerusalénna, mayájua jumá nuágu, jayájua juóúgua lúma jawágu jirájüñü,

²⁹ ladüga liábinba buri wéyu dánme le laríñawagún. “Fuleíseiwatiña ja siñábei jagáraüdüni jáma giñe ja marájüñüjañábaña, jáma ja mátagüdajanbaña.”

³⁰ Ábamei jaríñagun gürígia lun wübü íñuti. “Áburujabá wawágun”, aríñaga jagíame lun wübü únabuti. “Darúguabá wáu.”

31 Ladüga ánjein adügajabalin sun le láu tídibu wéwe le düdügili, ¿cábagi madügün jamá láu le mábeijali? (Ítara líña ladímurejan luougua, le madúnrunbei, lúma jawágu ja gadúnrunbaña.)

32 Barütiña giñe biáma gadúnruntiña lun jafarún úara lúma Jesúsu.

33 Dan le jachülürünbei lídoun fulásu le gírubei Lufúlasun Lábu Ichügü, ába jádaraguni Jesúsu luágu gurúwa jáma giñe biáma wuríbatíña jagía, ában lueígiñe loúnwenren, ában lueígiñe lubáüna.

34 Dánti le añája lan ádaraguei Jesúsu luágu gurúwa, ába laríñagun.

—Núguchi, ferúduna báña ladüga ibídiñeti joun ca lan jadügübei.

Ába jájurerun súdeara ubúnuruni lun jaríjin cába lan un jádaangiñe terédera lanáangun Jesúsu.

35 Ñíñanu gürígia aríagua, ñíñanu giñe lúrudugu jéjerajaña láu, jaríñaga.

—Sálbati ámu, sálbagualá giñeti lúngua, ánjein inárüni lubei luágu ligía lan Crístubei le lanúadirubei Búngiu lun lasálbaruniña gürígia.

36 Éjerajatiña giñe súdeara láu, láu jayárafadun íchiga tagübüri diweín lun lun látunun,

37 jaríñaga buri lun.

—Ánjein Jarúeite bubei juríu, sálbaguabá búngua.

38 Ñíñeinti ában abürjóuni lougiñe lichügü, laríñajare ñi. “Niján Jarúeite Juríu.”

39 Ába lanábuni ában jádaangiñe wuríbatíña ja dáwagubaña luágu gurúwa ñi Jesúsu, laríñaga.

—Ánjein bugúya lubei Crístubei, sálbaguabá búngua, sálba bawame.

40 Ába ladeínjan le ában lun louba, laríñaga lun.

—¿Manúfudetibusan luei Búngiu, bugúya le lábugiñebei ában meme sáfuri lúma?

41 Wagía, garíchatiwa lun wasúfurirun ladüga wafáyeijaña luágu wadüga, ánjeinti wügüri le, madügünti ni cáta wuríbatí.

42 Ábati laríñagun.

—Jesúsu, barítaguame nuágu dánme le lagúmeserun barúeijan.

43 Laríñaga Jesúsu lun.

—Nínárün báu luágu númabadibu lan siélu, ugúñe méme.

Loúnwen Jesúsu

(Mt 27.45-56; Mr 15.33-41; Jn 19.28-30)

44 Amídirugu, ába labúrigadun sun fulásu darí ladaünrún ürüwa rábounwéyu.

45 Ába labúrigadun wéyu, ába tajeíridagun tubélun témpulu tamídan túmagua.

46 Ábati lagúaragun Jesúsu ítara.

—Núguchi, deréga numútu nuwáni bújaburugun.

Quei laríñagun ítara, ába loúnwen.

47 Dan le laríjinbalin jábuti súdeara Rómána le asúseredubei, ába ladímurejan weírigu luágu Búngiu, laríñaga.

—Inárüni, madúnrunti buga wügüri le.

48 Sun gürígia ja ñíbaña, ja aríjubalin le asúseredubei, ába jóudin ñígiñe, áfarajeina jamei janíguagu, le jagárigu.

49 Ánjaña sun lumádagu Jesúsu jáma giñe würíña ja ñübinbaña úara lúma Galiléagiñe, ába jeréderun díse aríjei buri cátei le.

Labunún Jesúsu

(Mt 27.57-61; Mr 15.42-47; Jn 19.38-42)

⁵⁰ Níñein ában wügüri gíriti José, lídaangiñeti fulásu le gíribei Arimatéa, le jafúlasun juríu. Buíti ligáburi wügüri ligía, richáguati ligíbugiñe Búngiu, lídaañein líñun-ágei lúrudu le jáni juríu.

⁵¹ Agúrabañu líñein larúeijan Búngiu, magúndaanti lubeíti láu cátei le ladügübei líñun-ágei lúrudu láu Jesúsu.

⁵² Ábati lídin lúmoun Piláto, ába lamúriajani lúgubu Jesúsu lúma.

⁵³ Lárigiñe laráriragüdüni lueígiñe gurúwa, ába louburaguni táu ában gamísa, ába lácharuni lídoun ában umúajaü achigíti luágu ában dúbü le ní lubei úagili lan ni ában abunúti.

⁵⁴ Wándaradi wéyu ligía, luwéyuri aráansejani lubá luwéyuri eméraaguni joun juríu, áni agúñeeli gumése.

⁵⁵ Ába jafálaruni würíña já meja ñübinbaña lúma Jesúsu Galiléagiñe José, aríja jameí umúajaü, aríja jameí buídu ída líña lan líchugún lúgubu Jesúsu lídoun umúajaü.

⁵⁶ Dan le jagíribudunbei jábiñoun, ába jaráanseruni ibíñei buri le íchugúbei jawágu jiláaña, ábati jeméraagun lídan wéyu le eméraaguagülei quei laríñaguni lílúrudun Moisés.

24

*Lásaarun Jesúsu lídaangiñe ouweni
(Mt 28.1-10; Mr 16.1-8; Jn 20.1-10)*

¹ Wéyu dimáasu, ába jagíribudun würíña luágun umúajaü, bináafingua, barüina jameí ibíñei le jaráanserubei jámagua.

² Dan le jachülürünbei, mámaali lídan lubára dúbü le lidaü umúajaü.

³ Ába jebélurun lídoun umúajaü ligía, madári jamúti lúgubu Wabúreme Jesúsu ñi.

⁴ Súnti añája lan ñi arítagua jageí lánfuna, ligía jaríjin bián wügüriña rára jarúgabu táu anáanguni mirítu.

⁵ Queíti jélemuchun láu jagíbu ünabun, buin láu anúfudei, ába jaríñagun wügüriña jagía joun.

—¿Ca uágu jáluajei le wínwanbei jádan jiláaña?

⁶ Úati ya, saráli lídaangiñe ouweni. Jarítagua jumá luágu lé meja laríñagubei jun dan le Galiléañein lán meja, luágu le lúnbei lasúseredun lun, ligía le Wügüri Garaüwarügüti,

⁷ luágu ledéregerúaba lan jájaburugun gafígountiña, ábame jádaraguni luágu gurúwa, ábame lásaarun lídaangiñe ouweni luágu lürüwan wéyu.

⁸ Ábati jarítagun luágu dimúrei le laríñagubei Jesúsu.

⁹ Lárigiñeti jagíribudun umúajaürugúgiñe, ába jabájüdaguni sun cátei le asúseredubei joun únsu apóstolugu lúma joun jíbiri lánigu Jesúsu.

¹⁰ Ja anügübalin ugánu le joun apóstolugu, María Magdaléna, Juána, María to lúguchu Jacóbo, jáma ja jíbiri würíña.

¹¹ Dan le jaríñagunbalin buri cátei le joun apóstolugu, ába janügüni quei lílülün áu, mafiñetiña joun.

¹² Ába láfuridun Pédro, ába lídin eíbaagueina luágun umúajaü, dan le laríjinbei lurágeirugun, gamísa rügüñoun ñi, úaali úgubu. Ába lídin lúbiñoun láu luweírin anígi láu cátei le laríjubei.

*Luágu üma lun Emaúsun
(Mr 16.12-13)*

¹³ Luágu méme wéyu ligía, jóúdiña biáma jádaangiñe lánigu Jesúsu lídoun ában liraüraü fulásu gíriti Emaús, ürüwa óra eíbuguni Jerusaléngiñe,

14 adímurejeina jáña luágu sun cátei lé buri asúseredubei.

15 Súnti adímurejeina jamá, ába layárafadun Jesúsu joun, ába lagúmeserun eíbuga úara jáma.

16 Láu sun aríja jamáni, siñáti jasúbudiruni luágu Jesúsu lan.

17 Ábati laríñagun joun.

—¿Cásan le uágubei jadímureja, sun eíbugeina jumá?

18 Ába jaráramagun láu íruni jagíbuagu, ába loúnabun ában jádaangiñe, gíriti Cleofás, ába laríñagun.

—Sun gürígia subúdi jamúti le asúseredubei Jerusalén lídoun buri wéyu le. ¿Amürü rügüñein jádaangiñe ja ñíbaña íbídiñejabu lun?

19 Ábati laríñagun joun.

—¿Cági asúseredubei?

Jaríñaga lun.

—Luáguti Jesúsu le Nazarétna, ában meja proféta láu ubáfu luágu le ladügübei lúma luágu lerérun ligíbugiñe Búngiu lúma jagíbugiñe sun gürígia.

20 Ábati jedéregeruni jábutigu wafádiriñegu jáma walúrudungu lun siádiwa lan lun ouweni lúma lun ládarawagún luágu gurúwa.

21 Rúwamutí yebe wafíñen luágu ligíaba lan eséfurei linásiñun Israél. Ürüwa wéyu guetó lueígiñe lasúseredun cátei le.

22 Láu sun líra, weírigüda jamáli jádaangiñe würíña ja wámabaña wanígi láu jóudin luágun umúajaü lubá buga larúgan,

23 queíti madári jamáni lúgubu ñi, ába jayábin abájüdagua woun luágu aríja jamá ánjeligu ñi, aríñaga jamá joun luágu wínwan lan Jesúsu.

24 Ába jóudin jádaangiñe wíbirigu aríjei umúajaü, ába jadáriruni ítara quei jaríñaguni würíña jagía, maríjin jamúti Jesúsu.

25 Ábati laríñagun Jesúsu joun.

—¡Loúguati gíñe gunfaráanda jumá, lüti gíñe lubá jafíñerun luágu lé meja jaríñagubei profétagu!

26 ¿Ma funági lúnti meja lasúfuriruni Crístu sun cátei le lubáragiñe lerésibiruni luweírigun?

27 Ábati lagúmeserun afúnraanguágüdei sun le taríñagubei Lerérun Búngiu luágu joun, lagúmesera túmagiñe buri lilíburun Moisés túmoun sun jalíburun profétagu.

28 Dan le jachülürün lídoun fulásu le ñíjinbaña lubeí, ába ladügün Jesúsu camá jamuga lasígiraali leíbugun.

29 Ába jéredun luágu lun leréderun jáma, jaríñaga lun.

—Reídeibá wáma, ladüga ladáruduña áni gúñemémeeli.

Ábati lebélorun Jesúsu lun leréderun jáma.

30 Dánti le ñurújali jáma luágu dábula, ába lanügünun fein lújaburugu, ába leteíngiruni Búngiu tuágu, ába lagúbachagunun, ába líchugunun joun.

31 Lídan óra ligía, ába léfegechun jágu, ába jasúbudiruni luágu Jesúsu lan, ába lagúmuchagun jagíbugiñe.

32 Ábati jaríñagun jámagua.

—¿Ma sandítiwa tásüdün wanígi le wagúndan dan le adímurejeina lubeí woun luágu üma, aríñagaleí tíla Lerérun Búngiu woun?

33 Ábati magúrabajaanjaña lan, ába járügüdün üma lun jagíribudun ubúrugun Jerusalén le ñí lubei jadáriraña únsu apóstolugu oúndaragu jáma gíñe jíbiri lánigu.

34 Ába jaríñagun ja oúndaraguñubaña ñi joun.

—Inárüni luágu saráli lan Wabúreme Jesúsu lídaangiñe oúweni lúnya labágaridun, aríja láali Simón.

³⁵ Ábati jabájüdaguni bián wügüriña jagía le asúseredubei joun luágu üma, lúma luágu jasúbudiruni luágu Jesúsu lan dan le lagúbachagúnbarun fein.

*Larúfudagun Jesúsu lúngua joun disípulugu
(Mt 28.16-20; Mr 16.14-18; Jn 20.19-23)*

³⁶ Ñígiña adímureja luágu buri cátei le, ligía lasáliragun Jesúsu jamídaangua, ába labúsurun joun, aríñageina.

—Ñurúguaü jun.

³⁷ Ába tájüchürün janígi láu sarágu anúfudei, jarítagun luágu pántu lan jaríjubei.

³⁸ Ába laríñagun Jesúsu joun.

—¿Ca uágu tájüchüra janígi? ¿Ca uágu níjein lubei liloúguan afíñeni le tídan janígi?

³⁹ Aríja jumeí nújabu lúma nugúdi, áu méme le. Gurújumana, pántu, mágürügüti, mábu ligía, anáti áu.

⁴⁰ Dan laríñagun líra, ába larúfuduni lújabu lúma lugúdi joun.

⁴¹ Queíti mafíñen mémegiña lan ladüga ugúndani lúma luweírin anígi le jawágubei, ába laríñagun Jesúsu joun.

—¿Níjeinsan eígini júma ya?

⁴² Ába jíchugun murúsun úduraü süti lun lúma síruudu,

⁴³ ába lanügüni, ába leígini jagíbugiñe sun jagía.

⁴⁴ Lárigiñe, ába laríñagun joun.

—Le asúseredubei nun, ligía lé meja uágubei naríñaga jun dán meja le júmagidina, luágu lagúnfulirúaba lan sun le bürüwañubei nuágu tídan lilíburun Moisés, tídan jalíburun profétagu, lúma tídan líburu to gírriboun Sálmos.

⁴⁵ Ábati gunfarándagüda lánun Lerérun Búngiu joun,

⁴⁶ ába laríñagun joun.

—Bürüwañu líña luágu lúnti lan loúnwen Crístu, ába lánme lásaarun lídaangiñe oúweni lúnya labágaridun luágu lürüwan wéyu,

⁴⁷ lúnti lan giñe lapúrichijoún lídan líri joun sun gürígia ubouágu lun jasáansiruni jouserun lun ferúdnawa lan jafígoun, lagúmeseruña apúrichijani ligía ubúrugugiñe Jerusalén.

⁴⁸ Jugúya geféentün luágu buri cátei le.

⁴⁹ Noúnajabei Sífiri Sándu, le uágubei laríñaga Nóguchi Búngiu jun, ítara líña lubeíti, reidei jumá ya ubúругu Jerusalén daríme jerésibiruni ubáfu lúmagiñe Búngiu le siélubei.

*Lamúdeirun Jesúsu siélun
(Mr 16.19-20)*

⁵⁰ Ábati lanügüniña Jesúsu bougudin lueí ubúругu chülü Betánia, ába liñúrui lújabu, ába ln ferúdnawa laabíniruniña.

⁵¹ Dánti labíniruniña, ába lamúdeirun jaweí, ába lanügüniwa siélun.

⁵² Lárigiñe jájuduragun lun, ába jagíribudun járigoún ubúругun Jerusalén, ¡ma jagúndan!

⁵³ Súnwandánti témpulurugúñanu lan íchiga uweíriguni lun Búngiu.

UGÁNU BUÍTI LE LABÜRÜJABEI JUAN LUÁGU JESÚSU

Liábigüle Búngiu Irájü ubouágun queísi Wügüri Garaiwarügüti

¹ Dan le lagúmeserunbei sun cátei, níjeinjali meja Dimúrei (le ámu íri lun Búngiu Irájü), lúmañein Búngiu le Dimúreibe, áni Búngiu méme ligía.

² Lídan lubeíti lagúmeserunbei sun cátei, lúmañein Búngiu Úguchili Búngiu Irájü.

³ Lídaangiñe ladügei Búngiu sun cátei, úati ni cáta adügüti le máma ladüga.

⁴ Ligía íchugubei ibágari lun sun cátei, áni ligía arúgoundagädübei jáu gürígia.

⁵ Rúti larúgounga queísi lámpu lídan lubúriga, áni lásiñerubei lubúriga lámpu ligía éñegucha.

⁶ Níñein meja ában wügüri loúnajan Búngiu, gíríti Juan, le ñübinbei lun líchugun fe luágu Búngiu Irájü le lúnbei liábin ubouágun lun larúgoundagädün jáu gürígia.

⁷ Juan, lúnti líchugun fe luágu, lun gayáraabei lan jafíñerun sun gürígia luágu cátei le lúnbei laríñaguni dánme le liábin.

⁸ Máma Juan le lúnbei larúgoundagädün jáu gürígia, ában wügüri ligía le oúnajoúbei lun ladímurejaba lan luágu.

⁹ Búngiu Irájü, le queísigubeirügübei ában lámpu le tímatimaati lun larúgoundagädün jáu sun gürígia, lachülürüña meja ubouágun lídan dan ligía.

¹⁰ Nübinti ubouágun, áni láu sun lídaangiñe lan ladügei Búngiu ubou, manügün jamúti lirájüñü ubou quei Búngiu Irájü.

¹¹ Lageíroun yebe liábin, merésibirun jamúti lílana lageíra.

¹² Láu sun líra, añájein erésibiruti, ába jafíñerun luágu, ába líchugun ubáfu joun lun lirájüñübaña lan Búngiu.

¹³ Mítaraantiñatia quei jasáanigu agübürigu ja gürígiabaña, ja agüriajóutiña quei furúmierügü gürígia o láu lan lugúndan ában wügüri, lirájüñü Búngiu jagía.

¹⁴ Ligíratí meja le Dimúreibe, le méme Búngiu Irájübei, ñübinti lun ítara lúba lan quei furúmierügü gürígia, ába laganouñiwa wádan. Aríja wamúti luweírigun, uweíriguni le ladúnabei Liraü Búngiu le ábanrügüti, le buínbei láu areíni lúma inárüni.

¹⁵ Adímurejati Juan luágu, ába laríñagun.

—Niján léñaja uágubei nadímureja jun dan le naríñagunbei luágu le lan ubábei naráanseja üma, weírigutima lan sügü náu, ladüga níjeinjali lán meja lubáragiñebei nagüriajóun.

¹⁶ Sun wagía ibíjaadiwa sarágu abíniruni lídaangiñe luweírin lirísín.

¹⁷ Lúmagiñe Moisés lerésibirúa lílúrudun Búngiu, ánjeinti ínsiñeni lúma inárüni, lídaangiñe Jesucrístu liábin.

¹⁸ Úagili ni ában aríjiti Búngiu, Liraü le ábanrügübei le yaráfabei tun lanígi, ligía arúfudubalin woun ída líña lan Búngiu.

*Ladímurejan Juan le abásteragüdajabei luágu lufúleisein Jesucrístu
(Mt 3.11-12; Mr 1.7-8; Lc 3.15-17)*

¹⁹ Ába jóúnajan juríu ja Jerusalénna fádirigu jáma wügüriña jádaangiñe ladügawagun Leví álügüdei Juan cáteinein lan.

²⁰ Ába laríñagun joun furáangu.

—Máma áu Crístu.

²¹ Ábayati jálügüdüni.

—¿Cátabuti? ¿Proféta Elías amürü?

Laríñaga joun.

—Uá, máma áu.

Ábaya jaríñagun lun.

—¿Amürü proféta ligíra le lúnbei liábin?

Ába laríñagun joun.

—Máma gíñe áu.

²² Ábati jaríñagun lun.

—¿Cátabuti? Mósutia wanügüni boúnabagüle joun ja oúnajabaliwa. ¿Cági gayáraabei baríñagun woun buoúgua?

²³ Ába loúnabuniña láu méme dimúrei lé meja laríñagubei proféta Isaías.

—Áu ában le agúarajabei lídan fulásu le mageírawati. “Aráanse jumóun janígi lubá liábin Wabúreme queísi ladárarúniwa úma surúti.”

²⁴ Ja ñüdümbaña adímureja lúma Juan, lánigu jadámurin fariséogu,

²⁵ ábati jaríñagun lun.

—Ánjeinti máma bubeí Crístu, ni Elías, ni proféta ligía, ¿cáti uágu babásteragüdaja?

²⁶ Ába laríñagun joun.

—Áu, láu dúna nabásteragüdaja, níjein ában ibídiñeti jun jagánagua,

²⁷ liábinba nárigiñe, wügüri ligía, madúnatina ni lun jamúga nafáragaduni tagürüga ligeídin.

²⁸ Sun cátei le, lídan fulásu le gíribei Betábara lasúsereda, luágu oúbaü le ñígiñe lubei láfuara wéyu libíti dúna Jordán, le ñí lubei labásteragüdaja Juan.

Wügüri le loúnajabei Búngiu lun loúnwen luágu jafígoun gürígia

²⁹ Larúgan, ába laríjin Juan liábin Jesúsu ayárafadeina lun, ába laríñagun joun lánigu.

—Niján le loúnajabei Búngiu lun loúnwen luágu jafígoun gürígia queísi meja lafarúniwa mudún lídan dan ligíra luágu jafígoun gürígia.

³⁰ Luáguñaja nadímureja dan le naríñagunbei. “Liábinba ában wügüri nárigiñe le weíriguti sügü náu, ladüga níjeinjali lán meja lubáragiñe nagüriajóun.”

³¹ Ni áu, ibídiñetí meja wügüri ligía nun, abásteragüdajádina láu dúna lun jasúbudiruni Israelítagu.

³² Aríñagati gíñe Juan.

—Aríja numúti Sífiri Sándu camá ában únjun, larárirun siélugiñe, ába laráramagun lábulugu.

³³ Ibídiñetí yebe nun cátei lan wügüri ligía, aríñagarügaali meja le oúnajabalina abásteragüdaja láu dúna, nun. “Dánme le baríjin larárirun Sífiri Sándu ábame laráramun lábulugu ítaga wügüri, ligía wügüri ligía le abásteragüdajabei láu Sífiri Sándu.”

³⁴ Aríja náaliti, geféen áu luágu ligía lan Liraübei Búngiu.

Furúmiñetiña láni Jesúsu disípulugu

³⁵ Larúgan, ñíñeinya Juan jáma biáma jádaangiñe lánigu.

³⁶ Dan le laríjinbei Juan lásügürün Jesúsu, ába laríñagun.

—Niján wügüri le lanúadirubei Búngiu lun lagídaruni jafígoun gürígia.

³⁷ Ába jagáambuni biáma lánigu Juan laríñagun ítara, ába jafálaruni Jesúsu.

³⁸ Ábati ladígiragun Jesúsu lárigoún, quei laríjin jafálaruni, ába laríñagun joun.

—¿Ca jabúseerubei núma?

Ába jaríñagun lun.

—Maésturu, ¿jalía bagánawa?

³⁹ Ába laríñagun Jesúsu joun.

—Jigóugu jaríjei.

Ába jóudin, ába jaríjini jalía lan lagánawa, ába jásügürüni líbiri wéyu ligía lúma, ladüga queiburijali lan gádürü rábounwéyu óra ligía.

⁴⁰ Andrés, le lamúlen Simón Pedro, ligía ában jádaangiñe biáma ja agáambubalin le laríñagubei Juan ába jafálaruni Jesúsu.

⁴¹ Lubáragiñe ámu cátei, ába lídin Andrés álugei Simón Pedro le líbugaña, ába laríñagun lun.

—Darí wamaali Mesías, le Crístu, le lanúadirubei Búngiu lun lasálbaruniña gürígia lídaangiñe jafígoun.

⁴² Ába lanügüni Andrés Simón le ñíjin lubei Jesúsu, ába laríaguni Jesúsu Simón ligíbuagun, ába laríñagun lun.

—Simón, amürü le liraü Jonás, guetó Céfasba bíri, míni lan íri le. Pedro, o dübü.

Lanúadiruniña Jesúsu Felípe lúma Natanaél lun lánime disípulugu

⁴³ Larúgan, ába larítangun Jesúsu lídin loúbawagun Galiléa, ába ladúnragun lúma Felípe, ába laríñagun lun.

—Falábana.

⁴⁴ Felípe ligía, Betsáidana le ñí lubei giñe lagánawa Andrés láu sun Pedro.

⁴⁵ Ábati lídin Felípe áluajei Natanaél, ába laríñagun lun.

—Aríja wamáali wügüri le uágubei labürüja Moisés tídan líburu to lánina lilúrudun Búngiu, le giñe uágubei jabürüja profétagu—Jesúsu le liraü José le Nazarétna.

⁴⁶ Ába laríñagun Natanaél.

—¿Níjein funági Nazarétna buíti?

Ába laríñagun Felípe lun.

—Jigábu baríja.

⁴⁷ Dan le laríjin Jesúsu layárafadun Natanaél, ába laríñagun.

—Nítén ában ladügaragun Israél le tímatimaati, úati yéguau lídan.

⁴⁸ Ába laríñagun Natanaél lun.

—¿Ída liñági basúbudirunina?

Ába laríñagun Jesúsu lun.

—Aríja numútibu lubáragiñe lagúarun Felípe bun, dan le tábugiñeñadibu lan tídibu ígo.

⁴⁹ Ábati laríñagun Natanaél lun.

—Maésturu, amürü Liraübei Búngiu, amürü jarúeitebei Israelítagu.

⁵⁰ Ába laríñagun Jesúsu lun.

—¿Bafíñerunbei nun ladügarügü naríñagun bun luágu aríja nánibu tábugiñe tídibu ígo? Baríjubati cátei weínamutimáati lueí le.

⁵¹ Aríñagati giñe Jesúsu.

—Nínárün jáu, luágu jaríjubei lan siélu junréñu, añájame láni Búngiu ánjeligu aweínja lúma arárija nougiñe, áu le Wügüri Garaüwarügüti.

2

Ában maríei lídan fulásu le gíribei Caná, le lídaanbei Galiléa

¹ Ürüwa wéyu lárigiñe, ñíñein ában maríei lídan ában fulásu gíriri Caná, le lídaanbei Galiléa. Ñíñounti lúguchu Jesúsu,

² amísurajouáti gíñeti Jesúsu jáu sun láni disípulugu lídoun maríei ligía.

³ Ába tagúm muchun diweín, ába tariñagun lúguchu Jesúsu lun.

—Gumújatia diweín.

⁴ Ába lariñagun Jesúsu tun.

—¿Cági uágu bariñagei le nun, nóguchu? Machülügili dan lun nídejan lídan cátej le.

⁵ Ába tariñagun joun ja éjeeragubaña.

—Adüga jumeí sun le lariñagunbei jun.

⁶ Ñiñoun sísi dináa láutu dübü tíbe to jayúsuruboun juríu lun jachíbagun jóungua según jagáburi. Ságü ában dináa tugúya, barútu wein o darándi gálun dúna.

⁷ Ába lariñagun Jesúsu joun éjeeragutiña.

—Buíngüda jumoun sun dináa to láu dúna.

Ába jabuínchagüdünun buídu buídu.

⁸ Ábati lariñagun Jesúsu joun.

—Dabú jumati murúsun tídaangiñe, ábame janügüni lun le aríjubei láu fédu.

Ába jadügüni ítara.

⁹ Ábati louchuni le aríjubei láu fédu dúna ligía salígua lun diweínme, ibídiñoun lun jalíagiñeti lan, ja rügüñanu éjeeragubaña asúbudirei, ladüga jagía lan adáburubalin dúna. Ábati lagúarun le aríjubei láu fédu lun le amárieidubei,

¹⁰ ába lariñagun lun.

—Sun güriña seríwi jamútu tubuídun-ágei diweín furúmiñe, dánti le guráaña amísurajouátiña gíbe, ligía jéjeeragun diweín to furúmiegurügü, ánjeinti amürü, ába bareídunun tubuídun-ágei diweín darí guetó baságaroun.

¹¹ Cátei le, le ladügübei Jesúsu lídan fulásu le gíribei Caná le lídaanbei Galiléa, ligía furúmiñetibei miláguru le áubei larúfudei luweírigun, ába jafíñerun láni disípulugu luágu.

¹² Lárigiñe cátei le, ába lídin lídoun fulásu le gíribei Capernaúm, úara túma lúguchu, lamúlenu, jáma láni disípulugu, ába jeréderun átiri wéyu ñi.

*Labúgaguniña Jesúsu alúgurajatiña témpulurugugiñe
(Mt 21.12-13; Mr 11.15-18; Lc 19.45-46)*

¹³ Ábati lídin Jesúsu ubúrugú Jerusalén ladüga yaráfaali lan jafédun juríu le lánina páscua.

¹⁴ Ñi ladárraña ja alúgurajabaña bágasu, mudún, únjun, jáma buri ja ñúnbaña lídan jabára le ní lubei jasáansija seínsu joun güriña. Lídan tübüürü témpulu ladárraña sun güriña ja.

¹⁵ Dan le larájinbalin Jesúsu cátei le, ába ladügün ában labeíjagüle láu gúrudu, ába labúgaguniña sun jagía lídaangiñe tübüürü témpulu jáu sun jalügüniña mudún jáma bágasu. Chagálei jaseínsun ja asáansijabaña seínsu, garábagualeí jadábulan.

¹⁶ Ába lariñagun joun ja alúgurajabaña únjun.

—¡Sagájumei sun cátei le yágiñe! ¡Manüga jumoun lúban Nóguchi lun jalúguraagüleme!

¹⁷ Ábati jarítangun láni disípulugu luágu lariñawagún tídan líburu to Lerérun Búngiu. “Jángitina táu búban táu sun nanígi.”

¹⁸ Ábati jaríñangun juríu lun.

—¿Ca miláguru barúfudubei woun lun wasúbudiruni ánjein garícha bubeí lun badügüni cátei le?

¹⁹ Ába lariñagun Jesúsu joun.

–Güríngua jumoún témpulu to, naráramagüdayaboun lídan ürüwa wéyu.

²⁰ Ába jaríñagun juríu lun.

–Bián-wein-sísi irúmu janügün adügoun témpulu to, ¿lun biyáraaboun lan aráramagüda lídan ürüwa wéyu?

²¹ Lúgubu guánarü Jesúsu témpulu to uáguboun ladímureja joun.

²² Ligía dan lubei le lásaarun lídaangiñe ouweni, ába jaríttagun luágu dimúrei le meja laríñagubei, ába jafíñerun luágu sun le tídaanbei líburu to Lerérun Búngiu lúma luágu dimúrei buri le meja laríñagubei joun.

Subúsi le tídaanbei janígi gürígia lun Jesúsu

²³ Dan le Jerusalén lubei Jesúsu lídan fédu le lánina páscua, sarágu jáña afíñerutiña luágu dan jaríjinbaalin miláguru buri le ladágubei lun larúfuduni luágu ligía lan Crístubei.

²⁴ Ánjeinti Jesúsu, míchaagunti lúngua jájaburugun ladüga subúdi láníña cátañañanu lan.

²⁵ Mabúseerunti laríñawagúniwa lun ída jáña lan gürígia, ligía lúngua subúdi lumúti cátei lan tídaanbei janígi.

3

Jesúsu lúma Nicodémo

¹ Níñein ában wügüri lánina jadámurin fariséogu, ába jádaangiñe jábutigu juríu, gíriti Nicodémo.

² Ába lídin Nicodémo ayánuja lúma Jesúsu gúñoun, ába laríñagun lun.

–Maésturu, subúdi wamúti luágu Búngiu lan ouñajabalibu arúfudaja woun, ladüga úati ni ában lun gayára lan larúfuduni lubáfu láu miláguru quei badügüni ánjein úa lubei Búngiu lúma.

³ Ába laríñagun Jesúsu lun.

–Nínárün báu luágu le lan magüriajoúnwayati, siñáti lebélorun lídoun larúejan Búngiu.

⁴ Ába laríñagun Nicodémo lun.

–¿Ída lubági lagüriajoúnwaya ában wügüri weíriyaali? ¿Gayáraati funági lebélorunya turágeirugun lúguchu lúnya tagüriajani?

⁵ Ába laríñagun Jesúsu lun.

–Nínárün báu luágu le lan magüriajoúnti lídaangiñe dúna lánina abásteruni, lúma lídaangiñe Sífiri Sándu, siñáti lebélorun lídoun larúejan Búngiu.

⁶ Le agüriajoúbei jádaangiñe agübürigu ja gürígiabaña, ítara líña ligáburi queísi jagáburi gürígia, le agüriajoúbei lídaangiñe Sífiri Sándu, ítara líña ligáburi queísi ligáburi Sífiri Sándu.

⁷ Maweíridalá banígi luágu naríñagun bun luágu lúnti lánya jagüriajoúniwa sun gürígia.

⁸ Ítara quei láfurun garábali le nígiñe lumúti labúseera, agáambabei lamúri, ibídiñeti bun jalíagiñe lan liábin ni jalíñoun lan lídin, ítara jáña gíñe sun ja agüriajoúbaña lídaangiñe Sífiri Sándu.

⁹ Ábayati laríñagun Nicodémo lun.

–¿Ída lubásan cátei le?

¹⁰ Ába laríñagun Jesúsu lun.

–Ába ouñwenbun maésturu Israélna amürü, ¿ibídiñeti cátei le bun?

¹¹ Nínárün báu luágu le lan wasúbudirubei, ligía lan wadímurejabei, geféen wagía luágu le aríja wamáalibei, jugúya fariséogu, maffíñetün luágu le waríñagubei jun.

12 Ánjein mafiñen jubei nun dan le nadímurejan jun luágu buri cátei le lánina ubouú, ¿ída lubági jafiñera luágu le lánina siélu?

13 ‘Úagili ni ában amúdeiruti siélun, lárigiñe ába larárirun ñigiñe lun gayára lan geféen lan luágu nueídügüya, áu le Wügüri Garaüwarügüti, le gábanbei siélu.

14 Ítara quei meja liñurunun Moisés tiyáwa jéwe luágu wéwe lídan fulásu mageírawati lun jasálbaruba lan sun ja aríjitiña tuágun, ítara liñá giñe niñurúaba lan luágu gurúwa

15 lun sun lan le afiñeruti nuágu, mídin lámuga máfiougati, siélun lámuga lídin abágarida ában ibágari le magúmuchaditi.

Lísiñejabu Búngiu joun güriña

16 ‘Weíriti jínsiñe güriña ja ubouágubaña lun Búngiu darí lun loúnajanina, áu le Liraü le ábanrügüti, lun nouñwen luágu jafígoun, lun sun lan ja afiñerutiña nuágu, mídin jamámuga máfiougati, siélun lámuga jóúdin, abágarida ában ibágari le magúmuchaditi.

17 Mouñajan lumútina Búngiu áu le Liraü ubouágoun lun níchugun jadúnrun güriña, loúnajanina lun jasálbarun ja ubouágubaña nuágu.

18 ‘Le afiñeti nuágu, áu le Liraü Búngiu, barü lumuti Búngiu quéisi madúnrunuti, ánjein le mafiñeti, gadúnrunjali ligíbugiñe Búngiu ladüga mafiñen lan nuágu, áu le Liraü Búngiu le ábanrügüti.

19 Ja mafiñebaña, gadúnrunjaña ligíbugiñe Búngiu ladüga dán buga le niábinbei ubouágoun lun narúgoungagüdün láu, gúndaatimaatiña lílana ubou láu lubúriga sügü láu larúgounga, ladüga cátei lan wuríbati jadágubei.

20 Sun ja adügübaña cátei wuríbati, iyéreeguti larúgounga joun, ába jadísedun luei larúgounga ligía, luei lasúbudirúniwa cátei wuríbati le jadügübei.

21 Ja adügübalin lugúndan Búngiu, jínsiñeti joun lun lídan jamá larúgounga lun laríjiniwa luágu jarúma lan le jadügübei, láu lubáfu Búngiu.

Ladímurejaanya Juan luágu Jesús

22 Lárigiñe sun cátei le, ába lídin Jesúsú jáu láni disípulugu Judéoun, ába leréderun átiri dan ñi, abásteragüdaja.

23 Ñiñein giñe Juan abásteragüdaja lídan fulásu le gíribei Enón, yaráfa lun Sálím, ladüga ñiñein lan sarágu dúna, ába buríti jayábingua güriña, ába jabásterun.

24 Lubáragiñe ladaürün Juan lasúsereda sun cátei le.

25 Ábati jagúmeserun jádaangiñe lánigu Juan asígeneja jáma juríu luágu igáburi le lánina arúmaduni.

26 Ábati jóúdin aríñaga lun Juan.

—Aríjabásan maésturu, wügüri lé buga búmabei luágu óubaü le ñigiñe lubei láfurida wéyu libíti dúna Jordán, le ligíra lé meja uágubei badímureja woun, guetó labásteragüdajaña güriña áni jafálaruñeíti sun güriña.

27 Ába laríñagun Juan joun.

—Siñáti níjein lan ni cáta lúma ni ában güriña ánjein máma lubei líchugun Búngiu lun.

28 Agáamba jumúti lubeígia naríñagun jun furáangu luágu máma lan áu Crístubei, luágu áu lan ában le ouñajoubei lubá.

29 Lídan ában maríei, adári ligía táubei ladári. Léti lumáda adári, le ñíbei agáambei, ouñwenbun lugúndan láu lagáambuni ladímurejan. Ítara níña giñeti, ouñwenbun nugúndan luágu Jesúsú,

30 ligía lúnti laweírigudúntima, áu lun nünabuduntima.

Le nübinbei siéluñe

³¹ ‘Jesúsu, le ñübinbei siélugiñe, jóugiñeñein sun gürígia. Áu, múaruguna áu, áni lérügüñein lánina ubou gunfaráanda nan. Ánjein le ñübinbei siélugiñe, jóugiñeñein sun gürígia,

³² luágu giñe le aríja lálalibei lúma le agáamba lálalibei ladímureja, míbetiña afíñerutiña luágu le laríñagubei.

³³ Ánjeinti le afíñeruti, lachoururubei luágu inárüni lan le laríñagubei Búngiu, láu lafíñerun.

³⁴ Le louñajabei Búngiu, lerérun Búngiu ladímurejabei, ladüga mébejati líchuguni Búngiu lani Espíritu lun.

³⁵ Jínsiñeti Liraü Búngiu lun, rúlaali giñe sun cátei lújaburugun.

³⁶ Le afíñebei luágu Liraü Búngiu, gabágariti le magúmuchaditi, ánjeinti le májabei lafíñerun luágu Liraü Búngiu, mabágaribei líbe ibágari ligía áni mebélurunbei siélun, laburujarügüba ligáni Búngiu luágu.

4

Jesúsu túma würi to Samariána

¹ Aba jagáambun fariséogu luágu gíbetima jamá lánigu Jesúsu sügü jáu lánigu Juan, áni gíbetima gürígia ñübintiña lun, lun jabásterun,

² láu sun máma lan Jesúsu abásteragüdajabaliña, lánigu abásteragüdajabaña.

³ Dan le lasúbudirunbalin Jesúsu cátei le, ába láfuridun Judéagiñe lun lagíribudun Galiléoun.

⁴ Lídan weíyaasu ligía lásügürübatí loubwagugiñe Samária.

⁵ Ítara liñáti lachülürün lídoun ában fulásu lídan Samária gíriti Sícar, yaráfa lun múa lé meja lígirubei Jacób lun José le liraü, le ában jádaangiñe binádu wagübürigu.

⁶ Ñíñein wélu le únbei jagúara luwélun Jacób, queíti buchá lan luágu Jesúsu eíbuga, ába lañúurun láru wélu ligía. Queí buri amídirugu óra ligía.

⁷ Tiábijati ában würi Samariána adábura dúna lídaangiñe wélu le, ába laríñagun Jesúsu tun.

—Rúba dúna nun.

⁸ Añángüratí buga lani disípulugu agáñija eígini ubúругu.

⁹ Ábati taríñagun würi Samariána to lun Jesúsu.

—¿Ída liñági bamúriajanbei dúna núma, lárigiñe juríu ban, nugúya Samariána? (Mínsiñeguatiñati juríu jóungua jáma Samariána.)

¹⁰ Aba laríñagun Jesúsu tun.

—Lun jamúga subúdi báni edéweejani le líchugubei Búngiu, subúdibeí jamúga cátei lan le amúriajabei dúna búma, bamúriajaña jamúga núma, ába jamúga níchugun ában luwúyeri dúna le gayáraati líchugun ibágari bun, bun.

¹¹ Ába taríñagun lun.

—Úagubeíti cába lan áu badábura dúna áni julíiti wélu le, ¿ída lubáti bíchuguni luwúyeri dúna ligía nun?

¹² Jacób, lé meja binádu wadügawagun, ígirubalin wélu le woun, guráti meja dúna lídaangiñe jáu sun lirájüñü jáma lilügüniña. ¿Weírigutibu funági sügü láu Jacób?

¹³ Ába laríñagun Jesúsu tun.

—Sun ja átubaña lídaangiñe dúna le, jamágürabudayaba,

¹⁴ ánjein le átuti lídaangiñe dúna le níchugubei, mamágürabudundügüyaali, ladüga dúna le lúnbei níchuguni lun, géseséenbei lídan lun líchugun ibágari magúmuchaditi lun.

¹⁵ Ábati taríñagun lun.

—Rúbei dúna ligía nun, masándirundügüyaadina lámuga mágürabu, miábin nugúyame ya wélurugu adábura dúna.

¹⁶ Ába laríñagun Jesúsu tun.

—Beíba ougei búmari le úmabei bamárieida, ábame biábin.

¹⁷ Ába taríñagun lun.

—Mámaritina le maríeitina lúma.

Ábati laríñagun Jesúsu tun.

—Binárün láu bariñagun luágu mámari ban le maríeiti búma,

¹⁸ ladüga seíngüjáña wügüríña úmatiña bagánawa, áni mamárieiduntibu lúma wügürí le úmabei bagánawa guetó. Aríñagaadibu inárüni.

¹⁹ Dan tagáambubalin würi to cátei le, ába taríñagun lun.

—Afíñetina luágu proféta ban.

²⁰ Binádu wagübürigu ja Samariána, judúguatiña meja lun Búngiu ya luágu wübü lígita, ánjein jugúya juríu, aríñagatün luágu Jerusalén lan fulásu le lúnbei ñi lan wájuduragua lun Búngiu.

²¹ Ába laríñagun Jesúsu tun.

—Afíñebá nun luágu nítebei lan dan lun jájuduragun lun Búngiu mídinga jugúya luágun wübü lígita, ni jídin Jerusalén.

²² Jugúya Samariána, ibídiñeti jun ca lan un jájuduragua, ánjein wagía, subúdi wamúti ca lan un wájuduragua ladüga lídaangiñe warásan wagía juríu liábin asálbaruni.

²³ Lachülürüba óra, áni niján óra ligía, lun mebéresenwa lan jalía lan jájuduragua gürígia lun Búngiu. Le lúnbei lebéreserunwa láu, ída líña lan ligáburi jájuduragun lun. lúnti jadügüni táu sun janígi lídan ában luwúyeri le áuti lagúndaara Búngiu, según lerérun. Niján luwúyeri ájuduraguni le lálujabei Búngiu jámagiñe gürígia.

²⁴ Espíritu Búngiu, ja ájuduragubaña lun, lúnti jadügüni láu sun janárün, mebéresenga láu cátei le arijúati.

²⁵ Ába taríñagun lun.

—Subúditi nun luágu liábinba lan Mesías le gíribei Crístu, dánmeti liábin, lafúnraanguagüdübei sun cátei woun.

²⁶ Ába laríñagun Jesúsu tun.

—Áu Mesías ligía.

²⁷ Ligíati jachülürün láni disípulugu, ába laweíridun janígi láu jadáriruni Jesúsu adímureja túma ában würi, úati ni ában ganígiti lun lálügüdajan ca lan tabúseerubei o ca lan uágu layánuja túma.

²⁸ Ábati tígirunun würi tugúya tidína, ába tídin ubúrugú ougaña gürígia, ába taríñagun joun.

²⁹ —Jigoúgu jaríja ában eyéri aríñaguti sun cátei le adüga náalibei nun. ¿Mámadügü funásan ligía Crístubei?

³⁰ Ábati jóúdingua ubúrugugiñe lun le ñíjin lubeí Jesúsu.

³¹ Añájati buga disípulugu ayúmuragua lun Jesúsu lun leígin.

³² Laríñaga joun.

—Níjein cátei lun neígini le ibídiñeti jun.

³³ Ábati jagúmeserun disípulugu álügüdagua jámagua, ába jaríñagun.

—¿Máfuna barújaña eígini lun?

³⁴ Ába laríñagun Jesúsu joun.

—Nadügüni lugúndan le oúnajabalina, agúmuçhei luwádigimari, ligía neíginbei.

³⁵ Jugúya aríñagatün. “Níjeingua gádürü játi lubá alúbajani.” Ánjein áu, nariñajare jun. Arija jumeí nádü, dánjali lun lalúbajoún.

³⁶ Le ñadágimeinbei alúbaja, ibíja lumúti lafáyeiruaja, áni cáteiti le lalúbajabei, gürígia, lun jabíjini ibágari le magúmuchaditi siélu, lun lagúndaarun le ábunagubei úara lúma le alúbajabei.

³⁷ Quei le lubeíbei laríñawagún. “Ámu le ábunagubei, ámu le alúbajabei.”

³⁸ Oúnaja náadün alúbaja le ñí lubei mábunagun jumá, ámu ábunagubaña, jugúya alúbaja.

³⁹ Sarágu jáña lílana fulásu ligía le lání Samária afíñerutiña luágu Jesúsu láu taríñagun wúri tugúya joun luágu aríñaga lání sun le adüga táalibei tun.

⁴⁰ Dánti le jachülürünbei Samariána le ñí lubei Jesúsu, ába jayúmuragun lun lun leréderun jáma. Ába leréderun bián wéyu ñi,

⁴¹ ábaya jafíñerun sarágu gürígia dan le jagáambunbalin le laríñagubei.

⁴² Ábati jaríñagun tun wúri tugúya.

—Mámarügaali luágu le baríñagubei woun wafíñera, ladüga agáamba wamáali gíñe lúmagine, áni subúdi wamúti luágu ligía lan Crístubei le lasálbaja ubóu.

Lareídaguagüdüni Jesúsu liraü ában ñadágimeinti lúma urúei

⁴³ Bián wéyu lárigiñe, ába láfuridun Jesúsu Samáriagiñe, ába lasígiruni luweíyasun loubawagun Galiléa,

⁴⁴ mídinti lageíra quei laríñaguni Jesúsu guánarü luágu madügüniwa lan gásu láu ában proféta lídan guánarü lageíra.

⁴⁵ Dan lachülürünbei Galiléa, resíbi jamúti lílana fulásu buídu, ladüga ñüdüñ jamá gíñe lídan fédu le lánina páscua Jerusalén áni aríja jamúti sun le ladügübei lídan fédu ligía.

⁴⁶ Ábayati lagíribudun Jesúsu lídoun fulásu le Caná le lídaanbei Galiléa, le ñí lubei lasáriraguagüda dúna lun diweínme. Ñíñeinti ában wügüri weíriguti, ñadágimeinti lúma urúei, níjein ában liraü sánditi lídan fulásu le gíribei Caper-naúm.

⁴⁷ Dan lagáambunbei wügüri ligía luágu ñübinjali lan Jesúsu Judéagiñe lun Galiléoun, ába lídin aríjei, ába layúmuragun lun lun lídin lúbiñe lun lareídaguagüdüni liraü, ladüga madíseeli lan lun loúnwen.

⁴⁸ Ába laríñagun Jesúsu lun.

—Jugúya, ánjaün maríjin miláguru, mafiñetün.

⁴⁹ Laríñaga wügüri ligía lun.

—Queímoun furése lubáragiñe loúnwen niraü.

⁵⁰ Ábati laríñagun Jesúsu lun.

—Giríbubá búbiñoun, areídagua biraü.

Ába lafíñerun wügüri ligía luágu le laríñagubei Jesúsu lun, ába lídin.

⁵¹ Dan layárafadun tun lúban, ába jayábin lumúsuniña lubároun, ába jaríñagun lun.

—Magádieeli biraü.

⁵² Ába lálügüdüniña ca lan óra lagúmesera liraü areídagua, ába jaríñagun lun.

—Gúñaarü ladaünrün ában rábounwéyu lagídara abíruaü lueí.

⁵³ Ába larítagni luágu ligía lan óra laríñagun Jesúsu lun luágu areídaguaali lan liraü, ába lafíñerun luágu Jesúsu jáu sun lufámilian.

⁵⁴ Ligía libíaman miláguru le ladügübei Jesúsu dan le lagíribudunbei Judéagiñe lun Galiléoun.

5

Lareídaguagüdüni Jesúsu wügüri adádagaraali le Betédana

¹ Lárigiñe cátei le, jadügüña juríu ában fédu, ába lagíribudun Jesúsu Jerusaléoun luágu fédu ligía.

² Ñi Jerusalén, yaráfa lun béna le gíribei Jabéneri Mudún, níjein ában dúna, Betésda líribei lídan jerérun juríu, seíngüñein lubéneri.

³ Sarágu jáña sánditiña roun ñi múarugu, ñíñanu maríjintiña, meíbuguntiña, jáma derégüdaña, jagúrabajañein lánjingichagun dúna.

⁴ Ladüga níjeinja dan, liábin ában ánjeli siélugiñe, ába lánjingichaguni dúna ligía, léti furúmiñeti sánditi le adáburuti lídoun dúna ligía lárigi lánjingichagun, ába lareídagun furúmieguarügü sándi le luágubei.

⁵ Ñíñeinti ában wügüri, daráandi-wídü irúmu láu láu sándi,

⁶ dan laríjnbalin Jesúsu wügüri ligía roun, subúdileí átiri lan dan láu ítara, ába laríñagun lun.

—¿Buséntibu bareídagun?

⁷ Ába loúnabun le sándibei.

—Úati cába lan anügana lídoun dúna dan le lánjingichagun. Ságü nálugun nadáburun, dabújali ámu nubáragiñe.

⁸ Ába laríñagun Jesúsu lun.

—Sarába, budáboun bubárari, beíba.

⁹ Lídan óra ligía, ába lareídagun, ába labúdnun lubárari, ába lagúmeserun eíbuga. Queíti lidáani lubeí eméraaguni wéyu ligía,

¹⁰ ába jaríñagun juríu lun le areídagubei.

—Wéyu le eméraaguagülei ugúñe, mouñ lumuti banügünun bubárari buoúgua.

¹¹ Ába laríñagun joun.

—Le areídaguagüdübalina aríñagubei nun. “Budáboun bubárari, beíba.”

¹² Ába jaríñagun lun.

—¿Cáteigi le aríñagubei bun. “Budáboun bubárari, beíba”?

¹³ Ibídiñetiti lun ca lan areídaguagüdübalin, ladüga gíbetiña gürígia ñi áni ñüdünja bugáti Jesúsu.

¹⁴ Lárigiñe, ába ladúnragun Jesúsu lúma, témpulurugu, ába laríñagun lun.

—Guetó, quei areídaguagüdübalin lubeí, mafígounjadügüyabá lueí ladágarun ámu cátei janárimetimaati buágu.

¹⁵ Ábati lídin, ába lawísaruniña juríu luágu Jesúsu lan areídaguagüdübalin.

¹⁶ Ligía lébubei jeíbaajani juríu Jesúsu lun jáfaruni jilágubei ladüga buri ladáaguni cátei líbe le lídan wéyu le eméraaguagülei.

¹⁷ Ába laríñagun Jesúsu joun.

—Ñadágimeinti Nüguchi chülü lúmoun dan le, áu ñadágimeintina gíñe.

¹⁸ Ligiatimaati jabúseerunbei juríu jáfaruni jilágubei, mámarügü ladüga lálalachaguni lúru du le lánina wéyu le eméraaguagülei, ladüga gíñe líchaagun lúngua quei Búngiu láu laríñagun luágu Lüguchi lan.

Lugúmadin Liraü Búngiu

¹⁹ Ábati laríñagun Jesúsu joun.

—Nínárün jáu, luágu siñá lan nadügün, áu le Liraü Búngiu, ni cáta láu náni núngua, le rügüñein naríjubei ladügün Nüguchi, nadüga. Sun le ladügübei Búngiu Úguchili, adüga numúti gíñe, áu le Búngiu Irájü,

²⁰ ladüga jínsiñetina lun Búngiu, arúfuda lumúti sun le ladügübei nun, áni larúfuduba cátei weínamutimaati nun, le lúnti laweíridun janígi láu.

²¹ Ítara quei lásaaragüdüniña Búngiu Úguchili jiláaña lídaangiñe ouweni ába líchugun ibágari joun, ítara líña gíñe níchugun, áu le Búngiu Irájü, ibágari joun ja nabúseerun.

²² Magúseragüdünti Búngiu ni ában, rúrügü lumúti sun ubáfu nun, áu le Liraü, lun nadügüni,

²³ lun sun lan gürígia íchigei ában méme inébesei le jíchugubei lun Búngiu Úguchili nun. Le míchuti inébesei nun, áu le Búngiu Irájü, míchuti gíñe inébesei lun Búngiu Úguchili le oúnajabalina.

²⁴ ‘Nínárün jáu, luágu le lan eténiruti lun le naríñagubei lun, afíñe ligía luágu le oúnajabalina, gabágariti le magúmuchaditi, masíadirúnwabei giñe, sügüjali lídaangiñe féridi lídoun ibágari le magúmuchaditi.

²⁵ Nínárün jáu luágu nítebei lan dan, áni niján dan ligía, dánme le jagáambuni jiláaña numálali, ja nüdümbaña láu le nubeíbei, gabágaribaña.

²⁶ Ladüga gabáfuti Búngiu Úguchili lun líchugun ibágari, rújali gíñe ubáfu nun, áu le Búngiu Irájü, lun níchugun ibágari,

²⁷ rújali gíñe ubáfu nun lun nagúseragüdüniña gürígia ladüga Wügüri Garaüwarügüti áu.

²⁸ Maweíridalá janígi luágu le, ladüga lachülürüba dan lun jagáambuni sun jiláguaaña numálali,

²⁹ ábame jáfuridunga lídaangiñe jamúaja. Já meja arúfudubalin luágu nánigu jamá láu jadügüni buíti ubouágu, jásaaruba lun jaganoún lúma Búngiu lun sun dan, ánjañati ja arúfudubalin luágu lánigu jamá Máfia láu jadügüni wuríbani, jásaaruba lun jasíadirúniwa lun máfiougati lun sun dan.

Larúfuduni Jesúsu lagúmadijan

³⁰ ‘Siñáti nadügün ni cáta láu náni núngua. Quei laríñawagúniwa nun, ítara líña nagúseragüdün, áni buíti ligáburu nagúseragüdün ladüga mouchun nan lun nadügüni le nabúseerubei, lueidügüya le labúseerubei Nóguchi le oúnajabalina.

³¹ Ánjein áuba lubeí geféen nuougua, mounti le naríñagubei.

³² Níjein ámu le geféenbei luágu náni fuleísei, áni subúditi nun luágu le lan laríñagubei nuágu, gebégiti.

³³ Jugúya oúnajatün álügüdei Juan nuágu, áni le loúnabagülebei jun, inárüni.

³⁴ Áu magúrabuntina ladímurejan ni ában wügüri luágu nufúleisein, narítaguagüda rügüñaadün luágu le laríñagubei Juan nuágu lun gayáraabei lan jafiñerun nuágu lun jasálbaruba lan.

³⁵ Ítara líña meja Juan quei ában lámpu le durúnguati, ru ligía larúgounga, áni jugúya aráanseñu jíña méjati lun jerésibiruni larúgounga ligía luágu murúsun dan.

³⁶ Níjein ában cátei luágu nufúleisein buítimaati sügü láu le laríñagubei Juan. Lé buri cátei le nadügübei, le méme buri uágubei laríñaga Nóguchi nun lun nadügüni, arúfuda lumúti luágu Nóguchi lan oúnajabalina le tímatimaati.

³⁷ Nóguchi le oúnajabalina, arúfuda láali luágu áu lan Liraü le oúnajoúbei lun nasálbaruniña gürígia ubouágu, láu sun magáambun jumágili lan lumálali Búngiu, maríjin jumeí.

³⁸ Mebélugili lerérun jídoun, ladüga mafíñetün nuágu, áu le loúnajabei.

³⁹ Atúriaja jumútu Lerérun Búngiu láu sarágu goúnigi, ladüga agúraba jumá jadáriruni ibágari le magúmuchaditi tídan, láu sun líra, líburu tugúya adímurejaboun nuágu,

⁴⁰ áni májatün jiábin númoun lun jibíjini ibágari ligía.

⁴¹ ‘Máluajantina lun janügünina gürígia weírigu.

⁴² Gáma lúmoun, subúdi numútün, áni subúdi numúti luágu mísiñen lan Búngiu jun.

⁴³ Áu, lueígiñe loúbadina Nóguchi niábin, áni jugúya, merésibirun jumútina, ánjein nübin ámu láu lání lúngua, ligíaba jerésibira.

⁴⁴ ¿Ída lubásan jafíñerun nuágu, resíbitünga uweíriguni júmagiñegua, máluajan jumúti uweíriguni le lúmagiñeti Búngiu le ábanrügüti?

⁴⁵ Marítagua jumátia luágu níchuguba lan jidúnrun ligíbugiñe Núguchi, Moisés guánarügüba íchiga jidúnrun, le guánarügü uágubei jíchigei jeménigin.

⁴⁶ Ladüga, lun jamúga afíñe jumá luágu le lariñagubei Moisés, jafíñeruña jamúga gíñe nun, ladüga abürüjati Moisés nibügürü.

⁴⁷ Ánjein mafiñen jubei luágu le labürüjabei, ¿ída lubáti jafíñerun luágu le nariñagubei jun?

6

*Leígagüdün Jesúsu seíngü mílu wügüríña
(Mt 14.13-21; Mr 6.30-44; Lc 9.10-17)*

¹ Lárigiñe, ába lídin Jesúsu loubáfurugun dúna le Galiléa, le méme gíñe dúna le gíribei Tibérias.

² Sarágu jáña gürígia afálarei ladüga jaríjini buri miláguru le ladágubei, láu lareídagugüdüniña sánditiña.

³ Ábati laweínrun Jesúsu luágun ában wübü, ába lañúurun ñi jáma láni disípulugu.

⁴ Yaráfaaliti páscua, le jafédun juríu.

⁵ Dan laríjinbei Jesúsu luágu sarágu jáña lan gürígia afálaruti, ába lariñagun lun Felípe.

—¿Jalíabasan wagáñija eígini joun sun gürígia ja?

⁶ Lariñagunbalin líra lúnrügü lagáambun cába lan lariñaga Felípe, Jesúsu, subúdi láali cába lan ladüga.

⁷ Ábati lariñagun Felípe lun.

—Ni bián-san fiádürü fein louguaboun lun tafánreinjóuniwa murúsun murúsun jádan sun gürígia ja.

⁸ Ábati lariñagun Andrés, ában gíñe jádaangiñe disípulugu, le lamúlen Simón Pédro, lun.

⁹ —Niján ában irájü ya, nújein seíngü fein lúma, jáma bián úduraü, louguabei líra joun sarágu gürígia.

¹⁰ Ábati lariñagun Jesúsu.

—Ariñaga jumá joun súngubei lun jañúurun.

Ñíñanuti jawára seíngü mílu wügüríña bougudin jaweí würíña jáma irájüñü. Queíti ñíñein lan sarágu sagádi lídan fulásu ligía, ába jañúurun.

¹¹ Ábati lanügünun Jesúsu fein lújaburugu, lárigiñe líchugun eteíngiruni lun Búngiu, ába líchugunun joun láni disípulugu, ába jafánreinjanun disípulugu jádan sun ja ñúnbaña. Ligía méme ladüga jáu úduraü, ruínaleí sun le jabúseerubei joun.

¹² Dan le quimúleña, ába lariñagun Jesúsu joun láni disípulugu.

—Abúdaja jumeí sun le ígiragubei, mabúlegu lámuga ni cáta.

¹³ Ába jabúdajani, ába jabuínchagüdün dúusu faníñe láu tífe fein le ígiragubei tídaangiñe seíngü fein.

¹⁴ Dánti le jaríjinbalin gürígia miláguru le, le ladügübei Jesúsu, ába jaríñagun.

—Inárüni luágu niján lan proféta lé meja lúnbei liábin ubouágun.

¹⁵ Queíti lasúbudiruni Jesúsu luágu busén jamá janügüni láu érei lun jadügüni urúeime, ába lídin lábugua luágun wübü.

*Leíbugun Jesúsu ligíbuagu dúna
(Mt 14.22-27; Mr 6.45-52)*

¹⁶ Dan le lagúñedunbei, ába jarágachun láni Jesúsu disípulugu lárün dúna,

17 ába jádinagun tídon ában ugúnein, ába jagúmeserun ánjiñuragua lun jachülürün Capernaúm. Búrigaaliti, machülüti Jesúsu jámoun.

18 Ába lagúmeserun garábali áfuragua jére, ába lérougadun.

19 Dan le awáanseña luára seíngü o sísi quilómetros, ligía jaríjin liábin Jesúsu tuágun ugúnein, eíbugeina ligíbuagu dúna, ába janúfudedagun.

20 Ába laríñagun joun.

—Manúfueda jumá, áu le.

21 Ábati jerésibiruni láu ugúndani tídan ugúnein, ába jachülürün lídon fulásu le ñíjin lubeí jóudin lídan murúsun óra.

Jáluajani gürígia Jesúsu

22 Larúgan, ába jaríjin gürígia ja eréderubaña loubáfurugu luágu ñüdünja jamá buga disípulugu tídan ugúnein to ñíboun áni tugúya rügüñoun ñi, áni mídin lan Jesúsu jáma.

23 Sunti dan ligía, ába tiábingua ugúnein ubúrugugiñe Tibérias lun lídon ában fulásu yaráfa lun le ñi lubei jeígoun fein lárigi leteíngirun Jesúsu tuágu.

24 Dánti jaríjini gürígia luágu úa lan Jesúsu ñi, ni láni disípulugu, ába jádinagun tídon ugúnein buri tugúya, ába jóudin Capernaúm áluajei.

Jesúsu, fein to lánina ibágari

25 Dan le jachülürünbei loubáfurugu dúna, ába jadáriruni Jesúsu, ába jaríñagun lun.

—Maésturu, ¿ída búgasan biábin?

26 Ába laríñagun Jesúsu joun.

—Nínárün jáu luágu ladüga lan jeígin darí lun jaquímuledun jáluajana, máma ladüga gunfaráanda jumáni laníchigu buri miláguru.

27 Madíjerida jumá luágu eígini le gagúmuchaditi le lúntibei júgubu, áluaja jumeí eígini tun juwáni, le íchugubei ibágari magúmuchaditi. Ligía eígini le lúnbei níchuguni jun, áu Wügüri Garaüwarügüti, ladüga rúlaali Búngiu Úguchili ubáfu nun lun níchuguni ibágari ligía.

28 Ábati jaríñagun lun.

—¿Ída lubásan wadüga lun woúdin láu le lubeíbei Búngiu?

29 Ába laríñagun Jesúsu joun.

—Le labúseerubei Búngiu, lun jafíñerun nuágu, áu le loúnajabei.

30 Jaríñagati lun.

—¿Cábagi seíni gayára barúfudun woun lun wafíñerun buágu? ¿Cági cátei badügübei?

31 Binádu wagübürigu jóutiña meja fein to gíriboun maná lídan fulásu mageírawati, quei taríñaguni Lerérun Búngiu. “Jóügüda lumútiña Búngiu fein to siélugiñetu.”

32 Ába laríñagun Jesúsu joun.

—Nínárün jáu luágu máma lan Moisés íchugubarun fein siélugiñetu tugúya joun, Núguchi íchugubei fein joun áni ligía gíñe íchugubarun fein siélugiñetu jun to tímatimaatu.

33 Ladüga fein to líchuguboun Búngiu, tugúya to aráriruboun siélugiñe áni rúti gíñe ibágari joun lílana uboú.

34 Ábati jaríñagun lun.

—Rúboun fein tugúya woun súnwandan.

35 Ába laríñagun Jesúsu joun.

—Áu fein to íchuguboun ibágari. Le ñübinti númoun, malámadügüyaarume luwáni, le afíñeruti nuágu, mamágürabudügüyaaru giñe luwáni.

36 Quei le nubeíbei jun, jugúya maffñetün láu sun aríja jumáadina lan.

37 Sun gürígia ja líchugubaña Nóguchi nun, ñübintiña nun, játi ñübintiña númoun mabúgun nubáña.

38 Mára niábiña siélugiñe lun nadügüni nugúndan, le náni núngua, niábiña lun nadügüni lugúndan le oúnajabalina.

39 Léti labúseerubei Nóguchi le oúnajabalina, lun meféridirun nan ni ában jádaangiñe ja líchugubaña nun, lun sarágüdarügü nániña lídaangiñe oúweni lídaanme lagúmujoún wéyu.

40 Le labúseerubei le oúnajabalina, lun sun lan ja anügütina quéisi Liraü Búngiu, afiñe jagía nuágu, lun gabágari jamá le magúmuchaditi, áni násaaragüdübaña lídaangiñe oúweni lídan lagúmujoún wéyu.

41 Ába jagúmeserun juríu adímureja wuríba luágu Jesúsu ladüga laríñagun luágu ligía lan fein to aráriruboun siélugiñe.

42 Ába jaríñagun.

—¿Ma funági Jesúsu le liraü José le? Subúdi wamúti lúguchi túma lúguchu. ¿Ída liñáti laríñagunbei luágu siélugiñe lan larárita?

43 Ábati laríñagun Jesúsu joun.

—Madímureja jumá nuágu.

44 Siñáti liábin ni ában númoun ánjein máma lubeí lanügün Búngiu Úguchili le oúnajabalina, áni násaaragüdübei lídaangiñe oúweni lídan lagúmujoún wéyu.

45 Laríñajare tídan líburu to jerérun profétagu. “Larúfudajaba Búngiu joun súngubei.” Sun lubeíti ja agáambubalin Búngiu Úguchili, furéndeí jagía lúmagiñe, ñübintiña númoun.

46 ‘Mára jamúgatia luágu níjein lan aríjiti Búngiu Úguchili. Áu le ñübinbei lúmagiñe Búngiu, áu rügüñein aríjei.

47 Ninárün jáu luágu le lan afiñeti nuágu, gabágariti le magúmuchaditi.

48 Áu fein to íchuguboun íbágarí.

49 Joutiña binádu jagübürigu fein to maná lídan fulásu mageírawati áni láu sun luwúyeri jiláguatiña.

50 Áu, tuágu fein to aráriruboun siélugiñe nadímureja, lun ja lan eígitu, lúmounbaña Búngiu.

51 Áu méme fein wínwantu tugúya to aráriruboun siélugiñe, le eígitu tídaangiñe fein tugúya, labágariduba le tímatimaati lúma Búngiu lun súnwandan. Fein to lúnboun níchugunun, nógubu guánarü, níchugubei lun gayáraabei lan jabágaridun gürígia lun sun dan lúma Búngiu.

52 Ábati jeréderun juríu adímureja jámagua, ába jaríñagun.

—¿Ída lubásan leígagüdüni le lúgubu guánarü woun?

53 Laríñaga Jesúsu joun.

—Ninárün jáu luágu ánjaün lan meígin lídaangiñe nógubu, áu Wügüri Garaüwarügüti, mátun jumeíme níta, mabágaribadün.

54 Le eígitu nógubu, gurálei níta, gabágariti tímatimaati le magúmuchaditi, áni násaaragüdübei lídaangiñe oúweni lídan lagúmujoún wéyu.

55 Ladüga eígini le tímatimaati nógubu, uníñein le tímatimaati níta.

56 Le eígitu nógubu, gurálei níta, lídaañein ában núma, áu lúma.

57 Úguchili le oúnajabalina, gabágariti, áni áu, gabágaritina gíñe lídaangiñe, ítara méme líña, le awínwanduti nídaangiñe, gabágaribei nídaangiñe.

58 Tuágu fein to aráriruboun siélugiñe nadímureja. Mítaraantu fein to quei maná le jeígubei binádu jagübürigu, láu lan sun luwúyeri jiláguatiña, le eígitu tídaangiñe fein to, labágariduba tímatimaati lun sun dan lúma Búngiu.

⁵⁹ Lídán adámuridaguni tídan jalígilisin juríu to Capernaúmboun, ñi larúfudajei Jesúsu cátei le.

Dimúrei lánina ibágari magúmuchaditi

⁶⁰ Sarágu jáña jádaangiñe ja afálarubalin Jesúsu, dan le jagáambunbalin arúfudajani le, ába jaríñagun.

—Cátei le laríñagubei, jénreenguti lerésibirúniwa, ¿cábasan adüga gásu láu?

⁶¹ Ába lasúbudiruni Jesúsu luágu jadímurejaña lan luágu cátei ligía, ába laríñagun joun.

—¿Wuríbatí láburujan líra jun?

⁶² ¿Cába jamúga funáti asúsereda ánjana jamúga jaríja, áu Wügüri Garaúwarügüti, awárira nárigoún siélun lé meja ñi nubei furúmiñe?

⁶³ Náni Espíritu, ligía íchugubei ibágari tímatimaati, núguburügü, siñáti líderagunün. Áni sún buri cátei le naríñagubei jun, máma luáguti eígini le lúnti jurágeirugu, luáguti eígini le túnti juwáni, le íchugubei ibágari magúmuchaditi.

⁶⁴ Áni añájeingua jídaangiñe, mafiñetiña.

Ladüga lúmagiñe furúmiñeti dan, subúdi láña Jesúsu cátaña lan mafiñebaña, lúma cátei lan le lúnbei lalúguruni.

⁶⁵ Ába laríñagun.

—Ligía naríñagunbei jun luágu siñá lan liábin ni ában númoun ánjein máma lubeí Núguchi Búngiu agúarubei lun.

⁶⁶ Lúmagiñe dan ligía, sarágu jáña jádaangiñe ja afálarubalin Jesúsu, ába jígiruni, ába meíbugunjaña lan lúma.

⁶⁷ Ábati laríñagun Jesúsu joun dúusu disípulugu.

—Ángi jugúya, ¿buséntün gíñe jídin nueí?

⁶⁸ Ába loúnabun Simón.

—¿Cábagi úmoun wouúdin? Dimúrei buri le baríñagubei, lánina ibágari tímatimaati le magúmuchaditi.

⁶⁹ Wagía afíñeediwa, áni subúdi wamúti luágu amürü lan Crístubei le Liraú Búngiu wínwanti.

⁷⁰ Ába laríñagun Jesúsu joun.

—¿Másan áu anúadajabalün dúusugubei jugúya? Láu sun líra, níjein ában jídaangiñe láni Máfia.

⁷¹ Dan laríñagunbalin Jesúsu líra, luáguñein Júdas, le liraú Simón Iscarióte, ladüga ligíaba lan alúgurei, láu sun ában lan jádaangiñe dúusu disípulugu ligía.

7

Mafiñeruntiña lamúlenu Jesúsu luágu

¹ Lárigiñe sun cátei le, ába eíbugañaja lan Jesúsu loúbawagu Galiléa, mabúseerunti leréderun Judéa ladüga ñi buséntiña juríu jáfaruni jílagubei.

² Queíti yaráfaali lan ában lídaangiñe jafédun juríu le gírubei tufédun dibásein,

³ ába jaríñagun lamúlenu lun.

—Meréderabá ya, beíba Judéoun aríja jamámugei gíñe bánigu ja ñíbaña cátei lé buri badügubei.

⁴ Dan le busén lan ában gürígia lasúbudirúniwa, madügün lumúti buri cátei arámudaguarügü. Queíti adüga ban cátei líbeina le, adügabeí ligíbugiñe sun ubou.

⁵ Ni íbini lamúlenu mafiñetiña luágu.

⁶ Ábati laríñagun Jesúsu joun.

—Machülügili dan lun nídin Jerusalén luágu fédu ligía, ánjein jun, buíti furúmierügü óra.

⁷ Siñáti jiyéereegudún joun ja lánina ubouú le, anáti áu, iyéereegutina joun, ladüga geféentina luágu wuríba lán buri cátei le jadüğübei.

⁸ Jeíba lídan fédu, áu mídinbadina guetó, machülügili nidáani lun nídin.

⁹ Lárigiñe laríñaguni sun le joun, ába leréderun Galiléa.

Jesúsu lídan fédu le tánina dibásein

¹⁰ Lárigiñe jóudin lamúlenú, ligía lídin Jesúsu lídan fédu ligía, mafúnraangunrügü líña, camá jamuga mabúseerunti larijóuniwa.

¹¹ Ítara líña jáluajani juríu lídan fédu ligía, ába jaríñagun.

—¿Jageí funásan wüğüri le?

¹² Sarágu jañáti adímurejatiña luágu jádan güriía. Níñanu aríñagutiña luágu ában lan wüğüri buíti ligía, jíbiri aríñaga. “Mabuídunti, yéegua lumútiña güriía.”

¹³ Úati ni ában adímurejati furáangu luágu, ladüga janúfude jaweí juríu.

¹⁴ Lamídounjali fédu lúmagua, ligía lebélorun Jesúsu témpulurugun, ába lagúmeserun arúfudaja.

¹⁵ Ába laweíridun janígi juríu, ába jaríñagun.

—¿Ída líñasan lasúbudirunbei le sarágu cátei, matúriajaanga ligía?

¹⁶ Ába laríñagun Jesúsu joun.

—Le narúfudajabei, máma nídaangiñeti, lídaangiñeti le oúnajabalina.

¹⁷ Ánjein níjein lubeí ában le aráanseti lun ladüğüni le labúseerubei Búngiu, lasúbudirubei ánjein lúmagiñeti lubeí Búngiu le narúfudajabei lúmoun luágu lan náni núngua nadímureja.

¹⁸ Le adímurejabei luágu lání lúngua, ladüğüni lun janüğüni güriía weíri, le ouchubei lun lanüğüniwa le oúnajabalin weíri, ligía aríñagubalin inárüni, áni máma ligía biángua tigíbu.

¹⁹ ‘¿Ma inárüni luágu rúlaani Moisés lúrudu jun? Láu sun líra, úati ni ában jídaangiñe úaraduti lúma lúrudu ligía. ¿Ca uágu jabúseera jáfarunina jilágubei?

²⁰ Ába jaríñagun lun.

—Níjein espíritu wuríbati bídan, ¿ca busénbei láfarunibu jilágubei?

²¹ Ába laríñagun Jesúsu joun.

—Luágurügü ában cátei le nadüğübei lídan wéyu le eméraguagülei laweírda janígi sun jugúya.

²² Arúfudaja lumúti Moisés luáguti jagáburi juríu le circuncisión, (láu sun máma lan ligía agúmeserubalin igáburi ligía, jagúmeserun binádu lagübürigu lubáragiñe), ligía lébubei lerésibirun ában irájü circuncisión íbini lídan lan wéyu le eméraguagülei.

²³ Ánjein adüga jubálin líra íbini lídan lan wéyu le eméraguagülei lueírügü jadúraaguni lilúrudun Moisés, ¿cáti uágu jagáñida núma lueígiñe nareídaguagüdüni lúgubu ában wüğüri dayárugubei lídan wéyu le eméraguagülei?

²⁴ Masáminara jumá luágu cátei quéisi larijiniwa, samína jumá luágu quéisi lubeí.

Ladímurejan Jesúsu luágu ladügwagún

²⁵ Ábati jagúmeserun jádaangiñe ja aganóubaña Jerusalén álügüdaja.

—¿Másan niján le jáluajabei lun jáfaruni jilágubei?

²⁶ Nijánga adímureja ligíbugiñe guríriguaü, áni úati ni ában aríñaguti ni cáta lun. ¿Léfunasan afíñe jamá gumádimatiña luágu wüğüri lan le Crístubei?

²⁷ Subúditi woun jalíagiñe lan liábin le, ánjeinti dánme le liábin Crístu, ibídiñebei ni ca un jalíagiñe lan liábin.

28 Dan lagáambubalin Jesúsu cátei le, dan larúfudajaña lubeí témpulurugu, ába laríñagun rein.

—¡Subúdi jumútina lubeíti, subúdi jumeí jalíagiñe lan niábin! Máma láu nání núngua niábin, ában le inárünibeí luágu níjein lan, ligía oúnajabalina, áni ibídiñeti jun.

29 Áu, subúdi numúti ladüga lúmagiñe lan niábin, áni ligía oúnajabalina.

30 Ába yebéti jabúseerun jadáürüni, úati ni ában agúuruti luágu ladüga machülügili lan dan lun loúnwen.

31 Sarágu jáña afíñerutiña luágu, ába jaríñagun.

—Dánme le liábin Crístu, ¿ladügüba funági ámu miláguru sügü láu wügüri le?

Jóúnajan fariséogu polisía adáürei Jesúsu

32 Ába jagáambuni fariséogu le jaríñagubei güriégia luágu Jesúsu, jagía jáma jábutigu fádirigu, ába jóúnajan polisía témpulurugugiñe lun jadáürüni.

33 Ábati laríñagun Jesúsu.

—Murúsunrügübei dan neréderun júma ya, ábame nagíribudun lúmoun le oúnajabalina.

34 Jáluajabadina, madári jubádina, ladüga siñábei lan jídin le ñíjinbadina lubeí.

35 Ábati jagúmeserun juríu álügüdagua jámagua.

—¿Jalíñounba funásan lídin le siñábei lubeí nege wadáriruni? ¿Leíbuga funa jámoun juríu ja jagánaguabaña güriégia ja güriégu, lun larúfudajan joun güriégu?

36 ¿Ca míni lan láu laríñagun woun. “Jáluajabadina, madári jubádina ladüga siñábei lan jídin le ñíbadina lubeí”?

Líseesen dúna wínwanti

37 Le lagúmujoún wéyu lídan fédu ligía, ligíatima weírigubei. Lídaanti wéyu ligía, ába laráramun Jesúsu, ába laríñagun láu umálali reínti.

—Le mágürabutu luwáni, ñübinlá númoun, gurála.

38 Le afíñeti nuágu, láwiyujaba dúna wínwanti tídaangiñe lanígi, quei taríñaguni Lerérun Búngiu.

39 Laríñaguña Jesúsu láu líra luágu ja lan afíñerutiña luágu, jerésibirubei lan Sífiri Sándu, dan ligía, miábingili Sífiri Sándu ladüga magíribudungili lan Jesúsu larigoún siélun lídoun luweírigun.

Fánreinguaü jádan güriégia

40 Ñíñanu jádaangiñe güriégia, dan le jagáambunbalin cátei le, ába jaríñagun.

—Inárüni luágu niján lan proféta lé meja lúnbei liábin.

41 Jaríñaga jíbiri.

—Niján Crístubei.

Jaríñaga jíbiri.

—¿Ída lubásan Galiléanabei lan Crístu?

42 Taríñajare Lerérun Búngiu luágu ladügawagunbei lan urúei Davíd Crístu, áni Beléngiñetibeí lan, fulásu meme le ñígiñeti lubeí Davíd.

43 Ába lubeíti jafánreinragun güriégia lueígiñe Jesúsu.

44 Ñíñanu yebe abúseerutiña jadáürüni, úati ni ában adügüti.

Mafíñetiña gumádimatiña luágu Jesúsu

45 Ába jagíribudun polisía ja tánina témpulu jarigoún jámoun fariséogu jáma jábutigu fádirigu. Ába jaríñagun joun polisía.

—¿Ca uágu manügün jubálin?

46 Ába jaríñagun polisía.

—¡Úagili ni ában adímurejati quei ladímurejan wügüri le!

47 Ábati jaríñagun fariséogu joun.

—¿Ígiraguagüdaadün gíñe júngua lun leyéedunün?

48 ¿Níjein funági ában jádaangiñe wábutigu o jádaangiñe lan fariséogu afíñeruti luágu?

49 Ánjaña gürígia ja, ja afálarubalin wügüri ligía, ja ibídiñejabubaña lun lúrudu, íñarawagúaaña.

50 Nicodémo, le ñüdüñbei adímureja lúma Jesúsu gúñoun, ligía ában jádaangiñe fariséogu, ába laríñagun joun.

51 —Según walúrudun, siñáti wasíadiruni ában wügüri magáambunga wameí furúmiñe lun wasúbudiruni ca lan lidúnrunbei.

52 Ábati jaríñagun lun.

—¿Galiléana gíñe amürü, badímurejaanbei luágu lufúleisein? Atúriajaboún Lerérun Búngiu, basúbudirubei luágu úagili lan ni ában proféta Galiléana.

53 Ába jóúdin cáda ában jábiñoun.

8

Würi maríeitu to aganoúboun luma ámu wügüri

1 Ánjeinti Jesúsu, ába lídin luágun wübü le gíribei Olívos.

2 Larúgan bináafin, ába lagíribudun témpulurugun, ába jayábin sun gürígia lubádun, ába lañúurun, ába lagúmeserun arúfudaja joun.

3 Ábati janügün arúfudajatiña lilúrudun Moisés jáma fariséogu ában würi jadáriragun lúma ámu wügüri lueí túmari. Ába jíchugunun jamídaangua ja ñíbaña jámagua,

4 ába jaríñagun lun Jesúsu.

—Maésturu, nuján würi to, wadáriragun lúma ámu wügüri lueí túmari.

5 Laríñajare lilúrudun Moisés jawágu jíbe würiña ja, lun jáfarawagún jilágubei láu dübü. ¿Cági baríñagubei?

6 Jaríñagunbalin líra lun jaríjin lábun, lun gébuna lan jíchugun lidúnrun. Ábati lélemuchun Jesúsu, ába labürüjan múarugu láu lújabu.

7 Queíti jasígirun álügüdaguei, ába laráramun, ába laríñagun joun.

—Furúmiñeguarügü jídaangiñe le mafígounti, chüleí furúmiñeti dübü tuágu.

8 Ábaya lélemuchun, ába lasígirun abürüja múarugu.

9 Jagía, le jagáambubalin le laríñagubei, ába jasándiragun jóungua luágu gafígoun jamá, ába jáfuridunga ában ában, jagúmesera jámagiñe ja weinamutimáajañaña. Dánti le furíjaña súngubei, ába ladáriragun Jesúsu lúngua lábúgua túma würi tugúya quei teréderunbei ñi.

10 Ábati liñúraguni Jesúsu lichügü, ába laríñagun tun.

—¿Jagáñasán buga ja íchugubaña bidúnrun? ¿Úati ni ában asíadirutibu lun boúnwen?

11 Ába taríñagun lun.

—Uá, úati ni ában.

—Ábati laríñagun Jesúsu tun.

—Ni áu, masíadirun nubádibu, beíba, madügadügüyabá figoú.

Jesúsu lilámpun uboú

12 Ábaya ladímurejan Jesúsu joun gürígia, ába laríñagun.

—Áu lilámpunbei uboú, le afálarutina, libíjubei larúgounga le anügübei gürígia lídoun ibágari magúmchaditi, áni meíbugunbei lídan lubúriga.

13 Ábati jaríñagun fariséogu lun.

—Amürü, badímurejaña buíti buoúgua, mebégiti líra.

14 Ába laríñagun Jesúsu joun.

—Le naríñagubei gebégiti, láu sun áu lan adímurejabei buíti nuóúgua. Áu, subúdi numúti jalíagiñe lan niábin lúma jalíñounba lan nídin, ánjein jugúya, ibídiñeti jun jalíagiñe lan niábin ni jalíñounbadina lan.

15 Jugúya, jasáminarun nuágu queísi luwúyeri lasáminarun uboú, áu, magúseragüdüntina ni ában.

16 Ánjana jamúga agúseragüda, nadügüñein jamúga láu úarani, ladüga mámarügüba áu agúseragüda, Núguchi le oúnajabalina lagúseragüdüba giñe núma.

17 Bürüwati lídan jilúrudun luágu dan lan geféen jamá bián gürígia luágu ában méme cátei, lúnti lan lafíñerún joun.

18 Ítara liñáti áu ában le geféenbei luágu náni fuleísei, Núguchi le oúnajabalina, ligía giñe ában le geféenbei nuágu.

19 Ábati jaríñagun lun.

—¿Jageígi Búguchi?

Ába laríñagun joun.

—Jugúya, ibídiñetina jun, ni Núguchi, ibídiñeti giñe jun, lun jamúga subúdi jumánina, subúditi jamúga giñe Núguchi jun.

20 Lídan laríñagubalin Jesúsu cátei le, larúfudajaña témpulurugu lídan fulásu le ñí tubeí buri gáfu to lágei seínsu. Madáürün lumúti ni ában ladüga machülügili lan lidáni lun loúnwen.

Laríñajare Jesúsu joun luágu siñá lan jeídin ñíjinba lubeí lídin

21 Ábaya laríñagun Jesúsu joun.

—Áu, neíbuga, jugúya jáluajabadina, jóúweguba gafígounga, siñáti jídin le ñíjinba lubeí nídin.

22 Ábati jaríñagun juríu.

—¿Láfaragua funa lúngua, laríñagunbei luágu siñá lan woúdin le ñíjinba lubeí lídin?

23 Ábati laríñagun Jesúsu joun.

—Jugúya, ünabuna jugúya, ánjein áu, yágütana íñu áu. Láni uboú le jugúya, ánjein áu, máma láni uboú le áu.

24 Ligía naríñagunbei jun luágu jóúweguba lan gafígounga, ladüga ánjein mafíñen jubeí luágu áu lan áu, jóúweguba ítara.

25 Ábati jaríñagun lun.

—¿Cátabuti?

Ába laríñagun joun.

—Aríñaga náali jun lúmagiñe binárü.

26 Gayáraati jamúga naríñagun gíbeti jun luágu luríban jigáburi lun nadeínjan jun, le oúnajabalina aríñaga lumúti inárüni, áni cáteirügübei le nagáambubei lúmagiñe le oúnajabalina naríñaga joun ja lílana uboú.

27 Ánjein jagía, úati gunfaráanda jamáni láu luágu lan Búngiu ladímureja Jesúsu joun.

28 Ligía laríñagunbei joun.

—Dánme le jiñúrunina, áu Wügüri Garaüwarügüti, ligíame jasúbudiruni luágu áu lan le uágubei naríñaga luágu áu lan, áni madügün nan ni cáta luágu náni núngua, lueídügüya le larúfudajabei Núguchi nun.

29 Ladüga númañein le oúnajabalina, mígirun lágidina Núguchi nábugua, ladüga adüga náni le áubei lagúndaara súnwandan.

30 Dan le laríñagubalin Jesúsu le, ába jafíñerun sarágu luágu.

Lirájüñü Búngiu jáma lidámuniña figóu

³¹ Ába laríñagun Jesúsu joun juríu ja áñarubaña lun lerérun.

—Ánjaün asígira lun jídin surúñu láu le nubeíbei jun, jíábinba lun náni jumá disípulugu le tímatimaati.

³² Ábame jasúbudiruni inárüni, ábame lafúnraanguagüdünün inárüni.

³³ Ába jaríñagun lun.

—Linébaanfaangu Abrahám wagía, áni merédegidiwa idámunime ni ca un. ¿Ída liñáti baríñagunbei luágu furáangujadiwa lánme?

³⁴ Ába laríñagun Jesúsu joun.

—Nínárün jáu, luágu sun lan ja adáagubaña figóu, lidámun figóu jagía.

³⁵ Ában idámuni, máma jádaangiñeti família, ánjeinti ában isáani, jádaangiñeti família súnwandan.

³⁶ Ánjaün lubeíti nafúnraanguagüda, áu le Búngiu Irájü, lídaangiñe idámuni lun figóu, furáangubadün le tímatimaati.

³⁷ Subúdi náali luágu linébaanfaangu jumá Abrahám, láu sun líra, buséntün jáfarunina, ladüga mája jumá lun le nubeíbei jun.

³⁸ Áu nadímurejan luágu le larúfudubei Núguchi nun, jugúya jadügüni le jafúnrendeirubei lúmagiñe júguchi, le Máfia.

³⁹ Ába jaríñagun lun.

—Abrahám wáguchibei.

Ába laríñagun Jesúsu joun.

—Lun jamúga inárüni lan luágu lirájüñü jumá Abrahám, jadügüñein jamúga le ladügübei.

⁴⁰ Láu sun aríñaga náali lan inárüni le larúfudajabei Búngiu nun jun, buséntün jáfarunina. ¡Madügünti meja Abrahám ni cáta líbe líra!

⁴¹ Le méme ladügübei júguchi, ligía jadügübei.

Ábati jaríñagun lun.

—Mámatia wagía bástadi, ában rügüñein wáguchi, Búngiu.

⁴² Ába laríñagun Jesúsu joun.

—Ánjein jamúga Búngiu lubeí júguchibei, jínsiñetina jamúga jun ladüga lúmagiñe Búngiu niábin, áni anája ya. Máma láu náni nungua niábin, Búngiu oúnajabalina.

⁴³ ¿Ca uágu lásiñerunbei gunfaráanda jumáni le naríñagubei? Ladüga mabúseerun jumá jagáambuni náni ugánu.

⁴⁴ Máfia júguchibei, lánigu jugúya, áni buséntün jadügüni lugúndan. Gáfarajadigubeiñein Máfia lúmagiñe furúmiñeti dan. Márügüdünti lueígiñe inárüni, maríñagunti gíñe inárüni. Lídan le laríñagun iyéeni, ladímurejaña quei ligáburi, ladüga yéeti áni ligía lúguchibei iyéeni.

⁴⁵ Ánjeinti áu, quei inárüni lubeí naríñagubei, mafiñetün nun.

⁴⁶ ¿Ca jídaangiñe gayáraabei larúfuduni luágu gaffigoun nan? Ánjeinti inárüni lubeí naríñagubei, ¿cáti uágu mafiñen jubeí nun?

⁴⁷ Le lánigu Búngiu, agáamba lumúti lerérun Búngiu, ánjeinti jugúya, quei máma jubeí lánigu Búngiu, ligía mája jubeí jagáambuni.

Níjeinjali meja Crístu lubáragiñe Abrahám

⁴⁸ Ábati jaríñagun juríu lun.

—Wanárün láu waríñagun luágu máma ban ámu jaweí jagübüri Samariána, luágu gíñe níjein lan ában espíritu wuríbati bídan.

⁴⁹ Ába laríñagun Jesúsu joun.

—Úati espíritu wuríbati nídan. Le nadügübei, níchuguña inébesi lun Nüguchi, jugúya, íchiga minébeni nun.

⁵⁰ Málujajaantina inébesi núngua, láu sun níjein lan ában áluga lumúti ninébesi, áni ligía le agúseragüdübei.

⁵¹ Ninárün jáu luágu le lan adügüti gásu láu le nubeíbei, moúnwenbei lan.

⁵² Ábati jaríñagun juríu lun.

—Anáti guetó, choúru wamáali luágu níjein lan espíritu wuríbati bídan. Jiláti Abrahám, jilágua profétagu, áni aríñagagibu luágu le lan adügüti gásu láu le bubeíbei, moúnwenbei lan.

⁵³ ¿Cátabuñadíbugi lúmoun wáguchi Abrahám? Jiláti Abrahám, jilágua profétagu. ¿Ída liñáti banáangun búngua?

⁵⁴ Ába laríñagun Jesúsu joun.

—Ánjana íchiga uweíriguni nuóguá, málabei, ánjeinti Nüguchi, le méme uágubei jaríñaga luágu ligía lan Jubúngiutebei, ligía íchugubei uweíriguni nuágu.

⁵⁵ Jugúya, ibídiñeti Búngiu jun, anáti áu, subúditi nun, áni ánjana jamúga aríñaga luágu ibídiñe lan nun, yéetina jamúga gíñe quei jugúya. Subúditi Búngiu nun le tímatimaati, áni adüga numúti le lubeíbei.

⁵⁶ Abrahám lé meja binádu júguchi, gúndaati meja láu lasúbudiruni luágu lachülürüba lan nuwéyuri lun niábin uboúagun queísi asálbaragülei, buin líña láu ugúndani dan laríjini wéyu ligía.

⁵⁷ Ábati jaríñagun juríu lun Jesúsu.

—Úagubeigili ni dimí-san irúmu báu, ¿aríñagatibu luágu aríja báni Abrahám?

⁵⁸ Ába laríñagun Jesúsu joun.

—Ninárün jáu luágu lubáragiñe lan ñi lan Abrahám, anájeinjadina.

⁵⁹ Ába jabúdajan dübü lun jachüraguni luágu, ába larámudagun, ába láfuridun témpulurugugiñe, ába lásügürün jamídaangiñe, ába lídin.

9

Lareídaguagüdüni Jesúsu ában wügüri maríjinti

¹ Lídan le lásügürün Jesúsu lídaangiñe ában fulásu, ába laríjin ában wügüri maríjinti lúmagiñe lagüriajoún.

² Ába jaríñagun láni disípulugu lun.

—Maésturu, ¿cásan uágu lagüriajoúnbei wügüri le maríjinga? ¿Ladügasan jafígoun lagübürigu, o ladüga lifígoun guánarü?

³ Ába laríñagun Jesúsu joun.

—Máma ladüga lifígoun, máma gíñe ladüga jafígoun lagübürigu, lasúseredunbei ítara lun larijoúniwa le luáraabei Búngiu adüga láu lareídagun wügüri ligía.

⁴ Lúnti nadügüni luwádigimari Búngiu le oúnajabalina sun wínwangidina lan, jiláadina ligíame, siñáme nadügüni.

⁵ Sun dan anája lan ligíbuagu uboú le, áu lilámpunbei uboú.

⁶ Láriñe laríñaguni Jesúsu cátei le, ába lásuerun múarugun, ába ladügün murúsun gubégubeti láu larüre, ába lájuruduni luágu lágu le maríjinbei.

⁷ Ába laríñagun lun.

—Beíba achíbei bigíbu lídan dúna le gíribei Siloé —míni lan líra, Oúnajoúti.

Ába lídin maríjinti ligía, ába lachíbuni ligíbu ñi, dan le lagíribudunbei, aríjaali.

⁸ Játi lubésinanigu jáma gürija já meja aríjubalin amúriaja, ába jaríñagun.

—¿Másan nijáñaja le añúurubei amúriaja seínsu?

⁹ Ñíñanu aríñagutiña.

—Ánja, ligía.

Jaríñaga jíbiri.

—Máma ligía, lenége.

Ába laríñagun wügüri ligía.

—Ánja, áu.

¹⁰ Ábati jaríñagun lun.

—¿Ída liñáti aríjaadibu lubeí?

¹¹ Ába laríñagun joun.

—Wügüri le gíribei Jesúsu, ligía adügübei murúsun gubégubeti, ába lájuruduni luágu nágu, ába laríñagun nun. “Beíba lídan dúna le gíribei Siloé, ábame bachíbuni bigíbu ñi.” Ábati nídín, lásun nachíbuni nigíbu, ába naríjin.

¹² Ábati jaríñagun lun.

—¿Jageígi wügüri ligía?

Laríñaga joun.

—Ibídiñeti nun jageí lan.

Jálügüdaguni fariséogu maríjinti le areídaguagüdüwalibei

¹³ Ábati janügüni wügüri lé meja maríjinbei jagíbugiñoún fariséogu.

¹⁴ Queíti lídan lan wéyu le eméraaguagülei ladügei Jesúsu gubégubeti le áubei lareídaguagüdei maríjinti ligía,

¹⁵ ába gíñe jálügüdüni fariséogu wügüri ligía ída líña lan gayáraajali lubeí laríjin. Ába laríñagun joun.

—Ába líchugun gubégubeti luágu nágu, ába nachíbuni nigíbu, guetó aríjaadina.

¹⁶ Ábati jaríñagun jádaangiñe fariséogu.

—Le wügüri le adügübalin cátei le, siñáti loúnagüle lan Búngiu ladüga minébenti wéyu le eméraaguagülei lun.

Jaríñagati jíbiri.

—¿Ída liñáti ladáaguni buri miláguru le, ánjein gafígoun lubeí?

Ába lubeíti ñi lan fánreinguaü jádan.

¹⁷ Ábaya jálügüdüni lé meja maríjinbei.

—Ángi bugúya, ¿cági baríñagubei luágu wügüri le, queísi bugúya lubeí le laríjagüdübei?

Ába laríñagun.

—Nugúya, naríñagun luágu ában lan proféta.

¹⁸ Májatiña yebe fariséogu jafíñerun luágu maríjin lán meja wügüri ligía áni aríjaali lan guetó, darí lun jagúarun joun lagübürigu,

¹⁹ ába jaríñagun joun.

—¿Nijánsan jiraü le uágubei jaríñaga luágu maríjin gubeíñein lan lúmagiñe lagüriajóun? ¿Ída liñáti aríjaali lubeí guetó?

²⁰ Ába jaríñagun lagübürigu.

—Subúdi wamúti luágu waraü lan le, áni maríjin lan dan le lagüriajóunbei,

²¹ ibídiñeti woun ída líña lan aríjaali lubeí, ni ca lan areídaguagüdübalin lágu. Álügüda jumeí, weíriyaali, gayáraati loúnabun lueígiñegua.

²² Anúfudeiti aríñagagüdübalin líra joun lagübürigu wügüri ligía, ladüga aríñagaaña lan fariséogu luágu sun lan ja afíñerutiña luágu Jesúsu lan Crístubei, jabugúba lan tídaangiñe jalígílisin juríu.

²³ Ligía jaríñagunbei lagübürigu. “Álügüda jumeí, weíriyaali.”

²⁴ Ábayati jagúarun juríu lun wügüri lé meja maríjinbei, ába jaríñagun lun.

—Aríñagabeí inárüni woun ligíbugiñe Búngiu, wagía, subúditi woun luágu gafígoun lan wügüri líra.

²⁵ Ábati laríñagun joun.

—Ibídíñeti nun ánjein gafígoun lubeí lúmoun mafígoun lan. Le nasúbudirubei, luágu maríjin nán meja, áni guetó aríjaadina.

²⁶ Ábaya jaríñagun lun.

—¿Cásan ladügübei báu? ¿Ída liñásan ladüga lun laríjagüdünibu?

²⁷ Ába laríñagun joun.

—Aríñaga náali jun, mebéreseguntün náu, ¿cáti uágu jabúseera naríñaguniya jun? ¿Ódi buséntün gíñe jafálaruni?

²⁸ Ábati janábuni, ába jaríñagun lun.

—Bugúya, falá bumuti larúfudajan wügüri ligía, ánjein wagía, larúfudajan Moisés wafálarubei.

²⁹ Subúditi woun luágu adímureja lán meja Búngiu lun Moisés, ánjein le, ibídíñegubeíti woun jalágiñeti lan.

³⁰ Ábati laríñagun wügüri ligía joun.

—¡Amuti gíñe cátei le! ¡Ibídíñeti jun jalágiñeti lan, áni aríjagüda lána!

³¹ Subúditi woun luágu magáambun láníña Búngiu gafígountiña, ja rügüñanu ájuduragubaña lun jáma ja adügübalin lugúndan, lagáamba.

³² Magáambuñajagili luágu ni ában aríjagüdüti ában gürígia le agüriajóuti maríjinga.

³³ Lun jamúga máma lan lúmagiñe Búngiu liábin wügüri le, siñáti jamúga ladügün ni cáta.

³⁴ Ábati jaríñagun lun.

—¿Bugúyasan le agüriajóubei buin láu figoú, buséntibu barúfudajan woun?

Ába jabúguni tídaangiñe jalígílin.

Ja maríjinbaña luágu cátei lánina Búngiu

³⁵ Ába lagáambuni Jesúsu luágu bugá jamaani maríjinti meja ligía, dánti le ladúnragun lúma, ába laríñagun lun.

—¿Afíñetibu luágu Liraü Búngiu?

³⁶ Ába laríñagun wügüri ligía lun.

—Aríñagabeí nun cátei lan, afíñe námuga luágu.

³⁷ Ába laríñagun Jesúsu lun.

—Aríja báali, áu le úmabei badímureja.

³⁸ Ába lájuduragun ligíbugiñe Jesúsu, ába laríñagun.

—Afíñetina, Nabúreme.

³⁹ Ába laríñagun Jesúsu.

—Niábinbei ñájoun uboúagun lun néfegechagüdüni jágu ja ibídíñejabubaña lun cátei lánina Búngiu, lun gíñe narúfuduni luágu ja lan aríñagubaña luágu fegé lan jágu luágu buri cátei lánina Búngiu, maríjin jamá ni cáta.

⁴⁰ Dan le jagáambunbalin jádaangiñe fariséogu ja ñíbaña cátei le, ába jaríñagun lun.

—¿Baríñaguñati luágu darúñu líña lan gíñe wágu lun cátei le luáguti Búngiu?

⁴¹ Laríñaga Jesúsu joun.

—Lun jamúga ibídíñe lan cátei lánina Búngiu jun, madúnruntün jamúga luágu jífigoun, quei jaríñagun luágu subúdi jumáni, gadúnruntün.

10

Jémpulu luáguti loúnigiruniña Jesúsu lánigu queísi ában oúnigiruti mudún

¹ ‘Ninárün jáu luágu le lan mebékuti lídaangiñe lubéneri jabárierun mudún, lun lebékurun lídaangiñe ámu oúbaü, jíweruti.

² Ánjeinti le ebékurubei lídaangiñe béna, ligía le oúnigirubaliña mudún.

³ Ába lánjunrenchuni le oúnigirubalin béna béna lun, lun lebékurun, subúdi jamúti gíñe mudún lumálali. Ába lagúajan joun láu jíri, ába laságaraguniña baríerurugugiñe.

⁴ Lárigiñe laságaraguniña súngebeyi, ába lídin eíbugeina jabá jabá, ába jafálaruni ladüga subúdi jamáni lumálali.

⁵ Mídiñiña lárigi ában le ibídiñeti joun, anújararügütiña lueí ladüga ibídiñeti jamálali ámu mútu joun.

⁶ Rúlumuti Jesúsu jémpulu le joun, úati gunfaráanda jamáni le labúseerubei laríñagun joun.

Jesúsu jóuniri mudún buíti

⁷ Ábayati laríñagun Jesúsu joun.

—Ninárün jáu, áu béna le nígiñe lubeí gayára lan jayábin gürígia lun lánigu jamá Búngiu.

⁸ Ja ñúbinbaña nubáragiñe, ítara jáña queísi jíwerutiña mudún ladüga iyéeni lan jarúfudajabei, madügütiña lánigu Búngiu gásu jáu.

⁹ Áu bënabei, le ebékuruti nueígiñe, lasálbarúaba. Ítara lúba quei ában mudún le ebékuruti furí ligía baríerurugugiñe, darí ligía sagádi lun leígin.

¹⁰ ‘Jíweruti, liábin rügüña lun líwerujan, lun láfarajan lúma lun lagünrinchagun, ánjein áu, niábiña lun jibíjin ibágari, áni lun jibíjini gíbe.

¹¹ Áu, ítara níña queísi ában jóuniri mudún le buíti, le gayáraati líchuguni libágari jawágu lilügüniña mudún.

¹² Ánjein le ñadágimeinrügüti luágu fáyeiti, dan le laríjin liábin anímaalú le jabísa mudún, ába lígiruniña mudún, ába leíbaagun, ladüga máma lan oúnigiruti buíti ligía, máma gíñe lilügüniña mudún. Ábati liábin jabísa mudún, ába lawáraüdagüdüniña.

¹³ Wügüri ligía eíbaaguati ladüga luwádigimariña lan luágurügü fáyeiti, mebéresegúnti jáu mudún.

¹⁴⁻¹⁵ ‘Áu oúnigirutibeyi buíti. Ítara quei nisúbudin lun Nóguchi áni subúdi Nóguchi nun, ítara líña gíñe jasúbudin nánigu nun, subúdi jamána gíñe queísi subúdi jamáni mudún jóuniri. Rúnumuti nibágari jawágu queísi líchuguni oúnigiruti mudún libágari jawágu lilügüniña mudún.

¹⁶ Añájein gíñe ámu gürígia ja lúnbaña nánigu jamá ja mámabaña juríu, lúnti gíñe nanügüniña lun nánigu jamá. Jagáambubadina, ábame jeréderun súngebeyi lídan ában lúma ában oúnigiruti.

¹⁷ ‘Jínsiñetina lun Nóguchi, ladüga níchugubeyi nibágari luágu ubou, ligía ábayame nibíjini.

¹⁸ Magída lubeí ni ában gürígia nibágari, láuba nugúndan níchigei. Garíchatina lun níchuguni lúma lúnya nerésibiruni. Ligía cátei le laríñagubeyi Nóguchi nun.

¹⁹ Dan le jagáambubalin juríu dimúrei buri le, ábaya jafánreinragun.

²⁰ Sarágu jáña jádaangiñe aríñagutiña.

—¿Cásan uágu jadüga gásu láu, níjeingusan espíritu wuríbati lídan áni lülüjali láu?

²¹ Jaríñaga jíbiri.

—Úati ni ában le láuti espíritu wuríbati lun gayára lan ladímurejan ítara. ¿Gayáraati funági laríjagüdüniña espíritu wuríbati maríjintiña?

Merésibirun jamáni juríu Jesúsu

22 Dan ligía lidáani luríbouga, ladügüñati fédu le lánina tedéregérún témpulu Jerusalén lun Búngiu.

23 Ñíñeinti Jesúsu eíbugañaja témpulurugu luágu corredór le gírubei Láni Salomón corredór.

24 Ába jagúriridagun juríu láu, ába jaríñagun lun.

—¿Darísan ídaba bígirawa láu machouruni? Ánjein amürü lubei Crístubei, aríñagabeí furáangu.

25 Ába laríñagun Jesúsu joun.

—Aríñaga náali, mafíñetün nun. Sún buri cátei le nadáagubei láu lugúmadin Nóguchi, arúfuda lumúti furáangu.

26 Jugúya, mafíñetün ladüga máma jumá jádaangiñe nilügüniña mudún quei bugája naríñaguni jun.

27 Subúdi jamúti nilügüniña mudún numálali, subúdi numútiña gíñe, áni falá jamutina.

28 Rútina ibágari magúmuchaditi joun áni meféridirubaña, úabei gíñe agídarutiña nújaburugugiñe.

29 Nóguchi le weírubei jaweí súnqubei, ligía íchugubaliña nun, áni úati ni ában lun lagídaruniña lújaburugugiñe.

30 Áu lúma Búngiu Úguchili ában méme wagía.

31 Ábayati jabúdajan juríu dúbü lun jachüraguni luágun.

32 Ába laríñagun Jesúsu joun.

—Gíbeeli cátei buíti nadüga jigíbugiñe láu lubáfu Búngiu, ¿cábagi lídaangiñe uágu jíchaagua dúbü nuágu?

33 Ába jaríñagun juríu lun.

—Míchaagunbadiwa dúbü buágu luágu ni cáta buíti badüga, ladüga anába báali lan Búngiu láu berérun. Wügüri rügüñadibu, áni bíchaaguña búngua quei Búngiu.

34 Ábati laríñagun Jesúsu joun.

—Bürüwati lídan jilúrudun luágu aríñaga lan Búngiu. “búngiu buri jugúya”.

35 Subúdi woun luágu siñá lan leyéedawagún láu le taríñagubei Lerérun Búngiu, áni aríñagatu líburu tugúya luágu wa láníña Búngiu gürígia ja erésibirubalin lerérun lun jíchuguni joun gürígia, quei búngiugu.

36 Ánjeinti anúadaja lubáline Búngiu, ába loúnajanina ubouágun, ¿ída liñáti jaríñagunbei luágu anába náni láu naríñagun luágu Liraü nan Búngiu?

37 Ánjein madügün nan cátei lé buri ladügübei Nóguchi, mafíñera jumá nun,

38 ánjein nadüga, íbini mafíñerun jumá nun, afíñe jumá luágu buri cátei le nadügübei, subúdi jumámugei luágu níjein lan Nóguchi nídan, áni anájein lan gíñe lídan Nóguchi.

39 Ábaya jálugun jadáürüni, ába leséfurun jaweí.

40 Ábati lagíribudun Jesúsu loubáfurugun dúna Jordán, ába leréderun ñi lídan fulásu le ñi lubei meja labásteragüdaja Juan.

41 Sarágu jáña gürígia ñüdüntiña aríjei, ába buri jaríñagun.

—Láu sun madügün lan Juan ni ában miláguru, inárüni sun le laríñagubei luágu wügüri le.

42 Ába jafíñerun sarágu gürígia luágu Jesúsu lídan fulásu ligía.

11

¹ Nĩnein ában wügüri sánditi, gíriti Lázaro, lílana fulásu le gíribei Betánia, le tageíra María túma Márta to títugaña.

² María tugúya, to lítu Lázaro le sándibei, tugúya to éseruboun ibíñei luágun lugúdi Jesúsu, ába tarágajani láu títiburi.

³ Ábati jóúnajan bián ítunu ja, aríñaga lun Jesúsu.

—Jesúsu, sándiñeintia bumáda.

⁴ Dan lagáambunbalin Jesúsu cátei le, ába laríñagun.

—Mámabei ouweni lébeja cátei lídaangiñe sándi le, lúntibei larijiniwa luweírigun Búngiu, lúma gíñe lun larijiniwa luweírigun Liraũ Búngiu lídaangiñe sándi ligía.

⁵ Láu sun weíri lan jínsiñe Márta, María, lúma Lázaro lun Jesúsu,

⁶ dan le jaríñawagúnbei lun luágu sándiñein lan Lázaro, reídeigili bián wéyu lídan fulásu le ñi lubei.

⁷ Lárigiñe, ába laríñagun joun láni disípulugu.

—Queímounya Judéa.

⁸ Ábati jaríñagun lun.

—Maésturu, málügili lueígiñe jálugun juríu jáfarunibu láu dúbü ñi, ¿busenyadibu bídin ñi?

⁹ Ába laríñagun Jesúsu joun.

—¿Ma dúusuñein óra lídan ában wéyu? Ánjein lubeíti eíbuga ában gürígia wéyuagu, machúgeragúnbei, ladüga larijubei lan larúgounga le yábei ubouágu,

¹⁰ ánjein eíbuga áriebe, lachúgeraguba ladüga lubúriga.

¹¹ Lárigiñe, ába laríñagun Jesúsu joun.

—Arúmuga wamáda Lázaro, neíbuga agágudajei.

¹² Ábati jaríñagun disípulugu lun.

—Maésturu, ánjein arúmuga lubeí, lareídaguárügü líña.

¹³ Míni lánti Jesúsu luágu jilá lan Lázaro, jarítagunti disípulugu luágu luágu lan furúmieguarügü arúmuguni ladímureja.

¹⁴ Ábati laríñagun Jesúsu joun, furáangu.

—Jilá Lázaro.

¹⁵ Gúndaatina láu úa nan ñi, ladüga buítimaati ítara jun, afíñe jumámuga. Queímoun waríjei.

¹⁶ Ábati laríñagun Tomás, le únbei jaríñaga Mádou, joun jíbiri disípulugu.

—Queímoun gíñe, jilá wamáda úara lúma.

Jesúsu ásaaragüdübei lídaangiñe ouweni, ligía íchiga ibágari

¹⁷ Dan le lachülürünbei Jesúsu, gádürüjali wéyu lueígiñe labunún Lázaro.

¹⁸ Lidíse Betánia lueí Jerusalén quei bián quilómetros dimí.

¹⁹ Sarágu jáñati jádaangiñe juríu ñüdüntiña Jerusaléngiñe bisídoun Márta túma María lun jíchugun ñurúguaü joun luágu loúnwen jamúlen.

²⁰ Dan tagáambunbei Márta luágu níteeli lan Jesúsu achülüreina, ába táfuridun lubároun, ánjoun María, ába teréderun múnada.

²¹ Ába taríñagun Márta lun Jesúsu.

—Lun jamúga ya ban, moúnwenti jamúga namúlen,

²² áni subúditi nun luágu líchugubei lan Búngiu sun le bamúriajan lúma bun.

²³ Laríñaga Jesúsu tun.

—Labágaridayaba bamúlen.

²⁴ Taríñaga Márta lun.

—Ánja, subúditi nun luágu labágaridayaba lan lídaanme jásaarun jiláguaaña lídan lagúmujoún wéyu.

²⁵ Ábati laríñagun Jesúsu tun.

—Áu le ásaaragüdübaliña jiláaña, rúnei jabágari joun lárigoún. Le afíñeti nuágu, gayáraati loúnwen, labágaridayaba,

²⁶ áni sun le wínwangilibei áni afíñeti nuágu, labágariduba gíñe lúma Búngiu súnwandan. ¿Afíñetibu?

²⁷ Taríñaga lun.

—Ánja, Nabúreme, afíñetiña luágu bugúya lan Crístubei le Liraü Búngiu, lé meja lúnbei liábin uboúagun.

Layájun Jesúsu lubádu lumúaja Lázaro

²⁸ Lárigiñe taríñaguni Márta le, ába tídin oúgoun María, ába taríñagun tun jóunguarügü.

—Níjein Maésturu ya lún nege bídin lun.

²⁹ Quei tagáambuni María cátei le, ába tásaarun, ába tídin furése aríjei Jesúsu.

³⁰ Mebélugiliti Jesúsu ubúrugun, lídaañein fulásu le ñí lubei tadárierei Márta.

³¹ Dan le jaríjinbei juríu ja ñíbaña múnada túma María ámalijoun tásaarun ába táfuridun furéseguina, ába jóudin tárigi, jarítagun luágu teíbuga lán yebe luágu umúajaü ayájua.

³² Dánti le tachülürünbei María le ñíjin lubei Jesúsu, ába tájuduragun ligíbugiñe, ába taríñagun.

—Nabúreme, lun jamúga ya ban, moúnwenti jamúga namúlen.

³³ Dan le laríjin Jesúsu tayájun María jáma juríu ja ñübinbaña túma, ába lírudagun tídan lanígi,

³⁴ ába laríñagun joun.

—¿Jalíasan jábunei?

Ába jaríñagun lun.

—Jigábu baríjei.

³⁵ Ába layájun Jesúsu.

³⁶ Ábati jaríñagun juríu.

—¡Aríja jumá luweírin meja línsiñe lun!

³⁷ Ñíñanu jádaangiñe aríñagutiña.

—Niján le aríjagüdübalin wügüri le maríjinbei, ¿siñáti jamúga funásan ladügün lun moúnwen lan Lázaro?

Lásaarun Lázaro lídaangiñe oúweni

³⁸ Ábaya tírudagun lanígi Jesúsu, ába layárafadun lun umúajaü. Umúajaü ligía ában júyu luágu dübü, ñíñein ában dübü lidaüme.

³⁹ Ába laríñagun Jesúsu.

—Gidájumei dübü.

Ába taríñagun Márta lun.

—Mósutia jíngiaali lan ladüga gádürü wéyu lueígiñe loúnwen.

⁴⁰ Ába laríñagun Jesúsu tun.

—¿Másan aríñagatina bun luágu ánjabu lan afíñe nuágu, baríjubei lan luweírigun Búngiu?

⁴¹ Ábati jagídaruni dübü, ába laríjin Jesúsu siélun, ába laríñagun.

—Núguchi, teínqui numútibu luágu bagáambunina.

⁴² Subúdi numúti luágu agáamba bánina súnwandan, naríñaguñein líra jawágu gürígia ja, ja yábaña, lun jafíñerun luágu amürü lan oúnajabalina.

⁴³ Lárigiñe laríñaguni cátei le, ába lagúaragun.

—¡Lázaro, furíba nígiñe!

⁴⁴ Ába láfuridun jiláali láu lújabu lúma lugúdi gürágu táu gamísa, lúma ligíbu táu ában gamísa. Ába laríñagun Jesúsu joun.

—Farára jumeí, ígira jumeí lun lídin.

*Elédeguni lun lárügüdüniwa Jesúsu
(Mt 26.1-5; Mr 14.1-2; Lc 22.1-2)*

⁴⁵ Láu lasúseredun líra, sarágu jádaangiñe juríu ja ñüdümbaña túma María, aríja jameí le ladügübei Jesúsu, ába jafíñerun luágu.

⁴⁶ Ñíñanu jádaangiñe, ába jóúdin jámoun fariséogu, ába jabájüdaguni le ladügübei Jesúsu joun.

⁴⁷ Ábati jayábin fariséogu jáma jábutigu fádirigu, ába jóúndaragun jáma jíñun-ágei agúmadijatiña, ába jaríñagun.

—¿Cábasan wadüga? Ladáaguñatia wügüri le sarágu miláguru.

⁴⁸ Ánjeinti wígira ítara, jafíñeruba sun gürígia luágu, ábamei jayábin gumádimatiña Rómana, ábame jagúmochaguagüdünnun walígilisin láu sun warásan.

⁴⁹ Ñíñein ában jádaangiñe, gíríti Gáifasi, ligía jábutibeí fádirigu lídan irúmu ligía, ába laríñagun joun.

—Ibídiñeti ni cáta jun,

⁵⁰ maríjin jumeí luágu buítima lan woun lun loúnwen ábanrügü wügüri jawágu jíbiri, máma lun lagünrinchawagún sun warásan.

⁵¹ Máma láu láni Gáifasi lúngua laríñagei líra, ladüga quei ligía lan fádiri le íñutimaabei lídan irúmu ligía, ába laríñagagüdüni Búngiu lun, luágu louweba lan Jesúsu jawágu juríu,

⁵² áni mámarügü jawágu juríu, lun giñe loúndaruniña sun lirájüñü Búngiu ja díseguabaña jawáriuagua.

⁵³ Lúmagiñeti wéyu ligía, ába jagúmeserun agúmadijatiña aráanseja lun jáfaruni Jesúsu jilágubei.

⁵⁴ Ligía ába lubeí meíbugunjaali lan Jesúsu furáangu jádan juríu, ába láfuridun Judéagiñe, ába lídin lídoun ában fulásu gíríti Efraín, yaráfa lun fulásu mageírawati. Ába leréderun ñi jáma láni disípulugu.

⁵⁵ Yaráfaaliti jafédun juríu le gíríbei páscua, sarágu jáña gürígia ñüdünnun Jerusalén lun jadügüni igáburi le lánina jarúmadun lubáragiñe fédu ligía.

⁵⁶ Jáluajañeinti Jesúsu, dánti le témpulurugüñanu lan, ába jálügdajan jámagua.
—¿Ca jaríñagubei? ¿Liábinba lídan fédu, ódi miábinbei?

⁵⁷ Rújañati fariséogu jáma jábutigu fádirigu dimúrei lun le lan asúbudiruti jalíañein lan Jesúsu, lun lan laríñaguni, barú jamámugei adáüra.

12

*Tájurudaguni ában würi lugúdi Jesúsu
(Mt 26.6-13; Mr 14.3-9)*

¹ Sísi wéyu lubáragiñe páscua, ába lídin Jesúsu Betánia, le ñi lubei lagánawa Lázaro le lásaaragüdübei jádaangiñe jiláaña lúnya labágaridun.

² Ába jadügün ában adíneruni ñi luágu láni fuleísei, Márta, tugúya éjeeraguboun, Lázaro ában jádaangiñe ja ñúnbaña luágu dábula lúma Jesúsu.

³ Ábati tanügün María ában paénti ibíñei le séruti, ába tájurudaguni lugúdi Jesúsu láu, ába tarágajani láu tídiburi, ába lejémougadun ibíñei ligía sun ñi múnada.

⁴ Ába laríñagun Júdas Iscarióte, le liraü Simón, ában jádaangiñe láni Jesúsu disípulugu, le méme lúnbei lalúguruni.

5 —¿Ánsan malúgurún lubei ibíñei le luágu ürüwa-san fiádürü lun jíderawagún gudémetiña?

6 Laríñagunbei Júdas ítara, máma luágu berése lan jáu gudémetiña, laríñagunbei ítara ladüga jíweru lan, áni queíti ligía lan gámabarun lágei seínsu, ábaja líwerujan lídaangiñe le íchugúbei tídown.

7 Ábati laríñagun Jesúsu lun.

—Ígiraboún, taráanseruñadina lubá lachülürün luwéyuri nábunúniwa.

8 Súnwandan ñíbaña lan gudémetiña jídan, ánjeinti áu, mámaba súnwandan júmanan.

Elédeguni lubá Lázaro

9 Ába jasúbudiruni sarágu jádaangiñe juríu luágu níjein lan Jesúsu Betánia, ába jóudin ñi, mámarügü lun jaríjini, lun giñe jaríjini Lázaro le lásaaragüdübei Jesúsu jádaangiñe jiláaña.

10 Ába giñeti juáradun jábutigu fádirigu lídan ában lun giñe jáfaruni Lázaro,

11 ladüga sarágu jáña lan juríu adíseduntiña jawei lun jafíñerun luágu Jesúsu, lídaangiñeti Lázaro.

Lebélorun Jesúsu ubúrugun Jerusalén

(Mt 21.1-11; Mr 11.1-11; Lc 19.28-40)

12 Sarágu jáña güri-gia ñüdüntiña Jerusalén lubá fédu le páscua, larúgan, ába jasúbudiruni luágu lachülürüba lan Jesúsu ñíjin ubúrugun.

13 Ábati játüjan tubána fáluma, ába jáfuridun lubároun Jesúsu agúarajeina.

—¡Uweírighuni lun Búngiu! ¡Biníwati le ñübinbei lídan líri Wabúreme! ¡Biníwati lurúeite Israél!

14 Ába ladárirun Jesúsu ában burígü, ába laweínruni quei laríñagun tídan Lerérun Búngiu.

15 Manúfudebá, ubúrgu le Sión, níten burúeite waríñu luágu ában burígü.

16 Úati yebe gunfaráanda jamáni láni disípulugu cátei le wéyu ligía, lárighiñe, dan le belújali Jesúsu lídoun luweírighun yágüta siélu, ába jarítangun luágu bürüwa lan sun cátei le luágu, áni ítara líña lan lasúseredun lun.

17 Ja güri-gia ja ñíbaña dan le lagúarun Jesúsu lun Lázaro lídaangiñe lumúaja, ába lásaaragüdüni lídaangiñe ouweni, abájüdagua jamúti le jaríjubei.

18 Ligía lébubei jáfuridun güri-gia erésibirei Jesúsu, ladüga jagáambun luágu miláguru le ladügübei.

19 Ábati jaríñagun fariséogu jámagua.

—Aríja jumáli luágu, siñá lan ladügüniwa ni cáta, sun güri-gia añágüran lúma.

Jáluajani güriégu Jesúsu

20 Ñíñanu güriégu jádan güri-gia ja ñüdünbaña Jerusalén lun jájuduragun lun Búngiu,

21 ába jayábin güriégu jagía lúmoun Felípe, le Betsáidana, ñi Galiléa, ába jaríñagun lun.

—Buséntiwa waríjini Jesúsu.

22 Ába lídin Felípe, ába laríñaguni lun Andrés, ába jóudin biángubei jagía abájüdaguei lun Jesúsu.

23 Ábati laríñagun Jesúsu joun.

—Chülüja óra lun líchugúniwa uweírighuni nun, áu le Wügüri Garaúwarügüti.

24 Ninárün jáu luágu ánjein lan máburujan ában lágu türígu múarugun lun loúnwen, ában mémebei águu, ánjein ouwe, lalúbajoúba sarágu lídaangiñe.

²⁵ Le jínsiñejabuti lun libágari, leféridirubei, ánjein le mebéresenti láu libágari lídan ubouú le, lareídubei lubá ibágari le magúmuchaditi, siélu.

²⁶ Le busénti lesériwidunina, lúnti lafálarunina, áni le ní numuti, ñíbei gíñe le esériwidubalina. Le esériwidutina, líchuguba Nóguchi uweíriguni lun.

Ladímurejan Jesúsu luágu loúnwen

²⁷ ‘Níjein ában ouúnwenbun líbe samínaü nuágu guetó. ¿Cábasan naríñaga? ¿Naríñaga funa. “Nóguchi, sálba bána lídaangiñe le lúnbei lasúseredun nun guetó”? Uá, lun líra niábin.

²⁸ Nóguchi, iñurúalá bíri nídaangiñe.

Ábati lagaambúniwa ában umálali siéluigiñe le aríñagubei.

—Iñúra náali níri bídaangiñe, áni niñúruyabei.

²⁹ Ábati jaríñagun gürígia ja ñíbaña agáambaja luágu wayújururu lan, jíbiri aríñaga.

—Ában ánjeli adímurejabei lun.

³⁰ Ábati laríñagun Jesúsu joun.

—Mámatia luágu nufúleisein lagaambúa umálali le, luágu jufúleisein.

³¹ Niján dan ligía lun lagúserawagüdün ubouú, áni guetóba leféridirei Máfia, le agúmadijabei lídan ubouú le, lubáfu.

³² Dánmeti le niñurúniwa múarugugiñe, nanüğübaña súngubei númoun.

³³ Láu líra laríñaguñein luágu loúweba lan luágu ában gurúwa.

³⁴ Ába jaríñagun gürígia lun.

—Agáambaadiwa laliijoun tídan walíburun to lánina lilúrudun Moisés luágu labágariduba lan Crístu lun sun dan. ¿Ída liñáti baríñagunbei luágu liñurúaba lan Wügüri Garaüwarügüti? ¿Cáteigi Wügüri Garaüwarügüti ligía?

³⁵ Ábati laríñagun Jesúsu joun.

—Níchiga mémebei larúgouna jun luágurügü murúsun dan. Eíbuga jumá lídan larúgouna ligía sun anájagua lan júma lun gayáraabei lan jachúlürün le ñíjin lubei jabúseera jachúlürün, márügüdün lámugaün lubúriga, ladüga le eíbuguti lídan lubúriga, ibídiñeti lun jalíñouñein lan.

³⁶ Afíñe jumá lubeíti nuágu sun anájagua lan júma lun lirájüñü jumá larúgouna.

Lárigiñe laríñaguni Jesúsu sún buri cátei le, ába lídin, ába larámudagun jaweí.

Lébuna mafíñen jamá juríu luágu Jesúsu

³⁷ Láu sun adüga lan Jesúsu sarágu miláguru jagíbugiñe, mafíñetiña luágu.

³⁸ Láu líra jagúnfulirei le laríñagubei proféta Isaías.

¿Cásan afíñerubei luágu wáni ugánu?

¿Ca un larúfudei Wabúreme Búngiu lubáfu?

³⁹ Quei mafíñerun jabeí, ába lasúseredun le ámu dimúrei le laríñagubei Isaías tídan labürüjan, joun.

⁴⁰ Darú lumuti Búngiu jaríjin, derégüda loun janígi,

lun maríjin jamá láu jágu,

úame gunfaráanda jamá,

mayábin jagíame nun lun nareídaguagüdüniña.

⁴¹ Laríñagunbalin Isaías le luágu Jesúsu ladüga aríja láali lan luweírigun.

⁴² Láu sun líra, sarágu jáña jádaangiñe juríu afíñerutiña luágu Jesúsu ásta jádaangiñe ábutigu, áni maríñagun jamúti bougudi, le janúfude jaweí fariséogu, lueí jabúguniña tídaangiñe jalígilisin.

⁴³ Ladüga gúndaatimaatiña láu inébesei le jíchugubei gürígia sügü láu le líchugubei Búngiu.

Lagúseragüdübaña dimúrei buri le laríñagubei Jesúsu gürígia

⁴⁴ Ába laríñagun Jesúsu láu umálali jéreti.

—Le afíñeti nuágu, máma rügüñein nuágu lafíñera, afíñeti gíñe luágu Nóguchi le oúnajabalina.

⁴⁵ Le gíñe aríjitina, laríjiñein gíñe le oúnajabalina.

⁴⁶ Áu lámpubei, niábinbei ubouágun lun sun lan ja afíñetiña nuágu, merédera jamámuga lídan lubúriga.

⁴⁷ Ánjein le agáambuti nerérun áni madügünti gásu láu, máma áu asiádirubalin, ladüga máma niábiña lun nasiádiruniña gürígia ubouágu, niábiña asálbaraña.

⁴⁸ Le mebéresenti náu, madügün ligía gásu láu nerérun, níjein lúnti lasiádiruni dimúrei buri le aríñaga náalibei, ligíaba asiádirei lídaanme lagúmujoún wéyu.

⁴⁹ Ladüga madímurejaantina luágu náni núngua, Nóguchi le oúnajabalina, ligía aríñagubalin le lúnbei naríñaguni nun lúma le lúnbei narúfudajani.

⁵⁰ Áni subúdi numúti luágu barü lan lugúmadin Nóguchi ibágari magúmuchaditi joun ja adügübalin le lubeíbei. Le lubeíti naríñagubei, naríñaguni quei laríñaguni Nóguchi nun.

13

Lachíbuni Jesúsu jagúdi láni disípulugu

¹ Ábanrúgaali wéyu lubá fédu le páscua. Subúdi láali Jesúsu luágu chülüja lan óra lun lígiruni ubou le lun lídin lúmoun Lúguchi. Súnwandan meja jínsiñe jamá lánigu ja ubouágubaña lun, guetó larúfuduñeinti línsiñejabu lídan luweírin-ágei.

²⁻⁴ Dálaalíti Máfia larítagun tídoun lanígi Júdas Iscarióte lun ledéregeruni Jesúsu joun láganiñu. Jesúsu, láu sun subúdi láni luágu lúmagiñe lan Búngiu liábin, luágu lúmounba lan gíñe Búngiu lagíribuda, luágu gíñe rúlaali lan Úguchili sun cátei lújaburugun, ába larúfuduni luweírin-ágei únabuni le luágubei. Dan lubeíti jadíneruña lan, ába lásaarun lueígiñe dábula, ába larágachunun gamísa to tigíbuaguboun ladáüragun, ába lagürün ában tuáya liránaagua.

⁵ Ába líchugun dúna lídoun ában dabárasí, ába lachíbuni jagúdi disípulugu, ába larágachuni táu tuáya to liránaaguaboun.

⁶ Dán yebe le lachíbaali lan lugúdi Simón Pédro, ába laríñagun lun.

—Nabúreme, ¿bachíbaalisan nugúdi?

⁷ Ába laríñagun Jesúsu lun.

—Guetó, úati gunfaráanda báni le nadügübei, gunfaráanda bubeí lárigiñe.

⁸ Ába laríñagun Pédro lun.

—¡Machíbun bubeí nugúdi!

Laríñaga Jesúsu lun.

—Ánjein machíbun nan bugúdi, siñábei gafánran ban núma.

⁹ Ába laríñagun Simón Pédro lun.

—Mámarügüla nugúdi bachíba, chibábei gíñe nújabu lúma nigíbu.

¹⁰ Laríñaga Jesúsu lun.

—Le sun liñábei lágoun, lugúdi rügüñein abúseera lachibúniwa, ladüga jarúmati líbiri lúgubu. Jugúya, jarúmatün, mámarügü líña sun jugúya.

¹¹ Le laríñagunbei luágu máma lan sun jagía jarúmatiña, ladüga subúdi láni cába lan edéregerei.

¹² Lásun lachíbuni Jesúsu jagúdi, ábaya ladáürunun gamísa to larágachuboun, ábaya lañúurun luágu dábula, ába laríñagun joun.

—¿Gunfaráanda jumútisan le nadügübei jun?

13 Jugúya agúajatün nun Maésturu, lúma Nabúreme, áni richátün ladüga áu ligía,

14 ánjeinti chibá nubálin jugúdi láu sun Jumáesturun nan áni Jabúreme, lúnti gíñe jachíbuni jugúdi júmagua.

15 Rújadina ában jémpulu jun lun jadügüni líbe méme le nadügübei.

16 Ninárün jáu luágu míñugun lan ni ában músu lueí liyúbudiri, ni ában le oúnajoúti lueí le oúnajabalin.

17 Ánjein gunfaráanda jumá buri cátei le áni adüga jumeíme, gúndaabadün.

18 ‘Mámattia nadímurejaña juágu sun jugúya, subúdi numútiña cátaña lan nanúadirubaña lun nánigume le tímatimaati. Áni lúnti lagúnfulirún le tídaanbei Lerérun Búngiu. “Garábagua le eígubei núma, nuágun.”

19 Naríñaguñein le jun lubáragiñe lasúseredun, lun dánme lan le lasúseredun, afíñe jumámuga luágu áu lan Crístubei.

20 Ninárün jáu luágu le lan erésibiruti le noúnajan, resíbi lumútina gíñe, áni le erésibirutina, resíbi lumúti gíñe le oúnajabalina.

*Ladímurejani Jesúsu luágu ledéregerubei lan Júdas
(Mt 26.20-25; Mr 14.17-21; Lc 22.21-23)*

21 Lásun laríñaguni Jesúsu sun cátei le, ába lasándirun sarágu íruni tídan lanígi, ába laríñagun furáangu.

—Ninárün jáu luágu ledéregerubadina lan ában jídaangiñe.

22 Ábati jagúmeserun disípulugu aríagua jawoúguoún, ibídiñounga joun ca lan jádaangiñe uágubei ladímureja Jesúsu.

23 Áu Juan, le abürüjabarun gárada to, ában jádaangiñe disípulugu, le weírubei ínsiñe lun Jesúsu, loúbagiñeñádina lídan adíneruni,

24 ába ladügün Simón Pédro seíni nun lun nálügüdüni Jesúsu ca lan jádaangiñe uágubei ladímureja.

25 Ábati nayarafaduntima lun Jesúsu, ába naríñagun lun.

—Nabúreme, ¿cáteisan lúnbei ledéregerunibu?

26 Ába laríñagun Jesúsu nun.

—Nadüdüragüda murúsun fein, le únti níchigoun, ligíaba edéregerana.

Ábati ladüdüragüdün murúsun fein, ába líchugunun lun Júdas Iscarióte, le liraü Simón.

27 Quei lárügüdünun Júdas fein tugúya, ítara lebélorun Máfia tídoun lanígi. Ábati laríñagun Jesúsu lun.

—Le lúnbei badügüni, adügabeí furése.

28 Úati gunfaráanda láni ni ában jádaangiñe ja eígibaña luágu dábula ca lan uágu laríñagei Jesúsu líra lun.

29 Quei Júdas lubeí táubei lágei seínsu, sun jaríñagun yebéti laríñaguña Jesúsu lun lun lagáñijani le jabúseerubei lubá fédu, o lun lan líchugun seínsu joun gudémetiña.

30 Lárigiñe leíginun Júdas fein, ába láfuridun. Gúñeeli óra ligía.

Iséri gumádi

31 Lárigiñe láfuridun Júdas, ába laríñagun Jesúsu.

—Larijúa nuweírigun, áu le Wügüri Garaüwarügüti, guetó, arijúame luweírigun Úguchili nuágu.

32 Ánjeinti arúfuda nubálin luweírigun Búngiu, larúfudubei gíñe Búngiu nuweírigun, áni ladügübei madíse.

33 Nirájüñü, úaadináme júma sarágu dan. Jáluajabadina, le méme naríñagubei joun juríu naríñagayaali jun guetó. Siñábei jídin le ñjínba lubeí nídin.

³⁴ Níchigaali iséri gumádi le jun. lun jínsiñegua jumá júngua. Ítara quei jínsiñe nun, lúnti gíñe jínsiñegua jumá júngua.

³⁵ Ánjaün jínsiñegua júngua, jasúbudirubei sun gürígia luágu náni jumá disípulugu.

*Ladímurejani Jesúsu luágu leyéedaguba lan Pédro luágu
(Mt 26.31-35; Mr 14.27-31; Lc 22.31-34)*

³⁶ Ába laríñagun Simón Pédro lun Jesúsu.

—¿Jalíñounbadibusan, Nabúreme?

Ába laríñagun Jesúsu lun.

—Siñáti bafálarunina le ñíjinbadina lubeí guetó, lachülürüba wéyu lun bafálarubadina lan.

³⁷ Laríñaga Pédro lun.

—¿Ca uágu siñá lubei nafálarunibu guetó? Aráanse dina lun níchuguni nibágari buágu.

³⁸ Laríñaga Jesúsu lun.

—¿Binárün luágu aráanse ban lun bíchuguni bibágari nuágu? Ninárün báu luágu beyéedaguba lan náu ürüwa weíyaasu lubáragiñe layúgurujan gáyu.

14

Jesúsu, ligía ñmabei lun lúmoun Úguchili

¹ ‘Merédera jumá láu líbe samínaü, afíñe méme jumá luágu Búngiu, afíñe méme jugúyame nuágu.

² Níjein sarágu ubáraü tídan lúban Nóguchi lun jaganoún gürígia ñi, lun jamúga máma lan ítara líña, aríñaga náali jamúga jun. Neíbuga lubeíti aráanseja ában ubáraü jubá.

³ Lárigiñeme nídin, aráanse neíme ubáraü ligía, ábame nagíribudunya lun nanügünün númagua, lun ñi jumá le méme ní numuti.

⁴ Subúdi jumúti jalíñounbadina lan, subúdi jumúti gíñe ũma.

⁵ Laríñaga Tomás lun.

—Nabúreme, ibídiñeti woun jalíñounbadibu lan, ¿ída lubáti wasúbudiruni ũma?

⁶ Laríñaga Jesúsu lun.

—Lun lachülürüniwa lúmoun Búngiu, áu ñmabei, áu inárüni, áu ibágari. Nueígiñe rügüñein gayára lan lachülürüniwa lúmoun Búngiu Úguchili.

⁷ Lun jamúga subúdi nan jun buídu, subúdi jumúti jamúga gíñe Nóguchi, subúdi jumáaliti lúmagiñe guetó, ladüga aríjañaja jumáali láu jaríjinina.

⁸ Laríñagati Felípe lun.

—Arúfudabeí Úguchili woun, buídurügaalime woun.

⁹ Laríñaga Jesúsu lun.

—Felípe, lüjadina júma, ¿ibídiñegidina bun? Le aríjitina, laríjiñein gíñe Búngiu Úguchili, ¿cáti uágu baríñaga nun lun narúfuduni Búngiu Úguchili jun?

¹⁰ ¿Mafíñetibusan luágu anájein lan lídan Búngiu Úguchili, níjein lan gíñe Búngiu Úguchili nídan? Lé buri cátei le naríñagubei jun, máma lan láu náni núngua naríñagei, Búngiu Úguchili le aganoúbei nídan, ligía adügübalin luwádigimari guánarü.

¹¹ Afíñe jumá nun luágu anájein lan lídan Búngiu Úguchili, áni lan níjein gíñe Búngiu Úguchili nídan, íbini luágurügü cátei lé buri nadügübei, afíñe jumá nun.

¹² Ninárün jáu, luágu le lan afíñeti nuágu, ladügübei lan cátei lé buri nadügübei, ladügüba buri cátei weínamutimaati, ladüga áu, neíbuga le ñíjin lubeí Nüguchi.

¹³ Sun le jamúriajan lídan níri, nadügübei, arúfuda námugei luweírigun Nüguchi.

¹⁴ Nadügübei furúmieguarügü cátei le jamúriajan lídan níri.

Líchugun Jesúsu dimúrei luágu loúnajabei lan Sífiri Sándu

¹⁵ ‘Ánjein jínsiñe nubeí jun, gúnfuli jumá láu le nubeíbei,

¹⁶ ábame nayúmuragun lun Nüguchi lun loúnajan ámu jun newéñegua lun líderagunün, lun gíñe líchugun gurásu jun. Ligíaba Sífiri Sándu le subúdijabúbei lun sun inárüni, júmabei súnwandan.

¹⁷ Ja lánigu ubouú le, siñáti jerésibiruni Sífiri Sándu ligía, ladüga siñá lan jaríjini ni jasúbudiruni, ánjein jugúya, subúdi jumáali, ladüga níjein júma áni leréderuba jídan.

¹⁸ Mígirun nubádün jábugua, nagíribudayaba lun júma nan.

¹⁹ Málüjadina ánjana maríjin jamá gürígia, ánjein jugúya, jaríjubadina, áni gabágaribadün ladüga wínwañu níña lan.

²⁰ Lárigiñeme liábin Sífiri Sándu lun júma lan lun sun dan, jasúbudirubei luágu anájein lan lídan Nüguchi, jugúya nídan, áu gíñe jídan.

²¹ Le subúdijabuti lun nugúmadin áni úaragu ligía lúma, arúfuda lumúti luágu jínsiñe nan lun le tímatimaati. Áni jínsiñejabúbei Nüguchi lun le jínsiñejabuti nun, jínsiñebei gíñe nun, arúfudagua áume núngua lun.

²² Ába laríñagun Júdas (mámatia le Iscarióte).

—¿Cásan uágu barúfudaguba lubeí búngua woun, máma joun gürígia ja lánigu ubouú le?

²³ Laríñaga Jesúsu lun.

—Le jínsiñejabuti nun, adügati gásu láu le nubeíbei, áni línsiñeduba lun Nüguchi, ábame wayábin, áu lúma Nüguchi, agánawa lúma.

²⁴ Le mínsiñejabuti nun, madügünti gásu láu le nubeíbei. Dimúrei le naríñagubei, máma náni, láni Nüguchi le oúnajabalina.

²⁵ ‘Naríñaguñein sun le jun láu anájagua lan júma,

²⁶ Sífiri Sándu le lúnbei loúnajani Nüguchi lídan níri lun líderagunün, larúfudajaba jun, larítaguagüdübadün gíñe luágu sun le aríñaga náalibeí jun.

²⁷ ‘Neíbuga jümagiñe, nígiraali ñurúguaü júma—ában luwúyeri ñurúguaü le áurügübei gayára lan níchiguni. Mítaraanti queísi ñurúguaü le líchugubei ubouú. Magíbedalá jisáminan, manúfude jugúyame.

²⁸ Agáamba jumáali naríñagun luágu neíbuga lan, áni nagíribudayaba lan lun júma nan, lun jamúga jínsiñe nan jun láu jinárün, gúndaatün jamúga láu jasúbudiruni luágu neíbuga lan lúmoun Nüguchi, ladüga ligía íñugutimaati nueí.

²⁹ Ligía aríñaga gíñe nubálin le jun, lun dánme lan lasúseredun, afíñe jumámuga.

³⁰ ‘Madímurejaanjadina sarágu júma, ladüga níteeli le agúmadijabei lídan ubouú le. Láu sun mabáfu lan nuágu,

³¹ lúnti ítara lúba lan lun lasúbudiruni ubouú luágu jínsiñe lan Nüguchi nun, áni adüga náni le lubeíbei nun. Sarájuma, queímoun yágiñe.

15

Tídibu beíbei lúma tilímun

¹ Laríñaga Jesúsu.

—Ítara níña quei ában tídibu beíbei le tímatimaati, Nóguchi, ítara líña quei le oúnigirubarun nádü.

² Chaün lumuti furúmieguaügü lídaangiñe nilímun le mínti, atírimuja lumúti le gínbei, jarúmagüdaleí lúntima lagíndun.

³ Jugúya, jarúmaadün lárigi narúfudajan jun.

⁴ Lídan méme jumá ában núma quei lídaañadina lan ában júma. Ában límu siñáti lagíndun ánjein mámañein lubeí luágu ídibu, ítara jíña gíñe, siñáti jagíndun ánjein máma lubeí badüleñu jíña nuágu.

⁵ ‘Áu ídibubei, jugúya límu. Le badüleñuti nuágu, badüleñu áu luágu, lagínduba gíbe, siñáti jadügün ni cáta úouga áu.

⁶ Le merédeti badüleñu nuágu, lágurúba bougudin, ábame lamábeidun queí buri límu le abúdajóubei lun lagudúniwa.

⁷ ‘Ánjaün asígira badüleñu nuágu, mabúlieidun jumeíme le narúfudajabei, gayáraabei jamúriajani le jabúseerun, áni jibíjubei.

⁸ Ibíjati Nóguchi inébesi dan le gíbe lan jagíndun, áni arúfuda jumúti luágu nani jumá disípulugu ja tímatimaatiña láu líra.

⁹ Jínsiñetün nun ítara quei nínsiñe lun Nóguchi, ítara méme jumá lubeíti lídan ínsiñeni le nánibeí jun.

¹⁰ Ánjaün ñüdün láu le nubeíbei, lídan mémebadün ínsiñeni le nánibeí jun, ítara quei nídin láu le lubeíbei Nóguchi, áni lídan mémeñadina ínsiñeni le lánibeí nun.

¹¹ ‘Nadímurejánbei jun ítara lun gayára lan jasúbusiruni úgundani le níchugubei, le gumúti.

¹² Niján nugúmadinbei. lun jínsiñegua jumá júngua quei jínsiñe nun.

¹³ Luweírín-ágei ínsiñeni le gayáraabei gáni láni gürígia, lun líchuguni libágarí jawágu lumádagu.

¹⁴ Numádagu jugúya, ánjein jadüga le nubeíbei.

¹⁵ Manügün náadün quei músu, ladüga ibídiñeti le ladügübei liyúbudiri músu lun, nanügünün quei numádagu ladüga subúdigüda náali sun le laríñagubei Nóguchi nun jun.

¹⁶ Máma jugúya anúadajabalina, áu anúadajabalün, áni rújadina dimúrei jun lun jagíndun gíbe, lun gíñe ladúrarun jin. Ítara lúba líchuguni Nóguchi sun le jamúriajan lúma lídan níri jun.

¹⁷ Ítara líña lubeíti nugúmadin jun lun jínsiñegua jumá júngua.

Iyéreeguti Jesúsu jáu sun lánigu lun ubou

¹⁸ ‘Ánjaün iyéreeguda lun ubou, subúdi jumeí luágu áu lan iyéreegudubei lun furúmiñe.

¹⁹ Lun jamúga lánigu jumá ubou, jínsiñetün jamúga joun gürígia ja lánigu ubou quei jínsiñe jánigu joun. Anúadaja numútün jádaangiñe ja lánigu ubou, ligía jiyéreegunbei lun ubou ladüga mámaadün lan lani ubou.

²⁰ Jarítagua jumá luágu le naríñagubei jun. “Úati músu íñuguti lueí liyúbudiri.” Ánjein eíbaaja jamáadina lubeí, jeíbaajabadün gíñe, ánjein giñéti madügün jabeí gásu láu narúfudajan, madügünbaña gíñe gásu jáu.

²¹ Jadügübei sun le jun, nueígiñe, ladüga ibídiñe lan le oúnajabalina joun.

²² ‘Lun jamúga meja miábin nan adímureja joun, madúnruntiña jamúga luágu jamájarun lun jerésibirunina, queísiti niábin joun, gadúnruntiña lubeíti luágu figou ligía.

²³ Ja iyéreejabúbaña nun, iyéreeguti gíñe Nóguchi joun.

²⁴ Madúnruntiña jamúga lun jamúga madügün nan ni cáta le úagili adügüti jagánagua, guetó aríja jamáali buri cátei ligía áni láu sun líra iyéeregugidina joun, iyéeregu gíñe Nóguchi joun.

²⁵ Wel, lasúseredunbei le ladüga lúnti lan lagúnfulirun dimúrei le bürüwañubei lídan jalúrudun. “Ába niyéeregudun joun, mébunouga.”

²⁶ ‘Dánme liábin Sífiri Sándu le lúnbei líderagunün, Espíritu le lánina inárüni le lúnbei noúnajani luágu loúbadina Nóguchi, ligíaba adímureja luágu náni fuleísei.

²⁷ Jugúya, jadímurejaba gíñe luágu náni fuleísei, ladüga númañadün lan lúmagiñe furúmiñeti dan.

16

¹ ‘Naríñaguñein buri cátei le jun lun moúnwen lan jafíñen nuágu.

² Jabúgagubadün tídaangiñe jalígíisin, wuríbabei dan jun daríme lun ánjaün lan láfaragua furúmierügü gürígia jilágubei, larítaguba luágu lesériwiduñein lan Búngiu láu líra.

³ Jadügübei líra ladüga masúbudirun jamágili lan Nóguchi, masúbudirun jamána.

⁴ Naríñaguñein le jun, lun dánme lan le lachülürün dan ligía, lun jarítagun luágu aríñaga náali lán meja jun.

Le ladügübei Sífiri Sándu

‘Maríñagun numúti meja le jun lúmagiñe binárü ladüga meja júmañadina lan,

⁵ ánjein guetó, neíbuga lúmoun le oúnajabalina. Málügüdün lumútina ni ában jídaangiñe jalíñounbadina lan,

⁶ jírurügütün luágu naríñaguni cátei lé buri jun.

⁷ Inárüni naríñagubei jun. buítimaati jun lun nídin, ladüga ánjana mídin, miábinbei Sífiri Sándu júmoun lun líderagunün, áni ánjana ñüdü, noúnajabei.

⁸ Dánme liábin, ladáriraguagüdübaña gürígia ja ubouagubaña jóungua luágu gafígoun jamá, luágu gíñe níjein lan ában úma le lánina úarani, luágu gíñe lagúseragüdübaña lan Búngiu.

⁹ Larúfudubei joun luágu gafígoun jamá láu mafíñen jamá nuágu,

¹⁰ lasúbudiragüdübei joun luágu úaragua nan, láu larúfuduni joun luágu nídiba lan le ñíjin lubei Nóguchi dánme le nígirunün.

¹¹ Líchuguba fe joun luágu lagúseragüdün Búngiu, ladüga agúseragüda láali Máfia, le agúmadijabei lídan ubou le.

¹² ‘Gíbegili lúnti naríñaguni jun, jásiñerubei gunfaráanda guetó.

¹³ Dánme liábin Sífiri Sándu le lánina inárüni, larúfudajabei sun inárüni jun, ladüga madímurejanbei luágu láni lúngua, le lagáambubei, ligíaba laríñaga. Lasúbudiragüdübei cátei lé buri lúnbei lasúseredun jun.

¹⁴ Líchuguba inébesi nun, ladüga lerésibiruba lídaangiñe ninárün, ábame lasúbudiragüdüni jun.

¹⁵ Sun le lúmabei Nóguchi, náni gíñe, ligía naríñagunbei luágu lerésibiruba lan Sífiri Sándu lídaangiñe ninárün, ábame lasúbudiragüdüni jun.

Lasáansiraguba íruni lun ugúndanime

¹⁶ ‘Málüjadina, ánjana maríjin jumá, múrusunmeya dan lárigiñe, ábayame jaríjinina, ladüga neíbuga le ñíjin lubei Nóguchi.

¹⁷ Ábati jálügüdagun jádaangiñe láni disípulugu jámagua, ába jaríñagun.

—¿Cásan míni lan le? Laríñaga woun luágu málüjali lan ánjein maríjin wamá, múrusunya lánme dan lárigiñe, ábayame lan waríjini, ladüga leíbuga lan le ñíjin lubei Lúguchi.

18 ¿Ca míni lan láu “murúsun dan lárigiñe le”? Úati gunfaráanda wamáni ca lan uágu ladímureja.

19 Ába lasúbudiruni Jesúsu luágu busén jama jálügüdaguni, ába laríñagun joun.
—Aríñagatina jun luágu málüjadina lan ánjana maríjin jumá, murúsun lánme dan lárigiñe, ábaya lánme jaríjinina. ¿Ligía le uágubei jálügüdagua júmagua?

20 Ninárün jáu luágu jayájuba lan, jíruga jugúyame, ánjañati gürígia ja láni ubou le, jagúndaaruba. Láu sun líra, íbini jiru jumá, lasáansiraguba jírún lun ugúndanime.

21 Dan le tagüriajan lan ában würi, súfuritu ladüga chülüja lan lórate igári, lásun agüriajouaali lan irájü, marítagunjaru luágu igári, ladüga ugúndani le tasándirubei luágu agüriajaaru lan ában irájü ubouágu.

22 Ítara líña gíñe, jugúya jírütün guetó, naríjayabadün, ábame ti tabuínchun janígi láu ugúndani, ában ugúndani le úati gayáraati lagídaruni jueí.

23 Lídaanme wéyu ligía, málügüdün jumádiname luágu ni cáta. Ninárün jáu luágu líchugubei lan Nüguchi sun le jamúriajabei lídan níri lúma, jun.

24 Chülü lúmoun dan le, mamúriajangidün ni cáta lídan níri, jamúriaja, ábame jibíjin, buin jumámuga láu ugúndani.

Jesucrístu, le ásiiragúbalin ubou

25 Aríñaga náali buri cátei le jun láu jémpulu, inítebei dan lun madímurejaanjadina lánme jun láu jémpulu, ábame nadímurejan furáangu jun luágu Búngiu Úguchili.

26 Lídaanme wéyu ligía, jamúriajaba lúma lídan níri, maríñaguntina luágu nayúmraguba lan lun Nüguchi juágu,

27 ladüga ligía guánarü jínsiñetün lun. Jínsiñetün lun ladüga jínsiñe nan jun, afíñeedün gíñe luágu lúmagiñe lan Búngiu niábin.

28 Lúmagiñe Búngiu Úguchili náfurida, ába niábin lídoun ubou le, guetó nígiraali ubou le, neíbugaya lúmoun Nüguchi.

29 Ába jaríñagun láni disípulugu.

—Anáti guetó, badímurejaña furáangu, mayúsurunga jémpulu.

30 Aríja wamáali guetó luágu subúdi lan sun cátei bun, moún lumuti bálügüdün luágu ni cáta ladüga subúdi báni jarítagun gürígia. Luágu líra wafíñera luágu lúmagiñe lan Búngiu biábin.

31 Ába laríñagun Jesúsu joun.

—¿Afíñedünti guetó?

32 Iníteeli óra, áni guetó guetó, dánme le jachágaragun sun jugúya, cáda ában luágu loubadina, ábame jígirunina nábugua, láu sun máma lan nábuguañadina ladüga níjein Nüguchi núma.

33 Naríñagunbalin sun le jun, lun jadárirun ñurúguaü lídan jafíñerun nuágu. Jasúfuriruba ubouágu, ganígi jumá, ¡sirígua náali ubou!

17

Layúmuragun Jesúsu jawágu láni disípulugu

1 Lárigiñe laríñagun Jesúsu sun cátei le, ába laríjin siélun, ába laríñagun.

—Nüguchi, chülüja nidáani, rúba inébesi luágu Biraü, ru lámuga gíñe Biraü inébesi bun.

2 Rújadibu ubáfu lun Biraü jawágu sun gürígia lun líchugun ibágari magúmchaditi joun ja bíchugubaña lun.

3 Niján lébunabei ibágari le magúmchaditi, lun jasúbudirunibu gürígia amürü le Búngiu ábanrügüti, le inárüti, lúma lun jasúbudirunina, áu Jesucrístu le bouñajabei.

- ⁴ ‘Rújadina uweíriguni bun ya uboúagu, gumú nan gíñe le uágubei boúnajana.
- ⁵ Guetóti Núguchi, rúbei uweíriguni le méme méja nánibei nun biñúwarü lubáragiñe meja ñi lan uboú.
- ⁶ ‘Subúdigüda náali joun ja baságarubaña lídaangiñe uboú lun bíchuguniña nun, cátabu lan. Bánigu meja, ába bíchuguniña nun, ñüdüntiña láu le bubeíbei.
- ⁷ Guetó, subúdi jamáali luágu sun lan le bíchugubei nun búmagiñe lan liábin,
- ⁸ rúnaali ugánu le bíchugubei nun joun áni resíbi jamúti, subúdi jamáali luágu inárüni lan luágu búmagiñe lan niábin, afíñeeña gíñe luágu amürü lan oúnajabalina.
- ⁹ ‘Ayúmuraguatina bun jawágu, mayúmuraguntina jawágu lánigu uboú, nayúmuragun jawágu ja bíchugubaña nun, ladüga báni jamá.
- ¹⁰ Sun le náni, báni, le báni, náni, arijúati nuweírigun jawágu.
- ¹¹ ‘Áu, meréedina uboúagu, ánjein jagía, jeréderuba. Áu, neíbuga búmoun. Núguchi sánduti, toúnigi báña ja bíchugubaña nun láu bubáfu lueí jeíguadun, lun lídan jamá ában le tímatimaati quei áu búma.
- ¹² Dán meja le jáma nan uboúagu, toúnigi numútiña meja ja bíchugubaña nun láu bubáfu, meféridiruntina ni ában jádaangiñe lueídügü Júdas, lun lagúnfulirun le bürüwañubei tídan Berérun.
- ¹³ ‘Guetó, neíbuga le ñíjin bubeí, luágu anájagua lan uboúagu aríñaga numúti buri cátei le lun jabuínchun láu ugúndani méme le nuágubei.
- ¹⁴ Rúnaali berérun joun, ába jeyéreegudún lun uboú, ladüga máma jamá lánigu uboú ítara queísi máma lan lánigu uboú áu.
- ¹⁵ Mamúrijaantina búma lun baságaruniña uboúagugiñe, namúriajan búma lun batoúnigiruniña lueí Máfia.
- ¹⁶ Ítara quei máma lan láni uboú áu, máma gíñe láni uboú jagía.
- ¹⁷ Derégeguagüda báña jóungua bun, láu lubáfu berérun le inárütibei.
- ¹⁸ Quei boúnajanina jádoun lánigu uboú láu ugánu lánina asálbaruni, ítara gíñe nouñajaniña jádoun lánigu uboú láu ugánu ligía.
- ¹⁹ Áni derégeguatina núngua bun jawágu, lun gíñe jedéregeragun jóungua bun le tímatimaati.
- ²⁰ ‘Máma rügüñein jawágu namúriaja búma, amúriajatina gíñe jawágu ja lúnbaña jafíñerun nuágu dánme le jagáambuni ugánu lánina asálbaruni jámagiñe.
- ²¹ Amúriajatina búma lun lídan jamá ában sun jagía, lun ában méme jamá cátei wáma quei áu búma, amürü núma, lun lídan jamá ában buídu buídu, lun lafíñerun uboú luágu boúnajan nan.
- ²² Rúnaali uweíriguni le méme bíchugubei nun joun, lun ában méme jamá cátei quei ában méme wamá cátei áu búma,
- ²³ áu jádan, amürü nídán, lun jayábin lun ában mémebaña lan buídu buídu, subúdi lámugei uboú luágu boúnajan lan áu, áni jínsiñe jamá bun sarágu quei nísiñe bun.
- ²⁴ ‘Núguchi, amürü íchugubaliña nun, buséntina lun númabaña lan le ñí numuti, lun jaríjini uweíriguni le bíchugubei nun, ladüga jínsiñegubeiñadina bun lubáragiñe ladügüniwa uboú.
- ²⁵ Núguchi richáguati, ibídiñetibu lun uboú, subúditibu nun, subúdi jamáali gíñe wügüriña ja luágu boúnajan lan áu.
- ²⁶ Subúdigüda náali joun cátabu lan, áni nasúbudiragüda mémebadibu, lun ñi lan ínsiñeni le buágubei nun jádan, lun gíñe ñi nan já dan.

18

Janüğüni Jesúsu adáira
(Mt 26.47-56; Mr 14.43-50; Lc 22.47-53)

¹ Lárigiñe laríñaguni Jesúsu cátei le, ába láfuridun jáu láni disípulugu lun jóudin loubáfurugun dúna le cedrón. Ñíñein ában fulásu lé buri ñi lumuti tídibu olívos, ñíjin lubei lebelura Jesúsu jáu láni disípulugu.

² Subúdi lumúti gíñe Júdas le alúgurubalin Jesúsu, fulásu ligía, ladüga oúndaraguañajaali Jesúsu ñi jáma láni disípulugu.

³ Ába lubeiti lachülürün Júdas ñíjin jáu sarágu súdeara jáma polisía ja tánina témpulu, jóunajan jábutigu fádirigu jáma fariséogu. Gárumatetiña, barútiña gíñe lámpu lúma tóchi.

⁴ Quei subúdi láali lan Jesúsu le lúnbei lasúseredun lun, ába láfuridun, ába laríñagun joun.

—¿Ca jáluajabei?

⁵ Ába jaríñagun lun.

—Wáluajañein Jesúsu le Nazarétna.

Laríñaga Jesúsu joun.

—Áu Jesúsu ligía le jáluajabei.

Ñíñeinti Júdas le edégerubalin jáma.

⁶ Dan laríñagunbei Jesúsu joun luágu ligía lan le jáluajabei, ába jeíguadunga múarugún janagoún.

⁷ Ábaya laríñagun Jesúsu joun.

—¿Ca jáluajabei?

Ába jaríñagun lun.

—Wáluajañein Jesúsu le Nazarétna.

⁸ Ábati laríñagun Jesúsu joun.

—Aríñagaadinatia jun luágu áu lan. Ánjein áu lubei jáluajabei, ígira jumáña ja lun jóudin.

⁹ Lasúseredunbei líra lun lagúnfulirun le laríñagubei Jesúsu guánarügü. “Meféridirúnti ni ában jádaangiñe ja líchugubaña Nóguchi nun.”

¹⁰ Ábati laságarunun Simón Pedro lefeínte, ába líbuguni larígei ában lumúsun fádiri le íñutimaabei gíriti Málco.

¹¹ Ába laríñagun Jesúsu lun Pedro.

—Dáboun befeínte tárigoún. ¿Jarítaguatibu funági luágu moun lan nasúfuriruni oúchawagúni le líchugubei Nóguchi lun nasúfuriruni?

*Jesúsu ligíbugiñe fádiri le íñutimaabei
(Mt 26.57-58; Mr 14.53-54; Lc 22.54)*

¹² Ábati janügüni súdeara, lúma gumándan, jáma japolisían juríu, Jesúsu adáüra, ába jagüraguni.

¹³ Lárigiñe, ába janügüni lúbiñoun Anás. Anás ligía limédamurubei Gáifasi, fádiri le íñutimaabei lídan irúmu ligía.

¹⁴ Gáifasi ligía, le méme meja aríñagubei joun juríu luágu buítima lan joun lun loúnwen ában wügüri jawágu sun mútu.

*Leyéedagun Pedro luágu subúdi láni Jesúsu
(Mt 26.69-70; Mr 14.66-68; Lc 22.55-57)*

¹⁵ Ába wóudin, áu Juan lúma Simón Pedro, lárigi lárigi Jesúsu. Áu, subúditina lun fádiri le íñutimaabei, ábati nebélurun lúma Jesúsu lídoun түbürürü lúban fádiri,

¹⁶ ánjeinti Pedro, ába leréderun boúgudi luágu béna. Ligía náfuridunbei, ába nadímurejan túma to oúnigirubalin béna, ába nebélaagüdüni Pedro.

¹⁷ Ábati tálügüdüni oúnigirutu béna Pedro.

—¿Ma bugúya ában jádaangiñe láni güriñe le disípulugu?

Laríñaga Pédro.

—Uá, máma áu.

¹⁸ Queíti dilíga lubeí, fúguatiñati músu jáma polisía wátu, rára jañáti ñi abácharagua. Ñíñein gíñe Pédro jáma, abácharagua larügürügü wátu.

Lálügüdaguni fádiri le íñutimaabei Jesúsu

(Mt 26.59-66; Mr 14.55-64; Lc 22.66-71)

¹⁹ Ába lagúmeserun fádiri le íñutimaabei álügüdaguei Jesúsu cátaña lan lánibaña disípulugu, cátei lan gíñe larúfudajabei.

²⁰ Laríñaga Jesúsu lun.

—Bouğudi nadímureja ligíbugiñe sun ubouú, súnwandan narúfudajan tídan ligílisi lúma témpulurugu le ñi lubei jóundaragua sun juríu, madügüngidina lubeíti ni cáta arámudaguati.

²¹ ¿Ca uágu bálügüdana? Álügüda báña ja agáambubalina, jagialá aríñagei le uágubei nadímureja joun. Subúdi jamúti le naríñagubei joun.

²² Dan laríñaguni Jesúsu cátei le, ába liábin ában jádaangiñe polisía ja tánina témpulu, ába lagáyuajan ligíbuagun, ába laríñagun lun.

—¿Ítara lúba bouñabuni fádiri le íñutimaabei?

²³ Laríñaga Jesúsu lun.

—Ánjein aríñaga nubeí wuríbati, aríñagabeí jalíañein lan luríban, ánjeinti buídu lubeí le naríñagubei, ¿ca uágu bagáyuaja nuágu?

²⁴ Ábati louñajani Anás gürágu lun Gáifasi, fádiri le íñutimaabei lídan irúmu ligía.

Leyéedagunya Pédro luágu Jesúsu

(Mt 26.71-75; Mr 14.69-72; Lc 22.58-62)

²⁵ Sun dan le, nijágu Pédro abácharagua larügürügü wátu, ába jaríñagun lun.

—¿Másan amürü ában jádaangiñe láni gürígia le disípulugu?

Ába leyéedagun Pédro, ába laríñagun.

—Uá, máma áu.

²⁶ Ábati lálügüdüni ában jádaangiñe lumúsuniña fádiri le íñutimaabei, ában lidúje le líbugubei Pédro arígei.

—¿Máfunagi aríja numútibu lúma lídan fulásu lé buri ñi lumuti tídibu olívos?

²⁷ Ábaya leyéedagun Pédro, lídan óra ligía, ába layúgurujan gáyu.

Jesúsu ligíbugiñe Piláto

(Mt 27.1-2, 11-14; Mr 15.1-5; Lc 23.1-5)

²⁸ Ábati janügüni Jesúsu lúbiñegiñe Gáifasi lun lúbiñoun gumándan. Arúgadeina liñáti, mebélutiñati juríu palásiurugún lueí marúma jamá, siñáme gádan lániña adíneruni le lánina páscua.

²⁹ Ligía láfuridunbei Piláto lun ladímurejan jáma, ába laríñagun joun.

—¿Cásan lidúnrunbei gürígia le jurúma?

³⁰ Ába jaríñagun lun.

—Lun jamúga madügün lan wuríbani, medéregerun wamúti jamúga bun.

³¹ Ábati laríñagun Piláto joun.

—Barüjumei, agúseragüda jumeí quei laríñaguni jilúrudun guánarü.

Jaríñaga juríu lun.

—Wagía juríu, maríchatywa lun wáfarun ni ában jilágubei.

³² Ítara líña lagúnfulirún le laríñagubei Jesúsu luágu ligáburi ída lúba lan louñwen.

³³ Ábaya lebélorun Piláto palásiurugun, ába lagúarun lun Jesúsu, ába laríñagun lun.

—¿Amürü Jarúeitebei Juríu?

³⁴ Ába laríñagun Jesúsu lun.

—¿Luágu báni búngua bálügüdaja luágu líra, ódi ladüga jaríñaguni ámu bun nuágu?

³⁵ Laríñaga Piláto lun.

—¿Juríu funági áu? Binásiñun jáma jábutigu fádirigu, jagía edéregerubalibu nun. ¿Cági bidúnrunbei?

³⁶ Ábati laríñagun Jesúsu lun.

—Narúeijan máma lánina ubou le, lun jamúga ítara líña lan, jageíndaguña jamúga nánigu lun medéregerúniwa nan joun juríu. Máma yána narúeijan.

³⁷ Ábati laríñagun Piláto lun.

—¿Urúei lubeíti amürü?

Laríñaga Jesúsu lun.

—Urúei áu quei baríñaguni. Agüriajoúatina, ñübin áu lídoun ubou le lun naríñaguni le inárünibeí. Sun ja gagáambadibaña lun inárüni, agáamba jamúti le naríñagubei.

³⁸ Laríñaga Piláto lun.

—¿Cáteiti inárünibeí?

Lasíadirúniwa Jesúsu lun ouweni

(Mt 27.15-31; Mr 15.6-20; Lc 23.13-25)

Lárigiñe ladügüni Piláto álügüdajani le, ábaya láfuridun adímureja jáma juríu, ába laríñagun joun.

—Madáritina ni murúsun dúru luágu wügüri le.

³⁹ Quei jéchu jumá lun nígiragüdün ában adaürüti jun lídan fédu le lani páscua, ¿buséntün lun náfuridagüdüni Jesúsu le jarúeitebei juríu?

⁴⁰ Ábaya jagúaragun sun jagía.

—¡Mígiragüdabeí le! ¡Barabáslá bígiragüda!

Barabási ligía, ában jíwer uti.

19

¹ Ábati lanügüni Piláto Jesúsu, ába loúnajan abeíchagüdei,

² ába jíchugun ában súdaara ába rídi láuti jíyu leréberugu Jesúsu, ába jadáüraguagüdüni táu ában anáanguni colóru gúchu.

³ Ába jayárafadun lubádun dan méme aríñageina.

—¡Gabágarilá Jarúeite Juríu!

Ába jagáyuajan ligíbuagun.

⁴ Ábayati láfuridun Piláto, ába laríñagun joun juríu.

—Naságaraali ñájoun lun jasúbudiruni luágu madári nan dúru luágu.

⁵ Ába láfuridun Jesúsu láu rídi láuti jíyu lábulugu, táu lanáangun colóru gúchu.

Ábati laríñagun Piláto joun.

—¡Niján wügüri ligía!

⁶ Dan jaríjbalin jábutigu fádirigu jáu sun polisía, ába jagúmeserun agúaraja.

—¡Dáguabeí luágu gurúwa! ¡Dáguabeí luágu gurúwa!

Laríñaga Piláto joun.

—Barüjumeiti, dágua jumeí luágu gurúwa, ladüga áu, madáritina ni murúsun dúru luágu.

⁷ Ába jaríñagun juríu lun.

—Wagía galúruduntiwa áni según walúrudun, lúnti loúnwen ladüga laríñagun luougua luágu Liraü lan Búngiu.

⁸ Dan lagáambunbalin Piláto le, ábatima lanúfudedun.

⁹ Ábaya lebélorun palásiurugun, ába laríñagun lun Jesúsu.

—¿Jalíanasan amürü?

Moúnabunti Jesúsu ni cáta.

¹⁰ Ábati laríñagun Piláto lun.

—¿Moúnabun bumútina? ¿Ibídíñetísan bun luágu gabáfu nan lun nígiragüdüñibu, gabáfu áu lun nádaraguagüdüñibu luágu gurúwa?

¹¹ Laríñaga Jesúsu lun.

—Úati jamúga ni murúsun ubáfu búma nuágu lun jamúga míchu láni Búngiu bun, ligía weíritima lubei lidúnrun le edéregerubalina bun sügü báu.

¹² Lúmagiñe óra ligía, ába lálugun Piláto ída lúba lan lígiragüdüñi Jesúsu. Ába jagúaragun juríu lun.

—¿Anjein bígiragüda, máma amürü lumáda urúei Rómana! ¡Furúmieguarügü le aríñaguti luógu luágu urúei lan, lágani urúei Rómana!

¹³ Dan lagáambunbalin Piláto líra, ába loúnajan aságarei Jesúsu, ába lañúurun luágu jalaü le agúseragülei, ubáraü le únbei jaríñaga Dübü, Gabáta lídan jerérun juríu.

¹⁴ Quei buri amídirugujaali, le ában wéyu lubá páscua. Ábati laríñagun Piláto joun juríu.

—¿Niján jurúeite!

¹⁵ Ába jagúaragun.

—¡Jilála! ¡Jilála! ¡Dáguabeí luágu gurúwa!

Laríñaga Piláto joun.

—¿Buséntün nádaraguni jurúeite luágu gurúwa?

Jaríñaga jábutigu fádirigu lun.

—Marúeitetiwa ámu lueí urúei Rómana.

¹⁶ Láu líra, ába ledéregeruni Piláto joun lun ládarawagún luágu gurúwa, ába janügüni.

Ládarawagún Jesúsu luágu gurúwa

(Mt 27.32-44; Mr 15.21-32; Lc 23.26-43)

¹⁷ Ábati láfuridun Jesúsu barüñalei lugúruwan lun lídin lídoun fulásu le únbei jaríñaga Lufúlasun Lábu Ichügü, Gólgota lídan jerérun juríu.

¹⁸ Ñi jádaraguei luágu gurúwa, dágua jagía bián wügüriña úara lúma, ában lueígiñe cáda loúba.

¹⁹ Ába loúnajan Piláto íchigagüda ában abürüjoúni luágu gurúwa, laríñaga ñi. “Jesúsu Nazarétna, Jarúeite Juríu”.

²⁰ Sarágu jáña jádaangiñe juríu alíjati abürüjoúni ligía ladüga fulásu le ñi lubei jádaraguei Jesúsu luágu gurúwa, madíseti ubúrugugiñe, áni abürüjoúati abürüjoúni ligía lídan buri dimúrei hebréo, güriégu, lúma latín.

²¹ Ligía jaríñagunbei jábutigu jafádirin juríu lun Piláto.

—Mabürüdabá ñi “Jarúeite Juríu”, bürüba “Le aríñagubei luágu Jarúeite lan Juríu.”

²² Ába laríñagun Piláto joun.

—Le bürünaalíbei bürünaalíbei, ítara lúba.

²³ Lárigiñe jádaraguni súdeara Jesúsu luágu gurúwa, ába janügünun lanáangun, ába jadügün gádürü fánreinti táu, ába fánreinti lun cáda súdeara. Ába gíñe janügünun lisímisin, quei májüchawagún tubei, ában rügüñoun fiésu íñugiñe lun únabun,

²⁴ ába jaríñagun súdeara jámagua.

—Majeíridagua wamoún, ájurerá wamá tuágu, aríja wamámuga cába lan agáñiroun.

Ítara líña lagúnfulirun le tariñagubei Lerérun Búngiu. “Fánreingua jamútu nanáangun jádaangua, ájurera jagía tuágu nisímisin cába lan agáñiroun.” Ítara líña lubeíti jadügüni súdaaragu.

²⁵ Ñiñoun lúguchu Jesúsu yaráfa lun gurúwa túma tamúlelua, María to lúmarí Cléofas, túma María Magdaléna.

²⁶ Dan laríjinbarun Jesúsu lúguchu rára nubádu, áu le disípulu lé jínsiñebei lun sarágu, ába laríñagun tun lúguchu.

—Núguchu, nirán biraü.

²⁷ Ába laríñagun nun.

—Nurán búguchu.

Lúmagine óra ligía, ába nerésibirunun núbiñe.

Loúnwen Jesúsu

(Mt 27.45-56; Mr 15.33-41; Lc 23.44-49)

²⁸ Lárigiñe sun cátei le, quei subúdi láni Jesúsu luágu gúnfulijali lan láu sun le lúnbei ladügüni luágu wasálbarun, ába laríñagun, lun lagúnfulirún le tariñagubei Lerérun Búngiu.

—Mágürabujadina.

²⁹ Ñiñein ában fúdu táu diweín garüjütu, ába jadüdüragüdün ában mudúsi tídan diweín tugúya, ába jíchuguni luágu ában wéwe, ába jíñúruni luágun liyúma.

³⁰ Ába látunun Jesúsu diweín garüjütu tugúya, ába laríñagun.

—Gúnfulija sun cátei.

Ába larábachun ligíina, ába loúnwen.

Límiruni ában súdaara loúba Jesúsu táu lefeínte

³¹ Wéyu ligía, ában wéyu lubá páscua, mabúseeruntiñati juríu lun leréderun jágubu güriá luágu gurúwa lídan wéyu le eméraaguagülei, ladüga weíríti wéyu ligía. Ligía jamúriajaanbei lúma Piláto lun loúnajan ájalajei járuna ja dáwaguñubaña luágu gurúwa, lun gíñe lagídarún jágubu ñígiñe.

³² Ábati jóudin súdaara, ába jájalachuni lúruna furúmiñeti, jalá jamei lúruna le ában le dáwaguñubei luágu gurúwa úara lúma Jesúsu.

³³ Dan le jayárafadunbei lun Jesúsu, ába jaríjin luágu jiláali lan, ligía májalachun jamáali lubei lúruna.

³⁴ Ába liábin ában súdaara, ába límiruni Jesúsu loúbawagun táu ában efeín, ába láfuridun jítaü lúma dúna ñígiñe.

³⁵ Áu Juan, le abürüjabalin le, ában le aríjubalin, áni aríñaga numúti inárüni, subúdi numúti luágu aríñaga nání inárüni lun gíñe jafiñerun jugúya.

³⁶ Ladüga lasúseredunbei buri cátei le, lun lagúnfulirun le tariñagubei Lerérun Búngiu. “Májalachúnwabei ni ában ábuu luágu.”

³⁷ Aríñagati gíñe tídan Lerérun Búngiu. “Jaríjubei le jímiragubei.”

Lábunajoún Jesúsu

(Mt 27.57-61; Mr 15.42-47; Lc 23.50-56)

³⁸ Lárigiñe sun cátei le, ñiñein ában wügüri Arimatéana, gíriti José, falá lumuti meja wügüri ligía Jesúsu, láu sun arámudaguarügü lan ladüga lanúfude jawei juríu, ába lamúriajani lúgubu Jesúsu lúma Piláto. Ába líchuguni lun, ába lanügüni José lúgubu Jesúsu.

³⁹ Ába gíñe liábin Nicodémo, lé meja ñüdünbei ayánuja lúma Jesúsu gúñoun, ába liábin láu sarágu ibíñei.

⁴⁰ Ábati janügüni José lúma Nicodémo lúgubu Jesúsu, ába jóuburaguni táu gamísa to túaguatu láu ibíñei ligía según jagáburi juríu lubá jábunajan.

⁴¹ Ñĩñein ában fulúri-ágei lídan fulásu le ñí lubei jádaraguei Jesúsu luágu gurúwa, lídaanti fulásu ligía, ñĩñein ában umúajaü iséri le mayúsurungili.

⁴² Ñíjin jíchigei lúgubu Jesúsu, ladüga yaráfa lan umúajaü ligía, ladüga gíñe agúñeeli lan, gumése wéyu le eméraaguagülei.

20

Lásaarun Jesúsu lídaangiñe óuweni

(Mt 28.1-10; Mr 16.1-8; Lc 24.1-12)

¹ Wéyu dimáasu, lubá larúgan dan le búrigagili, ába tídin María Magdaléna aríjei umúajaü, dan tachülürünbei ñi, úaali dübü le lidaü umúajaü ñi.

² Ába tídin eíbaagueina le ñíjin wabeí áu lúma Simón Pédro, ába taríñagun woun.

—Barüjama Jesúsu lídaangiñe lumúaja, ibídiñeti woun jalía lan jíchigei.

³ Ábati wáfuridun, ába woúdin luágun umúajaü.

⁴ Úara woúdin biángubei wagía eíbaagueina, furésetina lueí Pédro, ába nachülürün furúmiñe luágu umúajaü.

⁵ Ába nélemuchun aríja ñíjin, gamísa rügüñoun naríja ñi, mebélutina.

⁶ Lárigiñe, ába lachülürün Simón Pédro, ába lebélorun lídoun umúajaü. Gamísa to aúboun lagürawagua Jesúsu, tugúya rügüñoun gíñe laríja ñi.

⁷ Gamísati to áboun loubarawagúa lichügü Jesúsu, máma lídaañoun ában túma tó buri áboun lagürawagúa, jóuburagu tíña, tábugua.

⁸ Ába giñéti nebélurun, ába naríjini le asúseredubei, ába nafíñerun luágu saráli lan Jesúsu lídaangiñe óuweni.

⁹ Ligíaaliti gunfaráanda náni le taríñagubei Lerérun Búngiu luágu lásaaruba lan Jesúsu lídaangiñe óuweni.

¹⁰ Ábati wagíribudun wábiñoun.

Larúfudagun Jesúsu lúngua tun María Magdaléna

(Mr 16.9-11)

¹¹ Ánjounti María, ába teréderun boúgudi ayájuaja lubádu umúajaü. Sun nuján lan ayájua, ába télemuchun aríja lídoun umúajaü,

¹² ába taríjin bián ánjeligu, jarútu jadáüragun, ñun le ñí lubei buga lúgubu Jesúsu, ában lichügügiñe, ában lugúdigiñe.

¹³ Ába jaríñagun ánjeligu jagía tun.

—¿Ca uágu bayájua?

Taríñaga joun.

—Barüjama Nabúreme, ibídiñeti nun jalía lan jíchigei.

¹⁴ Quei taríñagun ítara, ába tadígiragun, ába taríjini Jesúsu, niján lan ñi, ibídiñeti tun luágu ligía lan.

¹⁵ Ábati laríñagun Jesúsu tun.

—¿Ca uágu bayájua? ¿Ca báluajabei?

Sun taríñaguti le oúnigirubalin fulúri-ágei adímurejabei tun, ába taríñagun lun.

—Ánjein banügün lubei, aríñagabeí nun jalía lan bíchigei, barü námugei.

¹⁶ Ábati laríñagun Jesúsu tun.

—¡María!

Ába tagáraragun, ába taríñagun lun lídan jerérun juríu.

—¡Rabóni! —míni lan líra, Maésturu.

¹⁷ Laríñaga Jesúsu tun.

—Márügüdabá nuágu, ladüga maweínrungidina le ñíjin lubeí Núguchi. Beíba, bariñagame joun náni disípulugu luágu neíbuga lan le ñíjin lubeí Núguchi, le gíñe Júguchi, Nubúngiute le gíñe Jubúngiute.

¹⁸ Ábati tídin María Magdaléna awísaraña disípulugu luágu aríja táali lan Jesúsu, áni aríñaga láni buri cátei le tun lun taríñaguni joun.

*Larúfudagun Jesúsu lúngua joun disípulugu
(Mt 28.16-20; Mr 16.14-18; Lc 24.36-49)*

¹⁹ Wéyu méme ligía gúñoun, oúndaragu jáña disípulugu, darúgu béna jáu ladüga janúfude jaweí juríu. Ába lebélorun Jesúsu, ába laráramun jamídaangua, ába labúsurun joun ítara.

—Níjeinlá darángilaü jídan.

²⁰ Lárigiñe laríñaguni líra, ába larúfuduni lújabu lúma louba joun. Ába jagúndaaragun disípulugu láu jaríjini Jesúsu.

²¹ Ábaya laríñagun Jesúsu joun.

—Níjeinlá darángilaü jídan. Ítara quei loúnajanina Núguchi, ítara líña gíñe noúnajanün.

²² Ábati láfurun jawágun, ába laríñagun joun.

—Resíbi jumeí Sífiri Sándu.

²³ Ánjein ferúduna jumá jafígoun ámu, ferúdunawaali, ánjein úa ferúduna jumáni, reídejali, úouga ferúdunawa lan.

Laríjini Tomás Jesúsu lárigiñe lásaarun lídaangiñe ouweni

²⁴ Tomás, ában jádaangiñe dúusu disípulugu le únbei jaríñaga Mádou, úatiti jáma dan le liábinbei Jesúsu.

²⁵ Lárigiñe, ába jaríñagun ja jíbiri disípulugu lun.

—Aríja wamáali Wabúreme Jesúsu.

Ába laríñagun Tomás joun.

—Ánjein maríjin nan lárigi gürábu luágu lújabu, da neíme liraüraü nújabu lídoun júyu le lárigi gürábu, da nújabu lídoun louba, siñábei nafíñerun.

²⁶ Wídü wéyu lárigiñe, oúndaragu jáñaya disípulugu tídan ában múna, ñíñeinti Tomás jáma dan ligía. Láu sun darúgu líña lan béna jáu, ába lebélorun Jesúsu, ába laráramun jamídaangua, ába labúsurun joun ítara.

—Níjeinlá darángilaü jídan.

²⁷ Ába laríñagun lun Tomás.

—Dábei liraüraü bújabu ñájoun, aríja beíme nújabu, da beíme bújabu lídoun nouba. Masígirabá láu liloúguan afíñeni, afíñebá luágu áu lan.

²⁸ Ábati laríñagun Tomás.

—¡Nabúreme, Nubúngiute gíñe!

²⁹ Laríñaga Jesúsu lun.

—Tomás, afíñeedibu guetó, ladüga aríja báadina lan, gúndaatiña ja afíñerubaña, maríjinga jamána.

Ca lan lébubei tabürüjóun líburu to

³⁰ Adúgayati Jesúsu ámu sarágu miláguru jagíbugiñe láni disípulugu, le úabei bürüñu tídan líburu to.

³¹ Labürüdünbei buri le lun jafíñerun luágu Jesúsu lan Crístubei, le Liraü Búngiu, lun gíñe láu lan jafíñerun, gabágari jumá queísi lánigu.

21

Larúfudagun Jesúsu lúngua joun sédü jádaangiñe láni disípulugu

¹ Lárigiñe, ábaya larúfudagun Jesúsu lúngua joun láni disípulugu láru dúna le gíríbei Tibérias. Niján ligáburi ladügüni.

² Lídaañanu ában Simón Pédro, Tomás le únbei jaríñaga Mádou, Natanaél, le lílana Caná le láni Galiléa, lirájüñü Zebedéo, jámaya bián jádaangiñe láni Jesúsu disípulugu.

³ Ába laríñagun Simón Pédro joun.

—Neíbuga esénija.

Ába jaríñagun lun.

—Weíbuga gíñe búma.

Ába jádinun tídoun jagúne, ába jóúdin, mañúguntiña ni cáta áriebu ligía.

⁴ Dan le arúgadeina lan, ába jaríjini Jesúsu ñi láru dúna, ibídiñetí yebe joun disípulugu luágu Jesúsu lan.

⁵ Ábati laríñagun joun.

—Numádagu, ¿mañúgungidünsan?

Jaríñaga lun.

—Ni cáta.

⁶ Ábati laríñagun Jesúsu joun.

—Fíjuma lueígiñe toúnwenren ibíti ugúnein, jañúguba.

Ába jágurun, lárigiñe siñá yebe jacháwarunun séni dúnarugugiñe le jíbe úduraü tídan.

⁷ Ábati naríñagun, aú Juan, lun Pédro.

—¡Jesúsutia le!

Quei lagáambun Simón Pédro luágu Jesúsu lan, ába ladáürunun lanáangun, ába lachúbarun dúnarugun.

⁸ Ja jíbiri disípulugu, ába jóúdin lárún béya táu ugúnein, adúrujeina jamóún séni buin jáu úduraü, quei ában rügüñein lan san bádun jadíse lueí béya.

⁹ Dan le jarárirun múarugun, ába jadárirun wátu geméti láu eñéguraü, láu ában úduraü ligíbuagu túma fein.

¹⁰ Ába laríñagun Jesúsu joun.

—Barújuma fiú jádaangiñe úduraü ja sun liñábei jañúguniña.

¹¹ Ába ladinun Simón Pédro tídoun ugúnein, ába ladúrujanun séni lárún béya buin jáu úduraü weínamutiña, san dimí-san ürüwañanu, láu sun jíbe, ma-jeíridaguntu séni.

¹² Ábati laríñagun Jesúsu joun.

—Jigóúgu, játa bacháti.

Úati ni ában jádaangiñe disípulugu álügüdüti cátei lan, ladüga subúdi jamáni luágu Jesúsu lan.

¹³ Ába liábin, ába lanügünun fein lújaburugu, ába líchugunun joun, ligía méme ladüga láu úduraü.

¹⁴ Ligía lürüwan larúfudagun Jesúsu lúngua joun láni disípulugu lárigi lásaarun lídaangiñe ouweni lúnya labágaridun.

Ladímurejan Jesúsu lúma Simón Pédro

¹⁵ Lárigiñe játun bacháti, ába laríñagun Jesúsu lun Simón Pédro.

—Simón, Liraü Jonás, ¿jínsiñetinasan bun sügü jáu ja?

Laríñaga Pédro lun.

—Ánja, Nabúreme, subúditi bun luágu jínsiñe ban nun.

Ába laríñagun Jesúsu lun.

—Toúnigi báñati nánigu queísi ában jóúniri mudún buíti.

¹⁶ Ábaya lálügüdüni luágu libíaman weíyaasu.

—Simón, liraü Jonás, ¿jinsiñetinasan bun le tímatimaati?
Laríñaga Pédro lun.

—Ánja, Nabúreme, subúdiiti bun luágu jinsiñe ban nun.
Laríñaga lun.

—Toúnigi báñati nánigu.

¹⁷ Ábaya lálügüdüni luágu lürüwan weíyaasu.

—Simón, liraü Jonás, ¿jinsiñetinasan bun?

Ába lírudagun Pédro ladüga lálügüdüni Jesúsu luágu lürüwan weíyaasu ánjein jinsiñe lubei lun, ába laríñagun lun.

—Nabúreme, subúsiiti sun cátei bun. Subúsiiti bun luágu jinsiñe ban nun.

Ába laríñagun Jesúsu lun.

—Toúnigi báñati nánigu queísi ában jóuniri mudún buíti.

¹⁸ Ninárün báu, luágu dan lán meja ñúraütimagidibu, ábaja badáüragun, ába bídin le ñíjin lumúti babúseera, dánme le weíyaadibu, iñúrarügübalime barúna, ábame ladáüraguagüdünibu ámu, ábame lanügünibu le ñíjin lumúti mabúseerun ban bídin.

¹⁹ Láu laríñaguni Jesúsu cátei le, lasúbudiragüdüñein ída lúba lan ligáburi loúnwen Pédro, lun líchugun uweírighuni lun Búngiu láu. Lárighiñe, ába laríñagun lun.

—¡Falábana!

Disípulu le jinsiñegubei

²⁰ Dan ladígiragúnbei Pédro, ába laríjinina, áu Juan, anángüran lan járighi, áu le jinsiñebei sarágu lun Jesúsu, le méme añúurubei loúbagiñe Jesúsu lídan adíneruni, le gíñe álügüdübalin Jesúsu cába lan wádaangiñe edéregerei.

²¹ Dan laríjinbalina Pédro, ába laríñagun lun Jesúsu.

—Nabúreme, ánsan le, ¿cábasan asúsereda lun?

²² Laríñaga Jesúsu lun.

—Ánjana busén labágaridun daríme nagíribudun, ¿cámegi burúma? Amürü, falábana.

²³ Ábati leíbaagun dimúrei jádan jíbiri lánigu Jesúsu luágu moúnwenbadina lán nege, maríñagunti Jesúsu luágu moúnwenbadina lan, aríñagarügüti. “Ánjana busén labágaridun darí lúmoun nagíribudun, ¿cámegi burúma?”

²⁴ Áu méme disípulu le, le achoúrurubalin buri cátei le, abürüja náaru gíñe gárada to jalíjaboun guetó. Áni subúdiwati luágu inárüni lan le naríñagubei.

²⁵ Níjein gíñe sarágu cátei ladüga Jesúsu, ánjein jamúga abürüjoúa ában ában, afíñetina luágu mábara tan jamúga buri líburu to abürüjóutu láu lídan sun uboú.

CÁTEI LÉ BURI MEJA JADÜGÜBEI APÓSTOLUGU

Loúnajani Búngiu Sífiri Sándu

¹ Lun teófilo.

Abürüjatina bun tídan furúmiñetu nigáradan luágu sun le ladügübei Jesúsu, lúma le larúfudajabei, lúmagiñe dan le lagúmeserunbalin luwádigimari

² darí lúmoun wéyu le lamúdeirúnbei siélun. Lubáragiñebei lídin siélun, láu lubáfu Sífiri Sándu aríñaga lumúti cátei lé buri labúseerubei lun jadügüni apóstolugu já meja lanúadajabaña, lárigiñe lídin jámagiñe.

³ Lídan bián-wein wéyu le láubei uboúagu lárigiñe lásaarun lídaangiñe oúweni, arúfudaguati lúngua furáangu joun sarágu weíyaasu luágu wínwan lan. Ába buríti ladímurejan joun luágu larúeijan Búngiu.

⁴ Dán meja le njeingua lan Jesúsu jáma láni apóstolugu, aríñagati meja joun lun máfuridun jamá lídaangiñe ubúругu Jerusalén, laríñaga joun.

—Agúraba jumá lagúnfulirun dimúrei le líchugubei Nóguchi jun, le uágubei naríñaga jun.

⁵ Subúdi jumúti luágu badíseigüda lan Juan láu dúna, nasúbudiragüdüñein jun luágu máljadün lan giñe ánjaün badísei láu Sífiri Sándu.

Lamúdeirun Jesúsu siélun

⁶ Dan le oúndaragujaña lubei lúma Jesúsu, ába jaríñagun lun.

—Wabúreme, ¿Nijánsan dan le lúnbei bíchuguniya linásiñun Israél lun larúeijan?

⁷ Laríñaga Jesúsu joun.

—Siñáti jasúbudiruni ídame lan o cába lan dan ladügei Nóguchi cátei le buri, ligía rügüñein gayára laríñagun ídame lan ladügei.

⁸ Ánjein dánme le liábin Sífiri Sándu juágun, jibíjuba ubáfu lun geféen jumá nuágu, dándu Jerusalén quei sun loubwawagu Judéa, Samária, chülü lúmoun lidíse-ágei fulásu uboúagu.

⁹ Lárigiñe laríñaguni Jesúsu cátei le, sun añaja lan aríaguei, ába liñurúniwa lun lanügüniwa siélun, ába liábin ában juánriñu, ába ladáuragun láu, ába maríjin jamáli lan.

¹⁰ Ñiñanu aríagua siélun sun amúdeireina lan Jesúsu, ligía jasáliragun bián wügüriña, jarútu jadáuragun jarúgabu,

¹¹ ába jaríñagun joun.

—Wügüriña Galiléana, ¿ca uágu jerédera aríagua siélun? Jesúsu méme le, le amúdeirubei siélun júmagiñe, liábiyaba ítara quei jaríjin lídin.

Lanúadirún Matías lewéñequame Júdas

¹² Ábati jagíribudun disípulugu lueígiñe wübü le gíribei Olívos lun ubúrugun Jerusalén, lidíse ában kilómetro.

¹³ Dan le jachülürünbei ubúrugun, ába jamúdeirun tídoun rúmu to ñi lubei jagánawa. Ñiñein Pédro jádan, Jacóbo, Juan, Andrés, Felípe, Tomás, Bartolomé, Matéo, Jacóbo le liraü Álfeo, Simón le lídaanbei adámurini le gíribei Cananísta, lúma Júdas le lamúlen Jacóbo.

¹⁴ Oúndaraguatiñaja sun jagía súnwandan lun jayúmuragun lun Búngiu jáma lamúlenu Jesúsu, túma María to lúguchu, jáma ja jíbiri würiña.

¹⁵ Luágu ában wéyu lídan dan ligía, ába laráramun Pédro jagíbugiñe sun afíñetiña ja ñibaña—jawára san-wein gürígia—ába laríñagun joun.

16 –Nidújeñu, lúnti buga lagúnfulirun le lariñagubei Sífiri Sándu liyúmulugugiñe Davíd tídan Lerérun Búngiu, lídan le ladímurejánbei luágu Júdas, le adúndejabáliña ja anügübalin Jesúsu adáúra.

17 Ában meja jádaangiñe wánigu, Júdas, áni seríwiti lun Jesúsu úara wáma.

18 Ába lídin, ába lagáñijan ában fulásu láu seínsu le afáyeirúbei lun luágu wuríbani le ladügübei. Ába láburojan láu lábuloğu ünabun, ába lafáünchün, ába láfuridun sun litíripan.

19 Dan le jagáambunbalin güriğia ja aganoúbaña Jerusalén, ába jagúajan lun fulásu ligía, Acéldama, míni lan lídan jerérun, Fulásu Láni Jítaü.

20 Ába lasígirun Pédro aríñaga.

–Bürüwañu líña dimúrei buri le luágu Júdas tídan líburu to gíriboun Sálmos. Lariñajare ñi.

Reídeitá lúban málouga,
úa jamá aganoútiña tídan.

Aríñagati gíñe ñi.

Rúalá lubára lun ámu.

21 Ítara líña lubeíti, lúnti wanúadajan ában wügüri wádaangiñe lé meja wámati sun dan le wáma lubei Jesúsu,

22 lúmagiñe dan le labásterágüdünbalin Juan Jesúsu darí lúmoun dan le lamúdeirünbei siélun, lun lewéñegua lan Júdas. Wügüri ligía, líchuguba fe úara wáma luágu lásaarun Jesúsu lídaangiñe oúweni lúnya labágaridun.

23 Ábati jíridun bián jádaangiñe. José, le méme gíribei Barsabási, le méme gíñe gíribei Jústo, lúma Matías.

24 Ába jayúmuragun lun Búngiu ítara.

–Wabúreme, amürü le subúdijabúbei tun janígi sun güriğia, arúfudabei woun ca lan jádaangiñe bián wügüriña ja anúadira báalibei

25 lun lesériwidunibu queísi apóstolu lewéñegua Júdas. Ladüga féridi láali Júdas lubára ladüga lafígounjan, áni ñüdünja lídoun fulásu le ladünabei.

26 Ábati jíchaajan ubúnuruni, ába láburojan luágun Matías. Lúmagiñe óra ligía, ába ábanjali lan jádaangiñe apóstolugu.

2

Liábin Sífiri Sándu

1 Dan lachülürünbei luwéyuri fédu le Pentecostés, oúndaragu jáña sun lánigu Jesúsu lídan ában fulásu.

2 Sódini ába lagaambún ában ireíni ñübinti siélugiñe quei dan le láfurun ában garábali jéreti, ába lagaambún tídan sun múna to ñí jabei.

3 Ábati lasálrágún buri cátei joun camá ligémeri wátu, afánreinjóuañu lun ñi lan ában murúsun loúgiñe lábuloğu cáda ában jádaangiñe.

4 Ába jabuínchun sun jagía láu Sífiri Sándu, ába jagúmeserun adímureja lídan buri ámu luwúyeri dimúrei luei jerérun quei ladímuregüdüniña Sífiri Sándu.

5 Lídoun buri dan ligía, ñíburiñanu juríu Jerusalén ja gúnfulitiña lídan jafíñen, ñübintiña lídaangiñe sun fulásu ubouágu.

6 Dan le jagáambunbalin ireíni ligía, ába jóúndaragunga güriğia, ibídiñeja joun cába lan jasáminara ladüga cáda ában jádaangiñe güriğia jagía, agáamba jamútiña lánigu Jesúsu adímureja lídan jerérun guánarü.

7 Ába laweíridun janígi, ába jaríñagun jámagua.

–¿Ma funági Galiléana ja adímurejabaña?

8 ¿Ída liñáti wagáambubaliña adímureja lídan lerérun cáda ában wádaangiñe?

⁹ Añájein gürígia Pártiana ya, Médiana, Elámna, Mesopotámiana, Judéana, Capadócia, Póntona jáma Ásiana,

¹⁰ Fríjiana, Panfíliana, Ejíptona lúma lídaangiñe buri fulásu África le yagüroun mémebei lueí Ciréne. Añájein giñe Rómána aganoútiña ya, añájein jádaangiñe, juríu ladüga juríu jamá jagübürigu, jíbiri, barü jamaali ligáburi jafíñen juríu.

¹¹ Añájein giñe gürígia Crétana jáma Arábiana, sun wagía agáamba wamútiña adímureja luágu luweirigun Búngiu lídan werérun guánarü.

¹² Weíriti janígi sùngubei, ibídiñeja joun cába lan jasáminara, ába buri jálügüdagun jámagua.

—¿Cásan míni lan sun le?

¹³ Jíbiri, ába jéjerajan jáu lánigu Jesúsu, ába jaríñagun.

—Bacháruañanúrügü jáña.

Le laríñagubei Pédro joun gürígia ja ñíbaña

¹⁴ Ábati laráramun Pédro jáma ja jíbiri únsu apóstolugu, ába laríñagun láu umálali jéreti.

—Wügüriña Judéana jáma sun ja aganoúbaña Jerusalén, agáamba jumeí le lúnbei nariñaguni jun buídu, subúdi jumámugei ca lan lílabei cátei le jaríjubei.

¹⁵ Mabácharuántiña wügüriña ja quei jarítagun, néfugubeigili bináafin guetó.

¹⁶ Cátei le, le jaríjubei, ligía lé meja uágubei ladímureja Joél, le proféta, dan le laríñagubei.

¹⁷ Lídoun buríme lagúmujoun wéyu, líña laríñagun Búngiu, nouñajabei náni Espíritu jádoun sun gürígia, nadímurejaba jayúmulugugiñe jisáanigu.

Nayáwadaguba joun irájünü, lúma joun weiyaaña mútu.

¹⁸ Nouñajabei giñe náni Espíritu jádoun ja esériwidubaña nun lídoun buri wéyu ligía, wügüriña jáma würiña, ábame nadímurejan jayúmulugugiñe.

¹⁹ Narúfuduba buri cátei gariyawaseti siélu, narúfuduba seíni ubouágu.

láubei jítaü seíni buri ligía, láu wátu geméti, lúma láu juánriñu láuti gumúlali.

²⁰ Labúrigaduba wéyu,

láfuarame játi funáti quei jítaü,

lubáragiñe lachülürün luwéyuri Wabúreme,

le lúnbei ában lan wéyu weíriti, le marijínigilíbei líbe.

²¹ Áni sun ja amúriajatiña asálbaruni lúmagiñe Búngiu, jasálbaruba.

²² ‘Agáamba jumeí lubeíti le lúnbei nariñaguni, jugúya wügüriña Israelítagu. Jesúsu le Nazarétna, ában meja wügüri le larúfudubei Búngiu jigíbugiñe quei wügüri úraguati láu buri cátei weínamuti, miláguru, lúma buri seíni le ladügübei Búngiu jagánagua lídaangiñe, quei le jisúbudin.

²³ Láu sun líra, dan le ledéregerünbei jun, quei ligáburi aráansejani le larítagebei Búngiu lúmagiñe furúmiñeti dan, ába jáfaruni jilágubei láu jedéregeruni joun wügüriña wuríbatíña lun jádaraguni luágu gurúwa.

²⁴ Ába leséfuruni Búngiu lídaangiñe lubáfu ouweni, sarágüda lumúti lúnya labágaridun, ladüga siñá lan gabáfu lan ouweni luágu.

²⁵ Laríñajare urúei Davíd, dan le ladímurejan luágu Jesúsu.

Subúdi numúti luágu númabei lan Nabúreme Búngiu súnwandan, noubagiñeñein lun úa lan ni cáta lun lebélaagüdün anúfudei nídoun.

²⁶ Ligía lébubei téjerajan nanígi,

ába nadímurejan luágu ugúndani le nídaanbei.

Láu sun wügüri nan garaüwarügüti,
jeménigitina buágu luágu nabágaridayaba lan,

²⁷ ladüga mígirun bubóun nuwáni lídan jabára jiláaña,
mígirun amürüme lun lañáladun núgubu, áu le bánígu le jínsiñebei bun.

²⁸ Arúfuda bumúti üma le anügübei gürígia lídoun íbágari magúmuchaditi nun,
áni babuínchagüdúbadina láu ugúndani láu abúnja lan nubádu.

²⁹ ‘Nidújeñu, cátei furáanguti le, luágu jilá lan meja wadúje Davíd, bunáwa
ligía, gayáraagili waríjini lumúaja chülü lúmoun wéyu le.

³⁰ Davíd, ában meja proféta ligía, áni subúdi lumúti meja luágu aríñaga
láali lan Búngiu lun luágu jádaangiñeba lan linébaanfan liábin Crístu, le lúnbei
lañúurun luágu lála.

³¹ Adímurejati lubeíti Davíd luágu lásaarun Crístu lídaangiñe oúweni, luágu gíñe
merédeboun lan luwáni lídan jabára jiláaña, mañáladun ligíame lúgubu. Ítara
líña ladímurejan Davíd luágu Crístu camá jamuga aríagu líña lun, áni ítara líña
lasúseredun.

³² Sarágüda lumúti Búngiu Jesúsu méme le lídaangiñe oúweni, sun wagía
geféentiwa luágu líra.

³³ Ñurügüda lumúti Búngiu lueígiñe loúnwenren láu sarágu uweírighuni, ába
lerésibiruni Sífiri Sándu lúmagiñe Búngiu queísi laríñaguni Búngiu lun, lun
gayáraabei lan loúnajani méme Sífiri Sándu ligía joun sun lánigu ubouágu. Ligía
cátei le aríja jumáalibei lúma le agáamba jumáalibei guetó.

³⁴ Mára Davíd amúdeirubei siélun, aríñagati Davíd guánarügü.

Laríñajare Búngiu lun Nabúreme.

“Ñürüba lueígiñe noúnwenren,

³⁵ daríme níchuguniña báganiñu lábugiñoun bubáfu.”

³⁶ ‘Lúnti jasúbudiruni sun jugúya linásiñun Israél luágu Jesúsu méme lan le, le
jádaragubei luágu gurúwa, adüga láali lan Búngiu lun ligíaba lan Wasálbaragüle,
ligíame gíñe Wabúreme.

³⁷ Dan jagáambunbalin cátei le, ába lebélorun igárigu tídoun janígi, ába
jaríñagun lun Pédro lúma joun jíbiri apóstolugu.

—Wadújeñu, ¿cábasan wadüga?

³⁸ Ába laríñagun Pédro joun.

—Sáansi jumeí jigáburu ligíbugiñe Búngiu, badísei jugúyame cáda ában lídan líri
Jesucrístu, ferúduawa lámuga jífigoun, ru lámugei Búngiu Sífiri Sándu jun.

³⁹ Ladüga aríñagaali Búngiu luágu líchugubei lan gíñe Sífiri Sándu jun,
lúma joun jadügawagun, lúma joun ja aganoubaña díse, lúma joun sun ja
lagúarubaña Búngiu lun lánigu jamá.

⁴⁰ Láu buri dimúrei le lúma buri ámu, ladímureja Pédro joun, ába laríñagun
joun.

—Séfu jumá lueí asúfuriruni le lúnbei liábin jawágun gürígia wuríbatiña ja.

⁴¹ Ítara liñáti ába jabásterun, ja adügübaña gásu láu lerérun, ába jayábin queí
buri ürüwa mílu gürígia lun jafíñerun luágu Jesucrístu wéyu ligía.

⁴² Ába jedéregeragun jóungua lun jafúnrendeiruni le jarúfudajabei apóstolugu
joun, aganoua jagía lídan úarani jámagua, ayúmuragua jagía buri lun Búngiu,
oúndaragua jagía lun jeíginun fein to arítaguagülei luágu loúnwen Jesúsu, queísi
meja laríñaguni joun apóstolugu lun jadügüni.

Jabágaru furúmiñetiña lánigu Crístu

⁴³ Súngubei láuñanu luweírín anígi luágu buri seíni lúma buri miláguru le
ladügübei Búngiu jádaangiñe apóstolugu.

⁴⁴ Sun ja afñerubaña, lídaañanu ában, ába buríti jafánreinjani le jámati jádaangua.

⁴⁵ Jalúgurajeí buri jafúlasun lúma le jámati, ába jafánreinjani lebégi según lemégeirun cáda ában.

⁴⁶ Ságü wéyu jóúndaragun témpulurugu lun jájuduragun lun Búngiu. Lárigiñe, ába jóúndaragun lúbiñe ában jádaangiñe lun jeíginun fein to arítaguagülei luágu loúnwen Jesúsu, lúma lun jeígin le lánina ságü wéyu, lídan ában láu ugúndani lúma gudémegu.

⁴⁷ Ábaja jadímurejan weírigu luágu Búngiu, ábati jínsiñe jamá joun gürígia, ábatija anáajeina lániña Búngiu ja asálbareinabaña jánwoun.

3

Lareídagun ában meíbugunti

¹ Luágu ában wéyu, ába lídin Pédro lúma Juan témpulurugu ladaúnrün úrúwa rábounwéyu, le lórate ayúmuraguni lun Búngiu.

² Ságü wéyu, ñiñein lan ában wügüri meíbugunti lúmagiñe lagüriajoún, barúwarügütíja añúura lubádu tubéneri témpulu le gíribei “Béna Buídumeraüti” lun lamúriajan seínsu jáma ebélurutiña témpulurugun.

³ Dan le laríjinbaliña meíbugunti ligía Pédro lúma Juan jebélura lan témpulurúgun, ába lamúriajan seínsu jáma.

⁴ Ábati jaríjin Pédro lúma Juan luágun, ába laríñagun Pédro lun.

—Aríjabá wawágun.

⁵ Ába laríjin jawágun, agúraba yebe jíchugun seínsu lun.

⁶ Ába laríñagun Pédro lun.

—Maseínsutina, níchigaali le númati bun. lídan líri Jesucrístu le Nazarétna, sarába, beíbuga.

⁷ Ábati lárügüdüni Pédro lueígiñe lújabu le loúnwenren, ába liñúraguni, óra ligía, ába ledérebugudun lugúdi lúma lumúrugute.

⁸ Ábati lachúbarun lun laráramun, ába leíbugun. Ába lebélorun jáma témpulurugun, eíbugeina, achúbajeina, adímurejeina luágu luweírigin Búngiu.

⁹ Ába jaríjini sun gürígia eíbuga lúma adímureja luágu luweírigin Búngiu.

¹⁰ Weírítiti janígi luágu le asúseredubei lun, quei subúdi jabálin wügüri ligía, subúdi jameí luágu ligía lan léñaja añúurubei amúriaja tubéneri témpulu le gíribei “Béna Buídumeraüti”.

Lapúrichijan Pédro témpulurugu

¹¹ Mígiragüdün lumútiñati meíbugunti le areídagubei Pédro lúma Juan, súnti gürígia, ába jeíbaagun láu luweírín janígi luágun tubáranda témpulu le gíribei Salomón, le ñí jabei.

¹² Dan le laríjini Pédro cátei le, ába laríñagun joun gürígia.

—Jugúya Israelítagu, ¿ca uágu laweírída janígi? ¿Ca uágu jaríaguawa camá jamuga wagía areídaguagüdúbalin wügüri le, eíbugagüdei láu wabáfu o láu lan wagúnfulin lúma Búngiu?

¹³ Máma líña, Búngiu, le Jabúngiute binádu wagübürigu Abrahám, Isáac lúma Jacób, ligía areídaguagüdúbalin wügüri le lun líchuguni líñun-ágei uweírigin lun Jesucrístu le Liraü, ligíra lé meja jedéregerubei joun lúrudugu, áni dan lálugan Piláto lígiragüdüni, májatün.

¹⁴ Lubáragiñe jamúriajan lun lígirawagüdün Jesúsu le jarúmabei áni richágua, amúriajarügü jugúya lun lígirawagüdün ában gáfarajati.

¹⁵ Ítara líña jáfaruni le íchugubalin ibágari tímatimaati. Ába lásaaragüdüni Búngiu lídaangiñe ouweni, áni geféentiwa luágu líra.

¹⁶ Niján wügüri le jaríjubei áni subúdi jumeí, láu lubáfu méme Jesúsu ligía, lerésibira érei. Wafiñen luágu Jesúsu, ligía areídaguagüdübalin buídu buídu quei jaríjini.

¹⁷ ‘Subúdi náali, nidújeñu, luágu ibídiñe lán meja jun ca lan jadügübei dan le jáfarunbálin Jesúsu, jugúya jáma jábutinu.

¹⁸ Láu sun líra, gúnfuli lumúti Búngiu lé meja laríñagubei jádaangiñe profétagu, luágu lúnti lan lasúfuriruba lan Crístu.

¹⁹ Ligía lubeíti, ígira jumeí binádu jigáburi, giríbu jumá lun Búngiu, chibáwa lámuga jifígoun.

²⁰ Ábamei gayára lan loúnajan Búngiu eméraaguni tun juwáni, oúnajaya leíme Jesúsu le Crístu, le aráanseelibeí lubáragiñe furúmiñeti dan woun.

²¹ Láu sun, lúnti lan leréderun Jesucrístu siélu guetó daríme laráanseruni Búngiu sun cátei quei laríñaguni jádaangiñe profétagu ja derégeguaañabaña jóungua lun, lídan meja dan le binádu.

²² Ítara líña lubeíti aríñagati meja Moisés joun binádu wagübürigu. “Loúnajaba Wabúreme Búngiu ában proféta jádaangiñe guánarügü quei loúnajanina. Ánja jumá lun sun le lúnbei laríñaguni jun,

²³ ladüga sun ja amájarutiña lun le laríñagubei proféta ligía, jagídarúba jádaangiñe lánigu Búngiu, ábame jagünrinchawagún.”

²⁴ ‘Ítara líña lubeíti, sun profétagu lúmagiñe Samuél darí lárigiñe, adímurejatiña libügürü buri cátei le lúnbei lasúseredun lídoun buri wéyu le.

²⁵ Jugúya lúnbei jerésibiruni sun le laríñagubei Búngiu jádaangiñe profétagu, luáguti giñe jufúleisein darádu lé meja ladügübei Búngiu jáma binádu wagübürigu dan le laríñagunbei lun Abrahám. “Nabínirubaña sun gürígia ja ubouágubaña láu ában jádaangiñe binébaanfaangu.”

²⁶ Ába lanúadajani Búngiu Liraü lun loúnajani jun furúmiñe, jugúya juríu, lun labínirunün cáda ában jádaangiñe, láu laságarunün lídaangiñe luríban jigáburi.

4

Pédro lúma Juan jagíbugiñe gumádimatiña

¹ Nígiña Pedro lúma Juan adímureja joun gürígia, ligía jayábin jafádirigun juríu, jáma jábutigu súdaara ja oúnigirubárun témpulu, jáma ja lídaanbaña jadámurin saduséogu.

² Gáñitiña ladüga jarúfudajan Pédro lúma Juan joun gürígia, aríñaga jagía luágu arúfudúa lan luágu jásaaruba lan gürígia lídaangiñe ouweni lúnya jabágaridun ladüga sará lan Jesúsu.

³ Ábati janügüniña adáüra, ába jádaruniña furísunrugun darí larúgan quei dárüjali lubeí.

⁴ Sarágu jáña jádaangiñe ja agáambubalin ugánu le jíchugubei apóstolugu afíñerutiña luágu. Ja afíñerubaña jarügü wügüriña, quei buri seíngü mílu.

⁵ Larúgan, ába jóúndaragun jábutigu juríu, wügüriña weírigutiña lídan jafiñen, jáma arúfudajatiña lilúrudun Moisés, Jerusalén.

⁶ Níñein giñe Anás le fádiri le íñutimaabei, Gáifasi, Juan, Alejandro jáma sun ja jádaangiñebaña lufámilian Anás.

⁷ Ábati jóúnajan anügei Pédro lúma Juan, ába jíchuguniña lamídan jadámurin, ába jaríñagun joun.

—¿Ca áu ubáfu, o ca ídan íri jareídaguagüdei wügüri le?

⁸ Buin líña Pédro láu Sífiri Sándu, ába laríñagun joun.

—Jábutigu juríu jáma wügüríña weírigutiña lídan wafíñen.

⁹ quei jálügdüniwa luágu buíti le adügübei lun ában wügüri sánditi, ída líña lan lareídawaguágüdün,

¹⁰ buséntiwa lun jasúbudiruni, jugúya jáma sun gürígia ja Israelítagu, luágu láu lan lubáfu Jesucrístu le Nazarétna niján lubei wügüri le ya jigíbugiñe areídaguañu. Láu lubáfu Jesucrístu, le meme jádaragubei luágu gurúwa, le lásaaragüdübei Búngiu lídaangiñe ouweni, lareídagua.

¹¹ Jesús le, ligía queisi dübü le áubei jíchiga mebéreseni, jugúya le queibaña ábunagutiña múna, áni ñübinjali Jesús lun ligíaba lan quei dübü le mégeiwatimaabei lídan bunáguau.

¹² Úati ámu lun lasálbaruniwa lueídügüya Jesucrístu, ladüga míchuti Búngiu ámu íri ubouágu lun gayára lan wasálbarun lueígiñe.

¹³ Dan jaríjini gumádimatiña luágu adímureja jamá Pedro luma Juan manúfudeiga ni murúsun, áni subúdi jamei luágu máma jamá gürígia atúriajatiña sarágu, luágu gürígia jamá ja furúmieguarügü, ába laweíridun janígi, ábati jasúbudiruni luágu jádaangiñetiña lan já meja eíbugubaña luma Jesús.

¹⁴ Queiti ñíñein lubei wügüri le areídawaguágüdübei jáma, rára ligía, siñáti jaríñagun lúrudugu ni cáta.

¹⁵ Ábati jóunajaniña lúrudugu Pedro luma Juan luma wügüri le areídagualibei bougudin luei jádámurin lun gayáraabei lan jayánujan jámagua.

¹⁶ Jaríñagati.

—¿Cábasan wadüga jáu wügüríña ja? Sun ja aganoubaña Jerusalén subúdi jamúti luágu adüga jamáali lan miláguru le, áni siñáti wayéedagun láu.

¹⁷ Lun mabúruchagun lan ugánu luágu cátei le lídan sun fulásu, wewéridiraña lun madímurejandügüya jamá ni ca un lídan líri Jesús lúmagiñe ugúñe.

¹⁸ Ábati jagúarun joun lun jebélurun, ába jaríñagun joun lun ni lan ca uágu lun madímurejan jamá, marúfudajan jagíame lídan líri Jesús.

¹⁹ Ába jaríñagun Pedro luma Juan joun.

—Samína jumá júngua ánjein buídu lubei ligíbugiñe Búngiu lun ladügün le jubeíbei, ígira le lubeíbei Búngiu.

²⁰ Wagía, siñáti wámanichun láu cátei le aríja wamáalibei luma le agáamba wamáalibei.

²¹ Ábayati jewéridiruniña gumádimatiña, ába jigíragüdüniña. Madáritiña ída lúba lan jadügün ni cáta jáu ladüga adímurejatiña buri gürígia buíti luágu Búngiu luágu cátei le asúseredubei.

²² Wügüri le areídagubei láu miláguru ligía, sügü láu bián-wein irúmu láu.

Jamúriajan afíñetiña manúfudei luma Búngiu lídan jesériwidun lun

²³ Dan le jáfuridun Pedro luma Juan furísunrugugiñe, ába jóudin le ñí jabei jibirigu, ába jabájüdaguni sun le jaríñagubei jábutigu fádirigu jáma wügüríña weírigutiña joun.

²⁴ Dan jagáambubalin, ába jayúmuragun sun jagía lun Búngiu, ába jaríñagun.

—Wabúreme, amürü Búngiubei le adügübalin siélu, ubou, barána luma sun cátei.

²⁵ Amürü, aríñagatibu láu lubáfu Sífiri Sándu liyúmulugugiñe David lé meja esériwidubei bun.

¿Ca uágu jagáñida ja mámabaña juríu, samína jagía lun jadügüni cátei le siñábei jadügüni?

²⁶ Iñúraguatiña lurúeitegu ubou jóungua, oundaraguatiña lábutigu fulásu

lun jadüügün wuríbani lun Wabúreme Búngiu lúma lun Crístu le lanúadajabei.

²⁷ ‘Áni suséreti ítara, oúndaraguatiña Heródes luma Póncio Piláto lídan ubúругu le, jáma ja mámabaña juríu, lúma jáma Israelítagu lun jadüügün wuríbani lun Biraü Jesúsu le sándubei, le banúadajabei.

²⁸ Láu líra, adüga jamúti sun le baráansejabei lun lasúsereduba lan.

²⁹ Guetóti, Wabúreme, aríjabei jasíadiruníwa, rúba anígi woun, wagía le esériwidubalibu, lun wadímurejan buágu manúfudeiga,

³⁰ gayára lámuga gíñe wareídaguágüdüñ sánditiña, adüga wagíame miláguru lídan líri Biraü Jesúsu le sándubei, láu bubáfu wawágu.

³¹ Dan le lásurun jayúmuragun, ába lánjingichun fulásu le ñí lubei jóúndaragua, ába jabuínchun sun jagía láu lubáfu Sífiri Sándu, ába japúrichijani lerérun Búngiu manúfudeiga.

Sun cátei jáni súngua luágu

³² Sun ja afíñerubaña, ában lábu jarítangun, ában lábu jabúseerun. Úati ni ában aríñaguti luágu lumégen luágu láni lan lábugua, sun cátei jáni súngua luágu.

³³ Ába jasígirun apóstolugu adímureja luágu lásaarun Wabúreme Jesúsu lídaangiñe oúweni láu sarágu ubáfu, ábati labíniruniña Búngiu sun jagía sarágu.

³⁴ Úati ni ában jádaangiñe emégeiruti ni cáta ladüga sun ja gafúlasunbaña o gában, ába buri jalúgurunun, ába janüğüni tebégi,

³⁵ ába jadéregeruni joun apóstolugu lun lafánreinjoún jádan ja emégeirutiña.

³⁶ Queíburi, ñíñein ában jádaangiñe ladügawagun Leví jádan, gíriti José, agüriajóuti luágu uboúju le gírubei Chípree, ába jáchuni apóstolugu Bernabé, míni lan líra, “Le Íchigubei Gurásu”.

³⁷ Wüğüri ligía, ába lalúguruni lufúlasun, ába lanüğüni seínsu edégera joun apóstolugu.

5

Jafígoun Ananías túma Safíra

¹ Ñíñein gíñe ában wüğüri gíriti Ananías, túma Safíra, to lúmari, ába gíñe jalúgurun ában fulásu.

² Wüğüri le, ába lanüğüñe lídaangiñe seínsu, ába lídin láu líbiri joun apóstolugu, lafámura camá jamuga ligía rüğüñein libíjin luágu fulásu. Áni subúsititi sun cátej tun lúmari.

³ Ábati laríñagun Pédro lun.

—Ananías, ¿ca uágu bígira lun lagáñiruni Máfia barítangun lun layéejagüdüñibu lun Sífiri Sándu, lun beréderun láu líbiri seínsu le afáyeirúbei bun luágu fulásu?

⁴ ¿Ma funági bufúlasun meja fulásu? Lárigiñe balúguruni, ¿ma biseínsun lun badüğüni le babúseerunbei láu? ¿Ca uágu basáminara badüğüni cátei le? Búngiu balugubei bayéedagun, máma wüğüriña.

⁵ Dan lagáambuni Ananías cátei le, ába láburujan oúwe. Súnti ja asúbudirubalin cátei le, ába janúfudedagun.

⁶ Ábati jayábin wüğüriña, ába jóúburaguni Ananías, ába janüğüni ábuna.

⁷ Queíburi ürüwa óra lárigiñe, ába tebélorun lúmari Ananías, ibídiñoun ni cáta tun luágu le asúseredubei.

⁸ Ába laríñagun Pédro tun.

—Aríñagabei nun, ¿luágu ebégi le jaríñagubei jalúgurei fulásu?

Ába taríñagun.

—Ánja, luágu ebégi ligía.

⁹ Ábati laríñagun Pédro.

—¿Ca san uágu jebélura lídoun úaraduni lun jóuchaguni láni Búngiu Espíritu ítara? Añatén ja anügübalin búmari ábuna, janügadibu gíñe.

¹⁰ Lídan méme óra ligía, ába táburujan ouwe lubádu lugúdi Pédro. Dan jebélurun wügüriña, jadáriroun jiláaru, ába jaságarunun, ába jábununun louúbagiñe túmari.

¹¹ Súnti gürígia ja afiñebaña luágu Crístu jáma sun ja asúbudirubalin cátei le, ába janúfudedagun sarágu.

Sarágu buri miláguru lúma seíni

¹² Adáaguatiña buri apóstolugu sarágu seíni lúma miláguru jádan gürígia, ábati buri jóúndaragun sun afiñetiña lídan fulásu témpulurugu le gíríbei “Barandá Salomón”.

¹³ Úati meja ni ában jádaangiñe ja mámabaña afiñetiña lun jóúndaragun jáma afiñetiña ladüga janúfude, láu sun jínsiñe jamá sun afiñetiña joun gürígia, sarágu.

¹⁴ Eíbu wéyu, eíbu jayábin gürígia lun jafiñerun luágu Jesucrístu, dándu wügüriña queísi würiña.

¹⁵ Quei jadügüña lan apóstolugu sarágu miláguru, ába jaságaruniña gürígia sánditiña úmadoun tídan jabárari lun dan lan lásügürün Pédro, gayára lan jareídagun láurügü tadágarun liyáwa jawágu.

¹⁶ Nübintiña gíñe sarágu gürígia lídaangiñe buri fulásu yaráfati lun Jerusaléoun jáu sánditiña jáma ja gawágutiña espíritugu wuríbatíña, sun jagía areídaguatiña.

Jeíbaajoún Pédro lúma Juan

¹⁷ Léti fádiri le íñutimaabei jáma ja jánigu saduséogu ja lúmabaña, ába jabuínchun láu gimúgaü,

¹⁸ ába janügüniña apóstolugu, ába jadáürüniña.

¹⁹ Ába ladáraruni ában láni Wabúreme Búngiu ánjeli tubéneri furísun áriebeu ligía, ába láfuridagüdüniña, ába laríñagun joun.

²⁰ —Jeíba, jaráramame témpulurugu, ábame jabájüdagun joun ja níbaña luágu iséri ibágari le líchugubei Jesucrístu joun gürígia.

²¹ Dan jagáambuni cátei le, ába jóúdin témpulurugun bináafingua, ába jagúmeserun arúfudaja.

Súnti dan le, le fádiri le íñutimaabei jáma ja lúmabaña, ába jóúndaruniña líñun-ágei lúrudu, ja súnbaña Israelítagu weírigutiña, ába jóúnajan anügaña apóstolugu furísunrugugiñe.

²² Dan jachülürünbei polisía furísunrugu, madári jamútiña ñi. Ába jagíribudun,

²³ ába jaríñagun.

—Darúñu líña wadárirunun furísun, níñanu súaara bénabu oúnigira, dan le webélurunbei, madáritiwa ni ában jádaangiñe apóstolugu ñi múnada.

²⁴ Dan le jagáambunbalin jábutigu fádorigu lúma jábuti súaara ja oúnigirubarun témpulu cátei le, ába jálügüdagun jóúngua cába lánfuna ídan lébeda cátei le.

²⁵ Lídan óra ligía, ligía liábin ában wügüri, ába laríñagun joun.

—Ja wügüriña ja jádarubaña furísunrugu, añájein témpulurugu arúfudaja joun gürígia.

²⁶ Ábati lídin jábuti oúnigirutiña jáu súaara, ába janügüniña láu buídu, ladüga janúfude lueí jachámuragun gürígia dübü jawágun.

²⁷ Dan jachülürün jáu, ába jíchuguniña ligíbugiñe líñun-ágei lúrudu, ába laríñagun fádiri íñutimaati joun.

28 —Wéridi wamáadün lun marúfudajandügüya jumá lídan líri Jesúsu, áni ¿ca jadüga? Buíngüda jumá sun Jerusalén láu le jarúfudajabei, áni buséntün jíchuguni dúru wawágun luágu loúnwen wügüri ligía.

29 Ábati loúnabun Pédro jáma ja jíbiri apóstolugu, ába laríñagun.

—Lúnti wagáambuni Búngiu lun wadügüni le lubeíbei lubáragiñe le jabeíbei wügüriña.

30 Le Jabúngiute binádu wagübürigu, ligía ásaaragüdübalin Jesúsu, le méme jáfarubei láu jádaraguni luágu ában gurúwa.

31 Rúlaali Búngiu uweíriguni lun, ñurúgüdaleí lueígiñe loúnwenren, adüga láali Ábutime lúma Asálbaragülei, gayára lámuga jígiruni Israelítagu binádu jagáburi, lun gíñe ferúdunawa lan jafígoun.

32 Geféentiwa luágu líra, geféenti gíñe Sífiri Sándu le líchugubei Búngiu joun ja ñüdünbaña láu le lubeíbei.

33 Dan jagáambunbalin líñun-ágei lúrudu cátei le, ába jagáñidun, ába yebe jabúseerun jáfaraguniña jilágubei.

34 Ñíñein ában fariséo jádan lúrudugu, gíriti Gamaliél, maésturu lánina lilúrudun Moisés, inébeti joun gürígia sarágu. Ába laráramun, ába laríñagun lun janügüniwa apóstolugu lídaangiñe adámurini luágu murúsun óra, gayára lámuga ladímurejan jámarügü lúrudu.

35 Ába laríñagun joun gumádimatiña.

—Wügüriña Israélna, toúnigi jumátia láu le lúnbei jadügüni jáu wügüriña ja.

36 Jarítagua jumátia luágu inúragua lán meja Teudás lúngua aríñaga luágu ában lan wügüri weíriguti ligía, ába jafálaruni gádürü-san wügüriña, áni afarúati jilágubei, súnti ja afálarubalin, ába jawáragadagun, ába lagúmuchun sun cátei.

37 Lárigiñe, lídan lidáani jabájüdüniwa gürígia, ligía liñúragun Júdas le Galiléana lúngua, sarágu jáña afálaruti lídan labúseerun yebe lagárabagun luágun gumádi. Áfarúati gíñe, ába gíñe jawáragadagun sun ja afálarubalin.

38 Ígira jumáña lubeíti wügüriña ja, memétera jumá jámoun. Ladüga ánjein jáni lubeí wügüriña cátei le jarúfudajabei lúma le jadügübei, lagúmuchaguba,

39 ánjein láni lubeí Búngiu, siñá jubei agünrinchagua. Toúnigi jumá, mageíndagua jumá lúma Búngiu.

40 Ába jánjanrun súngubei láu le laríñagubei. Ábati jebélaagüdüniña apóstolugu, ába jabeíchuniña, ába jaríñagun joun lun jebé lan jadímurejan lídan líri Jesúsu. Lárigiñe, ába jígiragüdüniña,

41 Ába jáfuridun apóstolugu jámagiñe lúrudugu, gúndaañu láu laríjiniña Búngiu queísi gürígia gadünamatiña lun jasúfuriruni busíganu luágu líri Jesúsu.

42 Merédetiti jarúfudajan témpulurugu lúma tídan buri múna ságü wéyu, aríñaga jagía luágu Jesúsu lan Crístubei le agúrabajoúbei.

6

Jáluajoúniwa sédü ídejatiña

1 Lídan dan ligía, quei agíbedeina jamátima afíñetiña luágu Jesucrístu, ába jagúmeserun ja adímurejabaña güriégu adárra jadúnrun ja adímurejabalin jerérun juríu, ába jaríñagun luágu mibíjin jamá würíña güriégu ja jiláañabaña úmari eígini dan le lafánreinjoúniwa, ságü wéyu.

2 Ábati joúndaruniña dúusu apóstolugu afíñetiña, ába jaríñagun joun.

—Mabuídunti lun wígiruni wapúrichijani lerérun Búngiu lun wagíaba lan afánreinjei eígini.

³ Ligía lubeíti nidújeñu, áluga jumá sédü wügüríña jídaangiñe ja gafiñerúati jawágu, ja chúbaña áu, ja derégeguatiña joúngua lun Sífiri Sándu le gumúti, lun jadügüni wadágimanu le.

⁴ Wagía, wedéregerubei wadáani lun ayúmuraguni lun Búngiu luma lun warúfudajani lerérun.

⁵ Ába júaradun súngubei lídan cátei le, ába janúadiruní Estéban, le ában wügüri buín líña láu afiñeni luágu Jesucrístu áni derégeguañu líña lúngua lun Sífiri Sándu le gumúti, Felípe, Prócoro, Nicanór, Timón, Parménas luma Nicolás le Antioquiana, lé meja afálarubalin ligáburi jafiñen juríu.

⁶ Ába janügüniña le ñíjin jabeí apóstolugu, ába jayúmuragun lun Búngiu jáu, ába jíchuguni jájabu jawágu lun jabíniruniña.

⁷ Ába gíbetimaajaña lan agáambuti lerérun Búngiu lídan sun fulásu, agánwoundeina jagía afiñetiña Jerusalén furése, ába giñe jafiñerun sarágu fádirigu juríu luágu Jesucrístu.

Ladáürün Estéban

⁸ Adáaguatíja Estéban, le ábanbei wügüri le buínbei láu ubáfu luma abíniruni lúmagiñeti Búngiu, miláguru luma seíni jádan gürígia.

⁹ Ábati jagúmeserun gürígia asígeneja luágu, gürígia jagía, tídaangiñetiña jalígilisin juríu to gíriboun “Idámunigu Joúnguaaña”, jáma Cirénena, Alejandríana, Cilíciana jáma Ásiana.

¹⁰ Siñáti joun luma Estéban, ladüga láu lichú áu le líchugubei Sífiri Sándu lun ladímureja.

¹¹ Ábati jafáyeirun wügüríña lun jaríñagun luágu agáamba jamáani adímureja wuríba luágu Moisés luma luágu Búngiu.

¹² Ábati jafúdagüdüniña gürígia, jáma arúfudajatiña lilúrudun Moisés, jáma wügüríña weírigutiña lídan jafiñen juríu, ába jarügüdüni Estéban, ába janügüni ligíbugiñoun líñun-ágei lúrudu.

¹³ Ába giñe jálugun yéetiña lun jaríñagun luágu lerédera lan adímureja wuríba tuágu témpulu sándu luma luágu lilúrudun Moisés.

¹⁴ Jaríñaga.

—Agáamba wamúti laríñagun luágu lagünrinchaguboun lan Jesús Nazarétna témpulu, sáansi leíme igáburi le lígirubei Moisés woun.

¹⁵ Dánti jaríjini lúrudugu jáma sun ja ñíbaña ligíbu Estéban, ítara líña camá ligíbu ában ánjeli.

7

Ladímurejan Estéban luágu lufúleisein

¹ Ábati laríñagun fádiri le íñutimaabei lun Estéban.

—¿Inárüni sun cátei le?

² Ába loúnabun.

—Nidújeñu, nagübürigu, agáamba jumána. Weíriguti Búngiu, arúfudaguáti meja lúngua lun Wáguchi Abrahám dan le Mesopotámia lan, lubáragiñe lídin agánawa Harán.

³ Ába laríñagun lun. “Ígirabeí bageíra jáma bidújeñu, beíba lídoun fulásu le lúnbei narúfuduni bun.”

⁴ Ábati láfuridun Abrahám Caldéagiñe, ába lídin agánawa Harán. Lárigiñe, ába loúnwen lúguchi, ába lanügüni Búngiu Abrahám lídoun fulásu le ñí lubei wagánawa guetó.

⁵ Míchuti ni murúsun múa lun lídan fulásu le, aríñagarügüti lun luágu lachülürüba lan dan lun lánibei lan ageíraü le jáu sun ladügüwagun, láu sún meja marájüñügili lan Abrahám lídan dan ligía.

⁶ Aríñagati Búngiu lun luágu jaganouba lan ladügawagun quei teréncha lídan jageíra ámu, luágu idámunibaña lan ñi, amúdirúa jagíame luágu gádürü-san irúmu.

⁷ Aríñagati giñe Búngiu lun. “Nagúseragüdübaña lílana fulásu le anügübaliña idámunime, lárigiñeme lásügürün gádürü-san irúmu, ábame jáfuridun ñígiñe, ábame jesériwidun nun lídan fulásu le.”

⁸ Adügati Búngiu ában darádu lúma Abrahám, ába lerésibiruni Abrahám circuncisión, liseínime darádu ligía. Ligía, dan lubei lagüriajouñbei liraü Abrahám le Isáac, ába lerésibiruni circuncisión luágu wídü wéyu láu, ítara giñe ladüga Isáac lun Jacób le liraü, adügalei Jacób, le méme gíribei Israel, joun dúusu lirájüñü, ja jagübürigubaña dúusu türíbu ja gíribaña Israelítagu guetó.

⁹ ‘Lirájüñü Jacób ja, ja binádubaña wagübürigu, ába jagímugajan lun José le jamúlen, ába jalúguruni lun lanügün Ejíptoun quei idámuni. Ñíñein Búngiu lúma José,

¹⁰ ába leséfuruni lídaangiñe sun lidíjeri láu líchugun gunfaráandaü lun. Ába lagáñeiragüdüni lufúleisein Faraón, le lurúeite Ejípto lun, ába líchuguni José ábutime ñi Ejípto lúma tídan lúban Faraón.

¹¹ ‘Ábati ladágarun ában ilámaü lídan fulásu le Ejípto lúma Canaán, deréti meja dan ligía, madáritiñati binádu wagübürigu cába lan jeíga.

¹² Ába lagáambun Jacób luágu níjein lan eígini Ejípto, ába louñajaniña lirájüñü, ja binádu wagübürigu, ñi. Ligía furúmiñetibei jaweíyasun.

¹³ Le libíaman jouñdin, ába larúfudagun José lúngua joun líbugañanu lúma lamúlen, ítara líña lasúbudirúniña urúei lidújeñu José.

¹⁴ Ábati louñajan José anügei Jacób le lúguchi jáu sun lufámilian, Ejíptoun, ürüwañanu-wein-queínsi gürígia jagía.

¹⁵ Ítara líña lídinbei Jacób agánawa Ejípto, le ñi lubei louwe, ñi lubei giñe jouwegua binádu wagübürigu.

¹⁶ Átiri irúmu lárigiñe, ába lanügüniwa jábu ñígiñe lídoun fulásu le gíribei Síquem, ába jabunún lídan umúajaü lé meja lagáñijabei Abrahám jámagiñe lirájüñü Hamor ñi Síquem.

¹⁷ ‘Dan le layárafadúnbei dan lun lagúnfulirun dimúrei le líchugubei Búngiu lun Abrahám, gíbeeña ladügawagun Israel Ejípto.

¹⁸ Ábati lagúmeserun ában urúei agúmadija Ejípto le ibídiñejabubei lun José.

¹⁹ Ába layéeraguniña urúei ligía warásan juríu, amúdiragua láña binádu wagübürigu, águragüdáña jasánigu ja figígiña joun lun jouwegun, gumúgua lámuga warásan.

²⁰ Lídan dan ligía, ligía lagüriajouñ Moisés, ában irájü buídumeraüti, ába jagüriajani lagübürigu jábiñe luágu ürüwa játi.

²¹ Dan lachülürünbei dan lun jáguruni, ába jáguruni, ába tabúduni liraü urúei Ejíptona, ába tagüriajani quei tiraü.

²² Ligía lafúnrendeirubalin Moisés lichú jáu Ejíptona, áni gabáfutiti lídan le laríñagubei lúma le ladügübei.

²³ ‘Dan le bián-weínjali irúmu láu Moisés, ába lálugun lídin aríjaña lirásan ja ladügawagun Israel, ja ñibaña Ejípto.

²⁴ Ába laríjin ában Ejíptona amúdiragua ában jádaangiñe, ába lídin Moisés íderaguei lidúje, ába leséfuruni láu láfaruni Ejíptona ligía jilágubei.

²⁵ Moisés, jarítaguati luágu jasúbudirúbei lan Israelítagu luágu ligíaba lan layúsura Búngiu lun jésefurún lídaangiñe le gádaanbaliña, jagía, masúbudirun jamúti.

²⁶ Larúgan, ába ladúnragun Moisés jáma biáma Israelítagu ageíndagua jámagua, ába yebe labúseerun laráandaragüdüniña jámagua. Ítara líña laríñagunbei joun. “Ában mémetia mútu jugúya, ¿ca uágu jageíndagua júmagua?”

²⁷ Ábati ládaruni wügüri le áluajabei wuríbu lúma le ában, ába laríñagun lun. “¿Ca íchubalibu ábutime lúma agúseragüdütime wádan?”

²⁸ ¿Buséntibu gíñe báfarunina quei báfaruni Ejíptona ligíra gúñaarü?”

²⁹ Dan lagáambuni Moisés cátei le, ába lanúrajan, ába lídin Madiáoun. Ába leréderun agánawa ñi quei teréncha, ába jáguchi lan bián irájüñü ñi.

³⁰ ‘Bián-wein irúmu lárigiñe, ába lasáliragun ában ánjeli lun lídan fulásu mageírawati, yaráfa lun wübü le gírabei Sinaí, liábin lun quei wátu geméti lídan ában búbugati.

³¹ Ába laweíridun lanígi Moisés láu cátei le laríjubei, dánti layárafadun lúntima laríjini buídu, ába lagáambun laríñagun lumálali Wabúreme Búngiu.

³² “Áu Jabúngiute binádu bagübürigu, Lubúngiute Abrahám, Lubúngiute Isáac lúma Jacób.” Ábati lagúmeserun Moisés adádagara láu anúfudei, májaali ni lun laríjin ñíjin.

³³ Ába laríñagun Búngiu lun. “Gidáboun bigeídin lueígiñe bugúdi, ladüga fulásu le ñi bubei rára, fulásu sánduti.

³⁴ Aríja náali jasúfurirun numútuniña Ejípto, agáamba náali jagúajan láu igárigu, neséfuraaña lubeíti. Jigábu lubeíti, noúnajadibu Ejípto.”

³⁵ ‘Láu sun mebéresen jamá láu Moisés, álügüda jameí ca lan íchubalin ábutime lúma agúseragüdütime, oúnaja lumúti Búngiu quei ábuti lúma quei eséfujati, adímurejeina Búngiu lídaangiñe ánjeli le asáliragubei lun lídan búbugati.

³⁶ Moisés aságarubaliña binádu wagübürigu Ejíptogiñe, adüga ligía miláguru buri lúma buri cátei weíriguti lídan fulásu ligía, lídan Barána Funáti, lúma lídan fulásu mageírawati, luágu bián-wein irúmu.

³⁷ Moisés meme le, ligía aríñagubei joun Israelítagu. “Loúnajaba Búngiu ában proféta jun jádaangiñe guánarügü jibíriña, quei loúnajanina. Adüga jumá gásu láu.”

³⁸ Lídan le añája lubeí Israelítagu adámurigu lídan fulásu mageírawati, Moisés méme le, ába ladímurejan lúma ánjeli luágu wübü le Sinaí, ába lásügüragüdüni lerérun ánjeli ligía joun binádu wagübürigu. Ligía le erésibirubalin ugánu le adúrarubei lun sun dan lúmagiñe Búngiu lun lásügüragüdüni woun.

³⁹ ‘Májatiña meja binádu wagübürigu jagáambuni Moisés, mebéreseruntiña láu, busénrügü jagía jagíribudun Ejíptoun.

⁴⁰ Ábati jaríñagun lun Aarón. “Buséntiwa lun badügün búngiugu woun lun jóudin wabá wabá, ladüga ibídiñeti woun ca lan susérebei lun Moisés, le aságarubaliwa Ejíptogiñe.”

⁴¹ Ábati jadügün ában tiyáwa bágasu lun jasándunme, ába jáfarun anímaalugu lun jadágaragüdüñ tun jasándun, ába jadügün fédu lun jagúndaarun láu cátei le jadügübei láu jájabu.

⁴² Ábati ladíreirun Búngiu jaweí, ába lígiruniña lun jájuduragun joun warúguma ja siélubaña. Ítara líña labürüdün tídan jalíburun profétagu. Jugúya Israelítagu, ¿áfaratün funági anímaalugu lun jadágaragüdüñ nun lídan bián-wein irúmu le jáubei lídan fulásu mageírawati?

⁴³ Madügün jumúti líra, lubáragiñe lira, barü jumuti jisándun Molóc tídan lágei to jadügüboun lun,

túma tiyáwa warúguma to gíriboun Renfán, to gíñe janügüboun quei jisándun, iyáwaü buri ja jadáagun guánarügü lun jájuduragun joun.

Ligía naságarubadün lubei jageíragiñe, nouñajaünme yagüroun méme lueí Babilónia.

⁴⁴ ‘Lídan fulásu mageírawati, ñíñoun méja lúban Búngiu to gadíñurúwadiboun jáma binádu wagübürigu, ñí lubei lerédera Búngiu jáma. Adüga lumútu Moisés lúban Búngiu tugúya queísi larúfuduni Búngiu lun lun ladügünun.

⁴⁵ Nújeingua méja múna tugúya jáma jadügawagun binádu wagübürigu, ába janügünun jámawagua lídoun fulásu le ñí lubei wagánawa guetó, dán meja le lagáñeirubalin Josué wuríbu jawágu mútu ja mámabaña juríu já meja aganoúbaña ya. Ítara liña, nújeingua lubei lúban Búngiu tugúya lídan fulásu le darí lidáni Davíd.

⁴⁶ Daríti urúei Davíd fuleísei ligíbugiñe Búngiu, ába labúseerún yebe ladügün ában témpulu lun laganoún Lubúngiute Jacób ñí,

⁴⁷ Salomón adügübarun témpulu tugúya,

⁴⁸ láu sun, maganoún lan Búngiu le weírigutimaabei tídan buri ligílisi to jadüga gürígia, queí meja laríñaguni proféta.

⁴⁹ Siélu nálabei le ñí lubei nañúura lun narúejjan, uboú, le ñí lubei neméraaguagüdei nugúdi.

¿Cába tuwúyeri múna jadüga nun? líña laríñagun Búngiu.

¿Cátei fulásu le ñí lubei gayára lan neméraagun?

⁵⁰ ¿Ma funági nadüga sun cátei le láu nújabu?

⁵¹ Ába lasígirun Estéban aríñaga joun.

—Ánjein jugúya, derégubeiñóun janígi, magáambaditün lun lerérun Búngiu, ítara jíña quei ja ibídiñejabúbaña lun Búngiu. Súnwandan májatün lun Sífiri Sándu, ítara jíña quei binádu jagübürigu.

⁵² ¿Ca jádaangiñe profétagu mouserun jabáña binádu jagübürigu wuríba? Ni ában, áfaragua jamútiña já meja adímurejabaña luágu liábin Crístu le richáguabei, guetóti dan liábin, ába jalúguruni joun láganiñu, ába jáfaruni jilágubei.

⁵³ Jugúya le erésibirubálin lilúrudun Búngiu jámagiñe ánjeligu, mídintün láu.

Loúnwen Estéban

⁵⁴ Dan jagáambunbalin cátei le, ába jagáñidun buídu, ába lacünrinjan jári luágu Estéban, le jagáñi lun.

⁵⁵ Ánjein Estéban, buin líña láu lubáfu Sífiri Sándu, ába laríjin siélu, ába laríjini luweírigun Búngiu, lúma Jesúsu rára lueígiñe loúnwenren Búngiu.

⁵⁶ Ába laríñagun joun.

—¡Aríja jumá! Aríagu níña lun siélu darágu, lúma Jesúsu le Wügüri Garaúwarügüti, lueígiñe loúnwenren Búngiu.

⁵⁷ Ába jadáuruni jarígei láu jájabu lueí jagáambuni, ába jayábin sun jagía luágun, agúarajeina.

⁵⁸ Ába jaságaruni ubúrugugiñe, ába jígirunun geféentiña janáangun lábugiñe laríaajan ában wügüri gíriti Sáulo, ába jachámuragun dübü luágun Estéban.

⁵⁹ Súnti añaja lan achámuragua dübü luágun, ába layúmuragun Estéban lun Jesúsu, ába laríñagun.

—Nabúreme Jesúsu, resíbiboún nuwáni.

⁶⁰ Lárigiñe, ába lájuduragun, ába lagúaragun.

—Nabúreme, míchigabá dúru jawágun lueígiñe figoú le.

Lárigiñe laríñaguni le, ába loúnwen.

8

Leibaajaniña Sáulo ja afiñebaña luágu Crístu

¹ Sáulo, gúndaatiti láu láfarún Estéban.

Wéyu méme ligía, ába lagúmeserun ában oúnwenbun eíbaajoúni jawágun ja afiñebaña luágu Jesucrístu, Jerusalén. Ába janúragun lídoun buri lirájüñü fulásu Judéa lúma Samária le míbetiña gürígia ñi, apóstolugu rügüñanu manúrajan.

² Ába jayábin wügüriña ja deréguatiña joúngua lun Búngiu, ába jábununi Estéban láu sarágu íruni luágu loúnwen.

³ Ábati lasígirun Sáulo eíbaajaña afiñetiña, ábaja lebélorun tídoun sun múna lun laságaruniña wügüriña jáma würiña adúruujeina, ába loúnajaniña furísunrugun.

Lapúrichijoún ugánu buíti luáguti asálbaruni Samária

⁴ Apúrichija jamúti ja anúrajabaña Jerusaléngiñe ugánu buíti luágu chülü lan Jesucrístu lun lasálbaruniña sun gürígia, sun le ñí lumuti joúdin.

⁵ Ába lídin ában jádaangiñe, gíriti Felípe, lídoun ában ubúругu Samária, ába lagúmeserun adímureja joun ja ñíbaña luágu Crístu.

⁶ Ábaja joúndaragun gürígia, ru jagía jarígei lun le ladímurejabei Felípe, aríja jamei buri giñe miláguru le ladágubei.

⁷ Ladüga sarágu buri gürígia ja gawágutiña espíritugu wuríbatíña, areídaguatiña, ába buri jáfuridun espíritugu wuríbatíña jagía agúarajeina jádaangiñe, areídagua jagía sarágu derégüdaaña jamá, meíbuguntiña.

⁸ Súnti gürígia lídan fulásu ligía, gúndaatiña luágu cátei le.

⁹ Ñíñein ában wügüri lídan fulásu ligía, gíriti Simón, gabíñarajati meja, lüñajaali ayéjaña gürígia Samariána láu laríñagun joun luágu máma lan furúmieguarügü gürígia ligía.

¹⁰ Agáambaja jamútítija sun gürígia buídu, jámangiñe ja gudémegutiña dagá jámoun ja weírígutiña, ába jaríñagun.

—Ibíja lumúti gürígia le oúnwenbun lubáfu Búngiu.

¹¹ Adügatiñatija gásu láu, ladüga lüñajaali ayéjaña láu labíñarajan.

¹² Dan le jafíñerunbei luágu ugánu le líchugubei Felípe joun luágu larúeijan Búngiu lúma luágu Jesucrístu, dándu wügüriña quei würiña, ába jabásterún.

¹³ Simón meme ligía ába giñe lafiñerun, ába giñe labásterún, ába lagúmeserun afálarei Felípe, le luweírín lanígi láu buri oúnwenbun buri miláguru lúma seíni le ladágubei Felípe.

¹⁴ Dan le jagáambunbalin apóstolugu ja Jerusalénbaña luágu resíbi jamáli lan Samariána lerérun Búngiu, ába joúnajani Pédro lúma Juan ñi.

¹⁵ Dan le jachülürünbei, ába jayúmuragun jawágu afiñetiña ja Samariána lun liábiba Sífiri Sándu jádoun,

¹⁶ ladüga miábingili lan Sífiri Sándu lídoun ni ában jádaangiñe, badíseirügügiña lídan líri Wabúreme Jesúsu.

¹⁷ Ábati jíchuguni Pédro lúma Juan jájabu jawágu, ába liábin Sífiri Sándu jádoun.

¹⁸ Dan le laríjinbei Simón luágu ñübin lan Sífiri Sándu jádoun gürígia dan le jíchuguni apóstolugu jájabu jawágu, ába lálugun lagáñijani ubáfu ligía jámangiñe láu seínsu.

¹⁹ Ába laríñagun joun.

—Rújumei giñe ubáfu le nun, lun dánme lan níchuguni nújabu luágu furúmieguarügü, lun giñe lerésibiruni Sífiri Sándu.

²⁰ Ábati laríñagun Pédro lun.

—Beíba máfiogatin láu sun biseínsun, ladüga jarítaguatibu luágu gayára lan lagáñijoún cátei le ledéweejan Búngiu.

21 Maríchatibu, mafánran bugúya lídan wesériwidun lun Búngiu, ladüga múaraantu banígi ligíbugiñe Búngiu.

22 Ígirabeí buríban le, ayúmuraguabá lun Búngiu, lun ferúduna lánibu luágu luríban barítangun.

23 Ladüga aríja numúti luágu buin tíña lan banígi láu wuríbani, áni ragüñu liñálibu Máfia.

24 Ábati laríñangun Simón.

—Ayúmuragua jumá lun Búngiu nuágu lun masúseredun lan ni cáta nun lídaangiñe le jaríñagubei.

25 Lárigiñe jíchugun fe luágu Jesucrístu lúma jadímurejani lerérun Búngiu lídan fulásu ligía, ába japúrichijani apóstolugu ugánu buíti luáguti lasálbaruniña Jesucrístu gürígia lídaangiñe jafígoun lídan sarágu lirájüñü fulásu Samária, luágu jaweíyasun járigoún Jerusaléoun.

Felípe lúma wügüri le Etiopíana

26 Lárigiñe cátei le, ába laríñangun láni Wabúreme Búngiu ánjeli lun Felípe.

—Aráansebá, beíba luágun sur lídaangiñe üma le arárirubei Jerusaléngiñe lun ubúrugun Gáza.

Ligía üma le ásügürübei lídaangiñe fulásu mageírawati.

27 Ába laráanserun Felípe, ába lídin. Luágu leíbuguniwágu, ába ladárirun ában wügüri Etiopíana lubá lubá. Wügüri ligía siñáti garaü lan, ában wügüri weíriguti, ligía gíñe gamánijaribei láu sun tiseínsun Candáce to lurúeite Etiopía. Liábiñati wügüri ligía Jerusaléngiñe lárigi lídin ájuduragua lun Búngiu.

28 Lagríbuduñáti lageíroun, ñun tídan ában cárü, alíjeinaloún lilíburun proféta Isaías.

29 Ábati laríñangun Sífiri Sándu lun Felípe.

—Yaráfabá tuágun cárü túra.

30 Ába leíbaagun tuágun cárü, ába lagáambuni lalíjaña lan tídan lilíburun Isaías, ába laríñangun lun.

—¿Gunfaráanda bumútisan le balíjabei?

31 Ába laríñangun wügüri ligía lun.

—¿Ída lubági gunfaráanda náani, úaga cába lan afúnraanguágüdei nun?

Ába laríñangun lun Felípe lun ládinun lúmoun lun lañúurun loúbagiñe.

32 Niján buri dimúrei le lalíjabei.

Quei mudún, lanügüwa lun lafarún jilágubei, ítara quei leréderun mudún maníñu jagíbugiñe ja ásarubalín líyu, ítara líña gíñe maríñangun lan ni cáta.

33 Ünabuti lanügün, áni michugúnwati lirícha lun, siñábei ladímurejoún jawágu ladügawangun, ladüga gumúja lan labágaridun uboúagu.

34 Ába laríñangun wügüri ligía lun Felípe.

—Adügabeí fuleísei nun, aríñagabeí nun, ¿cáteisán le uágubei laríñagei wügüri le abürüjabei dimúrei le, luóúgua, ódi luágu ámu?

35 Ábati lagúmeserun Felípe arúfudajei Lerérun Búngiu lun, lúmagiñe le ñígiñe lubei lagúmesera alíja, ába líchuguni ugánu luáguti Jesúsú lun.

36 Dánti le jásügürünbei lídaangiñe ában fulásu le ñí lubei dúna, ába laríñangun wügüri ligía.

—Nijántia dúna, ¿siñátisan nabásterun?

37 Laríñaga Felípe lun.

—Ánjein afíñe bubeí luágu Jesucrístu táu sun banígi, gayáraati babásterun.

Laríñaga wügüri ligía lun.

—Afiñetina luágu Jesucristu lan Liraübei Búngiu.

³⁸ Ábati laráramagüdünun cárü, ába jarárirun biángubei jagía dúnarugún, ába labásterágüdüni Felípe.

³⁹ Dan jamúdeirun dúnarugugíñe, ába lanügüni láni Búngiu Espíritu Felípe ñígiñe, ába maríjin láali lan wügüri ligía. Ába lasígiruni leíbugun, gúndaañu.

⁴⁰ Ába ladáriragun Felípe lúngua Azóto, ába lídin lídaangiñeina fulásu apúrichijeinaleí ugánu luáguti Crístu darí lachülürün Cesaréa.

9

Lerésibiruni Sáulo Crístu queísi lasálbaragüle

¹ Sun dan ligía, merédeti lasíadiruniña Sáulo afiñetiña luágu Jesucristu.

² Ligía lídinbei lúmoun fádiri íñutimaati lídan jafíñen juríu amúriaja gárada láutu ubáfu lun lídin tídan buri jalígilisin juríu to Damáscoboun áluajaña ja afálarubalin lémeri Crístu lun lanügüniña adáüragua Jerusalén, dándu wügüriña quei würiña.

³ Luágu leíbuguniwágu, dan yaráfaali lun Damáscu, sódini ába ladúnraagun ában larúgounga siélugiñe, geyégua láu.

⁴ Ábati láburujan Sáulo múarugún, ába lagáambun laríñagun ában umálali lun.

—Sáulo, Sáulo, ¿ca uágu beíbaajana?

⁵ Ábati laríñagun Sáulo.

—¿Cátabusan Nabúreme?

Ába laríñagun umálali ligía.

—Jesúsu áu, le méme beíbaajabei.

⁶ Sarába, belúba ubúrugun, laríñawagúba bun ñi cába lan badüga.

⁷ Wügüriña ja úarabaña lúma Sáulo lídan luweíyasun, ába jaráramun láu luweírin janígi ladüga agáamba jamúti umálali, áni maríjin jamúti le adímurejabei.

⁸ Ába lásaarun Sáulo múarugugíñe, dan le léfegechúnbalin lágu, maríjinjali. Ábati járügüdüni lújabu, ába janügüni ubúrugun Damáscu.

⁹ Ába leréderun ürüwa wéyu ñi maríjina, meígin líña, mátun ni cáta.

¹⁰ Ñíñein ában afiñeti luágu Jesucristu ñi Damáscu gíriti Ananías, le únbei layáwadagua Wabúreme Jesúsu, ába laríñagun lun.

—¡Ananías!

Ába loúnabun.

—Anája ya, Nabúreme.

¹¹ Ábati laríñagun Jesúsu lun.

—Beíba guetó guetó luágu üma le gíribei Surúti, danme le bachülürün lúbiñe Júdas, bálügüdajame luágu ában wügüri Társona gíriti Sáulo. Badárirubei ñi ayúmuragua lun Búngiu,

¹² áni ayáwadaguaali ában wügüri gíriti Ananías lun, ába líchuguni lújabu luágu lun gayára lan laríjin.

¹³ Dan lagáambunbalin Ananías cátei le, ába laríñagun.

—Nabúreme, gíbeeñátia abájüdagutiña nun luágu wügüri ligía lúma luágu sun wuríbani le ladáagubei joun ja afíñebaña buágu, Jerusalén.

¹⁴ Guetó, liábiña ñájoun láu ubáfu jámagiñe jábutigu fádirigu lun ladáüraguniña sun ja bánigubaña.

¹⁵ Ába laríñagun Jesúsu lun.

—Beíba, ladüga anúadira náali wügüri ligía lun ladímurejan nuágu joun güriía ja mámabaña juríu lúma joun jarúitegu, lúma gíñe joun Israelítagu.

¹⁶ Narúfudubei sarágu cátei le lúnbei lasúfuriruni nueígiñe lun.

¹⁷ Ábati lídin Ananías lídoun fulásu le ñí lubei Sáulo. Ába lebélorun múnadoun, ába líchuguni lújabu luágu, ába laríñagun lun.

—Nidúje Sáulo, loúnajañadina Wabúreme Jesúsu le arúfudagubei lúngua bun luágu üma le ñígiñe lubei biábin, lun gayáraaya lan baríjin, lun gíñe berésibiruni Sífiri Sándu.

¹⁸ Lídan óra ligía, ába leíguadun camá jamuga arúraü lueígiñe lágu, ábaya laríjin. Lídan óra ligía, ába labásterún.

¹⁹ Lárigiñe, ába leígin, ábaya lejéredun, ába leréderun átiri wéyu jáma afíñetiña ja aganoúbaña Damásco.

Lapúrichijan Sáulo Damásco

²⁰ Ába lagúmeserun Sáulo apúrichija tídan buri jalígilisin juríu, laríñaga luágu Jesúsu lan Liraübei Búngiu.

²¹ Súnti ja agáambubalín, ába laweíridun janígi, jaríñagati.

—¿Másan niján wügüri léñaja eíbaajabáliña ja afálarubalin Jesúsu Jerusalén? ¿Ma ligía méme le ñübinbei ya lun lanáanguniña adáüra, lun ledéregeruniña joun jábutigu fádirigu juríu?

²² Ábatimá lapúrichijan Sáulo láu anígi, arúfudei luágu Jesúsu lan Crístubei le lúnbei lasálbaruniña güriía lídaangiñe jafígoun, darí lun labúlieidaguágüdün jáu juríu buri ja aganoúbaña Damásco.

Leséfurun Sáulo jawéi juríu

²³ Lárigiñe sarágu wéyu, ába jelédegun juríu lun jáfaruni Sáulo jilágubei,

²⁴ ába lasúbudirawagüdün le jabúseerubei jadügün lun Sáulo. Wéyuagu, áriebu, jagúrabajanja juríu luágu béna le áfuridagülei le láni ubúругu Damásco lun jáfaruni jilágubei.

²⁵ Ába jíchuguni afíñetiña lídoun ában faníñe weíríti, ába jarárigüdüni áriebu lueígiñe baríeru le geyégubei láu ubúругu, ába leséfurun.

Sáulo ubúругu Jerusalén

²⁶ Dan le lachülürünbei Sáulo Jerusalén, ába yebe lálugun ládaragun lúngua jádoun afíñetiña, sun jagía, janúfudetiña lueí, ladüga mafiñetiñá yebe luágu afíñejali lan luágu Jesucrístu.

²⁷ Ába lanügüni Bernabé jagíbugiñoun apóstolugu. Ába labájüdagun joun luágu laríjini Sáulo Jesúsu luágu leíbuguniwágu, lúma luágu ladímurejan Jesúsu lun, lúma luágu lapúrichijan Sáulo furáangu luágu Jesúsu ubúругu Damásco.

²⁸ Ábati jerésibiruni Sáulo queísi jánigu, ába leíbugun jáma Jerusalén,

²⁹ apúrichijeina luágu Wabúreme Jesúsu furáangu. Lárigiñe ladímurejan luágu Jesúsu jáma juríu ja adímurejabaña güriégu, asígeneja ligía jáma, ába jabúseerun jáfaruni jilágubei.

³⁰ Dan le jasúbudirúnbalin afíñetiña cátei le, ába janügüni Sáulo ubúругun Cesaréa, ñígiñe ába jóúnajani Társoun.

³¹ Lídoun buri dan ligía, buíti jóuserúniwa afíñetiña luágu Jesucrístu ja aganoúbaña Judéa, Galiléa, lúma Samária. Ába jedérebugudün lídan jafíñen luágu Jesucrístu, falájamei le lubeíbei, resíbi jagía gurásu lúmagiñe Sífiri Sándu. Ába agánwoundeina jamá afíñerutiña.

Lareídagun Enéas

³² Dan le lebélujaña lubei Pédro lídan buri fulásu lun líderaguniña ja afiñeñaabaña luágu Jesucristu, ába gíñe lídin aríjaña lánigu Búngiu ja ubúrugubaña Lída.

³³ Ñi ladárra ában wügüri gíriti Enéas, wídü irúmu láu gabánarugu láu derégüdaü.

³⁴ Ába laríñagun Pédro lun.

—Enéas, areídaguagüda lumútibu Jesucristu. Sarába, aráanseboún bigábana.

Ába lásaarun Enéas óra ligía.

³⁵ Ába jaríjini sun ja aganoúbaña fulásu buri Lída lúma Sarón, ába jígiruni binádu jafiñen, ába jafiñerun luágu Jesúsu.

Tágyuyugun Dórcas

³⁶ Lídan meja dan ligía, ñíñoun meja ában afiñetu aganoútu Jópe, gíritu Tabíta, lídan jerérun güriégu, gíritu Dórcas. Würi tugúya, súnwandan táu adüga buíti, íderagua tugúya gudémetiña.

³⁷ Lídoun dan ligía, ába tasándirun Dórcas, ába toúnwen, lárigiñe jágawagüdünnun, ába jaríwachaguagüdünnun.

³⁸ Yaráfati Jópe lun Lída le ñí lubei Pédro, queíti jagáambuni afiñetiña luágu níjein lan ñi, ába jóúnajan bián wügüriña aríñaga lun.

—Queímoun Jópe, oúfuda.

³⁹ Ábati lídin Pédro jáma. Dan le lachülürünbei, ába janügüni tídoun rúmu to ñí tubei jiláaru, ába jagúriridágun sun würiña ja jiláguaañábaña úmari láu, ayájuaja tárigi, arúfudajoún buri dínugu túma simísi tó buri tájüchaguboún Dórcas dán meja moúnwengiru, lun.

⁴⁰ Ába láfuridagüdüniña Pédro sun ja ñíbaña, ába lájuduragun, ába layúmuragun lun Búngiu. Ábati laríjin tuágun jiláaru, ába laríñagun tun.

—Tabíta, sarába.

Ábati téfegechuni tágu, dan taríjini Pédro, ába tiñúragun túngua.

⁴¹ Ába lárügüdüni tújabu, ába lásaaragüdünnun. Lárigiñe, ába lagúarun joun würiña jagía jáma jíbiri afiñetiña ja ñíbaña, ába larúfudunun joun, wínwañu.

⁴² Ába lagaambún cátei le lídan sun ubúругu Jópe, ába sarágu jamá afiñerutiña luágu Jesucristu.

⁴³ Ába leréderun Pédro sarágu dan lídan ubúругu ligía, lúbiñe Simón le aráansejabei úraü.

10

Loúnajan Cornélio oúgei Pédro

¹ Ñíñein ában wügüri ubúругu Cesaréa gíriti Cornélio, gumándan joun súdaara ja Italiána.

² Wügüri ligía jáu sun lufámilian, derégeguatiña jóungua lun Búngiu, judúguatiña lun Búngiu láu sun máma jamá juríu. Rúti buri gíñe sarágu seínsu lun jiderawagún juríu, áni súnwandan layúmuragun lun Búngiu.

³ Luágu ában wéyu, quei buri ladaünrün ürüwa rábounwéyu, ába lasáliragun ában láni Búngiu ánjeli lun, furáangu, ába laríñagun lun.

—¡Cornélio!

⁴ Ába leréderun Cornélio aríaguei ánjeli ligía láu sarágu anúfudei, ába laríñagun.

—¿Ca babúseerubei, Nabúreme?

Ába laríñagun ánjeli ligía lun.

—Agáamba láali Búngiu bayúmuragun, aríjalei buri cátei le badügübei lun bíderaguniña gudémetiña.

⁵ Oúnajabá lubeíti wügüríña ubúruгу Jópe lun jóuguni Simón, le gíñe gíribei Pédro, lun liábin bun.

⁶ Lúbiñe Simón le aráansejabei úraü, le gábanbei láru barána.

⁷ Dan le ñüdüñjali ánjeli le adímurejabei lúma Cornélio, ába lagúarun joun biáma jádaangiñe lumúsuniña lúma ában lisúdaaran, súdaara ligía, ában wügüri derégeguati lúngua lun Búngiu, leménigira Cornélio.

⁸ Ába labájüdaguni sun cátei joun, ába loúnajaniña ubúruгу Jópe.

⁹ Larúgan amídirugu, sun ayárafadeina jamá wügüríña ja lun Jópe, ába lamúdeirun Pédro luágun tábulugu múna le fadábei, ayúmuragua lun Búngiu.

¹⁰ Weírjaliti liláma óra ligía, busénjali leígin. Dan le añája lan aráanserei leígin, ába lasálriragun ában cátei lun ítara.

¹¹ aríja lumúti lánjunrenchun siélu, ába tiábin ában cáton camá jamuga gamísa weírítu gürágu lueígiñe gádürü tarigei, tiábin arárireina múarugun.

¹² Tídan gamísa tugúya, ñíñanu sun jawúyeri anímaalu, gádürügua tugúdi, jéwe, jáma dunúru.

¹³ Ábati lagáambun laríñagun ában umálali lun.

—Sarába Pédro, áfarabá jádaangiñe anímaalu ja lun beígin.

¹⁴ Ába loúnabun Pédro.

—Uá, Nabúreme, meígiñajágidina ni cáta le wanüğübei quei mabuídunti según lilúrudun Moisés.

¹⁵ Ábayati ladímurejan umálali ligía lun, ába laríñagun lun.

—Le cátei le labuíduragüdün Búngiu, mariñagabá luágu luágu mabuídun lan.

¹⁶ Ürüwañein weíyaasu lasúseredun cátei le, lárigiñe, ábaya tamúdeirun gamísa tugúya siélu.

¹⁷ Súnti niján lan Pédro láu luweírín arítaguni luágu, asáminara ca lan laníchigubei cátei le laríjubei, ligía jachülürün luwügüríñan Cornélio, álügüdajeína tuágu lúban Simón.

¹⁸ Dan jachülürün tubéneri múna, ába jálügüdajan rein ánjein ñí lubei lagánawa ában gírítu Simón le gíñe únbei jaríñaga Pédro.

¹⁹ Queíti buga nijágua lan Pédro asáminara luágu cátei le asálriragubei lun, ába laríñagun Sífiri Sándu lun.

—Añája ürüwa wügüríña álugabu,

²⁰ raríba, oúfudabá, beíba jáma láu afíñeni ladüga áu lan oúnajabalíña.

²¹ Ábati larárirun Pédro le ñíjin jabeí wügüríña ja loúnajabaña Cornélio, ába laríñagun joun.

—Áu le jáluajabei. ¿Ca gabüğürübalün?

²² Ába jaríñagun.

—Loúnajan gumándan le gíribei Cornélio wagía, ában wügüri surúti, derégeguati lúngua lun Búngiu, jínsiñeti joun sun juríu. Ñübinti ában ánjeli aríñaga lun lun loúnajan oúgabu lun bídin lúbiñe, lun lagáambuni le lúnbei baríñaguni lun.

²³ Ábati lebélaagüdüniña Pédro, ába jeréderun lúma ñí áriebu ligía. Larúgan, ába lídin Pédro jáma, ñüdüñtiña gíñe jádaangiñe afíñetiña ja aganoubaña Jópe jáma.

²⁴ Larúgan, ligía jachülürün Cesaréa, le ñí lubei Cornélio agúrabaña jáu lidújeñu jáma jabuídun-ágei lumádagu ja lamísurajabaña.

²⁵ Dan lachülürün Pédro, ába láfuridun Cornélio erésibirei, ába lájuduragun ligíbugiñe láu sarágu inébesi.

²⁶ Ába liñúraguni Pédro, ába laríñagun lun.

—Ráramabá, wügüri giñe áu bíledi.

²⁷ Súnti niján lan adímureja lúma, ába lebélorun, ába ladárirun sarágu gürígia adámuriñu ñi.

²⁸ Ábati lariñagun Pédro joun.

—Subúsi jumúti luágu mája lan wafiñen wagía juríu lun jóundaragun juríu jáma ja mámabaña juríu quei jugúya, ni lun webélorun tídon jában lueí wasálorun mabuídunga ligíbugiñe Búngiu. Wel, arúfuda láali Búngiu nun luágu mabúseerun lan lun nouseruniña ja mámabaña juríu queísi gürígia mabuíduntiña.

²⁹ Ligía nánjanrunbei niábin dan le bouñajanbei nuágu. Buséntina jamúgati nasúbudiruni ca lan lébubei jóunajan nuágu.

³⁰ Ábati loúnabun Cornélio.

—Ūrúwa wéyu guetó, queíburí óra le, ñáñadina núbiñe ayúmuragua lun Búngiu ladaürün ūrúwa rábounwéyu, queísi wéchun, ligía lasáloragun ában wügüri nun táu ában dáüguaü mirítu.

³¹ Ába lariñagun nun. “Cornélio, agáamba láali Búngiu bayúmuragun, jarítaguaaliti luágu buri cátei le badügübei lun bíderaguniña gudémetiña.

³² Oúnajabá lubeíti wügüriña ubúruгу Jópe ougei Simón le gíñe gíríbei Pédro, lúbiñe ábanya Simón aráansejati úraü, le gábanbei láru barána, ñi lagánawa.”

³³ Ába lubeíti nouñajan ougabú furése, áni buítiti badüga biábin. Guetóti awánja sun wagía ya ligíbugiñe Búngiu, busétiwati wagáambuni le lariñagubei Wabúreme Búngiu bun lun bariñaguni woun.

Lapúrichijan Pédro lúbiñe Cornélio

³⁴ Ábati lagúmeserun Pédro adímureja, ába lariñagun.

—Subúdi náali guetó luágu ában lan lábu lanügüniña Búngiu sun gürígia.

³⁵ Resibirügü lumútiña sun ja inébejabúbaña lun áni adüga jameí le buídubei, dándú juríu quei ja mámabaña juríu.

³⁶ Adímurejati Búngiu joun ladügawagun Israél, adímurejeina ugánu luáguti gayára lan jaráandarun gürígia luma Búngiu lídaangiñe Jesucrístu, le Jabúremebei sun gürígia.

³⁷ Jugúya, subúdi jumúti cátei le asúseredubei jageíra juríu buídu, le agúmeserubei Galiléa lárígiñe lapúrichijan Juan, áni abásteragüdaja ligía.

³⁸ Subúdi jumúti luágu rúlaani Búngiu lubáfu Sífiri Sándú lun Jesúsú Nazarétna, luágu meja gíñe ladáagun buíti, lúma lareídaguagüdüniña ja asúfurirubaña lábugiñe lubáfu Máfia. Ladügünbalin buri meja cátei le, ladüga ñíñein lan Búngiu lúma.

³⁹ Wagía geféentiwa luágu sun cátei le ladügübei Jesúsú Jerusalén lúma lídan sun líbiri jageíra juríu. Lárígiñe, ába jáfaruni jilágubei láu jádaraguní luágu ában gurúwa.

⁴⁰ Sarágüda lumúti Búngiu lídaangiñe ouweni luágu lürüwan wéyu, ába larúfudaguágüdüni lúngua wínwañu woun.

⁴¹ Marúfudagúnti lúngua joun sun gürígia, lueídügüya woun, wagía le anúadaja láañabaña Búngiu lúmagiñe binárü quei geféentiña luágu lásaarun lídaangiñe ouweni. Joútiwa lúma, gurá wagía lúma lárígiñe lásaarun lídaangiñe ouweni lúnya labágaridun.

⁴² Ába loúnajaniwa apúrichija joun gürígia luágu, lun giñe waríñaguni luágu rúlaali lan Búngiu Jesúsú méme le lun lagúseragüdüniña ja wínwangiñabaña jáma ja jiláguaañabaña dánme le lagíríbudun ubouágun.

⁴³ Adímurejaaña meja gíñe sun profétagu luágu Jesúsú lúmagiñe binárü, luágu sun lan ja afíñebaña luágu, resíbi jamáni ferúdu luágu jafígoun.

Jerésibiruni ja mámabaña juríu Sífiri Sándú

⁴⁴ Ñígili Pédro adímureja, ligía liábin Sífiri Sándu jádoun ja agáambajabalin ladímurejan.

⁴⁵ Játi juríu ja afiñetiña luágu Jesucristu ja ñübinbaña úara lúma Pédro, ába laweíridun janígi láu liábin Sífiri Sándu jádoun ja mámabaña juríu.

⁴⁶ Agáamba jamútiña adímureja dimúrei le mámabei jerérun, adímureja jagía luágu luweírigun Búngiu.

⁴⁷ Ábati laríñagun Pédro.

—¿Majóuabei funági lun jabásterún gürígia ja, quei resíbi jamáali lubeí Sífiri Sándu queígubeirügü wagía?

⁴⁸ Ába líchugun dimúrei lun jabásterun lídan líri Jesucristu. Lárigiñe, ába jayúmuragun lun Pédro lun leréderun átiri wéyu jáma.

11

Labájüdagun Pédro joun títana ligíli to Jerusalénboun luágu le asúseredubei Jópe

¹ Ába jagáambuni apóstolugu jáma jíbiri afiñetiña ja Judéabaña luágu ánjaaña lan giñe ja mámabaña juríu lun láni Búngiu ugánu luáguti Wasálbaragüle, Jesucristu.

² Dánti le lagíribudun Pédro Jerusaléoun, ába jachúrajani juríu ja afiñetiña,

³ jaríñaga.

—¿Cámesan bídin aríjaña ja mámabaña juríu, áni jou amürü jáma?

⁴ Ábati labájüdaguni Pédro sun le asúseredubei joun lúmagiñe lagúmeseja, ába laríñagun.

⁵ —Ubúrugunadina Jópe, ayúmuragua lun Búngiu, ligía naríjin ában cátei lasáliragun nun camá jamuga ában gamísa weíritu tarárirun siéluigiñe, gürágu lueígiñe gádürü tarígei, tiábin chülü le ñí nubei.

⁶ Dan le naríjin tuágun buídu lun naríjin ca lan tídaanbei, ába naríjin anímaalugu gádürügua tugúdi ñi, anímaalugu gáñitiña, jéwe, jáma dunúru.

⁷ Ába nagáambun laríñagun ában umálali nun. “Sarába Pédro, áfarabá jádaangiñe, jóubei.”

⁸ Ába naríñagun. “Uá, Nabúreme, ladüga meígiñajágidina ni cáta le wanügübei quei mabuídunti según lilúrudun Moisés.”

⁹ Ábayati ladímurejan umálali siéluigiñeti ligía nun, laríñaga nun. “Le cátei le labuíduragüdün Búngiu, maríñagabá luágu luágu mabuídun lan.”

¹⁰ Ürüwañein weíyaasu lasúseredun cátei le, lárigiñe, ábaya tamúdeirun siélun.

¹¹ Lídan óra ligía, ligía jachülürün ürüwa wügüriña tídoun múna to ñí nubei, óunajoútiña Cesaréagiñe álugana.

¹² Ába laríñagun Sífiri Sándu nun lun nídin jáma láu afiñeni. Ñüdüntiñá giñe sísi afiñetiña ja núma. Dan wachülürün Cesaréa, ába webélurun sun wagía lúbiñoun ában wügüri,

¹³ le abájüdagubei woun luágu nege laríjin ában ánjeli rára lúbiñe, ába lán nege laríñagun ánjeli ligía lun. “Óunajabá wügüriña lun jóudin ubúrugun Jópe óugei Simón le giñe gíribei Pédro,

¹⁴ laríñagubei bun ída lúba lan gayára lan basálbarun jáu sun bufámilian.”

¹⁵ Dan nagúmeserúnbei adímureja joun, ába liábin Sífiri Sándu jádoun quei meja liábin wádoun furúmiñe.

¹⁶ Ábati naríttagun luágu lé meja laríñagunbei Wabúreme. “Inárüni luágu badíseigüda lan Juan láu dúna, ánjein Búngiu, labásteragüdübadün láu Sífiri Sándu.”

¹⁷ Ánjeinti ru lubálin Búngiu líbe le líchubei woun, wagía le afíñeelibe luágu Jesucrístu, joun, ¿cátanañadináti lun neréderubei lan le labúseerubei Búngiu ladüga?

¹⁸ Dánti le jagáambuni afíñetiña ja Jerusalénbaña cátei le, ába jámanichun. Ába jadímurejan luágu luweírigun Búngiu, ába jaríñagun.

—¡Rújali lubei giñéti Búngiu ubáfu joun ja mámabaña juríu lun jasáansiruni jagáburi, lun gayára lan jabíjin ibágari magúmuchaditi!

Ligílisi to Antioquiana

¹⁹ Dan le láfarúnbei Estéban, ába gíñe jagúmeserun eíbaajaña ja jíbiri afíñetiña, ába janúrajan jíbiri chülü Fenícia, Chípree, luma Antioquía. Ñi jíchigei ugánu luáguti lasálbaruniña Jesucrístu gürígia lídaangiñe jafígoun jóúnrügü juríu, máma joun ámu gürígia.

²⁰ Ánjeinti afíñetiña ja Chíprena jáma Cirénena, ába jachülürün Antioquía, ába gíñe jadímurejan joun ja mámabaña juríu, ába jíchuguni ugánu luáguti Wabúreme Jesucrístu joun lun jasálbarun.

²¹ Ñíñein lubáfu Búngiu jáma afíñetiña jagía, sarágu ja mámabaña juríu, ába jígiruni binádu jafíñen, ába jafíñerun luágu Jesucrístu.

²² Dan lachülürünbei ugánu le lábun jagáambun afíñetiña ja Jerusalénbaña, ába jóúnajani Bernabé Antioquíoun.

²³ Dan lachülürünbei Bernabé, ába laríjini luágu binílaaña lan Búngiu gürígia ja mámabaña juríu, ába lagúndaarun sarágu. Ába labímejaniña súnqubei lun jafálaruni Wabúreme Búngiu táu sun janígi.

²⁴ Bernabé, ában meja wügüri buíti, derégeguati lúngua lun Sífiri Sándu le gumúti, buin líña gíñe láu afíñeni luágu Jesucrístu, ítara líña lagáñeirun sarágu gürígia lun Jesucrístu.

²⁵ Lárigiñe, ába lídin Bernabé Társo áluajei Sáulo, dan ladáriruni, ába lanügüni Antioquíoun.

²⁶ Ába jeréderun ñi jáma tílana ligílisi ában irúmu, arúfudaja joun sarágu gürígia. Ñí Antioquía lagúarúa joun afíñetiña “Cristiánugu” furúmiñe.

²⁷ Lídan dan ligía, ába jóúdingua já buri profétagu Jerusaléngiñe lun Antioquíoun.

²⁸ Ában jádaangiñe, gíríti Ágabo, ába laráramun jádan afíñetiña, ába laríñagun láu le lasúbudirágüdúbei Sífiri Sándu lun luágu liábiba lan ában oúnwenbun ilámaü lídan sun ubou, áni suséreti lídan lidáani larúeijan Cláudio.

²⁹ Ábati jóúndaragun afíñetiña ja Antioquiana lun jóúnajan seínsu joun afíñetiña ja Judéabaña según le jayáraati íchiga.

³⁰ Ítara líña jadügüni, ába jóúnajani seínsu ligía lúma Sáulo joun tábutigu jalígilisin afíñetiña Judéana.

12

Loúnwen Jacóbo lúma ladaürün Pédro

¹ Lídan dan ligía, ába lagúmeserun urúei Heródes eíbaajaña jádaangiñe afíñetiña.

² Ába láfaragüdüni Jacóbo le lamúlen Juan táu efeín,

³ queíti laríjin láu gúnda jamá juríu láu cátei le, ába gíñe lanügüni Pédro adáüra. Lídan buri wéyu le fédu le ídaanbei teigúa fein magánatu ísi lasúsereda cátei le.

⁴ Lárigiñe lanüğüni Heródes Pédro adaüra, ába ládaruni furísunrugun jáu díisi-sísi súdaaragu oúnigira gádürü gádürü, larítangun lún yebe laságaruni jagíbugiñe lílana fulásu lárigiñe fédu lun lagúserun.

⁵ Ñiñein lubeíti Pédro furísunrugu toúnigiwañu buídu, merédeti jayúmuragun tílana ligílisi lun Búngiu luágu.

Leséfuruni Búngiu Pédro furísunrugúgiñe

⁶ Áriebu le lubáragiñe wéyu lé yebe lúnbei laságaruni Heródes Pédro jagíbugiñoun güriña, larúmuguña Pédro jamídaangua bián súdaara, gürágu ligía láu bián güringüri, jámaya bián súdaara luágu béna oúnigira.

⁷ Sódini, ligía lasálagun ában láni Wabúreme ánjeli, ába larúgoungadún furísunrugu. Ába lagúuruni ánjeli ligía loubwawagu, ába lagáguduni, ába laríñangun lun.

—Sarába furése.

Ábati láburujan güringüri lueígiñe lújabu Pédro,

⁸ ába laríñangun ánjeli ligía lun.

—Murúbei bubélitin, daübounme bigeídin.

Lárigiñe ladüğüni Pédro sun líra, ába laríñangun ánjeli ligía lun.

—Daüboun babíte, falábana.

⁹ Ába láfuridun Pédro lárigi ánjeli ligía, ibídiñoun lun ánjein inárüni lubeí lúmoun máma lan inárüni cátei le ladüğübei ánjeli ligía. Genégetimáati lun camá gewénediñein.

¹⁰ Ába já sügürün jáu furúmiñetiña oúnigirutiña, sügü jamaña jabíaman, dánti le jachülürün luágun béna le gürábu le ümadagiñebei, ába lánjunrenchun lúngua. Ába jáfuridun, lárigiñe jánjiñuragún ában üma, ába lígiruni ánjeli ligía Pédro lábugua.

¹¹ Ligíaali lárügüdagun Pédro lúngua, ába laríñangun.

—Aná guetó, subúdi náali luágu oúnaja láali lan Búngiu ánjeli lun leséfurunina lueí Heródes lúma lueí sun lé yebe jabúseerubei juríu jadügün náu.

¹² Asáminareína ligía Pédro luágu cátei le, ába lídin túbiñoun María to lúguchu Juan Márcos, le ñí jabei sarágu güriña adámuriñu ayúmuragua lun Búngiu luágu.

¹³ Dan lacañjan luágu lubéneri bürürü, ába táfuridun ában irájü músu, gíritu Róde, aríja ca lan agúajabei.

¹⁴ Dan tasúbudiruni luágu Pédro lan luágu lumálali, bulíei tumúti tánjunrenchuni béna, le luweírin tugúndan, ábarüga teíbaagun múnadoun awísaja luágu niján lan Pédro bénabu.

¹⁵ Ábati jaríñangun tun.

—¡Lülüjaali báu!

Ába taríñangun joun luágu choúru tan luágu ligía lan. Ába jaríñangun.

—Máma ligía, fágua láfurugu.

¹⁶ Niján mémeti Pédro acañja luágu béna. Dan jánjunrenchuni, ába laweíridun janígi dan le jaríjini.

¹⁷ Ába líchugun seíni joun láu lújabu lun jámanichun, ába labájüdaguni joun ída líña lan laságaruni Búngiu furísunrugúgiñe, lárigiñe, ába laríñaga joun.

—Abájüdagua jumeí cátei le lun Jacóbo lúma joun jíbiri afíñetiña.

Ábati láfuridun, ába lídin lídoun ámu fulásu.

¹⁸ Dan larúgadunbei, niján luwúyerigu samínaü jádan súdaara, ladüga ibídiñeti joun ca lan susérebei lun Pédro.

19 Ába loúnajan Heródes áluajei, quei madári jamáni, ába lálügüdaguniña súdaara já buga oúnigrubalin, lárigiñe, ába láfaraguágüdüniña jilágubei. Lárigiñe, ába láfuridun Heródes Judéagiñe, ába lídin agánawa Cesaréa.

Loúnwen Heródes

20 Weíriti ligáñi Heródes jáma güriía ja aganoúbaña Tíro lúma Sidón, ánjein jagía, ába jebélurun lídoun ában arítagni lun jóúnajan wügüriña lun jadímurejan lúma luágu jafúleisein. Dan le jachülürün, ába jagáñeiruni Blásto, ában wügüri íñuguti láni Heródes, lun líderaguniña adílijei sun cátei, ladüga lageíragiñe Heródes jabíja eíini.

21 Ába lagúaragüdüñ Heródes jawágu luágu ában wéyu, wéyu ligía, ába ladáürunun lanáangun to lanáangun urúei, ába lañúurun luágu lála le ñígiñe lubei lagúmadija, ába ladímurejan joun.

22 Ábati jagúmeserun güriía agúaraja.

—¡Máma wügüri adímurejabei, búngiu adímurejabei!

23 Lídan óra ligía, ába lasándiragüdüni láni Búngiu ánjei Heródes, ladüga lanáangun lúngua luágu jerérun güriía, míchu lumúti linébase Búngiu lun, ába jeígini jéweraü, ába loúnwen.

24 Abúrchagueínatimá ligíati ugánu le láni Búngiu, apúrichijóuati lídan sun fulásu.

25 Dan jagúmuchuni Bernabé lúma Sáulo jawádigimari, ába jagíribudun Jerusaléngiñe barüina jamei Juan Márcos jámagua.

13

Jagúmeseruni Bernabé lúma Sáulo jawádigimari apúrichijei Lerérun Búngiu

1 Tídan ligílisi to Antioquíaboun, ñíñanu profétagu jáma maésturugu. Wügüriña jagía. Bernabé, Simón, le únbei jaríñaga Wuríti, Lúcio le Cirénena, Manaén le agüriarúbei úara lúma Heródes le gumádimati Galiléa, lúma Sáulo.

2 Luágu ában wéyu dan le jájuduragun lun Búngiu, ayúnara jagía, ába laríñagun Sífiri Sándu joun.

—Dírei jumei Bernabé lúma Sáulo nun lun wadágimanu le únbei nanúadiraña.

3 Lárigiñeti jayúmuragun lúma jayúnarun, ába jíchuguni jájabu jawágu Bernabé lúma Sáulo, ába jóúnajaniña luágu jawádigimari.

Japúrichijan Bernabé lúma Sáulo lídan fulásu le Chípre

4 Ítara líña loúnajaniña Sífiri Sándu Bernabé lúma Sáulo, ába jóúdin Seléucia, ñígiñe, jádina lun jóúdin luágun ubóuju le Chípre.

5 Dan jachülürün lídan ubúru le gíribei Salamína, líbiri méme Chípre, ába jagúmeserun apúrichijei lerérun Búngiu tídan jalígilisin juríu. Ñüdünti giñe Juan Márcos jáma, íderaguaña.

6 Eíbuga jamúti sun ubóuju ligía chülü lúmoun fulásu le gíribei Páfos. Ñi jadárira ában juríu gíriti Barjesús, garíyajati wügüri ligía, ye ligía, laríñaga luágu proféta lan.

7 Garíyajati ligía lúmañein gumádimati le Sérjio Páulo, ában wügüri janíchiguti. Ába loúnajan gumádimati ligía luágu Bernabé lúma Sáulo ladüga busén lan lagáambuni lerérun Búngiu.

8 Ánjein garíyajati ligía, le méme gíribei Elímas, sigéne lumútiña luei yebe lafíñerun gumádimati luágu le jaríñagubei lun luágu Jesucrístu.

9 Sáuloti, le méme gíribei Páblo, buin líña láu lubáfu Sífiri Sándu, ába laríaguni Elímas,

10 ába laríñagun lun.

—¡Yéetibu, buin bíña láu wuríbani, liraü Máfia amürü, lágani sun le buídubei! ¿Ca uágu meréde lubei beyéjan luágu lémeri Búngiu le surúbei?

¹¹ Guetó láburuja ligáñi Búngiu buágun, berédera maríjina luágu átiri dan.

Lídan óra ligía, ába labúrigadún láu, ába láluajan cába lan árüjei lújabu, ladüga maríjinjali lan.

¹² Dan laríjini gumádimati cátei le, ába lafíñerun luágu Jesucrístu, weíríti lanígi láu le jarúfudajabei luágu Wabúreme Jesucrístu.

Páblo lúma Bernabé ubúruğu Antioquía

¹³ Ába láfayarun Páblo jáma líbirigu Páfosgiñe lun ubúrugun Péрге, le lídaanbei fulásu gíríti Panfília. Ánjein Juan Márcos, ába lígiruniña, ába lagíribudun Jerusaléoun.

¹⁴ Lárigiñe, ába jásügürün Péргеgiñe lun ubúrugun Antioquía, le lídaanbei Pisídia. Ába jebélurun lídan wéyu le eméraaguagülei tídoun jalígílisin juríu, ába jañúurun ñi.

¹⁵ Lárigiñeti taliijóuniwa líburu to lánina lilúrudun Moisés túma buri líburu to jabürüjaboun profétagu, ába jóunajan ábutigu aríñaga joun.

—Wadújeñu, ánjein níjein lubei dimúrei lun jaríñaguni joun gürígia ja, aríñaga jumei guetó.

¹⁶ Ábati lásaarun Páblo, ába ladügün seíni joun láu lújabu lun jámanichun, ába laríñagun.

—Agáamba jumá, wügüríña Israelítagu júma jugúya le ájuduragubei lun Wabúngiute.

¹⁷ Búngiu le Jabúngiute Israelítagu, anúadaja lumútiña meja binádu wagübürigu lun lánigubaña lan, ába ladügüniña ábanme oúnwenbun násiñun dán meja le añájagua lan agánawa quei teréncha Ejípto, lárigiñe, ába laságaruniña lídaangiñe fulásu ligía láu lubáfu.

¹⁸ Awánda lumúti Búngiu luríban jagáburi lídan fulásu mageírawati quei buri bián-wein irúmu.

¹⁹ Lárigiñe, ába lagúmchaguagüdüni sédü násiñun ja aganoútiña Canaán lun líchuguni jafúlasun joun binádu wagübürigu luára gádürü-san-dimí irúmu.

²⁰ Lárigiñe, ába líchugun gürígia lun jagúseragüdüniña darí lúmoun lidáni proféta Samuél.

²¹ Ábati jamúriajan ában urúei lun ligíaba lan agúmadiraña, ába líchuguni Búngiu Saúl joun jarúeiteme luágu bián-wein irúmu, Saúl ligía, liraü Cis, ladügawagun Benjamín.

²² Lárigiñe, ába lagídaruni Búngiu arúejani luei Saúl, ába líchuguni lun David, le uágubei laríñaga. “Darína David, liraü Isaí, ában wügürí le áubei nagúndaara, áni ladügübei sun le nabúseerubei.”

²³ Jádaangiñe ladügawagun David ligía liábin Jesúsu le loúnajabei Búngiu lun jasálbarun Israelítagu, quei meja laríñaguni.

²⁴ Lubáragiñebei liábin Jesúsu ubouágun, apúrichijati Juan joun sun Israelítagu, laríñaga joun luágu lúnti lan jasáansiruni jagáburi, badísei jagíame.

²⁵ Dan le layárafadúnbei dan lun loúnwen Juan, ába laríñagun. “Mámatia áu le uágubei jarítagua luágu áu lan, liábiba ában nárigi, ni cáta áu loúbagiñe, madúnatina ni íbini lun nafáragadunun ligeídin.”

²⁶ Nidújeñu, jugúya le jarájüñübei ladügawagun Abrahám, júma jugúya le mámabei ladügawagun Abrahám, inébejabutün lun Búngiu. wagía gürígia ja únbaña loúnajoúa ugánu le luáguti Wasálbaragüle.

²⁷ Já meja gürígia ja aganoúbaña Jerusalén jáu sun jábutigu, ibídiñetí yébe joun ca lan Jesúsubei, úa ligía gunfaráanda jamáni jerérun profétagu, láu sun

alijoua lan jererun tidan jaligilisin sagu luweyuri emeraaguni, jagia guanaruguti gunfuli jamuti le buruwanubei lau jasiadiruni Jesusu lun lounwen.

²⁸ Lau sun madari jama lidunrun Jesusu lun gayara lan jafaruni jilagubei, amuriajatiña luma Pilato lun lafaraguduni jilagubei.

²⁹ Danti le aduga jamali sun le tariñagubei Lererun Bungi luagu, aba jarariguduni lueigiñe gurüwa, aba jichuguni lidoun lumüaja.

³⁰ Abla saaraguduni Bungi lidaangiñe ouweni lunya labagaridun.

³¹ Arufudaguati Jesusu lünga winwanu luagu saragu weiyaasu joun ja nubinbaña luma luagu luweiyasun Galileagiñe lun Jerusaléoun, jagiati gefeenbaña luagu joun gurigia gueto.

³² Wichiguñein lubeiti uganu le jun, luagu daradu le meja ladugubei Bungi jama binadu waguburigu

³³ gunfuli laali woun, wagia le jadugawagun, lau saaraguduni Jesusu, quei larinaguni tidan liliburun, lidan libiaman Salmo. "Niraü amüru, rünaali ubäraü le bun uguñe."

³⁴ Arinaga laali meja Bungi luagu saaraguduni Jesusu lidaangiñe ouweni lun mañaladun lan lugubu, dan larinagun tidan lliburu to Lererun. "Nichugubei abiniruni le uagubei narinaga lun David bun, gayaraati beménigidun luagu."

³⁵ Larinaga giñe David lidan abanya Salmo. "Migirunbadibu lun lañaladun lugubu Biraü le jinsiñebei bun."

³⁶ David, seriwiti meja joun ja lanina lidaani quei larinaguni Bungi lun, larigiñe, aba lounwen, aba labunun le ni lubei jabunua laguburigu, aba lañaladun lugubu.

³⁷ Anjeinti Jesusu, saragüda lumuti Bungi lidaangiñe ouweni, mañaladunti lugubu.

³⁸ Nidujeñu, lunti lubeiti jasubudiruni luagu lidaangiñe lan Jesusu ferudunawa lan wafigoun. Ligia uganu wanugubei jun.

³⁹ Lidaangiñeti giñe, chibawaali lubei sun wafigoun, sun wagia le afiñebei luagu, gidawa ligia wadunrun ligibugiñe Bungi, catei le meja siña lubei lilurudun Moisés aduga.

⁴⁰ Tounigi juma lubeiti luei laburujan ligañi Bungi juagun queisi jarinaguni profetagu dan le jarinagunbei.

⁴¹ Juguya le ejerajabei nau, weirilá janigi, ani gumugua juma, laduga au le Bungiubei, nadugüba catei weinamuburiti, darime lun mafinjen juma, ibini jabajudaguni amu jun.

⁴² Dan le lafuridunbei Pablo jama lanigu tidaangiñe ligilisi, aba jamuriajan jama lunya jadimurejan joun luagu buri catei le leweñegua dimáasu.

⁴³ Dan lagumuchun jadamuridagun ligilisirugu, saragu jadaangiñe jurü jama buri ja igirubalin binadu jafinjen lun jafalaruni jafinjen jurü, aba jafalaruni Pablo luma Bernabé. Abla jadimurejan Pablo luma Bernabé jama, aba jarinagun joun lun jasingirun eménigira luagu lareidun Bungi.

⁴⁴ Leweñegua dimáasu, le luweyuri emeraaguni, aba joundaragun jibe-agei lilana fulasu lun jagambuni lererun Bungi.

⁴⁵ Lau jarijin jurü saragu gurigia agambajei lererun Bungi, aba jeméendüjan, aba jagumeserun asigenerei Pablo, anaba jamei liri Jesusu.

⁴⁶ Abati jadimurejan Pablo luma Bernabé manufudeiga, aba jarinagun.

—Lunti yebe wichuguni uganu lumagiñeti Bungi luagu Wasalbaragüle jun furumiñe, juguya le jurü, quei mabuseerun juma jerésibiruni uganu ligia, lau lira jarufuduñein luagu maduna jumani ibagari le magumuchaditi, itara lina weibugabeiti apurichija joun ja mamabaña jurü.

- ⁴⁷ Ladüga ítara líña laríñaguni Wabúreme woun.
Níchuguñadibu lun bíchuguni larúgouna joun ja mámabaña juríu,
lun gayáraabei lan jasálbarun ja aganoúbaña lídan lagúmujoún fulásu uboúagu.
- ⁴⁸ Dan jagáambuni ja mámabaña juríu cátei le, ába jagúndaaragun, ába jagúmeserun aríñaga luágu buídu lan láni Búngiu ugánu, ába jafíñerun sun ja lúnbaña jafíñerun luágu Jesucrístu, ja lúntiñabaña ibágari le magúmuchaditi.
- ⁴⁹ Ítara líña lapúrichijoún lerérun Búngiu lídan sun fulásu ligía.
- ⁵⁰ Ába jadímurejan juríu jáma würiña gúnfulitiña, inébewa jagía, lúma jáma wügüriña weírigutiña ñi ubúrugú, ába jínchajániña lun jeíbaajaniña Páblo lúma Bernabé darí lun jabúguniña lídaangiñe fulásu ligía.
- ⁵¹ Ábati jáfuruduní calíqui lueígiñe jagúdi, arúfudei luágu mabuídun lan joúserun lílana fulásu ligía, ába joúdin ubúrugun Icónio.
- ⁵² Gúndaañu jáña afíñetiña Antioquía luágu jabágari lúma Crístu, weíríti jedéregeragun joúngua lun Sífiri Sándu.

14

Páblo lúma Bernabé ubúrugú Icónio

- ¹ Ába jebélurun Páblo lúma Bernabé tídoun jalígílisin juríu ubúrugú Icónio, ába japúrichijan, buíti jadímurejan darí lun jafíñerun sarágu, dándu juríu quei máma juríu, luágu Jesucrístu.
- ² Juríu ja mafíñebaña luágu Jesucrístu, ába jínchajaniña ja mámabaña juríu, amísiñedagüdaña afíñetiña joun.
- ³ Ligía jeréderunbei Páblo lúma Bernabé sarágu dan ñi, ába jadímurejan furáangu, manúfudeiga, jeménigiñu luágu Búngiu, arúfuda lumúti Wabúreme luágu inárüni lan cátei le japúrichijabei luágu lareídun, láu líchuguni ubáfu joun lun jadáagun seíni lúma miláguru.
- ⁴ Fánreinguañu jáña lílana ubúrugú ligía, jíbiri jámagiñeñanu juríu, jíbiri jámagiñe apóstolugu.
- ⁵ Játi juríu jáma ja mámabaña juríu, ába jebélurun lídoun ában arítaguni jáma gumádimatiña lun jeíbaajaniña apóstolugu lúma lun jachámuragun dübü jawágun.
- ⁶ Anjein Páblo lúma Bernabé, ába jasándiruni, ába joúdin lídoun buri fulásu le gíríbei Lístra lúma Dérbe, biáma fulásu le láni méme fulásu le Licaónia, lúma geyégu láu,
- ⁷ apúrichija jamúti gíñe ugánu luáguti Wasálbaragüle Jesucrístu ñi.

Jachámuragun dübü luágu Páblo lídan fulásu le Lístra

- ⁸ Ñíñein ában wügüri meíbugunti, Lístra, ñun líña ladüga ítaragubeíñein lan lúmagiñe lagüriajouún, meíbugungubeíti.
- ⁹ Lagáambajañein wügüri ligía le laríñagubei Páblo, láu laríjin Páblo luágun, ába lasúbudiruni luágu afíñe lan wügüri ligía luágu gayára lan lareídagun.
- ¹⁰ Ábati laríñagun Páblo lun láu umálali jéreti.
—Ráramabá luágu bugúdi.
Ába lachúbarun wügüri ligía arárama, ába lagúmeserun eíbuga.
- ¹¹ Dan jaríjini gürígia cátei le ladügübei Páblo, ába jagúmeserun agúaraja lídan jerérun Licaóniana, jaríñaga.
—¡Raríjaña búngiugu quei jagáburi wügüriña wámoun!
- ¹² Jaríñaga luágu Bernabé búngiu Júpiter, luágu Páblo búngiu Mercúrio, ladüga ligía lan adímurejabei. Nújein lúban jabúngiute Júpiter bougudiñoun lueí ubúrugú,

¹³ Ába liábin lufádirin Júpiter ñígiñe barüína wügüriña bágasu lúma buri fulúri luágun lubéneri ubúru, buséti yebéti ligía jáma buri güriña lun jáfaruniña bágasu jagía lun jadágaragüdün joun Páblo lúma Bernabé.

¹⁴ Dan jasúbudiruni Páblo lúma Bernabé cátei lan jabúseerunbei güriña ja jadügün, ába jajeíridagunun janáangun le luweírin lubéresen cátei le joun, ába jádaragun jóungua jádoun güriña agúarajeina.

¹⁵ —¡Wügüriña! ¿cámesan jabúseera jadügüni cátei le? Wügüriña giñétia wagía quei jugúya, wayábiña aríñaga jun lun jígiruni cátei buri le mabuídunbei, lun jafálaruni Búngiu le wíwanbei, le adügübalin siélu lúma ubou, barána lúma sun cátei le lídaanbei.

¹⁶ Lídan meja dan le sügüjalibei, ígira lumútiña meja Búngiu güriña lun jadügüni le jabúseerubei,

¹⁷ láu sun, arúfuda láani joun güriña cáteiñein lan láuja buídu le ladügübei joun. Rúti júya woun lúma alúbajani buíti, ru ligía eígini buídurügüti woun, belúgüda lumúti ugúndani tídoun wanígi.

¹⁸ Láu sun aríñaga jamáni Páblo lúma Bernabé sun cátei le joun, jénreengu mémegili jeréderuniña güriña luei jáfaruniña bágasu jagía lun jadágaragüdün joun.

¹⁹ Ábati jachülürün juríu Antioquíagiñe lúma Icóniogiñe, ába jagáñeiruni jarítangun güriña lun jachámuragun dübü luágun Páblo. Lárigiñe, ába jadúrüguduní bougudín luei fulásu, sun jaríñangun luágu jiláli lan.

²⁰ Dan le jagúriridágun afíñetiña láu Páblo, ába lásaarun, ábaya lebéllurun fulásurugún. Larúgan, ligía lídin lúma Bernabé ubúrugun Dérbe.

²¹ Lárigiñe lapúrichijaní ugánu luáguti Wasálbaragüle ñi Dérbe, le ñi jabei sarágu güriña afíñerutiña luágu Jesucrístu, ába jagíribudun, ába jóudin Lístra, Icónio lúma Antioquíu.

²² Rútiña gurásu joun afíñetiña ja lídaanbaña buri fulásu ligía, aríñaga jagía joun lun jasígirun derégüdagu lídan jafíñen, aríñageina jagía joun luágu lúnti lan wasúfurirun sarágu lun gayára lan webélurun lídoun larúeijan Búngiu.

²³ Rútiña gíñe ábutigu lídan cáda jadámurin afíñetiña. Lásunti jayúmuragun lúma jayúnarun, ába jedéregeruniña lábun laríaaan Búngiu le uágubei jafíñera.

Lagíribudun Páblo lúma Bernabé Antioquíoun

²⁴ Lárigiñe, ába jásügürün Pisídiagiñe, ába jachülürün Panfília.

²⁵ Ába japúrichijaní ugánu luáguti Jesucrístu ubúruge Pérge, líbiri méme Panfília, ábati jóudin Atálioun.

²⁶ Ñígiñe jádina, ában jóudin Antioquíoun, le fulásu le ñíjin lubei jóunajoúa lábugiñe laríaaan Búngiu adügei wadágimanu le jagúmuchubei guetó.

²⁷ Dan jachülürün Antioquíu, ába jóundaraguniña tánigu jalígilisin afíñetiña, ába jabájüdaguní sun cátei le ladügübei Búngiu jáu joun, lúma luágu lánjunrenchuní Búngiu béna joun ja mámabaña juríu lun gíñe gayáraabei lan jafíñerun luágu Jesucrístu lun jasálbarun.

²⁸ Ába jeréderun Páblo lúma Bernabé sarágu dan jáma afíñetiña ñi.

15

Adámuridagúni Jerusalén

¹ Ligía jayábin wügüriña Judéagiñe lun Antioquíoun, ába jagúmeserun arúfudaja joun afíñetiña luágu lun lan jasálbarún, mósu lan jerésibiruni wügüriña circuncisión, quei laríñaguni lilúrudun Moisés.

² Barúti Páblo lúma Bernabé ában sigénei weíriti jáma luágu cátei ligía, lagúmujoún óra, ába loúnajoún Páblo, Bernabé, jámaya ámu wügüriña

Jerusaléoun lun jóúdin aráanserei cátei le jáma apóstolugu jáma tábutigu ligílisi to ñíboun.

³ Ja tánigu ligílisi to Antioquíaboun oúnajabaliña, lídaanti jaweíyasun, ába já sügürün loúbawagugiñe Fenícia lúma Samária, abájüdagueina jagía luágu jígiruni ja mámabaña juríu binádu jafíñen lun jafálaruni Crístu. Ába jagúndaaragun sun afíñetiña láu ugánu le.

⁴ Dan jachülürünbei Páblo lúma Bernabé Jerusalén, ába jerésibiruniña tílana ligílisi, jáma apóstolugu, jáma tábutigu ligílisi, ába jabájüdagun Páblo lúma Bernabé joun luágu sun le adüga láalibei Búngiu jádaangiñe.

⁵ Ñíñanu jádaangiñe jadámurin fariséogu ja afíñetiña luágu Crístu, ába jaráramun, ába jaríñagun.

—Lúnti jerésibiruni wügüríña afíñetiña ja mámabaña juríu circuncisión, lúnti gíñe jagúnfulirun lúma lilúrudun Moisés.

⁶ Ábati jóúndaragun apóstolugu jáma tábutigu ligílisi lun jatúriajani cátei le.

⁷ Lárigiñe sarágu dimúrei, ába lásaarun Pédro, ába laríñagun.

—Nidújeñu, subúdi jumúti luágu binárü lán meja lanúadirana Búngiu jídaangiñe lun níchuguni ugánu le lánina asálbaruni joun ja mámabaña juríu, lun gíñe gayáraabei lan jafíñerun luágu Jesucrístu.

⁸ Búngiuti, le subúdi jabúbei tun anígi, arúfuda lumúti luágu resíbi láníña ja mámabaña juríu láu líchuguni Sífiri Sándu joun quei líchuguni woun.

⁹ Manügün lumútiwa Búngiu ámu jaweí, jarúmagüda lumútu gíñe janígi láu jafíñen luágu Jesucrístu.

¹⁰ ¿Cáti uágu laloúguada jafíñen guetó luágu le adüga láalibei Búngiu, ru jugúya ában ijürügu jawágun afíñetiña ja, le wásiñerubei wagía guánarügü anüga—ni wagía ni binádu wagübürigu?

¹¹ Afíñetiwa luágu sálbaadiwa lan láurügü wafíñerun luágu Jesucrístu, madügünga wagía ni ámu cátei lun wabíjini, sálbaadiwa láu lareíni Wabúreme Jesucrístu. Ítara méme líña gíñe jasálbarun ja mámabaña juríu.

¹² Ábati jámanichúnga, ába jagáambuni sun le jaríñagubei Bernabé lúma Páblo joun luágu buri seíni lúma miláguru le ladügübei Búngiu jádaangiñe, jagánagua ja mámabaña juríu.

¹³ Dan le lásurun jadímurejan, ába laríñagun Jacóbo.

—Nidújeñu, agáamba jumána.

¹⁴ Abájüdaguaali Simón Pédro woun ída líña lan fuleísei láníña Búngiu ja mámabaña juríu, láu lanúadajan jádaangiñe lun lánigume.

¹⁵ Ítara líña cátei le quei lé meja jabürüjabei profétagu tídan Lerérun Búngiu.

¹⁶ Gumúguaali jarúeijan ladügawagun David, queísigubeirügü tagúmuchagun ában múna eíguadutu.

Lachülürüba wéyu nun, áu le Búngiu, lúnyame naríjin jawágun ladügawagun David,

ábame níchuguni ubáfu lun ában jádaangiñe lun larúeijan jádan.

¹⁷ Nadügübei líra lun gayáraabei lan jayábin sun jíbiri gürígia lun jáluajanina queísi Jabúreme,

lun jayábin sun ja mámabaña juríu nun, ja anúadaja náñabaña lun nánigume.

¹⁸ Ítara líña naríñagun, áu le Búngiu, le asúbudirágüdübalin cátei le lúmagiñe buga binádu dan.

¹⁹ ‘Ligía naríñagunbei luágu moun lání wíchugun sarágu lúrudu jawágun ja mámabaña juríu, ja ígirubalín binádu jafíñen lun jafálaruni Búngiu,

²⁰ buídurügüti láu labürüjóun joun lun jebé lan jeígin eígini le adágarawagüdüti joun sándu, madáagun jagíame cátei buri jáma ja úmatiña

mamárieidun jamá, meígin jagíame jágürügü anímaalu ja tigiwarügütiña lugúndun máfuridunti játa jádaangiñe, meígin jagíame játa anímaalu.

²¹ Buíti lun jagúnfulirun lúma buri cátei le lun jíchugun inébesi joun juríu, ladüga lúmagiñe bugája binádu dan, añájein gürígia apúrichijati lilúrudun Moisés lídan ságü fulásu, alijouáti lúrudu luágu tídan buri jalígilisin juríu ságü luwéyuri eméraaguni.

²² Ábati jarítangun apóstolugu jáma tábutigu ligílisi jáma sun tílana ligílisi janúadajan wügüriña jádaangiñe, lun jóunajaniña Antioquía úara lúma Páblo lúma Bernabé. Ába janúadiruni Júdas, le gírubei Barsabási, lúma Sílas, bián wügüriña weirigutiña jádan afiñetiña.

²³ Ába jóunajan ában gárada jáma, láriñajare tídan gárada tugúya.

“Wagía le apóstolugu, tábutigu ligílisi, jáma sun jíbiri afiñetiña, mábuga wáña joun wadújeñu lueígiñe Jesucrístu ja mámabaña juríu ja aganoúbaña Antioquía, Síria, lúma Cilícia.

²⁴ Agáambaadiwa luágu añájein lan gürígia ñüdüntiña yágiñe ibídiñoun woun ebéreseja jun láu jadímurejan, áni dájaña ámu arítangun jídoun láu jaríñangun jun luágu mósu lan jerésibiruni wügüriña circuncisión, queísi láriñangun lilúrudun Moisés.

²⁵ Ligía wúwaradúnbei lídan warítangun lun wanúadajan gürígia wádaangiñe lun jóudin aríjaün úara jáma wadújeñu Bernabé lúma Páblo ja jínsiñebaña woun sarágu,

²⁶ ja rújamaalíbei jabágari lídoun pelíguru lueígiñe Wabúreme Jesucrístu.

²⁷ Wounajañanu lubeíti Júdas lúma Sílas jun, jadímurejaba júma lun jafúnraanguagüdüni sun cátei le tídaanbei gárada to wounajaboun jun, jun.

²⁸ Maríbaanti larijín lun Sífiri Sándu lúma woun, míchugúniwa lan ámu ijürügu jun lueídügüya murúsun cátei le, le lunbei jadügüni.

²⁹ lun meígin jumá úwi le jáni anímaalu ja adágarawagüdütiña joun sándu, meígin jugúyame jítaü, ni úwi le jáni anímaalu ja tigiwarügütiña, madáangun jugúyame cátei buri jama gürígia ja mamárieidúntiña júma. Ánjaün areídagua júngua lueí buri cátei le, buídubei jadüga. Buídu lámuga lídin jun.”

³⁰ Lárigiñeti jóunajóun luágu jaweíyasun, ába jóudin Antioquía. Dan le jachülürünbei ñi, ába jóundaraguniña afiñetiña, ába jíchugunun gárada joun.

³¹ Dánti le jalíjanbarun afiñetiña, ába jagúndaarun sarágu luágu gurásu le tíchugubei joun.

³² Quei gíñeti gabáfu jamá Júdas lúma Sílas lun ladímurejan Búngiu jayúmulugugiñe, ába jíchugun gurásu joun afiñetiña láu jadímurejan joun, ru jagía idérebugu lun jafiñen.

³³ Lárigiñe jásügürün átiri dan ñi, ába jayóuragun afiñetiña joun lubá jagíribudun jámoun já meja oúnajabaliña Jerusalén.

³⁴ Ánjeinti Sílas, ába leréderun.

³⁵ Reídeitiña gíñe Páblo lúma Bernabé Antioquía, ába jasígirun arúfudajei lúma apúrichijei ugánu luáguti Crístu, jagía jáma sarágu ámu.

Lagúmeseruni Páblo libíaman luweíyasun apúrichija

³⁶ Átiri dan lárigiñe, ába láriñangun Páblo lun Bernabé.

—Queímounya aríjaña afiñetiña lídan sun ubúругu buri le ñí lubei apúrichija wamáali lan ugánu luágu Crístu, aríja wamámuga ída jáña lan.

³⁷ Busénti yebe Bernabé janügüni Juan Márcos jámagua,

³⁸ májati Páblo janügüni ladüga meja ígira láaña lan Panfília, masígiti jáma lídan wadágimanu.

³⁹ Lárigiñe sarágu sigénei, múaradúntiña luágu cátei le darí lun jafánreinragun jawáriuagua. Ába lanügüni Bernabé Márcos, ába jóúdin Chípre,

⁴⁰ ába lanügüni Páblo Sílas. Lárigiñe jedéregeruni afiñetiña Páblo lúma Sílas lújaburugun Búngiu, ába jóúdin,

⁴¹ ába jásügürün Síriagiñe lúma Cilíciagiñe, íchaajeina gurásu joun afiñetiña ligílisirugu.

16

Lídin Timoteo úara jáma Páblo lúma Sílas

¹ Ába jachülürün Páblo lúma Sílas lídoun buri fulásu le Dérbe lúma Lístra, le ñí lubei jadárira ában afiñeti gíriti Timotéo, tiraü ában würi juríu afiñetu luágu Jesucrístu, güriégu lúguchi.

² Afiñetiña ja aganoúbaña Lístra lúma Icónio, buíti jadímurejan luágu.

³ Busénti Páblo lun lídiba lan Timotéo jáma, íchigeina ugánu luáguti Crístu, ába lerésibiruni Timotéo circuncisión lueí wuríba lan joun juríu ja aganoúbaña lídan buri fulásu ligía, quei subúdi jamáni luágu merésibirun láani circuncisión ladüga güriégu lan lúguchi.

⁴ Súnti fulásu le ñígiñe lumúti jásügüra, jasúbudirágüdüni cátei le jariñagubei apóstolugu jáma tábutigu ligílisi ja Jerusalénbaña joun afiñetiña, ába jéredun jawágu lun jagúnfulirun lúma jagúmadin.

⁵ Ába lubeiti jedéraagüdün tílana ligílisi lídan jafiñen, ába jagánwoundun afiñetiña ságü wéyu.

Lasáriragun ában wügüri Macedóniana lun Páblo

⁶ Májati Sífiri Sándu lun jíchugubei lan ugánu luágu Crístu Ásia. Ábati jásügürün labádinaguagiñe Fríjia luma Galácia,

⁷ ába jachülürün luágu fadáguau le Mísia. Ñígiñe yebe jarítagua lun jebélurun loúbawagun Bitínia, májati láni Jesúsu Espíritu le méme Sífiri Sándu lun jadügüni.

⁸ Ábati jóúdin surúrgu Mísioun, ába jarárirun Tróas.

⁹ Ñi lasáriragua ában wügüri Macedóniana lun Páblo, áriebu, rára ayúmuragua lun, laríñaga lun. “Queímoun Macedónia íderagua bámugawa.”

¹⁰ Lárigiñe lasáriragun wügüri ligía lun Páblo, ába waráansejan lun woúdin Macedónia láu wafiñen luágu lagúajaña lan Búngiu woun lun wíchuguni ugánu luágu Crístu le Wasálbaragüle joun Macedóniana.

Páblo lúma Sílas ubúrgu Filípos

¹¹ Ábati wáfayarun Tróasgiñe, ába woúdin sügülügü luágun ubóju le Samotrácia, larúgan, ligía wachülürün Neápolis.

¹² Ñígiñe ába woúdin Filípos, Filípos lábugiñeñein lagúmadijan Róma, ligía gíñe ubúrgu le weírigutimáabei luágu loúba Macedónia. Reídeitiwa átiri wéyu ñi.

¹³ Luágu ában wéyu le luwéyuri eméraaguni, ába wáfuridun boúgudin lueí ubúrgu, lárún dúna, lídan ában fulásu le ñi lubeíja layúmurawagúa lun Búngiu. Ába wañúurun ñi, ába wíchuguni ugánu luáguti Crístu joun würiña ja oúndaragubáña ñi.

¹⁴ Ñíñoun ában jádaangiñe, gíritu Lídia, ubúruguna Tiatíra, tifísiute alúguraja gamísa finutu to gúchu tágu. Judúguatu würi tugúya lun Búngiu, tagáambajañádiwa, ába lánjunrenchunun Búngiu tanígi lun tadügün gásu láu le laríñagubei Páblo.

¹⁵ Ába tabásterun jáu sun tílana túban, lárigiñe, ába tayúmuragun woun ítara.

—Ánjein afíñe jubei luágu afíñe nan le tímatimaati luágu Wabúreme Crístu, reídei jumá ya núbiñe.

Jéretu wawágu, ába weréderun.

¹⁶ Luágu ában dan, dan le woúdiña lan lídoun fulásu le ñi lubeiñaja layúmurawagúa lun Búngiu, ába wadúnragun túma ában irájü gawágutu ában espíritu wuríbati le íchugubei ubáfu tun lun tasábiujan. Ában idámuni irájü tugúya, ibíjatutíja sarágu seínsu joun tabúriña láu tasábiujan.

¹⁷ Ába tagúmeserun irájü to afálarawa, wagía lúma Páblo, agúarajeina tugúya ítara.

—Gürígia ja, jesériwiduña lun Búngiu le íñubei, jadímurejaña luágu üma lánina asálbaruni lídaangiñe figoú jun.

¹⁸ Gíbeti wéyu táu adúgei cátei le darí lun tebéresedun lun Páblo, ába lagáragun, ába laríñagun lun espíritu le tídaanbei.

—Lídan líri Jesucrístu, gumádi numútibu lun báfuridun tídaangiñe.

Ába láfuridun espíritu ligía tídaangiñe lídan méme óra ligía.

¹⁹ Dan le jaríjin tabúriña luágu siñáali lan jagáñeirun seínsu tueígiñe, ába jarügüdüni Páblo lúma Sílas, ába janügüniña jagíbugiñoún ábutigu lamídaangua ubúругu.

²⁰ Ába jarúfuduniña jagíbugiñe gumádimatiña, ába jaríñagun.

—Wügüriña juríu ja, jachágaraguñein wabúrugute,

²¹ jarúfudajaña igáburi le wásiñerubei erésibira ni adüga ladüga Rómana wagía.

²² Ábati jiñúragun güriña jóungua jawágu, ába jarágachaguágüdüniña gumádimatiña, ába jíchugun dimúrei lun jabeichúniwa láu wéwe.

²³ Lárigiñe sarágu abeichúni, ába jádaruniña furísunrugún, ába jaríñagun lun oúnigiruti adaürütiña lun goúnigi lániña buídu.

²⁴ Dan libíjini oúnigiruti lúrudu le, ába ládaruniña lídoun lagúmujoún tarígeirugu furísun, ába legélenchuni jagúdi.

²⁵ Queí buri luágun amídi áriebu, ñíñanu Páblo lúma Sílas ayúmuragua lúma erémuja urému lun Búngiu, ja jíbiri, agáambaja.

²⁶ Sódini, ába liábin ában oúnwenbun jarabaganáli, ába lánjingichuni tuágaburi furísun. Lídan óra ligía, ába lánjunrenchun sun béna, safá ligía sun güriñgüri le jawágubei adaürütiña.

²⁷ Ába lagágudun oúnigiruti, dan laríjin luágu júnren líña lan sun tubéneri furísun, ába laságarunun lefeínte lún yebe láfaragun lúngua, sún yebe laríñagun luágu ñüdúngua jamá adaürütiña.

²⁸ Ába lagúragun Páblo lun.

—Máfaraguabá búngua, awánja ya sun wagía.

²⁹ Ábati lamúriajan oúnigiruti lámpu, ába lebélorun eíbaagueina, adádagareina láu anúfudei, ába láguragun lúngua lubádu jagúdi Páblo lúma Sílas.

³⁰ Ába laságaruniña furísunrugugiñe, ába laríñagun joun.

—Wügüriña, ¿ca cátei lúnbei nadügüni lun nasálbarun?

³¹ Ába jaríñagun lun.

—Afíñebá luágu Wabúreme Jesucrístu, ábame basálbarun jáu sun tílana búban.

³² Ába jíchuguni ugánu luáguti Crístu lun jáu sun ja lúbiñebaña.

³³ Lídan méme óra ligía, láu sun áriebujali lan buídu, ába lachíbuni bíti buri le jawágubei, ábati labásterun jáu sun lufámilian.

³⁴ Lárigiñe, ába lanügüniña lúbiñoun, ába líchugun eígini joun, ¡máti lugúndan jáu sun lufámilian láu jafíñerun luágu Búngiu!

³⁵ Larúgan bináafin, ába jóúnajan gumádimatiña polisía aríñaga lun oúnigiruti lun lígiragüdüniña Páblo lúma Sílas.

³⁶ Ábati laríñagun oúnigiruti lun Páblo.

—Oúnajaaña gumádimatiña aríñaga nun lun nígiragüdünnün, gayáraajali lubeíti jídin darángilañu.

³⁷ Ába laríñagun Páblo joun polisía.

—Láu sun Rómana wamá, beíjamutiwa jagíbugiñe güriña, míchigunga dan woun lun wadímurejan waweígiñegua, dágua jamáwa furísunrugun, ¿guetó buséntiña jígiragüdüniwa arámudaguárügü? ¡Máfuridunbadiwa! Nübin jamá aságarawa.

³⁸ Ába jabájüdaguni polisía cátei le joun gumádimatiña, ába janúfudedagún gumádimatiña dan le jasúbudiruni luágu Rómana jamá Páblo lúma Sílas.

³⁹ Ábati jóúdin amúriaja ferúdon jáma, ába jaságaruniña, ába jayúmuragun joun lun jáfuridun ñígiñe ubúrugugiñe.

⁴⁰ Dan le jáfuridunbei furísunrugugiñe, ába jóúdin túbiñe Lídia, lárigiñe jaríjiniña afíñetiña lúma jíchugun idérebugu joun, ába jasígiruni jaweíyasun.

17

Chagáguai ubúruгу Tesalónica

¹ Lídan jaweíyasun Páblo lúma Sílas, sügütiña Anfípolisgiñe lúma Apolóniagiñe, ñígiñe, ába jachülürün ubúrugun Tesalónica le ñí tubei ában jalígilisin juríu.

² Quei léchun Páblo, ñüdünti tídan ligílisi tugúya, adímurejati jáma ürüwa dimáasu, ságü luwéyuri eméraguni.

³ Arúfudajati joun quei taríñaguni Lerérun Búngiu luágu lúnti lán meja lasúfurirun Crístu, lárigiñeme lan loúnwen, aba lánme lásaarun lídaangiñe oúweni lúnya labágaridun. Laríñaga buri joun.

—Jesúsu méme le uágubei nadímureja jun, ligía Crístubei le lúnbei liábin asálbaraña güriña.

⁴ Ábati jafíñerun jádaangiñe juríu, ába júaradun lúma Páblo lúma Sílas. Afíñetiña gíñe sarágu ja mámabaña juríu ja judúguatiña lun Búngiu, jáma sarágu würiña weírigutiña.

⁵ Juríu ja mafíñebaña luágu Jesúsu lan Crístubei le lunbei liábin, magúndaantiña láu cátei le, ába jóúndaragun wügüriña wuríbatíña ja eíbugañajádügübaña ümada, ába jachágaraguágüdüniña güriña ñi ubúruгу. Ába jaságarajanun lúban Jasón, áluajaña Páblo lúma Sílas lun jaságaruniña lun jedéregeruniña jájaburugún güriña.

⁶ Queíti madári jamániña ñi, ába janügüni Jasón jáma átiri jádaangiñe afíñetiña jagíbugiñoún gumádimatiña lídan ubúruгу ligía, ába jagúaragun aríñaga.

—Wügüriña ja, ja ebéresejabaña lídan sun fulásu, chülüjaña gíñe ñájoun,

⁷ resíbi láaña Jáson lúbiñe. Sun jagía dürügua jamúti lilúrudun Urúei César, ladüga aríñagatiña luágu níjein lan ámu urúei, ában nege gíriti Jesúsu.

⁸ Dan jagáambuni gumádimatiña jáma sun jíbiri güriña cátei le, ába jachágaragun.

⁹ Jáson jáma ja jíbiri, ába jafáyeijan, ába jígirawagüdüniwa.

Páblo lúma Sílas ubúruгу Beréa

¹⁰ Furése furése, dan le labúrigadun, ába jóúnajaniña afíñetiña Páblo lúma Sílas ubúrugun Beréa. Quei jachülürün ñi, ába jóúdin tídown jalígilisin juríu.

11 Juríu ja ñíbaña, buítimaati jagáburi jaweí ja Tesalónicabaña, resíbi jamúti ugánu luáguti Crístu láu ugúndani, ságüti wéyu jalíjanun Lerérun Búngiu lun jaríjini ánjein inárüni lubei le aríñawagúbei joun.

12 Sarágu jáña lubeíti afíñerutiña jádaangiñe, afíñe jagía gíñe sarágu ja mámabaña juríu, dándu würíña weírigutiña quei wügüríña.

13 Dan le jasúbudirunbalin juríu ja Tesalónicabaña luágu lapúrichijañein lan gíñe Páblo Lerérun Búngiu Beréa, ába joudin achágaraguágüdaña gürígia ñi.

14 Ába jóunajani afíñetiña Páblo furése lun lídin lacóstoun, leréderame Sílas lúma Timotéo Beréa.

15 Ja ñüdümbaña láu Páblo, ába jáfayajan lúma chülü ubúru gu Aténas. Lárigiñe, ába jagíribudun barüina jagía dimúrei lun Sílas lúma Timotéo lun jóudin lárigi Páblo lídan lufúresen.

Páblo ubúru gu Aténas

16 Sun niján lan Páblo Aténas agúrabajei Sílas lúma Timotéo, medéraguágüdünti larítangun láu laríjini ubúru gu ligía buin jáu bürübün sándu.

17 Ligíaja ladímurejaanbei tídan jalígílisin juríu lúma jáma ja mámabaña juríu ja ájuduragubaña lun Búngiu, adímureja ligía buri ságü wéyu jáma gürígia ja úmadarugubaña, ñí lubei jadámuridagua.

18 Ñíñanu jádaangiñe wügüríña ja atúriajabalin jarúfudajan epicúreogu, jáma ja atúriajabalin jarúfudajan estóicogu, ába jadímurejan lúma. Jaríñaga jíbiri.

—¿Cáfunasan laríñagubei wügüri le woun, líbebei ladímurejan?

Jaríñaga jíbiri.

—Camátia ladímurejaña jawágu ámu búngiugu.

Jaríñagunbeiti ítara ladüga lapúrichijan Páblo joun luágu Jesúsu lúma luágu ásaaruni lídaangiñe ouweni.

19 Ábati janügüni lídoun ában fulásu gíríti Areópago, le ñi lubeíja jóundaragua lun jagáambagun jóungua, ába jaríñagun lun.

—¿Gayáraati wasúbudiruni cátei lan iséri cátei le barúfudajabei?

20 Cátei lé buri baríñagubei woun, terénchati woun, buséntiwati wasúbudiruni ca lan laníchigubei.

21 Sun Aténasna, jáma teréncha ja aganoúbaña ñi, marítaguntiña luágu ámu cátei lueídügüya luágu jaríñagun lúma jagáambun cátei iséri.

22 Ábati laráramun Páblo jamídaangua ñi Areópago, ába laríñagun.

—Wügüríña Aténasna, aríja numúti luágu afíñe jumá jawágu jisándun,

23 ladüga dan le aríaajeina nubálin fulásu buri le ñí lubei jájuduragua joun jisándun, darítina ában latárü le ñí lubei bürüwañu lan dimúrei le. “Lun Búngiu le ibídiñewabei”. Búngiu le, le únbei jájuduragua, le ibídiñebei jun, ligía Búngiu le uágubei nadímureja jun.

24 ‘Ligía Búngiu le adügübalin ubou lúma sun cátei le ubouagubei, ligía labúremebei siélu luma ubou. Maganoúnti tídan ligílisi to jadüga gürígia,

25 memégeirun lumúti gíñe le gayáraabei jadügüni gürígia luágu lufúleisein, ligía guánarügü íchugubei ibágari lúma garábali, lúma sun cátei woun, sun wagía.

26 ‘Lídaangiñe ábanrügü wügüri ladügaña sun néchaanigu lun jaganou n lídan sun fulásu, aráanseleí dan le lúnbei jabágariduni lúma fulásu le lúnbei ñíba lan jagánawa.

27 Adüga lumúti Búngiu sun líra lun gayáraabei lan jáluajani gürígia, gayára lámuga jadáriruni láu jáluajani, láu sun inárüni lan luágu madíse lan Búngiu lueí cáda ában wádaangiñe.

28 Ladüga lídaangiñeti Búngiu awánjein lubeí, gabágari wagía, eíbuga wagía ligíbuagu ubou le, quei jaríñaguni poétagu jídaangiñe. “Lirájüñü Búngiu wagía.”

²⁹ Queíti lirájüñü wabeí Búngiu, mouñ lumuti wanügüni Búngiu quei ában sándu le gólu, o pláta o dübü le jadüga wügüriña quei jarítangun luágu ítara líña lan Búngiu.

³⁰ Mebéresegúnti méja Búngiu láu cátei le jadügübei gürígia lábugiñe libídiñe joun, ánjein guetó, aríñagati joun sun gürígia lídan sun fulásu lun jasáansiruni jouuserun.

³¹ Ladüga anúadajaali Búngiu ában wéyu lun ligíaba lan wéyu lagúseragüdüniña gürígia ja ubouagubaña láu ísuruni láu ában wügüri le anúadaja lálabei, wügüri ligía, ligía Jesucristubei, arúfuda lumúti woun láu lásaaragüdüni Jesúsú lídaangiñe ouweni lúnya labágaridun.

³² Dan le jagáambubei luágu ásaaruni lídaangiñe ouweni, ñíñanu jádaangiñe, ába jéjerajan láu, jíbiri ába jaríñangun.

—Lídaanbagúbei ámu dan wagáambeí badímurejan luágu buri cátei le.

³³ Ábati lígiruniña Páblo.

³⁴ Ába jafíñerun jádaangiñe luágu Jesucristu, ába jafálaruni. Níñein Dionísio jádan, lé meja ában jádaangiñe ábutigu lídan fulásu le gíribei Areópago, túma gíñe ában würi gíritu Dámaris, jámaya ámu gürígia.

18

Páblo ubúругu Corínto

¹ Lárigiñe cátei le, ába láfuridun Páblo Aténasgiñe, ába lídin ubúругu Corínto.

² Ñi ladárra ában juríu gíritu Aquíla, túma lúmari to gíriboun Priscíla, Póntona jagía. Málügili lueígiñe jayábin Itáliagiñe, jayábinbei ñígiñe ladüga líchugun urúei Cláudio dimúrei lun jáfuridun sun juríu Rómagiñe. Ába lídin Páblo aríjaña,

³ queíti ában lan lifísiute jáma—tadáawagun quiámpu—ába leréderun jáma lun jawádigimaridun lídan ában.

⁴ Ságüti wéyu le lidáani eméraguni, lídin Páblo tídan jalígílisin juríu adímureja, áni gáñei láaña buri dándu juríu quei ja mámabaña juríu lun jafíñerun luágu Jesucristu.

⁵ Dan jachülürün Sílas lúma Timotéo Macedóniagiñe, ába líchaagun Páblo lúngua le gumúti apúrichijeí Lerérun Búngiu. Aríñagati joun juríu furáangu luágu Jesúsú lan Cristubei le jagúrabajabei lun lasálbaruniña lídaangiñe jafígoun.

⁶ Ánjaña juríu, ába jasígeneruni le lubeíbei, anábagua buri jameí. Ábati láfurudunun Páblo labíte jawágun, arúfudei joun luágu mínsiñe lan jagáburi lun, ába laríñangun joun.

—Ánjaünme eféridira jídaangiñe, mámaalime nídaangiñeti. Lúmagiñe guetó, neíbuga apúrichija joun ja mámabaña juríu.

⁷ Ába láfuridun tídaangiñe jalígílisin juríu, ába lídin lúbiñoun ában wügüri gíriti Jústo, wügüri ligía, judúguati lun Búngiu, ñi toubagiñe ligílisi lagánawa.

⁸ Críspo, le tábuti jalígílisin juríu, ába lafíñerun luágu Wabúreme Jesucristu, jáu sun tílana lúban. Sarágu gíñe jádaangiñe Coríntona, dan jagáambunbalin ugánu luáguti Jesúsú, ába jafíñerun, ába jabásterún.

⁹ Ábati lasáliragun Wabúreme Jesúsú lun Páblo luágu ában árieibu, ába laríñangun lun.

—Manúfudebá, bapúrichija méme, mámanichabá,

¹⁰ ladüga anájein búma, úabei ni ában agúruruti buágu lun ladügün wuríbani bun. Añájein sarágu gürígia lídan ubúругu le ja lúnbaña nánigubaña lan.

¹¹ Reídeiti lubeíti Páblo ában irúmu dimí ñi Corínto arúfudajeí Lerérun Búngiu joun lílana fulásu.

¹² Lídán dan le Galión lan gumándanbei Acáya, ába jóundaragun juríu lun járügüdüni Páblo. Ába janügüni ligíbugiñoun lúrodu lun lagúserawagüdün.

¹³ Ába jaríñagun lun gumándan.

—Wügüri le, leréde arúfudaja joun gürígia lun jájuduragun lun Búngiu láu ában igáburi le múaraanbei lúma lúrodu.

¹⁴ Dán yebe ladímureja lan Páblo, ligía laríñagun Galión joun juríu.

—Lun jamúga ában lan wuríbani o dúru jürüti ladügübei wügüri le, níchaaguña jamúga núngua lun nagáambunün, jugúya juríu,

¹⁵ quei luágu lan dimúrei buri, lúma íri, lúma jilúrudun, aráanse jumeí júngua, ladúga mabúseeruntina nagúseragüdün luágu buri cátei le.

¹⁶ Ába labúgaguniña ñígiñe.

¹⁷ Ábati járügüdüni sun güríégugu Sóstenes le tábuti jalígilisin juríu, ába jabúleiseiruni ñi guánarügü ligíbugiñe gumándan. Mebéresegúnti Galión láu líra.

Lagíribudun Páblo Antioquíoun, lagúmeseruni lürüwan luweíyasun apúrichija

¹⁸ Lárigiñe líra, ába leréderun Páblo átiri dan ñi Corínto. Lárigiñe, ába layóuragun joun afíñetiña, ába lídin Síria úara túma Priscíla lúma Aquíla. Ába lásaruni lídiburi lídan ubúругu Céncrea lubáragiñe ládinun, lun lagúnfulirun láu ában méja darádu le ladügübei lúma Búngiu.

¹⁹ Dan le jachülürün ubúругu Éfeso, ába lígiruniña Páblo Priscíla lúma Aquíla lun jeréderun ñi lídan ubúругu ligía. Lubáragiñe lígiruni Páblo Éfeso, ába lídin ligílisirugu adímureja jáma juríu.

²⁰ Ába jamúriajan lúma lun leréderun méme ñi jáma, májati.

²¹ Ábati layóuragun joun, laríñaga joun.

—Mósu ñi nan Jerusalén lubá fédu le lúnbei ladügün, nagíribudayaba aríjaün ánjein busén Búngiu.

Ába ládinun, ába lídin Éfesogiñe.

²² Tüürüti Cesaréa, ñígiñe ába lídin Jerusalén abúsura joun tílana ligílisi, lárigiñe, ába larágachun Antioquíoun.

²³ Lárigiñe lásügürün átiri dan ñi, ábaya láfuridun, ába leíbuguni sun fulásu Galácia lúma Fríjia ában ában, íchaajeina dügüdaguaü joun afíñetiña.

Lapúrichijan Apólos ubúругu Éfeso

²⁴ Lídán dan ligía, ába lachülürün ában juríu gíriti Apólos ubúругun Éfeso, Alejandriana juríu ligía. Gapúrichijati, áni subúdi lumúti giñe Lerérun Búngiu buídu buídu.

²⁵ Subúditi luáguti Asálbaragülei le lúnbei liábin lun, áni apúrichijati luágu Asálbaragülei ligía táu sun tarúman lanígi. Sun le larúfudajabei luágu Jesúsu, inárüni, láu sun lougua lan lasúbudirun luágu, le rügüñein larúfudajabei Juan le abásteragüdajabei luágu Jesúsu le lúnbei liábin lárigiñe, lasúbudira.

²⁶ Luágu ában wéyu, dan le ladímurejaña lan Apólos tidan jalígilisin juríu láu sarágu ichóuruni, ába jagáambuni Priscíla lúma Aquíla. Dan lagúmuchun lapúrichijan, ába janügüni Priscíla luma Aquíla jábiñoun lun jafúnraanguagüdünitima luáguti Jesúsu le Wasálbaragülebei lun, luma luáguti cátei le larúfudajabei.

²⁷ Dánti le labúseerunbei Apólos lídin loubwagun Acáya, lúmagiñeñanu afíñetiña Éfeso lun lídin, ába jóúnajan ában gárada joun afíñetiña ja ñíbaña Acáya lun jerésibiruni buídu. Dan lachülürünbei Apólos Acáya, íderagua lumútiña ja lafíñeragüdübaña Búngiu luágu Jesúsu, láu lareíni,

28 arúfuda lumúti joun gürígia láu richaü le siñá jamuti asígena, luágu marícha lan le jarúfudajabei juríu, arúfudaleí joun tídaangiñe Lerérun Búngiu luágu Jesúsu lan Crístu le jagúrabubei lun lasálbaruniña.

19

Páblo ubúругu Éfeso

1 Sun niján lan Apólos ubúругu Corínto, ligía lásügürün Páblo labádinaguagiñe buri fulásu, ába lachülürün Éfesoun ñi lubeí ladárira sarágu afiñetiña.

2 Ába laríñagun joun.

—¿Resíbi jumútisan Sífiri Sándu dan le jafiñerunbei luágu Jesucrístu?

Jaríñaga lun.

—Uá, magáambungubeígidiwa yebe luágu níjein lan Sífiri Sándu.

3 Ábati laríñagun joun.

—¿Cáti luwúyeri badísei jerésibirubei?

Jaríñaga lun.

—Le labásterágüdün Juan.

4 Laríñaga Páblo joun.

—Labásterágüdüniña méja Juan gürígia, arúfudei luágu sáansi jamáli lan jouserun, aríñagati giñe joun luágu lúnti lan jafiñerun luágu le lúnbei liábin larigiñe—luágu Jesúsu le Crístubei, le Jasálbaragüle.

5 Dan jagáambuni cátei le, ába jabásterun lídan líri Wabúreme Jesúsu.

6 Dánti le líchugunbalin Páblo lújabu jawágu, ába liábin Sífiri Sándu jawágun, ában jadímurejan dimúrei buri teréncha, ába buri ladímurejan Búngiu jayúmulugugiñe.

7 Jawáaraañanu dúusu wügüriña jádan súngubei.

8 Ürüwañein játi láu Páblo abásija tídoun jalígilisin juríu le ñi lubeíja lapúrichija, adímureja ligíaja furáangu luágu larúejan Búngiu, afiñegüda láña gürígia luágu.

9 Ñiñanu giñe, edéreragüdütu janígi, májatiña jafiñerun, adímurejarügü jagía wuríba luágu lémeri Crístu jagíbugiñe gürígia. Ábati ladíreirun Páblo jaweí, ába lanügüniña ja afiñebaña luágu Jesucrístu tídoun ában lescuéla to ñi lubei larúfudaja ában wügüri gíriti Tiránno, ábaja ladímurejan ságü wéyu joun, ñi.

10 Ítara líña lasígirun luágu bián irúmu, súnti ja aganoúbaña loúbawagu Ásia, agáamba jamúti ugánu luáguti Wabúreme Jesúsu, dándu juríu quei ja mámabaña juríu.

11 Adügati buríti Búngiu oúnwenbun buri miláguru lídaangiñe Páblo,

12 dari lun tánügüniwa buri músue o anáanguni to dagáaru luágu lúra joun sánditiña, ábaja jareídagun, furí jagíaja espíritugu wuríbatiña jádaangiñe.

13 Ñiñanu juríu eíbugañajádügütiña, aságajatiña giñe espíritugu wuríbatiña jaweí gürígia, álugatiñá yebe jayúsuruni líri Wabúreme Jesúsu lun jaságajaniña, jaríñaga buri joun espíritugu.

—Gumádi numútibu lídan líri Jesúsu, le uágubei lapúrichija Páblo, lun báfuridun.

14 Ñiñanu sédü lirájüñü ában juríu gíriti Escéva, jábuti méja fádirigu, jádan ja adügübalin buri cátei le.

15 Níjein ában jadügüni, ába loúnabuniña espíritu wuríbati ligía.

—Subúdi numúti Jesúsu, subúditi giñe nun cátei lan Páblobei, ánjein jugúya, ¿cátaün?

16 Ába lachüragun wügüri le láubei espíritu wuríbati lúngua jawágun, gabáfuti sügü jáu súngubei, ába labúleiseiruniña buídu, ába jeíbaagun ñígiñe surúsu lúma láu buri bíti jawágu.

17 Agáamba jamúti sun ja aganoúbaña Éfeso cátei le, juríu jáma máma juríu, ába janúfudedagun, weíriti linébedun líri Wabúreme Jesúsu joun.

18 Sarágu gíñe buri jádaangiñe ja afiñerubaña, ába jayábin agúfeserei buri cátei wuríbati lé meja jadügübei,

19 sarágu gíñe buri jádaangiñe já meja gabíñarajadibaña, ába janügünun jalíburun buri, ába jágudunun jagíbugiñe súngubei. Dan jabájüdünbalin tebégi líburu buri tugúya, gebégitu quei buri dimí-san mílu murúsun seínsu le pláta.

20 Ítara líña abúrchagueína lan ugánu luáguti Jesúsu, arúfudeinaleí lubáfu lun lasáansiragüdüni jagáburi gürígia.

21 Lárigiñe sun cátei le, ába laráanserun Páblo lun lídin aríjaña afiñetiña Macedónia luma Acáya, lubá lasígiruni luweíyasun Jerusaléoun. Aríñagati gíñe luágu lárigiñe lanme lídin Jerusalén, lídiba lan gíñe Róma.

22 Ábati louñajan biáma jádaangiñe ja íderagubalin lubá, Macedónia, wügüríña jagía, Timotéo luma Erásto, ligía, ába leréderun átiriraüya dan Ásia.

Chagáguai ubúru Éfeso

23 Lídan dan ligía, ñíñein ában oúnwenbun achágaraguní Éfeso jaweígiñeti ja afálarubalin lémeri Crístu,

24 lídaangiñeti ában wügüri gíriti Demétrio, ladáawagun cátei láuti pláta lífísiutebei. Wügüri ligía, adáaguati tirájüñü ligílisi láu pláta to tilígilisin sándu to gíriboun Diána, belútiti sarágu seínsu joun ja ñadágimeinbaña lúma.

25 Ábati louñdaruniña ja ñadágimeinbaña lúma úara jáma ámu ja ñadágimeintiña ámu físiu le lenége jafísiute, ába laríñagun joun.

—Wügüríña, subúdi jumúti luágu ñulú lan wabágari láu físiu le,

26 agáamba jumáli, aríja jumeí ída líña lan lídin Páblo aríñaga luágu máma jamá búngiugu sándu ja jadügübaña wügüríña, áni gíbeeña gürígia jafíñeragüdün, mámarügü ya Éfeso, lídan gíñe líbe-ágei Ásia.

27 Ñóunguati cátei le, ladüga gayáraabei weféridiruni wabísínisin, gayáraabei gíñe teféridiruni tilígilisin búngiu Diána tuweírigun, ábame tanügün búngiu Diána to únoun jájuduragua sun gürígia Ásia lúma lídan sun ubou quei ni cáta.

28 Dan le jagáambunbalin cátei le, ába jagáñidun buídu, ába jagúaragun.

—¡Weírigutu Diána to jabúngiute Éfesona!

29 Ñíñeinti ában oúnwenbun achágaraguní lídan sun ubúru ligía. Ába járügüdüni Gáyo lúma Aristárco, biáma wügüríña Macedóniana ja úarabaña lúma Páblo, ába jadúruguduniña chülü tuágun múna to ñi lubeíja jóundaragua.

30 Álugatí yebe Páblo lebélorun lun ladímurejan joun gürígia ñi lun ladílorun sun cátei, mígirun jamúti afiñetiña lun lebélorun.

31 Ñíñanu gíñe jádaangiñe ábutigu ñi Ásia lumádagu Páblo, oúnajatiña gíñe dimúrei lun lun mebélorun lan ñíjin.

32 Ñíti lídan adámurini, jíbiri agúaragua ában cátei, jíbiri agúaragua ámu, ladüga chagágujaña gürígia, jibe-ágei, ibídiñeti joun ca lan lébubei jadámuridagun.

33 Ñíñanu jádaangiñe gürígia, ába jafúnraanguágüdüni cátei le lun Alejándro, le jádajabei juríu ligíbugiñoún guríriguaü lun ladímurejan luágu jafúleisein. Ába ladügün Alejándro seíni láu lújabu lun jámanichun, lun ladímurejan luágu jafúleisein jagíbugiñe gürígia.

34 Dan jasúbudirunbalin luágu juríu lan, ába jagúarajan sun jagía lídan ában, yaráfa lun bián óra.

—¡Weírigutu Diána to jabúngiute Éfesona!

³⁵ Dánti le gálumagüda láaña abürüjati le láni ubúru gu ligía gürígia, ába laríñagun.

—Gürígia Éfesona, sun gürígia subúdi jamúti luágu Éfesona lan oúnigirubárun tilígílisin búngiu Diána, túma tiyáwa to áburujaboun siélu giñe.

³⁶ Quei úa lan ni ában lun lasígeneruni cátei le, gáluma jumá, madüga jumá ni cáta masáminarunga jumei buídu.

³⁷ Wügüriña ja, ja janügübaña ñájoun, míwerujan jamá giru jilígílisin, madímurejan jagía wuríbati tuágu jubúngiute.

³⁸ Ánjein níjein lubei cátei uáguti labúseera Demétrio jáma ja ñadágimeinbaña lúma líchugun jadúnrun, ligía níjein lubei agúseragüdüti lúma agúseragülei, gayáraati jidin ligíbugiñoun lúru du lun ladímurejan cáda ában lueígiñegua.

³⁹ Ánjein ámu lubei cátei jamúriajabei, lúnti laráanserún lídan ában adámurini le richáti,

⁴⁰ ladüga gayáraabei laríñawagúniwa luágu wagúbujaña lan wuríbani ladüga cátei le asúseredubei ugúñe, ibídiñebei woun cába lan woúnabagüle ánjava álügüdüwa luágu chagáguaü le.

⁴¹ Lárigiñe laríñaguni cátei le, ába lagúmuchaguagüdüni adámuridaguni.

20

Luweíyasun Páblo Macedónioun lúma Grécioun

¹ Dan le lagúmuchunbei chagáguaü Éfeso, ába loúnajan Páblo jawágu afíñetiña lun jayábin lun, gayára lámuga líchugun gurásu joun, ábati loúburuniña, ába layóuragun joun, ába lídin Macedónioun.

² Luágu luweíyasun, chülügueina líña jámagiñe afíñetiña lídan buri fulásu le ídaangiñebei lásügüra, ru ligía sarágu dügüdaguaü joun láu lerérun. Ítara líña lachülürün lídoun ageíraü le Grécia.

³ Reídeiti ürüwa játi ñi Grécia, ládina yébe ugúnein lun lídin Síria, ligía lagáambun luágu jelédeguña lan juríu lubá. Ábagubeíti laráanserun lun lagíribudun múarugugiñe, sügüina ligíaya Macedóniagiñe.

⁴ Gíbetiña wügüriña ñüdüntiña úara lúma. Sópater, le liraü Pyrrhus, Beréagiñe, Aristárco lúma Segúndo, Tesalónicagiñe, Gáyo, Dérbegiñe, Timotéogiñe, lúma giñe Tíquico lúma Trófimo, Ásiana.

⁵ Afíñetiña ja, ába jóudin wabá, ába jagúrabuníwa ubúru gu Tróas.

⁶ Wagía, lárigiñe fédu le teigín fein to magánaboun ísi, ába wáfuridun Filíposgiñe tídan ugúnein, seíngü wéyu lárigiñe, ligía wátürün Tróas, le ñi lubei wúwarada jáma ja ñüdünbaja wabáragiñe, ába weréderun ñi sédü wéyu.

Bisída láni Páblo ubúru gu Tróas

⁷ Samúdi güñoun, ába jóundaragun afíñetiña lun jeígin fein le jarítaguagüle luágu loúnwen Crístu, Páblo arúfudajabei joun. Queíti gaweíyasúnbei lan larúgan, ába lasígirun adímureja joun darí lúmoun amídi áriebu.

⁸ Íñuñanu lídan lürüwan túbanana múna to ñi lubei jóundaragua, ñíñein sarágu lámpu durúngu.

⁹ Ñíñein ában irájü agáambaja, ñun líña luágu funédere, Eútico líribei. Queíti lílúbei lapúrichijan Páblo áriebu ligía, ába ladábudun lágu irájü ligía, ába larúmugun ñi, ába leíguadun lídaangiñe lürüwan túbanana múna, múarugun. Dan le jarárirunbei lun jiláali.

¹⁰ Ábati larárirun Páblo, ába laróunrun ligíbuagu irájü ligía, ába loúburuni. Ába laríñagun joun afíñetiña.

—Madíjeri jumá, gabágariyaali.

11 Ábayati lawárirun Páblo, ába jafánreinragunun fein, ába jeígin. Ábati lasígirun adímureja darí larúgadun, ligíaaali lídin.

12 Irájüti buga ligía, ába janügüni águyu wínwañu, sun jagía láu ugúndani láu.

Weíyaasu lúmagiñe Tróasgiñe lun Milétoun

13 Ába giñe woúdin, ába wádinun tídon ugúnein, ába woúdin chülü Asón, le ñí lubei lúnti lan wabúduni Páblo quei wadáradun, ladüga busén lan lídin Asón múarugugiñe.

14 Dan le wadúnragun lúma ñi Asón, ába ládinun wáma, ába woúdin Mitiléne.

15 Larúgan, ába wáfuridun ñígiñe, sügüina wagía ligíbugiñe ubóju Quío, ában wéyu lárigiñe, ligía wachülürün ubóju Sámos. Ába weméraagun ubúru Trojílio, larúgan, ligía wachülürün ubúru Miléto.

16 Mátürüntiwa ubúru Éfeso luágu waweíyasun ladüga mabúseerun lan Páblo leréderun sarágu dan ageíraü Asia, busénti lachülürün Jerusalén furése lun ñi lan lubá fédu le Pentecostés ánjein gayára.

Lapúrichijan Páblo joun tábutigu ligílisi, Éfeso

17 Dánti le Milétojadiwa, ába loúnajan Páblo jawágu tábutigu ligílisi Éfeso lun jayábin Miléto aríjei,

18 dan le jachülürünbei, ába laríñagun joun.

—Subúdi jumúti ída líña lan nigáburi lúmagiñe furúmiñeti wéyu nachülürün Ásioun.

19 Sun dan le jagánaguañadina lubeí, seríwitina lun Búngiu láu ünabuni, láu sarágu águiraü, súfuri áu sarágu láu cátei lé buri jabúseerubei juríu jadügün nun.

20 Merédeti napúrichijan jun luágu cátei le lúnbei buídubei lan jun, arúfudaja áu jun furáangu lídan guríriguaü lúma júbiñe.

21 Dándu joun juríu quei joun ja mámabaña juríu, aríñagaadina luágu lúnti lan jasáansiruní jóuserun ligíbugiñe Búngiu, lúma lun jafíñerun luágu Wabúreme Jesucrístu.

22 Guetó lubeíti neíbuga Jerusalén, loúnajan Sífiri Sándu. Ibídiñeti nun cába lan asúsereda nun ñi,

23 lé rügüñein nasúbudirubei, luágu sun lan ubúru le ñí lumuti nídin, aríñagati Sífiri Sándu nun luágu nadaürüba lan, nasúfuriruba sarágu, Jerusalén.

24 Úati ni cáta lídaangiñe áuti nebéresera, ni nibágari guánarügü, mebégitu ni cáta nun, adügarügü náali ligía le uágubei loúnajana Búngiu láu ugúndani darí lúmoun lagúmujoun, lun nadímurejani ugánu buíti luágu línsiñejabu Búngiu.

25 ‘Guetó, chóuru numúti luágu maríjindügüya láadina lan ni ában jídaangiñe, jugúya lé meja únbei napúrichija luágu larúeijan Búngiu.

26 Ligía naríñagunbei jun ugúñe luágu masándiragun nan núngua láu dúru lueígiñe ni ában jídaangiñe,

27 ladüga subúdigüda náali sun laráansejan Búngiu jun, marámuduntina ni cáta jueí.

28 Toúnigigua jumá lubeíti júngua, toúnigi jumáñame afíñetiña ja líchugubaña Sífiri Sándu lun jóunigiruniña, ja tánigu lilígilisin Búngiu, ja lagáñijabaña láu líta Liraü guánarügü.

29 Subúdi numúti luágu dánme lan nídin, jayábinba lan ámu áluga jagünrinchaguni jafíñen, quei lebélerun geígusi jádoun mudún áfaraguaña.

30 Ñíbaña jídaangiñe guánarügü, lubáragiñe jamúga jarúfudajani inárüni, jarúfudajabei iyéeni lun jafálaruniña afíñetiña.

31 Toúnigi jumá lubeíti, jarítagua jumeí luágu ürüwa lan irúmu náu ewéridijaün wéyuagu áriebu, ayájua buri áu.

³² ‘Guetóti, nidújeñu, derége numútün lun Búngiu lúma lun ugánu le luáguti línsiñejabu, le gabáfubei lun léredagüdüni jaffiñen lúma lun líchugun ubáraü jun siélu jádan ja derégeguáañabaña jóungua lun.

³³ Mabúseerun nágili ni liseínsun ni ában, ni lanáangun,

³⁴ lubáragiñe líra, subúdi jumúti luágu ñadágimein nan lun nibíjini le nemégeirubei lúma le jemégeirubei ja númabaña.

³⁵ Súnwandan narúfudajan jun luágu ítara líña lan luwádigimariniwa lun jíderawagún ja níjeinbei jemégeirun, luágu giñe lúnti lan laritawagún luágu dimúrei le laríñagubei Wabúreme Jesúsu dan le laríñagunbei. “Gúndaatimáati le íchugubei sügü láu le erésibirubei.”

³⁶ Lárigiñe laríñaguni Páblo cátei le, ába lájuduragun, ába layúmuragun lun Búngiu jáma súngubei.

³⁷ Ába jayájun súngubei láu igárigu, ába jóúburuni Páblo, ába jachúuruni.

³⁸ Jírutiñati ladüga laríñagun joun luágu maríjindügüya jamáali lánme. Ába jóúdin íchaajei tuágu ugúnein.

21

Luweiyasun Páblo ubúrugun Jerusalén

¹ Dan le wígiruniña afiñetiña, ába woúdin sügülügü lídoun fulásu le gíribei Cos, larúgan, ában woúdin Ródas, ñígiñe Ródasgiñe woúdin lun Pátara.

² Ñi Pátara wadárira ában ugúnein teíbuga Fenícia, ába wádinun tídoun, ába woúdin.

³ Dan wásügürün, ába waríjini ubouju le Chípre, ába wígiruni lueígiñe wabaüna, ába wasígirun darí wachülürün Síria. Queíti taráriguágüdüba lan ugúnein lídan ubúrugun le gíribei Tíro, ába warárirun ñi.

⁴ Áluaja wamútiña afiñetiña ja ñíbaña, ába weréderun sédü wéyu jáma ñi. Ába lawísaruniña Sífiri Sándu luágu lasúfuriruba lan Páblo Jerusalén, ába jaríñagun lun lun mídin lan.

⁵ Dan lásügürün sédü wéyu ligía, ába woúdin. Sun afiñetiña jáu jámarigu jáma jasáanigu, ñüdüntiña íchaajawa chülü bougudi luei ubúrugun, ñi béyabu ába wájuduragun ayúmurgua lun Búngiu.

⁶ Ábati woúburagun woúngua jáma, ába wádinun tídoun ugúnein, jagía, ába jagíribudun jábiñoun.

⁷ Ába wagúmuchi waweíyasun baránaja lúmagiñe ubúrugugiñe Tíro darí Tolemáida, le ñi lubei wabúsura joun afiñetiña, ába weréderun ában wéyu jáma ñi.

⁸ Larúgan, ába láfuridun Páblo wáma, wagía le lúmabei, ába wachülürün ubúrugun Cesaréa. Ñi woúdin lúbiñe Felípe le apúrichijabalin ugánu luáguti Jesucristu, ába giñe jádaangiñe sédü wügüríña já meja anúadajoúbaña Jerusalén lun jeténirun lun le jemégeirubei afiñetiña, ába weréderun lúma.

⁹ Gasáaniguti Felípe gádürü würíña irájüñü ja máfuridungiña, íbija jamúti ubáfu lúmagiñe Búngiu lun ladímurejan jayúmulugugiñe.

¹⁰ Átiri wéyu wáu ñi, ligía lachülürün ában proféta Judéagiñe, gíriti Ágabo,

¹¹ liábiña aríjawa. Ába lanügüni lubélitin Páblo, ába lagúraguni lugúdi guánarü lúma lújabu láu, ába laríñagun.

—Laríñajare Sífiri Sándu luágu ítara lúba lan jagúraguni juríu labúreme béliti le ubúrugun Jerusalén, ábame jedéregeruní joun ja mámabaña juríu.

¹² Dan wagáambuni cátei le, wagía jáma Cesaréana, ába wayúmurgun lun Páblo lun mídin lan Jerusalén.

¹³ Ába laríñagun Páblo.

—¿Ca uágu jayájua, írudagüdána? Aráansetina mámarügü lun nagürawagün Jerusalén, aráansetina darí lun noúnwen lueígiñe Nabúreme Jesúsu.

¹⁴ Quei siñá wamani larítangun agáñeira, ába wígiruni, ába waríñangun lun ladügüniwa lugúndan Búngiu.

¹⁵ Dan le gumújali webélujan ñi, ába waráanserun, ába wouúdin Jerusalén.

¹⁶ Ñüdütiña jádaangiñe afíñetiña wáma Cesaréagiñe, ñíñein ában Chíprena jádan, gíríti Mnasón, lüjali lueígiñe lafíñerun luágu Jesucrístu, lúbiñeba wagánawa.

Bisída láani Páblo Jacóbo

¹⁷ Dan wachülürün Jerusalén, ába jerésibiruníwa afíñetiña láu ugúndani.

¹⁸ Larúgan, ába wouúdin lúma Páblo aríjei Jacóbo, ñíñanu gíñe sun tábutigu ligílisi Jerusalén.

¹⁹ Ába labúsurun Páblo joun, ába labájüdaguni sun cátei le ladügübei Búngiu lídaangiñe joun, jádan ja mámbaña juríu.

²⁰ Dan le jagáambunbalin ugánu le, ába jadímurejan luágu luweírigun Búngiu. Ábati jaríñangun lun Páblo.

—Wadúje, aríjabásan, añájein sarágu mílu juríu afíñerutiña luágu Jesucrístu, áni sun jagía, aríñagatiña luágu lúnti lan lasígirúniwa lilúrudun Moisés.

²¹ Aríñawagúaaali joun luágu arúfudaja ban joun sun juríu ja aganoúbaña lídan jageíra ja mámbaña juríu lun madügün jamá gásu luágu lé meja laríñagubei Moisés, áni aríñaga bán nege joun lun merésibirun jamá jasánigu circuncisión, mafála jameíme wagáburi, wagía juríu.

²² ¿Cábasan wadúga? Joúndaragubátia juríu dánme le jasúbudiruni luágu chülüjadibu lan, lun jadügün wuríbani bun.

²³ Niján cátei le lúnbei badügüni. Añájein gádürü wügüriña ya wádan, gásu jagúnfulirun ában darádu lúma Búngiu.

²⁴ Barübaña búmagua, ábame barúmadaguágüdün búngua jáma ligíbugiñe Búngiu según wagáburi, wagía juríu, fáyeibeíme le jagástarubei lun jagúnfulirun lúma jádaradun, lárigiñeme gayáraajalíme jásaragüdüni jádiburi. Ítara lúba jaríjini sun juríu luágu iyéeni lan le aríñawagúbei joun buágu, gúnfulirügütibu lan gíñe lúma lilúrudun Moisés quei lubúdubu.

²⁵ Ánjeinti jawágu ja mámbaña juríu áni afíñejaña luágu Búngiu, abürüjaadiwa joun lun madíjeri jamá luágu buri cátei le, lúnrüğü meígin jamá úwi le dagágüdawaali joun sándu, ni jítaü, ni anímaalu le tigíwarügüti, lun gíñe úa lan ni ában agámariduti würi to mamárieduntu lúma.

Járügüdüni Páblo adáüra tídan témpulu

²⁶ Ábati lanügüniña Páblo gádürü wügüriña jagía, larúgan, ába larúmadaguagüdün lúngua jáma, ába lebélorun témpulurugun awísaja ídaba lan lagúmucha jawéyuri gádürü wügüriña jagía lun jarúmadun, léme lidáni jadágaragüdün cáda ában jádaangiñe lun Búngiu.

²⁷ Dan lé yebe yaráfaali lun lagúmuchun sédü wéyu ligía lubá lagúmuchun jarúmadun ligíbugiñe Búngiu, ába jaríjini jádaangiñe juríu Ásiana Páblo témpulurugu, ába jachágaraguágüdüniña gürígia. Ába járügüdüni Páblo,

²⁸ ába jagúaragun.

—¡Wügüriña Israelítagu, íderagua jumáwa! Niján wügüri le eíbugubalin sun fulásu arúfudaja joun sun gürígia wuríba luágu wanásiñun, luágu lilúrudun Moisés, lúma tuágu témpulu to, belúgüdaali gíñe gürígia ja mámbaña juríu témpulurugun awíyedei fulásu sándu le ligíbugiñe Búngiu.

29 Jaríñagunbei ítara ladüga meja jaríjini Páblo ubúругu lúma Trófimo le Éfesona, jarítaguatiñati luágu barülaani témpulurúgun.

30 Ába jachágaragun sun lílana fulásu, ába jayábin güriǵia eíbaagueina. Ábati jarügüdüni Páblo, ába jadúruguduní bougudin tueí témpulu, ába jadáuraguni béna furése.

31 Busénjaña yebe jáfaruni jilágubei, ligía lachülürün ugánu lun gumándan luágu chagágujaña lan sun lílana ubúругu Jerusalén.

32 Ábati loundaraguniña gumándan lisúdaaranigu jáma jábutigu, ába lachülürün eíbaagueina le ñíjin jabeí güriǵia. Dan jaríjini gumándan jáma súdaaragu, ába lásurun jabeíchuni Páblo.

33 Ábati layárafadun gumándan, ába lárügüdüni Páblo, ába lagüraguágüdüni láu bián güringüri, lárigiñe, ába lálügüdajan cátei lan, lúma ca lan lidúnrunbei.

34 Ámuñegueinarügüti cátei jaríñagun güriǵia, siñátiti gunfaráanda lan gumándan ni cáta ladüga ireíni le jadügübei, ába lanüggüdüni jábiñoun súdaara.

35 Dan le jachülürünbei luágu testépute múna, ába janügüni súdaara Páblo úyuajeina lueí jáfaruni güriǵia jilágubei,

36 ladüga jayábiña súnɡubei jarígi agúarajeina.

—jilála!

Ladímurejan Páblo lueígiñegua

37 Dan lé yebe jádaraali lan Páblo múnadoun, ába laríñagun lun gumándan le jáubei súdaara.

—¿Gayáraati nadímurejan búma?

Ába laríñagun gumándan lun.

—¿Geréngaditibu güriégu?

38 ¿Máma lubeí bugúya Ejíptona lé meja adügübei ában mabúchajaü luágu ában dan, ába lanügün gádürü mílu wügüriña gáfarajatiña lídoun fulásu mageírawaguti?

39 Laríñagati Páblo lun.

—Máma áu, juríu áu, Társona, ában fulásu weíriguti Cilícia. Adügabá fuleísei nun lun bígirunina lun nadímurejan joun güriǵia.

40 Ába líchugun gumándan üma lun, ába laráramun Páblo luágu estépu, ába líchugun seíni láu lújabu joun güriǵia lun jámanichun. Dan le manígaali, ába ladímurejan joun lídan hebréo, le jerérun juríu, ába laríñagun.

22

1 —Nidújeñu jáma jagübürigu, agáamba jumeí le lúnbei naríñaguni jun nueígiñegua.

2 Dan jagáambun ladímurejan joun lídan jerérun, ábatima jámanichaguágüdün. Ábati laríñagun joun.

3 —Juríu áu, le gumúti, ubúругu Társo loubawagu Cilícia nagüriajoúa, ya Jerusalén naweírda. Lábugiñe larúfudajan Gamáliel natúriaja, úarati larúfudajan lúma jalúrudun binádu wagübürigu. Jouchatina súnwandan lun nesériwidun lun Búngiu táu sun nanígi, queígubeirügü ligáburi jadügüni jugúya ugúñe wéyu.

4 Áu, eíbaaja numútiña meja lánigu Crístu darí náfaraguniña jilágubei, barügua áu wügüriña furísunrugun.

5 Geféenti fádiri íñutimaati jáu sun jábutigu juríu luágu rújama gárada nun joun wapaísanu ja Damáscobaña. Ñüdüntina ñi áluajaña afíñetiña luágu Crístu lun nanügüniña ñájoun lun nasúfuriragüdüniña.

Labájüdaguní Páblo luáguti lasáansiragun ligáburí

⁶ ‘Dan luáguñadina lubeí üma, yaráfaadina lun nachülürün Damáscó, queíburí amídirugu, sódini ligía ladúnraagun ában oúnwenbun larúgounga siélugiñe náu,

⁷ ába náburujan múarugun. Ába nagáambun laríñagun ában umálali nun. “Sáulo, Sáulo, ¿ca uágu beíbaajanina?”

⁸ Ábati naríñagun. “¿Cátabusan Nabúreme?” Laríñaga nun. “Jesúsu le Nazarétna áu, le méme beíbaajabei.”

⁹ Aríja jamúti ja úarabaña núma larúgounga ligía, ába janúfudedagun, magáambun jamúti lumálali le adímurejabei nun.

¹⁰ Ábati naríñagun. “¿Cábagi nadüga, Nabúreme?” Ába laríñagun nun. “Sarába, beíba luágu buweíyasun Damáscoun, ñíba laríñawagúa sun le lúnbei badügüni bun.”

¹¹ Queíti maríjingüda láadina lubeí buga larúgounga ligíra, ába járügüdüni ja númabaña nújabu darí wachülürün Damáscó.

¹² Ñiñein ában wügüri Damáscó gíriti Ananías, gúnfuliti buídu lúma lilúrudun Moisés, sun juríu ja aganoúbaña Damáscó adímurejatiña buídu luágu wügüri ligía.

¹³ Ába liábin Ananías aríjana, dan lachülürün, ába laráramun nubádu, ába laríñagun nun. “Nidúje Sáulo, ibíjayabei baríjin lárigoún.” Lídan méme óra ligía, ába léfegechun nágu, ába naríjini.

¹⁴ Ábati laríñagun nun. “Anúadaja láadibu Jabúngiute binádu wagübürigu lúmagiñe binárü lun basúbudiruni lugúndan, lúma lun baríjini Jesúsu le richáguabei, lun bagáambuni lumálali,

¹⁵ ladüga bíchuguba lan fe luágu Jesúsu joun sun gürígia, abájüdaguabeíme le aríja báalibei lúma le agáamba báalibei.

¹⁶ Guetóti, ¿ca uágu badárasaja? Sarába, badíseibá jeménigiñu luágu Wabúreme lun lachíbun bifígoun.”

Labájüdagun Páblo luágu loúnajoún apúrichija joun ja mámabaña juríu

¹⁷ ‘Dan nagíribudun ubúrugun Jerusalén, luágu ában wéyu dan le nídin témpulurugu ayúmuragua, ába lasáriragun Nabúreme Jesúsu nun,

¹⁸ ába laríñagun nun. “Furíba yágiñe Jerusaléngiñe, oúfuda, ladüga madügünbaña juríu gásu láu le baríñagunbei nuágu lídan fulásu le.”

¹⁹ Ábati naríñagun lun. “Nabúreme, subúdi jamúti luágu ñüdü nán buri méja tídan sun jalígílisin afíñetiña anáajaña ja afíñebaña buágu furísunurugun, beí buri náña.

²⁰ Dan le láfarúnbei Estéban jilágubei, le bánigu lé meja adímurejabei buágu, ñíñadina, gúndaatina láu jáfaruni, áu oúnigirubarun janáangun ja áfarubalín.”

²¹ Ába laríñagun Nabúreme nun. “Beíba, ladüga noúnajadibu díse, apúrichija joun ja mámabaña juríu.”

Páblo lújaburugu gumándan

²² Agáamba jamúti chülü lúmoun ladímurejan luágu lídin apúrichija joun ja mámabaña juríu, ába jagúmeserun agúaraja.

—¡Áfara jumeí jilágubei! ¡Maríchatí lun labágaridun!

²³ Queíti jasígirun agúaraja, achüjoun buri janáangun, achüja calíqui íñun le jagáñi,

²⁴ ába laríñagun gumándan lun ladarúniwa Páblo jábiñoun súdaara, ába loúnajan abeíchei lun ladímurejan, lun lasúbudirúniwa ca lan uágu jagúaraja gürígia luágu ítara.

25 Dan le gürágua jamáali lun jabeíchuni, ába laríñagun Páblo lun jábuti súdaara le ñíbei.

—¿Garíchatünsan lun jabeíchun ában wügüri Rómana, magúserunga ligía?

26 Dan le lagáambuni jábuti súdaara cátei le, ába lídin aríñaga lun gumándan.

—Toúnigibátia láu le lúnbei badügüni, Rómanatia wügüri le.

27 Ábati lídin gumándan luágun Páblo, ába laríñagun lun.

—¿Inárüni luágu Rómana ban?

Laríñaga Páblo lun.

—Ánja.

28 Ábati laríñagun gumándan.

—Fáyeitina sarágu seínsu lun Rómana nan.

Laríñaga Páblo.

—Ánjein áu, ñi nagüriajóua.

29 Ába jígiruni já yebe lúnbei jabeíchuni furése, liábin gíñe gumándan, dan le lasúbudiruni luágu Rómana lan Páblo, ába lanúfudedagun lueígiñe lagüraguni.

Páblo jagíbugiñe lúrudugu juríu ja íñutimáabaña

30 Larúgan, busénti gumándan lasúbudiruni ca lan lidúnrunbei Páblo jarúma juríu, ába lagídaruni güríngüri lueí, ába loúndaraguágüdüniña jábutigu fádirigu jáma lúrudugu juríu ja íñutimáabaña, ábati laságaruni Páblo, ába líchuguni jagíbugiñe.

23

1 Ába laríjin Páblo jawágun lúrudugu jagía, ába laríñagun joun.

—Nidújeñu, jarúmati nasándiragun núngua ligíbugiñe Búngiu chülü lúmoun wéyu le.

2 Ábati loúnajan Ananías, fádiri le íñutimaabei, lun jagáyuajan ja yaráfabaña ñi luágun liyúma Páblo.

3 Ába laríñagun Páblo lun.

—¡Lagáyuajaba Búngiu buágu, biángua tigíbu bugúya le! Ñun bíña ñi lun bagúseragüdüniña quei laríñaguni lúrudu, ¿cáti uágu bagáyuagüda nuágu, adúraaguei lúrudu?

4 Ába jaríñagun ja ñíbaña lun.

—¿Ítara liñásan banábuni fádiri le íñutimaabei le láni Búngiu?

5 Ába laríñagun Páblo.

—Nidújeñu, ibídiñetí yebe nun luágu fádiri lan le íñutimaabei, ladüga taríñajare Lerérun Búngiu. “Madímurejaanbadibu wuríba luágu ában agúmadijati bageíra.”

6 Subúdi lumúti Páblo luágu jánigu lan saduséogu jíbiri ja ñíbaña, jíbiri, jánigu fariséogu, ába laríñagun láu umálali jéreti.

—Nidújeñu, fariséo áu, jádaangiñetiña fariséogu nagübürigu, áni jagúseragüdüñadina ladüga affíñe nan luágu jásaaruba lan jiláaña lídaangiñe ouweni lúnya jabágaridun.

7 Dan le laríñagunbálin cátei le, ába jagúmeserun fariséogu jáma saduséogu asígeneja jámagua, ába lafánreinragun adámurini.

8 Ladüga jaríñajare saduséogu luágu másaarunbaña lan jiláaña lídaangiñe ouweni, úatiña nege gíñe ánjeligu, ni espíritugu, ánjañati fariséogu, affíñetiña luágu sun cátei le.

9 Jareínchati súngubei, ába jásaarun jádaangiñe arúfudajatiña lilúrudun Moisés ja ñíbaña, áni fariséogu gíñe jagía, ába jaríñagun.

–Wügüri le, úati ni cáta wuríbati ladüga, áni ánjeindügü ában lubei espíritu adímurejabei lun o ában lan ánjeli, touñigi wamátia luei wadárirún oucha weréderuni luwádigimari Búngiu.

¹⁰ Weírjiali sigénei darí lun lanúfudedun gumándan luei jáfaruni Páblo jilágubei. Ábati loúnajaniña lisúdaaranigu lun jaságaruni Páblo lídaangiñe adámurini lúnya janüğüni jábiñoun súaara.

¹¹ Le ában áriebe, ába lasáliragun Wabúreme Jesúsu lun Páblo, ába laríñagun lun.

–Manúfudebá, Páblo, ladüga ítara quei rújadibu lan fe nuágu ya Jerusalén, bíchuguba giñe fe nuágu, Róma.

Aráansejaní lun láfarúniwa Páblo jilágubei

¹² Larúgan, ába jebélurun juríu lídoun úarani lun jáfaruni Páblo jilágubei, ába jaríñagun láu íñaraguni ligíbugiñe Búngiu luágu meíginbaña lan, mátun jagíame ni cáta darí jáfaruni.

¹³ Jougiñe bián-wein wügüriña ja aríñagubalin cátei le.

¹⁴ Ábati jóudin jámoun jábutigu fádirigu lúma jámoun wügüriña weírigutiña jádan juríu, ába jaríñagun.

–Aríñagaadiwa láu íñaraguni luágu meíginbadiwa lan ni cáta darí wáfaruni Páblo jilágubei.

¹⁵ Guetóti, jugúya jáma ja jíbiri lúrudugu íñutimaatiña amúriaja jumá lúma gumándan lun lanüğüni jun jarúga, jaríñagame lun luágu lun lántima jálügüdüni luágu dúru le rúwaalíbei luágu jabúseera jaríjini. Wagía, aráanseñu wába lun wáfaruni lubáragiñe lachülürün.

¹⁶ Ába lachülürün cátei le lábun lagáambun tiraü lítu Páblo, ába lídin jábiñoun súaara asúbudiragüdei lun Páblo.

¹⁷ Ábati lagúarun Páblo lun ában jádaangiñe jábutigu súaara, ába laríñagun lun.

–Barübei irájü le lúmoun gumándan, níjein cátei lun laríñaguni lun.

¹⁸ Ába lanüğüni jábuti súaara lúmoun gumándan, ába laríñagun lun.

–Wáti adaürüti Páblo nun, ába lamúriajan núma lun nanüğüni irájü le bun ñájoun, níjein nege cátei lun laríñaguni bun.

¹⁹ Ába lárügüdüni gumándan lújabu irájü ligía, ába lanüğüni lun jábugua jamá, ába laríñagun lun.

–¿Ca babúseerubei baríñagun nun?

²⁰ Ábati laríñagun irájü ligía lun.

–Belújaña juríu lídoun úarani lun jamúriajan búma lun banüğüni Páblo jagíbugiñoun lúrudugu íñutimaatiña lún nege jálügüdünitima luágu lidúnrun.

²¹ Mafíñerabá joun, añájein jóugiñe bián-wein jawügüriña arámudagu jabá úmada agúrabajei lun jáfaruni jilágubei. Aríñagaaña láu íñaraguni ligíbugiñe Búngiu luágu meíginbaña lan, mátun darí jáfaruni Páblo, guetó aráanseñu jáña, jagúraba rügüñein bouñabagüle.

²² Ábati loúnajani gumándan irájü ligía águyu, aríñageina ligía lun lun maríñagun lan ni ca un luágu abájüdagua láali lan cátei le lun.

Loúnajoún Páblo lun gumádimati le Félix

²³ Ába lagúarun gumándan joun bián jádaangiñe jábutigu súaara, ába laríñagun joun lun jaráanserun bián-san súaara lun jóudin Cesaréa eíbu, úara jáma úrúwa-wein-díisi ja jawágutiña gabáyu, jáma bián-san ja táutiña efeín, lun jóudin ladaünrún néfu gúñoun.

²⁴ Aráansegdáti giñe gabáyu lun laweínjaniña Páblo, ru ligía dimúrei lun jachülüragüdüni Páblo lúmoun gumádimati Félix láu magádiei.

²⁵ Oúnajati ában gárada jáma, laríñajare tídan gárada tugúya.

²⁶ “Lúmagiñetu Cláudio Lisías lun gumádimati Félix le weírigubei, mábuga níña bun.

²⁷ Niján wügüri le, le noúnajabei bun, daüjamaali yebe juríu áni jáfaraali yebe jilágubei, dan le nasúbudirúnbalin luágu Rómana lan, ába nídin jáu nisúdaaranigu, ába neséfuruni.

²⁸ Queíti nabúseerun nasúbudiruni ca lan lidúnrunbei jarúma, ába nanügüni jagíbugiñoun lúrudugu juríu íñutimaatiña.

²⁹ Lidúnrun jarúma luáguti buri cátei le luáguti jalúrudun, úati iríchaü lun láfarún jilágubei, ni íbini lun ladaürün.

³⁰ Quei lachülürün lábun nagáambun luágu jaráansejaña lan juríu lun jáfaruni jilágubei, ligía lébubei noúnajani bun madárasajaanga. Aríñagaadina gíñe joun ja íchugubaña lidúnrun lun búma lan jaráanserei le jánibei lúma.”

³¹ Ábati janügüni súaara Páblo quei laríñawagúniwa joun, áriebu, chülü Antípatris.

³² Larúgan, ligía jagíribudun súaara ja eíbubaña, súaara ja jawágubaña gabáyu, ába jasígiruni jaweíyasun láu Páblo.

³³ Dan le jachülürünbei Cesaréa, ába jedéregerunun gárada lun gumádimati, derége jameí gíñe Páblo.

³⁴ Lárigiñe lalíjanun gumádimati gárada, ába lálügüdajan jalíana lan Páblo, dánti le lasúbudirúnbalin luágu Cilíciana lan,

³⁵ ába laríñagun lun.

—Nagáambubadibu dánme le jayábin ja íchugubaña bidúnrun.

Ábati líchugun dimúrei lun líchugúniwa Páblo tídoun palásiu tó meja lábunaguboun Heródes, jáu oúniri.

24

Ladímurejan Páblo lueígiñegua ligíbugiñe Félix

¹ Seíngü wéyu lárigiñe, ába lachülürün Ananías, fádiri le íñutimaabei, ubúrugin Cesaréa jáu wügüriña jádaangiñe juríu weírigutiña, lúma ában wügüri le subúdiabuti lun lúrudu, gíríti Tértulo. Ába jayábin lúmoun gumádimati lun jíchugin lidúnrun Páblo.

² Dan le lanügüniwa Páblo jagíbugiñoún, ába lagúmeserun Tértulo íchiga lidúnrun, laríñaga.

—Luágu bareíni, gumádimati, lüjadiwa láu darángilaü ya wageíra, buíti leíbugun sun cátei ya fulásurugu súnwandan lábugiñe lichú báu.

³ Ibíja wamúti sun le, áni teínqui wamútibu luágu.

⁴ Lun magídarun wamáni bidáani sarágu, amúriajatina búma lun badügün murúsun fuleísei woun lun bagáambuníwa luágu murúsun óra.

⁵ Niján wügüri le Páblo, beréseti, lerédera afánreinraguagüdaña juríu lídan sun fulásu, ligía gíñe ában jádaangiñe lichügüdinabei jadámurin nazarénugu.

⁶ Álugati gíñe lawíyedagüdünun témpulu ligíbugiñe Búngiu láu lebélaagüdün ában wügüri le mámabei juríu tídoun. Ába wárügüdüni, ába yebe wabúseerun wagúseragüdüni láu ligáburi walúrudun,

⁷ ába leméterun gumándan Lisías ñíjin, ába lagídaruni waweí láu érei,

⁸ ába laríñagun luágu ja lan íchugubaña lidúnrun lúnti lan jayábin búmoun. Gayáraati bálügüdaguni Páblo, subúdi bámugei inárüni luágu sun cátei le, le waríñagubei luágu.

⁹ Juríu buri ja níbaña, aríñagatiña gíñe luágu inárüni lan sun le laríñagubei Tértulo.

10 Ába ladügün gumádimati seíni lun Páblo lun ladímurejan, ában laríñagun Páblo.

—Lau sun nugúndan nadímureja nueígiñegua bigíbugiñe ladüga subúdi náani luágu lúmagiñe lan sarágu irúmu bagúseragüdajan lídan fulásu le.

11 Gayáraati bálügüdajan ánjein inárüni lubeí le lúnbei naríñaguni bun. Dúsurügügili wéyu lueígiñe nachülürün ubúrugun Jerusalén lun nájuduragun lun Búngiu,

12 madárirúnwatina asígeneja ni ca úma, ni achágaraguágüdaña gürígia témpulurugu, ni tídan buri tíbiri jalígilisin juríu, ni lídan buri ámu fulásu ubúrugun.

13 Gürígia ja, siñáti jarúfuduni luágu inárüni lan ni ában lídaangiñe sun cátei le jaríñagubei nuágu.

14 Ában cátei naríñagubei bun, luágu nesériwiduña lan lun Jabúngiute nagübürigu quei larúfudajani Jesucrístu, le uágubei jaríñaga luágu marícha lan. Afíñetina luágu sun le bürüwañubei tídan buri líburu to lánina lilúrudun Moisés lúma lé meja jabürüjabei profétagu.

15 Níjein giñe eménigini le jawágubei nuágu luágu Búngiu, luágu lásaaragüdübaña lan jiláaña, dándu ja buídübaña quei ja wuríbabaña.

16 Ligía náfaagunbei súnwandan lun madúnrun nan ligíbugiñe Búngiu lúma jagíbugiñe gürígia.

17 ‘Lárigiñe átiri dan náu eíbugei ámu buri fulásu, ába nagíribudun nageíroun lun nedéregerun seínsu joun gudémetiña Jerusalén lúma lun nadágaragüdün lun Búngiu.

18 Nadügüñein yebe cátei le témpulurugu lárigiñe narúmudaguagüdün núngua quei le igáburi, ligía jadárirunina átiri juríu loúbawaguna Ásia ñi témpulurugu, úatiña sarágu gürígia ñi, ni chagáguau.

19 Jagía lúnbaña jayábin arúfudagua jóungua ya lun jaríñaguni le lúnbei jaríñaguni ánjein níjein lubeí lúnti jaríñaguni nuágu,

20 jaríñaguni lan ja yábaña ánjein darí jabei nidúnrun dan le ligíbugiñe nubeí líñun-ágei lúrudu juríu.

21 Siñáti jaríñagun ni cáta nuágu, lueídügüya luágu lan ában wéyu dan le jádaañadina lubeí, ába nagúaragun aríñaga. “Jagúseragüdüñadina uguñe lueígiñe afíñe nan luágu jásaaruba lan jiláaña lídaangiñe ouweni lúnya jabágaridun.”

22 Subúsiti sarágu luágu larúfudajan Jesúsú lun gumádimati Félix, ítara líña, dan le lagáambunbalin le laríñagunbei Páblo luágu jásaarun jiláaña, ába lagúmuchaguagüdüni adámurini, aríñageina ligía.

—Nagúseragüdübei wügüri le dánme le lachülürün gumándan Lisías.

23 Ábati laríñagun Félix lun jábuti súdeara lun lasígirun Páblo daüwañu, lun furáangu lan lun gayára lan jóudin lumádagu aríjei, eténira lun.

24 Átiri wéyu lárigiñe, ábaya lachülürün Félix túma Drusíla to lúmari, to juríu, ubúrugun Cesaréa, ába lagúaragüdün luágu Páblo lun ladímurejan lun luágu Jesucrístu.

25 Dan le ladímurejaanbei Páblo lun luágu ibágari le surúbei, lúma luágu ágüdaagúni únguaü lueí le wuríbabei, lúma luáguti wéyu le lúnbei lagúseragüdüniña Búngiu sun gürígia, ába lanúfudedagun Félix, ába laríñagun lun.

—Beíba yebe, dánme le gadáani nan, nagúarayaba bun.

26 Agúrabatí yebe giñe Félix lun líchugun Páblo seínsu lun lun lígiragüdüni, ligía, dan méme lubeí wájali luágu lun layánujan lúma.

27 Sügüti bián irúmu ítara, ábati lagúmuchun lagúmadijan Félix, ába lárügüdüni Pórcio Féstó lufúlasun. Queíti busén lan Félix leréderun buídu jáma juríu, ába lígiruni Páblo daüwañu.

25

Páblo ligíbugiñe Fésto

¹ Ábati lachülürün Fésto lun lárügüdüní lufúlasun queísi gumádimati, ürüwa wéyu lueígiñe, ába lamúdeirun Cesaréagiñe lun ubúrugun Jerusalén.

² Ába jachülürün jábutigu fádirigu ñíjin jáma juríu ja weírigutimaabaña íchiga lidúnrun Páblo ligíbugiñe Fésto.

³ Ába jamúriajan fuleísei lúma lun loúnajan anügei Páblo Jerusalén. Le jaráansejanbei, lún yebe jáfaruni jilágubei luágu ũma.

⁴ Ába loúnabun Fésto luágu Cesaréa lan ladaürüwa Páblo, áni jarítagua lan lídin ñi madíse.

⁵ Ába laríñagun joun.

—Ligía lúnti lubei jóudin ja weírigutimaabaña jídaangiñe Cesaréa úara núma, áni ánjein adügaali lubei wügüri ligía dúru, gayáraabei jaríñaguni.

⁶ Wídü rügüñein o díisi lan wéyu láu Fésto Jerusalén, ába lagíribudun ubúrugun Cesaréa. Larúgan, ába lárügüdüní lufúlasun lun lagúseragüdün, ába loúnajan luágu Páblo.

⁷ Dan le lebélorunbei Páblo, ába jagúriridágun juríu ja ñübinbaña Jerusaléngiñe láu, ába jíchugun sarágu lidúnrun le jürüti, áni siñáti jarúfuduni luágu inárüni lan ni cáta lídaangiñe le jaríñagunbei.

⁸ Ábati laríñagun Páblo lídan ladímurejan lueígiñegua.

—Madügüngidina ni murúsun dúru ni lun jalúrudun juríu, ni tun témpulu, ni lun urúei César.

⁹ Queíti busén lan Fésto leréderun buídu jáma juríu, ába laríñagun lun Páblo.

—¿Buséntibu bídin Jerusalén lun nagúseragüdünibu ñi?

¹⁰ Ába loúnabun Páblo.

—Ligíbugiñeñadina lagúseragüle urúei César, le ñi lubei lúnti lan nagúserún. Queísi basúbudiruni buídu, madügüngidina dúru joun juríu.

¹¹ Ánjein adügaadina lubei dúru le garíchatí lun nafarún jilágubei lueígiñe, mebéresegúntina noúnwen, ánjein úa lubei ni cáta lánina inárüni lídan sun le aríñawagúbei nuágu, úati ni ában garíchatí lun ledéregerunina joun juríu. Amúriajatina lun César lan agúseragüdána.

¹² Lárigiñeti layánujan Fésto jáma lánigu cába lan ladüga láu Páblo, ába laríñagun lun.

—Amúriajaadibu lubeígia lun César lan agúseragüdabu, beíbugati lun César.

Páblo ligíbugiñe urúei Agrípa

¹³ Átiri wéyu lárigiñe, ába lídin urúei Agrípa túma Bereníce Cesaréa aríjei Fésto.

¹⁴ Quei reídei jabeí átiri wéyu ñi, ába labájüdaguni Fésto luáguti lagúserun Páblo lun urúei Agrípa, laríñaga lun.

—Níjein ában wügüri lígirun Félix dáüwañu ya.

¹⁵ Dan le Jerusalén nubeí, rútiña jábutigu fádirigu jáma wügüriña juríu weírigutiña lidúnrun nigíbugiñe, amúriajatiña núma lun nasíadiruni.

¹⁶ Ába naríñagun joun luágu magáburi láani lúrudu Rómána lun lasíadirun ában gürígia lun oúweni maríjina láña ja íchugubaña lidúnrun ligíbugiñe, lun gayára lan ladímurejan lueígiñegua.

¹⁷ Ligía, lídan lubei le jayábinbei ya úara núma, meféridirúntina dan, larúgan, ába nárügüdüni nufúlasun lídan agúseragülei, ába noúnajan luágu wügüri ligía.

¹⁸ Ja ñübinbaña lun jíchugun lidúnrun, maríñaguntiña ni cátei luágu lídaangiñe lé yebe uágubei narítagua.

¹⁹ Lé buri cátei le jaríñagubei luágu, luágu múaradun lán nege jáma luágu ligáburi jafíñen, lúma luágu ában nege wügüri gíriti Jesúsu —jiláti nege, laríñajare Páblo luágu wínwanya lán nege.

²⁰ Queíti ibídiñe lan nun cába lan nadüga lídan ában cátei líbe le, ába nálügüdüni Páblo ánjein busén lubei lídin Jerusalén lun lagúserún luágu cátei le ñi.

²¹ Quei lamúriajan lun urúeiba lan Augústo César agúseragüdeí, ába naríñagun lun lasígirun dáüwañu daríme gayára lan nouñajani lun Augústo César.

²² Ábati laríñagun Agrípa lun Fésto.

—Buséntina gíñe nagáambuni wügüri ligía.

Ába laríñagun Fésto lun.

—Bagáambubei jarúga.

²³ Larúgan, dan le jachülürünbei Agrípa túma Bereníce, ába jebélurun láu ouñwenbun uweíriguni múnadoun, jáma jábutigu súdaara jáma wügüriña weírigutiña ñi ubúrugü. Ába louñajan Fésto luágu Páblo,

²⁴ ába laríñagun.

—Urúei Agrípa, jáma wügüriña ja adámurigubaña wáma ya, niján wügüri le. adímurejaaña sarágu jádaangiñe juríu wuríba nun luágu, dándu Jerusalén quei ya Cesaréa, áni añájagua aríñaga nun láu sarágu éregu luágu lúnti lan louñwen.

²⁵ Laganouñ nun camá madügüngili ni cáta le lúnti lafarún jilágubei lueígiñe, áni queíti ligía guánarügü lan amúriajabei lun urúeiba lan Augústo César agúseragüdeí, nouñajaali lun.

²⁶ Queíti úa lan cába lan cátei uágu nabürüja lun Augústo luágu wügüri le, ligía nanügübalin jigíbugiñoun, bigíbugiñountimá urúei Agrípa, lun bálügüdaguni, niñein lámuga cába lan nabürüja.

²⁷ Ladüga garábaguati nun lun nouñajan ában adaürüti, mawísajaanga áu ca lan lidúnrunbei.

26

Ladímurejan Páblo lueígiñegua ligíbugiñe urúei Agrípa

¹ Ábati laríñagun Agrípa lun Páblo.

—Gayáraati badímurejan bueígiñegua.

Ába liñúruni Páblo lújabu lun jagáambuni, ába lagúmeserun adímureja, ába laríñagun.

² —Oúñwenbun nugúndan gayára lan nadímurejan nueígiñegua bigíbugiñe, urúei Agrípa, luágu sun cátei le aríñaga jamáalibei juríu nuágu,

³ gúndaatimáatina ladüga subúdi báni jagáburi juríu lúma cátei lé buri uágubei jasígeneja. Ligía namúriajanbei búma lun gagúraasun ban lun bagáambunina.

Labájüdaguni Páblo binádu libágari

⁴ ‘Subúdi jamúti sun juríu ligáburi meja nabágaridun jádan, nageíra lúma ubúrugü Jerusalén, lúmagiñe irájügídina.

⁵ Lúja jasúbudirunina, áni gayáraati jamúga jaríñaguni ánjaña jamúga busén luágu fariséo lan nugúya lúmagiñe niñúraü, adámurini létima derégüdabei lídan luwúyeri wafíñen, wagía juríu.

⁶ Guetóti, jagúseragüdüñadina luágu eménigini le nuágubei, luágu lásaaragüdübaña lan Búngiu jiláaña lídaangiñe ouñweni lúnya jabágaridun, quei meja laríñaguni joun binádu wagübürigu.

⁷ Dúusugubei família le jadügawagunbei lirájüñü Israél agúrabatiña jaríjini lagúnfulirun dimúrei le, ligía jájuduragunbei lun Búngiu, seríwi jameí wéyuagu, áriebu. Lueígiñe méme eménigini le, jadárira juríu nidúnrun, urúei Agrípa.

8 ¿Mafíñetün funági luágu gayára lan lásaaragüdüniña Búngiu jiláaña?

Labájüdagun Páblo luágu meja leíbaajaniña afíñetiña

9 ‘Nugúya guánarügü, jarítaguatina méja luágu lúnti lan neíbaajaniña ja afálarunbalin Jesúsu Nazarétna,

10 áni ítara líña nadügüni ubúruyu Jerusalén. Láu ubáfu le jíchugubei jábutigu fádirigu nun, dátina sarágu jádaangiñe lánigu Búngiu furísunrugun, áni dan lé buri jasíadirúniwa lun jóúnwen, nugúya ában jádaangiñe ja abúdujabaña lun ítara lúba lan.

11 Níjeinja dan, súfurigüda numútiña lún yebe jeyéedagun luágu jafíñen luágu Jesucrístu. Adáagua numúti meja cátei le tídan sun jalígilisin afíñetiña, áni weíríti meja nigáñi joun darí lun neíbaajaniña chülü lídoun buri ubúruyu le díseti.

Labájüdagunya Páblo luágu lasálbarun

12 ‘Ligía yebe cátei le gabügürübalina ubúrugun Damáscó ában dan, jóúnajan jábutigu fádirigu.

13 Luágu üma, nurúeite, amídirugu, ába naríjin ában larúgounga siéluigiñeti, jéreti sügü lau larúgounga wéyu, ába ladúnraagun geyégua náu jáu sun ja úarabaña núma.

14 Súngubei wagía, ába wáburujan múarugun, ába nagáambun ában umálali aríñaguti nun lídan hebréo, le jerérun juríu. “Sáulo, Sáulo, ¿ca uágu beíbaajana? Basúfuriraguagüdüñatia búngua láu bamánjarun nun quei ladüga bágasu dan le líchaagun quíqui luágun cátei gágiríti.”

15 Ábati naríñagun. “¿Cátabusan, Nabúreme?” Ába laríñagun nun. “Jesúsu áu, le guánarügü beíbaajabei.

16 Sarába, ráramabá, ladüga narúfudagunbei núngua bun lun besériwidun nun, lun geféen ban luágu le aríja báalibei guetó lúma le lúnbei narúfuduni bun.

17 Neséfurubadibu jaweí juríu lúma jaweí ja mámabaña juríu, ja únbaña nóúnajabu guetó.

18 Nóúnajañadibu jámoun lun béfegechagüdüni jágu nuágu, lun jebé lan jeíbugun lídan lubúriga, lun jeíbugun lídan larúgounga, lun gíñe meréde méme jamá lábugiñe lubáfu Máfia, lun lábugiñe jamá lubáfu Búngiu. Nóúnajañadibu joun, afíñe jamámuga nuágu, ferúduwawa lámuga jafígoun, ibíja jamámuga alágan jádan ja jarúmagüda láañabaña Búngiu láu jafíñerun nuágu.”

Labájüdagun Páblo luágu luwádigimari

19 ‘Ítara líña lubeíti, urúei Agrípa, ába nadügüni le laríñagunbei Jesúsu nun lídan le lasáliragunbei nun.

20 Furúmiñe, ába napúrichijan joun ja Damáscobaña, aríñagatina joun lun jaságüríjan luágu jafígoun, lun jagíribudun lun Búngiu, lun jadügün cátei buíti, arijúa lámuga luágu sáansiguaali lan jagáburi. Lárigiñe, ába napúrichijani cátei méme le joun ja Jerusalénbaña, ja mámabaña juríu.

21 Ligía lébubei járügüdüniña juríu témpulurugu, ába jálugun jáfarunina jilágubei.

22 Ába líderagunina Búngiu, ítara líña gayára lan nasígirun íchiga fe luágu Jesúsu lan Crístubei joun sun gürígia, dándu ja weírígubaña queísi ja únabugubaña, chülü lúmoun óra le. Maríñaguntina ni cáta joun gürígia bougudin lueí le uágubei jaríñaga Moisés jáma profétagu luágu lasúsereduba lan—

23 luágu lúnti lán meja lasúfuriruba lan Crístu, luágu lárigiñe lánme loúnwen, ligíaba lan furúmiñeti ásaaruti jádaangiñe jiláaña láu ibágari magúmchaditi, luágu gíñe líchugubei lan larúgounga luáguti asálbaruni dándu joun juríu quei joun ja mámabaña juríu.

Láfaagun Páblo lun lafñeragüdüni Agrípa luágu Jesucrístu

²⁴ Lídan le laríñagunbalin Páblo cátei le buri lídan ladímurejan lueígiñegua, ába lagúaragun Fésto.

—¿Lülüjaali báu, Páblo! Lülügüdá sarágu atúriajani báu.

²⁵ Ába loúnabun Páblo, ába laríñagun.

—Málülünti náu, gumádimati, inárüni le naríñagunbei.

²⁶ Niján urúei Agrípa le subúdiabubei lún buri cátei le buídu, ligía gayára lubei nadímurejan ligíbugiñe, furáangu, ladüga choúru náni luágu subúdi láani giñe sun cátei le asúseredubei lun Jesúsu, ladüga máma cátei le adügüti arámudaguarügü.

²⁷ ¿Afñetibu luágu le jaríñagubei profétagu, urúei Agrípa? Subúdi numúti luágu afíñe ban.

²⁸ Ába laríñagun Agrípa lun.

—¿Jarítaguatibusan luágu bafñeragüdübadina lan luágu Jesucrístu ítara ufúresen?

²⁹ —Furése yebe, o darása yebe, amúriajatina lúma Búngiu, mámarügü buágu, jawágu giñe sun ja añájabaña agáambana ugúñe, lun jayábin lun jafñerun quei nugúya, úouga güringüri jawágu.

³⁰ Lárigiñe laríñaguni Páblo cátei le, ába lásaarun urúei, sará giñe gumádimati úara túma Bereníce jáma sun ja ñúnbaña ñi,

³¹ ába jadíñurun ñígiñe lun jadímurejan luágu cátei le. Jaríñagatí buri jámagua.
—Wügüri le, madügünti ni cáta le lúnti lafarún jilágubei lueígiñe, moún lumuti ni íbini leréderun furísunrugu.

³² Ába laríñagun Agrípa lun Fésto.

—Lun jamúga mamúriajan lan wügüri le lun lagúseragüdüni Augústo César, gayáraati jamúga lígirawagüdü.

27

Loúnajoún Páblo ubúrugun Róma

¹ Lídan le jaráanserunbei lun joúnajaniwa Itálioun, ába ledéregerún Páblo jáma ja jíbiri adaürütiña lábu laríjin ában súaara gíriti Júlio, ligía gumándanbei lun jadámurin súaara le gíribei “lisúdaaranigu Urúei Augústo.”

² Ába wádinagun tídoun ában ugúnein ñübintu Adramítigiñe lun Ásioun. Ñíñein giñe Aristárco wáma, le Tesalónica, Tesalónica ában ubúrgu láni Macedónia.

³ Larúgan, ligía wachülürün Sidón, lídan fulásu ligía, buíti loúseruni Júlio, le gumándan, Páblo, ígira lumúti lun bisída lániña lumádagu lúma lun jeténirun lun.

⁴ Lídan wáfuridun Sidóngiñe, ába wouúdin ünabugiñe libíti ubouju Chípree ladüga wabánrouñein lan garábali.

⁵ Ába wájiñuraguni barána ligíbugiñe lubéyaari Cilícia lúma Panfília, ába wachülürün lídoun fulásu le gíribei Míra, ában ubúrgu láni Lícia.

⁶ Ñi ladárira gumándan ában ugúnein Alejandría teíbuga Itália, ába ládinagüdüniwa lun wasígiruni waweyasun.

⁷ Áfayajatiwa jámaru luágu sarágu wéyu, láu lénreengun wachülüra ligíbugiñe ubúrgu le gíribei Gnído. Queíti wabánroun mémegili lubei garábali, ába wáfayajan ünabugiñe libíti ubouju Créta, sügüina wagía ligíbugiñe Salmón,

⁸ wasígira láu méme lénreengun láru láru, ába wachülürün lídoun ában ubúrgu gíriti Buiti Fulásu, yaráfa lun ubúrgu Laséa.

⁹ Féridijadiwa sarágu dan, dénychajaliti áfayajani baránaja ladüga yaráfaali lidáani luríbouga, sügüjali jafédun juríu le lánina ferú dun figou. Ligía lewéridirunbaliña Páblo, laríñaga joun.

¹⁰ —Arija numúti luágu denchábei lan weíyaasu le, áni weféridiruboun ugúnein, féridime sun tíla, gayáraabei gíñe weféridiruni wabágari.

¹¹ Lubáragiñe ladügün gumándan gásu láu le laríñagunbei Páblo, ába lídin láu le lubeíbei tabúreme ugúnein lúma le abúgajabei.

¹² Queíti mabuídun lubeí fulásu ligía lun lásügürün luríba dan ñi, ába jarítangun jíbe-ágei luágu buídutima lán yebe lun wáfuridun ñígiñe, lun waríjin ánjein gayára wachülürün Feníce, ában fulásu láni ubouju Créta, lun wásügürüni luríbaniga ñi. Ñi Feníce, níjein barána lueígiñe núru lúma suédi.

Luríba dan baránaja

¹³ Queíti lagúmeserun suédi jámaru, ába jarítangun luágu gayáraabei lan jasígiruni weíyaasu, ábati joudin, ába jasígirun láru láru Créta.

¹⁴ Málüti lueígiñe jáfayarun, ába láfurun ában nodísi jéreti,

¹⁵ ába lagúmeserun abánrenjoun ugúnein. Queíti siñá lan wawáanserun lubároun garábali, ába wígiraguágüdün woúngua lun lanügüniwa.

¹⁶ Ába wásügürün ünabugiñe libíti ában liraüraü ubouju gíriti Cláuda, le ñi lubei mére lan láfujan garábali, ába wádinagüdünun tisálufun wagúne to atoujeina wabouñ, láu ában lénreengun.

¹⁷ Lárigiñe wiñúrunun ugúneirugun, ába lásügüragüdüniwa gúrudu tábugiñegiñe ugúnein lun jagúragunun, derébugu támuga. Queíti janúfudebei lueí joudin adágara luágu sándala le gíribei Síрте, ába jagídaraguní bíra, ába jígiraguagüdün joúngua lun lanügüniwa garábali.

¹⁸ Larúgan, quei jére mémegili lubeí dan, ába jagúmeserun achágajei tíla ugúnein baránajoún,

¹⁹ luágu lürüwan wéyu, ába jachágajani lídaangiñe tumégegung ugúnein baránajoún láu jájabu guánarügü.

²⁰ Maríjintiwa wéyu ni warúguma lídan sarágu wéyu, láuti oúnwenbun luríban dan le, féridi wamáali wafíñen luágu weséfuruba lan.

²¹ Queíti sügüjadiwa lubeí sarágu dan meíginga, ába laráramun Páblo wádan, ába laríñagun.

—Wügüriña, aríñagatiná yebe jun lun mayábin wamá Crétagiñe, buídutimaati jamúga lueí wasúfuriruni dáñu le, áni féridi wameí wálagu.

²² Gagúraasun jumá, úabei ni ában jídaangiñe ouweti, láu sun teféridiruba lan ugúnein.

²³ Chülüjali ában láni Búngiu ánjeli númoun áriebe to, loúnagüle Búngiu le Nabúreme le gíñe únbei nesériwida,

²⁴ laríñajare ánjeli ligía nun. “Manúfudedabá, Páblo, ladüga barúfudaguba búngua ligíbugiñe urúei César Augústo, áni badügaba leséfuraña Búngiu sun ja tídaanbaña ugúnein búma lueí ouweni.”

²⁵ Gagúraasun jumá lubeíti, ladüga jeménigitina luágu Búngiu, áni choúru numúti luágu ítara lúba lan quei laríñaguni ánjeli luágu nun,

²⁶ láu sun, wadágaruba lan luágun ában ubouju.

²⁷ Bián dimáasu wáu luágu waweíyasun, lubáranarugúñadiwa Ádria, labánreinja mémeñadiwa garábali, ligía, amídi áriebe, ába jasándirun mádulungu luágu achülüreina wáña lan luágun múa.

²⁸ Ába jamísurajani lujúlilin dúna, san-wein ugúdi lujúlilin, ábaya jamísurajan jabáruaguoun mémeraü, gádürü-wein-dísi ugúdi.

²⁹ Léti janúfude luei jabúguchun luágu dübü, ába jágurun gádürü oúnguru tiyúnagiñe ugúnein, ába jagúrabajan larúgadun láu idíjeri.

³⁰ Súnti dan le, añája mádulungu asáminara lun jeséfuragun joúngua láu jeíbaagun tídaangiñe ugúnein, ába jagúmeserun aráriragüdoún salúfu dúnarugun, jadüga camá jágura oúnguru tígirigiñe ugúnein.

³¹ Ába lawísaruni Páblo gumándan jáma lisúdaaranígu, laríñaga joun.

—Ánjaña meréde ja tídan ugúnein, jugúya siñábei jeséfurun.

³² Ábati jíbuguni súdeara tugúrudun salúfu, ába jígiragüdünun dúnarugun.

³³ Lubá larúgan, ába laríñagun Páblo joun súngubei lun jeígin, laríñaga joun.

—Bián dimáasu guetó lueígiñe marúmugun jumá buídu, meígin sarágu, ladüga idíjeri le juágubei.

³⁴ Ayúmuraguatina jun lun jeígin, líchuguba érei jun lun jeséfurun. Choúru numúti jun luágu úabei lan ni ában eféridiruti libágari.

³⁵ Lárigiñe laríñaguni Páblo cátei le, ába lanügün ában fein lújaburugu, ába líchugun eteíngiruni lun Búngiu jagíbugiñe súngubei. Ábati lagúbachagunun, ába leígin.

³⁶ Ába járügüdün ja jíbiri gurásu, ába giñe jeígin.

³⁷ Bián-sáñadiwa úrüwa-wein-dísi-sísi gürígia tídan ugúnein.

³⁸ Dánti le joujáña quimúle, ába jáguruni türígu baránajoun lúntima tawálidagun ugúnein.

Tabúluchun ugúnein

³⁹ Dan le larúgadunbei, ibídiñeti fulásu le ñí jabei mádulungu joun, ába jaríjin ában beídi gebéyaariti, ába joúchun lun janügünun ugúnein ñíjin.

⁴⁰ Ába jíbuguni lagürüga oúnguru, ába jígiruni baránaja, ába jasílacürüni fágaayu le esériwidubei lun jabúgurunun ugúnein. Ábati jaweínragüdüni lúgubu bíra, ába tagúmeserun ugúnein ayárafajoúa lun láru béya.

⁴¹ Ába tídin lídoun ában fulásu le ñí lubei biángua lan ébeeni, ába tadágarun, siñá lánjingichun tígiri ni murúsun, ába tagúmeserun abouchágu tiyúnagiñe, le lére lugúdi barána.

⁴² Ába yebe jabúseerun súdeara jáfaraguniña adaürütiña jilágubei luei janúrajan áfulijeina.

⁴³ Ánjein le gumándan, quei busén lubei leséfuruni Páblo, mígirunti lun jadügüni súdeara le jarítagebei. Ábati laríñagun lun lan jachúbaragun ja gáfulijadibaña baránajoun furúmiñe lun jachülürün múarugun,

⁴⁴ jáme jíbiri, jouúdinme ligíbuagu buri fuláansu lúma buri tífe ugúnein. Ítara líña jachülürün súngubei múarugun séfuñu.

28

Páblo luágu ubóju le gíribei Málta

¹ Dan le séfujadiwa sun wagía láru béya, ligía wasúbudiruni luágu Málta lan líribei ubóju ligía.

² Buíti jouseruniwa gürígia ja aganoúbaña ñi, ába jáfuragun ában oúnwenbun wátu quei dilíga lubei áni niján júya ájuya, ába jamísurajaniwa sun wagía lun wabácharagun.

³ Ábati labúdajan Páblo wátu mábeiti, líchuguñein yebe wáturugun, ligía táfuridun ában jéwe tanúraña luei lára wátu, ába tárügüdün luágu lújabu, ába tágürüni.

⁴ Dan le jaríjinbarun lílana fulásu jéwe to dawágu luágu lújabu Páblo, ába jaríñagun jámagua.

—Mósu ában lan wügüri gáfarajati wügüri le, láu sun leséfurun baránajagiñe, mabúseerunti Búngiu lun labágaridun.

⁵ Ába láfuridunun Páblo jéwe wáturugun, masúseredunti ni cáta lun.

⁶ Agúrabatiñá yebe súngubei láludun lújabu, o láburuan lan ouwe. Lílüwagu jagúrabajan, dan le jaríjinbei luágu masúseredun lan ni cáta lun, ába lasáansirun jarítangun, ába jagúmeserun aríñaga luágu ában lan búngiu Páblo.

⁷ Yaráfa lun fulásu ligía, ñíñein lufúlasun ában wügüri le weírigutimaabei lídan sun ubóju ligía, Públio líribei, resíbi lumútiwa lúbiñe, seríwi láwa buídu luágu ürüwa wéyu.

⁸ Roun liñáti lúguchi Públio láu sándi, abíruaü, lúma denési. Ába lídin Páblo aríjei, lásun layúmurangun lun Búngiu luágu, ába líchuguni lújabu luágu, ába lareídagun.

⁹ Lárigiñe lira, ába giñe jayábingua jíbiri sánditiña ja lídaanbaña fulásu ligía, ába jareídagun.

¹⁰ Ába jarúfuduni lubuídun jagáburi woun, edéweejatiña sarágu cátei woun, lárigiñe, dan le lachülürün dan lúnya wádinangun lun wasígiruni waweíyasun, ába jíchuguni sun le wemegeirubei woun lun waweíyasun.

Lachülürün Páblo ubúrugun Róma

¹¹ Lárigiñe ürüwa játi wáu luágu ubóju ligía, ába wádinangun tídoun ában ugúnein to eréderuboun ásügürei luríbouga ñi luágu ubóju ligía. Alejandríana ugúnein tugúya, ñíñanu jayáwa bián sándu luágu tigíbu ugúnein tugúya, Cástor lúma Pólux.

¹² Ába wachülürün ubúругu Siracúsa, ába weréderun ürüwa wéyu ñi,

¹³ ñígiñe wasígira láru láru darí wachülürün ubúругu Régio. Larúgan, ába láfujan suédi, luágu libíaman wéyu ába wachülürün lídoun liraüraü aüdü le gíribei Puteóli.

¹⁴ Ñi wadárira átiri afíñetiña, ába jamísurajaniwa lun weréderun ában dimáasu jáma, lárigiñe, ába wígiragüdün lun ubúrugun Róma.

¹⁵ Agáambaña afíñetiña ja Rómabaña wawágu luágu awánte lan, ába jóudin wabároun, jíbiri chülü lúmoun fulásu le gíribei Fóro, le luágubei üma gíriti Ápio, jíbiri, dúnguatiña wáma lídan fulásu le gíribei Ürüwa Jában Chülüdügütiña. Dan le laríjinbaliña Páblo, ába líchugun eteíngiruni lun Búngiu, ába lárügüdün gurásu.

¹⁶ Dan le wachülürünbei Róma, ába ledéregeruniña gumándan adaürütiña lun jábuti ónigirutiña, ánjeinti Páblo, ígira lumúti lun leréderun lábugua láu ában súdaara ónigirei.

Lapúrichijan Páblo Róma

¹⁷ Ürüwa wéyu lárigiñe lachülürün Páblo, ába loúnajan jawágu juríu weírigutiña ja Rómabaña, dan le adámuriguaña, ába laríñangun joun.

—Nidújeñu, láu sun madügün nan ni cáta wuríbatu joun juríu, ni lun le uágubei jéchuda binádu wagübürigu, derégawatina dáüwañu joun Rómana ubúругu Jerusalén.

¹⁸ Lárigiñe jálügdagúnina, álugatiñá yebe jígiragüdünina ladüga madári jamá nidúnrun le lúnti náfarúniwa jilágubei lueígiñe,

¹⁹ májatiña juríu lun nígirawagüdün, ába namúriajan lun urúeiba lan César agúseragüdána, láu sun madúnrun jamá ninásiñun nun.

²⁰ Ligía lubeíti lébubei noúnajan juágu lun naríjinün lúma lun nadímurejan jun, ladüga lueígiñe cátei le uágubei weménigida wagía Israelítagu anája lubeí gürágu láu güríngüri le.

²¹ Ábati jaríñangun lun.

—Wagía, merésibirúngidiwa ni ában gárada buágu Judéagiñe, úagili gíñe ni ában wapaísanu jádaangiñe ja nübinbaña ñígiñe aríñaguti wuríbati woun buágu.

²² Buséntiwa jamúga wagáambuni ca lan barítagebei, ladüga subúdi wamúti luágu adímurejoúa lan wuríba luágu iséri adámurini le, le lánina lémeri Jesúsu, lídan sun fulásu.

²³ Ábati jíridun ában wéyu lun, ába jachülürün sarágu gürígia le ñí lubei lagánawa Páblo. Ába ladímurejan joun lúmagiñe bináafin darí gúñoun luágu larúeijan Búngiu. Louchun lun lafiñeragüdüniña luágu Jesúsu lan asálbaragüleibe le jagúrabajabei láu layúsuruni lilúrudun Moisés lúma le jabürüjabei profétagu.

²⁴ Jíbiri, afíñetiña luágu le laráñagubei Páblo, jíbiri mafiñetiña.

²⁵ Queíti múaradun jamá jámagua luágu jarítageun, ába jagúmeserun ñüdüngua, ábati laráñageun Páblo joun.

—Ligía laráñageunbei Sífiri Sándu joun binádu wagübürigu lídaangiñe proféta Isaías.

²⁶ Beíba, baríñageun joun gürígia ja juríubaña.

Jugúya, jagáambuba ában ugánu sarágu dan, úabei gunfaráanda jumáni laníchigu dimúrei le jagáambubei.

Jaríjuba sarágu cátei, meféenbadün luágu,

²⁷ ladüga deréeru janígi gürígia ja, áni wuríbati jagáambun,

darú jamuti jágu, luei jaríjini laníchigu cátei le jaríjubei,

úati gíñe gunfaráanda jamáni cátei le jagáambubei,

derétu gíñe janígi,

máluajan jamútina lun nareídaguagüdünnun jawáni.

²⁸ Subúdi jumeí luágu oúnaja láali lan Búngiu ugánu luáguti Jesúsu le méme Wasálbaragüleibe joun ja mámabaña juríu, áni jagía, jánjaruba lun.

²⁹ Dan le laráñageunbei Páblo ítara, ába jóüdüngua juríu, adímurejeina jámagua luágu cátei le.

³⁰ Reídeiti Páblo bián irúmu dayáruti tídan lúban ájayajoútu, resíbi lumútiña sun ja ñüdümbaña aríjei.

³¹ Apúrichijati luágu larúeijan Búngiu láu furáangu, arúfudaja ligía luágu Wabúreme Jesucrístu, mebérésejanga ni ában lun.

LIGÁRADAN PÁBLO JOUN RÓMANA

Labürüjan Páblo joun títana ligílisi to Rómaboun

¹ Anája áu, Páblo, nabürüjañoun gárada to jun, jugúya lánigu Búngiu ja aganoúbaña ubúругu Róma. Aban esériwiduti lun Jesucrístu áu, anúadira lumútina Búngiu lun lánibadina lan apóstolu, ába loúnajanina lun nasúbudiragüdüni ugánu luáguti Wasálbaragüle le aráanse láalibei jaba gürígia.

² Sabúdigüda lumúti Búngiu ugánu le lúmagiñé meja binárü jádaangiñe profétagu, bürúwati le jadímurejabei tídan Lerérun Búngiu.

³ Nñubinti asálbaruni ligía woun lídaangiñe Wabúreme Jesucrístu. Gürígia ubouáguna Jesucrístu, Búngiu méme giñe. Queisi gürígia, jádaangiñeti meja lufámilian Urúei Davíd Jesucrístu,

⁴ arufudúati luágu Liraü lan Búngiu láu luweírin miláguru le ladügübei láu lásaaragüdüni Jesucrístu lídaangiñe ouweni.

⁵ Fuleísei lumútiwa Búngiu lídaangiñe Jesucrístu lun loúnajaniwa lídan líri lun wasúbudiragüdün joun gürígia luágu queísi Wasálbaragüle lídan sun fulásu, gayára lámuga jafiñerun luágu, adüga jameíme le lubeíbei.

⁶ Anjünjein jagánagua gürígia jagía, jugúya le únbei lagúara Búngiu lun lánigu jumá Jesucrístu.

⁷ Nabürüjaña lubeíti jun, jugúya le aganoúbei ubúругu Róma, ja jínsiñebaña lun Búngiu, wa ligía jun lun jabágaridun ában ibágari derégeguañu júngua lun. Ibíja jumá abíniruni lúma darángilaü lúmagiñe Wáguchi Búngiu lúma lúmagiñe Wabúreme Jesucrístu.

Busénti Páblo lídin Róma

⁸ Furúmiñeti cátei le nabúseerúbei jasúbudirun, luágu luweírin neteíngiruni Nubúngiute lídaangiñe Jesucrístu juágu, sun jugúya, lugúndun adímurejóuati luágu jafiñen luágu Jesucrístu lídan sun fulásu.

⁹ Áni Búngiu, le únbei nesériwida táu sun nanígi apúrichijei ugánu luáguti Liraü, geféenti luágu luweírin nayúmuragun juágu súnwandan lídan nayúmuragun lun.

¹⁰ Amúriajatina lúma Búngiu súnwandan lun madísebei lan wéyu ligía lun gayáraabei lan nídin aríjaün, ánjein ligía lubeí lugúndaanbei.

¹¹ Lugúndun buséntina naríjinün lun níderagunün lídan jafiñen, lúntima derégüdagu jumá,

¹² lun giñe wíchugun gurásu wádaangua láu affíñeni le wawágubei.

¹³ Nidújeñu, buséntina jasúbudiruni luágu álugaadina lan nídin aríjaün sarágu weíyaasu, siñágili nídin. Álugaadina nídin lun níderagunün lídan jawáanserun lídan jeíbugun lúma Búngiu, queísi naríjini jawáanserun jíbiri affíñetiña lídan buri ámu fulásu.

¹⁴ Lúnti níderaguniña sun gürígia, dándu ja chülüguatiña queísi ja machúlaaguntiña, dándu chu táu queísi ibídiougua táu.

¹⁵ Lueígiñe lubeíti noubadina, buséntina giñe lun napúrichijani ugánu luáguti Wasálbaragüle jun, jugúya le aganoúbei ubúругu Róma.

Lubáfu ugánu lánina asálbaruni

¹⁶ Úati nibúsigari nan láu ugánu luáguti Wasálbaragüle, lugúndun níjein lan lubáfu Búngiu lídan ugánu ligía lun lasálbaruniña sun ja affíñebaña luágu, juríu furúmiñe, lárigiñe, ja mámabaña juríu.

17 Arúfuda lumúti ugánu ligía woun ída líña lan larícharaguagüdüniña Búngiu gürígia ligíbugiñe, lun gayáraabei lan lerésibiruniña queísi lánigu. luwúyeri igáburi ligía, láurügü lafíñerúniwa luágu, libijúa. Ítara líña taríñaguni Lerérun Búngiu. “Le gürígia le richáguabei ligíbugiñe Búngiu láu lafíñerun luágu, libíjubei ibágari magúmuchaditi.”

Jadúnrun gürígia ligíbugiñe Búngiu

18 Aríja wamúti láburuan lanárime ligáñi Búngiu siélugiñe jawágun sun gürígia ja wuríbabaña, jáma ja minébenejabubaña lun, ja mígirunbaña lun lasúbudirúniwa linárün Búngiu, lurúma jaríban.

19 Subúdi jamúti le gayáraabei lasúbudirúniwa luágu Búngiu buídu buídu lugúndun ligía guánarügü arúfuda láali joun,

20 le marijínbei luágu Búngiu, gayáraati lasúbudirúniwa láu buri cátei le ladügübei. Arijúaaali furáangu lúmagiñe lagúmeserun ubouú luágu Búngiu lan ligía, luágu gíñe Súnti Gabáfu lan ligía lun súnwandan. Gadúnrunjaña lubeíti luágu jaríban,

21 lugúndun láu sun subúdi jamáni Búngiu ítara, míchugugiña inébesi lun queísi Búngiu, meteíngirun jameí. Queísi libídiouniga láu ligáburi jarítangun luágu Búngiu, féridi jamúti murúsun larúgounga luágu Búngiu lé meja jabíjibeí.

22 Láu sun aríñaga jamá luágu chu lan jáu, ibídiouguati jáu,

23 lubáragiñe jájuduragun lun Búngiu le weírigubei, le mouwedadibeí, jájuduraguágu joun jayáwa gürígia ja goúwedaditiña, lúma gíñe joun jayáwa dunúru, jéwe jáma anímaalu ja gádürügua tugúdi.

24 Ligía ígira láaña lubeí Búngiu láu luríban ayúmajani le gádaanbaliña, darí lún buri jadügün cátei buri nibúsigarídünati jámagua.

25 Ítara líña ligáburi jabágaridun lugúndun mafíñerun jamá luágu inárüni luáguti Búngiu, jafíñera luágu iyéeni, jájuduragua láu inébesi lún buri cátei le ladügübei Búngiu lubáragiñe jamúga jájuduragun lun Búngiu, le gadúnabei inébesi súnwandan. Ítaralá.

26 Ligía ígira láaña lubeí Búngiu lun jadáagun cátei nibúsigarídünati, ásta würíña adáagutiña cátei jáma würíña jáledi lubáragiñe jamúga jagámaridun wügüri queísi lubúdubu.

27 Ítara méme gíñe ígira jamáali wügüriña jayúsurun würíña lun jayúsuragun jóungua. Adáaguatiña wügüriña cátei buri nibúsigarídünati jámagua, ábati jasúfuriruni lafáyeiruaja jawíye jawouúgua.

28 Queísiti mabúseerúnjaña lan jíchuguni lilúgaarun Búngiu lun, ígira láañati láu lagübüri jasáminan, lun jadügüni le mouñ lubei jadügüni.

29 Buin jáña láu sun luwúyeri maríchaü, salúfuri, wuríbani, meménijabuni, iyéreejabúni, gimúgaü, áfarajadi, lanígiwa wuríbu, ayéeraguní, ibíbuni, marásualugu.

30 Adímurejatiña wuríba jawágu jíbiri gürígia, iyéreeguti Búngiu joun, minébenejabutiña, barüguatiña jóungua, pántatiña. Gachügütiña lun jaságarun iséri buri cátei wuríbati, mabájüdün jamútiña jagübürigu,

31 ibídiouguati jáu, magúnfulirun jamúti jerérun, mínsiñejabutiña ni ca un, úati ferúduna jamá, magúdemejaabutiña.

32 Subúdi jamúti le laríñagubei Búngiu buídu buídu, subúdi jamúti luágu ja lan adügütí buri cátei le, lúnti lan jóunwen lueígiñe. Láu sun líra, adúga méme jamúti, darí lun gúnda jamá dan l jasáminan, lun jadügüni lee jaríjin ámu gürígia adúgei.

2

Agúseragüdáti Búngiu láu inárüni

¹ Ligía gadúnrun lubeí le adímurejabei luágu le ladügübei ámu, cáteiñein lan, lugúndun dan le ladímurejan luágu wuríbani le ladügübei ámu, líchuguña guánarügü dúru luóúgua, lugúndun líbe méme gíñe cátei wuríbati ligía ladügübei.

² Subúdi wamúti luágu láu lan inárüni lagúseragüda Búngiu dan le lasíadiruniña ja adügübalin buri cátei l jasáminan, lun jadügüni lee.

³ Bugúyati le adímurejabei jawágu ja adügübalin buri cátei wuríbati le, áni ligía méme gíñe badügübei, ¿jarítaguatibu funági luágu beséfuruba lan lueí ligáñi Búngiu?

⁴ ¿Ódi mebésentibu láu lareíni Búngiu le magúmuchadibei lúma lugúraasun, ibídiñounga bun luágu arúfuda láani Búngiu lareíni bun lun gayáraabei lan basáansiruni bigáburi, máma lun basígirun afígounja?

⁵ Derétu banígi, májatibu basáansiruni bigáburi. Ligía abúnja lubeí agánwoundagüda lafáyeija bifígoun lubáme luwéyuri lagúseragüdün Búngiu dánme liábin lun líchuguni lisíadin le richábei,

⁶ dánme le lafáyeiruni cáda ában según le ladügübei.

⁷ Líchuguba ibágari magúmuchaditi joun ja áluajabalin uweíriguni, inébesei, lúma cátei lé buri magúmuchaditi yágüta siélu láu jadügüni le buídubei súnwandan ya uboúagu.

⁸ Ánjaña sun gürígia ja magáambadibaña lun Búngiu, ja májabaña lun jafálaruni linárün Búngiu, jafálarei wuríbani, lafáyeirubaña Búngiu láu sun ligáñi.

⁹ Níjeinbei asúfuriruni lúma igárigu joun sun ja adügübalin le wuríbabei, joun juríu furúmiñe, lúma gíñe joun ja mámabaña juríu.

¹⁰ Ánjeinti joun sun ja adügübalin le buídubei, líchuguba Búngiu uweíriguni, inébesei, lúma darángilaü, juríu furúmiñe, lúma gíñe joun ja mámabaña juríu.

¹¹ Lugúndun ában lan lanügüniña Búngiu sun gürígia.

¹² sun ja afígounjabaña masúbudirunga jameí lilúrudun Búngiu le ledéregerubei joun gürígia lídaangiñe Moisés, jagúserawagüdüba boúgudin lueí lúrudu ligía, tídiba jawáni máfiougatin. Játi afígounjabaña láu sun subúdi jamáni lilúrudun Búngiu, jagúserawagüdüba láu lúrudu ligía, tídiba gíñe jawáni máfiougatin.

¹³ Lugúndun máma ja agáambarügübalin lúrudu richáguabaña ligíbugiñe Búngiu, anáti ja agúnfulirubalin.

¹⁴ Játi mámabaña juríu, ja ibídiñejabubaña lun lilúrudun Búngiu, gayáraagili jadügüni le lubeíbei Búngiu láurügü laríñagun jarítagun guánarügü joun luágu le buídubei lúma le wuríbabei.

¹⁵ Láu jagáburi, arúfuda jamúti luágu níjein lan lilúrudun Búngiu bürüñu tídan janígi, arúfuda tumúti janígi líra, áni laríñagubei jarítagun joun ánjein gadúnrun jabei lúmoun madúnrun jamá.

¹⁶ Luágume wéyu le lagúseragüdüniña Búngiu sun gürígia lídaangiñe Jesucrístu, larítaguba luágu sún buri cátei le, ladüga lagúseragüdübei gíñe ásta cátei lé buri arámudagúabei tídan wanígi. Ítara lúba según ugánu luáguti asálbaruni le napúrichijabei.

Juríu lúma lilúrudun Moisés

¹⁷ Ánjein bugúya le pántabei luágu juríu ban, luágu bárügüdün luágu lilúrudun Moisés lun basálbarun, luágu Búngiu lan le inárüni Bubúngiutebei.

¹⁸ Subúdi bumúti lugúndan Búngiu, áni arúfudajati lilúrudun Moisés bun lun banúadajani cátei le buídutimaabei.

¹⁹ Jarítaguatibu búngua luágu gayára lan badúndejan maríjintiña lídoun ũma buíti lúma luágu gayára lan bíchugun larúgounga joun ja eíbugubaña lídan lubúriga.

²⁰ Jarítaguatibu luágu gayára lan barúfudajan joun ibídiougua táu luágu Búngiu, lúma lun barúfuduni ũma joun ja isérigiñabaña lídan jafíñen, queísi barítangun luágu ibíja báani sun subúdi lúma inárüni lídan lilúrudun Moisés.

²¹ Wel, ánjein lubeíti arúfudaja bubeí joun ámu, ¿cági uágu marúfudajan bubeí bun guánarügü? Ánjein apúrichija bubeí luágu lúnti lan míwerujoún lan, ¿cági uágu bíweruja?

²² Ánjein aríñaga bubeí luágu moún lumuti lan jagámaridúniwa jámari gürígia maríeitiña, ¿cámegi badügei? Ánjein iyéreegu lubeí cátei lánina sándu bun, ¿cámegi bádaragua búngua lídoun buri cátei jánina sándu láu bíwerujani tirísin jalígilisin?

²³ Pántatibu láu lilúrudun Búngiu, ába bíchugun minébesi lun Búngiu láu magúnfulirun báani.

²⁴ Tinárün Lerérun Búngiu dan le taríñagunbei. “Jídaangiñeti, jugúya juríu, jadímurejanbei ja mámabaña juríu wuríba luágu Búngiu.”

²⁵ Adüga jumúti jugúya juríu igáburi le circuncisión lé meja liseíni lidáradun Búngiu jáma lánigu. Buíti igáburi ligía ánjaün agúnfulira lúma líbiri lilúrudun Búngiu lé meja líchugubei joun lánigu lídaangiñe Moisés. Ánjein magúnfulirun jumá, manügünti circuncisión ni cáta jun, queígubeirügü madügüniwa lan.

²⁶ Gürígia ja mámabaña juríu, ánjein jadüga buri cátei le lubeíbei lilúrudun Búngiu, janügüba queísi lánigu Búngiu láu sun merésibirun jamáni circuncisión.

²⁷ Gürígia ja merésibirubalin circuncisión, ába jagúnfulirun lúma lilúrudun Búngiu, jarúfudunbei jidúnrun, jugúya le resíbi jumáalibei circuncisión, ja magúnfulirunbalin Lerérun Búngiu, láu sun jun lan labürüdüwa.

²⁸ Le juríubei le tímatimaati, máma bougudigiñerügü libíti juríu lan, máma gíñe láurügü wadügün cátei le bouguditi wabíti lánigu wamá Búngiu.

²⁹ Láu wafálaruni Búngiu táu sun wanígi, lánigu wagía le tímatimaati, wafaaguba táu sun wanígi lun wadügüni lugúndan, lugúndun ni cáta circuncisión lun Búngiu. Ítara líña lubeíti, gürígia le lánigubei Búngiu tídaangiñe lanígi, ligía buídubei ligíbugiñe Búngiu íbini jarítangun gürígia luágu mabuídun lan.

3

¹ Queísi ítara líña lubeí, ¿jalíañeinti jagáñiragüle gürígia lueígiñe juríu jamá? ¿o cági lubuíduña lerésibirúniwa circuncisión?

² Sarágu, áni gíbeti gíñe lébuna. Furúmiñeti cátei, rúlumuti Búngiu lerérun joun juríu.

³ Ánjaña ñi jádaangiñe juríu, múaraantiña lúma Búngiu, ¿magúnfulirunbei funági Búngiu láu lerérun ladüga líra?

⁴ ¡Máma líña! Lubáragiñe líra, lagúnfuliruba Búngiu láu lerérun láu sun yé jama sun gürígia ubouágu. Taríñajare Lerérun Búngiu.

Babájüdüba queísi richáti lídan le baríñagubei, áni buídubei báfuridun dánme le bagúserawagüdü.

⁵ Ábanya álügüdajani. ánjein seríwi lubeí luríban wagáburi lun larúfuduni luágu richágua lan Búngiu, ¿cábagi waríñaga? ¿Maríchati funági Búngiu lugúndun larúfuduni ligáñi luágu luríban wagáburi? (Nadímurejañatia queísi gürígia.)

⁶ ¡Máma líña! Lugúndun lun jamúga múaran lan Búngiu, ¿ída líña jamúgagi lagúseragüdüniña gürígia?

⁷ Ánjein gíñe seríwi lubeí wayéeni lun weírigutimá lan linárün Búngiu, ¿cáti uágu laríñawagúa wawágu luágu gafígoun wamá?

⁸ ¿Lúnti lubeí jamúga ladügün wuríbani lun larijóuniwa le buídubei? Niján cátei le jaríñagubei sarágu gürígia luágu ligía lan warúfudajabei. Gürígia ja aríñagubaña ítara, lúnti jamúga jasiadirúniwa.

Sun wagía gadúnruntiwa ligíbugiñe Búngiu

⁹ ¿Ída liñági? ¿Buítimaatiwa wagía juríu sügü jáu gürígia ja mámabaña juríu? ¡Uá! Lugúndun arúfuda wamáali luágu dándu lan juríu queísi máma juríu lábugiñeñanu lubáfu figou.

¹⁰ Taríñajare Lerérun Búngiu.

Úati ni ában gürígia richáguati ligíbugiñe Búngiu, ni íbini ábanrügü,

¹¹ úati ni ában ánjaruti lun gunfaráanda lan,

úati ni ában áluajati Búngiu.

¹² Yuríguaaña súngubei, ñüdüñaña lídoun féridi.

Úati ni ában adügüti le buídubei, ni íbini ában.

¹³ Eyéeraguatiña láu jayúma,

júnren líña jayúma lun jadímurejan lagübüri dimúrei le mínsiñeguti

queísi limínsiñegun líjeme umúajaü júnren lárigiñe líchugúniwa jiláali ñíjin.

Yúsu jamúti jayúma lun jagádeirun jíri gürígia furése queísi láfarajan lupeísini jéwe.

¹⁴ Anábajani rügüñein jadímurejan lau jeyéreejabu.

¹⁵ Furéseti jagúdi lun jóudin áfaraja.

¹⁶ Barüti jagáburi gürínguaü luma igárigu,

¹⁷ áni ibídiñeti üma lánina darángilaü joun.

¹⁸ Marítagungubeítiña luágu lanúfudewa lueí Búngiu.

¹⁹ Subúdi wamúti luágu sun lan le laríñagubei binádu lilúrudun Búngiu, joun lan ja lábugiñebaña lúrudu ligía laríñagei, lun jasúbudiruni gürígia jagía luágu gafígoun jamá. Ítara líña lubeíti, gadúnrun jamá sun gürígia ligíbugiñe Búngiu, dándu juríu queísi ja mámabaña juríu.

²⁰ Lugúndun úabei ni ában eréderuti richágu ligíbugiñe Búngiu lueígiñerügü ladügüni le lubeíbei lúrudu, lúnrügü lasúbudiragüdüni lúrudu woun luágu gafígoun wamá lesériwida.

Lídaangiñe afíñeni liábin asálbaruni

²¹ Guetóti arúfuda láali Búngiu woun ída lúba lan ligáburi gayára lan weréderun richáguañu ligíbugiñe bougudin lueí lúrudu lé meja líchugubei lídaangiñe Moisés. Gayáraati wasúbudiruni líra láu walíjanun lilíburuna to meme lilúrudun Moisés, túma jalíburun profétagu.

²² Láu wafíñerun luágu Crístu, gayára lan weréderun richáguañu ligíbugiñe Búngiu, áni ában lan ladügüni Búngiu líra joun sun gürígia,

²³ lugúndun afígounjaaña sun gürígia áni siñáti lagúndaarun Búngiu jáu.

²⁴ Láu lareíni Búngiu, resíbi lumútiña sun gürígia queísi lánigu, mafáyeijaanga jagía luágu, lugúndun fáyeijali Crístu luágu wafígoun lun gayáraabei lan weréderun richáguañu ligíbugiñe Búngiu.

²⁵ Adügati Búngiu lun lébunabei lan ferúdu Crístu láu loúnwen luágu wafígoun, áni lídaangiñe wafíñerun luágu queísi Wasálbaragüle liábin ferúdu woun. Láu loúnwen Crístu queísi afáyeiragülei luágu figou, ába larúfuduni Búngiu luágu úaragua lan áni iyéreeguti figou lun. Ába lachíbuni líta Crístu jafígoun gürígia já meja aganoubaña lídan dan le sügüjalibei, le uágubei mafáyeijagüdüni láañabaña lan,

²⁶ chibá lumuti gíñe jafígoun ja aganoúbaña lídan buri dan le, lun larúfuduni luágu úaragua lan, áni sun ja afíñebaña luágu Jesucrístu queísi Jasálbaragüle barü lumútiña queísi úaraguatiña.

²⁷ Queísiti ítara líña lubeí, ¿cáti asúseredubei lun japántan gürígia luágu lubuídun jagáburi? Gumúguati. ¿Cági uágu? Lugúndun lun jamúga gayára lan wasálbarun láu lubuídun wagúnfulirun lúma binádu lilúrudun Búngiu, gayáraati jamúga wanáangun woúngua, queísi sálbañu wáña lubeí láurügü wafíñerun luágu Crístu, gumúgua lébuna wanáangun woúngua.

²⁸ Subúdi wamáali lubeíti buídu luágu resíbi láani Búngiu gürígia le afíñeti luágu Crístu queísi gürígia richáguati, mebéresegúnga ánjein gúnfulijali lubeí lúma lilúrudun Moisés lúmoun magúnfulirungili lan.

²⁹ ¿Juríu rügüñanu funági Gabúngiutei Búngiu? ¿Ma funági gíñe Jabúngiute ja mámabaña juríu? Jabúngiute gíñe,

³⁰ lugúndun ában rügüñein Búngiu, le erésibirubaliña sun gürígia ja afíñebaña luágu Jesucrístu queísi Jasálbaragüle, mebéresenga ligía ánjein resíbi jabálin circuncisión lúmoun merésibirun jamáni.

³¹ ¿Wayúsuruñein lubeíti afíñeni luágu Crístu lun warúfuduni luágu mebégi lan binádu lilúrudun Búngiu guetó? ¡Uá! Lubáragiñe líra, warúfuduñein luágu buídu méme lan lúrudu ligía.

4

Jémpulu luáguti Abrahám

¹ ¿Cábati waríñaga luágu Abrahám, le binádu wáguchi, wagía juríu?

² Lun jamúga lueígiñe lan ladügün cátei buíti lerésibirei Búngiu queísi ában gürígia richáguati, gébunati jamúga lapántajan, máma ligíbugiñe Búngiu.

³ Taríñajare Lerérun Búngiu. “Afíñetí meja Abrahám luágu Búngiu, luágu lafíñen lerésibirei queísi wügüri richáguati.”

⁴ Dan le ladügün gürígia ában wadágimanu, fáyeiti le libíjubei lebégi luwádigimari, máma edéweejani.

⁵ Ánjeinti gürígia le asálbaruti lídaangiñe lifígoun láurügü lafíñerun luágu Búngiu le erésibirubaliña gafígountiña, lerésibirubei Búngiu queísi ában gürígia richáguati luágu lafíñen, anáti líra, edéweejani.

⁶ Davíd guánarügü adímurejati luágu jagúndan gürígia ja lerésibirubaña Búngiu queísi richáguatiña luágurügü jafíñen, mebéresenga ligía ca lán meja jadügübei.

⁷ Laríñajare Davíd.

Gúndaatiña gürígia ja ferúduna lubáña Búngiu jaríban, áni chibáwa ligía jafígoun.

⁸ Gúndaati gürígia le lanügübei Búngiu queísi gürígia mafígounjaangili.

⁹ ¿Joúnti rügüñein funásan ja erésibirubalin circuncisión, ódi joúnti gíñe ja merésibirunbalin? Joúnti sun jawúyeri gürígia ugúndani ligía. Aríñagaadiwa luágu resíbi láani Búngiu Abrahám queísi wügüri richáguati, luágu lafíñen.

¹⁰ ¿Ída bugági lerésibirei, lárigiñe lerésibiruni circuncisión ligía ódi lubáragiñe? Máma lárigiñe, lubáragiñe.

¹¹ Lárigiñe larúfuduni Abrahám lafíñen luágu Búngiu, ligía lerésibiruni circuncisión queísi seíni luágu resíbi láali lan Búngiu queísi wügüri richáguati ladüga lafíñen luágu. Ítara líña gíñe liábin Abrahám lun jáguchibeí lan sun ja afíñebaña luágu Búngiu merésibirunga circuncisión, áni resíbi lumútiña gíñe Búngiu ítara queísi richáguatiña.

¹² Jáguchi gíñe ja resíbi jamáalibeí circuncisión Abrahám, ja afíñebaña luágu Búngiu queísi lafíñerun Abrahám lúmagiñe lubáragiñe meja lerésibiruni circuncisión.

Gúnfuliti Búngiu láu lerérun

¹³ Aríñagatí meja Búngiu lun Abrahám luágu líchugubei lan ubouú lun jáu sun linébaanfaangu queísi jalágaante, máma ladüga lagúnfuliruni Abrahám lilúrudun Búngiu líchugúa dimúrei le lun, ladüga lafíñerun luágu Búngiu, ába lerésibiruni Búngiu queísi ában wügüri richáguati.

¹⁴ Lun jamúga já rügüñanu lan íchugubalin jeménigi luágu jagúnfulirun lúma lilúrudun Búngiu erésibira alágan, málati lubeíti jamúga jafíñerun ja eménigidubaña luágu jafíñen luágu Búngiu lun jerésibiruni. Málati jamúga gíñe dimúrei le líchugubei Búngiu luágu alágan lugúndun lídan linárün cátei, mabáfutiña gürígia lun jagúnfulirun lúma lilúrudun,

¹⁵ barürügü lumúti lilúrudun Búngiu ligáñi jawágun gürígia luágu magúnfulirun jamáni. Ánjein le ní lumuti úa lan lúrudu, úati gíñe dúru luágu ladúraawagún.

¹⁶ Ligía, lun lubeí derégüda lan dimúrei le líchugubei Búngiu lun Abrahám joun sun linébaanfaangu, lúnti méja ábanbei lan edéweejani luágurügüti afíñeni. Mamarügü jónti ja lábugiñebaña lilúrudun Búngiu le líchugubei joun juríu lídaangiñe Moisés dimúrei ligía, jónti gíñe sun ja mámabaña juríu áni máma gíñe lábugiñeñanu lúrudu ligía, ába jafíñerun luágu Búngiu queísi lafíñerun Abrahám luágu.

¹⁷ Ligíbugiñe Búngiu, ñübinti lubeíti Abrahám lun wáguchibei lan sun wagía le afíñebeí luágu Búngiu, queísi tariñagun Lerérun Búngiu. “Adüga náadibu lun jáguchi ban sarágu mútu.” Gabáfuti Búngiu lun ladügüni líra queísi gabáfu lan lun líchugun íbágarí joun jiláaña, níjeingüdaleí buri cátei le úagili.

¹⁸ Láu sun uá lán yebe eménigini luágu Abrahám lun garaü lan ladüga weíyaali lan, weíya tugúya Sára, afíñeti dán meja le laríñagubei Búngiu lun luágu ítara lúba lan jíbe ladügawagun queísi warúguma. Ába lasúseredun ítara lun jáguchibei lan sarágu mútu.

¹⁹ Meféridirun lumúti lafíñen luágu dimúrei le laríñagubei Búngiu lun, láu sún meja yaráfaali lan lun lagúnfulirun san irúmu, áni weíyaaru gíñe Sára lun tagáraüdün.

²⁰ Malouguadunti lafíñen luágu dimúrei le laríñagubei Búngiu lun, weíritimáarügüti lafíñen.

²¹ Rúti uweíriguni lun Búngiu láu ában ichoúruni le tímatimaati luágu gabáfu lan Búngiu lun ladügüni sun le uágubei laríñaga.

²² Ligía lerésibirunbalin Búngiu queísi wügüri richáguati, luágu lafíñen.

²³ Cátei le, luáguti lerésibiruniña Búngiu gürígia luágu jafíñen, mamarügü luágu Abrahám labürüjóua,

²⁴ labürüjóuña gíñe wawágu. Lugúndun luágu wafíñen, resíbi lumútiwa gíñe Búngiu queísi richáguatiña, wagía le afíñebeí luágu le ásaaragüdübalin Wabúreme Jesúsu lídaangiñe ouweni.

²⁵ Jesúsu le edéregerúabei lun loúnwen luágu wafígoun, ába lásaarun lídaangiñe ouweni lun larúfuduníwa richáguañu ligíbugiñe Búngiu.

5

Niján lébubei weréderun madúnrunga

¹ Queísiti resíbi láadiwa lubeí Búngiu láu wafíñerun luágu, lídaanjadiwa dan lúma, lídaangiñe Wabúreme Jesucrístu.

² Ladüga Crístu, biníwadiwa lubeí láu wafíñen luágu, derégüdagu wáña lídan lareíni Búngiu, áni gúndaatiwa láu eménigini luágu gafáanranbadiwa lan lídan luweírigun Búngiu.

³ Áni máma rügüñein líra, gúndaatiwa gíñe lídan wasúfurirun ya ubouágu, lugúndun subúdi wamúti luágu ru lan asúfuriruni gurásu woun,

⁴ buídugüda lumúti gurásu wagáburi, áni láu líra, gayára lan weménigidun lun gafánraanbadiwa lan lídan luweírigin Búngiu yágüta siélu.

⁵ Áni máburujanbei warüna lurúma eménigini le, ladüğübei Búngiu le aríñaga láalibei woun ladüga línsiñejabu woun. Sandí wamaali línsiñejabu, buíngüda láaru wanígi láu línsiñejabu, láu Sífiri Sándu le rúlaalíbei woun.

⁶ Ladüga línsiñejabu Búngiu woun, queí meja le mabáfu wabeí lun wasálbaragun woúngua lídaangiñe figou le gádaanbaliwa, ába loúnajani Crístu lídan óra le lanúadirubei lun loúnwen wawágu, wagía le gafígounbei.

⁷ Máma cátei ménreengunti lun loúnwen ában gürígia jawágu ámu gürígia, ni íbini lueígiñe ában gürígia le buídubei, láu sun níjein lan gürígia gayáraati jamúga loúnwen lueígiñe ában gürígia le buíti le tímatimaati.

⁸ Ánjein Búngiu, ába larúfuduni luweírini línsiñejabu woun láu loúnajani Jesu-crístu le Liraü lun loúnwen wawágu, láu sún meja gafígoundiwa lan.

⁹ Guetóti, láu resíbi láadiwa lan queísi gürígia richáguatiña láu loúnwen Crístu wawágu, choúrutimaati luágu weséfuruba lan lueí ligáñi Búngiu le lúnbei láburojan jawágun gafígountiña lídaanme luwéyuri agúseruni.

¹⁰ Lugúndun ánjein ru lubáliwa Búngiu lídan dan lúmagua láu loúnwen Liraü dán meja le láganigídiwa, choúrutimaati luágu lasálbarubadiwa lan le gumúti, luágu Liraü le wíwnañubei lúma, siélu.

¹¹ Áni máma rügüñein cátei le, gúndaatiwa gíñe lúma Búngiu lídoun buri dan le, lídaangiñe Wabúreme Jesu-crístu, le ídaangiñebeí lídaanjadiwa lan dan lúma Búngiu.

Adán lúma Crístu

¹² Ítara queísi lídaangiñe lán meja ábanrügü wüğüri le gíribei Adán lebélura figou ubouágun, ába lanüğüni figou ouweni lúmagua queísi lafáyeija, ítara líña gíñe jóweguba lubeí sun gürígia lugúndun afígounjatiña súngubei.

¹³ Lubáragiñe meja líchuguni Búngiu lilúrudun joun gürígia lídaangiñe Moisés, añájeinjaña méja gürígia afígounjaña ubouágu, láu sun úagili lan lúrudu ligía lun gayáraabei lan jadüraaguni.

¹⁴ Láu sun líra, lúmagiñe meja lidáani Abrahám darí lúmoun lidáani Moisés, jilátiña gürígia luágu jafígoun láu sun máma lan ladüga magáambadi jamá jafígounbei queísi ladüğüni Adán le magáambadibei lun lerérun Búngiu lun. Lueígiñe ában oubaü, Adán liyáwa Crístu le lúnbei liábin, ladüga biángubei jagía barütiña som cátei joun gürígia.

¹⁵ ¡Amüñegueinarügü gíñe cátei le janüğübei joun gürígia! Barüti Adán ouweni joun sun gürígia láu lafígounjan, ánjeinti Crístu, barüti asálbaruni joun sun gürígia, áni weírini asálbaruni le líchugubei Búngiu láu lareíni woun lídaangiñe Crístu sügü láu lifígoun Adán.

¹⁶ Weírini gíñe le líchugubei asálbaruni sügü láu le líchugubei lifígoun Adán woun. Ladügarügü ában figou, chülüti ouweni joun sun gürígia, ánjeinti ladüga loúnwen Crístu wawágu, ferúdnawati sun wafígoun le gíbebei, resíbi lumútiwa Búngiu queísi gürígia richáguatiña.

¹⁷ Ánjein gabáfu lubeí ouweni jawágu sun gürígia ladüga lidúnrun ábanrügü wüğüri—Adán, choúrutimaati luágu sun lan gürígia ja lerésibirubaña Búngiu láu lareíni queísi gürígia richáguatiña, jabíjubei íbágarí magúmuchaditi lúma Búngiu, jarúejaba úara lúma Crístu, ladüga ábanrügü wüğüri ligía.

¹⁸ Ítara queísi líchuguniña Adán sun gürígia lábugiñe lisíadin Búngiu lun jóúnwen láu ladüğüni le áubei magúndan lan, ítara líña gíñe lagídaruniña

Crístu gürígia lábugiñegiñe asiadiruni ligía, rúleí ibágari magúmuchaditi joun láu ladügüni lugúndan Búngiu lun loúnwen jawágu.

¹⁹ Ladüga lubeíti lumágaambadi ábanrügü wügüri, ñübintiña sun gürígia lun jafígounjaba lan, ítara méme giñe, ladüga lagáambadi ábanrügü wügüri, gayáraati jayábin sun gürígia lun richágua jamá ligíbugiñe Búngiu.

²⁰ Rúati lilúrudun Moisés woun lun gayáraabei lan wasúbudiruni cátei lan figoubei. Láu sun gíbe lan figou ubouágu, weíritimaabei lareíni Búngiu lun lachíbuni sun figou ligía.

²¹ Ítarati queísi gabáfu lán meja figou lun lanügüni ouweni, ítara giñe gabáfuti lareíni Búngiu lun ladügüniña gürígia richágua ligíbugiñe, luma lun líchugun ibágari magúmuchaditi joun lídaangiñe Wabúreme Jesucrístu.

6

Jiláñu wáña lun figou, wínwañu lun wesériwidun lun Crístu

¹ ¿Cábatí waríñaga? ¿Wasígiruba afígounja lun larúfuduntima Búngiu lídaangiñe lareíni woun?

² ¡Máma lúba! Wagía, jiláadiwa lun figou, ¿ída lubáti gayára lan wasígirun afígounja?

³ ¿Ibídíñeti jun luágu láu lan lídan wamá ában luma Crístu láu wabásterun, queísigubeirügü jamúga lídaañadiwa lan giñe ában luma lídan loúnwen, lun mabáfujali lánme figou wawágu?

⁴ Láu wabásterun, queísigubeirügü jamúga bunáwa wamá úara luma Crístu, áni reideitiwa jiláñu lun figou. Queígubeirügü sarágüda láani Wáguchi Búngiu Crístu lídaangiñe ouweni láu luweírin lubáfu, sarágüda láadiwa giñe lun isérijali lan wabágari.

⁵ Lugúndun ánjein ñübin wabeí lun lídaanbadiwa lan ában luma Crístu lídan ában ouweni líbe loúnwen, ítara wába giñe lídan lásaarun lídaangiñe ouweni.

⁶ Subúdi wamúti luágu dáwagua lan binádu meja wagáburi luma Crístu luágu gurúwa lun lagünrinchawagún lubáfu figou lé meja wawágubei, lun merédeediwa lan queísi idámuni esériwida lun figou queísi wayúbudiri.

⁷ Lugúndun le jiláalibeí, furíjali lídaangiñe figou.

⁸ Ánjein jiláadiwa lubeí luma Crístu, gayáraati wafíñerun luágu wabágariduba lan giñe luma,

⁹ lugúndun subúdi wamúti luágu sará lan Crístu ában weíyaasu lídaangiñe ouweni, moúnwendügüyaali, mabáfujali ouweni luágu.

¹⁰ Dan le loúnwenbei Crístu, ába lagúmuchaguagüdüni lubáfu figou lun sun dan, áni ibágari le labágaridubei guetó, lun méme lesériwidun lun Búngiu labágaridei.

¹¹ Jugúya giñe, rúgua jumá júngua queísi jiláguaaña lun figou, áni wínwañu lun jesériwidun lun Búngiu, lídan ában luma Crístu Jesús le Wabúreme.

¹² Ligía, mígira jumá lubeí lun gabáfu méme lan figou juágu, afósuraün lun jadügüni luríban jayúmajan.

¹³ Míchaagua jumá júngua lun figou lun layúsuruni júgubu lun cátei wuríbati. Lubáragiñe líra, derégegua jumá júngua lun Búngiu queísi gürígia jiláaña, ábaya jabágaridun, derége jumeí júgubu lun Búngiu lun layúsuruni lun cátei buíti.

¹⁴ Mabáfujalíme figou juágu, lugúndun mámaadün lábugiñe lilúrudun Búngiu, lábugiñejadün lareíni lun gayára lan jadügüni lugúndan.

Ában jémpulu luágu idámuni

¹⁵ Queísiti máma lubeí lídaangiñe wagúnfulirun lúma lilúrudun Búngiu le líchugubei lun Moisés liábin wasálbarun, lídaangiñe werésibiruni lareíni Búngiu, ¿gayáraati lubeíti wabágaridun lídan figoú ladüga líra? ¡Siñáti!

¹⁶ ¿Ibídíñeti jun luágu le lan únti jíchaagua júngua lun jídin láu le lubeíbei lidámuñadün lan? Gayáraati lubeíti janúadajan cába lan un jíchaagua júngua, lún yebe figoú le íchugubei féridi, o lun lan agáambadi lun Búngiu, le íchugubei ában ibágari richáguati.

¹⁷ Teínqui níña lun Búngiu luágu láu sun lan lidámun jumá meja figoú, guetó jídiña láu ligáburí arúfudajani buíti le jagáambubei, táu sun janígi.

¹⁸ Mámaadün idámuni lun figoú, lidámunjadün Búngiu.

¹⁹ (Nadímurejaña jun láu jémpulu le, le luáguti idámuni lúma labúreme, lúntima gunfaráanda jumánina.) Ítara queí meja lidámun jumá sun luwúyeri figoú, guetó lúnti jíabin lun lidámun jumá buri cátei le buídubei, lun jabágaridun ában ibágari derégeguañu lun Búngiu.

²⁰ Lídan buri meja dan ligíra, dán meja le lidámuñadün lan figoú, mebéréseguntün meja lun jabágaridun ában ibágari buíti ligíbugiñe Búngiu.

²¹ ¿Ca mejáti cátei buíti lanüğübeí buri cátei ligía jun le áubei buri nibúsigari jumá guetó? Ni cáta buíti, féridi rüğüñein lanüga jun.

²² Ánjeinti guetó, mámaadün lábugiñe lugúmadin figoú, lidámujadün Búngiu, barütiti cátei le arúmani tun janígi lúma ibágari magúmuchaditi jun.

²³ Lugúndun ouweni lafáyeijabei figoú, ánjeinti edéweejani le líchugubei Búngiu woun, ibágari le magúmuchaditi ladüga lídaañadiwa lan ában lúma Wabúreme Jesucrístu.

7

Ában jémpulu lídaangiñeti maríei

¹ Nidújeñu, jugúya le subúdijabúbei lun lúrudu, subúdi jumáali luágu dán rüğüñein lan wínwangili ában gürígia, ligía lábugiñeñein lan lúrudu.

² Quei jamúga, ában würi to maríeitu, rulumutu lúrudu lábun lagúmadijan túmari sun dan le wínwangili lan, ánjein ouwe túmari, bougudijaru lueí lúrudu le íchugubarun lábugiñe lagúmadijan túmari.

³ Ánjoun lubeíti agánawa lúma ámu wüğüri sun wínwangili lan túmari, tadüğüña figoú le gíribei adultériu, ánjein ouwe túmari, gidáaru lábugiñegiñe lúrudu ligía, áni gayáraati tamárieidun lúma ámu wüğüri, madüğüntu adultériu.

⁴ Ítara giñe jugúya, nidújeñu, láu loúnwen Crístu, furíjadün lábugiñegiñe lagúmadijan lilúrudun Moisés queísi würi to jiláali túmari, ába tagámaridun ámu. Guetó, lánijadün Crístu, le saráalibeí lídaangiñe ouweni, lun gayáraabei lan jesériwidun lun Búngiu le gumúti.

⁵ Lubáragiñe meja werésibiruni Crístu, seríwiti meja lilúrudun Moisés lun lagáguduni luríban ayúmajaní wádan, áni ligía cátei le anüğübaliwa lídoun ouweni.

⁶ Ánjeinti guetó, jiláadiwa lun lúrudu ligía lé meja gámabaliwa lábugiñe lubáfu, guetó furángujadiwa lun wesériwidun lun Búngiu lídan iséri luwúyeri, táu sun wanígi, láu ubáfu le líchugubei Sífiri Sándu woun, máma queísi idámuni lun binádu lilúrudun Búngiu le bürüwabei.

Igáburí lánina figoú le wádaanbei

⁷ ¿Waríñaguba lubeíti luágu wuríba lan binádu lilúrudun Búngiu? ¡Máma líña! Láu sun líra, lúrudu asúbudiragüdübalin figoú nun. Ibídíñeti jamúga nun luágu figoú lan lawámadirun jamégen ámu ánjein jamúga maríñagunti lúrudu. “Mawámadirabeí jamégen ámu.”

8 Ladüga méme gumádi le, ába lagáguduni igáburi lánina figóu le nídaanbei sun luwúyeri luríban ayúmajani nídan. Lugúndun lun jamúga úa lan lúrudu, larúmuguñá yebe lubáfu figóu.

9 Níjein meja ában dan, lubáragiñe nasúbudiruni laníchigu lilúrudun Búngiu le tímatimaati, ába narítangun luágu úaragua lan nigáburi ligíbugiñe Búngiu, dan le nasúbudirubalin laníchigu lúrudu ligía, ába nasúbudiruni luágu gafígoun nan, luágu lídaañadina lan üma lun féridi.

10 Ítara líña, lúrudu le jamúga lúnbei yebe líchugun ában ibágari buíti nun, arúfudarügü lumúti nidúnrun lúma lafáyeiruaja.

11 Lugúndun lárügüdün igáburi lánina figóu le nídaanbei lueígiñe lúrudu ligía, ába leyéerangunina lun nadügüni le wuríbabei, ába lanügünina lídoun féridi láu meme lúrudu ligía.

12 Sánduti lubeíti lilúrudun Búngiu lídaangua, sánduti giñe sun gumádi le lídaanbei, úaraguati, áni buíti.

13 ¿Ligía funásan cátei buíti le anügübalina lídoun féridi? ¡Máma líña! Nifígoun anügübalin neféridirun nun, áni ítara líña larúfuduni luágu figóu lan, láu cátei le buídubei, le méme lúrudubei, lanügana igáburi lánina figóu le nídaanbei lídoun féridi, áni ítara líña larúfuduni lilúrudun Búngiu luágu wuríba lan figóu le tímatimaati.

14 Subúdi wamúti luágu lídaangiñe lan Sífiri Sándu líchigei Búngiu lilúrudun, ánjeinti áu, queísi wügüri garaüwarügüti, alúgurúañu níña queísi idámuni lun lubáfu figóu.

15 Úati gunfaráanda náani ca lan susérebei nun, madügün numúti cátei buíti le nabúseerubei nadügün, nadügei cátei le iyéeregubei nun.

16 Ánjein le lubeí mabúseerun nubeí nadügün ligía nadüga, úaraguati nisáminan lúma lilúrudun Búngiu luágu cátei le buídubei, áni láu líra, arúfuda numúti luágu barünaani lúrudu quei cátei buíti.

17 Mámaadina lubeíti áu adügübalin cátei wuríbati le nadügübei, igáburi lánina figóu le nídaanbei, ligía adügübalin.

18 Subúdi numúti luágu úa lan ni cáta buíti nídan bougudín lueí Búngiu, áu queísi wügüri garaüwarügüti. Buséntina jamúga nadügüni le buídubei, siñáti nadügüni.

19 Madügün numúti cátei buíti le nabúseerubei nadügün, nasígirarüga adügei wuríbati le mabúseerun nubeí nadügün.

20 Ánjein lubeíti le lubeí cátei le mabúseerun nubeí nadügün ligía nadüga, lídan linárün cátei, máma áu le láni Búngiu adügübalin, igáburi lánina figóu le nídaangilibe, ligía adügübalin.

21 Niján cátei le asúseredubei nun. dan le busén nan nadügüni le buídubei, wuríbati rügüñein nadárira nídan.

22 Lídan nisáminan, jínsiñeti lilúrudun Búngiu nun,

23 áni aríjatina luágu níjein lan cátei nídan, ageíndaguti lúma nisáminan, cátei ligía, igáburi lánina figóu le nídaanbei, le gámabalina adaürüwañu.

24 ¡Fugiábu áu! ¿Cába eséfurana lídaangiñe igáburi lánina figóu le nídaanbei, le anügübalina lídoun ouweni?

25 Búngiu gubeírügü, lídaangiñe Wabúreme Jesucrístu. ¡Teínqui níña lun Búngiu! Gunfaráanda numúti lubeíti luágu áu lan láu náni núngua, úouga lubáfu Crístu nuágu, buséntina jamúga nagúnfulirun lúma lilúrudun Búngiu, siñá numuti ladüga igáburi lánina figóu le nídaanbei, seríwirügütina lun figóu queísi lidámun.

8

Wabágari lúma Sífiri Sándu

¹ Guetó, gidáwaali jadúnrun gürígia ja lídaanbaña ában lúma Jesúsu.

² Rúlaali Crístu lání Espíritu woun, áni Espíritu ligía, rúti iséri ibágari woun, furígüda láadiwa lábugiñegiñe lubáfu figoú le anügüwaliwa lídoun ouweni.

³ Mabáfuti meja lilúrudun Búngiu lun lagídaruníwa lábugiñegiñe lubáfu figoú ladüga turíban wanígi, wagía gürígia garaüwarügütiña. Ába ladügüni Búngiu le lásiñerubei lilúrudun adüga láu loúnajani Liraü ubouágun queísi gürígia garaüwarügüti le gíñe gayáraati lafigounjan (láu sun, mafigounjan lan). Ába loúnwen Liraü Búngiu, le Jesucristubei, luágu wafígoun, ába lagúmchaguagüdüni lubáfu figoú wawágu láu loúnwen.

⁴ Ladügünbalin Búngiu líra, lun gayáraabei lan wadügüniwa gürígiame richáguatiña queísi lagúmadijan lilúrudun, gürígia ja mabágaridunjañabaña lídan luríban jagúndan, ja abágariduñabaña guetó queísi lugúndan Sífiri Sándu.

⁵ Ja abágaridubaña queísi jagúndan queísi gürígia garaüwarügütiña, luágu rügüñein cátei le lánina ubou jarítagua, ánjaña ja abágaridubaña queísi lugúndan Sífiri Sándu, luágu cátei le lánina siélu jarítagua.

⁶ Dan le jabágaridun gürígia queísi jagúndan, marítagunga jagía luágu Búngiu, barü lumútiña lídoun ouweni, ánjeinti dan le jabágaridun queísi lugúndan Sífiri Sándu, barü lumútiña lídoun ibágari tímatimaati lúma darángilaü.

⁷ Ja arítagubaña luágu cátei le lánina ubou le, láganiñu Búngiu lugúndun mája jáña, áni siñá ligía jíchaagun joúngua lábun lilúrudun.

⁸ Ligía, ja lubei abágaridubaña láu jagúndan queísi gürígia garaüwarügütiña, siñáti jadügüni lugúndan Búngiu.

⁹ Ánjeinti jugúya, mabágaridunjadün lídan jugúndan queísi gürígia garaüwarügütiña, jabágariduña lídan ában lúma lání Búngiu Espíritu, queísi aganoúa lubei jídan. Le úabei lání Crístu Espíritu lúma, máma lánigu Crístu.

¹⁰ Ánjein wínwan lubei lání Crístu Espíritu jídan, wínwanboun juwáni lun sun dan ladüga tarúfudúniwa richáguañu ligíbugiñe Búngiu, láu sun louweba lan júgubu ladüga figoú le lídaanbei ubou le.

¹¹ Ánjein wínwan lubei lání Espíritu jídan, Búngiu méme le ásaaragüdübalin Jesucristu lídaangiñe ouweni, líchuguba ibágari iséri lun júgubu le goúwedadibe, lídaangiñe lání Espíritu le jídaanbei.

¹² Ítara líña lubeíti, nidújeñu, lúnti wagúnfulirun lúma Sífiri Sándu le wádaanbei, máma lúma wagúndan queísi gürígia garaüwarügütiña.

¹³ Lugúndun ánjaün abágaridarügü queísi jugúndan, queísi gürígia garaüwarügütiña, jeféridiruba, mídinbadün siélu, ánjein jáfara igáburi lánina figoú le jídaanbei jílagubei, láu lubáfu Sífiri Sándu, jabágariduba lun sun dan lúma Búngiu siélu.

¹⁴ Sun ja ladúndejabaña lání Búngiu Espíritu, lirájüñü Búngiu.

¹⁵ Sífiri Sándu le jerésibirubei, máma ában espíritu lánina idámuni lúnya lanúfudedagüdünnün luei láburujan ligáni Búngiu juágun, Espíritu le jerésibirubei, ligía le adügübalün lun lirájüñü jumá Búngiu. Ligía gayára lubei wagúaruni Búngiu Wáguchi.

¹⁶ Geféenti lání Búngiu Espíritu woun luágu lirájüñüjadiwa lan Búngiu.

¹⁷ Áni ladüga lirájüñü wamá Búngiu, garíchatywa gíñe lun alágan siélu le uágubei laríñaga Búngiu woun, le lúnbei gafánran wamá lídaangiñe, lúma Crístu. Ánjein súfuri wabeí luágu Crístu ya ubouágu, gafánraanbadiwa lídan luweírigun yágüta siélu.

18 Jarítaguatina luágu ni cáta lan le wasúfurirubei ya ubouágu lúmoun uweíríguni le lúnbei wabíjini siélu.

19 Láuñein sarágu ayúmajani lúma eménigini sun ubou le ladügübei Búngiu, agúrabei dan le lúnbei jerésibiruni lirájüñü Búngiu jalágaante.

20 Níjein mégeiti luágu sun ubou, máma jamúga ladüga labúseerun, ladüga ítara líña lan labúseeruni Búngiu,

21 láu sun líra, súnwandan níjein lan eménigini luágu leséfuruba lan ubou lídaangiñe asúfuriruni lúma agádeiruni le gádaanbalin lun gafánraanbei lan lídan jaweírígün lirájüñü Búngiu.

22 Subúdi wamúti luágu chülü lan lúmoun dan le, sun ubou le ladügübei Búngiu ayájuati láu igárigu camá ában würi to agáridutu.

23 Áni máma rügüñein ubou asúfurira, súfuritiwa gíñe, wagía afíñetiña luágu Crístu, láu sun níjeinjali lan Sífiri Sándu wáma queísi lagúmeseraja cátei le lúnbei werésibiruni. Sandítiwa ában oúnwenbun igári, áni agúraba wamúti dan le lúnbei wayábin lun lirájüñüjadiwa lánme Búngiu le tímatimaati, dánme le liséridun wágubu.

24 Ligía lágüdaja wasálbarun. Merésibirun wamágili sun ubuiduni le lúnbei wabíjini queísi lirájüñü Búngiu, agúrabajatiwa werésibiruni yágüta siélu. Ánjein jamúga íbija wamáaliti sun le lúnbei wabíjini queísi lirájüñü, mébunaali jamúga wagúrabajan. Magúrabajaantiña gürígia jerésibiruni cátei le íbija jamáalibeí.

25 Queíti merésibirun wamágili lubeí sun le lúnbei wabíjini queísi lirájüñü Búngiu, lúnti wagúrabuni láu gurásu.

26 Ítara méme gíñe, íderagua lumútiwa Sífiri Sándu lídan wadébilin. Queísigubeirügü níjein dan, siñáti wayúmuragun lun Búngiu queísi lubúdubu. Lídan óra ligía, ába líderaguniwa Sífiri Sándu lun waríñaguni luweírín cátei le wasándirubei tídan wanígi lun Búngiu lídan ában luwúyeri le siñáti laríñawagún láu dimúrei.

27 Áni Búngiu, le aríjubarun wanígi, subúdi lumúti ca lan labúseerubei Sífiri Sándu laríñagun wádaangiñe, ába loúnabuniwa Búngiu lugúndun ayúmuraguati Espíritu queísi lugúndan Búngiu.

Agáñeiruni lídan sun luwúyeri lénreengúnga

28 Subúdi wamúti luágu aráanse láani Búngiu lun sun lan cátei le asúseredubei woun, íbini asúfuriruni, lun lanügün buíti woun, wagía le jínsiñejabúbei lun, wagía le wájali lan lun lánigu wamá queísi larítaguni.

29 Lugúndun ja lasúbudirubaña Búngiu lúmagiñe lubáragiñe ladügüni ubou luágu lánigubaña lan, fánrein lumútiña lun ítara jamá queísi Liraü, lun Liraü lan íbugañä joun sun ja lanúadirubaña lun lirájüñü jamá.

30 Játi lanúadirubaña lúmagiñe binárü, wáti gíñe joun, resíbi lumútiña gíñe lúmagua queísi gürígia richáguatiña, áni ja lerésibirubaña, rúti gíñe ufánrani joun lídan luweírígün queísi lirájüñü.

31 ¿Cábatí waríñaga luágu buri cátei le? Queísi lueígiñeñein lubeí wafúleisein Búngiu, ¿cábagi jabáfu wáganiñu wawágu?

32 Mamájaanti Búngiu lun líchuguni Liraü guánarügü lun loúnwen luágu wafúleisein, lubáragiñe líra, ába ledéregeruni lun loúnwen waweígiñe, sun wagía, ¿ída lubáti míchugun láani sun líbiri cátei woun queísi líchuguni Liraü woun?

33 ¿Cági gayáraabei líchugun jadúnrun ja anúadaja láañabaña Búngiu queísi lánigu? Búngiu arúfudubaliña quei madúnruntiña.

³⁴ ¿Cáteiti gayáraabei lasíadiruniwa lun féridi? Crístu guánarügü oúwebei wawágu, ába lásaarun lídaangiñe oúweni, guetó níjein ñun lueígiñe loúnwenren Búngiu Úguchili ayúmuragua wawágu.

³⁵ ¿Cábati gayára lagídaruniwa lueí línsiñejabu Crístu? ¿Liyáraabadiwa funági asúfuriruni, o lénreengúnga, o eíbaajoúni, o ilámaü, o manáanguni, o pelíguru, o oúweni? ¡Uá!

³⁶ Laríñajare tídan Lerérun Búngiu.

Yaráfatiwa lun wounwen bueígiñe ságü wéyu,

ítara líña jouseruniwa wáganiñu queísi mudún anügütiña lun jafarún.

³⁷ Lídan sun cátei le, ibíja wamúti luweírín lubáfu Crístu, le jínsiñejabúbei woun, lun wagáñeirun lídan sun lénreengúnga.

³⁸ Chóuru numúti lubeíti luágu úa lan ni cáta lun lagídaruniwa lueí línsiñejabu Búngiu—ni oúweni, ni ibágari, ni ánjeligu, ni máfianu, ni cátei le guetóbei, ni le lúnbei liábin,

³⁹ ni le siélubei, ni le ubouágubei, ní buri ámu cátei le ladügübei Búngiu—siñáti lagídaruniwa lueí línsiñejabu le larúfudubei woun lídan Wabúreme Jesucrístu.

9

Anúadaja láaña Búngiu Israelítagu lun lánigu jamá

¹ Inárüni le lúnbei nariñaguni guetó jawágu nirásan, áu queísi ában afiñeti luágu Crístu, áni meyéejantina, aríñaga tumúti nanígi nun to úraguaboun lúma Sífiri Sándu luágu inárüni lan.

² Weíríti nírun, áni súnwandan níjein lan gáriti tídan nanígi jawágu nirásan.

³ Buséntina jamúga lun gíñe lábugiñe nan líñaragun Búngiu, díseñu lueí Crístu, ánjein jamúga ítara lúba lubeí gayára lan jerésibiruni Jesucrístu queísi jasálbaragüle lun jasálbarun.

⁴ Linébaanfaangu Israél jagía, áni resíbi lumútiña Búngiu queísi lirájüñü. Reídeití meja Búngiu jádan láu sun luweírigin áni rulumuti gíñe darádu buri joun lúma lilúrudun lídaangiñe Moisés. Arúfudati igáburi joun lun jesériwidun lun, ligílisirugu, áni joun laríñaga luágu loúnajaba lan ában Asálbaragülei.

⁵ Janébaanfaangu Abrahám, Isáac lúma Jacób jagía, lídaangiñe jarásan liábin Crístu, le Búngiubei, le gíñe Súnti Gabáfu, le gadúnamabei lun liñurúniwa líri lun sun dan. Ítaralá.

⁶ Mámatia luágu jamúga reídei lan lerérun Búngiu joun ladügawagun Israél magúnfulirunga, ladüga máma sun Israelítagu lánigu Búngiu le tímatimaati.

⁷ Máma sun linébaanfaangu Abrahám lirájüñü Búngiu le tímatimaati, aríñagarügüti méja Búngiu lun Abrahám. “Lídaangiñerügüba Israél ganébaanfaangu ban.”

⁸ Arúfuda lumúti líra woun luágu úa lan ni ában liraü Búngiu luágurügü lirásan, ja rügüñanu lirájüñü ladüga jafíñerun luágu lerérun, jagía anügübaña queísi lirájüñü ja tímatimaatiña.

⁹ Lugúndun niján dimúrei le líchugubei Búngiu lun Abrahám. “Niábinba dánme le lachülürün dan ligía, ábame tagáraüdün Sára ában irájü.”

¹⁰ Áni máma rügüñein líra, niján ábanya jémpulu luágu lanúadajan Búngiu. Biángubei meja tirájüñü Rebéca ában jáguchi, le binádu wadúje Isáac,

¹¹⁻¹³ áni dán meja le magúriajoúngiña, madügüngiña gíñe ni cáta ni buíti ni wuríbati, ába laríñagun Búngiu tun Rebéca. “Lumúsunbei amúleñein le íbugañaü.” Úraguati gíñe líra lúma le aríñawagúbei tídan Lerérun Búngiu. “Jínsiñetí meja Jacób nun, ánjein Esaú, iyéreeguti nun.” Ítara líña gufírümawa lan

lirícha Búngiu lun lanúadajaniña ja únbaña labúseera lagúarun lun lánigu jamá queísi labúseeruni, mebéresenga ligía ca lan jadügübei.

¹⁴ ¿Cábatí waríñaga? ¿Waríñaguba luágu múaran lan Búngiu? ¡Siñáti!

¹⁵ Lugúndun laríñajare lun Moisés. “Gareínibadina lun le nabúseerun, gudémejabu áume lun le únti nabúseera.”

¹⁶ Ítara líña lubeíti, máma lídaañein wabúseerún o wáfaagun, lugúdemejabu Búngiu woun, lídaañein lugúndan.

¹⁷ Tídan Lerérun Búngiu, bürüwañu líña dimúrei le laríñagubei lun urúei Ejíptona. “Nadügünbálibu urúeime lun narúfuduni nubáfu buágu, lun gíñe nasúbudiragüdüni níri lídan sun fulásu.”

¹⁸ Gudémejabuti lubeíti Búngiu lun le labúseerun gudémejabu lan, derégüdalóun lanígi le únti labúseera ledéreragüdünnun.

¹⁹ Baríñaguba lubeíti nun. “Ánjein ítara líña lubeí, ¿cáti uágu líchiga Búngiu dúru jawágu gürígia? ¿Cági gayáraabei ladügün cátei bougudíti lueí lugúndan Búngiu?”

²⁰ Wel, ¿cátabuñadíbugi lun balégejan lúma Búngiu? ¿Laríñaguba funági soudíeru lun le adügübalin. “¿Cáme badügana ítara?”

²¹ Garíchatí le adáagubei soudíeru lun ladügüni le labúseerun láu lubúñe soudíeru, gayáraati ladügün ában soudíeru le díseguati layúsurun, lúma ában le ayúsurúti lun furúmieguarügü cátei lídaangiñe ában méme ubúñei.

²² Ítara méme líña, gabáfuti Búngiu jawágu gürígia, aráanseñu líña lun larúfuduni luweírin ligáñi jawágu gürígia ja gadúnabaña jagünrinchawagún. Áfaaga lumúti jaríban láu sarágu gurásu darí guetó

²³ Lúnrügü gayára lan larúfuduni luweírin luweírigun woun, wagía le únbaña gudémejabu lan, ja gíñe laráanserubaña lúmagiñe binárü lun gafánraanbadiwa lan lídan luweírigun.

²⁴ Wátí Búngiu woun, jíbiri jádaangiñe juríu, jíbiri jádaangiñe ja mámabaña juríu,

²⁵ queísi laríñagun Búngiu tídan lilíburun Oséas.

Já meja mámabaña nánigu, naríñaguba joun. “Nánigu”, gürígia méja ja mínsiñebaña nun, naríñaguba joun. “Jínsiñetün nun”.

²⁶ Áni lídan méme fulásu le ñí lubei laríñawagúa joun. “Máma nánigu jugúya”, ñiba laríñawagúa joun. “Lirájüñü Búngiu le wínwanbei”.

²⁷ Ánjeinti jawágu Israelítagu, ja méme juríubaña, laríñajare Isaías. “Láu sun gíbe jamá ladügawagun Israél quei ságoun láru béya, biánraürügübaña jádaangiñe erédera lun jasálbarun,

²⁸ lugúndun lagúnfulirubei Búngiu lerérun ligíbuagu ubouú lun lagünrinchaguniña ja magáambadibaña lun, lídan ában igáburi le gumúti, le gíñe furéseti.”

²⁹ Queísi méja laríñagun méme Isaías.

Lun jamúga meja mígirun lan Súnti Gabáfu jádaangiñe wadügawagun woun, wayábiña jamúga lun ítara wamá queísi ubúrgu buri Sodóma lúma Gomórra.

Juríu lúma ugánu luáguti Crístu

³⁰ ¿Cábatí waríñaga? Luágu ja lan mámabaña juríu, ja mibíjinbalin lilúrudun Búngiu lun jasúbudiruni le buídubei lúma le wuríbabei, jagía anügübaña quei richáguatiña ligíbugiñe Búngiu ladüga jafíñerun luágu.

³¹ Ánjañati ladügawagun Israél, ja áfaagubaña lun jerésibirúniwa queísi gürígia richáguatiña láurügü jagúnfulirun lúma lilúrudun Búngiu, siñá jamuti lúrudu ligía agúnfulira, machülüntiña lun richágua jamá ligíbugiñe Búngiu.

³² ¿Cági uágu? Lugúndun máfaagun jamá lun jeréderun buídu ligíbugiñe Búngiu luágurügü jafiñen, jadügeirüga láu cátei le guánarügü jadügübei. Ligía jachúgeragunbei luágu Jesucrístu queísi “dübü le achúgeraguágülei”, ladüga siñá lan jafiñerun luágu queísi Jasálbaragüle.

³³ Laríñajare tídan Lerérun Búngiu.

Rútina ában wügüri le queísigubeirügübei dübü le achúgeraguágülei Sión, dübü gíñe le eiguadagüdüti gürígia.

Ánjeinti le afiñeruti luágu, maságürijanbei.

10

¹ Nidújeñu, le cátei le uágubei tayúmaja nanígi, lúma le uágubei nayúmragun lun Búngiu jawágu Israelítagu, ja méme juríubaña, lun jasálbarun.

² Aríñagatina luágu jafúleisein luágu níjein lan ában oúnwenbun gúnfuli jádan lun Búngiu, máma queísi laríñagun subúdi jagúnfulin.

³ Ibídiñeti joun ída líña lan ligáburi líchuguniña Búngiu gürígia richáguañu ligíbugiñe, láu igáburi le jabúseerubei jáluajan jeréderun richáguañu ligíbugiñe Búngiu, madügünga jameí le labúseerubei.

⁴ Lugúndun Crístu lébejabei lagúnfulirúniwa lilúrudun Moisés, áni adügati lun sun lan ja afiñebaña luágu, jeréderun richáguañu ligíbugiñe Búngiu.

⁵ Luágu lerésibiruniña Búngiu gürígia queísi gürígia richáguañu láu jagúnfuliruni lilúrudun, laríñajare Moisés. “Gürígia ja agúnfulirutiña lúrudu le gumúti, jabágariduba luágu lúrudu.”

⁶ Luáguti lerésibiruniña Búngiu gürígia queísi richáguañu ligíbugiñe luágu jafiñen, laríñajare. “Maríñagabá tídan banígi. ¿Cába amúdeira siélun?” — queísigubeirügü barárigüdüñein lan Crístu le Wasálbaragüle siélugiñe.

⁷ Maríñagabá giñe. “¿Cába arárrira le ñíjin jabeí jiláaña?” — queísigubeirügü bamúdeiragüdüñein lan Crístu jádaangiñe jiláaña ítara. Úati ni cáta lun wadügüni lueídügüya lun wafiñerun luágu.

⁸ Cáteiti laríñagubei Búngiu? “Yaráfati ugánu lánina asálbaruni bun, adímurejatibu luágu ugánu ligía láu biyúma, níjein giñe ugánu ligía tídan banígi.” Ugánu le, elun?” — queísigubeirügü barárigüdüñein lan Crístu le ligía ugánu le lánina afiñeni luágu Crístu le Wasálbaragüle, le wapúrichijabei.

⁹ Ánjabu aríñaga láu biyúma luágu Jesúsu lan Babúremebei, afiñe amürü tídan banígi luágu sarágüda láani Búngiu lídaangiñe oúweni, basálbaruba.

¹⁰ Láu bafiñerun luágu Jesucrístu táu sun banígi, lerésibirabu Búngiu queísi ában gürígia richáguañu ligíbugiñe, láu bíchugun fe luágu láu biyúma, basálbara.

¹¹ Taríñajare Lerérun Búngiu. “Úati ni ában gürígia le afiñeruti luágu Jesucrístu lun laságürijan luágu lárigiñe.”

¹² Ában jáu juríu jáma ja mámabaña juríu, Wabúreme Jesucrístu, ligía Jabúremebei sùngubei, áni fuleísei lumútiña sun ja agúarubaña lun líderaguniña.

¹³ Ítara líña quei laríñawagún tídan Lerérun Búngiu. “Sun ja agúaruti líri Wabúreme, jasálbaruba.”

¹⁴ ¿Ída lubáti gayára lan jagúaruni lun lasálbaruniña ánjein mafiñerungiña lubeí luágu? ¿Ída lúba giñeti gayára lan jafiñerun luágu, ánjein magáambungiña lubeí luágu? ¿Ída lubáti gayára lan jagáambun luágu, ánjein uá jabeí apúrichijati ugánu luáguti asálbaruni joun?

¹⁵ ¿Ída lubáti giñe gayára lan japúrichijan gürígia joun ánjein uá cába lan oúnajaña apúrichija? Queísi laríñawagún tídan Lerérun Búngiu. “¡Ma lubúidun

jachülürün ja anügübalin ugánu luáguti aráandaruni lúma Búngiu, apúrichija jameí ugánu buíti luáguti asálbaruni!”

¹⁶ Másutiña gürígia ja agáamba jamáalibei ugánu luáguti asálbaruni ebéresera láu. Queísi laríñaguni Isaías tidan lilíburun. “Wabúreme, míbetiña affíñerutiña luágu ugánu luáguti asálbaruni le wapúrichijabei.”

¹⁷ Ítara líña lubeíti, lídaangiñe jagáambuni gürígia ugánu luáguti Crístu gayára lan jafíñerun luágu.

¹⁸ Ába naríñagun. ¿Magáambun jamúba giñéti gayára lan jafíñerti funásan ugánu luáguti asálbaruni? ¡Agáamba jamúti! Taríñajare Lerérun Búngiu.

Agaambúaali jamálali lídan sun fulásu,
chülújali jerérun lídoun lagúmujoún larígei ubou.

¹⁹ Ába naríñagun. ¿Úagili funásan gunfaráanda jamáni Israelítagu ugánu luáguti Wasálbaragüle? Gunfaráanda jamáali, lugúndun lídan furúmiñeti cátei laríñajare Búngiu liyúmulugugiñe Moisés.

Naméendidagüdübadün jadüga ában rása ja máma náni,
nagáñidagüdübadün jadüga ában rása ja ibídiñegidina joun.

²⁰ Aríñagati giñe Búngiu liyúmulugugiñe Isaías.

Darí jamutina ja máluajaanbalina,
arúfudaguatina núngua joun ja málügüdajánbaña nuágu.

²¹ Ábaya laríñagun jawágu Israelítagu. “Sun wéyu náu agúaja joun gürígia magáambaditiña, mabuídun.”

11

Israelítagu ja sálbabaña

¹ Aríñagatinati guetó. ¿Májaali funásan Búngiu joun Israelítagu ja lumútuniña? ¡Máma líña! Áu guánarügü Israelíta áu, jádaangiñetina lirásan Abrahám, jádaangiñe lufámilian Benjamín.

² Barü lumútiña Búngiu Israel-ítagu queísi lánigu lúmagiñé meja binárü, guetó, mamájaanti joun. ¿Magáambun jumúti le taríñagubei Lerérun Búngiu luágu Elías, lé meja proféta, luágu líchuguni dúru jawágu Israelítagu lídan layúmuragun lun Búngiu? Laríñaga.

³ “Nabúreme, áfaragua jamá profétagu jilágubei, güríngua jameí buri báni latárü, áu rügáli erédera jádaangiñe bánigu, áni buséntiña giñe jáfarunina jilágubei.”

⁴ Ába laríñagun Búngiu lun. “Anuádajaadina sédü mílu wügüríña nubárua ja májuduragúngiñabaña ligíbugiñe liyáwa búngiu le Baal.”

⁵ Ítara méme giñe lídoun buri wéyu le, reídeijaña átiri jádaangiñe juríu ja anúadaja láañabaña Búngiu láu lareíni.

⁶ Ánjeinti láu lubeí lareíni Búngiu lanúadiraña, mámaali láu cátei le liyáraati gürígia guánarügü adüga, lugúndun lun jamúga ítara líña lan, mámaali jamúga areíni lareíni Búngiu.

⁷ Ítara líña lubeíti, madári jamúti sun Israelítagu le jáluajabei, anáti ja lanúadirubaña Búngiu, darí jamuti. Ja jíbiri, siñáti jánjanrun lun asálbaruni le lébunabei afíñeni luágu Búngiu, ába lígiruniña Búngiu táu tidére janígi.

⁸ Queísi taríñagun Lerérun Búngiu. “Adüga lumútiña Búngiu lun deré lan jachügü lun cátei lánina Búngiu, rúti águu le maríjinti joun, arígeirugu le magáambuti. Ítara liñáti chülü lúmoun dan le.”

⁹ Aríñagati Davíd.
Garábagua lámuga jefédujan lun sádarame,

lun jáburujan tídown, lun jasúfurirun.

¹⁰ Darú lámuga jágu, maríjin jamámuga, sebúgua lámuga gíñe janágan lábugiñe janügün lun sun dan.

Jasálbarun ja mámabaña juríu

¹¹ Nálügüda jaati guetó. ¿Láu jachúgeragun juríu, ja méme Israelítagu, jeíguatiña funásan le gumúti? ¡Máma líña! Lubáragiñe líra, láu jamájarun juríu lun jerésibiruni Crístu, jayábin ja mámabaña juríu lun jabíjubei lan asálbaruni, lun jáyeijabaña lan Israelítagu.

¹² Ánjeinti seríwi lubeí dúru le jadügübei juríu buítme lun ubouú, áni ánjein buíti lubeí lanügübei jeféridirun joun ja mámabaña juríu, ¡sarágume buídutimaabei lan dánme le jasálbarun sun juríu!

¹³ Níjein gíñe ában cátei lun nariñaguni jun, jugúya le mámabei juríu. Quei loúnajañadina lan Búngiu apúrichija luágu Crístu joun ja mámabaña juríu, weíríti nubéresen láu nuwádigimari,

¹⁴ lun gayára lan jabúseerun nirásan jáyeijanün, lun gíñe jasálbarun.

¹⁵ Ánjein ladüga lubeí lamájarun Búngiu joun juríu, jayábin ja mámabaña juríu lun jaráandarun lúma Búngiu, ¿ídatimá lubáti dánme le jerésibirúniwa? Ítara lúba joun queísi ásaaruni lídaangiñe ouweni.

¹⁶ Ánjein derégewa tubeí furúmiñetu fein to adügütu tídaangiñe fulúwaaru añoundawagutu lun Búngiu, derégewatu gíñe sun fulúwaaru ñounwaguatu to ídaangiñeboun tiábin fein tugúya. Ánjein gíñe derégewa lubeí tílagüle ában tídibu wéwe lun Búngiu, derégewañu líña gíñe tilímun.

¹⁷ Añájein jádaangiñe juríu, queísi tilímun olívo tímatimaati, chaünwatiña, gidáwatiña jagánaguagiñe lumútuniña Búngiu ladüga mafíñeni le jádaanbei. Jugúya jawéñegubei, jugúya le mámabei juríu, ja ítarabaña quei tilímun olívo to áraabuna. Ítara líña jiábin lun gabára jumá lídan tílagüle lúma lídan tibágari olívo, resíbi jugúyame labínirun Búngiu, queísi lumútuniña.

¹⁸ Marítagua jumátia luágu buídutimá jumá lueí límu le ñígubeibei méja. Ánjaün arítagua luágu buídutima jumá, jarítagua jumá luágu máma lan jugúya ágüdajabalin ílagülaü, luágu ílagülaü lan ágüdajabalün.

¹⁹ Fágua jaríñaguba. “Ánja, ába jagídarúniwa juríu lun wíchugún jawéñegua luágu olívo.”

²⁰ Jinárün luágu gidáwa jamá jagánaguagiñe lumútuniña Búngiu, jagídarúnbei lugúndun mafíñen jamá luágu Wasálbaragüle, jugúya, gabára jubeí ladüga jafíñen luágu. Manángua jumá lubeíti júngua, duárirügü jumá.

²¹ Lugúndun ánjein úa lubeí ferúduna láníña Búngiu juríu já meja lanúadajabaña lun lánigu jamá, úabei gíñe ferúduna lánün, jugúya le mámabei juríu, ánjaün ñübin lun mafíñen jumá.

²² Aríja jumeí lubeíti luweírin lareídun Búngiu, derégüdati gíñe. Derégüdati joun ja mafíñebaña, areídati joun ja afíñebaña. Lúnti jasígirun lídan lareíni láu sun jafíñen luágu, ánjein madügün jumá ítara, jagídarúba gíñe.

²³ Ánjaña ñübin juríu lun jafíñerun luágu Crístu, jíchugúyaba lídown jabára jagánagua lumútuniña Búngiu, lugúndun gabáfuti Búngiu lúnnya líchuguniña járigoún.

²⁴ Jugúya le mámabei juríu, chaünwatün tueígiñe ában olívo to áraabuna, ába jíchugún tuágun olívo to buítu, gúbume ladügüwa joun juríu ja tilímunbaña olívo buítu ja tímatimaatiña, jíchugúyaba járigoún tuágun olívo to ñígiñe lubeí jagídarúa, nariñaguña luágu lachúlürüba lan wéyu lun jerésibiruni juríu Jasálbaragüle.

Jasálbarun Israelítagu le lagúmujoún

²⁵ Nidújeñu, buséntina lun jasúbudiruni cátei le luáguti laráansejan Búngiu, lé meja arámudagúabei, lun mapántajan jumá luágu chu lan jáu lídan le jálügdagun júngua luágu buri cátei le. luágu deréragüda láaru lan Búngiu janígi Israelítagu murúsun lun Jasálbaragüle darírügü dánme le gumújali jerésibiruni ja mámabaña juríu Crístu.

²⁶ Dánme le lasúseredun líra, ábame jasálbarun sun Israelítagu, ja méme juríu, lugúndun taríñajare Lerérun Búngiu.

Liábinba Asálbaragülei Sióngiñe,
ábame lagídarun wuríbani jádaangiñe juríu.

²⁷ Nijánba nidáradun jáma,
dánme le nagídaruni jafígoun.

²⁸ Luágu ugánu le luáguti asálbaruni, barüwatiña juríu queísi láganiñu Búngiu luágu jufúleisein, láu sun líra, jínsiñegiña lun Búngiu lugúndun anúadaja lumútiña binádu jagübürigu juríu.

²⁹ Lugúndun le cátei le líchugun Búngiu, magída lumúti, gürígia ja lanúadajabaña lun lánigu jamá, lánigumemebaña.

³⁰ Jugúya, magáambaditún meja lun Búngiu, guetó, láu jamájarun juríu jagáambuni, ába gudémejabu lan Búngiu jun.

³¹ Magáambaditiña juríu lun Búngiu guetó, ánjein líra, lúnrügü gudémejabu lan Búngiu joun queísi gudémejabu lan jun.

³² Ígira lumútiña Búngiu súngubei lun magáambun jamáni, lun gayáraabei lan gudémejabu lan joun.

³³ ¡Luweírín lareídun Búngiu, lúma lichú láu! Siñáti wasúbudiruni larítangun, siñá gunfaráanda wamáni lémeri.

³⁴ ¿Cági gunfaráandabalin larítangun Búngiu? ¿Cági arúfudajabei lun?

³⁵ ¿Cági gürígia rújalibei som cátei lun Búngiu furúmiñe lun lerésibirun som cátei fáyeitime lárigiñe?

³⁶ Úati ni ában, lúmagiñe Búngiu liábin sun cátei, ligía gíñe ágüdjabalin sun cátei, áni lúngua gíñe ladügei. ¡Uweíríguni lun Búngiu lun sun dan! Ítaralá.

12

Ibágari le derégewati lun Búngiu

¹ Amúriajatina lubeíti júma, nidújeñu, lun jedéregeragun júngua le gumúti lun Búngiu queísi gürígia abágaridutiña lun jesériwidun lun, jarúmañu lan jibágari ligíbugiñe. Niján luwúyeri agúnfuliruni le áubei lagúndaara Búngiu, áni lúnti itara lan wadügüni lugúndun weírini lareíni woun.

² Jebé jabágaridun queísi lirájüñü ubou le, lubáragiñe líra, sáansi jumeí ligáburí jisáminan, sáansi lámuga gíñe ligáburí jabágaridun. Ítara lúba jíabin lun jasúbudiruni le lugúndaanbei Búngiu jun—le buídubei, le uáraguabei.

³ Queísi jumaésturun luágu lareíni Búngiu nun, aríñagatina jun sun jugúya, lun úa lan ni ában jídaangiñe arítaguti luougua weíri sügü láu le ligíabei. Lubáragiñe líra, cáda ában lúnti lasúbudiragun lúngua, según affíñeni le rúlaalíbei Búngiu lun.

⁴ Lugúndun ítara quei gíbe lán buri umégeguni luágu ábanrügü úgubu, áni máma ában méme lifísiute sun umégeguni ligía,

⁵ Ítara wáña gíñe, wagía afíñetiña, láu sun gíbe wamá, ában rügüñadiwa úgubu lídan ában lúma Crístu, áni íderaguatiwa woúngua wádaangua queísi lumégegun ában méme úgubu.

⁶ Rújali Búngiu ámuñegueinarügü ubáfu woun queísi labúseeruni líchuguni lun cáda ában, lun wesériwidun lun, lúma joun wadújeñu lueígiñe Jesucrístu. Lúnti buídu lan wayúsuruni ubáfu ligía. Ánjein rújali lubeí Búngiu ubáfu woun lun ladímurejan wayúmugugiñe, lúnti wadügüni según afiñeni le wádaanbei,

⁷ ánjein rújali lubeí ubáfu woun lun wesériwidun joun ámu, lúnti wesériwidun buídu. Le garúfudajadíbei Lerérun Búngiu, lúnti líchaagun lúngua lun arúfudajani.

⁸ Le gíchigaditi dügüdaguaü joun ámu, lúnti líchaagun lúngua lun ladügüni. Le edéweejati, lúnti magúrabun lan láguyun lun, le ábutibei, lúnti lagúmadijan láu sarágu duári, le íderaguti gudémetiña, lúnti ladügüni láu ugúndani.

Ligáburi jabágaridun lánigu Crístu

⁹ Jínsiñe jamá jidújeñu lueígiñe Jesucrístu jun láu ínsiñeni le inárüni. Iyéeregulá wuríbani jun, falájumei le buídubei.

¹⁰ Lúnti jínsiñegua jumá júmagua queísi idújeñu. Furése jumá lun jiñúragüdüni jíri jidújeñu.

¹¹ Mamáqualigu jumá lídan luwádigimari Wabúreme, seríwi jumeí táu sun janígi.

¹² Abágarida jumá gúndaañu láu eménigini le juágubei, gagúraasun jumá dan le jasúfurirun, ayúmuragua lun Búngiu, eteíngirei, súnwandan.

¹³ Íderagua jumáña afiñetiña lídan jemégeirun, resíbi jumáña ja bisídabalün láu ugúndani.

¹⁴ Amúriaja jumá labínirun Búngiu jawágun ja oúserutün wuríba, amúriaja jumá abíniruni joun, máma wuríbani.

¹⁵ Gúnda jumá jáma ja gúndaabaña, jayájua jáma ja ayájubaña.

¹⁶ Abágarida jumá lídan úraguni júmawagua. Manáangua jumá júngua, gamádagua jumá jáma ja gudémebaña. Marítagua jumá juoúgua queísi sábiugu.

¹⁷ Mafáyeira jumá wuríbani luágu wuríbani lun ni ában. Áfaagua jumá lun jadügüni le búidubei jagíbugiñe súngubei.

¹⁸ Adüga jumeí sun le juáraati lun jabágaridun lídan dan jáma súngubei.

¹⁹ Nidújeñu jínsiñetiña nun, mágyugüda jumeí wuríbani, ígira jumeí lun Búngiu lan afáyeigüda luágu. Tariñajare Lerérun Búngiu. “Áu lúnbei nafáyeigüdüniña gürígia luágu jaríban, líña Jabúreme.”

²⁰ Aríñagati giñe Búngiu. “Ánjein lamá lubeí bágani, rúba eígini lun, ánjein mágürabu lubeí, rúba dúna lun, lugúndun láu badügüni líra, lebéloruba busíganu lun luágu luríban louserunibu.”

²¹ Mígiraguagüdá búngua lun lagañeirunibu wuríbani lun báguyugüdüni wuríbani luágu wuríbani, lubáragiñe líra, gáñibeí wuríbani láu buídu le badügübei.

13

¹ Lúnti jíchaagun súngubei júngua lábun jalúrudun gumádimatiña, lugúndun ítara líña laráansejan Búngiu lun ñíbei lan lúrudu, áni gumádimatiña ja lídaanbaña jabára, labúseerun Búngiu añajein lubeí ñi.

² Gürígia lubeíti le awügüríjoúti lun gumádi, múaraanti láu le laríñagubei Búngiu, áni ja awügüríjoútiña ítara, gadúnruntiña luágu líra áni jafáyeiruba luágu.

³ Máma lúnñanu jíchugun gumádimatiña anúfudei joun ja adügübalin le buídubei, aná joun ja adügübalin le wuríbabei. ¿Buséntibu babágaridun manúfudeiga lueí lúrudu? Buídulá bouserun, ábame buídu ban lurúma lúrudu,

⁴ lugúndun lesériwiduñe lun Búngiu luágu bufúleisein. Ánjein wuríba bouserun, lúnti janúfude ban, ladüga máma luágu ni cáta gabáfu lan lúrudu

lun lafáyeijagüdün luágu dúru, quei lesériwiduña lubeí lun Búngiu lun lafáyeijagüdün luágu dúru.

⁵ Ligía lúnti lubeí úragua wamá lúma lilúrudun wageíra, mámarügü lun máburujan lan asúfuriruni wawágun, lúnti ítara lan lun jarúmañu lan warítangun.

⁶ Ligía gíñe lébubei jafáyeijan seínsu lun gumádi, lugúndun jesériwiduña lúrudugu lun Búngiu áni lun cátei le jeténira.

⁷ Ru jumeíme le jáni cáda gürígia joun. Fáyei jumeí le lagúburajabei gumádi luágu jufúlasun, lúma buri ámu cátei líbe líra, fáyei jumeí le lúnti jafáyeiruni luágu cátei le ñübinbei jun boúgudigiñe lueí jageíra. Gagáambadi jumá joun gumádimatiña, ru jugúyame inébesi joun queísi lubúdubu.

⁸ Máni jumá dúweiti ni ca úma, lueídügüya lidúweitina ínsiñeni le jadúweirubei júmagua. Le jínsiñejabuti lun gürígia líledi, adüga láali sun le lubeíbei lilúrudun Búngiu láu ladügüni líra.

⁹ Tariñajare Lerérun Búngiu. “Magámaridabá gürígia maríeitiña, máfarajabá, míwerujabá, maríñagabá iyéeni luágu ni ában, mawámadalá jemégen mútu bun.” Gúnfuli wamáali sun gumádi le, lúma buri le líbiri, láu wagúnfulirun lúma lilúrudun Búngiu le aríñagubei. “Jínsiñelá gürígia bíledi bun queísi bínsiñegua búngua.”

¹⁰ Le jínsiñejabúbei, madügünti wuríbatí lun ni ában, ánjava lubeíti jínsiñejabu, gúnfuli wamáali sun lilúrudun Búngiu queísi lubúdubu.

¹¹ Lúnti ítara lan ligáburí wabágaridun lugúndun wabágariduña lídoun lagúmujoún dan. Dánjali lun wagágudun lídaangiñe idábagu, lugúndun yaráfatimaajali óra lun lagíribudun Wasálbaragüle ubouágun sügü láu dán meja le wafíñerunbei luágu ugánu luáguti asálbaruni.

¹² Belújali áriebu buídu, yaráfaali larúgadun, ligía lúnti lubeí wígiruni wadügüni cátei wuríbatí le adügübei lábugiñe lubúriga, lun wadáurunun wadáurangun queísi súdeara ja lábugiñetiña larúgounga.

¹³ Eíbuga wamá queísi lubúdubu ítara queísi gürígia ja buídubaña, úouga ni cáta luágu jagáburí lun jarámudagun lueí jaríjin gürígia. Mabágarida wamá lídan bacháruaü, lúma buri lanárime fédu, ni lídan salúfuri lúma iwíyeni, ni lídan gáganiguaü lúma gimúgaü.

¹⁴ Lubáragiñe líra, rújumei Crístu guánarügü jubáragiñe lídan sun cátei, masáminara jumá lun jíchugun ugúndani lun lagúbüri ayúmajani.

14

Madímurejabá luágu bidúje lueígiñe Jesucrístu

¹ Ánjein débili lubeí ában gürígia lídan lafíñen, resíbi jumeí, maríñagunga ni cáta lun luágu cátei le machourunbei luágu.

² Queí buri, añájein derégüdati jafíñen, jarítaguatiña luágu gayára lan jeígin afíñetiña furúmieguaügü cátei áni jeréderuba jarúmañu ligíbugiñe Búngiu. Añájein jíbiri, débilitiña lídan jafíñen, meígintiña úwi.

³ Le eígiti furúmieguaügü cátei, moún lumuti ünabu lan lanügüni le meíginbalin, le gíñe májabei leígin furúmieguaügü cátei, moún lumuti gíñe ladímurejan luágu le eígibalin, lugúndun resíbi láali Búngiu gürígia ligía queísi lánigu.

⁴ ¿Cátabuñadíbugi lun badímurejan luágu gürígia le esériwidubei lun Búngiu? Ánjein erédera buídu o wuríba, Labúreme lúnbei laríjin láu líra. Áni leréderuba buídu lugúndun gabáfuti Búngiu lun leréderagüdüni buídu.

⁵ Nijánya ában jémpulu. Añájein gürígia weírítí janügüni ában wéyu lueí ámu wéyu, añájein jíbiri, afíñetiña luágu ában lan lábu sun wéyu. Cáda ában lúnti lachou ruruni le uágubei larítagua.

⁶ Le areídubei som wéyu, ladügüñein lun líchugun inébesi lun Búngiu. Le eígibei furúmieguarügü cátei, leígini lun líchugun inébesi lun Búngiu, lugúndun rúti eteíngiruni lun Búngiu luágu eígini ligía. Le meíginbei úwi ladüga liloúguan lafiñen, lun líchugun inébesi lun Búngiu ladügei, rúti gíñe eteíngiruni lun Búngiu luágu cátei le gayáraabei leígin según lafiñen.

⁷ Naríñagubalin líra lugúndun úa lan ni ában wádaangiñe abágariduti lun guánarügü, úa ni ában ouweti lun guánarügü.

⁸ Ánjawa abágarida, wabágariduña lun wadügüni lugúndan Búngiu, ánjawa ouwe, wounweña según lugúndan Búngiu. Ítara líña lubeíti, dándu lídan ibágari queísi lídan ouweni, láni Crístu wagía.

⁹ Jiláti Crístu, ábaya labágaridun lun Wabúremebei lan, wínwañu wagía yebe, jiláñu yebe.

¹⁰ ¿Ánjein bugúya, ca uágu badímureja luágu bidúje lueígiñe Jesucrístu? ¿Ca uágu banügei quei ni cáta? Búngiu rügüñein lun lagúseragüdün, áni sun wagía, waráramuba ligíbugiñe lun wagúserun,

¹¹ queísi taríñagun Lerérun Búngiu.

Inárüni itara quei gabágari nan, líña laríñagun Búngiu, luágu jájuduraguba lan sun gürígia nigíbugiñe,

áni jasúbudirubadina súngubei ligíbugiñe guríriguaü.

¹² Cáda lubeíti ában wádaangiñe, lagúseruba luoúgua lúma Búngiu.

Machúgeraguagüdadeí bidúje

¹³ Ligía, moún lubeí wadímurejan jawágu wadújeñu lueígiñe Jesucrístu. Lubáragiñe líra, derébugulá jarítagan lun madügün jumá ni cáta le gayáraati lachúgeraguagüdüni jíbiri, o láburegüdüni lan lídoun figou.

¹⁴ Subúdi numúti luágu úa lan ni cáta le leígibei gürígia lun lawíyeduni ligíbugiñe Búngiu, áni choúru numúti líra, áu queísi afiñeti luágu Jesucrístu. Láu sun líra, ánjein jarítagua lubeí ában gürígia luágu marúman lan ában cátei, marúmaanti lun, áni figou lun lun leígini.

¹⁵ Ánjeinti bañáwurija lafiñen bidúje láu cátei le beígibei, mámaali bagáburiduña láu ínsiñejabuni. Madügabá lun leféridirun ában gürígia le ueígiñebei loúwe Crístu, ladügarügü beígin ítaga cátei.

¹⁶ Míchiga jumá lubeíti lúgaaru lun ladímurejoún wuríba luágu cátei le gayáraabei jadügüni queísi afiñetiña luágu Crístu.

¹⁷ Larúeijan Búngiu máma cátei luáguti le eígibei o atúbei, luáguti ában ibágari le lánina ísuruni, darángilaü lúma ugúndani le líchugubei Sífiri Sándu woun.

¹⁸ Le esériwiduti lun Crístu lídan igáburi le, gúndaati Búngiu láu, áni buíti gíñe jarúma gürígia.

¹⁹ Ítara méme wamá lubeíti áluaja lun lídan lan darángilaü sun cátei, lun gayára lan wíderagun wámagua lun wawáanserun lídan cátei le lánina Búngiu.

²⁰ Magürinchaguabeí luwádigimari Búngiu lídan libágari ában gürígia láu cátei le beígibei. Inárüni luágu jarúma lan sun eígini ligíbugiñe Búngiu, le wuríbabei, lun leígin cátei le áburugüdütiña ámu gürígia lídoun figou.

²¹ Buíti lun meígin ban úwi, matún bínu, madügün ni cáta le achúgeraguagüdüti bidúje, o láburegüdüni lan lídoun figou, o ledébilragüdüni lan lafiñen.

²² Afiñeni le buágubei, lúnti buágu guánarügü lan ligíbugiñe Búngiu. ¡Gúndaati gürígia le gayáraabei laríñagun luágu buídu lan cátei le ladügübei, masándiragunga ligía lúngua láu dúru!

²³ Ánjeinti le eígibei ában cátei láu machoúrui luágu buídu lan leígini queísi afiñeti luágu Crístu, gadúnrunti ladüga leígini, lugúndun meígin lumúti láu

afíñeni. Sun le wadügübei, ánjawa arítagua luágu fágua lan moun láani wadügüni, figou woun.

15

Gúndaagüdübá gürígia bíledi, máma amürü guánarügü

¹ Wagía le jérebei lídan wafíñen, lúnti gagúraasun wamá jabá ja louguagiñabaña afíñe, lúnti warítangun luágu le buídubei joun, mámarügü luágu wíchugun ugúndani woúniwagua.

² Cádá ában wádaangiñe, lúnti lagúndaaraguagüdüni gürígia líledi láu le buídubei lun gürígia ligía, lúma láu le gayáraati lagánwoundagüdüni lafíñen.

³ Ni Crístu, míchugunti ugúndani lúniwagua, lubáragiñe líra, suséreti le abürüjoubei tídan Lerérun Búngiu lun. “Núguchi, áburujati janábajan ja anábubalibu nuágun.”

⁴ Sun le aríñawagübei tídan Lerérun Búngiu lúmagiñe binárü, lun larúfudajoún woun labürüjoua, bürüwatí meja dimúrei buri ligía lun wanügün gurásu lúma dügüdaguaü lídaangiñe, gayára lámuga weménigiduntima luágu Búngiu.

⁵ Búngiu le íchugubei gurásu lúma dügüdaguaü, íderagualaün lun jabágaridun lídan dan jáma jíbirigu, queísi ladügüni Jesucrístu.

⁶ Ítara lúba, sun lan wagía lídan ában, láu ábanrügü umálali, wíchuguba uweírighuni lun Búngiu, le Lúguchi Wabúreme Jesucrístu.

Agáambatiña ja mámabaña juríu luágu Wasálbaragüle

⁷ Resíbigua jumá lubeítí júniwagua quei gíñe lerésibiruníwa Crístu, lun liñurúniwa líri Búngiu.

⁸ Le nariñagubei, luágu liábinbei lán meja Crístu lun lesériwidun joun juríu, lun lagúnfulirun dimúrei le íchugübei joun binádu wagübürigu, lun larúfudún luágu gúnfuli láani Búngiu lerérun.

⁹ Liábinbei gíñe lun jíchuguba lan ja mámabaña juríu uweírighuni lun Búngiu luágu lareídun, quei tariñaguni Lerérun Búngiu.

Ligía níchuguba lubeí uweírighuni bun jagánaguagiñe ja mámabaña juríu, nerémujaba gíñe luágu buweírighun.

¹⁰ Tariñajare gíñe Lerérun Búngiu.

Gúnda jumá, jugúya le mámabei juríu, úara jáma ja lánigubaña Búngiu.

¹¹ Tariñajare gíñe.

Rújuma sun ja mámabaña juríu inébesei lun Búngiu, adímureja jamá sun gürígia luágu luweírighun.

¹² Lariñajare gíñe Isaías tídan Lerérun Búngiu.

Liábiba ában ladügawagun Isaí, le lúnbei lagúmadiruniña ja mámabaña juríu.

Jagía, jeménigiduba luágu.

¹³ Búngiu, le íchugubalin eménigini woun, buíngüdalaün láu ugúndani lúma darángilaü lídan jafíñerun luágu, lun buíñu jumá láu eménigini, láu lubáfu Sífiri Sándu.

¹⁴ Nidújeñu, choúruguatina núngua luágu buin jíña lan láu areíduni lúma subúdi luágu wafíñen luágu Crístu, luágu gíñe gíchigadi jumá dimúrei buítí joun jíbirigu.

¹⁵ Tídan gárada to, abürüjaadina jun láu sun furáangu luágu buri cátei le lun mabúlieidun jumáni. Nadügüñein luágu wadágimanu le rúlaalíbei Búngiu nun láu lareíni,

¹⁶ lun nesériwidun lun Jesucrístu jagánagua ja mámabaña juríu. Seríwi le nadügübei, napúrichijani ugánu lúmagiñeti Búngiu luágu Wasálbaragüle lun

nanügübaña lan ja mámabaña juríu lun Búngiu, lun lerésibiruniña queísi gürígia ja jarúmaaru janígi láu luwádigimaridun Sífiri Sándu jádan.

¹⁷ Ítara líña lubeíti, áu queísi ában afíñeti luágu Jesucrístu, gébunati gúnda nan lídan nesériwidun lun Búngiu,

¹⁸ luágu rügüñein buri cátei le ladügübei Crístu guánarügü nídaangiñe nadímureja, lun jayábin ja mámabaña juríu lun jagáambubei lan Búngiu. Yúsu láali Crístu nerérun lúma náfaagun,

¹⁹ luweírín buri seíni lúma buri miláguru le nadügübei láu lubáfu Sífiri Sándu nídan, lun lanügüniña ja mámabaña juríu lúmoun. Láu igáburi le, jóustagüda náali lapúrichijoún ugánu luáguti asálbaruni lídaangiñe Crístu, lúmagiñe Jerusaléngiñe darí loúbawagun Ilírico.

²⁰ Ítara líña áfaaguaadina lan lun napúrichijani ugánu luáguti Wasálbaragüle le ñí lumuti magaambúngili lan líri Crístu. Mabúseeruntina nuwádigimaridun lun Crístu lídan fulásu le ñí lumuti chülújali lan ámu láu ugánu luágu, nubáragiñe,

²¹ lubáragiñe líra, súnwandan busén nan nagúnfuliruni dí múrei lébei le taríñagubei Lerérún Búngiu.

Ja masúbudirungiñabaña luágu, jagáambuba luágu, gunfaráanda jagíame luágu.

Jarítaguati Páblo lídin Róma

²² Ladüga nesériwiduña lan lun Crístu lídan ámu fulásu, siñágili lubeí nídin bisídaün, láu sun gíbeeli lan weíyaasu nabúseerun nadügüni.

²³ Guetóti, quei gumúnaali lan nuwádigimari lueígiñe oubaü le, áni quei lúmagiñe lan binárü nabúseera nídin aríjaün,

²⁴ agúrabatina násügürün bisídaün dánme le nídin Espáña. Lárigiñeme aríja náadün lan lun wagúndaaragun wámagua murúsuraü, agúrabatina lun jíderagubadina lan luágu nuweíyasun yágütoun.

²⁵ Ánjein guetó, neíbuga Jerusalén, barüína cátei joun wadújeñu lueígiñe Jesucrístu ñi.

²⁶ Lugúndun wadújeñu ja Macedóniabaña jáma ja Acáyabaña jarítaguaaña jóundarun seínsu jádaangua lun jóúnajani joun idújeñu gudémetiña ja Jerusalénbaña.

²⁷ Jarítaguaaña luágu buídu lan lun jadügüni cátei le, áni richátiña, lugúndun dúwei jamúti joun le tímatimaati, lugúndun ítara quei jafánreinraguni afíñetiña ja juríu jarísín le lánina siélu jáma ja mámabaña juríu, lúnti giñéti jíderaguniña afíñetiña ja mámabaña juríu afíñetiña ja juríu luágu jemégeirun ya ubouágu.

²⁸ Dánme lubeíti gumúnaali cátei le, derége neíme seínsu le joun, ábame nídin lun Espáñoun, bisída naünme dánme le násügürün.

²⁹ Choúru numúti luágu dan lánme nachülürün júmoun, nachülürüba lan buin láu abíniruni lúmagiñe Crístu.

³⁰ Nidújeñu, ayúmuraguatina jun luágu jínsiñejabu lun Wabúreme Jesucrístu, lúma luágu ínsiñeni le líchugubei Sífiri Sándu woun, lun júaradun núma lídan áfaaguni, ayúmuragueina lun Búngiu nuágu.

³¹ Amúriaja jumá lúma Búngiu lun leséfurunina jaweí mafíñetiña ja Judéabaña, lun gíñe buídu lan lerésibirúniwa íderawaguni le nanügübei joun wadújeñu ja Jerusalénbaña,

³² lun gúndaabadina lan dánme le nachülürün júmoun eméraagua murúsun, ánjein ligía lubeí lugúndaabei Búngiu.

³³ Júmalá Búngiu le íchugubei darángilaü. Ítaralá.

16

Mábugaï lun cáda ában

¹ Táu gárada to, nasúbudiragüdüñoun Fébe, wadúje lueígiñe Crístu to esériwiduboun wáma tídan ligílisi to Cencréaboun, jun.

² Dánme le tachülürün júmoun, resíbi jumoun buídu lídan líri Wabúreme, queísi lúnti lan ladügün jádan idújeñu lídan afíñeni. Íderagua jumounme lídan furúmieguarügü cátei le temégeirun, lugúndun tugúya, sarágujaña tíderagun, íderagua táadina gíñe.

³ Mábuga níña tun Priscíla, lúma lun Aquíla ja nidújeñu lídan nesériwidun lun Jesucrístu.

⁴ Jagía, rújamuti jabágari guánarügü lídoun lénreengúnga lun jasálbaruni nibágari, teínqui níña lubeíti joun, áni mámarügü áu, sun gíñe wadújeñu ja tílana jalígilisin ja mámabaña juríu, rújamuti jeteíngirun joun luágu líra.

⁵ Mábuga níña gíñe joun wadújeñu ja oúndaragubaña jábiñe Priscíla lúma Aquíla. Mábuga níña lun numáda Epenéto le jínsiñebei nun, le furúmiñebei afíñeruti luágu Crístu ubúругu Acáya.

⁶ Mábuga níña tun María to ñadágimeinjáruboun sarágu jagánagua, jugúya Rómána.

⁷ Mábuga níña joun nupaísanu Andrónico lúma Junías já meja níbirigubaña furísunrugu, buíti jadímurejan láni Crístu apóstolugu jawágu, jagía gíñe afíñerubaña luágu Crístu nubáragiñe.

⁸ Mábuga níña lun Amplías, numáda jínsiñeti nun queísi lánigu Crístu.

⁹ Mábuga níña lun Urbáno, woúba lídan wawádigimari luágu Jesucrístu, lúma lun Estáquis, numáda le jínsiñebei nun.

¹⁰ Mábuga níña lun Apéles, le arúfuda láalibei lafíñen luágu Crístu sarágu weíyaasu, mábuga níña gíñe joun tílana lúban Aristóbulo.

¹¹ Mábuga níña lun nupaísanu Herodión lúma joun tílana lúban Narcíso ja afíñebaña luágu Wabúreme.

¹² Mábuga níña joun Trífena túma Trífosa, ja ñadágimeinbaña lídan luwádigimari Wabúreme, lúma gíñe tun wadúje Pérsida to jínsiñeboun woun, to adügaaruboun sarágu lídan líri Crístu.

¹³ Mábuga níña lun Rúfo, wügüri le buídubei igáburi le tímatimaati ligíbugiñe Crístu, mábuga níña gíñe tun lúguchu, to gíñe ítarajaruboun quei ában úguchuru nun.

¹⁴ Mábuga níña joun Asíncrito, Flegónte, Hérmes, Patróbas, Hérmes, lúma joun wadújeñu ja jámabaña.

¹⁵ Mábuga níña gíñe lun Filólogo lúma tun Júlia, lun Neréo lúma tun lítu, lun Olímpas lúma joun sun wadújeñu lueígiñe Crístu ja jámabaña.

¹⁶ Chúgua jumá júngua lídan líri Wabúreme, arúfuda jumámugei luágu lídaañadiwa lan ában wámagua. Mábuga jáña sun tílana lilígilisin Crístu jun.

¹⁷ Nidújeñu, ayúmuraguatina jun lun jaríjiniña cátaña lan ja afánreinraguagüdübaña güri-gia, ru jagía achúgeraguágülei lun jafíñen. Múaraanti le jadügübei lúma le arúfudajóubei jun. Díse jumá jaweí güri-gia jagía,

¹⁸ lugúndun güri-gia jagía, mesériwiduntiña lun Wabúreme Jesucrístu, jóungua guánarügü jesériwida. Jeyéedañati güri-gia ja ünabugutiña láu buri liñúlun lúma lubuídun lagaambún jerérun.

¹⁹ Subúdi jamúti sun güri-gia luágu ñüdüñ jumá láu le lubeíbei Búngiu, ligía gúnda nubeí, buséntina gíñe lun furése jumá lun jadügüni le buídubei, máma lun le wuríbabei.

²⁰ Búngiu le íchugubalin darángilaü, lagáñeiragüdübadün luágu Máfia, furése. Binílaün Wabúreme Jesucrístu.

²¹ Mábuga líña Timotéo jun, le nouba lídan wadágimanu, mábuga jaña gíñe Lúcio, Jasón lúma Sosípater, ja nupaísanu, jun.

²² (Áu, Tércio, le abürüjabarun gárada to, mábuga níña gíñe jun, nidújeñu lueígiñe Wabúreme.)

²³ Mábuga líña Gáyo jun. Naganouña tídan lúban to gíñe lafúrederúboun joun sun tílana ligílisi. Mábuga líña gíñe Erásto jun, le ágüdajabalin liseínsun fulásu, lúma gíñe wadúje Cuárto.

²⁴ Binílaün Wabúreme Jesucrístu sun jugúya. Ítaralá.

Rúwama uweíriguni lun Búngiu

²⁵ Guetóti, rúwama inébesei lun Búngiu, le gayáraabei ladügünün lúntima derégüdagü jumá lídan jafíñen, según ugánu luáguti asálbaruni le napúrichijabei, lúma arúfudajani luágu Jesucrístu. Arámudaguati meja laráansejan Búngiu luáguti wasálbarun lúmagiñe lubáragiñe lagúmeserun uboú, láu sun abürüja jamá meja profétagu luágu.

²⁶ Guetó, láu lugúmadin Búngiu le wínwanbei lun sun dan, subúdigüdáwaali luágu Wasálbaragüle joun sun gürígia lun gayára lan jafíñerun luágu, gagáambadi jagíame lun Búngiu.

²⁷ ¡Uweíriguni lun Búngiu le ligíarügüti, ábanrügüti, le ligíarügüti chu áu, uweíriguni lun, lídaangiñe Jesucrístu, lun sun dan! Ítaralá.

FURÚMIÑETU **LIGÁRADAN PÁBLO JOUN** **CORÍNTONA**

Labürüjan Páblo joun tílana ligílisi Corínto

¹ Áu Páblo, wálaadina Búngiu láu lugúndan lun ábanbadina la láni Jesucrístu apóstolu, le méme gírubei ában le loúnajan. Nabürüjañoun gárada to, úara lúma wadúje Sóstenes, jun,

² jugúya le wadújeñu lueigiñe Jesucrístu ja tílanabaña lilígilisin Búngiu to ubúruguboun Corínto, ja lánigubaña Búngiu ladüga lídaañadün lan ában lúma Jesucrístu. Wájali Búngiu jun lun jedéregeragun júngua lun le gumúti, queísi wájali lan joun sun ja agúarubalin líri Wabúreme Jesucrístu lídan sun fulásu lun jedéregeragun joúngua lun. Jesucrístu Jabúremebei, ligía gíñe Wabúremebei.

³ Resíbi jumeí abíniruni lúma darángilaü lúmangiñe Wáguchi Búngiu lúma lúmangiñe Wabúreme Jesucrístu.

Abíniruni le wánibei lídaangiñe Jesucrístu

⁴ Súnwandan neteíngiruni Búngiu juágu, luágu abíniruni le rúlaalíbei jun láu lareíni, lídaangiñe Jesucrístu.

⁵ Ladüga lídaañadün lan ában lúma Crístu, rújali Búngiu sun luwúyeri irísini le lánina siélu jun, rújali ában oúnwenbun subúdi jun luógu, lun gayáraabei lan jadímurejan luágu láu ában lichú áu.

⁶ Ítara líña geféen jumá luágu inárüni lan le waríñagubei jun luágu Crístu.

⁷ Láu igáburi le, úati ni cáta jemégeirun lídaangiñe le líchugubei Crístu, sun anjúnja lan agúrabajei wéyu le lúnbei lagíribudun Wabúreme Jesucrístu uboúagun.

⁸ Lágüdadabádün Búngiu derégüdagü lídan jafíñen darí lúmoun lagúmujoún, lun úa lan ni ában íchuguti jidúnrun luágu ni cáta dánme le liábin Wabúreme Jesucrístu.

⁹ Súnwandan lagúnfuliruni Búngiu lerérun, áni ligía agúarubei jun lun lídan jumá ában lúma Jesucrístu, le Liraü, le Wabúreme.

Fánreinguaü jádan lánigu Búngiu

¹⁰ Nidújeñu, ayúmuraguatina jun luágu líri Wabúreme Jesucrístu, lun júaradun, lun meréde jumá fánreinguañu. Abágarida jumá lídan úarani le gumúti, láu ában méme luwúyeri asáminaruni lúma ayúmajani.

¹¹ Naríñagunbalin le, nidújeñu, lugúndun aríñagaaña ja jádaangiñebaña lufámilian Cloé luágu níjein lán nege múarani jagánagua.

¹² Ámuñegueinarügü lán nege cátei laríñagun cáda ában jídaangiñe, añájein nege jídaangiñe, aríñagatiña. “Áu, lánigu Páblo áu”, jaríñaga jíbiri. “Áu, lánigu Apólos áu”, jaríñaga jíbiri. “Áu, lánigu Pedro áu”, jaríñaga jíbiri. “Áu, lánigu Crístu áu”:

¹³ ¿Cámegi sun le? ¿Fánreinwaguati funági Crístu? ¿Dáwaguatina funági luágu gurúwa luágu jufúleisein? ¿Ódi lídan níri jabásterá?

¹⁴ Teínqui níña lun Búngiu luágu mabásteragüdün nan ni ában jídaangiñe lueídügüya Críspo lúma Gáyo,

¹⁵ Ítara, úati ni ában lun laríñagun luágu lídan lan níri labásterá lun nánigu lan.

¹⁶ Narítaguñein guetó luágu badíseigüda náani gíñe Estéfanás jáu sun tílana lúban, marítaguntina ánjein badíseigüda nubeí ámu.

17 Mouñajan lumútina Crístu abásteragüdaja, loúnajañadina apúrichijei ugánu luáguti lasálbaruniña gürígia, máma láu apúrichijani le weíriguburiti, lueí lagídarun lídaangiñe laníchigu loúnwen Crístu luágu gurúwa.

Arijúati lubáfu Búngiu lúma lichú láu lídan Crístu

18 Ítara líña ugánu luáguti loúnwen Crístu luágu gurúwa quei libídiouniga áu joun ja lúnbaña jeféridirun, ánjein woun, wagía le lúnbei wasálbarun, subúdi wamúti luágu lídaangiñe lan ugánu luáguti loúnwen Crístu larúfudei Búngiu lubáfu lun lasálbaruniña gürígia.

19 Bürüwati tídan Lerérun Búngiu.

Nagürinchagubei lichú áu le lánina ubouú le, nadügübei jafúrendeí furéndeitiña lun ni cáta me ánjein máma lubeí númagiñe liábin.

20 ¿Cáti un ju lan le chúbei áu, o le arúfudajabei, o le lan gasígenejadibalín buri cátei le lánina ubouú le? Úati ju lan lun ni cáta, adüga láali Búngiu lichú láu ubouú le lun libídiounigame áu.

21 Láu lichú láu, adügati lun masúbudirun jamáni ja lánigubaña ubouú láu lichú áu le jawágubei. Láu giñe lichú láu, ába laráansejan lun lasálbaruniña ja afiñebaña luágu larigiñe jagáambuni ugánu luágu loúnwen Crístu jawágu, láu sun barü jamaani jíbiri gürígia ugánu le quei libídiouniga áu.

22 Buséntiña juríu jaríjin miláguru lun jafiñerun luágu Crístu, ja mámabaña juríu, buséntiña lun láubei lan lichú áu arúfudajani lun gayáraabei lan jerésibiruni.

23 Ánjein wagía, wapúrichija luágu Crístu le ádarawagúbei luágu gurúwa. Jayábiti juríu, siñáti jerésibiruni ában asálbaragülei le ouwebei láu ában luwúyeri ouweni le busíganudünati líbe líra, játi mámabaña juríu, janügüni quei libídiouniga áu.

24 Láu sun líra, añájein jádaangiñe juríu jáma ja mámabaña juríu ja agáambubalin lagúarun Búngiu joun lun lánigu jamá. Jagía, gayáraati jaríjini lubáfu Búngiu lídan loúnwen Crístu, lúma lichú láu lun lasálbaruniwa ítara.

25 Joun lirájüñü ubouú, libídiouniga áu laráansejan Búngiu, wel, weíriti lichú láu Búngiu sügü láu le chútimaabei áu ubouúagu.

26 Nidújeñu, lúnti jasúbudiruni luágu wájali lan Búngiu jun, láu sun míbe jamá jídaangiñe chúti jáu según ubouú, áni míbetiña giñe jídaangiñe weírigutiña, o jádaangiñetiña lan familia íñugutiña.

27 Anúadaja láaña Búngiu ja ibídiouguabaña áu según ubouú lun líchugun busíganu joun ja chúbaña áu, láu jaríjini luágu ni cáta lan lichú jáu ligíbugiñe Búngiu. Anúadaja láaña giñe ja lanügübaña ubouú quei mabáfutiña lun líchugun busíganu joun ja gabáfubaña, láu jaríjini luágu ni cáta lan jabáfu ligíbugiñe Búngiu.

28 Anúadaja láaña Búngiu ja maweírigunbaña ubouúagu, ja áubaña mebéresenwa lan, ja ni cátabaña, lun larúfuduni luágu ni cáta lan ja anáangubaña jóungua ubouúagu.

29 Úati lubeíti ni ában gayáraati lanáangun lúngua ligíbugiñe Búngiu.

30 Rúládün Búngiu guánarügü jugúya afiñetiña lídoun ában lúma Jesucrístu. Ladüga cátei líra, ibíjatiwa lichú áu lúmagiñe Crístu, gayáraati lerésibiruniwa Búngiu queisi richáguatiña, derégeguañu woúngua lun, sálbañu.

31 Ítara líña lubeíti adüga wameí quei tariñagun Lerérun Búngiu. “Le busénti ladímurejan luágu uweíriguni, adímurejalá luágu luweírin cátei le adüga láalibeí Wabúreme Crístu woun.”

2

Ugánu luáguti Crístu le ádarawagúbei luágu gurúwa

¹ Nidújeñu, dán meja le nídinbei lun nadímurejan jun luágu linárün Búngiu, adúga numúti mayúsurunga dimúrei buri íñuguti.

² Dan lé meja júma nubeí, máluguntina meja napúrichijan luágu ámu cátei lueídügüya luágu Jesucrístu le ádarawagúbei luágu gurúwa.

³ Ába narúfudagun núngua jun queísi ában wügüri gudémeguti, adádagareina láu anúfudei lueí jamúga níjein lan mégeiti lídan nuwádigimari luágu Wabúreme.

⁴ Dán meja le nadímurejanbei jun, ába napúrichijani Lerérun Búngiu jun, máluajantina nagáñeirunün láu buri dimúrei le jadímurejan wügüriña chu táu. Lubáragiñe líra, láurügü lubáfu láni Búngiu Espíritu nadímureja jun, ába jasúbudiruni luágu inárüni lan le naríñagubei jun.

⁵ Ítara líña jafiñerun lídaangiñe lubáfu Búngiu, máma lídaangiñe lichú jáu gürígia.

Arúfudaguati Búngiu lúngua lídaangiñe láni Espíritu

⁶ Láu sun líra, adímurejatiwa luágu ában luwúyeri lichú áu joun ja weínamujañábaña lídan jafiñen. Ánjeinti lichú áu ligía, máma lánina ubou le, máma gíñe jáni ja agúmadijabaña ya ubouagu, ja madíseelibeí ánjañame gumúgua.

⁷ Luágu lichú láu Búngiu wadímureja, le áubei laráanseja lúmagiñe lubáragiñe ladügüni ubou lun lasálbaruníwa lun sun dan, gafánran wamámuga lídan sun luweírigun Crístu. Ligía rügüñein meja asúbudirei aráansejani ligía, guetó, subúdigüda láali woun.

⁸ Játi gumádimatiña lánina ubou le, siñáti gunfaráanda jamáni laráansejan Búngiu lubá wasálbarun, lugúndun lun jamúga gunfaráanda jamáni, mádaragun jamúti jamúga Crístu luágu gurúwa.

⁹ Ítara líña queísi taríñaguni Lerérun Búngiu. Maríjiñaja jamágili gürígia cátei buíti lé buri laráansejabei Búngiu joun ja jínsiñejabúbaña lun, magáambuñajagiña gürígia luágu cátei buíti líbeina líra, marítaguntiña ída lúba lan.

¹⁰ Ába lasúbudiragüdüni láni Búngiu Espíritu, le méme Sífiri Sándu, luáguti buri sun lubuídun cátei ligía woun, wagía afiñetiña. Aríaja lumúti Sífiri Sándu sun cátei, áni subúdi lumúti lujúlilin-ágei larítangun Búngiu.

¹¹ ¿Ca jádaangiñe gürígia gayáraabei lasúbudiruni ca lan tídaanbei lanígi ában gürígia, lueídügüya espíritu le lídaanbei gürígia ligía? Ítara líña gíñe, láni rügüñein Búngiu Espíritu asúbudirei sun cátei le lánina Búngiu.

¹² Wagía afiñetiña, máma ában espíritu le lánina ubou werésibirubei, Sífiri Sándu le ñúbinbei lúmagiñe Búngiu, ligía werésibirubei, lun gunfaráanda wamáni le rúlaalíbei Búngiu woun láu lareíni.

¹³ Adímurejatiwa luágu lareíni Búngiu láu buri dimúrei le larúfudajabei Sífiri Sándu woun, máma láu buri dimúrei le wafúnrendeirun láu lichú wáu, le jáni gürígia. Ítara líña, laú lubáfu Sífiri Sándu, wafúnraanguagüdei linárün Búngiu joun gürígia ja íbíjubalin Sífiri Sándu.

¹⁴ Gürígia le mibíjinbalin Sífiri Sándu, májati lun larítangun Búngiu le larúfudajabei láni Búngiu Espíritu jádaangiñe gürígia, lugúndun libídiouniga áu lanügüni, siñá lumuti gunfaráanda, lugúndun cátei lán buri le, láu rügüñein lubáfu Sífiri Sándu gayára lan gunfaráandawa lan.

¹⁵ Ánjeinti gürígia le gámati Sífiri Sándu, gáma lumúti larúgounga le líchugubei Sífiri Sándu luágu sun cátei, jayábiti ja lirájüñü ubouú, siñáti gunfaráanda jamáni cáteiñein lan gürígia le eíbugubei lídan larúgounga le líchugubei Sífiri Sándu.

¹⁶ Queísi laríñawagun tídan Lerérun Búngiu. “¿Ca gunfaráanda jamáalibei lisáminan Búngiu? ¿Ca gayáraabei larúfudajan lun Búngiu?” Láu sun líra, wagía afíñetiña, níjein lisáminan Crístu wádan ladüga ibíja wamáali Sífiri Sándu.

3

Luwádigimari Páblo lun Búngiu lídan ában jáma jíbiri

¹ Láu sun líra, nidújeñu, dán meja le júmañadina lan, siñáti méja nadímurejan jun queísi joun gürígia ja lagúmadirubaña Sífiri Sándu, adímurejatina meja jun queísi joun gürígia ja míchaagugiñábaña joungua lábugiñoun lagúmadijan Sífiri Sándu le gumúti—queísi joun irájüñü—luágu buri cátei le luáguti Crístu.

² Ába níchugun arúfudajani le ménreengunti jun, queísi líchugúniwa úri lun ában irájü le gurágili lewéñegua eígini le deréguati, lugúndun siñágili lan lájuluchun eígini le deréguati. Siñá jumuti meja líla lujúlilin-ágei larítangun Búngiu gunfaráanda, áni chülü lúmoun dan le, siñá meme jumágili,

³ lugúndun gagáburigidün queísi jagáburi lirájüñü ubouú. Níjeingua ligía gimúgaü jídan, gáñiguaü, fánreinguaü, máma jígiraguagüdüña júngua lun labúgurunün Sífiri Sándu, áni jadügüñein le jadügübei sun mútu.

⁴ Lugúndun láu laríñangun ában. “Lánigu Páblo áu”, laríñagaya ában. “Áu lánigu Apólos”, jadügüña queísi gürígia ja lánigu ubouú le.

⁵ ¿Cátanagi? ¿Cáteigi Apólosbei? Esériwidutiñarügü lun Búngiu wagía, ja ídaangiñébaña jíabin afíñera luágu Crístu. Wadágimanu le líchugubei Wabúreme lun cáda ában wádaangiñe, ligía wadügübei.

⁶ Áu ábunagubalin Lerérun Búngiu queísi nádü tídon janígi, Apólos áturaguei nádü ligía láu larúfudajan méme jun luágu Crístu. Búngiu aweíridagüdúbalin nádü, ligía edérebugüdúbalin jafíñen.

⁷ Ni lubeíti le ábunagubei, ni le áturagubei, ni cáta jagía, ánjeinti Búngiu, sun cátei ligía, lugúndun ligía aweíridagüdúbarun nádü.

⁸ Ában jáu ja ábunagubaña jáma ja áturagubaña, láu sun lafáyeirubei lan Búngiu cáda ában según luwúyeri lesériwidun lun.

⁹ Íbirigu wagía lídan wadágimanu esériwida lun Búngiu, jugúya, ítara jíña quei múa le luwádigimaridubei Búngiu.

Ítara jíña gíñe queísi ában múna to lábunaguñounboun Búngiu.

¹⁰ Fuleísei láadina Búngiu láu líchugun ubáfu nun lun nuwádigimaridun úara lúma. Niábiti queísi ában wügüri le subúsijabúbei lun labunún wagábu buídu—áú le íchugubalin ébuu lun jafíñen. Ámuti gürígia ábunagubei ligíbuagu ébuu ligía—jagía maésturugu ja arúfudajabaña luágu Jesucrístu jun, nárigi. Cáda ában, lúnti goúnigi lan ída líña lan lábunagun ligíbuagu ébuu ligía.

¹¹ Rúaali ébuu lun jafíñen, áni siñáti líchugúniwa ámu ébuu. Ébuu ligía, Jesucrístu guánarügü.

¹² Gayáraati lábunagun gürígia ligíbuagu ébuu ligía laú cátei gebégiti le siñábei lágudúniwa, queísi gólu, pláta, lúma dúbü gebégiti, o gayáraati lábunagun láu cátei le mebégibe sarágu, le gayáraabei lágudúniwa, quei fuláansu, murísi o mabúru.

¹³ Lachülürüba wéyu lun louchuni Búngiu jawádigimari sun gürígia ubouágu lun laríjini ída líña lán meja, ánjein gebégi lubeí lúmoun mebégi lan. Louchagubei wawádigimaridun quei láu wátu geméti, aríja lámugei ánjein gayára lubeí lawándun, ánjein gebégi lubeí.

14 Ánjein buídu lubeí wawádigimaridun luágu Búngiu áni madúnamati lun lagünrinchawagúniwa, queísi siñá lan tagünrinchawagúniwa múna to adügütu láu cátei derébuguti, werésibirubei wafáyeiruaja lúmagiñe Búngiu.

15 Ánjein mabuídun lubeí wawádigimaridun luágu Búngiu, lagünrinchawagúba sun wawádigimari, weféridirubei sun cátei, wawánirügüba wasálbara, quei le séfugarügüti lúngua lídaangiñe wátu geméti.

16 ¿Ibídíñetísan jun luágu lilígilisin lan Búngiu jugúya, áni agánawa lan Sífiri Sándu jídan?

17 Ánjoun lagünrinchagua ában gürígia lilígilisin Búngiu tugúya, lagünrinchagubei gíñe Búngiu gürígia ligía, lugúndun Búngiu jabúremebei tílana lilígilisin, áni jugúya guánarügü tílanabei ligílisi tugúya.

18 Mayéeragua jumá júngua. Le arítaguti luágu sábiu lan según lichú áu le lánina ubouú le, lúnti labúlieiduni lichú áu ligía, lun lanügüniwa queísi ában ibídiougua táu según ubouú, gayára lámuga lerésibiruni lichú áu le tímatimaati le líchugubei Búngiu.

19 Lugúndun lichú áu le lánina ubouú le, ában libídiouniga áu lun Búngiu. Taríñajare Lerérun Búngiu. “Áburugüda lumútiña Búngiu ja chúbaña áu según ubouú le tídoun lisádaraana jabíbun guánarügü.”

20 Aríñagatu gíñe. “Subúdi lumúti Wabúreme Búngiu luágu mála lan jasáminan sábiugu.”

21 Ligía mouñ lubei lun janáangun júngua luágu arúfudajati le jafálarubei, ladüga gürígia rügüñadiwa sun wagía, áni rúlaali Búngiu sun cátei jun lun lesériwidun jun.

22 Rúlaadina jun láu sun Apólos lúma Pédro, lun warúfudajan jun. Rúlaali gíñe sun cátei le ubouúgubei jun lun jayúsuruni. Rulumuti gíñe ibágari lúma ouweni jun. Sun le asúseredubei jun ugúñe lúma sun le lúnbei lasúseredun jun, jáni.

23 Jáni sun cátei ladüga lánigu Crístu jugúya, áni Crístu láni Búngiu.

4

Jawádigimari apóstolugu

1 Lúnti lubeíti janügüniwa queísirügü esériwidutiña lun Crístu, ja íchugúbaña lun jarúfudajani linárün Búngiu lé meja arámudaguabei jun.

2 Le lubeíti ibíjiti ában wadágimanu, lúnti ladügüni buídu lun larúfuduni luágu gadüna lan lun leménigidun liyúbudiri luágu.

3 Ánjein luágu noubadina, maweírinti nebéreserun luágu ída líña lan janügüni nesériwidun lun Búngiu, ni jugúya ni furúmiegurügü le ubouúguna. Ni áu guánarügü, siñáti nariñagun ánjein buídu lubeí nesériwidun lun, o ánjein níjein lubeí mégeiti luágu,

4 láu sun madúnrun nan luágu ni cáta lurúma narítangun, máma lueígiñe líra lun madúnrunbadina lan, Nabúreme agúseragüdübalina.

5 Magúseragüda jumá lubeíti luágu buri cátei lubáragiñe dan, agúra jumá lagíribudun Wabúreme Jesucrístu ubouúangun lun laságaruni cátei le arámudaguabei lídoun larúgounga. Lasúbudiragüdübei Wabúreme tarítangun cáda ában anígi, ca lan ueígiñe wadügei sun le adüga wamáalibei. Ábame ladímurejan Búngiu buíti luágu gürígia le buídubei adüga.

6 Nidújeñu, adímurejaadina nuougua lúma luágu Apólos queísi ában jémpulu jun lun gayáraabei lan jafúnrendeirun lídaangiñe le nariñagubei wawougua. Le lúnbei jafúnrendeiruni, lun manügün jumá ában gürígia weíri lueí le lúnbei lanügüniwa, queísi bürüwañu lan, lun gíñe manáangun lan ni ában lúngua luágu ában arúfudajati le lafálarubei, áni lanügeime le ában quei ni cáta.

⁷ ¿Cági adügübalibu buídu jaweí jíbiri? ¿Cági cátei búmabei le mámabei líchugun Búngiu bun? Ánjeinti Búngiu lubeí íchugubalin sun cátei bun, ¿cáti uágu banáangua búngua camá jamuga ibíjarügü bumúti le búmabei láu báni búngua?

⁸ Jaganoún camá jamuga rísijadün lídan cátei lánina Búngiu, ibíja jumáli sun le gayáraabei jabúseeruni lídaangiñe le líchugubei. Sandíguatün júngua camá jamuga jarúeijaña lúma Crístu, ígira wagía. ¡Buíti jamúga lun urúeigu jumá le tímatimaati lun jamúga gafánran wamá lídan jarúeijan!

⁹ Laganoún nun luágu ígira láadiwa lan Búngiu wagía apóstolugu lídan lagúmujoún ubáraü. Ítara wáña queísi gürígia ja siádiwafañabaña lun ouweni, ñübinjadiwa lun ábanbadiwa lan aríawasei lun jaríaguniwa sun lílana ubou, dándu ánjeligu queísi gürígia.

¹⁰ Barüwatiwa queísi ibídiougua táu lueígiñe wesériwidun lun Crístu, sun jarítaguñu jumá juougua luágu chu lan jáu lídan cátei lánina Crístu. Según jugúya, wagía débilitiwa, jugúya jéretün. Barü jamutiwa gürígia quei ni cáta, ánjein jugúya, inébetün joun.

¹¹ Chülü lúmoun wéyu le, áfagaadiwa ilámaü, mágürabu, lúma manáanguni, wuríbati jouseruniwa gürígia, mábantiwa,

¹² weíríti wawádigimari láu wájabu lun wágüdaagun woúngua darí lun labúcharun wawágu. Anába jamútiwa gürígia, ába woúnabun láu abíniruni. Eíbaajoúatiwa, awánda wamúti.

¹³ Adímurejatiña wuríba wawágu, rútiwa dimúrei buíti joun láu gurásu. Chülü lúmoun wéyu le, ousera jamútiwa camá ífei láni ubou, quei cátei le mabúseerun jamáli gürígia.

¹⁴ Mára nabürüjañein le jun lun janügün busíganu, nabürüjañein jun lun narúfudajan jun queísi joun nisáanigu jínsiñetiña nun.

¹⁵ Láu sun jamúga añájein lan díisi-mílu maésturugu arúfudajatiña jun luágu Crístu, áu rügüñein júguchi lídan jafiñen luágu, ladüga áu lan anügübalin ugánu jun luágu Wasálbaragüle lun gayáraabei lan jafiñerun luágu.

¹⁶ Amúriajatina lubeíti júma lun jáyeijani nigáburi.

¹⁷ Ligía noúnajaanbalin Timotéo lun líderagunün luágu cátei le. Jínsiñeti nun sarágu, ítara líña queísi ában niraü lídan Jesucrístu, gayáraati neménigidun luágu. Larítaguagüdübadün luágu ligáburi nabágaridun queísi afiñeti luágu Crístu, lun jáyeijani. Niján luwúyeri igáburi le narúfudajabei tídan sun ligílisi lídan sun fulásu.

¹⁸ Añájein jídaangiñe, buin jáña láu anáanguni únguaü, jarítaguatiña luágu mídinbadina lan bisidaün ladüga nanúfudei lun nagágibudagun júma.

¹⁹ Bulíeiguatiña, agúrabatina nídin aríjaün madíse, ánjein busén Wabúreme. Ábameti naríjini ca lan jayáraabei barúgua túngua ja adüga lun jesériwidun lun Búngiu, mámarügü le jaríñagubei.

²⁰ Lugúndun dan le larúeijan Búngiu tídan wanígi, máma láurügüti dimúrei, níjein lubáfu wádan lun wadügüni lugúndan.

²¹ ¿Cáteiti jímein jubeí. lun nabeíchunün dánme le nachülürün, ódi lun nídin aríjaün láu ínsiñeni lúma uálini?

5

Lagúserawagüdüñ ában le adügübei figou

¹ Agaambúaaali luágu níjein lan ában jídaangiñe lagámariduñoun lúmari lúguchi. Ában ouñwenbun iwíyei líra, le majouábei lun ni jádan ja ibídiñejabubaña lun Búngiu.

² ¡Áni laú sun líra, anáanguagidün júngua! ¡Lúntirügü jamúga jírudagun luágu líra! Gürígia le adügübalin lanárime iwíyei le, lúnti labugún jídaangiñe.

³ Láu sun úa nan júma le ñí jubei, anájein júma narítangunrugu, áni darínaali lidúnrun le adügübalin figoú le, camá jamuga ñíñadina júma lun nagúseragüdüni.

⁴ Guetó, le lúnbei jadügüni, lun joúndaragun lídan líri Wabúreme Jesucrístu, ñíbadina júma narítangunrugu, ñíbei gíñe lubáfu Wabúreme Jesúsú júma.

⁵ Lúnti lubeíti jedéregeruni wügüri ligía lun Máfia láu jaságaruni lídaangiñe jidámurin, lun lagúnrinchawagún lúgubu, sálba támuga luwáni dánme le lagíribudun Wabúreme Jesúsú uboúagun.

⁶ Moún lumuti janáangun júngua luágu le jadügübei. ¿Magáambun jumágili cátei le. résigüda lumútu murúsun ísi sun fulúwaaru to ídounboun líchugúa? Ítara méme gíñe, murúsun figoú jagánagua gayáraati lagádeirunün súngubei.

⁷ Gidájumei lubeíti sun iwíyei le lánina binádu igáburi le ígirubei jídan, le ítarabei quei ísi le pasáli. Ábame jarúma jumá le tímatimaati. Ítara júba quei fein to eigíboun lídan fédu le páscua, to adügüboun táu fulúwaaru to sún umuti tañoúndawagún, to magánatu ísi. Jarúmaali wadáriragun woúngua ligíbugiñe Búngiu ladüga derége láani Búngiu Crístu lun loúnwen luágu wafígoun quei meja ladágaragüdüniwa mudún lídan fédu le páscua luágu figoú.

⁸ Ítara líña lubeíti, queísi sálbaadiwa lan, lúnti wagáburidun ában igáburi jarúmati, falá wameíme inárüni. Igáburi ligía, ítara líña quei fein to magánatu ísi. Moún lumuti wagáburidun queísi meja wagáburidun furúmiñe, moún lumuti woúserun wuríba, ni lun wasígirun láu tiwíye wanígi. Sun igáburi ligía, ítara líña quei ísi pasáli.

⁹ Aríñagatiná meja jun tídan to ában nigáradan luágu moun lan lun jeréderun lídan ában jáma ja abágaridubaña lídan salúfuri.

¹⁰ Mára meja naríñaguña jun lun jadísedun le gumúti jaweí sun lirájüñü uboú le, ja salúfuribaña, o ja lan meménijabutiña, o jíwerutiña, o ájuduragutiña joun sándu, lugúndun lun jamúga mánbadün lan ni cáta jáma, gásu jamúga jáfuridun uboúagugiñe.

¹¹ Le nabúseerubei naríñagun jun, lun meméterun jumá lúmoun ni ában le aríñaguti luágu idújei lan lueígiñe Jesucrístu áni salúfuriti, o meménijabuti, o judúguati joun sándu, o marásualuguti, bachárua o jíweru. Moún lumuti ni lun jeígin lúma idújei le ítarati.

¹²⁻¹³ Mára áu lúnbei nagúseragüdüniña ja bougudibaña lueí Crístu, Búngiuba agúseragüdaña. Wagía, lúnti wagúseragüdüniña wadújeñu lueígiñe Jesucrístu ánjein jadügüña lubeí wuríbati. Ligía gidájumei lubeí gafígounti le jagánaguagiñe.

6

Wuríbu buri jagíbugiñe agúseragüdütiña ja máma afíñetiña

¹ Dan le níjein lan cátei lúnti laráñaajan ában jídaangiñe líri ámu, ¿cági uágu jídin jámoun agúseragüdütiña ja ibídiñebei Crístu joun, lubáragiñe jamúga jídin jámoun lánigu Búngiu?

² ¿Ódi ibídiñeti jun luágu jagúseragüdübaña lan lánigu Búngiu lánigu uboú? Ánjeinti jagúseragüdübaña lubeí lánigu uboú, ¿siñá jumuti buri cátei ñübüriti le aráansera?

³ ¿Ibídiñeti jun luágu wagúseragüdübaña lan gíñe ánjeligu? ¡Gúbuméti gayára lan wagúseragüdün luágu buri cátei lánina ibágari le!

⁴ Ánjein níjein lubei buri wuríbu jagánagua luágu buri cátei le lánina ibágari le, ¿cámegi jídin aríñaaja joun ja mafíñebaña luágu Jesucrístu, ja málabei lichú áu le jádaanbei ladüga máma lan lúmagiñeti Búngiu?

⁵ Naríñaguñein le lun janügün busíganu. ¿Úati funági íbini ában chu táu jídan le gayáraati laráanseruni ában cátei jádan lidújeñu lueígiñe Jesucrístu?

⁶ ¿Lúnti lídin ában idújei aríñaaja líri lidúje joun agúseragüdütiña ja maffíñetiña luágu Crístu?

⁷ Láurügü jawúribujan júmagua, ábanjali mabuíduni le gumúti líra. Buítimaati lun jawánduni maríchaü le adügübei jun sügü láu jageíndagun ladüga. Buítimaati lun jígirun lun líwerujoún jueí.

⁸ Ánjein jugúya, lubáragiñe líra, adúgatün maríchaü, íweruja jugúya, íbini jaweí jidújeñu guánarügü.

⁹⁻¹⁰ ¿Ibídíñeti jun luágu ja lan adügübaña wuríbani, mafánranbaña lan lídan larúeijan Búngiu? Sun ja agámaridubaña mamáriedunga, ja ájuduragubaña joun sándu, ja agámaridubaña ja maríeitiña, ja wügüriña ja agámaridutiña wügüriña jáledi, jíwerutiña, meménijabutiña, bacháruatiña, marásualugutiña, ja anügübalin láni ámu láu jabíun—sun ja adügübaña wuríbani líbe buri le, siñábei jebélurun lídoun larúeijan Búngiu siélu.

¹¹ Añájein jídaangiñe, ítara jañá meja, ánjein guetó, chibáwaali jífigoun, derégeguaadün júngua lun Búngiu, áni resíbi láadün queísi lánigu ladüga le ladügübei Wabúreme Jesúsu juágu, lúma sun le ladügübei láni Búngiu Espíritu juágu.

Wágubu, ában cátei derégewati lun Búngiu

¹² Aríñawagúati. “Gayáraati ladügüni gürígia le labúseerun ladüga.” Inárüni líra, áni máma sun cátei lun buídu lan lanügün. Gayáraati ladügüni gürígia le labúseerun, wel, moún lumuti lígiraguagüdün lúngua lun lagúmadiruni layúmajan.

¹³ Inárüni le aríñawagübei luágu ladügüni lan Búngiu eígini lun weígini, adügaleí warágeirugu lun ladügüni wadágimanu láu weígin. Inárüni, áni lagúmuchaguagüdübei Búngiu biángubei cátei le, mamégeirun wamáalime. Ánjeinti wágubu, madügünti lun wadügün salúfuri láu, ladügün wágubu lun Crístu, lun ligíaba lan labúreme, áni ligía íchugubalin ubáfu lun wágubu lun gayáraabei lan wesériwidun lun, láu.

¹⁴ Ítara quei lásaaragüdüni Búngiu Crístu lídaangiñe ouweni láu sun lúgubu, lásaaragüdübadiwa gíñe láu sun wágubu, láu lubáfu.

¹⁵ ¿Ibídíñetísan jun luágu líbiri lan cátei le únbei wagúara lúgubu Crístu cáda ában jídaangiñe? ¿Nanügeiméti nügubu le líbiribe lúgubu Crístu lun nadügüni líbirime tógubu ában jóru? ¡Madügün nubeí!

¹⁶ ¿Ódi ibídíñeti jun luágu dan lan le leméterun ában gürígia túmoun ában jóru, biángubei jagía ñübintiña lun ítara jabá lan quei ában méme úgubu? Taríñajare Lerérun Búngiu. “Jayábinba biángubei lun ítara jamá quei ábanrügü.”

¹⁷ Ánjein dan le liábin ában gürígia lun lídan lan ában lúma Crístu, ában liábin láni Crístu Espíritu lun ában lan lúma láni gürígia ligía espíritu lun ábanrügü jamá espíritu.

¹⁸ Anúraja jumá lubeíti lueí salúfuri. Mítaraanti salúfuri queísi ámu figou, furúmiñeguarügü ámu figou le jadüga gürígia, bougudin lueí jágubu ladüga dáñu, ánjein le agámariduti mamáriedunga, ladügüña figou luágu lúgubu guánarügü.

¹⁹ ¿Ibídíñeti jun luágu lúban lan Sífiri Sándu wágubu, le líchugubei Búngiu woun lun laganouún wádan? Máma wagía labúriñabei wágubu, Búngiu labúremebei.

²⁰ Agáñija lumútiwa Búngiu séru lun lánigu wamá. Ligía lúnti lubeí wíchugun inébesei lun Búngiu dándu láu wágubu quei láu wáni espíritu lugúndun láni Búngiu biángubei.

7

Dimúrei buri luáguti maríei

¹ Guetó noúnabaali lé buri uágubei jálügüdana tídan jigáradan to jabürüjaboun nun. Inárüni luágu buídu lan lun wügüri lun magámaridun lan,

² quei níjein lubeí sarágu salúfuri, buítimaati lun lagámaridun wügüri, lun gíñe tagámaridun würi, súnwandan láu amárieiduni.

³ Lúnti lagúnfulirun wügüri túma lúmari queísi úmari, lúnti gíñe tagúnfulirun würi lúma túmari.

⁴ Mára úmari to würi labúreme boun túgubu guánarügü, láni gíñe túmari. Mára gíñe úmari le wügüri labúremebei lúgubu guánarügü, táni gíñe lúmari.

⁵ Mamájara jumá lun jesériwidagun júniwagua, ánjaün gubeírügü adüga darádu lun mayúsuragun jumá júngua luágu átiri dan lun jíchaagun júngua lúnrügü jayúmuragun lun Búngiu. Lárigíñe líra, lúntiya jayúsuragun júngua, lueí lásiñerun jágüdaagun júngua, ábame lafígoungüdünün Máfia láu jeméterun jámoun ámu jaweí jámarigu.

⁶ Mára naríñaguña luágu lúnti lan jagámaridun, gayáaraügüti jáluajan úmari lun jamárieidun jáma ánjaün busén.

⁷ Áu, buséntina jamúga lun sun lan gürígia gayára lan jágüdaagun jóungua lun magámaridun jamá queísi áu. Subúdi numúti luágu siñá lan ítara, rújali Búngiu ámuñegueinarügü ubáfu lun cáda ában, ában luwúyeri joun jíbiri, ámu joun jíbiri.

⁸ Ja mámarigiñabaña, jáma ja jiláañabaña úmari, aríñagatina joun luágu buídu lan jamúga lun jeréderun mámariga queísi áu,

⁹ ánjein siñá lubei jágüdaagun jóungua, buíti lun jagámaridun (súnwandan láu amárieiduni) sügü láu lun jeréderun láu ában luweírín ayúmajani le siñábei jawánduni.

¹⁰ Ánjaña ja maríeijañabaña, aríñagatina joun lun mígirun táani würi túmari. Gumádi le, lídan lubúdubu máma nugúmadin, lugúmadin Wabúreme.

¹¹ Láu sun líra, ánjein tígira würi túmari, lúnti teréderun mámariga, o taráandarun lan lúma túmari. Moún lumuti gíñe lígirunun wügüri lúmari.

¹² Joun jíbiri, aríñagatina queísi dimúrei le náni, máma láni Wabúreme, luágu ánjein lan mafíñen tubeí lúmari ában le afíñeti luágu Crístu, áni gagúndaantu lun tasígirun agánawa lúma, moún lumuti lafánreinragun túma.

¹³ Ánjein gíñe mafíñen lubeí túmari ában würi to afíñetu luágu Crístu, áni gagúndaanti lun lasígirun agánawa túma, moún lumuti tafánreinragun lúma.

¹⁴ Úmari le mafíñebei, derégewaali lun Búngiu láu lídaañein lan ában túma lúmari to afíñetu luágu Crístu, úmariti to mafíñetu, derégewaaru gíñe lun Búngiu láu lídaañoun lan ában lúma túmari le afíñebei luágu Crístu. Lun jamúga máma líña lan, ítara jáña jamúga jisáanigu quei jasáanigu ja mafíñebaña, ítara, derégewañu jáña lun Búngiu.

¹⁵ Ánjein busén lubeí úmari le mafíñebei luágu Crístu lun lígirunun lúmari, o würi to mafíñeboun lun tígiruni túmari, ígiragua jamá. Lídan oúbaü líra, moún lumuti jafósuruniña úmarigu ja afíñebaña úmarigu ja mafíñebaña lun jeréderun jáma, lugúndun wájali Búngiu woun lun wabágaridun lídan darángilaü.

¹⁶ Ában gíñe cátei, ¿cági basúbudirubei, amürü würi, ánjeindügü gayára lubeí basálbaruni búmari láu beréderun lúma? ¿O cági basúbudirubei, amürü wügüri, ánjeindügü gayára lubeí basálbarunun búmari láu beréderun túma?

17 Lídán sun luwúyeri, lúnti labágaridun cáda ában quei líchuguni Wabúreme lun, áni quei lubeí meja gíñe, dan le lagúarunbei Búngiu lun lun lánigu lan. Ítara líña nariñaguni tídan sun ligílisi.

18 Ánjein agúara Búngiu lun ában gürígia le resíbi lálalibei circuncisión, lé meja liseíni lidáradun Búngiu jáma lánigu, lúnti leréderun ítara, ánjein gíñe agúara lun ában le merésibirungili circuncisión, moún lumuti lerésibiruni.

19 Mebéresenwati ánjein resíbi lubeí circuncisión lúmoun merésibirún lán, le busénwabei, lun lagúnfulirúniwa lugúmadin Búngiu.

20 Cáda gürígia lúnti leréderun lídan igáburi lé meja gádaanbalin dan le lagúarunbei Búngiu lun lun lánigu lan.

21 Ánjein meja idámuni bubeí dan le lagúarunbei Búngiu bun, madíjeribá luágu líra, ánjeinrügü líñáti gayára lubeí báfuridun lídaangiñe idámuni ban, adügabei.

22 Lé meja idámunibei lun labúreme ya ubouágu dan le lagúarúnbei lun lun lafíñerun luágu Crístu, gidáli lueí lubáfu figoú lun lesériwidun lun Wabúreme Jesucrístu, ítara méme gíñe, lé meja mámabei idámuni lun ában gürígia ubouágu dan le lagúarúnbei lun, lidámunjali Crístu, ligíajali Labúreme.

23 Agáñija láadün Búngiu luágu oúnwenbun ebégi, mígira jumá lun janügünün wügüríña lidámunme jagúndan, lidámun jumá lugúndan Búngiu.

24 Ítara líña lubeíti, nidújeñu, madíjeri jumá cátañañadün lan bougudigiñe jibíti, reidei jumá ligíbugiñe Búngiu lídan méme igáburi lé meja gádaanbalün dan le lagúarunbei jun.

25 Jawágu gürígia ja mámarigiñabaña, úati ni ában gumádi núma le jamúga lúmagiñeti Wabúreme, nariñagaali le narítapun, áu queísi ában le gadúnati lun lafíñerúniwa luágu, luágu lareíni Wabúreme le rújalibei murúsun lídaangiñe lichú láu nun.

26 Lídán narítapun, lúnti leréderun gürígia quei lubeí, ladüga buri lidére dan le gádaanbaliwa.

27 Ánjein gámari bubeí, málugabá bígirapun, ánjein mámari bubeí, málugabá bagámaridun.

28 Ánjabu amárieida, máma figoú, ánjoun gíñe amárieida ában irájü, máma gíñe figoú, láu sun líra, ñíbei asúfuriruni joun ja gámaribaña, áni buséntina jamúga masúseredun lan líra.

29 Nidújeñu, niján le nabúseerubei nariñapun. Murúsun rügáli dan wabá lun wesériwidun lun Búngiu. Lúmagiñe lubeíti guetó, ja gámaribaña, lúnti jesériwidun lun Búngiu táu sun janígi camá jamuga mámaritiña.

30 Moún lumuti wíchugun dan lun íruni o ugúndani le gádaanbaliwa, o lun umégeguni le wámabei, lun lagídaruníwa lueí wadügüni le lúnbei wadügüni quei esériwidutiña lun Búngiu, ladüga louguati dan.

31 Masáminara jumá sarágu luágu lubuídun cátei lánina ubou le, le jánibei lun jayúsuruni, ladüga ubou le, le waríjibei, lagúmuchuña, lúnti jarítapun luágu cátei le magúmuchadibei.

32 Buséntina lun madíjeri lan jarítapun luágu ni cáta. Dan le mámari lan ában wügüri, larítapun luágu buri cátei le luáguti Búngiu lúma lun lesériwiduni buídu.

33 Ánjeinti dan le gámarijali, larítapun luágu buri cátei le lánina íbágari le, lúma lun lesériwidunun lúmari buídu,

34 biánguañein cátei lun leténirun lun—lun lesériwidun lun Búngiu lúma lun latoúnigirunun lúmari. Ámuti gíñe touserun würi maríeitu tueí to mámariboun. To mámariboun, tarítapun luágu buri cátei le luáguti Wabúreme Búngiu, lun derégeguñu tan túngua lun Búngiu dándu láu túgubu queísi táu tanígi. Ánjounti to

gámariboun, tarítangun luágu buri berésegu lánina ibágari le, lúma lun tesériwidun buídu lun túmari.

³⁵ Naríñaguñein le jun luágu jáni fuleísei, máma naríñaguñein lun mamárieidun jumá. Naríñaguñein lun jabágaridun lídan ában igáburí le buíti, esériwideina lun Wabúreme, derégeguñu júngua lun, marítangunga sarágu luágu cátei lánina ibágari le.

³⁶ Agübürigu ja arítagubaña luágu buídutima lan lun tamárieidun jaraü lugúndun taweíyaaduña lan, áni ánjein buítima lubeí líra, lúnti jadügüni le uágubei jarítagua luágu buídu lan—gayáraati jíchugunun lun tadári lun tamárieidun lúma, máma figou líra.

³⁷ Ánjein añájein lubeí ámu agübürigu, derégüdaguatiña lídan jarítangun luágu mouñ lumuti lan lun tamárieidun jaraü, áni memégeiruati lun tíchugúniwa, áni gayáraati jadügüni le jabúseerunbei, buíti jadüga lun míchugun jamánun jaraü lun tamárieidun.

³⁸ Ja lubeíti íchugutu jaraü lun tamárieidun, buíti jadüga, ja míchuguntu, buítimaati jadüga.

³⁹ Würi to maréitu, lábugiñeñoun leréreejan túmari, lurúma lúrudu, sun wíngwángili lan, ánjein ouwe túmari, gayáraati tamárieidun lúma le tabúseerun, afíñeti rügáli ligía luágu Crístu.

⁴⁰ Láu sun líra, buítimaabei dan tun ánjounya mamárieidun. Ligía narítangunbei, áni afíñetina luágu ligía lan gíñe larítangunbei láni Búngiu Espíritu.

8

Eígini buri le adágarawagüdüti joun sándu

¹ Guetó nadímureja luágu eígini le adágarawagüdüti joun sándu. Inárüni luágu subúdi wamáni luáguti buri cátei le, queísi jaríñaguni, awáansegüda lumútiwa wasúbudin lídan cátei málati, ánjein ínsiñeni, awáansegüda lumútiwa lídan lubuídun igáburí.

² Le arítaguti luágu níjein lan lasúbudirun, ibídiñegilirügü líña ni cáta lun queísi lubúdubu.

³ Ánjein le jínsiñejabúbei lun Búngiu, subúdi lumúti Búngiu gürígia ligía queísi lánigu.

⁴ Luáguti lubeíti leigín eígini le adágarawagüdüti joun sándu, inárüni luágu ni cáta jamá sándu ubouágu, máma jamá búngiugu ladüga subúdi wamúti luágu ában rügüñein lan Búngiu.

⁵ Añájein mútu ubouágu, jarítaguatiña luágu añájein lan bürübünu búngiugu jáma abúremeigu siélu lúma ubouágu,

⁶ ánjeinti woun, wagía le afíñebei luágu Crístu, ában rügüñein Búngiu, le Wáguchibei. Ligía adügübalin sun cátei, áni ligía le únbei wesériwida táu sun tarúman wanígi. Ában rügüñein gíñe Wabúreme, le Jesucrístu, le ídaangiñebei ladügüwa sun cátei, áni ligía le ídaangiñebei wibíjei ibágari magúmuchadíti.

⁷ Másutiña ja afíñebaña luágu Crístu gayára jafíñerun luágu ni cáta jamá sándu, añájein já meja jéhubaña ájuduragua joun sándu, jou jamágili eígini ligía queísi cátei adágarawagüdüti joun búngiugu. Queíti lougua lubeí jafíñen luágu gayára lan jeígini afíñetiña eígini ligía, ába mabuídun lan lasándiraguagüdüniña jóungua ligíbugiñe Búngiu láu jeígini eígini ligía.

⁸ Inárüni le jaríñagubei luágu máma lan cátei le weígibei gayáraagüdübalin lerésibiruníwa Búngiu, mabuíduntimaabadiwa ligíbugiñe Búngiu lueígiñe weígin, maríbaduntima wagíame lueígiñe meígin wáma.

⁹ Gayáraati jeígin eígini le adágarawagüdüti joun sándu, lúntirügü goúnigi jumá lueí jeíguadagüdüniña jidújeñu lueígiñe Crístu ja loúguabaña jafíñen ánjein buídu lubeí lúmoun mabuídun lan.

¹⁰ Quei jamúga guetó, amürü le subúdíjabúbei luágu gayára lan beígin furúmiegurügü eígini, bañúura eíga lídan ában fulásu le jóunti sándu, laríjabu ában idújei le débiliti lafíñen luágu buri cátei le, ñi, lanügüba gurásu buágu lun gíñe leígin lídaangiñe eígini le, le adágarawagüdüti joun sándu.

¹¹ Ítara, ladüga bisúbudin, féridigüda bumúti bidúje le débilibei lídan lafíñen le gíñe ueígiñebei louúwe Crístu.

¹² Dan lubeíti le jañáwarijani jarítangun idújeñu ja débilibaña lídan jafíñen, jadügüña lun jafígounjan jidújeñu, áni jugúya guánarügü jafígounjaña gíñe.

¹³ Ligía, ánjein lubeí náburugüda nidúje lídoun figou ladüga cátei le neígibei, buitimaati lun meígindügüya nan úwi lueí nafígounjagüdüni.

9

Lirícha buri ában apóstolu

¹ Áu, furángutina lun nadügüni le nabúseerubei, garíchatina gíñe queísi ában apóstolu, aríja náali Wabúreme Jesúsu, áni jugúya guánarügü asálrubaña lídaangiñe nuwádigimaridun luágu Wabúreme.

² Fágua manügün jabádina jíbiri queísi apóstolu, ánjeinti jugúya, gásu janügünina queísi apóstolu, lugúndun láu afíñe jumá luágu Crístu, arúfuda lumúti líra luágu inárüni lan luágu ában nan apóstolu.

³ Niján noúnabagülebei joun ja adímurejabaña nuágu.

⁴ Garíchatina lun nerésibiruni sun le íchugúbei nun lun neígini lúma lun nátuni queísi nafáyeirujaja luágu nuwádigimari luágu jáni fuleísei.

⁵ Garíchatina gíñe lun namárieidun túma ában würi to afíñetu luágu Crístu, lun gíñe nanügünun númagua luágu nuweíyasun quei ladügüni Pédro jáma ja jíbiri apóstolugu, jáma gíñe ja lamúlenu Wabúreme.

⁶ ¿Ódi jarítaguatün luágu áu rügüñein lan lúma Bernabé marícha lun werésibirun wágüdaja júmagiñe lun gayára lan wígiruni wawádigimaridun láu wájabu lun wapúrichijani Lerérun Búngiu?

⁷ Queísgubeirügü, máma súaara guánarügü afáyeirubalin cátei lé buri layúsurubei, le ábunagubei beíbei, jóuti tídaangiñe, le oúnigirubei bágasu, guráti lídaangiñe míligi le lamíligijabei.

⁸ Áni marítagua jumátia luágu nariñaguñein lan le queísi rügü jarítangun gürígia, lugúndun aríñaga lumúti gíñe lilúrudun Moisés.

⁹ Laríñajare tídan lilíburuna lúrudu. “Magüraguabeí liyúma bágasu le lánina wadágimanu lueí leígin lídaangiñe ílaü le léferejabei.” Máma laríñaguñein Búngiu líra jawágurügü bágasu,

¹⁰ laríñaguñein gíñe queísi ában jémpulu woun. Luágu wáni fuleísei labürüdüwa lúrudu le, lugúndun dándu le awoújabalin múa, queísi le éferejabalin líla nádü, lúnti jadügüni láu eménigini luágu jerésibirubei lan jafánran lídaangiñe alúbajani.

¹¹ Queísi bunágua wamáali lubeí Lerérun Búngiu tídan janígi, ¿gíbeti funági larijín jun lun walúbajan murúsun cátei júmagiñe lun wágüdaagun woúngua?

¹² Ánjein garícha jabeí ámu lun líra júmagiñe, garíchatimáatiwa.

Mayúsu wamúti iríchaü le wawágubei. Lubáragiñe líra, awánda wamáali sun le wemegeirubei lueí lejénreendun jun agáambeí wapúrichijani Lerérun Búngiu, ladüga wamúriajan wágüdaja júmagiñe.

13 Subúdi jumúti luágu ja lan ñadágimeinbaña ligílisirugu, lídaangiñe le ligílisirugubei jawínwanda. Ja eténirubaña lun latárü le ñí lubei líchugúa adágaragüdüni, jóútiña úwi jádaangiñe anímaalu ja adágarawagüdübaña ñi.

14 Ítara líña gíñe laríñaguni Wabúreme Jesúsu lun ja lan apúrichijabalin ugánu luágu, lun gíñe jádaangiñe lan ja agáambubalin ugánu ligía jawínwanda.

15 Áu, mayúsugidina ni ában lídaangiñe iríchaü le, máma gíñe nabürüjañein le jun lun jíchugun som cátei nun. ¡Íimein numúti noúnwen niláma lubáragiñe neféridiruni ugúndani le nuágubei láu napúrichijani ugánu luáguti asálbaruni, magúburajanga luágu!

16 Máma cátei lúnti napántajan luágu láu napúrichijani ugánu luáguti asálbaruni jun, lugúndun mósu nadügüni. ¡Fugiábu áu ánjein mapúrichijan nan ugánu le!

17 Lun jamúga mínsiñe lan nun lun napúrichijan, láu sun luwúyeri mósu nadügüni ladúga ligía lan wadágimanu le líchugubei Búngiu nun. Queísi apúrichija nan láu sun nugúndan, gafáyeiruajatina,

18 afáyeiruajaü ligía, lun gayára lan napúrichijan luágu Wasálbaragüle, magúburajanga ni cáta, márügüdünganeí nirícha lun nawínwandun lídaangiñe nuwádigimari queísi apúrichijati.

19 Láu sun mábuti nan ubouágu lun nagáambuni, rúguaadina núngua jadámunme súngubei, lun nagáñeirun sarágu gürígia lun Crístu.

20 Dan le jagánagua nan juríu, ába nadügün camá juríu áu, lun nagáñeiruniña lun Crístu. Queísi jabágaridun juríu lábugiñe lilúrudun Moisés, rúguatina núngua lábugiñoun lúrudu ligía lun nagáñeiruniña, láu sun mámañadina lan lábugiñe lúrudu ligía.

21 Lun nagáñeiruniña ja mámabaña juríu, ja mabágaridunbaña lábugiñe lilúrudun Moisés, rúguatina núngua quei jagía, láu sun lábugiñeñadina lan lilúrudun Búngiu, quei lábugiñeñadina lubei lilúrudun Crístu.

22 Dan le jáma nan ja louguabaña afíñe luágu cátei le gayáraabei jadügüni afíñetiña, madügüntina ni cáta le uágubei jarítagua luágu mabuídun lan ladügüniwa, lun gayára lan nagáñeiruniña. Rúguaadina núngua queísi cáda jawúyeri gürígia lun añájein lan nasálbarun lídan furúmieguarügü luwúyeri.

23 Nadügüñein sun le lun lasúbudirúniwa ugánu le lánina asálbaruni, lun gafánraanbadina lan lídan buídu le lanügübei ugánu le.

24 Subúdi jumúti luágu gíbe jamá eíbaagutiña lídan ában eíbaaguni, áni ában rügüñein jádaangiñe agáñeira. Eíbaagua jumá lubeíti lídan ibágari le lídan ában luwúyeri lun gayáraabei lan jagáñeiruni ledéweejan Búngiu jun.

25 Sun ja aráansejabaña lun jebélurun lídoun juráraü, jóúchatiña lun madügün jamá ni cáta le gayáraabei lásiñeragüdüni jájurerun. Áni jadügüni lun jagáñeirun ában rídi le láuti ubánaü. Ánjeinti wagía, wáfaaguña lun wibíjin ában rídi siélu le lúnti ladúrarun lun sun dan.

26 Áu, neíbaaguña lídan ibágari le, rúñuneí naríjin luágun ubuíduni le lúnbei líchuguni Búngiu nun, siélu. Mítaraantina queísi ageíndaguti le agáyuajabei garábalirugu,

27 lubáragiñe líra, áfara numúti lugúndan núgubu, fósuneí lun lagáambunina, lueí lubeígia neféridiruba lan lárigiñé buga arúfudajadina lan joun ámu luágu lubuídun úma lun wachülürün lúmoun Búngiu.

10

Dimúrei luágu ájuduraguni joun sándu

¹ Nidújeñu, buséntina lun narítaguagüdünün luágu lé meja asúseredubei joun binádu wagübürigu lídan lé meja lídan jamá fulásu mageírawati, luágu ñíñein lán meja Búngiu lídan ában juánriñu jóugiñe lun loúnigiruniña. Séfuti gíñe lanügüniña súngubei dan le jájiñuragunbalin Barána Funáti.

² Ítara líña queísi ában abásteruni joun láu já sügürün labádinaguagiñe barána, lúma juánriñu jóugiñe. Lídaañanu ában lúma Moisés lun jafálaruni ladüga ligía lan abúgurubaliña.

³ Jóutiña gíñe sun jagía lídaangiñe ában méme eígini le líchugubei Búngiu joun, siélugiñe,

⁴ rúati gíñe dúna joun súngubei lídaangiñe ában dübü lun játun. Ñíñein Crístu jáma luágu sun jaweíyasun lun fuleísei láníña láu dúna lun játun.

⁵ Láu sun líra, madügün jamúti jíbe-ágei lugúndan Búngiu, ába lamágundarun Búngiu jáma. Ligíati jóúwegunbei lídan fulásu mageírawati.

⁶ Sun le asúseredubei joun, ában jémpulu woun, lun mayúmajan wamá buri cátei wuríbati, queí meja jadügüni.

⁷ Ligía májuduragua jumá lubeí joun sándu queí meja jadüga jádaangiñe, queísi tariñaguni Lerérun Búngiu luágu jefédujan joun sándu. “Ába jañúurun güriña eíga lúma áta, lárigiñe, ába jásaarun eféduja.”

⁸ Moún lumuti wadügün salúfuri queí meja jadüga jádaangiñe, ába larúfuduni Búngiu luágu wuríba lan le jadügübei láu loúwegüdüniña mílu güriña jádaangiñe lídan ában wéyu.

⁹ Moún lumuti gíñe wáluajani lében lugúraasun Búngiu woun láu luríban wagáburi, queí jadügüni jádaangiñe, ába jóúwegun láu lágüragüdüniña joun jéwe.

¹⁰ Mamágundara jumá gíñe lúma Búngiu queí jadüga jádaangiñe, ába loúnajani Búngiu ánjeli lun láfaraguniña jilágubei.

¹¹ Suséreti sun le joun binádu agübürigu, ába labürüdün tídan Lerérun Búngiu queísi jémpulu woun, wagía le wíwanbei lídan lagúmujóun dan le, lun wasúbudiruni buídu luágu mínsiñe lan figoú lun Búngiu.

¹² Le lubeíti jarítaguabei luágu derégüdagua lan leíbugun lúma Búngiu, toúnigilá, máburujalá lídoun figoú.

¹³ Oúchawaguni buri le jasúfurirubei, ában láu lúma buri le jasúfurirubei ja jíbiri. Gayáraati jeménigidun luágu Búngiu, mígirunbei lun jibíjin oúchawaguni le jásiñerun awánda. Lubáragiñe líra, dánme liábin oúchawagüni, larúfudubei gíñe Búngiu jun ída lúba lan jáfuridun lídaangiñe, ítara lúba gayára lan jawánduni.

¹⁴ Ligía lubeíti, nidújeñu jínsiñetiña nun, mádaragua jumá júngua lídoun cátei le jánina sándu.

¹⁵ Nadímurejaña jun queísi joun güriña gunfaráandatiña, samína jumá júngua ánjein buídu lubeí le naríñagubei jun, lúmoun mabuídun lan.

¹⁶ Dan le werésibirun, dan le wátun lídaangiñe uníñein le uágubei wíchiga eteíngiruni lun Búngiu, arúfuda wamúti luágu lídaañadiwa lan ában lúma Crístu luágu líta le áwiyurubei, dan lé meja loúnwenbei luágu gurúwa wawágu. Dan le weígin tídaangiñe fein to wagúbachaguboun, arúfuda wamúti luágu lídaañadiwa lan ában lúma Crístu luágu lúgubu le ledéregerubei lun oúweni luágu gurúwa ligía.

¹⁷ Queísi jou wabeí tídaangiñe ában méme fein, arúfuda lumúti líra luágu lídaañadiwa lan ában láu sun gíbe wamá.

¹⁸ Aríja jumá lun násiñun le linásiñun Israél. Ja eígibaña lídaangiñe eígini lé buri adágarawagüdüti lun Búngiu luágu latárü, lídaañañu lan ában jámagua, lúma lúma Labúreme latárü.

¹⁹ Mára naríñaguña luágu wíwan jamá sándu, maríñaguntina gíñe luágu weírigutima lan úwi le adágarawagüdübei joun sügü láu ámu úwi.

20 Le nariñagubei, luágu dan lan le jadágaragüdün ja ibídiñejabubaña lun Búngiu joun sándu, joun máfianu jadágaragüda, máma lun Búngiu, áni mabúseerúntina lun lídan jumá ában jáma máfianu.

21 Siñáti játun lídaangiñe licópun Wabúreme Jesucrístu úara lúma játun lídaangiñe jacópun máfianu. Siñáti gíñe jeígin luágu lidábulan Wabúreme Jesucrístu úara lúma jeígin luágu jadábulan máfianu.

22 ¿Ódi buséntün jeméendügüdüni Wabúreme láu jañúurun luágu jadábulan máfianu? ¿Jéretün funági lueí Búngiu lun manúfudebadün lan lueí ligáñi?

Lúnti jínsiñejabu jamá lánigu Crístu

23 Inárüni le aríñawagúbei luágu gayára lan jadügüni gürígia le jabúseerun, láu sun líra, máma sun cátei buíti láburujan. Gayáraati jadügüni gürígia le jabúseerun, láu sun, máma lan sun cátei lun líderaguniña ámu gürígia lun jóudin jabáruaguóun lúma Crístu.

24 Lúnti warítapun luágu le buídubei joun ámu gürígia, mámarügü lan wawóuguoun warítagua.

25 Niján le lúnbei jadügüni luágu úwi. Jóujuma lídaangiñe sun cátei le alúgurajoúbei mágidirugu, málügüdajanga jugúya ánjein dágüdawa lubei joun sándu lúmoun madágarawagüdün lan,

26 maríbadalá jarítapun luágu, gayáraati jeígini, lugúndun láni Wabúreme múa láu sun le lídaanbei.

27 Ánjaün lamísuraja ában gürígia le mafíñeti luágu Crístu lun jídin eíga lúma, gayáraati jídin ánjaün busén. Jóujumei le íchugúti jun, málügüdajanga ni cáta, mebéresen jumá ánjein dágüdawa lubei eígini ligía joun sándu furúmiñe, lúmoun madágaragüdünwa lan.

28 Ánjein aríñawagua jun luágu dágüdawaali lan eígini ligía joun sándu, meíga jumei, luei jadügün dáñu lun le aríñagubalin jun, luei gíñe laríbadun larítapun.

29 Nadímurejañatia luágu larítapun le ában, máma luágu barítapun.

Gayáraati jamúga funa laríñapun mútu. “¿Cásan uágu lúnti lubei lafálaruni ában gürígia le larítapun ámu?”

30 Ánjein gayára lubei níchugun eteíngiruni lun Búngiu luágu le neígibei, ¿cábago uágu jadímureja nuágu lueígiñe neígini?”

31 Ánjaün lubeiti eíga o áta o jadügün furúmieguarügü cátei, adüga jumei súngubei lídan ában luwúyeri le íchugubei inébesei lun Búngiu.

32 Míchiga jumá lébuna eíguaduni lun ni ában, ni joun juríu, ni joun ja mámabaña juríu, ni joun ja lánigu Búngiu.

33 Áu, jóuchatina lun nagúndaaragüdüniña súngubei lídan sun cátei, máma rügüñein nuóúgua narítagua, jarítaguatina gíñe jawágu jíbiri lun gayáraabei lan jayábin lun jafíñerun luágu Jesucrístu lun jasálbarun.

11

1 Áyeija jumei nigáburi queísi náyeijani ligáburi Crístu.

Wúríña lídan jóúndarapun afíñetiña

2 Nidújeñu, gúndaatina jáu luágu súnwandan lan jarítapun nuágu, lúma luágu falá jumaní arúfudajani le níchugubei jun.

3 Guetó, níjein ámu arúfudajani le nabúseerubei lun gunfaráanda jumáni, luágu Crístu lan lichügüdinabei cáda wügüri, wügüri tichügüdüna lúmari, ítara quei Búngiu lan lichügüdinabei Crístu.

4 Nibúsigarídünati lun ladáurapun ában wügüri láu lábulugu dan le layúmurapun lun Búngiu, eteíngirei lídan jadámurin afíñetiña, o dan lan le laríñapun ugánu le ladímurejan Búngiu liyúmulugugiñe wügüri ligía, ladüga láu

líra, larúfuduñein luágu níjein lan ában wügüri weírigutimaati lanügüni lueí lídan adámurini ligía, áni Crístu rügüñein weírigu jádan sun wügüriña.

⁵ Nibúsigarídünati gíñe lun madáuragun tan würi láu tábulugu dan le tayúmuragun lun Búngiu, eteíngirei lídan jadámurin afíñetiña, o dan lan le ladímurejan Búngiu tiyúmulugugiñe, ladüga láu líra tarúfuduñein tamájarun lun tanügüni wügüri weírigu sügü táu, wuríbati líra, queísigubeirügü jamúga lasarún tídburi queísi wügüri.

⁶ Ánjoun madáuragun ában würi láu tábulugu, buítimaati lun tásaruni sun tídburi, áni ánjein busíganudüna lubeí tíbuguni würi tídburi o tásaruni lan tábulugu, darúguatá láu tábulugu.

⁷ Moún lumuti ladáuragun wügüri láu lábulugu lídan jadámurin afíñetiña lugúndun liyáwa Búngiu ligía, áni arúfuda lumúti luweírigun Búngiu. Ánjounti würi, arúfuda tumúti luweírigun wügüri,

⁸ lugúndun dan le ladügünbalin Búngiu wügüri, máma tídaangiñe würi ladügei, würi ladügüboun lídaangiñe wügüri.

⁹ Adüga lumútu Búngiu würi lun wügüri, máma wügüri tun würi.

¹⁰ Ligía lúnti lubeí tadáuragun würi láu tábulugu lídan jadámurin afíñetiña queísi liseíni derégüdaguäü lábugiñe lagúmadijan wügüri, lúma lun jagúndaarun ánjeligu láu tagúfurumadun.

¹¹ Láu sun líra, lídan wabágarí queísi afíñetiña, mégei lumútu wügüri würi, mégei tumúti gíñe würi wügüri.

¹² Queísi inárüni lubeí luágu lídaangiñe lan wügüri tadügüwa würi, ítara líña gíñe inárüni lan luágu würi lan íchugubalin wügüri ubouágu, áni sun cátei lúmangiñe Búngiu liábin.

¹³ Ítara líña lubeíti, samína jumá júngua ánjein buídu lubeí lun tayúmuragun würi lun Búngiu lídan adámurini madáuragunga láu tábulugu.

¹⁴ Jéchutiwa wagía gürígia lun waríttagun luágu busíganu lan lun migínagu lan lídburi wügüri.

¹⁵ Ánjoun würi, ában uwéndeni tun lun migínagu lan tídburi, ligía líchugúnbei ídburi migínaguti tun lun tadáuragun láu tábulugu.

¹⁶ Ánjein níjein lubeí busénti lasígenejan luágu cátei le, lúnti lasúbudiruni luágu ni lan wagía, ni já buri jíbiri tílana lílígílisin Búngiu masúbudiruntiwa ámu igáburi lueí líra.

Luríban jagáburi afíñetiña dan le jeígin luágu lidábulan Wabúreme Jesucrístu

¹⁷ Nabürüja jun guetó luágu ában cátei le siñábei naríñagun luágu buídu lan jadügüni, lugúndun genége lumúti luágu adüga lán buri jóúndaragun dáñu jun lubáragiñe jamúga ladügün buíti.

¹⁸ Furúmiñeti cátei, aríñawagúati nun luágu dan lan le jóúndaragun, níjein lan fánreinguaü jídan, áni afíñetina luágu níjein lan inárüni lídan le aríñawagúbei.

¹⁹ ¡Fágua lúnti ñi lan fánreinguaü jídan lun lasúbudirúniwa cátaña lan afíñetiñabaña ja tímatimaatiña!

²⁰ Láu buri fánreinguaü le, dan le jóúndaragun lun jeígin luágu lidábulan Wabúreme Jesucrístu, siñáti jeígin láu ában igáburi le íchugubei inébesi lun,

²¹ lugúndun dan le lachülürün óra lun jeígin, meígintün nege lídan ában. Lubáragiñe líra, cáda ában, ába louífudajan eígei eígini le lanügübei. Ja siñábei janügün gíbeti, ába jeréderun láu jaláma. Jayábiti jídaangiñe, ába játun sarágu dari lun jabácharuadun.

²² ¿Mábantün funági lun jeígin lúma lun játun ñi? Láu igáburi le, barü jumutiña tílana lílígílisin Búngiu quei ni cáta, rújumaña ja úabei ni cáta jáma

lídoun busíganu. ¿Cábagi nariñaga jun luágu líra? ¿Lúnti nagúndaarun jáu? ¡Luágu líra siñáti!

Adíneruni le arítaguagülei luágu loúnwen Wabúreme

²³ Lúmagiñe guánarügü Wabúreme Jesucrístu nerésibirei igáburi le warítaguagüle luágu loúnwen, lé meja níchugubei jun. Queísi le nubeíbei jun, luágu le lan áriebu le lalúgurúnbei Wabúreme, ába lanügünun fein lújaburugu,

²⁴ lásun líchugun eteíngiruni lun Búngiu tuágu, ába lagúbachagunun lun lafánreinragunun jádan lánigu, ába laríñagun. “Joujúma, núgubu le, le nedéregerubei luágu jufúleisein. Adüga meme jumeí cátei le, jarítaguagüleme nuágu.”

²⁵ Ítara gíñe, lásun jeígin, ába lanügüni cópu táu diweín lújaburugu, ába laríñagun. “Cópu le táu diweín to, liseíni iséri lidáradun Búngiu júma, le achoúrurúabei láu níta le lúnbei láwiwurun lídaangiñe núgubu juágu. Ságüme játuni, adüga jumeí lun jarítagun nuágun.”

²⁶ Ítara líña lubeíti, daríme le lagíribudun Wabúreme ubouágun, ságüme jeígin fein, gurá jugúya diweín to jarítaguagüle luágu Jesúsu, jarúfuduñein luáguti loúnwen Jesúsu wawágu.

Ligáburi leigín eígin le arítaguagülei luágu Jesúsu

²⁷ Furúmieguarügü le eígitu fein tugúya, guráloun diweín to láni Wabúreme Jesucrístu lídan ában igáburi le míchuti inébesei lun Búngiu, ladügüña figou ladüga líchuguña lan minébesei lun lúgubu Wabúreme lúma líta.

²⁸ Ítara líña lubeíti, cáda ában lúnti lasúbudiragun lúngua buídu ánjein jarúma tubeí lanígi lubáragiñe lerésibirun.

²⁹ Lugúndun ánjein erésibira marítagunga luágu laníchigu lánina lúgubu Wabúreme, labeíchubei Búngiu.

³⁰ Ligía añájein lubeí sarágu jídaangiñe, sánditiña, débilitiña, jilágu jíbiri.

³¹ Ánjawa jamúga asúbudiragua woúngua buídu lubáragiñe werésibirun, mabeíchun lumútiwa jamúga Wabúreme ítara.

³² Dan le labeíchuniwa Wabúreme, ladügüñein líra lun wasúbudiragun woúngua, gayára lámuga wasáansiraguni wagáburi lueí weféridirunme úara jáma lirájüñü ubou.

³³ Ítara líña lubeíti nidújeñu, dan le jouúndaragun lun jerésibirun, agúrabagua jumá júngua.

³⁴ Ja lamátiña, joujúma jábiñe, mabeíchun lámugaña Búngiu luágu luríban ligáburi jouúndaragun. Lé buri líbiri cátei naráanserubei dánme le nídin aríjaün.

12

Ubáfu buri le líchugubei Sífiri Sándu lun cáda afñeti

¹ Nidújeñu, níjein buri cátei nabúseerun lun jasúbudiruni luáguti buri ubáfu le líchugubei Sífiri Sándu lun cáda afñeti luágu Jesucrístu.

² Subúdi jumúti buídu luágu dan lán meja le mámagidün lánigu Crístu, ádajouátün meja lun jeíbugun jarígi sándu ja maríñagadibaña.

³ Ligía nabúseerunbei nariñagun jun guetó lun gayára lan jasúbudiruni ánjein lubáfu lubeí Sífiri Sándu ádajabálin ában gürígia lun ladímurejan lúmoun lubáfu lan espíritu wuríbati. Siñáti ládajani Sífiri Sándu ában gürígia lun lanábaguni Jesúsu láu laríñagun luágu máma lan Liraü Búngiu, espíritu wuríbati ádajabalin lun ladügüni líra. Áni láu rügüñein lubáfu Sífiri Sándu gayára lan laríñagun ában gürígia luágu Jesúsu lan Wabúremebei.

⁴ Níjein sarágu luwúyerigu ubáfu le gayáraati lerésibiruni gürígia le afíñebei luágu Jesucrístu, áni ában méme Sífiri Sándu íchugubalin.

⁵ Níjein sarágu luwúyeri ligáburu esériwiduni lun Wabúreme Jesucrístu láu ubáfu buri le íchugubei Sífiri Sándu woun, áni lun méme ában Abúremein wesériwida.

⁶ Lídan gíñe sarágu luwúyeri wayúsurei ubáfu buri le rúaalibe woun, áni ában méme Búngiu le íderagubaliwa lun wayúsuruni ubáfu ligía.

⁷ Arúfudaguati Sífiri Sándu lúngua wádaangiñe láu ubáfu le íchugubei woun, lun gayára lan wíderaguniña jíbiri afíñetiña.

⁸ Añájein jíbiri, rúti Sífiri Sándu ubáfu joun lun gayára lan jadímurejan láu lichú áu, añájein úntiña líchiga ubáfu lun jadímurejan láu sarágu subúdi.

⁹ Jíbiri resíbitiña ában afíñeni weíruti lúmagiñe méme Sífiri Sándu ligía, jíbiri resíbitiña ubáfu lun jareídaguagüdüni sánditiña.

¹⁰ Añájein resíbitiña ubáfu lun jadügün miláguru, jíbiri resíbitiña ubáfu lun ladímurejan Búngiu jayúmulugugiñe. Joun jíbiri, rúti ubáfu lun jasúbudiruni ánjein Sífiri Sándu lubei ádajabalin ában gürígia lun ladímurejan o ámu lan luwúyeri espíritu, jíbiri íbjatiña ubáfu lun jadímurejan ámuñegueinarügü luwúyeri dimúrei luei jerérun. Añájein íbjatiña ubáfu lúmagiñe Sífiri Sándu lun jafúnraanguagüdüni le aríñawagübei lídan buri dimúrei teréncha ligía.

¹¹ Sún buri cátei le, ában méme Sífiri Sándu le ábanrügübei, ligía adügübalin, le afánreinjabalin ámuñegueinarügü ubáfu ligía lun cáda gürígia queísi labúseerun.

Lánigu ában méme úgubu súngubei

¹² Gíbeti umégeguni lídan wágubu, áni sun umégeguni ligía ában rügüñein úgubu ladüga. Ítara líña gíñe le únbei wagúara lúgubu Crístu, cáda ában afíñeti ában lídaangiñe lumégegun lúgubu Crístu.

¹³ Sun wagía afíñetiña –juríu, máma juríu, idámuni, máma idámuni, furúmiegurügü le wawúyeribe –láu wabásterun, ába ladügüniwa Sífiri Sándu lun ában wamá jáma sun jíbiri afíñetiña, áni sun wagía, resíbi wamúti méme Sífiri Sándu ligía.

¹⁴ Níchiga ában jémpulu jun luágu wágubu láu sun lumégegun lun jasúbudiruni luágu ítara wáña lan queísi lumégegun lúgubu Crístu. Wágubu, máma rügüñein ában umégeni luágu, gíbeti umégeguni luágu.

¹⁵ Ánjein jamúga aríñaga ugúdi. “Máma nugúya líbiri úgubu lugúndun máma nan újabu”, máma lueígiñe líra lun mámabei lan líbiri úgubu,

¹⁶ ánjein lan jamúga aríñaga arígei. “Máma nugúya líbiri úgubu lugúndun máma nan águu”, máma lueígiñe líra lun mámabei lan líbiri úgubu.

¹⁷ Lun jamúga águu lan sun úgubu, ¿ída líña jamúgagi wagáambun? O lun jamúga arígeirugu lan sun úgubu, ¿ída líña jamúgagi wirímichun?

¹⁸ Rúlaali Búngiu cáda lumégegun úgubu le ní lumuti labúseera.

¹⁹ Lun jamúga ában rügüñein lan umégeni luágu úgubu, moustarunti jamúga úgubu ligía.

²⁰ Láu sun gíbe lan lumégegun úgubu, ában rügüñein úgubu.

²¹ Siñáti laríñagun águu lun újabu. “Memégeirun numútibu”, siñáti gíñe laríñagun ichügü lun ugúdi. “Memégeirun numútibu.”

²² Lubáragiñe líra, lé buri lumégegun úgubu le laganóunbei camá débiliti, ligiatima buri mégeiwabei,

²³ lé buri lumégegun úgubu le wanügübei quei ni cáta, ligiatima wadáraguagüdübei láu uwéndeni. Le buríti líbiri lumégegun wágubu le arámudaguabei, ligiatima wóuserunbei láu goúnigi,

²⁴ le madügünwabei lún buri líbiri lumégegún wágubu. Ítara líña laráanseruni Búngiu úgubu lun le lán buri líbiri umégeguni le anügübei quei ni cáta, ligíatima lan weírigu,

²⁵ lun níjein lan ában úarani luágu úgubu lídan le luwádigimaridun sun umégeguni lídan ában, láu ában toúnigi jóuniwagua.

²⁶ Ánjein asúfurira ában lídaangiñe lumégegún úgubu, súfuriti gíñe buri le líbiri, ánjein gíñe ouserúa ában lídaangiñe buídu, ába lagúndaarun lé buri líbiri lídan ában.

²⁷ Ítara méme líña gíñe, lúgubu Crístu jugúya, cáda ában jídaangiñe, lumégegún úgubu ligía.

²⁸ Rújali Búngiu wadágimanu jun tídan lilígilisin lun juwádigimaridun luágu ában queísi luwádigimaridun lumégegún úgubu. Furúmiñetiña, apóstolugu líchuguniña Búngiu lun jesériwidun joun jíbiri afiñetiña, jabíaman, profétagu, jürüwan, arúfudajatiña luágu cátei láni Búngiu, lárigiñe, ja adáagubaña miláguru, lárigiñe, ja areídaguagüdübaña sánditiña, ja ídejabaña, ja láubaña gumádi, jáma ja íbíbubaña ubáfu lun jadímurejan dimúrei buri le teréncha.

²⁹ ¿Apóstolugu funági súngubei? ¿Profétagu funági súngubei? ¿Arúfudajatiña súngubei? ¿Ódi sun jagía adáaguatiña miláguru?

³⁰ ¿Gabáfutiña súngubei lun jareídaguagüdün sánditiña? ¿Adímurejatiña súngubei dimúrei buri teréncha? ¿Gayára jamúti súngubei míni lán buri dimúrei ligía aríñaga? Uá.

³¹ Buíti lubeíti lun jáfaagun lun jibíjini lubuídun-ágei buri ubáfu lúmagiñe Búngiu, áni níjein ában cátei lun jáfaagun lun jibíjini, buítimaati sügü láu sún buri ubáfu ligía, ínsiñeni cátei ligía, narúfudaja jun luágu.

13

Ínsiñeni

¹ Ánjawa jamúga gabáfu lun wadímurejani sun luwúyeri dimúrei le adímurejoúbei ubouágu lúma sun luwúyeri dimúrei le jadímurejabei ánjeligu, áni mínsiñejabutiwa, málati jamúga wadímurejan. Ítara wáña jamúga quei ában garánwoun le adaúnjati, o quei lan ában asíedu le areínchuti.

² Ánjein jamúga gayára ladímurejan Búngiu wayúmulugugiñe, subúdi wameí sún buri lujúlilin-ágei inárüni arámudaguati áni níjein sun luwúyeri subúdi wáma, áni weíri ligía wafiñen darí jamúga lun gayára lan wagídaruni ában wübü lídaangiñe lubára láu afiñeni ligía, sun líra áni mínsiñejabutiwa, ni cáta wagía.

³ Ánjein wíchiga sun le wámabei murúsun murúsun joun gudémetiña darí lagúmunchun, madügünga wameí láu ínsiñejabuni, mesériwinti woun lun ni cáta. Lun jamúga weíri lan wesériwidun lun Búngiu darí lun wágudúniwa jilágubei luágu, mesériwidunga wagía láu ínsiñejabuni, málati gíñe woun.

⁴ Le jínsiñejabúbei gagúraasunti, areídati, áni magímugati, mapántati, manáangun ligía lúngua.

⁵ Manárimeguti, máma rügüñein luougua larítagua, magáñidunti, máguyugüdünti wuríbani luágu wuríbani.

⁶ Magúndaarunti láu jafígoun ámu, lagúndaarun dan le janügün gürígia ában ũma le richábei.

⁷ Awánda lumúti sun cátei, afiñeti buídu jawágu súngubei, afiñeti luágu gayára lan leménigidun jawágun gürígia lun jarúfuduni lubuídun jagáburi, úati ni cáta lun gayára lan lagídaruni línsiñejabu.

⁸ Lachülürüba dan, dánme le lagíribudun Jesucrístu ubouágun, lun madímurejan lánme Búngiu jayúmulugugiñe gürígia, madímurejoún ligíame

dimúrei buri teréncha, memégeirunwalime gíñe subúdi. Ánjeinti ínsiñeni, leréderuba lun sun dan.

⁹ Guetó, murúsun rügüñein wasúbudirun, murúsun rügüñein gíñe wafúraanguagüdüni dimúrei le ladímurejabei Búngiu wayúmulugugiñe.

¹⁰ Ánjeinti dánme le lagíribudun Jesucrístu, wasúbudirubei sun cátei le gumúti. Murúsun ubáfu le wabíjibei guetó, memégeirunwabei, lagúmuchaguba.

¹¹ Dán meja le irájüñügidiwa, queí meja irájüñü wadímureja, queí meja irájüñü wasáminara, queí gíñe meja irájüñü warítaqua, ánjeinti dan le wügüriñajadiwa, ába wígiruni le jáni irájüñü.

¹² Guetó, louguati wasúbudirun luágu Búngiu lúma luágu luwádigimari, waríjini camá buri cátei le marijinti buídu tídan ában isúbusein. Lachülürüba wéyu lun waríjini Búngiu furáangu. Guetó, louguati wasúbudiruni buri cátei, wasúbudirubei Búngiu le gumúti lídanme wéyu ligía queísi lasúbudiruníwa Búngiu guetó.

¹³ Afíñeni, eménigini lúma ínsiñeni ladúraruba lun sun dan, áni ínsiñeni, weíritimaabei lídaangiñe ürüwagubei.

14

Ladímurejoún dimúrei teréncha

¹ Ítara líña lubeíti, lubáragiñe sun cátei, áfaagua jumá lun jínsiñejabu jumá, ayúmaja jumá gíñe lun líchugun Búngiu ubáfu le líchugubei joun afíñetiña lídaangiñe Sífiri Sándu jun, létima ubáfu lánina ladímurejan Búngiu jayúmulugugiñe gürígia.

² Buítimaati lun jáluajan ladímurejan Búngiu jiyúmulugugiñe sügü láu jáluajan jadímurejan dimúrei teréncha, lugúndun gürígia le adímurejati dimúrei buri teréncha, lun Búngiu ladímureja máma joun gürígia, lugúndun Búngiu rügüñein asúbudirei líla dimúrei le ladímurejabei. Le laríñagubei, lídaangiñe Sífiri Sándu laríñagei, ánjeinti laníchigu, arámudaguati lueí jasúbudin gürígia.

³ Ánjeinti le iyúmulugugiñébei ladímureja Búngiu, adímurejati láu jerérun ja agáambubalin lun lawáanseragüdüniña lídan cátei lánina Búngiu, lun líchugun dügüdaguaü joun lúma gurásu.

⁴ Le adímurejati dimúrei teréncha, lúngua rügüñein líderagua lídan leíbugun lúma Búngiu, ánjeinti le iyúmulugugiñébei ladímureja Búngiu, awáansegüda lumútiña lánigu Búngiu lídan jeíbugun lúma.

⁵ Buséntina jamúga lun gabáfu jumá sun jugúya lun jadímurejan dimúrei teréncha, laú sun, buséntimaatina jamúga lun gayára lan ladímurejan Búngiu jiyúmulugugiñe, lugúndun buítimaati líra sügü láu ladímurejoún dimúrei teréncha, ánjein gubeírügü aríñawagua ca lan míni lan le aríñawagúbei lídan dimúrei ligía lun gayára lan jawáanserun tílana ligílisi lídan jeíbugun lúma Búngiu.

⁶ Ligía lubeíti nidújeñu, ánjana ñüdüñ bisídaün, ábame nadímurejan jun láu dimúrei teréncha, mesériwinbei líra jun lun ni cáta, ánjana gubeírügü gíñe adímureja jun lídan werérun luágu cátei le lasúbudiragüdüñ Búngiu woun, o níchugun lan ában subúdi luáguti inárüni jun, o ában lan arúfudajani, o ladímurejan lan Búngiu jun niyúmulugugiñe.

⁷ Rúwamei jálagu áfarutiña queí ában jémpulu. ílagu buri ligía, mabágariti, queí buri fidu, gidára, ánjein wásiñera asúbudira furáangu ca lan nóta afarúbei, íbídiñebei woun ca lan urému le wagáambajabei.

⁸ Ánjein mínwirun fidu ában ínwiruni furánguti wuríburugu, úabei ni ában aráanseruti lun lídin ageíndagua.

⁹ Ligía méme gíñe asúseredubei wáma. ánjawa mariñagun dimúrei le gayáraati gunfaráandawa lan, ¿ída lubági lasúbudirúniwa ca lan waríñagubei? ¡Wadímurejaña lun garábali!

¹⁰ Gíbeti luwúyerigu dimúrei ubouágu, áni sún buri dimúrei ligía richáti joun ja gunfaráandabalin,

¹¹ ánjein úa lubeí gunfaráanda náni dimúrei le áubei ladímurejoúa nun, terénchabadina lun gürígia le adímurejabei nun, áni terénchabei gíñe gürígia ligía nun.

¹² Ligía, quei weíri lubeí jayúmajan lun jibíjin lídaangiñe ubáfu le líchugubei Sífiri Sándu joun afíñetiña, áfaagua jumá jibíjini ubáfu buri le gayáraabei lawáanseragüdüniña tílana ligílisi.

¹³ Gürígia lubeíti le adímurejati dimúrei teréncha, lúnti lamúriajan lúma Búngiu lun líchugun ubáfu lun lun lafúnraanguagüdüni le laríñagubei lídan dimúrei ligía.

¹⁴ Ánjana ayúmuragua lun Búngiu láu dimúrei teréncha, inárüni luágu nayúmuraguña lan láu náni espíritu, líla le naríñagubei, ibídiñeti nun.

¹⁵ ¿Cáteiti lúnbei wadügüni? Lídan adámurini gayáraati wayúmuragun láu dimúrei teréncha, lúnti gíñe wayúmuragun láu dimúrei le gunfaráandawati. Gayáraati werémujan láu dimúrei teréncha, lúnti gíñe werémujan láu dimúrei gunfaráandawati.

¹⁶ Ánjein badímurejaña lubeí lun Búngiu luágu luweírigun láu dimúrei teréncha, gürígia ünabugutiña ja agáambubalibu siñábei júaradun búma, lugúndun úati gunfaráanda jamáni le baríñagubei.

¹⁷ Gayáraati ában lan eteíngiruni buíti le bíchugubei lun Búngiu láu dimúrei teréncha, míderagun lumútiña jíbiri gürígia láu líra.

¹⁸ Teínqui numúti Búngiu luágu gayára lan nadímurejan dimúrei teréncha sügü jáu sun jugúya,

¹⁹ áni jímein numúti naríñagun seíngü dimúrei le gunfaráandawati lídan jóundaragun tílana ligílisi, lun gayára lan jafúnrendeirun númagiñe, lubáragiñe naríñagun díisi-mílu dimúrei teréncha le úati gunfaráanda láni ni ában.

²⁰ Nidújeñu, masáminara jumá quei irájüñü luágu buri cátei le. Ítara jumá quei irájüñü lún buri cátei le wuríbati, ítara jugúyame queísi weínamujaña lídan ligáburi jasáminarun.

²¹ Laríñajare tídan lilíburun lúru. “Nadímurejaba joun lílana fulásu le lídan ámu luwúyeri dimúrei, lúma jayúmulugugiñe teréncha, ni ítara, mebéresenbaña náu, líña laríñagun Jabúreme Búngiu.”

²² Ubáfu lubeíti lun ladímurejoúniwa ámuñegueinarügü dimúrei, seríwiti liseínime lubáfu Búngiu joun ja mafíñebaña, máma joun ja afíñebaña. Ánjeinti ubáfu lun ladímurejan Búngiu jayúmulugugiñe gürígia, seríwiti liseínime lubáfu Búngiu joun afíñetiña luágu Jesucrístu, máma joun ja mafíñebaña.

²³ Dan lubeíti le óundaragua jamá sun tílana ligílisi, ánjein jadímurejaña lubeí sun jugúya dimúrei teréncha, ába jebélurun mafíñetiña jánwoun, o gürígia lan ja ibídiñegilibei luágu ubáfu le joun, ¿ma jaríñaguba luágu lülüjali lan jáu?

²⁴ Ánjein ladímurejaña lubeí Búngiu jiyúmulugugiñe, ába lebélorun ában le mafíñeti, ladáriraguba lúngua luágu gafígoun lan dánme le lagáambuni le jaríñagubei.

²⁵ Ítara lúba lafúnraangudun cátei arámudaguati le tídaanbei lanígi, ábame lájuduragun íchiga inébesei lun Búngiu, aríñaga ligíame luágu níjein lan Búngiu júma le tímatimaati.

Adüga jumeí sun cátei lídan lubúdubu

²⁶ Nidújeñu, niján lubeíti igáburi le lúnbei jouuseruni lídan jidámurin. Dan le joundaragun lun jájuduragun lun Búngiu, añájeinbaña jídaangiñe láu urému o arúfudajani, o cátei le lasúbudiragüdün Búngiu jun, o adímurejani lídan dimúrei teréncha, o lafúnraanguagüdüniwa adímurejani ligía, sun líra adüga jumeí lun méme jawáanserun tilana ligílisi lídan cátei le luáguti Búngiu.

²⁷ Dan le ladímurejoún lídan dimúrei teréncha, biámarügü jamá gürígia adímureja, o ürüwa, áni ában ábanlá gíñe jadímurejan, lúnti gíñe níjein lan ában lun lafúnraanguagüdüni le jaríñagubei.

²⁸ Ánjein úa lubeí ni ában le gayára lumúti afúnraanguagüda, buítimaati lun madímurejoún lan lídan dimúrei teréncha lídan adámurini, ladímureja cáda ában lúmagua lúma lun Búngiu.

²⁹ Ánjein gíñe luáguti lubeí ladímurejan Búngiu jayúmulugugiñe gürígia, biámarügü o ürüwa jamá gürígia adímureja, ja jíbiri lun jaríjin ánjein lúmagiñeti lubeí Búngiu le aríñawagübei lúmoun máma lan lúmagiñeti.

³⁰ Ánjein asúbudiragüda Búngiu ában cátei lun ámu gürígia le ñun umúti lun líchuguni lun guríriguaü, lúnti lámanichun le adímurejabei lun líchugun dan lun, lun ladímurejan.

³¹ Ítara, sun jugúya le iyúmulugugiñebei ladímureja Búngiu, gayáraabei jadímurejan ában ában lun jafúrendeirun súngubei, ragü jugúyame gurásu.

³² Ja iyúmulugugiñebaña ladímureja Búngiu, lúnti jágüdaagun joúngua darí lachülürün jadáani lun jadímurejan,

³³ lugúndun Búngiu le íchugubalin ugánu ligía joun, lánina darángilaü, máma lánina chagáguau.

Queísi jagáburi jíbiri wadújeñu lídan wafíñen dan le jadámuridagun,

³⁴ moún lumuti jadímurejan würiña lídan jadámurin afíñetiña lugúndun ma-jouáti lun cátei le. Lúnti gagáambadi jamá queísi laríñaguni lilúrudun Búngiu.

³⁵ Ánjein busén jabei jasúbudirun ában cátei, álügüda jameí jámari jábiñe, lugúndun mabuídunti laríaajoún lun tadímurejan ában würi lídan jadámurin afíñetiña.

³⁶ Ánjaün magúnda láu nerérun, lúnti jasúbudiruni luágu máma lan júma lagúmesera Lerérun Búngiu, áni mámarügügidün gíñe jugúya erésibirei.

³⁷ Le jarítaguabei luágu gabáfu lan lun ladímurejan Búngiu liyúmulugugiñe, o jarítagua lan luágu ru lan Sífiri Sándu ámu ubáfu lun, lúnti lasúbudiruni luágu ában lan lugúmadin Wabúreme Jesucrístu cátei le nabürüjabei jun.

³⁸ Ánjein manügün lan ítara, reídeilá lídan libídiouniga láu.

³⁹ Ítara líña lubeíti nidújeñu, áfaagua jumá lun gayára lan ladímurejan Búngiu jiyúmulugugiñe, mamájara jumá lun ladímurejoún lídan dimúrei teréncha,

⁴⁰ adügarüga jumeí sun cátei lídan lubúdubu.

15

Lásaarun Crístu lídaangiñe oúweni

¹ Guetóti nidújeñu, buséntina lun jarítagun luágu ugánu lé meja apúrichija náalibei jun luágu Jesucrístu le Wasálbaragüle. Niján ugánu ligía le jerésibirubei, le gíñe ídaanbei derégüdagun lan jafíñen.

² Sálbatün gíñe lun sun dan ladüga jafíñen luágu ugánu le, ánjein jafálara le uágubei napúrichija jun, ánjein gíñe láu lubeí jinárün jafíñera.

³ Furúmiñeti cátei, arúfudaja náali le furéndeí náalibei luágu Wasálbaragüle jun, luágu jilá lan Crístu luágu wafígoun, queísi taríñaguni Lerérun Búngiu luágu lúnti lan lasúseredun.

⁴ Lárigiñe meja loúnwen, ába labunún, ába lásaarun lídaangiñe oúweni luágu lürüwan wéyu queísi tariñaguni Lerérun Búngiu luágu le lúnbei lasúseredun.

⁵ Ligía larúfudagun lúngua lun Pédro, lárigiñe, ába larúfudagun lúngua joun jíbiri apóstolugu.

⁶ Lárigiñe, ába larúfudagun lúngua joun sügü jáu seíngü-san afíñetiña ja oúndarañubaña lídan ában, áni añájeingua sarágu jádaangiñe, wínwangiña chülü lúmoun dán le, ja jíbiri, jilágua.

⁷ Lárigiñe, ában larúfudagun lúngua lun Jacóbo, lárigiñe, joun sun apóstolugu.

⁸ Agúmujoúni, járigiñe súnigubei, ába giñe larúfudagun lúngua nun, láu sun ítara níña lan quei ában le agüriajoúti lídan ában igáburi le múaraanti,

⁹ lugúndun áu lan ni cátatimáabei jádan apóstolugu, madúnatina ni lun nanügün quei apóstolu, lugúndun eíbaaja numútiña méja tílana lilígilisin Búngiu.

¹⁰ Áu le áubei guetó lugúndun lareídun Búngiu nun, áni merédeti lareíni nun maságarunga ni cáta buíti nídaangiñe, lubáragiñe líra, ñadágimeinjaadina sügü jáu jíbiri apóstolugu, láu sun máma lan áu ñadágimeinbei, Búngiu le númabei láu lareíni, ligía ñadágimeinbei nídaangiñe.

¹¹ Mebéresentina ca lántima ñadágimeinjañabaña, jagía lan o áu lan, niján ugánu le wapúrichijabei luágu lásaarun Crístu lídaangiñe oúweni, áni niján giñe uágubei jafíñera.

Jásaarun jiláaña lídaangiñe oúweni

¹² Queísi wapúrichijan luágu saráli lan Jesucrístu lídaangiñe oúweni, ába jerésibiruni, ¿ída liñáti añájein lubei jádaangiñe aríñagatiña luágu másaarun jamá jíbiri jiláaña?

¹³ Ánjein másaarun jabei jíbiri jiláaña, másaarunti lubei giñe Crístu lídaangiñe oúweni,

¹⁴ áni ánjeinti másaarun lubei Crístu lídaangiñe oúweni, málati ugánu le wapúrichijabei luágu asálbaruni, málati giñe afíñeni le juágubei.

¹⁵ Ánjein ítara líña lubei, waríñaguña iyéeni luágu Búngiu, lugúndun aríñagaadiwa lan luágu sarágüda láani Búngiu Crístu lídaangiñe oúweni, ánjein máma lubei inárüni luágu sará jamá jiláaña, máma giñe inárüni luágu sarágüda láani Búngiu Crístu lídaangiñe oúweni.

¹⁶ Lugúndun ánjein másaarun jabei jiláaña, ni Crístu, másaarunti giñe lídaangiñe oúweni,

¹⁷ áni ánjeinti jiláñugili lubei Crístu, mesériwinti jafíñen lun ni cáta, lídaangidün jifígoun ligíbugiñe Búngiu.

¹⁸ Áni ánjein ítara líña lubei, féridiñu jáña giñe ja oúwegubaña láu jafíñen luágu Crístu.

¹⁹ ¡Ánjein lúntirügü lubei ibágari le weménigi luágu Crístu, fugiábu wagía jádaangiñe súnigubei!

²⁰ Le inárünitibei, saráti Crístu lídaangiñe oúweni lúnya labágaridun, ligía furúmiñetibei ásaaruti lídaangiñe oúweni lun moúnwendügüyaali lan, áni ítara lúba jásaarun sun lánigu.

²¹ Ítara quei lídaangiñe lan ában wügüri lagúmesera oúweni uboúagu, lídaangiñe giñe ában wügüri lagúmesera jásaarun jiláaña.

²² Ítara quei jóuwegun súnigubei ladüga lídaangiñe lan Adán jayábin, ítara lubá giñe gabágariya jamá súnigubei lárigiñe oúweni ladüga lánigu jamá Crístu.

²³ Lúnti lásaarun cáda ában lídan lidáni. furúmiñeti meja ásaaruti, Crístu, lárigiñeme, dánme le lagíribudun Crístu uboúagun, ligíame jásaarun lánigu lídaangiñe oúweni.

²⁴ Ligíabati liábin lagúmuchagüle sun cátei, ábame lagünrinchaguni Crístu sun líbiri luwúyeri arúejiani, ubáfu, lúma érei le ubouágubei, ábame ledéregeruni arúejiani lun Búngiu Úguchili.

²⁵ Larúejaba Crístu daríme gáñeigüda láali Búngiu wuríbu lun jawágu sun láganiñu,

²⁶ ouweni, ligíaba lagúmujoún ágani agünrinchawagúti.

²⁷ Rúlaali Búngiu sun cátei lábugiñoun lubáfu Crístu, dan le taríñagun Lerérun Búngiu luágu rúa lan sun cátei lábugiñoun lubáfu, subúdiwati luágu úa lan Búngiu lábugiñe lubáfu, lugúndun Búngiu íchugubalin sun cátei lábu lubáfu Crístu.

²⁸ Dánmeti le reídejali sun sun cátei lábugiñe lubáfu Crístu, ábame leréderun Crístu, le Liraü Búngiu, lábugiñe lubáfu Búngiu, le íchugubalin sun cátei lábugiñoun lubáfu Crístu. Búngiurügüba urúei, le Súnti Gabáfu.

²⁹ Añájein jídaangiñe, abásterutiña jewéñegua ja ouwetiña mabásterunga. ¿Cámegi jadügei lira? Ánjein másaarun jabei jiláaña, ¿cámegi ju lan jabásterun jewéñegua?

³⁰ Ánjein siñá jásaarun jiláaña, málati wapúrichijan súnwandan lúnrüğü weíbaajoún lueígiñe.

³¹ Ságü wéyu yaráfa wamá lun wounwen, inárüni líra nidújeñu, queísi ugúndani le nasándirubei juágu queísi afiñetiña luágu Wabúreme Jesucrístu.

³² Ageíndaguatiña wügüriña ja ítarabaña quei anímaalugu janárimetiña ya Éfeso núma, ladüga mínsiñe lan cátei le napúrichijabei joun, ¿cági nagáñeirubei láu líra? Ánjein jamúga inárüni lubeí luágu úabei lan ibágari lárigiñe ouweni, richátiña jamúga ja ariñagubaña. “Jouwama, guráwama, lugúndun jarúga wouwegua.”

³³ Mayeedúa jumá. Aríñawagúati. “Féridigüda jamúti jagübüri umádagu lubuídun igáburi.” Inárüni líra.

³⁴ Darígua jumá júngua, giríbu jumá lun ában ibágari le surúti, mafígouja jumá. Añájein jídaangiñe, ibídiñeti Búngiu joun. Naríñaguñein le lun janügün busíganu.

Ída lúba ligáburi jásaarun jiláaña

³⁵ Fágua níjeinbei álügüdajati. “¿Ída lúbasan ligáburi jásaarun jiláaña? ¿Cábasan luwúyeri úgubu jawágu?”

³⁶ Libídiouniga láu álügüdajani líra. Dan le labunún ában ílaü, gásu lañáladun lábugiñe múa furúmiñe lubá gayára lan labouchun.

³⁷ Mára nádü le lúnbei lájüchün abunúbei, ílaü abunúbei, furúmiegüarügü le luwúyeribei.

³⁸ Lárigiñe labunúniwa, jilá ligía, ába líchuguni Búngiu úgubu le labúseerubei luágu ílaü ligía, ába líchuguni úgubu le lúnbei cáda ílaü.

³⁹ Mára ában lábu sun úgubu, ámu luwúyeri jágubu gürígia, ámu jágubu anímaalu, ámu jágubu dunúru, ámu jágubu úduraü.

⁴⁰ Níjein gíñe buri cátei siéluna queísi wéyu, játi, warúguma, queísigubeirügü níjein lan ubouáguna, ámu lubuídunmeraü buri le siéluna lueí le ubouáguna.

⁴¹ Ámu larúni wéyu lueí larúni játi, ámu gíñe jarúni warúguma, áni jádaanguanarügü warúguma, ámuñegueinarügü jarúni jawáriuagua.

⁴² Ítara líña gíñe lídan jásaarun jiláaña, ámubei jágubu, labunúa ában úgubu le gañáladaditi, lásaarame le mouñwenjali.

⁴³ Labunúa ában úgubu le mabuídunjali, lásaarame ában le buídumeraüti. Labunúa ában úgubu le débiliti, lásaarame ában le jéreti.

⁴⁴ Labunúa ában úgubu le ídaanbei wabágarida ya uboúagu, lásaarame ában úgubu le ídaanbei wabágarida yágüta siélu. Ánjein ibíja wabeí wágubu lánina uboú, wibíjibeí gíñe wágubu lánina siélu.

⁴⁵ Ítara líña taríñagun Lerérun Búngiu. “Adán le furúmiñeti wügüri, ában meja wügüri wínwanti”, ánjeinti Crístu, le gíribeí gíñe lagúmujoún Adán, ában espíritu ligía le íchugubei ibágari.

⁴⁶ Furúmiñe ibíja wamúti ibágari le uboúaguna, lárigiñe, ábame wibíjini ibágari le lánina siélu.

⁴⁷ Lé meja furúmiñeti wügüri le adügübeí láu múa, uboúaguna meja, libíaman wügüri le Wabúreme Jesucrístu, siélu.

⁴⁸ Sun gürígia uboúagu ítara líña jágubu quei lúgubu Adán le adügübeí láu múa, sun lánigu Crístu, jabíjuba jágubu quei lúgubu Crístu, le siélu.

⁴⁹ Wágubu guetó, líbe lúgubu Adán, le lánina uboú, lachülürüba wéyu lun wibíjin ámu luwúyeri úgubu líbe lúgubu Crístu, le lánina siélu.

⁵⁰ Le naríñagubei, nidújeñu, luágu siñá lan jebélurun gürígia láu jágubu le uboúaguna lídoun larúeijan Búngiu siélu, lugúndun cátei le goúwedadibeí siñáti gabára lan lídan fulásu le ní lubei úa lan oúweni.

⁵¹ Buséntina lun jasúbudiruni cátei lé meja arámudaguabei le. Mára sun lánigu Crístu lun jouweguba lan, jasáansirawagúba súnigubei, ánjein wínwangiña lubeí dánme lagíribudun Jesúsu o jiláaña lan,

⁵² Lídan murúsun óra, furése furése quei ában léfegechun lúma lámurudun águu, dánme le lagaambúniwa lumálali fídu, le liseíni lagúmujoún sun cátei. Línwiruba fídu, ábame jásaarun lánigu Crístu ja jiláañabaña lun moúnwendügüyaaña lan, ja moúnwengiñabaña, ábame jasáansirawagún lídan méme óra ligía.

⁵³ Wágubu le wawágubei le gayáraabei lañáladun, lasáansiraguba lídoun ában luwúyeri le siñábei lañáladun, wágubu le goúwedadibeí, lasáansiraguba lídoun le moúwedadibeí.

⁵⁴ Dánme le sáansiguaali wágubu le goúwedadibeí lídoun le moúwedadibeí, ábameí lagúnfulirun le bürüwañubei tídan Lerérun Búngiu. “Gumúja lubáfu oúweni, féridilá wuríbu.

⁵⁵ Oúweni, ¿jigeígi bubáfu lun bagúmuchaguagüdüníwa? ¿Jigeígi agáñeiruni lé nege lúnbei badügüni?”

⁵⁶ Figoú lébunabei oúweni, áni binádu lilúrudun Moisés, ligía arúfudubalin woun cátei lan figoúbei lun wayúmajani.

⁵⁷ Teínqui wáña lun Búngiu luágu lagáñeiragüdüníwa luágu sún buri cátei le, láu lubáfu Wabúreme Jesucrístu.

⁵⁸ Ligía lubeíti nidújeñu jínsiñetiña nun, ítara méme jumá derégüdagu lídan jafíñen, meréderagunga, ñadágimein súnwandan, gánwoun gueínarügü lídan luwádigimari Wabúreme, lugúndun subúdi jumúti luágu máma lan luágu ni cáta jadügei wadágimanu le jadügübeí lídan ában lúma Wabúreme Jesucrístu.

16

Loúndarún seínsu joun idújeñu lueígiñe Jesucrístu

¹ Luágu loúndarún seínsu joun wadújeñu lueígiñe Jesucrístu ja gudémebaña yágüta Jerusalén, adüga jumeí quei narúfudajani tídan sun ligílisi loúbawagu Galácia.

² Ságü wéyu dimáasu, cáda ában jídaangiñe lúnti ladíreirun murúsun lídaangiñe le lagáñeirubei, ábame lareíduni lun dánme lan nachülürün, merédedünme oúndaragua seínsu.

³ Dánmeti le nachülürün, nouñajabaña gürígia ja janúadajabaña ubúru gu Jerusalén, ábame níchugun gárada joun lun janüğüni seínsu le jóúndarubei joun wadújeñu ja ñíbaña.

⁴ Ánjein gíñe lun lubeí nídin, jóúdiba núma.

Laráansejan Páblo lubá luweíyasun

⁵ Lídan nuweíyasun, násüğürüba loúbawagugiñe Macedónia lun neréderun átiri wéyu ñi, nachülürüba lubeíti ubúru gu Corínto lárigiñe.

⁶ Fágua neréderagun júma átiri dan, o násüğürüni lan sun juyáabun ñi, gayáraabeiti jíderagunina lídan nuweíyasun léme ñíjin lumúti nídin lárigiñe nebélujan júmoun.

⁷ Mabúseerúntina chülüguarüğü nan aríjaün, buséntina neréderagun átiri dan júma, ánjein busén Wabúreme.

⁸ Neréderuba ya ubúru gu Éfeso darí luwéyuri Pentecostés,

⁹ lugúndun níjein ában oúnwenbun cháansi nuágu lun nadímurejan luágu Wabúreme Jesucrístu ya, áni buídubei lanüğü. Añájein gíñe gíbetiña gürígia mabúseerúntiña lun nuwádigimaridun luágu Wabúreme ya, ligía siñábei lubeí nígiruni Éfeso guetó.

¹⁰ Dánme le lachülürün Timotéo, jóucha jumá lun gúnda lan jagánagua, lun úa lan sarágu samínaü luágu, lugúndun luwádigimariña luágu Wabúreme Jesucrístu queísi áu.

¹¹ Manüga jumeí quei ni cáta. Dánme le gumúlaali lidáani júma, jíderagueime lun gayára lan lagíribudun númoun láu ában ugúndani tídan lanígi luágu lubuídun lidáani júma. Nagúrabajañein ya Éfeso jáu sun jíbiri wadújeñu lueígiñe Jesucrístu ja lúnbaña jayábin úara lúma.

¹² Ayúmuraguatina yebe lun Apólos lun lídin jáma jíbiri wadújeñu aríjaün, jénrenguti lídin guetó, lídiba dánme le gayára lan.

Lagúmujoún buri mábugaü

¹³ Ítara méme jumá agágudañu, toúnigiñu lueí cátei le jamúga gayáraabei ladíñurunün lueí lubuídun úma le gádaanbalün, derégüdagu jumá lídan jafíñen. Agáburida jumá quei wüğüriña ja awáanserubaña lídan le inárünibeí, manúfudeiga, jére jumá, gáñei jumámuga luágu wuríbani.

¹⁴ Sun cátei le jadüğübei, adüga jumeí láu insiñejabuni.

¹⁵ Nidújeñu, subúdi jumúti luágu Estéfnas lan jáma sun tílana lúban furúmiñebaña loúbawagua Acáya ígirutiña binádu jagáburi lun jerésibiruni Crístu, luágu gíñe derégeguaaña lan jóungua lun jesériwidun joun wadújeñu lídan afíñeni lídan furúmieguarüğü cátei le jayáraati.

¹⁶ Buséntina lubeíti lun gíñe jíchaagun júngua joun, lúma joun sun ja ídejabaña, ñadágimein jagía ítara.

¹⁷ Gúndaatina láu jayábin Estéfnas, Fortunáto, lúma Acáico ñájoun. Weíriñajati nisáminan juágu, áni siñáti jíabin sun jugúya,

¹⁸ ába jíchugun wüğüriña jagía gurásu nun láu janüğün ugánu nun juágu. Afíñetina luágu janüğüba lan gíñe gurásu jámagiñe luágu jadímurejan jun nuágu. Lúnti jeteíngiruni Búngiu jawágu gürígia ítaratiña.

¹⁹ Mábuga jáña tílana ligílisi buri to loúbawaguboun Ásia jun. Mábuga jáña gíñe Aquíla túma Priscíla jáma sun ja oúndaragubaña jábiñe jun, queísi afíñetiña luágu Crístu.

²⁰ Mábuga jáña sun idújeñu ja yábaña jun. Chúgua jumá júngua lídan líri Wabúreme, arúfuda jumámugei luágu lídaañadiwa lan ában wámagua.

²¹ Áu Páblo, noúnajañein mábugaü le jun le nabürüjabei láu nújabu lúma nilétüran.

²² Le mínsiñejabuti lun Wabúreme Jesucrístu, reídeilá lábugiñe líñaragun Búngiu. ¡Giríbubá furése ubouágun, Wabúreme!

²³ Binílaün Wabúreme Jesucrístu.

²⁴ Oúnaja numúti nínsiñejabu lídan Jesucrístu jun, sun jugúya. Ítaralá.

TIBÍAMAN LIGÁRADAN PÁBLO JOUN CORÍNTONA

Abúsuraguni

¹ Áu Páblo, ában láni Jesucrístu apóstolu áu, láu lugúndan Búngiu, ában le loúnajabei lun napúrichijani ugánu luáguti asálbaruni. Úara lúma Timotéo, le wadúje lueígiñe Jesucrístu, nabürüjañoun gárada to jun, jugúra le tílanabei ligílisi to ubúruguboun Corínto, lúma joun sun lánigu Búngiu ja loúbawagubaña Acáya.

² Resíbi jumá abíniruni lúma darángilaü lúmagiñe Wáguchi Búngiu, lúma lúmagiñe Wabúreme Jesucrístu.

Lasúfurirun Páblo

³ ¡Úati quei Búngiu, le Lúguchibei Wabúreme Jesucrístu! Ligía Wáguchibei le gudémejabubei woun, aráanseñu líña lun líchugun gurásu woun furúmieguarügü Óra.

⁴ Rúti gurásu woun lídan sun wasúfurirun, lun gíñe gayára lan wafúnrendeirun lúmagiñe ída lúba lan gayára lan wíchugun gurásu joun ámu ja asúfurirubaña, lídan méme luwúyeri igáburi le líchugubei woun.

⁵ Lugúndun ítara quei luweírin wasúfurirun luágu líri Crístu, ítara gíñe werésibirun ában oúnwenbun gurásu lúmagiñe.

⁶ Ligía lébubei wasúfurirun, lun gagúraasun jumá, sálba jugúyame, resíbitiwa gurásu lúmagiñe Búngiu lun gíñe gayára lan jerésibirun gurásu wámagiñe, subúdi jumeíme Wasálbaragüle. Ítara lúba gayára lan jawánduni líbe asúfuriruni le wawándubei, láu gurásu.

⁷ Derégüdati wafíñen juágu luágu jasígiramémeba lan derébuguñu lídan jafíñen, láu sun weíri lan jasúfurirun. Subúsiti woun luágu láu sun lan jasúfurirun luágu líri Crístu queísi wasúfurirun, jerésibiruba lan gíñe gurásu lúmagiñe Búngiu queísigubeirügü werésibiruni.

⁸ Nidújeñu, buséntiwa lun jasúbudirun luágu sarágu lénreengúnga le wasúfurirubei loúbawagu Ásia. Deréti oúchwagúni ligía, darí yebe lun méreediwa lan lun wawánduni láu wáni woúngua. Jarítaguatiwa yebe luágu woúweguba lán meja lubáragiñe wáfuridun ñígiñe.

⁹ Sandíguaadiwa yebe woúngua queísi gürígia ja síadiwaaña lun joúnwen. Wel, lasúseredunbei líra lun wafúnrendeirun lídaangiñe lun weménigidun luágu Búngiu le gabáfubei lun lásaaragüdüniña jiláaña, máma lun wawoúgua lan weménigida.

¹⁰ Séfu lumútiwa Búngiu dán buri meja ligía le yaráfa wabeí lun woúnwen, áni leséfuraméméñadiwa lídaangiñe lénreengúnga le gádaanbaliwa guetó, áni rúwamaali weménigi luágu, luágu leséfuramémebadiwa lan,

¹¹ ánjawa jíderagua láu jayúmuragun lun Búngiu wawágu. Áni ánjaña ayúmuragua sarágu gürígia wawágu lun Búngiu, sarágubaña íchugutiña eteíngiruni lun Búngiu luágu fuleísei lániwa láu leséfuruníwa.

Ca lan uágu lasáansiragui Páblo larítagun luágu luweíyasun ubúrugun Corínto

¹² Níjein ában cátei agúndaaragüdütiwa. laríñagun warítagun woun luágu gagáburi wamá ában igáburi jarúmati, furáangu, ya uboúagu, jagánaguatima. Íderagua láadiwa Búngiu láu lareíni lun buídu lan wagáburidun ítara, madügüntiwa ni cátei láu lichú wáu guánarügü.

¹³ Lídaan le wabürüjanbei jun tídan wagáradan, úati ni cáta arámudaguati ñi le jásiñerun alíja o gunfaráanda.

¹⁴ Guetó subúdiraüjadün luágu gayára lan jagúndaaragun wáu quei jumáesturungu, chülü lámuga wéyu lun gayáraabei lan jasándiragun júngua buídu buídu láu ugúndani wawágu, ítara quei wagía juágu lídaanme wéyu le lagíribudagüle Jesucrístu ubouágun.

¹⁵ Queísi méja afiñe nubeí luágu gúnda jumá wáu queísi láni Crístu apóstolugu jun, jarítaguatina yebe meja nídin aríjaün furúmiñe, lun nagúndaaragüdünün láu bisída nánün bián weíyaasu—

¹⁶ jarítagutiná yebe nachülaagun aríjaün lídan nuweíyasun Macedónioun, dan jamúga le nagíribudun Macedóniagiñe, ábaya jamúga nachülaagun aríjaün. Ítara líña jamúga gayára lan jíderagunina lun nasígiruni nuweíyasun Judéoun.

¹⁷ Madügün numúti. ¿Jálügüdaguñasan júngua ca lan ueígiñe madügün nubálin? ¿Masáminarun numúti funásan quei lubúdubu dan lé meja naríñagubei jun luágu nadügübei lan cátei le? ¿Jarítaguatün luágu ítara níña lan queísi lirájüñü ubou ja aríñagubaña ában cátei áni magúnfuliruntiña láu jerérun?

¹⁸ Geféenti Búngiu luágu maríñagun wamá ában cátei jun magúnfulirunga wagía láu.

¹⁹ Sun wagía—Silváno, Timotéo, áu—apúrichijatiwa jun luágu Jesucrístu, le Liraü Búngiu. Áni mítaraanti Crístu quei gürígia ja aríñagubaña ában cátei áni magúnfuliruntiña láu jerérun, Crístu, súnwandan ladügüni le laríñagubei.

²⁰ Gúnfuli lumúti Crístu sun lidáradun Búngiu jáma lánigu, woun. Ligía lébubei dan lan le lásurun wadímurejan lúma Búngiu luágu luweírigun, ayúmuragua wagía lun, ába waríñagun “ítaralá” lun warúfuduni wafíñerun luágu ladügüwaba lan lídan líri Jesucrístu.

²¹ Búngiu adügübei lun derégüdagu wamá, wagía júma, lídan wafíñen luágu Jesucrístu, ligía anúadajabaliwa lun wesériwidun lun.

²² Rúlaali Sífiri Sándu wádoun lun larúfuduni luágu lánigu wamá. Sífiri Sándu le wádaanbei, ligía queísibe lasúbudiraja le lúnbei werésibiruni queísi lánigu Búngiu. Queísi ítara líña lubeí, ¿gayáraati funásan ítara wamá queísi gürígia ja aríñagubaña ában cátei áni magúnfuliruntiña láu? Siñáti.

²³ Mídingidina Corínto aríjaün luágu nuweíyasun ñájoun Macedónioun queí yebe narítaguni lugúndunrügü mabúseerun nan nírudaguagüdünün láu ában ébechuni, geféenti Búngiu luágu líra. Ánjein máma lubeí líña, aráansetina lun nouñabun láu nibágari guánarügü.

²⁴ Máma jamúgatia wabúseeruña waríñagun jun. “Nijánba jafíñera”, derégüdaguaadün lídan jafíñen, busénrügütiwa wíderagunün lúntima lagánwoundun jagúndaarun.

2

¹ Ligía mídinya nubeí bisídaün lun nírudaguagüdünün.

² Lugúndun ¿ída lubásan gayára lan jamúga nagúndaarun lárigiñe níchuguni íruni joun gürígia ja agúndaaraguagüdübalina? Siñáti jamúga.

³ Ligía nabürüjanbei jun ítara, lun gayára lan jaráanseruni cátei le mégeibeí jídaangua lubáragiñe nachülürün júmoun, dánme lámuga nachülürün, mibíjin námuga íruni júmagiñe, jugúya le lúnbei nibíjin ugúndani júmagiñe. Subúdi numúti luágu láu lan jamúga nasándirun ugúndani, jasándiruña lan jamúga gíñe ugúndani.

⁴ Dán meja le nabürüjanbarun gárada tugúya jun, weíríti meja nidíjeri juágu darí lun nayájun lídan le nabürüjabarun. Máma meja lun nírudaguagüdünün nabürüjoun jun ítara, nabürüjanun lun jasúbudiruni luweírin nínsiñejabu jun.

Ferúdun lun lé meja afigounjabei

⁵ Le rújalibei íruni láu luríban leménerun, máma rügüñein nun líchiga íruni, rúlumuti gíñe jun lídan ában luwúyeri. Nariñagunbei “lídan ában luwúyeri” lun maweírin lan naweíridaguagüdüni jun.

⁶ Abeíchuni lé meja jariñagubei lídan jadámurin lun líchugúniwa luágu gürígia ligía, buídurügaali.

⁷ Guetó, lúnti ferúduna jumáni, ru jugúyame gurásu lun lueí ladügün sarágu íruni wuríbatí lun.

⁸ Ligía nayúmragunbei jun lúnya jarúfuduni jínsiñejabu lun.

⁹ Abürüjatina jun luágu cátei le lun gíñe nasúbudiruni ánjein aráanse jubeí lun jadügüni le nubeíbei jun.

¹⁰ Guetóti, le únti ferúduna jumá furúmieguarügü cátei, ferúduna nubeí gíñe, ánjein gíñe níjein lubeí cátei le lúnti ferúduna náni gürígia ligía luágu, ferúduna numúti ligíbugiñe Crístu, jueígiñe.

¹¹ Lídan ában cátei líbe líra, mabúseerúntiwa wíchugun lúgaaru lun Máfia lun lanügün ában gürígia le máma láni lárigoún lídoun lubáfu, subúdiwati lumáñaan Máfia buídu buídu.

Madárangilan lan larítangun Páblo ubúruгу Tróas

¹² Dán meja le nachülürünbei ubúruгу Tróas lun napúrichijani ugánu luáguti Crístu, ába nibíjin ában oúnwenbun cháansi ñi lun nuwádigimaridun luágu Wabúreme.

¹³ Madárangilaanti narítangun lugúndun madári náni wadúje Títo Tróas lun nagáambun lúma juágu. Ligía nayóuragunbei joun wadújeñu ja Tróasbaña, ába nídin loúbawagun Macedónia lun nadúnragun lúma Títo ñi.

Gáñeitiwa láu lubáfu Crístu

¹⁴ Buíti lasábirun sun cátei. Teínqui wamúti Búngiu le anügübaliwa lídoun sun fulásu, amáchareina wagía lábugiñe lagúmadijan Wábuti Jesucrístu, le súnwandanbei lagáñeiragüdüniwa lídan sun lénreengúnga. Yúsu lumútiwa Búngiu lídan sun fulásu lun wasúbudiragüdüni ugánu luáguti Crístu, queísi lírímuchúniwa líjeme cupáli.

¹⁵ Lugúndun ítara wáña quei cupáli le lágudajabei Crístu lun Búngiu, ñüdúntiwa láu ugánu luáguti Crístu, le queíbei líjeme cupáli, joun ja lúnbaña jerésibiruni ugánu ligía lun jasálarun, jáma gíñe ja lúnbaña merésibirun jamáni ugánu ligía lun jeféridirun.

¹⁶ Joun ja merésibirunbalin ugánu ligía, ítara líña quei ában íjemeni le gáfarajati, ánjein joun ja erésibirubalin, ítara líña quei ában árani le areídaguagüdüti. ¿Cáti gabáfubei lun lasúbudiragüdüni ugánu luáguti Crístu?

¹⁷ Wagía le loúnajabei Crístu, gabáfutiwa, ladüga mítaran wamá queísi arúfudajatiña yéetiña jagánagua, ja asáansiragubalin linárün Búngiu quei jabúseerun lun jaríjin cába lan jagáñeira lídaangiñe. Lubáragiñe líra, apúrichija wamúti Lerérun Búngiu quei lubeí, ligíbugiñe Búngiu, wagía queísi loúnajan Búngiu ja lídaanbaña ában lúma Crístu.

3

Ugánu luáguti iséri darádu

¹ Dan le waríñaguni cátei le, ¿genége lumúti jun luágu wagúmeseruñaya lan adímureja buídu wawoúgua? ¿Ódi gásu funági warúfudun gárada jámagiñetu ámu mútu jun to adímurejatu luágu lubuídun wagáburi lun gayára lan jerésibiruniwa, o wamúriajan lan gárada júmagiñetu joun ámu mútu, quei jadüga jíbiri mútu?

² Uá, lugúndun jugúya afiñetiña, ítara jíña queísi ában gárada to adímurejatu luágu lubuídun wawádigimaridun jagánagua, ítara jíña quei ában gárada to bürüwañutu tídan wanígi, to gayáraaboun jalíjanun sun gürígia, asúbudiragüdei cátawa lan.

³ Ítara jíña queísi ában gárada to labürüjan Crístu guánarügü, to wedégeruboun, ában gárada jugúya to abürüjóuboun láu lání Búngiu le wíwanbei Espíritu, máma láu tínta, áni tídan janígi ladügei Espíritu ligía wadágimanu, máma luágu dübü.

⁴ Gayáraati waríñagun luágu buídu lan wesériwidun lun Crístu ladüga wadügüni jeménigiñu luágu Búngiu lun líchuguni ubáfu woun lídaangiñe Jesu-crístu.

⁵ Mabáfutiwa lun ni cáta láu wáni woúngua, sun le wayáraabei adüga, lúmagiñe Búngiu liábin.

⁶ Rújali ubáfu woun lun wesériwidun lun láu wasúbudiragüdüni iséri lidáradun jáma gürígia lun jasálbarun. Iséri darádu ligía, mítaraanti quei lé meja binádu, lé meja lánina lúrudu bürüwati le lúnbei lagúnfulirúniwa láu, lánina ában ibágari le erésibirúti lúmagiñe Sífiri Sándu. Lúrudu ligía, le lilúrudun Moisés, arúfudarügü lumúti wafígoun ligíbugiñe Búngiu, figoú ligía, oúweni lafáyeijabei. Ánjeinti Sífiri Sándu, rúti ibágari joun sun ja ánjabaña lun.

⁷ Lilúrudun Moisés le, abürüjóuati luágu dübü. Dan le lerésibirubalin lúrudu ligía lúmagiñe Búngiu lun líchuguni joun Israelítagu, ñíñein ában oúnwenbun larúgounga lúmagiñeti Búngiu ligíbuagu darí lun siñá lán meja jariaguni gürígia jagía ligíbu Moisés, lugúndun weíríti lámiridun ligíbu. Láu sun líra, ába éñegucheina lan larúgounga ligía murúsun murúsun. Ánjein láu lubei sarágu uweíriginu liábin lúrudu ligía le asiádjabei gürígia lun oúweni,

⁸ ¡weírítimaati luweíriginu ugánu le lanügübei Sífiri Sándu woun luágu Wasálbaragüle!

⁹ Ánjein weíri lubei luweíriginu meja lúrudu le esériwidubei lun larúfuduni wadúnrun ligíbugiñe Búngiu woun, ¡weírítimaati luweíriginu ugánu luágu Wasálbaragüle le adügübalíwa richágua ligíbugiñe Búngiu!

¹⁰ Ni cáta luweíriginu lilúrudun Moisés ligíbugiñe luweíriginu Wasálbaragüle.

¹¹ Ánjeinti weíriginu lubei meja darádu le lúnbei ladúrarun murúsunrügü dan, weírítimaati luweíriginu darádu le lúnbei ladúrarun lun sun dan.

¹² Ladüga níjein lan eménigini le wawágu, luágu siñá lan leféridiruni ugánu luáguti Crístu luweíriginu, wapúrichijánbei furáangu.

¹³ Madügüntiwa quei meja Moisés, adáuragua láu ligíbu táu ában bélu lun maríjin jamáni Israelítagu léñeguchun larúgounga ligía le siñábei ladúrarun, marámudaguntiwa láu ugánu lánina wasálbarun ni murúsun.

¹⁴ Derétu janígi Israelítagu jagía lun laníchigu lilúrudun Moisés joun, queísigubeirügü jamúga núrein lan bélu darúgu láu jasáminan. Íbini guetó, dan le jalíjan tídaangiñe líburu to lilúrudun Moisés, bélu méme tugúya to luáguboun jasáminan, mígirun tumútiña lun gunfaráanda jamáni laníchigu binádu lidáradun Búngiu joun, siñáti jasúbudiruni luágu gúnfuliwa lan sun laníchigu binádu darádu ligía lídan Crístu le Wasálbaragüle.

¹⁵ Chülü lúmoun dan le, dan le jalíjanun líburu buri to labürüjaboun Moisés, darúguatu ában bélu láu jachügü luei gunfaráanda jamá.

¹⁶ Ánjeinti dan le lígiruni ában gürígia binádu ligáburi lun leíbugun lúma Crístu, ába tagídarún bélu tugúya luei.

¹⁷ Wabúreme Crístu, ligía Espíritu le íchugubei ibágari. Láu Espíritu ligía (le méme Sífiri Sándu) wádan, sálbatiwa, máfaagunga wagía lun wagúnfulirun láu

lilúrudun Moisés.

¹⁸ Ligía sun lubeí wagía afíñetiña luágu Crístu, gidáwaaru bélu lueí wasáminan, subúdi wamúti Crístu furáangu, láu sun luweírigun. Ítara wáña quei ában isúbusein to arúfudubalin luweírigun Wabúreme Crístu, áni láu wasígirun íchigei warítangun luágun, sáansiguagüda lumútiwa láni Espíritu murúsun murúsun lun ítara wamá quei ligía.

4

¹ Máburujalá lubeíti warüna, lugúndun rúlaali Búngiu wadágimanu le lábun waríajaan, láu lareíni.

² Mayúsuruntiwa ibíbuni lun wafíñeragüdüniña gürígia luágu Crístu, rúwamuti wanágan luágun cátei le adügübei arámudaguarügü, le nibúsigarídünabei. Masáansirangun wameí Lerérun Búngiu, inárüni rügüñein waríñaga. Ítara líña jasúbudiruni sun gürígia cátawa lan ligíbugiñe Búngiu.

³ Ánjein mafúraangun lubeí werérun luáguti Wasálbaragüle, jóun rügüñein ja lúnbaña jeféridirun mafúraangun lan.

⁴ Quei mafíñen jabeí luágu werérun, darúlaali Máfia, le lubúngiutebei ubouú le, jaríjin lun siñá lan larúgoungadagüdüni ugánu luáguti Crístu le weírigubei, le liyáwabei Búngiu wínwanti, jasáminan.

⁵ Dan le wapúrichijanbei, máma wawouúgua wapúrichija, luágu Jesucrístu wapúrichija, queísi Wabúreme, waríñagati wawouúgua luágu esériwidutiñarügü lan wagía jun, luágu wínsiñejabu lun Jesúsu.

⁶ Lugúndun Búngiu, le méme íchugubalin lámpu siélu lun lagídarúniwa lubúriga, ligía giñe adúnraaguagüdübalin lilámpun tídan wanígi, lun gayáraabei lan wasúbudiruni luweírigun Búngiu le waríjibeí lídan Jesucrístu.

Abágariduni láu eménigi luágu Búngiu

⁷ Larúgounga le wibíjubei luágu luweírigun Búngiu le lídaanbei Crístu, ítara líña quei ában irísini woun. Barü wamuti irísini ligía lídan fugiábu wágubu, le ítarabei quei ában soudíeru, lun larijiniwa luágu lumagiñe lan Búngiu liábin oúnwenbun ubáfu le wawágubei, máma wámagiñe.

⁸ Ítara, láu sun sáfuri wamá sun luwúyeri lénreengúnga, súnwandan larúfudun Búngiu ában üma woun lun wáfuridun lídaangiñe furúmieguarügü lénreengúnga. Níjein dan, weíriti wadíjeri luágu cába lan wadüga, máburujaanti warüna, lugúndun íderagua lániwa Búngiu.

⁹ Eíbaajoúatiwa, mígirun lumútiwa Búngiu joun wáganiñu. Gayáraati jájuchuruniwa, ígira jamáwa múarugu quei jiláaña, siñáti jagúmchaguagüdüniwa.

¹⁰ Le ñílumuti wouúdin, buséntiña wáganiñu jáfaraguniwa jilágubei queí jáfaruni láganiñu Jesúsu jilágubei. Lúnti ítara lúba lan lun gayáraabei lan larijiniwa lubáfu Crístu le wínwanbei wádaangiñe.

¹¹ Wagía, sun awánja lan abágarida, yaráfañu wáña lun woúnwen furúmieguarügü wéyu lueígiñe Jesúsu, lun gayára lan larijiniwa libágari Jesúsu wádaangiñe.

¹² Ítara líña lubeíti, láu yaráfañu wamá lun ouweni lun wíchuguni ugánu jun luágu Wasálbaragüle, resíbi jumúti ibágari magúmchaditi.

¹³ Lariñajare Davíd tídan Lerérun Búngiu. “Afíñetina, ligía nadímurejánbei”, ítara giñéti afíñetiwa luágu Búngiu láu méme ligáburi afíñeni le meja luágubei Davíd. Ligía wapúrichijanbei luágu.

¹⁴ Lugúndun subúdi wamúti luágu Búngiu lan le ásaaragüdübalin Jesúsu lídaangiñe ouweni, lásaaragüdübaliwa lan giñe lúnya wabágaridun, úara lúma Jesúsu, ábame lanügniwa úara júma ligíbugiñoun.

¹⁵ Luágu jáni fuleísei nasúfurirei sun cátei lun gayára lan jagíbedun ja áñarubaña lun lareíni Búngiu joun, giñe jamámuga giñe íchugutiña eteingiruni lun luágu lareíni. Ítara lúba íñurúañu lan líri Búngiu.

¹⁶ Ligía máburujan lubeí warüna. Oúwedaina líña wágubu murúsun murúsun, wawáni, tedébuguduña ságü wéyu.

¹⁷ Ni cáta le wasúfurirubei lídan ibágari le, lídan le wasáminarun luágu oúnwenbun ugúndani le lúnbei wibíjini yágüta siélu dánme le ñi wamá lúma Crístu lídan luweírigun. Maweírinti lidáani wasúfurirun woun ya ubouágu dan le wasáminarun luágu lúntibei lan dan magúmuchaditi wagúndan siélu.

¹⁸ Marítaguntiwa sarágu luágu cátei lánina ubou le, ladüga murúsuraü lan dan ladúrarun. Le uágubei wíchigei warítangun, luágu cátei lánina siélu, ladüga cátei ligía, lúnbei sun dan ladúrarun.

5

¹ Subúdi wamúti lubeíti luágu gayára lan woúnwen lubáragiñe lagíribudun Jesucrístu ubouágun, gayáraati loúnwen wágubu quei teíguadun ában múna weíyaaru. Ánjein asúsereda, subúdi wamúti luágu aráanseeli lan Búngiu lun líchugun ában iséri úgubu woun lun wabágaridun láu, siélu, lun sun dan. Úgubume ligía, mámabei lánina ubou quei ában múna adügütu láu újabu, ábanbei úgubu lánina siélu.

² Buchá wawágu láu úgubu le wawágubei guetó, buséntiwa jamúga tadáurawagún wawáni láu iséri wágubu le lánina siélu.

³ Láume iséri úgubu ligía wawágu, mítaranbádiwa quei uwáni to úati úgubu táu.

⁴ Sun awánja lan abágarida láu úgubu le wawágubei, darítiwa mégeiti luágu, sandígua wagía woúngua láu idíjeri. Máma jamúga wabúseeruña woúnwen lun weréderun quei uwáni úouga úgubu táu, le wabúseerubei, lun lasáansiragun wágubu le gagúmuchadibei furése furése lídoun wágubu le magúmuchadibei, moúnwenga wagía.

⁵ Búngiu aráanserubaliwa lun gabágarí wamá le magúmuchaditi, áni rúlaali Sífiri Sándu woun queisi larúfudajan luágu ítara lúba lan.

⁶ Gúndaatiwa lubeíti súnwandan, láu sun subúdi wamá luágu sun lan awánjagua lan ubouágu abágarida lídan wágubu, bougudiñadiwa lan tueí wában yágüta siélu, máma lan lúmañadiwa Wabúreme.

⁷ Ya ubouágu, siñáti waríjini Crístu, gayáaarügüti wafíñerun luágu.

⁸ Gúndaatiwa láu furúmieguarügü cátei le gádaanbaliwa, láu sun jamúga jímein wamáni lun wígiruni ibágari le ya ubouágu lun woúdin agánawa lúma Wabúreme Jesucrístu siélu.

⁹ Ligía wáfaagunbei lun wadügüni lugúndan Wabúreme súnwandan, ya wagía yebe ubouágu, yágüta wagía yebe siélu.

¹⁰ Lugúndun sun wagía, waráramuba ligíbugiñe Crístu lun werésibiruni cáda ában le lúnbei werésibiruni, según buíti o wuríbati lé meja wadügübei dán meja le ubouágugidiwa.

Ugánu lánina darángilaü

¹¹ Ligía, quei subúdi wabálin lanúfudewa lueí lagúseragüdü Wabúreme, áfaaguatiwa lun wafíñeragüdüniña sun gürígia. Subúdi láali Búngiu cátawa lan, áni agúrabatina lun giñe subúdi jumáni.

¹² Máma wadímurejañaya buídu wawougua, wíchuguña ában cháansi jun lun jasándiragun júngua gúndaañu wáu, lun gayára lan jóunabuniña arúfudajatiña jagánagua ja apántajabaña luágu lubuídun jarúfudagun jóungua boúgudi jabíti, áni tídan janígi mabuíduntiña.

¹³ Ánjein weíri lubeí wesériwidun lun Búngiu darí lun warijín camá lülüñein wáu, ladüga luweírin wínsiñejabu lun Búngiu lasúsereda. Ánjein genége lubálin luágu wesériwiduña lan lun Búngiu láu ában lidíli ichúgü, ladüga luweírin wínsiñejabu jun wadügei.

¹⁴ Mósu nesériwidun lun Crístu táu sun nanígi lárigiñe larúfuduni luweírin línsiñejabu woun láu loúnwen lídan wafúlasun súngubei. Queísigubeirügü jamúga jilá jamá sun gürígia úara lúma dán meja le loúnwenbei.

¹⁵ Jiláti Crístu jawágu súngubei, lun sun lan ja ánjabaña lun jerésibiruni ibágari lídaangiñe, mámaali lámuga joun guánarügü jabágarida, lun jabágaridun lun Crístu le ouwebei jawágu, sará ligía lídaangiñe ouweni.

¹⁶ Ligía manügün wabeí ni ában quei janügün lirájüñü ubou gürígia, según boúgudi jabíti. Luágu méja ában dan, barü wamuti meja Crístu quei janügüni lirájüñü ubou, mítaranjaali guetó.

¹⁷ Le lubeíti lídaanbei ában lúma Crístu, ábanjali gürígia iséri, gumúja sun cátei le lánina binádu ligáburi, labágariduña ában iséri ibágari lúma Crístu.

¹⁸ Adüga lumúti Búngiu sun cátei le. Gáganiguatiwa meja lúma ladüga wafígoun, ába loúnajani Crístu lun lachíbuni wafígoun, gayára lámuga gamádagua wamá luma. Rúlumuti wadágimanu ligía woun lun waráandaragüdüniña sun gürígia lúma.

¹⁹ Le naríñagubei, láu loúnwen Crístu lídan wafúlasun, arúfudati Búngiu ában üma woun lun gayára lan lagídarúniwa wadúnrun luágu wafígoun ligíbugiñe, gayára lámuga gamádagua wamá lúma. Oúnaja lumútiwa lun waríñaguni le joun sun gürígia.

²⁰ Wayábiña lubeíti queísi wügüriña ja loúnajabaña Crístu, queísigubeirügü jamúga layúmuragun Búngiu guánarügü jun wádaangiñe. Ayúmuraguatiwa lubeíti jun lueígiñe loúbadina Crístu. aráandara jumá lúma Búngiu.

²¹ Madügünti Crístu ni ában figou, rúlumuti Búngiu sun lidúnrun wafígoun luágun Crístu lun láu lan lídan wamá ában lúma, lun wachülürün abágaridei ibágari lánina ísuruni le labúseerubei Búngiu lun wabágaridun.

6

¹ Wagía, queísi ñadágimeintiña úara lúma Búngiu, ayúmuraguatiwa jun lun jarúfuduni láu lubuídun jigáburi luágu máma lan luágu ni cáta jerésibirei lareíni Búngiu jun.

² Laríñajare Búngiu tídan Lerérun.

Nagáambubei bagúajan nun lídan nidáani lun fuleíseijabu nan joun gürígia, níderagubadibu lídan nuwéyuri lun nasálbarun gürígia. Chülüjali lidáani Búngiu lun fuleíseijabu lan joun gürígia, niján buri wéyu le luwéyuribeí Búngiu lun lasálbaruniña gürígia.

³ Áfaaguatiwa lun úaragua lan wagáburi lúma wapúrichijan, lueí jamúga jeréderúniwa gürígia lueí jagáambuniwa. Mabúseerúntiwa jamúga wanügün minébesei lun luwádigimari Búngiu láu wagáburi,

⁴ busénrügütiwa warúfuduni lídan sun cátei luágu esériwidutiña lan lun Búngiu wagía, láu luweírin wagúraasun lun wawánduni asúfuriruni, mégei, lúma lénreengúnga.

⁵ Beíjamaadíwa, dáüjamáwa, ínchajouúatiña gürígia lun jeíbaajaniíwa, jéreti wawádigimari lun Búngiu darí lun wasándirun oúnwenbun lubúcha uágu. Reídeijadiwa marúmugunga, áfaaga wagía ilámaü.

⁶ Arúfuda wamúti gíñe luágu esériwidutiña lan lun Búngiu wagía láu larúman wabágari, láu lisúbudin linárün Búngiu woun, láu wagúraasun lúma wareíni, láu waráfuduni lubáfu Sífiri Sándu le wádaanbei, láu wínsiñejabu le tímatimaati,

⁷ láu wáni ugánu le lánina inárüni, lúma láu lubáfu Búngiu wádan. Yúsu wamúti lárumatena lubuídun ibágari, dándu lun woúdin jabároun wáganiñu quei lun waráramuniña dan le jayábin wabároun.

⁸ Níjein dan ibíjatiwa inébesi, níjein dan anábawaguatiwa. Níjein dan adímurejouúati buídu wawágu, níjein dan adímurejouúati wuríbati. Níjein dan, ousera jamútiwa quei yéetiña, níjein dan quei wügüriña ja aríñagutiña inárüni.

⁹ Níjein dan, ousera jamútiwa quei ibídiñewatiña, níjein dan quei subúdiwatiña buídu, níjein dan, agúrabañu wáña lan woúnwen, awánjagua wínwanlu, ígirati Búngiu lun wasúfurirun, lun wafúnrendeirun lídaangiñe,

¹⁰ moúnwentiwa lídaangiñe asúfuriruni ligía. Láu sun níjein lan cátei lun lírudaguagüdüniwa, níjein gíñe ugúndani lúmagiñe Búngiu tídan wanígi. Láu sun gudéme wamá según uboú, aríñagatiwa joun gürígia luágu irisini inárüni le gayáraabei jadáriruni lídan Jesucrístu, láu sun úa lan ni cáta wáma según jarítangun lánigu uboú, ibíja wamúti sun cátei lídaangiñe Crístu.

¹¹ Wadújeñu Coríntona, adímurejaadina jun láu furáangu, dará náaru nanígi jun le gumúti, le luweírin jínsiñe nun.

¹² Masáansiragúnti wínsiñejabu jun, láu sun afiñetina luágu sáansigua lan jínsiñejabu woun.

¹³ Ayúmuraguatina jun quei layúmurangun ában úguchili joun lirájüñü lun jínsiñejabu jumá woun le gumúti, quei sí wínsiñejabu jun.

Aganoúati Búngiu wádan

¹⁴ Magámarida jumá gürígia ja mafíñetiña luágu Crístu, lugúndun janügüba ában ibágari le múaraanti. Mamádaguati ísuruni lúma wuríbani, siñáti gíñe gamádagua lan larúgounga lúma lubúriga.

¹⁵ Siñáti níjein lan úarani lídan Crístu lúma Máfia, siñáti gíñe lúaradun ában afíñeti luágu Crístu lúma ában le mafíñeti.

¹⁶ Siñáti gadúnama jamá sándu tídan lúban Búngiu, áni lúban Búngiu le wínwanbei wagía, quei laríñangun Búngiu guánarügü.

Naganoúba jagánagua, eíbuga áume jagánagua, áuba Jabúngiute, jagíame nánigu.

¹⁷ Ligía gíñe laríñangunbei Wabúreme Búngiu.

Furíjuma jagánaguagiñe ja mafíñebaña nuágu, díse jumá jaweí, líña Jabúreme. Mádaragua jumá júngua lídoun le wíyebei.

Ábame nerésibirunün,

¹⁸ ábame ában nan úguchili jun,

jugúyame nirájüñü, líña laríñangun Jabúreme, le Súnti Gabáfu.

7

¹ Ítara líña lubeíti, nidújeñu jínsiñetiña nun, niján buri dimúrei le líchugubei Búngiu woun. Ligía lúnti lubeí wachíbuni sun luwúyeri iwíyeni wawárua, dándu lueí wágubu quei tueí wawáni. Áluaja wamá lun jarúma lan wémeri le gumúti lúma Búngiu, ladüga luweírin inébesi le wawágubei lun Búngiu.

Lasáansirangun jagáburi Coríntona

² ¡Rújuma ában ubáraü woun tídan janígi! Madügüngidiwa dáñu lun ni ában, maríbadagüdün wagía ni ában, mayéedagun.

³ Máma nariñaguñein le lun níchugun jidúnrun, lugúndun queí buga nariñaguni jun, tídaañadün nanígi, lídaañadiwa ában ínsiñejabúni le mébejati, lídan yebe ibágari o lídan yebe ouweni.

⁴ Weíriti nafiñen lúma nugúndan jáu, labádinagua sun le nasúfurirubei, sandítina dügüdaguaü, áni buin níña gíñe láu ugúndani, jueígiñe.

⁵ Lúmagiñé meja wachülürün Macedónioun, meméraagüngidiwa, darírügütiwa lénreengúnga lídan sun fulásu geyéguwa wáu, geyéguati wuríbu wáu, weíriti wadíjeridun juágu.

⁶ Ánjeinti Búngiu, le íchugubei gurásu joun ja magúraasunbaña, ába líchugun gurásu woun láu lachülürün Títo,

⁷ áni mámarügü láu lachülürün, lugúndun gíñe gagúraasun lan juágu. Aríñagati woun luágu luweírin jabúseerun jaríjiniwa, abájüdagua ligía woun luágu íruni le juágubei luágu le asúseredubei lúma luágu luweírin jabúseerun lun jóúdin láu nerérun jun. Ábatima nagúndaarun láu líra.

⁸ Láu sun jírugua jumá tadüga gárada to nabürüjaboun jun, maságürijaantina luágu, guetó. Aságürijatíná meja furúmiñe láu nasúbudiruni luágu jírugua jumá tadüga gárada tugúya luágu murúsun dan.

⁹ Guetó gúndaatina, máma ladüga jírudagun, ladüga sáansiguagüda láni írudaguni ligía jigáburi. Áfaga jumúti íruni ligía lídan ában igáburi le áubei lagúndaara Búngiu, ítara líña lubeíti madügüntiwa ni murúsun dáñu jun.

¹⁰ Lugúndun dan le wíchugun üma lun Búngiu lun layúsuruni íruni le wawágubei ladüga luríban wagáburi lun lasáansiraguni wagáburi, barü lumútiwa lídoun asálbaruni le magúmuchaditi, maríbaanti íruni ligía woun. Ánjein wanüga íruni ligía queísi janügüni lirájüñü uboú, magáragunga wagía lun Búngiu, lanügübadíwa lídoun féridi lun sun dan.

¹¹ Awánda jumúti íruni queísi labúseeruni Búngiu, áni jaríja jumeíti le asúseredubei guetó lídaangiñe jawánduni íruni ligía! Tadüga gárada tugúya, ába jatátirun asáminara buídu cába lan jadüga láu wügüri le afígounjabei jagánagua. Arúfuda jumúti luágu magúndan jumá láu figoú le ladügübei, áni gáñitün luágu busíganu le líchugubei jun, janúfudetün lueí jamuga jabeichúniwa lueígiñe. Ába jabúseerun jaríjinina lun nasúbudiruni jínsiñejabu nun. Weíriti jabúseerun lun jadügüni le richábei, lun jabeíchuni le adügübalin figoú, adüga jumáali sun le lúnbei jadügüni lun jaráanseruni cátei le. Madúnrunjadün guetó.

¹² Dan lubeíti le nabürüjanbarun meja gárada tugúra jun, mámadügüya jamúga ladüga nasáminaruña lan sarágu luágu gürígia le adügübalin wuríbani, ni luágu le asúfurirubalin lueígiñe, nabürüjanbarun lun geféen júma ligíbugiñe Búngiu luágu luweírin jínsiñejabu woun.

¹³ Ligía ragüguaadiwa lubeí woúngua.

Lánwoun sun gurásu le barü wamáalibei juágu, oúnwenbun wagúndan láu waríjini luágu gúnda lan Títo, íderagua jumáali sun jugúya lun lasándirun darángilaü.

¹⁴ Adímurejatina bugája buíti juágu lun Títo, áni gúnfuli jumúti nerérun juágu. Quei sun lan le aríñaga wamáalibei jun, inárüni, ítara líña gíñe inárüni lan le waríñagubei lun Títo, luágu gúnda wamá jáu.

¹⁵ Áni weíritimaati jínsiñe lun dan le larítangun luágu jadügüni sun jugúya le lamúriajabei júma, lúma luágu jerésibiruni láu ában inébesei lúma idíjeri lueí jamúga jemégeiruba lan lídan jagúnfulirun láu lerérun.

¹⁶ Gúndaatina láu gayára lan nafiñerun juágu le gumúti.

8

Wichugun joun gudémetiña

¹ Guetó, nidújeñu, buséntina nabájüdagun jun luágu lareíni Búngiu joun tílana sun ligílisi buri to loúbawaguboun Macedónia.

² Láu sun ában lan oúnwenbun oúchawaguni lun jafíñen lénreengúnga le jadárirubei, gúndaatiña buídu, áni láu sun gudéme jamá, rújaña lídan jíderawagún ja gudémebaña Jerusalén camá jamuga rísitiña.

³ Geféentina luágu rújamaali lan sun le jayáraabei láu sun tarúman janígi, ru jagía sügü láu lé yebe jayáraabei.

⁴ Ayúmuraguatiña sarágu woun lun wígiruniña lun jíchuguni jafáran lídan jíderawagúniwa idújeñu lueigiñe Jesucrístu.

⁵ Adügatiña sügü láu lé yebe wagúrabubei jadügün, furúmiñe, ába jedéregeragun joúngua le gumúti lun Wabúreme Jesucrístu, lárigiñe ába jedéregeragun joúngua woun, queísi lugúndan Búngiu.

⁶ Weíriti jabúseerun jíchugun, darí lun wayúmuragun lun Títo lun lagíribudun júmoun lun gayáraabei lan lagúmuchaguagdüni labúdajoún seínsu lé meja lagúmeserubei jídan.

⁷ Jugúya ubáraübei lídan sun cátei—lídan jafíñen, lídan jisúbudin luágu Lerérun Búngiu lúma jubáfu lun jarúfudajani furáangu joun ámu, lídan jabúseerun jesériwidun lun Crístu, lúma lídan ínsiñejabuni woun—lúnti lubeíti giñe ubáraü jumá lídan ídejani le.

⁸ Mára naríñaguñein le jun quei ában gumádi, busénrügütina jasúbudiruni jabúseeruni ja jíbiri jídejan, lun gayáraabei lan giñe jarúfuduni jínsiñejabu láu jíchugun táu sun janígi quei jagía.

⁹ Jarítagua jumá luágu lareíni Wabúreme Jesucrístu woun. rísiti bugája dan le siélu lan, ába lagúdemedun láu liábin ubouágun ladüga línsiñejabu woun, lun gayáraabei lan wayábin lun warísidun lídaangiñe lugúdeme.

¹⁰ Luágu jáni fuleísei naríñagei narítangun jun luágu cátei le. Gumésetün buídu lídan irúmu le ásügürübei, mámarügü láu jatátirun abúdaja seínsu joun, adüga jumúti giñe táu sun janígi.

¹¹ Guetó lubeíti, ítara méme jumá darí jagúmuchuni abúdajani luágu, láu méme ugúndani lé meja juágubei lúmagiñe furúmiñeti, íchigeina según le júmami.

¹² Lugúndun ánjein íchiga ában gürígia sun le liyáraati según le lúmabei, láu sun lugúndan, gúndaati Búngiu láu, áni resíbi lumúti le líchugubei gürígia ligía, mamúriajan lumúti Búngiu le úati jáma gürígia.

¹³ Mára lun jáfagun mégei ladüga jíderagun ámu,

¹⁴ le busénwabei, lun ñi lan úarani jídan. Guetó, níjein júma lun jabuínchagüdüni le jemégeirubei ámu, lídaanme ámu dan, níjeinbei jáma lun jabuínchagüdüni le jemégeirubei. Ítara lúba ñi lan úarani,

¹⁵ quei taríñangun Lerérun Búngiu. “Le gíbebei úma, mígiragunti lúma, le míbebei úma, memégeirunti lun.”

Títo jáma líbirigu

¹⁶ Teínqui numúti Búngiu luágu líchuguni ayúmajani méme le líchugubei nídoun tídoun lanígi Títo lun líderagunün.

¹⁷ Gúndaati Títo lúnya lídin aríjaün quei namúriajani lúma, áni afíñetina luágu weíri lan labúseerun lúnya laríjinün darí jamúga lun lídin láu láni lúngua maríñagunga áu ni cáta lun.

¹⁸ Úara lúma Títo, wounajaña ában idújei le uágubei buídu lan jadímurejan tílana sun ligílisi, luágu lubuídun luwádigimari lun labúruchagun ugánu luágu Wasálbaragüle.

¹⁹ Áni mámarügü líra, anúadaja jamúti gíñe tílana buri ligílisi idújei ligía lun ladügün weíyaasu wáma lun líderagun lídan loúndarún seínsu le. Wadügüñein wadágimanu le, le lánina ídejani, lun wíchugun ugúndani lun Búngiu, lun gíñe warúfuduni luágu busén jamá afiñetiña lun jíderaguniña jadújeñu ja gudémebaña.

²⁰ Waráanseruñein sun cátei lébei lun míchugun wamá lúgaaru lun ladímurejóun wuríba wawágu lueígiñe loúndarun seínsu le wadügübei.

²¹ Wáfaaguña lun wadügüni sun cátei láu arúmani, mámarügü ligíbugiñe Wabúreme, jagíbugiñe gíñe gürígia.

²² Woúnajaña gíñe ábanya jádaangiñe wadújeñu lúma Títo lúma le ában. Wügüri le, arúfuda lálabei luweírin labúseerun lesériwidun lun Crístu woun lídan sarágu luwúyeri, guetótima láu oúnwenbun afiñeni le luágubei luágu jíchuguba lan sarágu seínsu láu sun jugúndan.

²³ Le álügüdajati libügürü Títo, aríñaga jumá lun luágu nouba lan, luágu luwádigimariña lan núma lun wesériwidun jun. Ánjaña álügüdaja jabügürü biáma idújeñu lueígiñe Jesucrístu ja lúmabaña, jaríñagame joun luágu jóúnajan lan tílana ligílisi buri, luágu jiñúrágüdüñein lan líri Crístu láu lubuídun jagáburi.

²⁴ Ítara líña lubeíti, resíbi jumáña láu ában ínsiñeni le tímatimaati lun gayáraabei lan jaríjini wügüriña jagía luágu inárüni lan lubuídun werérun juágu, áni lun gíñe jasúbudirun sun jíbiri tílana buri ligílisi luágu ínsiñejabuni le juágubei jádaangiñe wügüriña jagía.

9

Loúndarún seínsu joun idújeñu ja gudémebaña

¹ Luágu loúndarún seínsu joun idújeñu lídan afiñeni, memégeirunwati lun nabürüjan jun,

² lugúndun subúdi náali lubuídun jugúndan lun jídejan. Súnwandan naríñagun joun loúbawaguna Macedónia láu ugúndani luágu jugúya lan Acáyana aráanseñu jíña lan lun jídejan lúmagiñe lídan irúmu le sügüjalíbei, áni jíbe-ágei Macedóniana ragújaña gíñe dügüdaguau láu jagáambun luágu luweírin jáfaagun luágu ídejani le.

³ Láu sun líra, nouñajaña idújeñu jun nubáragiñe lun jaráanseruni luáguti labúdajoún seínsu, lun mámabei lan iyéeni, buíti le naríñagubei juágu libügürü cátei le, lun abúdajoúali lan sun seínsu lubáragiñe nachúlürün jumóun,

⁴ ñüdündügü jañeín jádaangiñe Macedóniana núma, jadárirauñme maráanserunga. Líchuguña jamúga líra busíganu woun, júntima, lárigiñe rúwamaali lan sarágu wafiñen juágu.

⁵ Ligía narítaganbei namúriajan jáma idújeñu ja lun jóúdin bisídaün nubáragiñe, lun gíñe jíderagunün abuinchagüdei seínsu le uágubei jaríñaga jóúndarun. Ítara, aráanseñu lúba seínsu le jóúndarubei lun jarúfuduni jareíni, máma quei ában cátei le lúnti wafósurunün luágu.

⁶ Jarítagua jumá luágu cátei le. Le loúguati lábunagun, loúguabei gíñe lalúbajan, le gíbeti lábunagun, gíbebei gíñe lalúbajan.

⁷ Cáda ában jádaangiñe, lúnti líchugun queísi ligáburi larítagan, máma láu magúndani ni ladüga aríñawagúa lan jun lun jíchugun, lugúndun jínsiñejabuti Búngiu lun le íchugubei láu ugúndani.

⁸ Gayáraati líchugun Búngiu sun luwúyeri abíniruni jun gíbe, lun ñi lan le jabúseerubei júma súnwandan lun jabágaridun, ñi ligíame gíñe sarágu júma lun jídejan.

⁹ Taríñajare Lerérun Búngiu luágu gürígia le íchugubei sarágu.

Rújali sarágu joun gudémetiña,
áni reídeiti cátei buíti le ladügübei lun sun dan.

¹⁰ Búngiu, le íchugubalin ílaü lun lábunún, ában lalúbajagüdün sarágu lídaangiñe lun gayára lan weígin buídu, íchuguba gíñe jun lun gayáraabei lan jedéweejan sarágu joun gudémetiña queísigubeirügü ílaü le ábunúbei. Ábame laweíridagüdüni Búngiu murúsun fuleísei le jadügübei joun, daríme lun jabíjin oúnwenbun abíniruni lúmagiñe Búngiu queísi ában oúnwenbun alúbajani.

¹¹ Jugúya, jibíjuba sarágu súnwandan lun gayáraabei lan jíchugun sarágu, áni dánme le jerésibiruni wadújeñu seínsu le lúnbei jóúnajani joun wáma, weíribei jateíngiruni Búngiu.

¹² Lugúndun láu wíchuguni íderawaguni le joun wadújeñu, máma wíchiga rügüñein seínsu le jemégeirun joun, wadügüña gíñe lun jíchugun sarágu eteíngiruni lun Búngiu láu líra.

¹³ Jíchuguba uweíriguni lun Búngiu lugúndun arúfuda lumúti ídejani le joun luágu adüga jumáni le lubeíbei Crístu, jíchuguba gíñe uweíriguni lun Búngiu luágu íderawaguni le jíchugubei joun lúma joun súngubei.

¹⁴ Ábame jayúmuragun lun Búngiu juágu láu sarágu ínsiñejabuni jun luágu luweírin lareíni Búngiu le larúfudubei jídaangiñe.

¹⁵ ¡Teínqui wáña lun Búngiu, luágu rújali lan ában oúnwenbun cátei woun le siñá wabei adárrira dimúrei le buídurügüti ubuídun lun wadímurejan luágu! Cátei ligía, Liraü.

10

Lubáfu Páblo queísi apóstolu

¹⁻² Aríñawagúati luágu gudémegu nan dan le júma nan, ánjein lan dan le díse nan jueí, derégüda lan nouserun júma. Áu Páblo, ayúmuraguatina jun láu ában ünabuni lúma ában areíni líbe le larúfudubei Crístu, lun mafósurun jubádina lan lun narúfuduni nubáfu láu nafáyeigüdünün luágu wuríbati le jadügübei, dánme le nachülürün júmoun. Sáansi jumeí ligáburi jarítangun wawágu, jugúya le aríñagubei luágu lun lan waríjin cába lan waságara lídaangiñe wesériwidun lun Crístu. Ánjein madügün jumá, aráansetina lun nagágibudagun júma.

³ Inárüni luágu ubouáguna wamá láu sun jadébilin gürígia ubouáguna, máma queísi wügüriña lánina ubou le wawúribuja luágu wuríbani.

⁴ Máma ubouáguna áruma to áuboun wawúribuja, larúmate Búngiu wayúsuruboun lun tagünrinchagun érei.

⁵ Ítara líña lubeíti, láu lubáfu Búngiu güríngua wamúti sun arítangun le múaraanbei lúma linárün Búngiu, lúma sun cátei le abúseerúbei leréderuni lasúbudirúniwa Búngiu. Sun gíñe jasáminan gürígia ubouágu rúwamuti lábugiñoun lubáfu Crístu lun lúaraduba lan láu le lubeíbei.

⁶ Áni lárigiñe jíchaagun júngua le gumúti lábugiñoun lagúmadijan Crístu, aráanseñu wáña lun wasúfuriragüdüniña ja magáambadigiñabaña lun.

⁷ Barü jumuti cátei quei larijiniwa bougudigiñe libíti. Aríñagatina jun luágu ánjein lan choúrugua lubeí ában gürígia lúngua luágu lánigu lan Crístu, lúnti gíñe lasúbudiruni luágu ítara méme líña lan lánigu wamá gíñe Crístu.

⁸ Fágua jarítangun luágu néredun murúsun lueí le lubúdubu luágu nubáfu queísi láni Crístu apóstolu, úabei nibúsigari nan luágu líra, lugúndun Búngiu guánarü rúlaali ubáfu le nun lun nawáanseragüdünnün lídan cátei lánina Búngiu, máma lun nagünrinchaguni jafiñen, queísi jadügüni arúfudajatiña jagánagua guetó.

⁹ Mabúseerúntina lun jarítangun luágu náluguña lan nebélaagüdünnün anúfudei jídoun táu nigáradan.

¹⁰ Aríñagatiña náganiñu luágu abürüja nánun gárada queísi ában gürígia láuti sarágu ubáfu, áni derégüdatí nege nerérun jun tídan, dan le júma nan, débilitiná nege, áni mínsiñegu lán nege ligáburí nadímurejan.

¹¹ Furúmieguarügü le aríñagubalin cátei le, lúnti gíñe lasúbudiruni luágu ítara lan quei nubeí láu dimúrei díse jueí, ítara núba lan gíñe dánme le júma nan.

¹² Míchaaguntiwa woúngua jámoun ja adímurejabaña buídu jawoúgua, mítaraantiwa quei jagía. Jagía, adügatiña ában libídiouniga áu láu jamísuraagun joúngua láu guánarügü jamísuraagüle lúma láu jíchaagun joúngua jámagua.

¹³ Wagía, mapántajaanbadiwa luágu wawádigimaridun lun Búngiu lídan ában fulásu le ñílumuti míchugun lan Búngiu üma woun lun wesériwidun lun ñi, queísi jadügüni arúfudajatiña jagánagua guetó. Búngiu arúfudubalin lébeja fulásu le lúnbei wawádigimarini lun, áni ligía ánjarubei lun wachülürün júmoun ubúrugin Corínto.

¹⁴ Ligía mídin wabeí sügü láu le labúseerubei Búngiu wadüga lídan le wáfaagun lun wíderagunün, ladüga wagía anügübalin ugánu luáguti Crístu jun furúmiñe.

¹⁵ Mapántajaantiwa láu wadágimanu le jadügübei ámu, camá jamuga wadüga. Agúrabarügütiwa lun quei lan lagánwoundun jafíñen, gayáraabei lan wawádigimaritima jagánagua, súnwandan quei lugúndan Búngiu.

¹⁶ Lárigiñeme, jarítaguatiwa wadíseduntima lun wapúrichijani ugánu lánina asálbaruni lídan buri fulásu le díseti jueí, le ñí lumuti magáambungiña lan luágu Crístu, lueí wapántajan luágu wadágimanu le jadügübei ámu, camá jamuga wadüga.

¹⁷ Le busénti ladímurejan luágu uweíriguni, ladímureja luágu luweírigun Crístu, máma luágu luweírigun guánarü.

¹⁸ Lugúndun gürígia le buídubei, máma le adímurejabei buídu luóúgua, le uágubei buídu lan ladímurejan Wabúreme Crístu, ligía buídubei.

11

Páblo jáma yéetiña ja aríñagubaña luágu apóstolugu jamá

¹ ¡Buséntina jamúga lun jawánduni libídiouniga náu murúsun! Awánda jumá,
² lugúndun eméendütina jáu láu ában eméendüni le lúmagiñeti Crístu, lueí jamuga jígiruni Crístu. Áu asúbudiragüdübalin Crístu jun, ába júaradun lúma, áni le nabúseerúbei, lun gayáraabei lan nedéregerunün lun quei ában irájü jarúmatu to amárieidutu lúma ábanrügü wügüri.

³ Ítara quei layéedunun Máfia Éva, janúfudetina lueí gíñe jígiraguagüdün júngua lun jeyeedún lídan jarítangun, lueí jesériwidun lúnrügü Crístu táu sun tarúman janígi.

⁴ Naríñagubalin le, ladüga resíbi jumáaña ja ñübintiña adímureja iyéeni jun luágu Crístu, áni buléiguatün lueí cátei inárüni le warúfudajabei jun. Resíbitün gíñe ában espíritu láu ugúndani ámu lueí Sífiri Sándu le resíbi jumáalibei láu warúfudajan jun, resíbitün gíñe ában ugánu lánina asálbaruni jámagiñe le ámu lueí ugánu lánina asálbaruni le agáamba jumáalibei wámagiñe.

⁵ ¡Afiñetina luágu múnabun nan sügü jáu súper-apóstolugu ja jafálarubaña!

⁶ Fágua ibídiouguati láu ligáburí nadímurejan, mabídiounigati láu nisúbudin, áni arúfuda wamáali le jun súnwandan lídan sun le adüga wamáalibei.

⁷ ¿Ódi wuríbati nadüga napúrichijani ugánu lánina asálbaruni jun magúburajanga áu ni cáta, ünabudaguagüda núngua ítara lun niñúragunün lídaangiñe binádu jigáburí?

⁸ Barütina seínsu jámagiñe tílana ámu buri ligílisi láu nerésibiruni le jafáyeirubei nun, lun nayúsuruni esériwida jun magúburajanga naün.

⁹ Áni dan lé meja níjein lan nemégeirun dan le júma nubeí, merédetina quei ijürügu lun ni ában, idújeñu ja ñübinbaña Macedóniagiñe, jagía íchugubalin le nemégeirubei nun. Ítara líña náfaagun lun mámabadina lan ijürügu jun lídan ni cáta, áni ítara méme lúba nadüga.

¹⁰ Ítara quei chouuru náni luágu subúdi náni linárün Crístu, ítara líña gíñe nasúbudiruni luágu manügübadina lan seínsu lúmagiñe ni ában lídan sun Acáya, luei jamuga lagídarúniwa lébuna ugúndani le nuágubei, lun gayára lan nesériwidun jun magúburajanga.

¹¹ ¿Cásan uágu nadímureja ítara? ¿Ladüga funásan jimísiñe nun? Subúdi luweírín jínsiñe nun lun Búngiu.

¹² Nadüga mémebei le nadügübei lun míchugun nan lúgaaru joun arúfudajatiña jagía ja áluajabaña lun gayáraabei lan jaríñagun luágu ítara méme líña lan jesériwidun jun queísi wagía.

¹³ Mára Crístu oúnajabaliña yéetiña jagía jagánaguóún láu sun jafámurun camá lánigu Crístu apóstolu jagía.

¹⁴ Áni máma cátei terénchati le, lugúndun Máfia guánarügü arúfudaguati lúngua quei ánjeli le íchugubalin larúgounga,

¹⁵ ligía giñéti jafámurubei ja esériwidubaña lun queísi gürígia ja adügütiña buíti. Wel, lachülürüba wéyu lun jerésibiruni le jadúnabei luágu wuríbani le jadügübei.

Lasúfurirun Páblo luágu lesériwidun lun Crístu queísi apóstolu

¹⁶ Naríñaguñaya jun. Úa la ni ában arítaguti luágu ladüga lan lülü lan náu nadímurejanbei jun ítara, ánjein jarítagua jubálin ítara, ígira jumána lun nadímurejan jun quei ában lülü táu, lun gíñe gayára lan napántajan murúsun.

¹⁷ Dan le nadímurejan buíti nuoúgua, madímurejaantina láu ában ünabuni quei ligáburi ladímurejan Crístu, nadímurejan quei jadímurejan ibídiouguatiña áu.

¹⁸ Queísi japántajan arúfudajatiña jagánagua láu buri cátei le lánina ubou le, napántajaba gíñe.

¹⁹ ¡Quei lanárimebei lichú jáu, awánda jumútiña lülü táu láu ugúndani!

²⁰ Lugúndun awánda jumútiña ja afósurubalün lun jesériwidun joun, jáma gíñe ja aságarubalin le júmati, ja anügübalün jánime, ja ouserubalün quei ni cáta, ja agáyuajabaña jigíbuagun.

²¹ Láu sun nibúsigari nan lun naríñaguni, ¡weírítí buga wedébilin lun wadügüni cátei líra!

Ánjeinti le uágubei gayára lan janáangun joúngua, gayáraati gíñe nanáangun núngua luágu (nadímurejaña méme queísi ában lülü táu).

²² ¿Jarásan Hebréona jagía? Áu sun. ¿Linásiñuna Israel jagía? Áu sun. ¿Linébaanfaangu Abrahám jagía? Linébaanfan gíñe áu.

²³ ¿Esériwidutiña lun Crístu jagía? Sügütimaatina jáu láu sun nadímurejaña lan queísi ában lülü táu dan le naríñaguni. Ñadágimeinjaadina sügü jáu, beíwaadina sügü jáu, dáüwaadina sügü jáu, sarágujali weíyaasu yaráfa nan lun nouñwen.

²⁴ Seíngüjali weíyaasu jabeíchunina juríu láu darándi-néfu beíti.

²⁵ Ürüwa weíyaasu jíchaagun Rómana wéwe nuágu, ában weíyaasu jachüragun juríu dübü nuágu. Ürüwa weíyaasu tabúluchun ugúnein to ídaanboun náfayaja náu, ában weíyaasu sügütina ában áriebe lúma ában wéyu anágü baránaja lárigiñe tabúluchun ugúnein náu.

²⁶ Aweíyasujaadina sarágu luágu luwádigimari Wabúreme, áni luágu buri weíyaasu ligía daríguaadina núngua lídan pelíguru dúnarugu, jádan jíwerutiña, jádan nupáisanu, lúma jádan teréncha. Daríguaadina núngua lídan pelíguru

ubúru, áraabu, lúma baránaja, lúma lídan pelíguru jádan gürígia aríñagutiña luágu idújeñu jamá lueígiñe Jesucristu, le jayéeni.

²⁷ Deréti nuwádigimaridun láu sarágu lénreengúnga, reídeijadina marúmugunga sarágu weíyaasu, súfurijadina ilámaü lúma mágürabu, ayúnaraadina gíbe, súfurijadina lidíliga lúma tilougua anáanguni.

²⁸ Boúgudi lueí buri cátei le lúma buri ámu cátei, ságü wéyu nasándiruni lijürü nidíjeri jawágu tílana sun ligílisi.

²⁹ Ánjein débili lubeí ában gürígia, sandítina camá jamuga áu débilibei. Ánjein áburuja ában gürígia lídoun figou, weíriri nigárigu luágu.

³⁰ Ánjein lúnti lubeí napántajan lun gayáraabei lan jerésibirunina queísi apóstolu, napántajaba láu buri cátei le, le arúfudubalin nidébilin.

³¹ Búngiu, le Lubúngiute áni Lúguchi Wabúreme Jesucristu, le únbei lúnti lan líchugúniwa uweíríguni lun sun dan, subúdi lumúti luágu inárüni lan naríñagubei.

³² Dán meja le ubúru nubeí Damáscu, ába líchugun gumádimati le esériwidubei lun urúei Aréetas oúnigirutiña luágu buri lubéneri fulásu ligía lun janügünina adáüra.

³³ Ába jaráriragüdünina numádagu lídan ában faníñe lídaangiñe ában funédere láni lubárierun ubúru, ítara líña neséfurun jájaburugugiñe náganiñu.

12

Labájüdagun Páblo luágu buri cátei le larúfudubei Jesucristu lun

¹ Magáñeirunti gürígia ni cáta láu ladímurejan buídu luougua. Láu sun líra, nabájüdagua jun guetó luágu buri cátei lé meja larúfudubei Jesúsun.

² Catoúrusu irúmu guetó lueígiñe nanügúniwa lídoun lürüwan siélu, áu le afíñebeí luágu Crístu. Ibídiñeti nun ánjein láu sun lubeí nügubu nídin, lúmoun máma lan láu, Búngiu asúbudirubalin.

³ Subúdi numúti luágu barüwa nan lídoun lürüwan siélu, le méme gíríbei paraíso, ibídiñeti nun ánjein láu sun lubeí nügubu o máma lan láu sun nügubu, Búngiu rügüñein asúbudirei.

⁴ Ñi siélu, arúfudati Búngiu cátei nun lé buri uágubei siñá lan nadímurejan ni ca un ladüga arámudaguati buri cátei ligía lueí jasúbudin gürígia.

⁵ Gayáraati jamúga napántajan luágu naríjini buri cátei líra, láu sun líra, siñáti napántajan nuougua, nadímurejanrügü luágu luweírín mabáfu nan nurúmawagua.

⁶ Láu sun ánjana lan jamúga busén nadímurejan buídu nuougua, máma jamúga libídiouniga áu líra, lugúndun inárüni lan jamúga le naríñagubei luágu le asúseredubei nun. Madügün nubeí lun úa lan ni ában anügütina weíri sügü láu laríjinina o sügü lan láu le lagáambubei naríñagun.

⁷ Buídu buríti bugája cátei lé buri larúfudubei Búngiu nun siélu darí jamúga lun gayára lan napántajan luágu. Lun mámabei lan lúba, ába líchugun ában sándi nuágu camá jamuga ában jíyu charúñu nuágu, liábin quei ában lumégen Máfia lun lasúfuriragüdünina.

⁸ Ürüwaali weíyaasu namúriajan lúma Nabúreme Crístu lun lagídaruni sándi ligía nueí,

⁹ Iaríñaga Nabúreme nun. “Anájein búma láu nínsiñejabu, áni buídurügüti líra lun bawánduni sun asúfuriruni, buítimaati laríjín nubáfu jawágu gürígia dan le débili jamá.” Gúndaatina lubeíti láu nidébilin, lun larúfuduni Crístu lubáfu nuágu.

¹⁰ Ligía nagúndaarúnbei láu débili, anabúni, mégei, eíbaajoúni, lúma buri lénreengúnga le nasúfurirubei luágu nesériwidun lun Crístu, lugúndun dántima le débili nan, weíritimaabei nasándiruni lubáfu Crístu nuágu.

Lidjéeri Páblo jawágu tílana ligílisi Coríntona

¹¹ Ábanjadina lülü táu láu nadímurejan buíti nuóúgua, áni jugúya adügagüdübalin nun, lugúndun jugúya yebe lúnbei jadímurejan buídu nuágu, máma áu. Múnabuntina sügü jáu súper-apóstolugu ja jafálarubaña, láu sun ni cáta nan.

¹² Lídan wadágimanu le nadügübei láu sarágu gurásu jagánagua, arúfudúati láu seíni lúma miláguru weíríti le nadügübei luágu ában lan apóstolu tímatimaati áu.

¹³ Mouserun numútün ünabu jaweí tílana túbiri ligílisi, ánjein gubeírügü láu lubeí meréde nan quei ában ijürügu jun. ¡Ferúduna jumána luágu líra!

¹⁴ Guetó aráanseedina lun nídín bisídaün lürüwan weíyaasu, áni mámabadina ában ijürügu jun. Máma náluguñein le júmabei, jugúya nálugubei lun jedéregeragun júngua le gumúti lun Crístu. Ítara jíña nun queísi isáanigu, áni agübürigu lúnbaña joúndarun seínsu jabá jasáanigu, máma isáanigu jabá agübürigu.

¹⁵ Nagástarubei le nómabei láu ugúndani juágu, daríme lun níchaagun núngua le gumúti luágu jufúleisein lun gayáraabei lan jeíbugun buídu lúma Crístu, láu sun genége lání luágu dántima lan le jínsiñe jumá nun, mínsiñetimaatina jun.

¹⁶ Añájein, láu sun subúdi jamáni luágu meréde nan quei ában ijürügu jun, aríñagatiña luágu barü nan seínsu júmagiñe lídan ámu luwúyeri láu ibíbuni.

¹⁷ ¿Ayéeda numútün funági láu ában jádaangiñe gürígia ja noúnajabaña jun lun lanügüni seínsu júmagiñe nubá?

¹⁸ Amúriajatina lúma Títo lun lídín bisídaün, oúnaja áu ában idújei lúma. ¿Yéegua lumútün funági Títo? ¿Ma ában láu wouuserun wagía biángubei, áni ában méme Sífiri Sándu abúgurubalíwa?

¹⁹ Fágua jarítaguatün luágu weséfuraguña lan woúngua jigíbugiñe, máma líña. Lubáragiñe líra, wadímurejaña ligíbugiñe Búngiu queísi lánigu Crístu. Sun le aríñaga wamáalibei, waríñaguñein lúnrügü jawáanserun lídan jeíbugun lúma Búngiu, nidújeñu jínsiñetiña nun.

²⁰ Nidíjeritina lueí dan lánme nídín aríjaün, fágua madárirun nubádün agáburida queísi nabúseerun jamúga nadárirunün, ábame magúndaanbadün lan láu ébechuni le lúnbei níchuguni juágu. Nidíjeritina lueí nadárirunün ageíndagua, láu gimúgaü, lúma igáñi tídan janígi, láu jáfaagun lun jawáanserun láu júnabudagüdüniña jidújeñu lueígiñe Jesucrístu, láu marásualugu, agúseragüdüña jidújeñu, láu pantaü, lúma lídan chagáguau.

²¹ Nidíjeritina lueí lídan lánme nídinya bisídaün, lanügagüdüniña Nubúngiute busíganu jáu, lueí giñe nayájun jawágu sarágu jídaangiñe ja afígounjañabaña lúmagiñe binárü áni mígirun jamágili iwíyei, salúfuri, lúma buri ámu luwúyeri wuríbani.

13

Ewéridijani lúma lagúmujoún buri mábugaü

¹ Nijánme lürüwan weíyaasu nídín bisídaün. Dánme le nachülürün júmoun, lagúseragüdüwaba cáda ában le gadúnrunti ánjein añájein lubeí biáma o ürüwa geféentiña luágu lidúnrun.

² Luágu meja libíaman nuweíyasun júmoun, wéridi numútiña meja ja adáagubaña wuríbani lun jasáansiraguni jagáburi. Láu sun díse nan jueí guetó,

nariñaguñaya joun sun ja asígirubaña adáagua wuríbani, luágu dánme lan nídin bisídaün lürüwan weíyaasu, nasúfuriragüdübaña lan láu ában érei weíríti.

³ Narúfudubeiti jun luágu adímureja lan Crístu nídaangiñe. Áni medébilinti Crístu lídan ligáburi loúserunün, arúfudarügü lumúti luweírin lubáfu jagánagua.

⁴ Inárüni luágu jilá lan luágu gurúwa queísi débiliti, ába labágaridun láu lubáfu Búngiu. Débilitiwa gíñe queísi ligía dán meja le laganouñbei ya ubouágu, áni quei sará lan Crístu lídaangiñe ouweni láu sun lubáfu Búngiu luágu, wachülürüba júmoun láu sun lubáfu Búngiu wawágu ladüga lídaañadiwa lan ában lúma Crístu.

⁵ Joucháguá jumá júngua lun jaríjini ánjein lánigu jubeí Crístu le tímatimaati, joucháguá jumá júngua, mouchugua jumána. ¿Ibídiñeti jun luágu níjein lan Crístu jídan ánjein afiñe jubeí le tímatimaati luágu?

⁶ Agúrabatina jasúbudiruni luágu afiñe wamá luágu Crístu le tímatimaati, áni níjein lan agánawa wádan láu sun lubáfu,

⁷ ladüga mabúseerun wamá warúfuduni wabáfu quei apóstolugu láu wasúfuriragüdünün luágu luríban jigáburi. Busénrügütiwa lun buídu lan jeíbugun lúma Búngiu láu sun jamúga ígirúa wamá marúfudunga wabáfu quei apóstolugu.

⁸ Dan rügüñein múaran lan lagáburidun gürígia lúma linárün Búngiu, labúseerúa larúfudúniwa nubáfu queísi apóstolu lun nasúfuriragüdüni gürígia luágu lifígoun, dan le buídu lan jouádin lúma Búngiu, mabúseerúnwati narúfuduni nubáfu láu abeíchuni.

⁹ Gúndaatina lun naganouñ quei mabáfuti ánjein buídu lubeí jigáburi, áni wayúmuraguamémeba lun jiábin lun jabuídurun le gumúti.

¹⁰ Nabürüjañoun gárada to jun lubáragiñe nídin aríjaün, lun gayáraabei lan jasáansiruni jigáburi lubáragiñe nachülürün júmoun, lun memégeirúniwa lan narúfuduni nubáfu juágu quei apóstolu láu nasúfuriragüdünün. Lugúndun rúlumuti Búngiu ubáfu nun queísi apóstolu lun nawáanseragüdünün lídan jeíbugun lúma, máma lun neréderunün lueí.

¹¹ Guetóti, nidújeñu, buídulá lídin jun. Áluga jumá lun jabuídurun le gumúti lídan jigáburi, ragújuma dügüdaguaü, abágarida jumá lídan úarani lúma darángilaü. Ítara lúba júmabei lan Búngiu láu lidárangilan lúma línsiñejabu.

¹² Chúgua jumá júngua lídan líri Wabúreme lun jarúfuduni luágu lídaañadiwa lan ában wámagua.

¹³ Mábuga jáña sun wadújeñu lídan afiñeni jun.

¹⁴ Resíbi jumeí labíniragüle Jesúsu, lúma línsiñejabu Búngiu, sandí jumeíme Sífiri Sándu júmagua. Ítaralá.

LIGÁRADAN PÁBLO JOUN GALÁCIANA

Labürüjan Páblo joun títana ligílisi buri to Galáciaboun

¹ Anája áu Páblo, le lání Jesucrístu apóstolu. Máma gürígia anúadirubalina lun apóstolu nan, máma gíñe gürígia oúnajabalina apúrichija luágu, Jesucrístu guánarügü lúma Wáguchi Búngiu le ásaaragüdúbalin lídaangiñe oúweni, jagía oúnajabalina quei apóstolu.

² Áu jáma sun wadújeñu lueígiñe Jesucrístu ja nómabaña ya, wabürüjañoun gárada to jun, jugúya le títana sun ligílisi to Galáciaboun.

³ Binílaün Wáguchi Búngiu lúma Wabúreme Jesucrístu, ibíja jumá gíñe darángilaü jámagiñe.

⁴ Rulumuti Jesúsu libágari wawágu lun lachíbuni wafígoun, gayára lámuga wasálbarun lídaangiñe lubáfu wuríbani le lánina ubou le, queisi labúseeruni Búngiu.

⁵ ¡Uweírighuni lun Búngiu lun súnwandan! Ítaralá.

Ában rügüñein luwúyeri ligáburi wasálbarun

⁶ ¡Weíríti nanígi láu lufúresen jígiruni Búngiu le agúarubei jun lun lánigu jumá luágu le ladügübei Crístu juágu, láu luweírín línsiñejabu! Furéseti jasáansiruni jafiñerun afálara ámu arúfudajani lún nege jadáriruni jasálbarun lídaangiñe,

⁷ iyéeni arúfudajani ligía. Chülújaña wügüriña jagánaguouún, ja buséntiña jañáwurijani jarítangun lun jafálarun ában ũma le maríchatí –ámu lueí jafiñerunrügü luágu Jesucrístu lun jasálbarun.

⁸ Wel, furúmieguarügü gürígia le ñübinbei adímureja jun luágu ámu luwúyeri asálbaruni lueí le arúfudaja wamáalibei jun, cáteíñein lan gürígia ligía, ¡reídeilá lábugiñe líñaragun Búngiu lun sun dan, áu yebe, ában yebe ánjeli siélugiñe!

⁹ Aríñaga náali meja áni naríñagayaali guetó. Ánjein ñübin ában gürígia arúfudaja ámu luwúyeri ligáburi asálbaruni lídaangiñe figou jun lueí le resíbi jumáalibei, ¡reídeilá lábugiñe líñaragun Búngiu!

¹⁰ Dan le naríñaguni le, ¿náluguña neréderun buídu jagíbugiñe gürígia, ódi neréderun buídu ligíbugiñe Búngiu? ¿Buséntina funági neréderun buídu jagíbugiñe gürígia? Lun jamúga ligía lan nabúseerúbei, mámaadina jamúga ában esériwiduti lun Crístu.

Ligáburi lachüürün Páblo lun ábanbei lan lání Jesúsu apóstolu

¹¹ Buséntina jasúbudiruni, nidújeñu, luágu ugánu lan le luáguti asálbaruni le uágubei nadímureja, máma jádaangiñe gürígia liábin,

¹² máma lúmagiñe ni ában gürígia nibíjei, máma gíñe larúfudajan ni ában gürígia nun, Jesucrístu guánarügü asúbudiragüdúbalin nun.

¹³ Agáamba jumáali ída líña lán meja nigáburi dán meja le gúnfuligidina lúma Búngiu láu luwúyeri jagúnfulirun juríu, subúdi jumáali ída líña lán meja lanárime neíbaajaniña títana lilígílisin Búngiu, áfaagua áu lun nagúmochaguagüdüniña.

¹⁴ Lídan ligáburi jagúnfulirun juríu lúma Búngiu, furésetina meja sügü jáu sarágu jádaangiñe nupaísanun ja madíseguati jagüriajouún núma, ladüga derégüdatimáatina meja lídan nagúnfulirun láu jagáburi binádu nagübürigu.

¹⁵ Ánjeinti Búngiu, anúadira láadina méja lubáragiñe nagüriajouún lun nesériwidun lun, ába lagúarun nun luágu luweírín línsiñejabu lun lánibadina lan.

¹⁶ Lídan lidáani, ligía lugúndaanbei Búngiu lun lasúbudiragüdüni Liraü nun lun gayáraabei lan napúrichijani lubuídun ugánu joun ja mámabaña juríu luágu ligía

lan Wasálbaragülebei. Lárigiñe nasúbudiruni Jesucrístu, mídintina álügüdaja ni ca úma,

¹⁷ mídin áu Jerusalén aríjaña ja apóstolubaña nubáragiñe, lubáragiñe líra, ába nídin furése loúbawagun Arábia. Lárigiñe, ábaya nagíribudun ubúrugun Damáscu.

¹⁸ Darí ürüwa irúmu lárigiñe, ligía nídin Jerusalén, ligíati nasúbudiruni Pédro, ába neréderagun queínsi wéyu lúma.

¹⁹ Maríjintina ámu jádaangiñe apóstolugu lueídügüya Jacóbo, le lamúlen Wabúreme Jesús.

²⁰ Ninárün jáu ligíbugiñe Búngiu luágu inárüni lan le nabürüjabei jun.

²¹ Lárigiñe líra, ába nídin loúbawagun Síria lúma Cilícia.

²² Ja wadújeñu lueígiñe Crístu ja tídaanbaña lilígílisin Crístu to loúbawaguboun Judéa, maríjin jamágidiná meja lídan dan ligía,

²³ agáambarügütiña laríñawagún. “Wügüri lé meja eíbaajabaliwa, lapúrichijañein ugánu le lánina afíñeni luágu Crístu queísi Wasálbaragüle guetó, áni ligía lé meja busénbei lagünrinchaguni wafíñen luágu Crístu.”

²⁴ Ába jíchugun uweíriginuni lun Búngiu luágu lasáansiraguni nigáburi ítara.

Resíbi jamúti jíbiri apóstolugu Páblo

2

¹ Catoúrusu irúmu lárigiñe, ábaya nídin Jerusalén úara lúma Bernabé, barü numuti gíñe Títo númagua.

² Nídinbei ñi ladüga arúfuda láali lan Búngiu nun luágu lúnti lan nídin. Ñi Jerusalén, ába nadámuridagun jáma ábutigu afíñetiña, ába nabájüdaguni joun ída líña lan narúfudajan joun ja mámabaña juríu luágu wasálbarun, nadügünbalin líra lun gayára lan jánjarun lun le narúfudajabei, lueí leréderun le adüga náalibe lúma le nadügübei quei ni cáta.

³ Resíbi jamúti, áni ni Títo, le noubabei, mafósurun jamúti lun lerésibirun circuncisión, láu sun máma lan juríu.

⁴ Inárüni luágu añájein lan eyéjatiña luágu idújeñu jamá lueígiñe Jesucrístu, ádaragutiña jóungua wagánaguóun arámudaguarügü, buséntiña lun líchugúniwa gumádi luágu lúnti lan lerésibiruni Títo circuncisión ánjein busén lubeí lun láni lan Búngiu. Belútiña yéetiña jagía quei aríajatiña lun jaríjini ída líña lan wagáburi bougudi lueí lilúrudun Moisés lídan woúndaragun lúma Jesucrístu, buséntiña jamúga lúnya wayábin lun idámunime lun lúrudu ligía.

⁵ Mígiraguagüdüntiwa woúngua joun ladüga busén wamá lun ñi méme lan inárüni le lánina ugánu luáguti asálbaruni júma, jugúya le mámabei juríu, meméterunga ámu buri cátei lánwoun le lúnbei jadügüni lun jasálbarun lueídügüya lun jafíñerun luágu Jesucrístu.

⁶ Ja asúbudirúabaña queísi ábutigu—láu sun, mebérese nan láu cátañañanu lan ladüga magúseragüdünti Búngiu luágu cátei le genégerügüti—míchuguntiña ábutigu jagía ni ában iséri luwúyeri arúfudajani nun lun níchuguni jun lánwoun le napúrichijabei.

⁷ Lubáragiñe líra, ábarüga jasúbudiruni luágu Búngiu lan íchugubalin wadágimanu le lánina lapúrichijoún ugánu luáguti asálbaruni joun ja mámabaña juríu nun, ítara queí buga líchuguni wadágimanu lun Pédro lun lapúrichijani ugánu méme ligía joun juríu.

⁸ Aríja jamáali luágu le méme lan Búngiu le ñadágimeinbei lídaangiñe Pédro quei apóstolu jádan juríu, ligía méme lan gíñe ñadágimeinbei nídaangiñe quei apóstolu jádan ja mámabaña juríu.

⁹ Queísi subúdi jamáni Jacóbo, Pédro lúma Juan, ja anügübaña quei weírigitimaatiña, luágu Búngiu lan fuleíseibalina lun líchuguni ubáfu le nun, ába

jíchuguni jájabu woun, áu lúma Bernabé, quei jánigu lídan luwádigimari Crístu, luágu gíñe gúnda jamá lun woúdin ñadágimein lídan jageíra ja mámabaña juríu, sun añája lan jagía ñadágimein lídan jageíra juríu.

¹⁰ Amúriajarügütiña wáma lun warítangun jawágu gudémetiña, áni nijánti cátei le nouchubei nadügün láu sarágu gounigi.

Ladeínjan Páblo lun Pédro ubúruгу Antioquía

¹¹ Dan le lídinbei Pédro ubúruгу Antioquía, ába nadeínjan lun ligíbuangun, lugúndun mabuídun lan le ladügübei.

¹² Furúmiñe meja, jouíti meja jáma afiñetiña luágu Crístu ja mámabaña juríu (ja mebéresenbaña láu circuncisión lúma buri ámu gumádi lídan lilúrudun Moisés). Ánjeinti lárigiñe jachülürün gürígia loúnajan Jacóbo, ligía lagúmeserun Pédro adíseda jaweí ja mámabaña juríu, ába meíginjali lan jáma ladüga lanúfude lueí le gayáraabei jaríñangun ja afiñebaña luágu lúnti lan jerésibiruni wügüriña circuncisión lun jasálbarun, lun gíñe meígin jamá juríu lídan ában jáma ja mámabaña juríu.

¹³ Játi jíbiri juríu ja afiñebaña luágu Crístu, ába júaradun lúma Pédro lídan cátei mabuídun le ladügübei, ába gíñe lúaradun Bernabé jáma lídan cátei ligía.

¹⁴ Dan le naríjinbei luágu meíbugun jamá úara lúma inárüni le larúfudajabei ugánu luáguti asálbaruni (luágu man lan asálbaruni ni cátei lúma lilúrudun Moisés), ába naríñangun lun Pédro ligíbugiñe sun adámurini. “Amürü le juríu, berédera abágarida quei ja mámabaña juríu, mabágariduntibu quei juríu. ¿Ída liñáti babúseerúnbei bafósuruniña ja mámabaña juríu lun jabágaridun quei juríu?”

Sálbawatiña juríu, queísigubeirügü sun gürígia, luágurügü jafiñen luágu Jesucrístu

¹⁵ Ába nasígirun aríñaga joun.

—Juríu wagía lúmagiñe wagüriajoun, aríñagatiwa luágu mafígoun wamá, luágu mítaran wamá quei ja mámabaña juríu ja agüriajoubaña bougudi lueí lilúrudun Búngiu.

¹⁶ Láu sun líra, subúdi wamúti luágu úabei lan ni ában eréderuti richágu ligíbugiñe Búngiu luágu ladügüni le lubeíbei lilúrudun Moisés, láurügübei lafiñerun luágu Jesucrístu lerédera richágu ligíbugiñe Búngiu. Ligía gíñe lébubei wafiñerun luágu Jesucrístu, wagía le juríubei, lun gayáraabei lan weréderun richágu ligíbugiñe Búngiu lídaangiñe afiñeni le, máma lídaangiñe wadügüni le lubeíbei lilúrudun Moisés, lugúndun úabei ni ában eréderuti richágu ligíbugiñe Búngiu lueígiñe ladügüni le lubeíbei lilúrudun Moisés.

¹⁷ Ítara líña lubeíti, quei wáluajan weréderun richágu ligíbugiñe Búngiu lídaangiñerügü Jesucrístu, ába waríjin luágu gafígoun méme wamá queísi ja mámabaña juríu ladüga wabágariduña lan gíñe guetó bougudi lueí lilúrudun Moisés, ¿gayáraati waríñangun lueígiñe líra luágu Crístu lan gafígonügüdübaliwa? ¡Ni cátei líbe líra!

¹⁸ Lubáragiñe líra, lun jamúga wagíribudun lun wemenigidun luágu wagúnfulirun lúma lilúrudun Moisés lun wasálbarun lárigiñe wemenigidun luágurügü wafiñerun luágu Crístu, warúfuduñein luágu magúnfulirun wamá lúma linárün laníchigu lúrudu ligía, áni gafígountiwa.

¹⁹ Áu, queígubeirügü jiláadina lan lun lilúrudun Moisés, lúrudu méme ligía ouwedagüdübadina lun, lun gayára lan nabágaridun lun Búngiu.

²⁰ Rúguatina núngua quei jiláadina lun figou, dáwaguañu luágu gurúwa lúma Crístu. Mámaadina lubeíti áu méme abágaridubei nídaangua, Crístu abágaridubei nídan. Ibágarí le nabágaridubei lídan nügubu, nabágariduñein láu sun nafíñen

luágu Liraü Búngiu le jínsiñejabúbei nun, ába ledéregeragun lúngua lun loúnwen nuágu.

²¹ Mabúseerúntina lubeí namájarun lun lareíni Búngiu láu nagíribudun lún buri igáburi lánina lilúrudun Moisés, lugúndun lun jamúga gayára lan leréderun gürígia richágu ligíbugiñe Búngiu láu lagúnfulirun lúma lúrudu ligía, úati jamúga ju lan loúnwen Crístu.

Lúrudu ódi afíñeni

3

¹ ¡Jugúya Galáciana, magáambaditün gíñe! ¿Ca abíñaragubadün lun magáambun jubeí lan ugánu le inárünibeí libübürü wasálbarun? Lídán meja wapúrichijan jun, arúfuda wamúti laníchigu loúnwen Crístu luágu lugúruwan jun, furáangu.

² Aríñaga jumeí cátei le nun. ¿Lueígiñe jagúnfulirun lúma lilúrudun Moisés jerésibirei Sífiri Sándu ódi lueígiñe jafíñerun luágu le jagáambubei luágu Crístu?

³ ¿Ída líña ítara lubeí jumágaambadi? Gumésetün eíbuga lúma Crístu láu lubáfu Sífiri Sándu, ¿guetó jarítaguatün funági luágu buítimaabei lan jeíbugun lun jígiruni Sífiri Sándu lun jagúnfulirun lúma jagáburi juríu?

⁴ ¿Marúfudajaangili sun le jasúfurirubei jun? ¡Arúfudajaali lámuga jun!

⁵ Dan le líchuguni Búngiu láni Espíritu jun, adüga ligía miláguru jagánagua, ¿cásan uágu ladügei líra? Máma lugúndun adüga jumáni le lubeíbei lilúrudun Moisés ladügei, ladügünbalin lugúndun afíñe jumá luágu le jagáambubei luágu Liraü.

⁶ Jarítagua jumá luágu Abrahám. Rúlumuti meja sun lafíñen luágu Búngiu, luágu lafíñen, ába lerésibiruni Búngiu queísi ában wügüri richáguati.

⁷ Ligía lubeíti jugúya, lúnti jasúbudiruni luágu ja lan afíñebaña, jagía lan linébaanfaanbaña Abrahám tímatimaatiña.

⁸ Queísi subúdi láni Búngiu lubáramegiwa luágu ñíbaña lan jádaangiñe ja mámabaña juríu lun jayábiba lan lun jeréderun richágu ligíbugiñe láu jafíñerun luágu Jesucrístu, ába laríñaguni ugánu buíti lun Abrahám lubáramegiwa, queísi bürüwañu lan tídan lilíburun. “Jabínirúaba sun gürígia ubouágu bídaangiñe.”

⁹ Ítara líña lubeíti, ja afíñebaña, biníwatiña úara lúma Abrahám le afíñerubei luágu Búngiu.

¹⁰ Ja afíñerubaña luágu jasálbaruba lan láu jagúnfulirun lúma lilúrudun Moisés, bulíeiguatiña, lábugiñeñanu líñaragun Búngiu, lugúndun taríñajare Lerérun Búngiu. “Sun ja magúnfulirunbalin sun le bürüwañubei tídan lilíburun nilúrudun le níchugubei lídaangiñe Moisés, lábugiñeñanu níñaragun.”

¹¹ Furánguti lubeíti luágu úa lan ni ában eréderuti richágu ligíbugiñe Búngiu luágu ladügüni le laríñagubei lilúrudun Moisés, lugúndun taríñajare Lerérun Búngiu. “Láu lafíñerun gürígia luágu Búngiu lerédera richágu ligíbugiñe, ibíjaleíme ibágari magúmchaditi.”

¹² Ánjein lilúrudun Moisés máma cátei lánina afíñeni, lánina cátei le adügüwarügüti ladüga laríñajare lúrudu ligía. “Láu rügüñein jamúga lagúnfulirun gürígia láu sun igáburi lánina lúrudu le, libíjei ibágari magúmchaditi.”

¹³ Wagía queísi gürígia garaüwarügütiña, mabáfutiwa lun wagúnfuliruni sun lúrudu ligía. Ába laséfuruniwa Crístu lídaangiñe líñaragun Búngiu lé lúnbei yebe láburujan wawágun lueígiñe magúnfulirun wamáni sun lilúrudun Búngiu le líchugubei woun lídaangiñe Moisés. Barü lumuti Crístu líñaragun Búngiu luougua wewéñagua lídan le loúnwenbei luágu gurúwa, lugúndun taríñajare Lerérun Búngiu. “Íñarawagúati sun le ádarawagúti luágu gurúwa.”

¹⁴ Adüga lumúti louñwen Crístu lun liábinba lan abíniruni le uágubei laríñaga Búngiu lun Abrahám, lídaangiñe Jesucrístu joun gíñe ja mámabaña juríu, lúma lun werésibiruni, sun wagía, Sífiri Sándu le uágubei laríñaga Búngiu, láu wafíñen.

Lilúrudun Moisés, lúma lerérun Búngiu lun Abrahám

¹⁵ Nidújeñu, níchiga ában jémpulu jun lídaangiñeti jabágari gürígia. Dan le ladügün wügüri ában darádu, ába laseíniruni, úati ni ában lun gayára lan lagúluuduni ni lun líchugun ni cátei lánwoun.

¹⁶ Ítara líña gíñe, rulumuti meja Búngiu lerérun lun Abrahám lúma lun linébaanfan. Maríñaguntu Lerérun Búngiu “binébaanfaangu”, camá jamuga jawáguti sarágu gürígia, taríñajare “lun binébaanfan”. Laníchigu líra, “ábanrügü gürígia”, le Crístu.

¹⁷ Niján le naríñagubei. Adügati Búngiu ában darádu lúma Abrahám, ába lachouúruruni, gádürü-san darándi irúmu lárigiñe, ába líchuguni lilúrudun lun Moisés lun lafúnraanguagüdüni joun gürígia. Ligía darádu lubei lé meja ladügübei Búngiu lúma Abrahám siñáti lagúluudúniwa láu ában lúrudu le ñübinbei gádürü-san darándi irúmu lárigiñe, lun lígiruni lerérun Búngiu lun Abrahám mebégiga.

¹⁸ Lun jamúga lídaangiñeti lan agúnfuliruni lúma lilúrudun Moisés cátei le líchugubei Búngiu, mámaali jamúga ában cátei le líchugubei lun lagúnfulirún láu lerérun. Ánjeinti le laríñagubei Búngiu lun Abrahám, luágu líchugubei lan lun, míni lan líra, libíjibe cátei ligía madügünga ni cátei lun lagáñeiruni.

¹⁹ ¿Cáti un ju lan lilúrudun Moisés ánjein siñá lubei lasálbaruníwa? Ñübinti lúrudu ligía sarágu irúmu lárigiñe lidáradun Búngiu lúma Abrahám lun larúfuduni jafígoun gürígia joun, lúntirügü ladúrarun darí liábin linébaanfan Abrahám, le Crístu, le gíñe úmabei ladügüwa darádu ligía. Rulumuti Búngiu lilúrudun joun ánjeligu lun jíchuguni lun Moisés, liábin Moisés, ába lafúnraanguagüdüni lúrudu ligía joun gürígia.

²⁰ Ánjeinti dán meja le ladügübalin Búngiu lidáradun lúma Abrahám lun labíniruniña sun gürígia lídan, mayúsurunti ánjeligu, mayúsurun ligía gürígia, ligía adügübalin sun cátei.

Ca lan uágu níjein lubei lilúrudun Moisés

²¹ ¿Laríñaguña funági le luágu múaradun lan lerérun Búngiu lúma lilúrudun le líchugubei lídaangiñe Moisés? Máma líña. Lun jamúga rúa lan ában lúrudu le íchugubei ubáfu woun lun wagúnfulirun láu, gayáraati jamúga jayábin gürígia lun jeréderun richágu ligíbugiñe Búngiu láu jagúnfuliruni le lubei bei lúrudu ligía.

²² Lídan linárün cátei, mabáfutiwa lun wagúnfulirun lúma lilúrudun Búngiu, le líchugubei lídaangiñe Moisés, queísi laríñagun Búngiu tídan Lerérun. “Sun gürígia lábugiñeñanu lubáfu figou.” Ítara líña lun lídaangiñerügü lan afíñeni luágu Jesucrístu gayára lan jáfuridun gürígia lábugiñegiñe lubáfu figou lun jeréderun richágu ligíbugiñe Búngiu láu jafíñen luágu Jesucrístu, queísi meja laríñagun Búngiu lun Abrahám.

²³ Lubáragiñebei liábin Crístu lun gayáraabei lan wafíñerun luágu lun wasálbarun, lábugiñeñadiwa buga lubáfu lúrudu agúrabaja liábin.

²⁴ Ába lubeíti lanügüniwa lilúrudun Moisés lánime camá jamuga irájüñü wagía lun latoúnigiruniwa lueí wuríbani darí liábin Crístu lun dánme lan wafíñerun luágu, gayáraajálme weréderun richágu ligíbugiñe Búngiu.

²⁵ Guetóti, quei chülújali lubei Crístu, mámaadiwa lábugiñe louñgírurun lilúrudun Moisés.

²⁶ Guetóti lirájüñü Búngiu sun jugúya luágu jafíñen luágu Crístu, lídaañadün ában lúma.

27 Sun jugúya le belújalibei lídoun ában lúma Crístu láu jabásterun, ibíjaadün ában igáburi líbe ligáburi Crístu.

28 Mámaali cátei lánina lun juríu jumá o máma jumá juríu, o idámuni o máma idámuni, wügüri o würi, ladüga láu lídaañadün lan ában lúma Crístu Jesúsu, sun jugúya ábanrügüñadün.

29 Ánjein lánigu jubeí Crístu, linébaanfaangu Abrahám jugúya, jerésibirubei le uágubei laríñaga Búngiu lun Abrahám queí jalágaante.

4

1 Niján cátei le nabúseerúbei naríñagun. Dan le loúnwen ában úguchili áni ñúraügili liraü le lúnbei lerésibiruni alágan, mabuíduñtimaati dan lun irájü ligía sügü jáu lumúsuniña lúguchi, láu sun ligía lan labúremebei alágan, ladüga siñágili lan layúsuruni.

2 Añájein gürígia oúnigiruti, aríja jagía láu lalágaante darí lachülürün dan le líridubei lúguchi lun lerésibiruni.

3 Ítara líña lasúseredun wáma. Lubáragiñebei liábin Crístu ubouágun, lábugiñeñadiwa meja lúrudu lúma buri igáburi le mámabei lúnti ladúrarun lun sun dan.

4 Dan le lagúnfulirunbei dan, ába loúnajani Búngiu Liraü, le agüriajoubei tídaangiñe ában würi, ába liábin queí juríu lábugiñe lilúrudun Moisés.

5 Liábinbei ítara lun laságaruníwa lábugiñegiñe lúrudu ligía, lun lerésibiruníwa Búngiu queísi lirájüñü.

6 Lúnti larúfuduni Búngiu luágu lirájüñüjadiwa lan, ába loúnajani láni Liraü Espíritu, le méme Sífiri Sándu, tídoun wanígi, áni agúajati Espíritu ligía wadaangiñe lun Búngiu. “¡Núguchi!”

7 Lirájüñü lubeíti Búngiu wagía, mámaadiwa idámuni, áni ladüga lirájüñü wamá Búngiu, líchugubei alágan woun lídaangiñe Crístu.

Labúseeruni Páblo le buídubei joun ja afiñebaña

8 Dán meja le ibídiñegili Búngiu jun, jadámuñadün meja “búngiugu” ja mámabaña búngiugu lídan linárün cátei.

9 Ánjein guetó, láu subúdi jumáli lan Búngiu, —lídan lirícha cátei, láu subúdi láadün lan Búngiu —¿ída lubáyasan gayára lan jarítangun lúnya jíchaagun júngua queísi idámuni lábugiñoun lúrudu lúma buri igáburi le mabáfubei lun ladügün ni cáta jun?

10 Adáaguatün buri fédu ítaga wéyu, ítaga játi, ítaga dan, ítaga irúmu queísi laríñaguni lilúrudun Moisés lun jeréderun richágu ligíbugiñe Búngiu, lídan jarítangun.

11 Janúfudetina lueí masériwidun lan wadágimanu le nadügübei jagánagua lun ni cáta.

12 Nidújeñu, ayúmuraguatina jun lun jarítangun queísi áu luágu buri cátei le, ladüga furíjadina lun mámaadina lan lábugiñe lilúrudun Moisés queísi meja mámañadün lan lábugiñe lúrudu ligía. Madügüntün ni ában wuríbani nun lídan meja júma nan,

13 queí subúdi jumáni, ladüga meja ában sándi le nuágubei gayára lubeí neréderun júma furúmiñeti dan lun napúrichijani ugánu lánina asálbaruni jun.

14 Sándi ligía lé meja nuágubei, ában meja ouchúni nun, múnabunti janüügünina luágu líra. Lubáragiñe líra, ába jerésibirunina queísi ában láni Búngiu ánjeli, camá jamuga Jesucrístu guánarügü áu.

15 ¿Ca susérebei lun ugúndani lé meja jasándirubei náu? Gayáraati naríñagun luágu jáni fuleísei luágu ánjein lan jamúga meja lúnti, jaságaruñein lan jamúga jágu lun jíchuguni nun.

16 Guetó, ¿jáganijadina funági lueígiñerügü naríñaguni inárüni jun?

17 Weíriti juwámaan joun mútu ja, mabuídunti jarítangun jubá. Le jabúseerubei, lun jadisedagüdünün waweí lun ában lánme jawámaadun jun.

18 Buíti lun juwámadirun joun ámu, ñi áu yebe júma o úaadina lan júma, ánjein láu lubeí lubuídun arítangun ladügüwa.

19 Nirájüñü, nasúfuriruñaya igárigu juágu quei ában úguchuru dan le tagáridun, áni ítara méme núba asúfurira daríme lun jarúfuduni luágu níjein lan Cristu jídan.

20 ¿Buséntina jamúga lun anájein lan júma guetó lun gayára lan nadímurejan jun láu ámu luwúyeri, ibídiñeti nun cába lan narítagua juágu!

Jémpulu tuáguti Agár túma Sára

21 Jugúya le busénbei jíchaagun júngua lábugiñoun lilúrudun Moisés, aríñaga jumeí cátei le nun. ¿magáambun jumágili le laríñagubei lilúrudun Moisés?

22 Laríñajare luágu garájüñü lán meja Abrahám bián irájüñü, ában táu lidámun, le ában táu lúmari to ában würi to máma idámuni.

23 Le tiraü idámuni, ítara líña lagüriajoun quei jagüriajoun sun irájüñü, ánjein le tiraü to máma idámuni, lagüriajoun lun lagúnfuliruba lan le uágubei laríñaga Búngiu lun Abrahám.

24 Ítara líña cátei le queísi ában jémpulu. Bián würiña ja, ítara jáña queísi bián darádu le ladügübei Búngiu. Adügati ában darádu lúma Moisés dan le líchugunbalin lilúrudun lun luágu wübü Sinaí. Darádu ligía, ítara líña queísi Agár ladüga sun lan gürígia ja lábugiñebaña lúrudu ligía idámuni lun jagúnfulirun lúma, queísi idámuni jamá sun tirájüñü Agár.

25 Wübü le Sinaí lídaañein fulásu le gíribei Arábia (le ñi lubei jagánoua ladügawagun tiraü Agár). Agár liyáwaboun wübü ligía lúma lúrudu le íchugübei ñi. Ubúругu le Jerusalén le guetóbei, ítara líña quei wübü Sinaí lídan dan le sügüjalibeí, ladüga ubúругu ligía jáu sun lílana, ítara jáña quei idámuni lun igáburi lánina lilúrudun Moisés.

26 Ánjeinti Jerusalén le siélubei, máma lánina idámuni queísi máma lan idámuni lúmari Abrahám, áni lirájüñü Jerusalén le siélubei wagía.

27 Tariñajare Lerérun Búngiu.

Gúndaaguabá, würi maraüjeitu, amürü to maraüboun, wáguabá láu ugúndani, amürü to ibídiñebeí agáriduni bun, lugúndun amürü to áuboun mebéresenwa lan, gíbetimaabaña birájüñü sügü táu würi to garaüboun láu búmari.

28 Nidújeñü, queísigubeirügü Isáac lan irájü le líchugubei Búngiu lun Abrahám lun lagúnfulirun láu lerérun lun, wagía afíñetiña ladügawagunbaña Abrahám ja uágubaña laríñaga Búngiu lun.

29 Ítara queí meja dan ligía, isáani le agüriajoubei lídan ában igáburi quei furúmieguarügü agüriajouni eíbaaja lumúti meja isáani le agüriajoubei láu lubáfu Sífiri Sándu, ítara líña gíñe lasúseredun guetó—ja lábugiñebaña lilúrudun Moisés eíbaaja jamútiña ja māmabaña lábugiñe lúrudu ligía.

30 ¿Cáteisán tariñagunbei Lerérun Búngiu? Tariñajare. “Bugáboun idámuni láu sun tiraü, lugúndun siñáti gafánran lan tiraü idámuni lídan alágan lúma tiraü to māmaboun idámuni.”

31 Nidújeñü, mítaraantiwa lubeíti quei tirájüñü idámuni, ítara wáña quei tirájüñü würi to māmaboun idámuni.

5

Míchaaguaya jumá júngua idámunime

¹ Furígüda láadiwa Crístu lídaangiñe idámuni wamá lun lúrudu buri lúma igáburigu. Reídei jumá lubeíti le ñí lubei líchugaün Crístu, míchaaguaya jumá júngua idámunime.

² Agáamba jumána. Áu pábulo aríñagatina jun luágu ánjaün lan íchaagua júngua lábugiñoún igáburi le lánina circuncisión lún nege jeréderun richágu ligíbugiñe Búngiu, mesériwidunbei Crístu lun ni cáta jun.

³ Naríñagayaali lun furúmieguaügü wügüri le resíbinbalin circuncisión luágu lúnti lan ladügüni sun líbiri le lubeíbei lilúrudun Moisés lun gayáraabei lan leréderun richágu ligíbugiñe Búngiu.

⁴ Jugúya le jarítaguabei luágu richágu jumá ligíbugiñe Búngiu láu jagúnfulirun lúma lilúrudun Moisés, ígira jumáli Crístu, díseedün lueí asálbaruni le láurügüti lareíni Búngiu.

⁵ Wagía, láu lubáfu Sífiri Sándu lúma láu wafíñen luágu Jesucrístu, jeménigitiwa luágu weréderuba lan richágu ligíbugiñe Búngiu.

⁶ Ánjein lídaañadiwa lubeí ában lúma Crístu Jesúsu, málati werésibiruni circuncisión lúmoun merésibirun wamáni. Le busénwabei, lun afíñe wamá luágu Jesucrístu lúma lun warúfuduni afíñeni le wawágubei láu wínsiñejabu joun gürígia wáledi.

⁷ Buíti meja jeíbugun lúma Crístu, ¿ca ígiragüdúbalin lagaambúniwa inárüni jun?

⁸ Mámá Búngiu le agúarubei jun adügúbalin líra.

⁹ Mabúlieida jumeí luágu furése lan lawáraudagun arúfudajani le maríchatu lun lagünrinchaguni jafíñen sarágu gürígia queísigubeirügü resígüda lánun murúsun ísi sun to añóundawagouboun láu.

¹⁰ Neménigiduña luágu Wabúreme Crístu lúnya lasáminaragüdünün queísi áu luágu buri cátei le. Áni cáteíñein lan gürígia le añáwuriabei jun, labeíchubei Búngiu.

¹¹ Aríñagatiña arúfudajatiña yéetiña jagía luágu apúrichija nan luágu lúnti lan jerésibirun wügüriña circuncisión lun jasálbarun. Nidújeñu, ánjein jamúga apúrichija nubálin cátei líra, ¿cámesan jeíbaajana meme juríu? Lun jamúga napúrichijani circuncisión, maríbaanti jamúga láburujan dimúrei luáguti loúnwen Crístu luágu gurúwa joun.

¹² Ánjeinti jawágu ja abúseerúbaña jádaruni jídoun luágu lúnti lan jerésibiruni circuncisión, ígúndaatina jamúga lun jíbugunun jawáriu gumúgubei!

¹³ Ánjeinti jugúya, nidújeñu, agúajati Búngiu jun lun lagídarunün lábugiñegiñe igáburi lánina lilúrudun Moisés, manüga jumeírügü liñáti líra lun lébume gayára lan jasígiruni ugúndani buri le lánina ubou le. Lubáragiñe líra, seríwigua jumá júniwagua láu ínsiñejabuni le jídaanbei jubáruagua,

¹⁴ lugúndun láu jagúnfulirun lúma lúrudu le aríñagubei. “Jínsiñelá gürígia bíledi bun queísi bísiñegua búngua”, gúnfulijadün láu sun lilúrudun Moisés.

¹⁵ Goúnigi jumá, ánjaün ageíndagua júmagua, jagúmuchaguagüdúba júniwagua.

Ugúndani le lánina ubou, lúma eíbuguni lúma Sífiri Sándu

¹⁶ Niján cátei le naríñagubei jun. Abágarida jumá quei labúseeruni Sífiri Sándu, ítara lúba mafála jumáni jugúndan guánarügü le lánina ubou.

¹⁷ Ugúndani le lánina ubou máma lúmagiñeñein Sífiri Sándu, áni Sífiri Sándu, máma lúmagiñeñein ugúndani le lánina ubou. Gáganiguati ában lúma le ában, ligía lásíñerunbei jadügüni jugúya cátei le jabúseerúbei yebe jadügün.

¹⁸ Ánjein Sífiri Sándu lubeí abúgurubadün, mámaadün gíñe lábugiñe lilúrudun Moisés.

19 Ménreengúnti larijíniwa cátei lán buri cátei le jadügübei ja afálarubalin ugúndani lánina ubouú. Gámariguatiña jámagua mamárieidunga, adáaguatiña buri cátei wíyeti, úati nibúsigari jamá láu jasálufurin,

20 judúguatiña joun sándu, abíñaraja jagía. Níjein iyéreejabuni jádan, gáganiguaü, lúma eméendüni. Ménreengúnti jagáñidun, jawouúgua rügüñein jarítagua súnwandan, fánreinguagüda jamúti adámurini.

21 Gimúgatiña, gáfarajadi, gátadi, weínamu jeígin, adüga jagía ámu buri cátei lenége líra. Nariñaguñein jun quei nariñaguni lubáramegiwa luágu ja lan adügübalin cátei le, mebélurunbaña lídoun larúeijan Búngiu.

22 Niján buri igáburi le líchugubei Sífiri Sándu. Ínsiñejabuni, ugúndani, darángilaü, gagúraasuni, areíduni, lubuídun igáburi, úaraguni,

23 manáanguni únguaü, ragüguaü únguaü. Úaraguati buri igáburi le lúma furúmieguarügü lúrudu.

24 Ja lánigubaña Crístu, dágua jamáali sun luwámaan cátei le lánina ubouú le joun luágu lugúruwan Crístu.

25 Ítara quei wabágaridun lídaangiñe Sífiri Sándu, lúnti gíñe wígirun lun labúguruniwa Sífiri Sándu lídan le wadügübei.

26 Mouún lumuti wanáangun woúngua, añáwuriwatiwa joun wíbirigu ítara, rúti gíñe gimúgaü wádaangua.

6

Íderagua jumá júmawagua

1 Nidújeñu, ánjaün aríja luágu áburujaali lan ában jídaangiñe lídoun figouú, jugúya le eíbugubei lúma Sífiri Sándu lúnti jíderaguni lun lagídarun lídaangiñe figouú ligía, adüga jumeí láu maweírighuni. Lúnti gíñe goúnigigua jumá júngua lueí gíñe jáburujan lídoun figouú queísi ligía.

2 Ídaragua jumá júmawagua lun jawánduni jijürügu, ítara lúba jagúnfulirun lúma lilúrudun Crístu, le lánina ínsiñejabuni.

3 Lúnti wíderaguniña wíbirigu lugúndun ánjein anáangua gürígia lúngua áni ni cáta ligía, leyéedaguña lúngua.

4 Cáda ában gürígia lúnti lagúserun lúmagua ída líña lan ladíñurun. Ánjeinti adáriragua lúngua buíduñu, ligíaba buídu guánarü lúngua, máma ámu,

5 lugúndun sun gürígia geféenbaña lun Búngiu jawouúgua, máma jawágu ámu.

6 Le únbei larúfudajoúa Lerérun Búngiu lúnti lafánreinjani sun luwúyeri ibíjini lúma le arúfudajabei lun.

7 Mayéedagua jumá júngua, siñáti jéjerajan láu Búngiu. Le lábunagubei gürígia, ligíaba gíñe lalúbaja.

8 Ánjein ábunagua ában gürígia cátei le íchugubei ugúndani le lánina ubouú lun, le méme lábunagubei, líchuguba ában alúbajani le lánina féridi lun. Ánjein ábunagua ában gürígia cátei le íchugubei ugúndani lun Sífiri Sándu, líchuguba Sífiri Sándu ában alúbajani le lánina ibágari magúmuchaditi lun.

9 Mouún lumuti lubeíti labúchadun wawágu adügei cátei le buídubei, lugúndun ánjava ítara méme adügei, walúbajaba buíti dánme le lachülürün dan lun werésibiruni.

10 Ligía, adüga wameí lubeí le buídubei joun súngubei ságü gayára lan, jountima wadújeñu lueígiñe Crístu.

Ewéridijani lúma lagúmujoún ayouúraguni

11 Aríja jumá luweínamu létera le áubei nabürüja jun guetó láu nújabu guánarügü.

¹² Ja abúseerúbaña jafósurunün lun jíchaagun júngua lábugiñoun igáburi le lánina circuncisión jadügüñein lúnrügü jeréderun buídu jagíbugiñe juríu, lun meíbaajoúniwa jamá lueígiñe jamúga jariñagun luágu lídaangiñe rügüñein lan loúnwen Crístu wasálbara.

¹³ Ni ja íchaagubaña jóungua lábugiñoun igáburi le lánina circuncisión, madügün jamúti sun le laríñagubei lilúrudun Moisés, busénrügütiña lun jerésibiruni jugúya circuncisión lun gayára lan japántajan luágu jafósurunün lun jibíjini circuncisión.

¹⁴ Ánjeinti áu, mabúseerúntina napántajan ni ca uágu, ában rügüñein cátei uáguti nadímureja weíri—luágu loúnwen Wabúreme Jesucrístu luágu lugúruwan wawágu. ¡Lídaangiñe lugúruwan Crístu jiláañu líña cátei le lánina ubouú nun áni jiláañu níña gíñe lun cátei le lánina ubouú!

¹⁵ Lun Búngiu, ni cáta ánjein ibíja wabálin circuncisión lúmoun mibíjin wamáni, le busénwabei, lun iséri wamá gürígia.

¹⁶ Sun ja abágaridubaña ítara, jagía lánigubaña Búngiu le tímatimaati, resíbi jamá lubeíti darángilaü lúma gudémejabu lúmagiñe.

¹⁷ Lúmagiñe dan le ugúñe, mabúseerúntina lun nibíjin lénreengúnga ni ca úmagiñe. Arúfuda lumúti lárigi buri bíti le nuágubei luágu ában nan esériwiduti lun Nabúreme Jesúsu.

¹⁸ Nidújeñu, binílaün Wabúreme Jesucrístu, sun jugúya. Ítaralá.

LIGÁRADAN PÁBLO JOUN ÉFESONA

Labürüjan Páblo joun títana ligíli to Éfesoboun

¹ Anája áu Páblo, le lání Jesucrístu apóstolu láu lugúndan Búngiu, nabürüjañoun gárada to jun, jugúya le lánigubei Búngiu ja afiñebaña luágu Crístu Jesúsu lídan ubúrgu le Éfeso.

² Binílaün Wáguchi Búngiu lúma Wabúreme Jesucrístu, ibíja jumá gíñe darángilaü jámagiñe.

Abíniruni le wánibei lugúndun lídan wamá ában lúma Jesucrístu

³ Rúwama uweíríguni lun Búngiu, Lúguchi Wabúreme Jesucrístu, lugúndun láu lídan wamá ában lúma Wabúreme Jesucrístu, biní laadiwa láu sun luwúyeri abíniruni le lánina siélu.

⁴ Lubáragiñebeí meja ladügüni Búngiu uboú, anúadira lumútiwa lun lánigubadiwa lan láu le lúnbei ladügüni Crístu wawágu, lun weréderun madúnrunga ligíbugiñe, derégeguñu woúngua lun.

⁵ Fánrein lumútiwa lúmagiñe binárü, láu línsiñejabu, lun lerésibiruníwa queísi lirájüñü lídaangiñe Jesucrístu, ladüga ligía lan lugúndaanbei woun.

⁶ Ligía súnwandan lubeí wíchugun uweíríguni lun Búngiu luágu luweírín lareíni le áubei labínirawa dan le lídan wamá ában lúma Liraü le jínsiñebeí lun.

⁷ Láu luweírín lareíni Búngiu, sálba láadiwa láu líta Liraü le áwiyurubei wawágu dan le loúnwenbei luágu gurúwa, ferúdunaleí wafígoun.

⁸ Arúfuda láali Búngiu lareíni woun le tímatimaati láu líchugun sun luwúyeri subúdi lúma gunfaráandaü woun,

⁹ subúdigüda láali layúmajan lé meja arámudaguabei woun, o arítaguni lan le lasáminarubei ladügün.

¹⁰ Según arítaguni le, le lúnbei lagúnfulirun quei lubúdubu dánme le lachülürün lidáni, ladúnraguagüdübei Búngiu sun cátei lábugiñe lagúmadijan Crístu, dándu lé buri siélubei quei le uboúagubei.

¹¹ Láu lídaañadiwa lan ában lúma Crístu, anúadira lumútiwa Búngiu lúmagiñe binárü lun werésibiruni wafánran lídan le lúnbei líchuguni, áni sun le, lídaañein lugúndan Búngiu le adügübalin sun cátei quei labúseeruni.

¹² Anúadira lumútiwa lun wabágaridun, wagía le afiñebeí luágu Crístu furúmiñe, lun liñurúniwa líri Búngiu luágu luweírígün.

¹³ Jugúya gíñe, dan le jagáambunbalin ugánu le lánina inárüni—ugánu le anügübalin asálbaruni jun—ába jafiñerun luágu Crístu queísi jasálbaragüle, ába lídan jumá ában lúma, ába larúfuduni Búngiu luágu lánigu jumá láu líchuguni Sífiri Sándu le uágubei laríñaga, jun.

¹⁴ Sífiri Sándu ligía ában lichoúrún Búngiu woun luágu werésibirubei lan alágan le lúnbei líchuguni Búngiu woun dánme lagúmuchuni lasálbaruníwa, wagía le lánigubei, lun liñurúniwa líri luágu luweírígün.

Lamúriajan Páblo lúma Búngiu lun líchugun subúdi joun afiñetiña

¹⁵ Ligía dan le lubeí nagáambunbei luágu afiñeni le jídaanbei luágu Wabúreme Jesúsu, lúma luágu ínsiñejabuni le juágubei joun sun ja lánigubaña Búngiu,

¹⁶ másuti neteíngiruni Búngiu juágu dan le narítagun juágu lídan nayúmuragun lun.

¹⁷ Amúriajatina lúma Lubúngiute Wabúreme Jesucrístu, Úguchili Weíríguti, lun líchugun subúdi íñugiñeti jun lun gunfaráanda jumáni le lasúbudiragüdübei jun, lun gíñe jasúbudirunitima Búngiu buídu.

18 Amúriajatina lúma Búngiu lun larúgoungadagüdüni jisáminan lun jasúbudiruni ca lan uágubei lagúara jun lun jeménigidún luágu, lúma lun jasúbudiruni ída líña lan luweírigun lúma lirísín alágan le líchugubei Búngiu joun lánigu.

19 Amúriajatina gíñe lúma lun lasúbudiragüdüni jun ída líña lan luweírin lubáfu le mébejabei le ñadágimeinbei wádan, wagía le afíñebei luágu.

20 Ubáfu le, ligía méme le larúfudubei Búngiu láu sarágu érei dan le lásaaragüdünbalin Crístu lídaangiñe ouweni, ába lañúuragüdüni lueígiñe loúnwenren yágüta siélu.

21 Rúlumuti lougiñe sun gumádi, ubáfu, érei lúma arúejani lé buri siélubei, lúma lougiñe sun le gayáraabei lirimún, dándu lídan dan le queísi lídan le lúnbei liábin.

22 Rúlumuti sun cátei lábun lubáfu Crístu, rúlei gíñe Crístu guánarügü lun ligíaba lan ichügüdünaü joun sun gürígia ja lánigubaña, ja gíribaña lilígilisin.

23 Gürígia jagía, ja méme lúgububaña Crístu, buin jáña láu libágari Crístu (láu lubáfu lání Espíritu), áni Crístu guánarügü adügübalin sun catei áni ágüdaalejí.

2

Sálbaadiwa láu lareíni Búngiu

1 Rújali Búngiu ibágari magúmchaditi jun úara lúma Crístu le lásaaragüdübei lídaangiñe ouweni, láu sún meja jiláñugidún lan lun cátei le luáguti Búngiu, lurúma wuríbani lúma figou buri le gádaanbalún.

2 Lídan meja dan ligía, falá jumuti lání ubou le jémpulu, adügei lugúndan Máfia, le agúmadirubaliña espíritugu garábalirugu, le ñadágimeinbei jádaangiñe ja magáambadibaña lun Búngiu.

3 Ítara líña meja gíñe wabágaridun, sun wagía, luágu ában dan, afálarei wayúmajan, agúnfulira lúma lugúndan wagáburi lúma lugúndan wasáminan, queísi gürígia garaüwarügütiña. Ligía lúnti lubei yebe láburuan lanárime ligáñi Búngiu wawágun queísi ja jíbiri.

4 Weíriri lugúdemejabu Búngiu,

5 ába larúfuduni luweírin línsiñejabu woun láu sún meja jiláñugidiwa lan lun cátei le luáguti Búngiu lurúma wafígoun. Ába ladáraruni lubéneri ibágari magúmchaditi woun láu lásaaragüdüni Crístu lídaangiñe ouweni. Sálbatiwa lubeiti láu lareíni Búngiu.

6 Sarágüda lumútiwa gíñe Búngiu lídaangiñe ouweni lánina figou láu lásaaragüdüni Crístu lídaangiñe ouweni, ába líchuguni wabára woun lúma Crístu yágüta siélu, lúma uweíriguni lánina ubáraü ligía.

7 Ladügünbalin líra lun larúfuduni luweírin wínsiñe lun lúma lareíni woun lídan Crístu Jesúsu lídounme dan le lúnbei liábin.

8 Sálbawádiwa luágu lareíni Búngiu, luágu wafíñen luágu. Mára jamúga ában cátei le wagía guánarügübei adügübalin, Búngiu íchugubalin wasálbarun woun.

9 Mára lídaangiñeti cátei le jamúga ladüga mútu, lun úa lan ni ában apántajati lueígiñe.

10 Lugúndun Búngiu adügüwaliwa, iséri gürígia wagía lídan Crístu Jesúsu lun wadügün cátei buíti, quei larítaguni lúmagiñe binárü.

Waráandarun lúma Búngiu lídaangiñe Crístu

11 Jarítagua jumá lubeiti luágu ída jíña lán meja furúmiñe. Mára meja lídaangiñetün jarásan juríu, ligía lébubei gürígia ja juríu, ja erésibirubalin circuncisión, ába jagúarunün, “gürígia ja merésibirubalin circuncisión”, o gürígia ja mámabaña lánigu Búngiu.

¹² Lídán meja dan ligía, ibídiñegili meja Crístu jun, mámagidün meja lílana linásiñun Israél, ja lumútuniñabaña Búngiu, boúgudiñadün meja lueí lidáradun Búngiu joun lánigu lúma sun le lúnbei líchuguni joun lábugiñe darádu ligía. Jabágariduñá meja ubouágu meménigiga, ibídiñega Búngiu le inárütibei jun.

¹³ Ánjeinti guetó, quei lídaañadün lan ában lúma Crístu Jesúsu, jugúya meja le dísebei lueí Búngiu, guetó yaráfaadün lun, láu loúnwen Crístu.

¹⁴ Barü laadiwa Crístu lídoun aráandaruni, ladüga adüga láaña juríu jáma ja mámbaña juríu lun ában méme jamá mútu, güríngua lumúti gáganiguaü lé meja afánreinragubaliña.

¹⁵ Gumúguagüda lumúti cátei le lilúrudun Moisés láu sún buri gumádi lánina lúrudu ligía láu loúnwen, adügeina láña juríu jáma ja mámbaña juríu lun ában mémebaña lan lídan. Ítara líña ladügüni aráandaruni wádaangua.

¹⁶ Láu loúnwen Crístu luágu gurúwa, ába lagúmuchaguagüdüni wuríbu lé meja jádaanbei juríu jáma ja mámbaña juríu, ába laráandaragüdüniña biángubei lúma Búngiu, adügeina láña biángubei lun ábanrügü lan mútu—lumútuniña Búngiu jagía.

¹⁷ Ñübinti Crístu, ába lapúrichijani ugánu buíti luáguti aráandaruni lúma Búngiu joun sun gürígia, dándu jun, jugúya le mámbabei juríu já meja dísebaña lueí Búngiu, quei woun, wagía juríu já meja yaráfabaña lun Búngiu.

¹⁸ Lídaangiñe Crístu, sun wagía, juríu máma juríu, gayáraati wayárafadun lun Búngiu láu lubáfu ában méme Espíritu, le Sífiri Sándu.

¹⁹ Ligía mámaadün lubeí teréncha lun larúeijan Búngiu, lílanaadün larúeijan quei sun ja lánigubaña. Lufámiliangu Búngiu jugúya.

²⁰ Sun wagía afíñetiña, dándu juríu quei máma juríu, ítara wáña quei ában ligílisi to ligíbuaguboun wagábu le jábunubei apóstolugu jáma profétagu. Cátei lé buri jarúfudajabei, ligía wagábubei, Jesucrístu meme ligía dübü le weírigutimaabei lídan ébuu ligía.

²¹ Luágu ébuu ligía le Crístubei tiñúrawagua múna tugúya (wagía afíñetiña), aráanseñu sun tumégegün buídu darí lun tiábin lun ában tan ligílisi to derégewatu lun Crístu, to gíñe lídaantu ában lúma. Ítara wáña wagía le afíñebeí luágu Crístu.

²² Ítara líña lubeíti, jugúya gíñe le mámbabei juríu, lídaañadün ában lúma Crístu, oúndaraguatün jáma súngubei ja jíbiri lun wayábin sun wagía lun ítara wamá quei ában múna to ñí lubei lagánawa Búngiu láu láni Espíritu.

3

Luwádigimari Páblo lun lapúrichijan luágu Crístu joun ja mámbaña juríu

¹ Ligía lébubei nayúmragun, áu Páblo, lun Búngiu juágu. Daúwañu níña lueígiñe luwádigimari Crístu le adüga náalibei jagánagua, jugúya le mámbabei juríu.

² Mósu subúdi jumáli lan luágu rúlaali lan Búngiu wadágimanu le nun láu lareíni, luágu jáni fuleísei.

³ Queísi nabürüjan jun, adüga lumúti meja Búngiu ában aráansejani juágu, jugúya le mámbabei juríu, arámudaguati aráansejani ligía, ába lasúbudiragüdüni nun.

⁴ Láu jalíjani le nabürüjabei, jasúbudirubei luágu gunfaráanda náni laráansejan Búngiu luágu Crístu, lé meja ligíarügübei asúbudirei.

⁵ Masúbudirawagüdünti aráansejani ligía lun ni ában lídan meja dan le sügüjalibei, ánjeinti guetó, láu lubáfu Sífiri Sándu, arúfuda láali Búngiu joun láni apóstolugu jáma profétagu ja deréguabaña jóungua lun le gumúti.

⁶ Niján aráansejani ligía. Lídaangiñe ugánu le lánina asálbaruni, jerésibirubei ja mámabaña juríu alágan le méme lúnbei jerésibiruni juríu, áni líbirigu méme lúgubu Crístu, gafánraantiña gíñe lídan méme dimúrei le líchugubei Búngiu joun juríu luágu gayára lan weréderun richágu ligíbugiñe Búngiu lídaangiñe Jesucrístu.

⁷ Fuleísei láadina Búngiu láu líchugunina lun napúrichijani ugánu ligía láu lubáfu, laú sun madüna náni yebe fuleísei ligía.

⁸ Ünabutimaatina sügü láu le ünabutimaabei jádan lánigu Búngiu, láu sun líra, rúlaali ubáfu le nun lun napúrichijan joun ja mámabaña juríu luágu luweírín jarísín lídan Crístu le mébejabei.

⁹ Rúlaadina Búngiu, le adügübalin sun cátei, lun nafúraanguagüdüni joun sun gürígia ída líña lan lanügün aráansejani ligía lé meja arámudaguabei fulásu.

¹⁰ Arámudaguati meja aráansejani ligía lun guetó lan gayára lan jayábin sun láni Búngiu ánjeligu ja arúejabaña siélu lun jasúbudiruni lichú láu Búngiu lídan sun luwúyerigu jádaangiñe afíñetiña, ja lilígílisinbaña Crístu.

¹¹ Úraguati sun le lúma larítangun Búngiu le larítagubei lúmagiñe lubáragiñe lagúmeserun sun cátei, le lagúnfulirubei lídaangiñe Wabúreme Jesucrístu.

¹² Lídaangiñe Crístu, gayáraati wayárafadun lun Búngiu láu eménigini le líchugubei wafíñen luágu Jesucrístu woun.

¹³ Ligía nayúmuragunbei jun lun máburujan lan jarüna lueígiñe le nasúfurirubei juágu, lugúndun weírirügüti cátei líra jun.

Línsiñejabu Crístu

¹⁴ Ligía lubeíti lébubei nájuduragun ligíbugiñe Lúguchi Wabúreme Jesucrístu,

¹⁵ le Jáguchibeí sun lufámilian Búngiu ubouágu lúma siélu.

¹⁶ Amúriajatina lúma Búngiu lun líchugun érei lúma ubáfu jun según luweírín ubáfu le lúmabei, lun jídin jubáruaguóun láu Sífiri Sándu le jídaanbei.

¹⁷ Amúriajatina gíñe lúma lun jíchugun fulásu tídan janígi lun laganoún Crístu ñi, láu sun jafíñen luágu,

¹⁸ lun gíñe láu lan ában ínsiñeni weíríti, derégüdagü jídan, gayára lan gunfaráanda jumáni lítulen, limígífen, lujúlilin lúma líñun línsiñejabu Crístu buídu, jáma sun jíbiri afíñetiña.

¹⁹ Amúriajatina lubeíti lun jasúbudiruni ínsiñejabuni le, le weírítimaabei lueí sun le wayáraabei asúbudira, lun lúma jumá Búngiu le gumúti.

²⁰ Guetóti, iñurúalá líri Búngiu le gabáfubei lun ladügün gíbe sügü láu le wamúriajabei o le lan wasáminarubei, láu lubáfu le ñadágimeinbei wádan.

²¹ ¡Arijúalá luweírígün Búngiu lídaangiñe sun le ladügübei jádan lánigu lúma lídan Crístu Jesúsu luágu sun sígulu lúma sun dan! Ítaralá.

4

Lídaañadiwa ában láu lubáfu Sífiri Sándu

¹ Ladüga sun le adüga lálalibeí Búngiu jun, ligía namúriajabei júma, áu le adaürübei lueígiñe luwádigimari Crístu, lun jouéseragun júngua quei lúnti lan jadügüni ja únbaña wájali lan Búngiu lun lánigu jamá quei lagúarun jun.

² Ünabugu jumá, jínsiñejabu, gagúraasun jumá, areída jugúyame joun jíbiri.

³ Joucha jumá lun lídan jumá ában súnwandan láu lídejan Sífiri Sándu, eíbuga jumá lídan darángilaü júmagua, ítara lúba lídaanbadün lan ában súnwandan.

⁴ Lúnti wanáangun woúngua lídan ában, lúma jáma jíbiri lánigu Búngiu ladüga lumégegün lan ában méme úgubu le gíribeí lúgubu Crístu sun wagía, ligía méme Sífiri Sándu le lídaanbei cáda ában wádaangiñe, wájali Búngiu woun lun wabíjini ában meme eménigini luágu walágaante lídaangiñe.

⁵ Ligía méme Abúremein Wabúreme súngebei, ligía méme wafíñen luágu Jesucrístu, badíseitiwa sun wagía lídan líri Abúremein ligía.

⁶ Ában rügüñein Búngiu Jáguchi súngebei, jóúgiñeñein súngebei, ñadágimeinti jáu súngebei, áni níjein jádan súngebei.

⁷ Rújali Crístu sarágu luwúyeri ubáfu joun lánigu, rúlaali ubáfu le labúseerubei líchugun lun cáda ában wádaangiñe, woun.

⁸ Ligía laríñawagunbei tídan Lerérun Búngiu luágu Crístu. Múdeiti siélun barüina láña adaürütiña lúmagua, ába buri líchugun ubáfu joun gürígia.

⁹ ¿Cáti míni lan “múdeiti”? Míni lan luágu rarí lan furúmiñe lídoun ubáraü buri le ünabutimáabei ubouágu.

¹⁰ Crístu le arárirubei lun ubouágun, ligía méme gíñe le amúdeirubei lídoun líñun-ágei siélu láu sun luweírigun lun labuínchagüdüni súngebei láu guánarügü.

¹¹ Ába líchugun ubáfu lun cáda ában jádaangiñe afíñetiña luágu. Añájein rúti joun lun apóstolugu jamá, jíbiri lun ladímurejan Búngiu jayúmulugugiñe, jíbiri lun jóudin apúrichijeí ugánu buíti lánina asálbaruni joun ja magáambun jamágilibei ugánu ligía, jíbiri lun jafádirijan lúma lun jarúfudajani Lerérun Búngiu.

¹² Ítara líña laráanseruniña lánigu lun gayáraabei lan jesériwiduni buídu,

¹³ lun jedérebudagüdüniña jíbirigu lídan Crístu daríme wachülürün sun wagía lun lídan wamá ában lídan wafíñen luágu Jesucrístu, le Liraü Búngiu, lúma lídan lisúbudinwa. Ítara lúba gürígia wamá weínamujaña lídan weíbugun lúma Crístu, ítara lúba wagáburidun queísi lagáburidun Crístu.

¹⁴ Mítaraanjádiwame quei irájüñü lun ménreengun lan wasáansijan lun ladúurujaniwa ligárabalin furúmieguaügü iséri luwúyeri arúfudajani lun wáburujan lídoun jayéeni gürígia bíbutiña ja abúseerúbaña janügüniwa lídoun üma le maríchabei.

¹⁵ Lubáragiñe líra, wadímurejabei inárüni láu ínsiñeni lun wawáanserun lídan sun luwúyeri lídan ában lúma Crístu le ichügüdünaübei joun sun lánigu ja gíribaña lúgubu.

¹⁶ Sun wagía le lúgubu Crístu, úraguatiwa lídan ában lábugiñe lagúmadijan Crístu, cáda ában wádaangiñe gayáraati wíderaguniña ja wíbirigu. Ítara lúba gayára lan wawáanserun súngebei lídan weíbugun lúma Crístu, awáanse wagíame lídan ínsiñeni.

Iséri ibágari lídan Crístu

¹⁷ Niján lubeíti cátei le naríñagubei jun lídan líri Wabúreme. lun jebé lan jabágaridun quei ja ibídiñejabubaña lun Búngiu, ja abágaridubaña úragua lúma jasáminan le málabei.

¹⁸ Darúgu líña láu jasáminan, úati ibágari le ñübinbei lúmagiñe Búngiu jádan lugúndun ibídiñeti ni cáta joun lurúma tidére janígi.

¹⁹ Féridi jamáali jabúsigari, derégeguaaña jóungua lun wuríbani, adügatiña sun luwúyeri iwíyei láu ugúndani.

²⁰ Ánjeinti jugúya, máma líña jafúnrendeirun lúmagiñe Crístu,

²¹ ladüga inárüni lan luágu agáamba jumá luágu Crístu, arúfudajoúati inárüni lé meja larúfudajabei, jun.

²² Ánjeinti luágu binádu ligáburi jabágaridun, arúfudajoúati jun lun jígiruni binádu meja jigáburi le mabuídunjalibei láu jagúnfulirun lúma luríban ayúmajani le gayéeraguadibei,

²³ arúfudajoúati jun lun iséri jumá lídan jáni espíritu lúma lídan jisáminan,

²⁴ lun iséri lan jigáburi, buíduñu, jarúmañu le gumúti queísi ligáburi Búngiu.

²⁵ Ligía jebé lubei jayéejan, adímureja jumeí inárüni jáma jíbiriugu lugúndun lánigu ában méme úgubu sun jugúya, le lúgubu Crístu.

²⁶ Moún lumuti jagáñidun le lánina afígoujani, moún lumuti gíñe jálüdün sarágu dan arítagua luágu cátei le agáñidagüdübalün—

²⁷ míchiga jumá lúgaaru lun Máfia ítara.

²⁸ Le jíwerubei, jebé líwerujan, luwádigimarida láu ában arúmani lun lagüriaragun lúngua, lun gíñe gayára lan líderaguniña ja gudémebaña.

²⁹ Madímureja jumá liwíye dimúrei, jarúmalá jadímurejan lun gayára lan jíderaguniña ja agáambubalün, ibíja jagíame abíniruni lídaangiñe jerérun.

³⁰ Majírudaguagüda jumeí Sífiri Sándu, lugúndun níjein Sífiri Sándu jídan lun jasúbudirúniwa queísi lánigu Búngiu daríme lachülürün wéyu lun jasálbarun le gumúti.

³¹ Ígira jumeí sun magúndani, sun iyéreejabuni, sun agúaraguní lánina igáñi, sun anábajani, lúma sun wuríbani.

³² Buídu jumá, gudémejabu jugúyame júmagua, ferúdunagua jumá júmagua ítara quei ferúduna lánün Búngiu lídan Crístu.

5

Ída lúba lan ligáburi jabágaridun lirájüñü Búngiu

¹ Quei lirájüñü jubeí Búngiu ja jínsiñetiña lun, jóucha jumá lun ítara lan jigáburi quei ligáburi.

² Jínsiñegua jumá júniwagua ítara quei wínsiñedun lun Crístu, ába ledéregeragun lúngua wawágu queísi ában mudún le adágarawagüdüti lun Búngiu. Ítara líña línsiñejabu Crístu woun queísi cupáli le buíti líjeme, le águdajoúbei lun Búngiu, resíbi lumúti láu ugúndani.

³ Quei lánigu jumá Búngiu, moún lumuti ni lun jadímurejan luágu salúfuri, ni ámu luwúyeri iwíyei, ni luweínamu águu.

⁴ Mawíyelá jiyúma, maríñagun jugúyame libídiouniga áu, ni dimúrei málati, ladüga mabuídunti buri cátei le. Lubáragiñe jadímurejan cátei líbeina líra, yúsu jumeí jiyúma lun jíchugun eteíngiruni lun Búngiu.

⁵ Subúdi jumúti luágu le lan agámariduti mamárieidunga, o ladügün lán buri cátei wíyeti, o labágaridun lídan luweínamu águu—le queísigubeirügübei lanügüni irísini lisándunme—siñáti gafánran lan lídan jarúeijan Crístu lúma Búngiu.

⁶ Mayéedagualaün ni ában láu lagübüri buri dimúrei, lugúndun ladüga buri cátei wuríbati le, láburuja lanárima ligáñi Búngiu jawágun ja magáambadibaña lun.

⁷ Dírei jumá jaweí jíbe güriía jára.

⁸ Lídaañadün meja lubúriga, ánjein guetó, quei lídaañadün lan ában lúma Wabúreme, lídaañadün larúgounga. Ítara líña lubeíti agáburida jumá queísi güriía ja eíbugubaña lídan larúgounga.

⁹ Güriía jagía, areídatiña, surúti jabágarí, jínsiñeti inárüni joun.

¹⁰ Jóucha jumá jafúnrendeiruni ca lan jínsiñebei lun Wabúreme.

¹¹ Mádanlaün buri cátei málati le jadügübei ja lánigubaña lubúriga, sagárügü jumeí lídoun larúgounga láu lubuídun jigáburi.

¹² Rúti busíganu íbini lun ladímurejoúniwa luágu buri cátei le jadügübei arámudaguarügü,

¹³ dan le larúfuduni larúgounga luágu wuríba lan jagáburi, ába jasúbudiruni luágu inárüni lan, gayáraati jayábin ja lídaañadün lubúriga lun lídoun larúgounga.

¹⁴ Ligía laríñawagúnbei.

Agáguduabá, bugúya le arúmugubei,
sarába jádaangiñe jiláaña,
ábame larúgoungadágüdün Crístu báu.

¹⁵ Toúnigi jumá lubeíti buídu ída líña lan jóuserun. Mabágarida jumá quei ibídiougu táu, jabágarida quei chu táu.

¹⁶ Yúsu jumeí jidáani lídan cátei buíti, lugúndun níjein sarágu wuríbani lídoun buri dan le.

¹⁷ Ligía mabídiouniga lubeí jáu, jóúcha jumá gunfaráanda jumáni ca lan lugúndaanbei Wabúreme.

¹⁸ Mabácharuada jumá, lugúndun barü lumútiña líra gürígia lídoun féridi, lubáragiñe líra, buínjuma láu Sífiri Sándu.

¹⁹ Adímureja jumá júmagua luágu luweírigun Búngiu, erémuja jumá luágu, jerémuja táu sun janígi lun Wabúreme.

²⁰ Rújuma eteíngiruni lun Búngiu Úguchili súnwandan luágu sun cátei lídan líri Wabúreme Jesucrístu.

Igáburi le lúnbei wagáburiduni jáma ja wábiñebaña

²¹ Derégegua jumá júniwagua, ítara lúba jarúfuduni linében Crístu jun.

²² Lúnti derégeguñu tan würi túngua lun túmari quei lun Wabúreme Jesucrístu,

²³ lugúndun wügüri tichügüdinabei lúmari ítara quei Crístu lan tichügüdinabei lilígilisin. Crístu giñe Jasálbaragülebei gürígia ja gíribaña lilígilisin, ja méme giñe gíribaña lúgubu Crístu.

²⁴ Ítara quei jagáambadi afíñetiña lun Crístu, ítara líña giñe lúnti lan gagáambadi jamá würiña joun jámarigu lídan sun cátei.

²⁵ Jínsiñetá lúmari wügüri lun quei luweírin wínsiñe lun Crístu, wagía le lilígilisin, ába líchuguni libágarí wawágu.

²⁶ Ladügünbalin líra lun larúmadagüdüniwa lídaangiñe le binádubei láu wabásterun lúma giñe láu lerérun,

²⁷ lun larúfuduniwa ligíbugiñe queísi ában würi to ayárafaduboun lun túmari —buídumeraütü, jarúmañu, aráanseñu, ni cáta mégeiti tuágu, ában würi derégüdaguatü, úraguatü.

²⁸ Ítara líña lúnti lan tínsiñedun lúmari wügüri lun quei línsiñe lúgubu guánarügü lun. Le jínsiñejabuti tun lúmari jínsiñeguati lúngua ladüga ábanjali lan láu jágubu.

²⁹ Úati gürígia mebéresenti láu lúgubu guánarügü, jóügüdarügü lumúti, toúnigileí. Ítara líña giñe ladüga Crístu tun lilígilisin,

³⁰ ladüga lúgubu tan, áni wagía líbiri úgubu ligía, ábanjadiwa lúma.

³¹ Laríñajare tídan Lerérun Búngiu. “Ligía lígirubei lubeí wügüri lúguchi túma lúguchu lun lamárieidun túma lúmari, ábame jayábin jagía biángubei lun camá jamá ábanrügü.”

³² Níjein ában oúnwenbun inárüni arámudaguati lídan dimúrei ligía. Aríñagatina luágu luáguti lan lúaradagun Crístu jáma lánigu ja gíribaña lilígilisin.

³³ Laríñaguña giñe dimúrei ligía luágu cáda lan ában jádaangiñe lúnti lan jínsiñe tan lúmari lun quei línsiñegua lúngua, lun giñe inébe lan túmari würi tun.

6

¹ Isáanigu, le lúnbei jadügüni queísi afíñetiña lun gagáambadi jumá joun jagübürigu, lugúndun ligía richábei.

² Niján ában gumádi weíríti lídaangiñe ligúmadin Búngiu le anügübei buíti woun láu wagúnfuliruni. “Inébelá bóguchi túma bóguchu bun lun buídu lan dan bun,

³ gabágari amürüme migífe ya ubouágu.”

⁴ Jugúya agübürigu, magáñidagüda jumáña jisáanigu, agüriajarügü jumáña buídu lun gagáambadi jamá, arúfudajeina joun lun jafiñerun luágu Wabúreme.

⁵ Músu, gagáambadi jumá joun jiyúbudirigu ya ubouágu láu inébesei, láu anúfudei, lueí ñi lan mégeiti lídan jesériwidun joun. Juwádigimarida buídu láu sun tarúman janígi camá jamuga lun Crístu jesériwida.

⁶ Seríwi jumáña buídu, mámarügü dan le aríagu jáña lan jun lun jeréderun buídu jáma, seríwi jumáña buídu súnwandan quei esériwidutiña lun Crístu, adügeina lugúndan Búngiu táu sun janígi.

⁷ Adüga jumei juwádigimari láu ugúndani, camá jamuga lun Wabúreme jadügei máma joun gürígia,

⁸ ladüga subúdi jumáli luágu cáda lan ában jídaangiñe, dándu idámuni quei máma idámuni, lafáyeirubei Wabúreme según buíti le ladügübei.

⁹ Jugúya iyúbudirigu, buídulá gíñe jóuseruniña jumúsuniña, masíadira jumáña. Jarítagua jumá luágu dándu lan jugúya quei jagía, lábugiñeñadün lagúmadijan Wabúreme le siélubei, áni ában lan láu lanügüniña Búngiu sun gürígia.

Cátei lé buri áubei wageíndagua lúma Máfia

¹⁰ Guetóti nidújeñu, jére jumá lídaañu ában lúma Wabúreme, láu lére le gabáfubei.

¹¹ Daüjumoun sun daüguaü to líchuguboun Búngiu joun sun lánigu lun derégüdagü jumá lueí leyéedagunün Máfia.

¹² Lugúndun máma jáma gürígia ja láutiña ügürügü lúma ábuu wageíndagua, jáma buri espíritugu gabáfutiña ja lánina wuríbani yágüta íñu lúma jáma espíritugu ja gáambaña gumádi, lúrudu lúma érei luágu buri cátei lánina lubúriga lídan ubou le wageíndagua.

¹³ Ligía ragüjumoun lubei sun daüguaü to líchuguboun Búngiu jun lun gayára lan jawánduni wuríbani lídan wéyu le jabúseerubei espíritugu jagía jageíndagun júma, áni lárigiñeme jawánduni, ábame jeréderun derégüdagü.

¹⁴ Derégüdagü jumá lubeíti, daügu táu láni Búngiu daüguaü queisi ában lisúdaaran. Daügua jumá láu inárüni queisi láu ában béliti le gürágu umúti buídu luágu jiránaagua, areidúañu láu ísuruni quei láu cátei le adáuragubei láu laníguagu súdaara.

¹⁵ Aráanseñu jumá lun japúrichijani ugánu luágu Wasálbaragüle, le íchuguti darángilaü, queisi laráanserun súdaara dan le ladáürunun lisábadun.

¹⁶ Lougiñe sun cátei, barüjumei jafiñen quei lárügüdüni súdaara cátei láuti gürábu ligíbugiñe, lun jaráramunun sun gimára durúnguatü to lachüüjaboun Máfia juágun.

¹⁷ Barüjumei jeménigidun luágu jasálbarun quei ladáüruni súdaara lubúnidin lun latóunigiruni lábulugu, barü jumeime Lerérun Búngiu quei efeín to líchuguboun Sífiri Sándu jun.

¹⁸ Adüga jumei sun le láu sarágu ayúmuraguni lun Búngiu lun líderagunün, ayúmuragua jumá lun Búngiu súnwandan láu lubáfu Sífiri Sándu. Agágudúañu jumá, máburujalá jarúna, ayúmuragua jumá jawágu sun ja lánigubaña Búngiu.

¹⁹ Ayúmuragua jumá gíñe nuágu lun líchugun Búngiu dimúrei nun dan le nadímurejan, lun gíñe nadímurejan láu manúfudei lun nasúbudiragüdüni ugánu luagu gayára lan gíñe jasálbarun ja mámbaña juríu queisi ja juríubaña.

²⁰ Oúnaja láadina Búngiu lun napúrichijani ugánu le, le ueígiñebei nadaürűwa guetó. Ayúmuragua jumá lun napúrichijani ugánu le láu manúfudei, queísi lubúdubu.

Lagúmujoún buri mábugaü

²¹ Tíquico, wadúje jínsiñeti woun, le íderagubaliwa buídu lídan luwádigimari Wabúreme, ligíaba íchiga ugánu jun nuágu lúma luágu le nadügübei.

²² Ligía noúnajaanbalin jun lun laríñaguni jun ída wáña lan, lun líchugun gurásu jun.

²³ Rúlá Búngiu Úguchili lúma Wabúreme Jesucrístu darángilaü lúma ínsiñeni láu afiñeni jun, wadújeñu lueígiñe Jesucrístu,

²⁴ biní láñame Búngiu sun ja jínsiñejabúbaña lun Wabúreme Jesucrístu láu ában ínsiñeni le masáansiraguati. Ítaralá.

LIGÁRADAN PÁBLO JOUN FILÍPOSNA

Labürüjan Páblo furísunrugugiñe joun títana ligílisi to Filíposboun

¹ Anája áu Páblo lúma Timotéo, esériwidutiña wagía lun Jesucrístu, wabürüjañoun gárada to jun, sun jugúya fádirigu jáma esériwidutiña ligíliserigu ja ubúrugubaña Filípos, jáma jíbiri lánigu Búngiu ja lídaañabaña giñe ában lúma Crístu Jesúsu.

² Binílaün Wáguchi Búngiu lúma Wabúreme Jesucrístu, ibíja jumá giñe darángilaü jámagiñe.

Layúmuragun Páblo jawágu afiñetiña

³ Ságü narítangun juágu neteíngiruni Nubúngiute.

⁴ Súnwandan nayúmuragun lun Búngiu juágu láu ugúndani,

⁵ Láu narítangun luágu luweírin jíderangunina abúruchaguagüdei ugánu le lánina asálbaruni lúmagiñe wéyu le jagáambubalin chülü lúmoun wéyu le ugúñebai.

⁶ Choúru numúti luágu Búngiu lan le agúmeserubei adügei lubuídun luwádigimari jídan, lasígira mémeba lan adügei daríme wéyu le liábingüle Jesucrístu.

⁷ Richáti lun narítangun juágu ítara lugúndun weíriri jínsiñe nun, lugúndun giñe gafánran jumá lídan abíniruni le nánibei dan le furísunrugunadina lan luágu nesériwidun lun Crístu, o dan lan le naráramun ligíbugiñe lúru du lun nadímurejan lueígiñe loúbadina ugánu le lánina asálbaruni lun nachoúruruni joun luágu inárüni lan.

⁸ Subúdi lumúti Búngiu luágu weíri lan nálugun juágu lugúndun jínsiñetün nun queísigubeirügü jínsiñe jumá lun Jesucrístu.

⁹ Amúriajatina lídan nayúmuragun lun Búngiu juágu lúntima laweíridun jínsiñejabu láu sarágu subúdi lúma gunfaráandaü lídan sun cátei,

¹⁰ lun gayára lan janúadajani cátei le buídubei súnwandan. Ítara lúba jabágaridun ában ibágari jarúmati, madúnrun jumámuga dánme liábin Crístu.

¹¹ Amúriajatina lúma Búngiu lun buin jumá láu lubuídun igáburi, láu lubáfu Jesucrístu le jídaanbei, lun líchugúniwa uweíriguni lun Búngiu luágu.

Crístu ibágaribei nun

¹² Nidújeñu, buséntina jasúbudiruni luágu cátei lán buri le suséreelibein nun, ñübinjali lídan linárün lun líderagun lídan lapúrichijoún ugánu le lánina asálbaruni.

¹³ Subúdi jamúti lubeíti sun tisúdaraana lúban urúei jáma sun ja jíbiri luágu nadaürüña lan lueígiñe nesériwidun lun Crístu.

¹⁴ Játi jíbiri idújeñu, láu jaríjin luágu nadaürüña lan lueígiñe napúrichijani ugánu luágu Crístu, ragújaña anígi lun japúrichijani méme ugánu ligía manúfudeiga, láutima afiñeni luágu Crístu.

¹⁵ Inárüni luágu añájein lan adímurejatiña luágu Crístu ladüga jagímugan, busén jagía janügüniña gürígia jánigume. Ánjaña jíbiri, japúrichijan luágu Crístu láu lubuídun arítangun.

¹⁶ Gürígia jagía, luágu ínsiñejabuni japúrichija, lugúndun subúdi jamáni luágu lueígiñe lan nadímurejani ugánu le lánina asálbaruni nadaürüña lan.

¹⁷ Ánjaña ja jíbiri, máma láu janárün japúrichija, lun jarijiniwa weírigu jadügei, lúma lun jíchugun líbe samínaü nun guetó le nadaürüña lan.

¹⁸ Wel, úati cátei luágu líra, lídan sun luwúyeri, láu yebe janárün o máma lan láu, luágu Crístu jadímureja, áni gundaatina luágu líra.

Áni nagúndaarúba gíñe,

¹⁹ lugúndun subúdi numúti luágu buídubei lan nasárirun lídan sun cátei le, ladüga jayúmuragun lun Búngiu nuágu lúma ladüga líderagunina láni Jesucristu Espíritu.

²⁰ Cátei le nabúseerúbei lúma le nagúrabubei, lun madügün nan ni cáta lun jamúga nanügün busíganu luágu, gayáaraarügü lámuga nadímurejan manúfudeiga, arijúa mémetima lámuga luweírigun Crístu nuágu guetó quei súnwandan, wínwañu áu yebe, jiláñu áu yebe.

²¹ Lugúndun ánjana abágarida méme, lúnba Crístu nabágarida, ánjana ouwe, buítimaabei nun lugúndun lúmounbadina Crístu.

²² Ánjein gayára lubei nasígirun ñadágimein luágu láni nabúreme Crístu fuleísei láu nasígirun abágarida, ibidiñeti nun ca lan buítimaabei, ánjein lun lubei nasígirun wínwañu ódi lun noúnwen.

²³ Jénreenguti nun lun nanúadajan lídan bián cátei le. lídan ában oúbaü, buséntina jamúga noúnwen lun nídin erédera lúma Crístu, lugúndun buítimaati jamúga líra nun,

²⁴ lídan le ában oúbaü, buítimaati jun lun nasígirun abágarida.

²⁵ Áni quei chouuru náni cátei le, subúdi numúti luágu nerédera mémeba lan júma lun níderagunün lun jasígirun jubáruaguóún, lun gíñe jagúndaaruntima lídan jafiñen.

²⁶ Ítara lúba jiñúragüdüni líri Crístu Jesúsu luágu lagíribudagüdünina júmoun.

²⁷ Joucha jumá lun úragua lan ligáburu jabágaridun lúma larúfudajan Crístu. Ítara lúba, ánjana ñüdüñ aríjaün o ánjein díseñu níña lubei juei lun agáambarügü nan juágu, gayára lámuga nasúbudiruni luágu derégüdagu meme jíña lan áni lídaañadün lan gíñe ában, áfaagua súnqubei lídan ában lun labúrchagun afiñeni luágu Jesucristu queísi Wasálbaragüle,

²⁸ mígiraguagüdünga júngua lun janúfudedagun jaweí jáganiñu. Ladüga jáganiñu lan gürígia jagía, arúfuda lumúti líra furáangu luágu joudíña lan lídoun gürínguaü, arúfuda lumúti gíñe jasálbarun jugúya le afiñebei, áni lúmagiñe Búngiu liábin cátei le.

²⁹ Ladüga Crístu, gayáraati mámarügü lun jafiñerun luágu, gayáraati gíñe jasúfurirun lueígiñe.

³⁰ Jugúya núma, lídaañadiwa ában méme áfaaguni. Aríja jumáli meja ída líña lan náfaagun, guetó agáambatün luágu ída líña méme lan náfaagun.

2

Lünabugun Crístu lúma luweírigun

¹ ¿Sandítüñsan dügüdaguaü ladüga lídaañadün lan ában lúma Crístu? ¿Barütüñsan gurásu luágu línsiñejabu jun? ¿Eíbugatüñsan sun jugúya lúma Sífiri Sándu? ¿Subúdi jumútisan lugúdemejabu Crístu jun lúma lareídun? Afiñetina luágu ítara líña lan.

² Ligía lébubei namúriajan júma lun jaganoún lídan úarani lúma ínsiñejabuni júmawagua, lun ában lan jarítangun, ában lan gíñe jáfaagun luágu buri cátei le láni Crístu. Láu jabágaridun ítara, buin lúba nugúndan jáu.

³ Madüga jumá ni cáta juoúguarügü lun janügüniwa weíri, ni luágu pántaü, adüga jumei cátei láu ünabuguni. Buídulá janügüniña ámu gürígia juei guánarügü.

⁴ Mámarügülá cátei le buídubei jun jáluaja, áluaja jumei gíñe le buídubei joun ámu.

⁵ Ítaramemelá ligáburi jasáminarun queí meja ligáburi lasáminarun Crístu Jesúsu.

⁶ Láu sún meja Búngiu Irájü lan ligía, málugunti lárügüdüni lirícha quei Búngiu.

⁷ Lubáragiñe líra, ába lígiruni le lánibei, ába ladügün quei músu láu lagüriajóun quei wügüri.

⁸ Dánti le ítarajali quei wügüri, ába lünabudaguagüdüntima lúngua, áni ladüga lagáambadi, ába loúnwen luágu gurúwa láu sun nibúsigarídüna lan ouweni luágu gurúwa.

⁹ Ligía líchugunbalin Búngiu líñun-ágei uweíriguni lun lúma íri le weírigutimaabei lídaangiñe súngubei,

¹⁰ lun dan lan jagáambuni sun ja siélubaña, ja múarugunbaña, jáma ja lábugiñebaña múa líri Jesúsu, lun jájuduragun lun,

¹¹ lun gíñe jasúbudiruni súngubei, aríñaga jagíame luágu Jesucrístu lan Wabúremebei, lun líñurún líri Búngiu Úguchili.

Ítara jáña lánigu Crístu quei larúgounga uboúagu

¹² Ítara líña lubeíti nidújeñu jínsiñetiña nun, ítara quei agáamba jumánina súnwandan dan lé meja júmañadina lan, agáambatima jumána guetó dan le díse nan. Eíbuga meme jumá jubáruaguóun lídan lémeri Crístu láu únabuguni lúma inébesei lun Búngiu daríme jebélurun siélun.

¹³ Búngiu íchugubalin lubúidun ayúmajani jun lun jeíbugun lúma, íderagualaün lun jadügüni quei labúseeruni.

¹⁴ Adüga jumeí sun cátei láu ugúndani, masígenejaanga,

¹⁵ madárirúniwa lámuga dúru juágu, ni mégeiti, lirájüñü jumámuga Búngiu jarúmatiña jagánagua gürígia wuríbatiña, magáambaditiña lun Búngiu. Jugúya, jarúgoungadagüdatün jagánagua gürígia jagía quei warúguma lídan ában fulásu búrigati,

¹⁶ Íchigeina ugánu luáguti ibágari magúmuchaditi joun. Láu jigáburidun ítara, gúndaabadina juágu dánme le lachülürün wéyu le liábingüle Jesucrístu, láu nasúbudiruni luágu máma lan luágu ni cáta nuwádigimarida jagánagua.

¹⁷ Íbini lun lan níchuguni nibágari guánarügü lun loústarun jafíñen, le queísibei ában edéweejani buíti lun Búngiu, gúndaabadina úara júma luágu lubúidun wedéweejan lun Búngiu.

¹⁸ Lun jamúga lasúseredun ítara lun noúnwen luágu nesériwidun lun Crístu, lúnti gíñe jagúndaarun úara núma.

Timotéo lúma Epafrodító

¹⁹ Ánjein busén lubei Wabúreme Jesucrístu, noúnajabei Timotéo aríjaün madíse, lun gayáraabei lan nagúndaarun dánme le lagíribudun láu ugánu nun juágu.

²⁰ Úati ámu núma le asáminaruti quei áu, le áfaaguti lun buídu lan lídin jun,

²¹ súngubei jawoúgua rügüñein jarítagua, mebéreseguntiña láu le labúseerubei Crístu Jesúsu.

²² Ánjeinti Timotéo, subúditi ligáburi jun, ída líña lan lesériwidun núma lídan lapúrichijoún ugánu le lánina asálbaruni queísi ában isáani le íderaguti lúguchi.

²³ Agúrabatina lubeíti noúnajani aríjaün lárigiñeme nasúbudiruni ánjein náfuriduba lubeí furísunrugugiñe,

²⁴ láu sun afíñe nan luágu niján lan lugúndaanbei Búngiu, lun nídin aríjaün núngua madíse.

²⁵ Genége lumúti gíñe nun luágu lúnti lan noúnajani nibíri Epafrodító lárigoún júmoun. Quei jasúbudirun, ligía nouíbabei lídan luwádigimari Crístu lúma lídan áfaaguni, le jóúnajabei jugúya guánarügü nun lun leténirun lun le nemégeirubei.

²⁶ Weíriti labúseerun laríjinün áni gíbeti larítangun ladüga jagáambun luágu lasánderun.

²⁷ Inárüni luágu sándi lán meja, yaráfa lun loúnwen, ába gudémejabu lan Búngiu lun lúma nun lun mabíjin nan íruni lánwoun le núagubei, ába lareídaguagüdüni.

²⁸ Ligíatima nabúseerúnbei noúnajani lun jagúndaarun láu jaríjini.

²⁹ Resíbi jumeí láu sun ugúndani queísi idújei lueígiñe Wabúreme Jesucrístu, áni jínsiñe jagíame sun ja ítarabaña quei ligía jun súnwandan,

³⁰ quei chülü lubei yaráfa lun loúnwen ladüga lesériwidun lun Crístu. Derégeguati lúngua, mebérésegunga cába lan asúsereda lun, lun lesériwidun nun, cátei le jásiñerubei adüga lugúndun díseñu jíña lan nueí.

3

Üma le inárüti lun weréderun richágu ligíbugiñe Búngiu

¹ Lagúmujoún cátei, nidújeñu, gúnda jumá lídan Wabúreme. Mabúchati nuágu abürüjei le abürüja náalibei jun, lugúndun buíti jun.

² Cátei ligía, lun toúnigigua jumá júngua jaweí ja ítarabaña oúserun quei oúnli, ja adügübalin le wuríbabei, ja íbagubalin úgubu.

³ Ariñagatiña yéetiña jagía luágu lúnti lan jerésibiruni wügüríña circuncisión lun lánigu jamá Búngiu, iyéeni líra. Lírájüñü Búngiu le tímatimaati wagía le agúnfulirubei lúma láu lubáfu láni Espíritu le wádaanbei, wagía le gúndaabei láu lánigu wamá Crístu Jesúsu áni míchu wamúti weménigi luágu cátei bougudinti lueí lun wasálbarun.

⁴ Lun jamúga gayára lan wasálbarun luágu cátañañadiwa lan bougudin lueí Jesucrístu, garíchatina jamúga lun neménigidun luágu buri cátei ligía, úati jamúga ni ában garíchati nueí lun leménigidun luágu buri cátei ligía.

⁵ Wídü wéyu lueígiñe nagüriajoún, ligía nerésibiruni circuncisión lugúndun jarásan israelítagu áu, jádaangiñetina lufámilian Benjamín, hebréo áu lúmagiñe nagüriajoún, hebréogu gíñe nagübürigu. Fariséo meja áu lídan ligáburu gunfaráanda náni jalúrudun juríu,

⁶ janárimeti meja neméendün darí neíbaajaniña affíñetiña luágu Jesucrístu. Luáguti lísurun íbágaru según jalúrudun juríu, úati meja ni ában lun gayára lan laríñangun ni cáta nuágu.

⁷ Ánjeinti guetó, sún buri meja cátei le, lé meja weíritibei cátei nun, barü numuti quei ni cáta lun gayáraabei lan nasígiruni Crístu.

⁸ Sügü láu líra, sun cátei le gayáraabei jamúga níjein lan núma, rúnumuti quei ni cáta ligíbugiñe oúnwenbun agáñeiruni le luágubei nasúbudiruni Wabúreme Crístu Jesúsu. Féridi náali sún buri cátei le ladüga nasúbudiruni Crístu, áni barü numuti sun le quei ífei lun nagáñeiruni Crístu,

⁹ lun nadárirangun núngua lídan ában lúma. Guetó, gumúja náfaagun lun neréderun richágu ligíbugiñe Búngiu luágu lubuídun nagúnfulirun lúma lilúrudun, lugúndun barúlaadina Búngiu richágu ligíbugiñe láu nafíñerun luágu Jesúsu. Richáguau ligía ában cátei le lídaangiñeti affíñeni, máma adügüni.

¹⁰ Le nabúseerúbei, lun nasúbudiruni Crístu buídu buídu, lun nasánderuni lubáfu meme Búngiu le ásaaragüdübalin Jesúsu lídaangiñe oúweni nuóúgua, lúma lun nasúfurirun luágu queísi lasúfurirun nuágu,

11 lun ítara nan quei ligía lídan loúnwen láu eménigini luágu násaaruba lan lídaangiñe oúweni quei ligía.

Áfaaguni lun lachülürün lídoun lébeja

12 Máma naríñaguña luágu chülújadina lan lúmoun lébeja lídan sun cátei le, maríñaguntina gíñe luágu buídujali lan nigáburi lídan sun cátei, le nadügübei, nubáruaguouñadina méme lun ítarabadina lan queísi meja labúseerun Crístu lun ítarabadina lan dán meja le lasálbarúnbalina.

13 Nidújeñu, maríñaguntina luágu ibija náali lan sun cátei le, le nadügübei, nabúlieiduni sun le eréderubei árigi lun náfaagun lun nárügüdüni le nigíbugiñebei,

14 lun nachülürün lúmoun lébeja eíbaaguni ligíbuagu ubou le, lun nagáñiruni le lúnbei líchuguni Búngiu siélu joun sun ja lídaanbaña ában lúma Crístu Jesúsu.

15 Sun wagía le weínamujalibeí lídan wafíñen, lúnti wasáminarun ítara. Ánjaün asáminara lídan ámu luwúyeri lídan som cátei, larúfudubei gíñe Búngiu cátei le jun.

16 Luágu sun luwúyeri, lúnti wasáminarun lúma lun wabágaridun úaragua lúma cátei le furéndeí wamáalibeí.

17 Nidújeñu, amúriajatina júma lun ában lan jarítangun lun jafálaruni náni jémpulu, aríja jumáña gíñe ja abágaridubaña según jémpulu le wíchugubei jun.

18 Aríñaga náali jun sarágu weíyaasu áni naríñagayaali jun láu águiraü, luágu añájein lan sarágu ja aríñagatiña luágu afíñe jamá luágu Crístu, abágaridutiña queísi láganiñu Crístu le oúwebei lun larúmadagüdüníwa.

19 Lídaanme lagúmujoún dan, gürínguabei cátei joun—jasúfuriruba luágu jafígoun lun sun dan. Lé buri cátei le wámaabei joun, ligía jabúngiutebei, apántajatiña láu buri cátei le jamúga lúnbei nibúsigari jamá láu. Luágu rügüñein buri cátei ubouaguna jarítagua.

20 Ánjein wagía, siéluna wagía, áni wagúrabuña liábin Wabúreme Jesucrístu le Wasálbaragüle siélugiñe.

21 Lídaanme wéyu ligía, lasáansirubei wágubu le emégeirubei sarágu lun ítara lan quei lúgubu, le úabei lemégeirun. Áni ladügübei láu méme ubáfu le luágubei lun líchuguni sun cátei lábugiñe lagúmadijan.

4

Gúnda jumá súnwandan lídan Wabúreme

1 Ligíati nidújeñu jínsiñetiña nun, ítara méme jumá derégüdagu lúma Wabúreme.

Oúnwenbun nabúseerun naríjinün, jugúya nugúndanbei lúma nafáyeiruaja luágu nesériwidun lun Crístu.

2 Ayúmuraguatina tun Evódia túma Síntique lun jebélurun lídoun úarani queísi idújeñu lueígiñe Crístu.

3 Ánjein bun, nouba buíti lídan wadágimanu, amúriajatina búma lun bíderaguniña ítunu ja lun gamádagua jamá, lugúndun áfaaguatiña noubagiñe lídan lapúrichijoún ugánu le lánina asálbaruni, úara lúma Cleménte jáma buri jíbiri ja ñadágimeinbaña meja núma. Bürüwaali jíri sun jagía tídan lílburuna íbágarí magúmchaditi.

4 Gúnda jumá súnwandan ladüga lídaañadün ában lúma Wabúreme. Aríñagaya numúti. ¡Gúnda jumá!

5 Subúdiwa jumá quei gürígia areídatiña ladüga madíseeli liábin Crístu.

⁶ Magíbedalá jarítangun luágu ni cáta, aríñagarügü jumeí sun cátei lun Búngiu súnwandan dan le jayúmuragun lun, amúriaja jumá lúma, mabúlieidagunga lun jíchugun eteíngiruni lun.

⁷ Ábameti líchuguni Búngiu lidárangilan jun, darángilaü le, weíritimaabei lubáfu lun lagídarun jidíjeri sügü láu jubáfu lun jarítaguni cátei le lúnbei jadügüni, áni darángilaü ligía, loúnigiruboun janígi lúma sun jisáminan lueí idíjeri lídan le jeménigidun luágu Búngiu lídaangiñe Crístu Jesúsu.

Samína jumá luágu le buídubei

⁸ Lagúmujoún cátei nidújeñu, samína jumá luágu sun le inárütibei, sun le gadúnabei inébesei, sun le richábei, sun le jarúmabei, sun le gúndaawabei láu, sun le uágubei buídu lan ladímurejoúa. Samína jumá luágu sun le buídubei lúma sun le gadúnabei uweíriguni.

⁹ Falájumei sun le arúfuda náalibei jun lúma sun le resíbi jumáalibei númangiñe. Gúnfuli jumá láu le nariñagubei jun, áyeija jumeí nigáburi. Ábame júma lan Búngiu láu lidárangilan le líchugubei.

Jedéweejan Filíposna seínsu lun Páblo

¹⁰ Oúnwenbun nugúndan lídan Wabúreme luágu jarítaguayaadün lan nuágu. Maríñaguntina luágu bulíei jumáadina lán yebe, madárirügü jíñáalin ligáburi ída lúba lan líderagunina.

¹¹ Mabúseerúntina jamúga jarítangun luágu nadímurejañein lan lueígiñe nemégeirun, lugúndun furéndeijadina lun gúndaañu nan láu le númati,

¹² subúdi numúti labágaridúniwa lídan gudémeín, subúdineí gíñe gámawa lan gíbe. Furéndeijadina lawandúniwa furúmieguaügü igáburi, ilámaü yebe o quimúle, níjeín lan darí lun lígiragún o úa lan ni cáta.

¹³ Úati cátei jénrenguti nun ladüga lídaañadina ában lúma Crístu le íchugubei ubáfu nun.

¹⁴ Láu sun líra, buíti jadüga láu jíderagunina lídan lénreengúnga nun.

¹⁵ Queísi gíñe jasúbudiruni, jugúya Filíposna, lárigiñe meja napúrichijani ugánu le lánina asálbaruni jun, ába náfuridun Macedóniagiñe, jugúya rügüñadün tílana ligílisi oúnaja seínsu nun quei ateíngiragülei luágu nesériwidun jun.

¹⁶ Sun meja anájagua lan ubúругu Tesalónica, oúnajatün edéweejani nun, mámarügü ában weíyaasu, lun le nemégeirubei.

¹⁷ Máma jamúga nasáminarun lun gubeírügü nibíjin som cátei, le nabúseerúbei, lúntima lagánwoundun le lúnbei jibíjini lúmangiñe Búngiu.

¹⁸ Áu, resíbi náali súngubei lúma sügü láu lé yebe lúnbei nerésibiruni, láu le jóunajabei nun lúma Epafrodíto ígiraguaali núma. Le jóunajabei nun, ítara líña quei líjeme cupáli le águdajoúti lun Búngiu, ában edéweejani le lerésibirubei láu ugúndani.

¹⁹ Líchugubei lubeíti Nubúngiute sun le jemégeirubei jun queísi buri luweírigun lirísín, lídaangiñe Crístu Jesúsu.

²⁰ ¡Uweíriguni lun Wáguchi Búngiu lun sun dan!

Lagúmujoún buri mábugaü

²¹ Rújumei numábugaü lídan líri Jesucrístu joun sun ja lánigubaña Búngiu. Mábuga jáña wadújeñu lueígiñe Jesucrístu ja yábaña núma jun.

²² Sun ja yábaña Róma ja lánigu Búngiu, játima tílana lúban urúei, mábuga jáña gíñe jun.

²³ Binílaün Wabúreme Jesucrístu sun jugúya. Ítaralá.

LIGÁRADAN PÁBLO JOUN COLÓASASNA

Labürüjan Páblo joun títana ligílisi to Colósasboun

¹ Anája áu Páblo, le ában lání Jesucrístu apóstolu láu lugúndan Búngiu.

² Úara lúma Timotéo le wadúje lueígiñe Jesucrístu nabürüjañoun gárada to jun, jugúya le lánigu Búngiu ja gúnfulibaña lúma Crístu le uágubei jafiñera, ja ubúrugubaña Colósas. Binílaün Wáguchi Búngiu, ibíja jumá gíñe darángilaü lúmagiñe.

Layúmuragun Páblo jawágu afiñetiña lun Búngiu

³ Súnwandan weteíngiruni Búngiu, le Lúguchi Wabúreme Jesucrístu, dan le wayúmuragun lun juágu.

⁴ Agáambaadiwa luágu jafiñen luágu Crístu Jesúsu lúma luágu jínsiñejabu joun sun ja lánigubaña Búngiu,

⁵ ladüga eménigini le juágubei luágu le areidúañubei jubá siélu. Chülütün árügüdei eménigini le lárigiñe jagáambuni ugánu le inárütibe, ugánu le luáguti asálbaruni.

⁶ Ugánu méme le, lé meja apúrichijóubei jun, labúruchaguña lídan sun uboú, lasáansiraguña jagáburi gürígia ítara quei lasúseredun jídan lúmagiñe jagáambuni ladímurejóun luágu línsiñejabu Búngiu, ába jasúbudiruni luágu inárüti lan ínsiñejabuni le.

⁷ Ligía cátei le larúfudajabei Epáfras jun, le ñadágimeinjalibei wáma. Jínsiñeti woun, subúdi wamúti luágu gayára lán meja weménigidun luágu lun lesériwiduni Crístu buídu jagánagua wawéñegua.

⁸ Barüjali ugánu woun juágu lúma luágu jínsiñejabu le rúlaalíbei Búngiu jun.

⁹ Ligía lúmagiñe lubeí wéyu le wasúbudirunbalin cátei le, merédeti wayúmuragun lun Búngiu juágu, lúma wamúriajan lúma lun lasúbudiragüdüni lugúndan jun buídu, ru ligíame sun luwúyeri subúdi lúma gunfaráandaü jun luágu cátei le larúfudajabei lání Espíritu jun.

¹⁰ Ítara lúba gayára lan jagáburidun queisi lúnti lan jagáburidun lánigu Wabúreme, adúgei le áubei lagúndaara súnwandan, arúfudeina ában alúbajani le lánina sun luwúyeri cátei buíti, lun gíñe jasúbudirunitima Búngiu.

¹¹ Amúriajatiwa lúma lun léredagüdünn láu luweírín lubáfu lun gayára lan jawánduni sun cátei láu sarágu gurásu lúma ugúndani,

¹² lun gíñe jeteíngiruni Wáguchi Búngiu luágu aráanse láadiwa lan lun werésibiruni wafánran lídaangiñe le lúnbei líchuguni joun lánigu lídaanme larúeijan le lánina larúgouna.

¹³ Séfu lumútiwa Búngiu lídaangiñe lubáfu lubúriga, ába líchuguniwa lídoun larúeijan Liraü le jínsiñebe, lun,

¹⁴ le asálbarubaliwa láu loúnwen, chibálei wafígoun.

Aráandaruni lúma Búngiu láu loúnwen Crístu

¹⁵ Wáguchi Búngiu le siñábei jaríjini gürígia, ába liábin uboúagun lídan ában luwúyeri le gayáraati jaríjini gürígia lídan Liraü le Jesucrístu, le weírigitimaabei lídaangiñe sun cátei le níjeinbei.

¹⁶ Lídaangiñe Crístu ladúgei Búngiu sun cátei le siélurugubei lúma le uboúagubei, dándu buri cátei le marijínbei quei le arijúabei. Lídaangiñe Crístu ladúgei arúeijani, gumádi, lúrudu buri lúma buri ubáfu le jáni ánjeligu, áni lun gíñe Crístu ladügüwa.

¹⁷ Lubáragiñebei sun cátei, níjeinjali meja Crístu, áni láu lubáfu, níjein lubei sun cátei lídan lubára.

¹⁸ Loúgiñe sun líra, Crístu jachügüdinabei lánigu, ja gíribaña lúgubu, ja giñe gíribaña lilígilisin. Ligía le íchugubei ibágari lun úgubu ligía, ligía furúmiñebei ásaara lídaangiñe ouweni lun moúnwendügüyaali lan, lun ligía lan láu furúmiñeti ubáraü lídan sun cátei.

¹⁹ Ítara líña labúseeruni Búngiu lun níjeinbei lan sun le ligíabei lídan Crístu.

²⁰ Lídaangiñe Crístu, ába laráandaragüdüni Búngiu sun ubouú dayárugubei lúmagua, dándu buri cátei le ubouúagubei quei lé buri siélubei, ladügüni aráandaruni ligía láu loúnwen Crístu luágu gurúwa.

²¹ Jugúya, teréncha buri meja jugúya lun Búngiu, lágani buri meja Búngiu jugúya tídan janígi ladüga buri cátei wuríbati le jadügübei.

²² Ánjeinti guetó, aráandaragüda láadün Búngiu lúmagua láu loúnwen Crístu lun larúfudunün jarúmañu, madúrunga, queisi lánigu ligíbugiñe.

²³ Ítara méme lúba giñe ánjaün asígira derégüdagü lídan jafíñen, ragüñu buídu luágu Crístu, mígirunga jumei eménigini le juágubei le íchugubalin ugánu lánina asálbaruni le jagáambubei. Ligía ugánu le apúrichijoubei lídan sun ubouú, le giñe napúrichijabei, áu Páblo.

Rúlumuti Búngiu Páblo lun lesériwidun joun títana buri ligílisi

²⁴ Guetó gúndaatina láu le nasúfurirubei juágu, lugúndun láu igáburi le, gayáraati níderagun láu núgubu guánarügü lun loústaragüdüniwa le lúngilibei lasúfuriruni Crístu jawágu lánigu, jawágu lilígilisin ja lúgubu.

²⁵ Nübinjadina lun ábanbadina lan jádaangiñe ja esériwidubaña joun lánigu Crístu luágu wadágimanu le líchugubei Búngiu nun luágu jufúleisein, jugúya le mámabei juríu, lun napúrichijani ugánu le láni Búngiu jun quei lubúdubu.

²⁶ Ugánu ligía, cátei lé meja arámudañu lubei Búngiu lúmagiñe sarágu dan, áni guetó subúdigüda láali joun lánigu.

²⁷ Joun lánigu Búngiu labúseera lasúbudiragüdüni luweírin irisini le lídaanbei cátei arámudaguati le, le júnbei jugúya le mámabei juríu dándu joun ja juríubaña. Cátei arámudaguati ligía, luágu níjein lan Crístu jídan, juríu yebe, máma yebe juríu, áni ligía le ídaanbei jíchigei jeménigi luágu uweíriguni le lúnbei jibíjini siélu.

²⁸ Luágu Crístu wapúrichija, aríñagatiwa joun sun gürígia lun járügüdüni lémeri Crístu, arúfudaja wagía luágu, lun gunfaráanda jamá buídu buídu, faráragua jagía buídu lídan ában lúma Crístu.

²⁹ Ligía nuwádigimaridunbei, áfaagueina láu sun érei lúma ubáfu le líchugubei Crístu nun.

2

¹ Buséntina lubeíti lun jasúbudiruni luágu luweírin lidíjeri narítangun juágu, lúma jawágu afíñetiña ja Laodicéabaña, lúma jawágu sun jíbirigu afíñetiña ja maríjin jamáginabaña.

² Weíriti nayúmajan lun gagúraasun jumá tídan janígi, lun lídan jumá ában láu línsiñejabu Crístu juágu joun jíbirigu, lun gunfaráanda jumáni linárün Búngiu buídu buídu lun derégüdagü jumá lídan le uágubei jafíñera, gayára lámuga jasúbudiruni laráansejan Búngiu lé meja arámudaguabei, le luáguti Crístu guánarügü.

³ Lídaañein Crístu sun linárün Búngiu lúma ubáfu lun gunfaráanda wamáni sún buri inárüni le, le queísibeí ában oúnwenbun irisini woun.

⁴ Naríñaguñein buri cátei le jun lun mayéedun lánün ni ában láu buri dimúrei buíduburiti.

⁵ Láu sun úa nan jigíbugiñe lun gayára lan jamúga jaríjinina, anájein júma lídan espíritu, áni gúndaatina láu naríjini luágu lídaañein lan dan sun cátei jurúma áni derégüdagu jíña lídan jafiñen luágu Crístu.

⁶ Ligía, ítara queísi jerésibiruni Wabúreme Jesucrístu láu sun jafiñen luágu, lúnti ítara lan jabágaridun lídan ában lúma,

⁷ lun ragüñu lan jibágari luágu lídan le jídin jubáruaguoun lúma, derégüdagu lídan jafiñen ítara queísi larúfudajoúniwa jun, láu eteíngiruni lun Búngiu súnwandan.

Iséri ibágari lídan Crístu

⁸ Toúnigi jumá, mígiraguagüda jumá júngua joun ja busénbaña jayéejan láu buri arúfudajani málati. Mára lúmagiñeti Crístu cátei le jarúfudajabei, lúmagiñeti jagáburi binádu mútu lúma buri ligáburi jarítangun gürígia lánina ubou le luágu cátei.

⁹ Níjein sun le Búngiubei lídan Crístu,

¹⁰ áni jugúya, buin jíña láu Búngiu lugúndun lídaañadün ában lúma Crístu. Jéreti Crístu lueí sun lúrudu lúma ubáfu le ubouagubei lúma le siélubei.

¹¹ Láu giñe lídaañadün lan ában lúma Crístu, queísigubeirügü resíbi jumáli lan circuncisión lé meja jerésibirubei binádu juríu lun jarúfuduni luágu lánigu jamá Búngiu. Circuncisión le jibíjubei, máma le adügübei láu bíti luágu úgubu, jáni circuncisión, láu jasálbarun lídaangiñe figou le áubei jiábin ubouangun. Niján luwúyeribeí ladügüniwa Crístu lun lánigu wamá Búngiu.

¹² Láu jabásterún, arúfuda jumúti luágu bunáwa jumá lúma Crístu lun ibágari le binádubei, sarátün giñe lúma lun ibágari le iséribei ladüga jafiñerun luágu lubáfu Búngiu le ásaaragüdübalin lídaangiñe ouweni.

¹³ Luágu meja ában dan, jiláñu jíña meja lun cátei lánina Búngiu ladüga jifigoun, ladüga giñe jabágariduña lan queísi gürígia bouguditiña lueí lilúrudun Búngiu, agúnfulireina lúma sun luríban layúmajan júra. Ánjeinti guetó, rújali Búngiu iséri ibágari jun úara lúma Crístu.

¹⁴ Láu loúnwen Crístu, ferúduna láali Búngiu sun wafígoun, ába lagúmuchaguagüdüni Búngiu lilúrudun Moisés lúma buri sun gumádi le lánina lúrudu ligía le áubei mabáfu wamá lun wagúnfulirun, queígubeirügü jamúga dágua láni Búngiu lúrudu ligía luágu lugúruwan Crístu.

¹⁵ Dan le loúnwenbei Crístu luágu gurúwa, gáñei lumúti Máfia lúma buri líbiri ubáfu wuríbatí, ába lúnabudagüdüniña ligíbugiñe guríriguaü, ába lanügüniña quei adaürütiña lun.

Áluaja jumeí buri cátei le lánina siélu

¹⁶ Úa la ni ában añáwarijati jarítangun luágu buri arúfudajani lánina cátei le lúnbei jeígini o le lan lúnbei játuni lun jagúnfulirun lúma Búngiu, o luágu lán buri fédu le jarítaguagüle luágu iséri irúmu, lúma iséri játi, o luágu lan wéyu le eméraaguagüleí.

¹⁷ Sún buri cátei le, lúntirügü lagúnfulirúniwa lúma darí meja liábin Crístu ubouangun, liyáwa rügüñein le lúnbei liábin, Crístu ligía linárünbei.

¹⁸ Mígiraguagüda jumá júngua joun ja afámurubaña quei ünabugutiña, ja ájuduragubaña joun ánjeligu, lun janügüni jagáñirun jueí. Weíríti jadímurejan luágu nege buri cátei le ayáwadaguti joun, ába buri janáangun jóungua luágu ligáburi jasáminan, le jáni gürígia.

¹⁹ Márañanu lídan ában lúma Crístu, le ichügüdünaü joun sun lánigu ja gíribaña lúgubu, le ágüdadjabalin úgubu ligía, le awáanseragüdübadiwa lídan cátei le lánina Búngiu, ru ligía ubáfu woun lun gayáraabei lan lídan wamá ában queísi labúseeruni Búngiu.

²⁰ Jugúya, ígira jumáli binádu jigáburu, queísi lídaanjadün lan ában lúma Crístu, gidáadün lídaangiñe ligáburu jarítangun güriña luágu buri cátei. ¿Cáti uágu jabágaridunbei camá jamuga lánigugidün ubou,

²¹ Íchaagua júngua lun ligáburu ubou lun jagúnfulirun lúma Búngiu queí buri jamúga lúrudu le aríñagubei. “Magúurabeí le, meígabeí líra, márügüdebeí cátei ligía”?

²² Sún buri gumádi le, luáguti buri cátei le gagúmuchaditi láu layúsurún, áni máma ámu cátei lueí gumádi buri lúma arúfudajani le jáni güriña.

²³ Inárüni luágu gayára lan genége láni buri cátei lánina subúdi lugúndun labúseerúniwa agúnfuliruni lúma ünabuni lun lagúnfulirúniwa láu, áni deréti líra woun. Láu sun líra, mabáfuti lúrudu buri ligía lun lídejan luágu luríban jayúmajan güriña.

3

¹ Queísiti jabágariduña lan ában ibágaru iséri ladüga lídaanjadün lan ában lúma Crístu, áluaja jumeí buri cátei le lánina siélu, le ñí lubei Crístu ñun lueígiñe loúnwenren Búngiu.

² Samína jumá luágu buri cátei le lánina siélu, máma luágu buri le lánina ubou.

³ Jilátün lúma Crístu lun ubou le, guetó, níjein jibágaru le tímatimaati lúma Crístu le yágütabei siélu lúma Búngiu.

⁴ Dánme lagíribudun Crístu, le úmabei lídan wamá ában, wachülaaguba gíñe lúma, ábame gafánran wamá lídan luweírigan.

Binádu ibágaru lúma iséri ibágaru

⁵ Ígira jumeí sun le jigáburu le láninabei ubou le. Úa la ni ában jídaangiñe agámariduti mamáriedunga, madügün jugúyame cátei wíyeti, mafálara jumeí luríban ayúmajani, maweínamulá jágu luágu cátei le máma jáni, le méme ájuduraguni joun sándu.

⁶ Lueígiñe buri cátei le, láburujan lanárime ligáñi Búngiu jawágun ja madügünbaña gásu láu.

⁷ Jugúya, adüga buri jumúti meja cátei le lídan meja binádu jibágaru,

⁸ ánjeinti guetó, ígira jumeí sún buri cátei le. igáñi, iyéreejabuni, wuríbani, anábajani, lúma buri dimúrei wíyeti.

⁹ Maríñaga jumá iyéeni júmagua quei ígira jumáli lan binádu jigáburu lúma lé buri meja jadügübei.

¹⁰ Isérijali jigáburu le isérideinábei quei méme ligáburu Búngiu guánarügü le adügübalin, daríme jasúbudiruni Búngiu buídu buídu.

¹¹ Iséri ibágaru ligía, mámaali cátei lánina juríu jumá o máma jumá juríu, ni lánina jerésibiruni circuncisión lúma merésibirun jumáni, ni lánina teréncha jumá o máma jumá teréncha, machülaaguntiña, idámuni, máma idámuni, Crístu, ligía sun cáteibei, áni níjein gíñe jádan sun lánigu láu láni Espíritu.

¹² Jínsiñetün lun Búngiu, anúadaja láadün lun lánigume. Ítara líña lubeíti, abágarida jumá queísi lánigu, láu gudémejabu, areíduni, manáanguni únguaü, gagáambadi, lúma gagúraasuni.

¹³ Gagúraasun jumá jubáruagua, ferúdunagua jugúyame júmawagua, ítara quei ferúduna lánün Crístu, ítaralá gíñe jadüga.

¹⁴ Lougiñe sun cátei, jínsiñejabu jumá, ligía cátei le íchugubalin sun cátei lídan ában, áni jóústagüdaleí lubuídun jigáburu.

¹⁵ Abúguraleí lidárangilan Búngiu sun le jadügübei, ladüga ligía lagúarunbei Búngiu jun lun ábanrügü jumá úgubu, abágarideina láu darángilaü. Geteíngiradi jumá gíñe.

16 Buíngüdalóún láni Crístu ugánu janígi le gumúti. Arúfudaja jumá júmawagua, aríñagagua jugúyame júmawagua láu lichú áu. Jerémuja luágu luweírigun Búngiu láu eteíngiruni lun tídan janígi.

17 Furúmieguarügü cátei le jadüga o le lan jaríñagun, adüga jumeí lídan ában luwúyeri le íchuguti inébesei lun Wabúreme Jesucrístu, eteíngireina Búngiu Úguchili lídaangiñe Jesucrístu.

Igáburi le lúnbei wagáburiduni jáma ja wábiñebaña

18 Wúriña, gagáambadi jumá joun júmarigu, ligía cátei buíti le lúnbei jadügüni queísi afíñetiña luágu Wabúreme Crístu.

19 Wügüriña, jínsiñe jamá júmarigu jun, magáñida jumá jáma.

20 Isáanigu, agáamba jumáña jagübürigu lídan sun cátei, ladüga ligía jínsiñebei lun Búngiu.

21 Agübürigu, másügüragualá jagúmadiruniña jisáanigu, ragü jáñein magúraasuni.

22 Esériwidutiña, gagáambadi jumá joun jiyúbudirigu lídan sun cátei, mámarügü dan le ariágu jáña lan jun lun jeréderun buídu jagíbugiñe, adüga jumeí súnwandan táu sun janígi ladüga luweírin linében Búngiu jun.

23 Furúmieguarügü cátei le jadüga, adüga jumeí láu ugúndani, camá jamuga jadügüñein lun Wabúreme Crístu máma joun gürígia.

24 Subúdi jumáali luágu líchugubei lan Búngiu alágan jun queísi jafáyeiruaja, ladüga lun Wabúreme Crístu le Jabúreme le tímatimaati jesériwida.

25 Ánjeinti le adügüti wuríbati, lerésibirubei lafáyeiruaja wuríbati le ladügübei, áni ában láu lanügüniña Búngiu sun gürígia.

4

1 Iyúbudirigu, lúnti buídu lan jigáburi jáma jumúsuniña, oúsera jumáña láu úarani lúma iríchaü, jarítagua jumá luágu níjein lan gíñe ában Jabúreme yágüta siélu.

2 Ítara méme jumá ayúmuragua lun Búngiu sarágu, agáguduañu, eteíngireinei Búngiu.

3 Ayúmuragua jumá gíñe wawágu lun ladáranun Búngiu béna wabá lun wapúrichijani ugánu le lánina asálbaruni lúma lun wasúbudiragüdüni laráansejan Búngiu le luáguti ñi lan Crístu jádan lánigu, juríu yebe, máma yebe juríu. Lueígiñe napúrichijani cátei le, nadaürüwa.

4 Ayúmuragua jumá lun nasúbudiragüdüni furáangu quei lubúdubu.

5 Buídulá jouuserun jáma ja mafíñebaña, yúsu jumeí jidáani lídan cátei le buídubei.

6 Lúnti gúndaawa lan láu jiyáanu súnwandan, lúnti gíñe semé lan, lúnti gíñe jasúbudiruni ída lúba lan jóunabuniña gürígia.

Lagúmujoún buri mábugaü

7 Laríñaguba wadúje Tíquico nuágu jun. Jínsiñeti wügüri ligía woun sarágu, ligía ában ídejati buíti le gíñe esériwidubei lun Wabúreme Crístu núma.

8 Ligía nouñajaanbalin jun lun laríñagun jun ída wáña lan, lun gíñe líchugun gurásu jun.

9 Níngira gíñe Onésimo lúma, wadúje úaraguati le jínsiñebei woun, le ju páisanun. Jagíaba abájüdagua jun luágu sun le asúseredubei ya.

10 Mábuga líña Aristárco le nouba furísunrugu jun, mábuga líña gíñe Márcos le lidúje Bernabé jun. Aríñawagúaaali jun luágu Márcos, ánjein ñüdüñ aríjaün, resíbi jumeí buídu.

¹¹ Mábuga líña gíñe Jesúsu, le gíñe gíribei Jústo, jun. Jagía rügüñanu jádaangiñe juríu afiñetiña ja ñadágimeinjáñabaña núma luágu larúeijan Búngiu, áni jayábin nun quei ában oúnwenbun dügüdaguaü.

¹² Mábuga líña Epáfras le jupaísanun, le esériwidubei lun Crístu, jun. Ligía, súnwandan layúmuragun juágu lídan layúmuragun lun Búngiu lun derégüdagu jumá lídan jafiñen áni derégeguñu júngua buídu buídu lun jadügüni lugúndan Búngiu.

¹³ Geféentina luágu jarítagua lan Epáfras juágu, lúma gíñe jawágu ja ubúrugubaña Laodicéa lúma Hierápolis.

¹⁴ Mábuga líña Lúcas, le wasúrusian, le jínsiñebei woun, jun, lúma gíñe Démas.

¹⁵ Mábuga níña joun idújeñu lueígiñe Crístu ja ubúrugubaña Laodicéa. Rújuma gíñe mábugaü tun Nínfas lúma joun sunagun juágu lídan layúmuragun lun Búngiu lun derégüdagu jumá lídan jafiñen áni derégeguñu júngua buídu buídu lun jadügüni lugúndan Búngiu. afiñetiña ja oúndaragubaña túbiñe lun jájuduragun lun Búngiu.

¹⁶ Lásunme jalíjanun gárada to júmagua, jóúnajounme lun jalíjanun tílana ligílisi Laodicéa, alíja jumounme gíñe gárada to achülürüboun jun Laodicéagiñe to nabürüjaboun.

¹⁷ Aríñaga jumá lun Arquípo lun ladügüni wadágimanu le rúlaalíbei Wabúreme Crístu lun, buídu.

¹⁸ Niján numábugaü le nabürüjabei jun láu nújabu guánarü—áu Páblo. Jarítagua jumá luágu nadaürüña lan. Binílaün Búngiu. Ítaralá.

FURÚMIÑETU LIGÁRADAN PÁBLO JOUN TESALÓNICANA

Labürüjan Páblo jáma líbirigu joun tílana ligílisi to ubúruguboun Tesalónica

¹ Áu Páblo lúma Silváno láu Timotéo, wabürüjañoun gárada to jun, jugúya tílana ligílisi to Tesalónicaboun, ja lánigubaña Wáguchi Búngiu lúma gíñe Wabúreme Jesucrístu. Resíbi jumei abíniruni lúma darángilaü jámagiñe.

Jémpulu lánina afñeni lé meja jarúfudubei Tesalónicana

² Súnwandan weteíngiruni Búngiu juágu, sun jugúya, jarítagua wagía juágu súnwandan lídan wayúmragun lun Búngiu.

³ Jarítaguatiwa ligíbugiñe Wáguchi luágu lubuídun jesériwidun lun Jesucrístu ladúga jafíñen luágu, lúma lubuídun jóuseruniña wánigu ladúga buin tíña lan janígi láu ínsiñejabuni, lúma lubuídun jawánduni sun asúfuriruni ladúga jeménigidun luágu Wabúreme Jesucrístu le ídaangiñebei lan jachúlüra siélun.

⁴ Nidújeñu, jínsiñetün lun Búngiu, áni subúdi wamúti luágu anúadaja láadün lan.

⁵ Lugúndun dán meja le wapúrichijanbalin ugánu luáguti asálbaruni jun, merésibirun jumúti queísirügü dimúrei, ñadágimeinti tídan janígi, láu lubáfu Sífiri Sándu, lun lasáansiraguni jigáburi. Resíbi jumúti meja ugánu ligía láu ichoúruni le tímatimaati luágu inárüni lan. Subúdi jumúti lubuídun woúserun jagánagua, lun ábanbadiwa lan jémpulu buíti jun.

⁶ Ába jáyeijani wagáburi, lúma ligáburi Wabúreme Jesucrístu, resíbi jumúti ugánu luágu láu ában ugúndani le líchugubei Sífiri Sándu jun, láu sun barü lan jerésibiruni Crístu asúfuriruni jun.

⁷ Ítara líña jíabin lun ábanbadün lan jémpulu joun sun afñetiña ja loúbawagubaña Macedónia lúma Acáya.

⁸ Burúguaali ugánu luágu Wabúreme Jesucrístu júmagiñe, mámarügü loúbawagu Macedónia lúma Acáya, burúguaali lídan sun fulásu, áni subúdiwaali luágu afñeni le jibíjubei luágu Búngiu lídan sun fulásu. Memégeirunwati wabájüdagun luágu jafíñen joun gürígia,

⁹ lubáragiñe líra, jagía guánarügü adímurejatiña woun luágu webélujan júmoun, abájüdagua jagía luágu lubuídun jerésibiruniwa, lúma luágu jígiruni jájuduragun joun sándu lun jafálaruni Búngiu, ába jagúmeserun esériwida lun Búngiu le wínwanbei, le gíñe tímatimaatibei.

¹⁰ Abájüdaguatiña gíñe juágu luágu jagúrabajañein lan lagíribudun Liraü Búngiu siélugiñe —Jesúsu le lásaaragüdübei Búngiu lídaangiñe ouweni, le asálbarubáliwa luei lanárime afáyeiruajaü luágu figou le lúnbei liábin.

2

Luwádigimari Páblo Tesalónica

¹ Jugúya guánarügü, nidújeñu, subúdi jumúti luágu máma lán meja luágu ni cáta woúdin aríjaün.

² Queísi jasúbudiruni, wuríbati meja jóuseruniwa gürígia ja Filíposbaña, ába wayábin júmoun ladúgarügü líchugun Búngiu anígi woun lun wadügüni. Ába wapúrichijani ugánu le lánina asálbaruni jun, mebéresenga wagía láu le lúnbei wasúfuriruni jámagiñe gürígia ja mísiñejabúbaña lun ugánu ligía.

³ Mâma wapûrichijaña ladûga jamûga bulieiguaü, queîsi jarîñaguni wâganiñu, ni lâu lurîban arîtaguni, ni lun wayéedagunün.

⁴ Lubâragiñe líra, aríja lumúti Búngiu luágu buídu wamá, ába líchuguniwa lun wapûrichijani ugánu le lánina asálbaruni, ítara líñati wadímurejan lun wagúnfulirun lúma eménigini le lánbei Búngiu wawágu. Máfaaguntiwa lun gúnda jamá gürígia wâma, wâfaagun lun gúnda lan Búngiu wâma, le asúbudirubarun wanígi.

⁵ Queîsi jasúbudiruni, siñáti laríñawagún luágu adímureja wamá meja jun lâu dimúrei buíduburiti, mayúsu wagía ni cátei lébuname wagáñeirun seínsu. Geféenti Búngiu luágu cátei le.

⁶ Máluajantiwa lun wibíjin uweíriguni jámagiñe ámu gürígia, ni júmagiñe, lâu sun gayára lan jamûga wasándiragüdüni lijürü wagúmadijan queîsi láni Crístu apóstolugu.

⁷ Lubâragiñe líra, ouserarügü wamútün lâu ában uálini queîsi ában úguchuru to agüríajabaliña tirájüñü, ouñigira táña.

⁸ Weíríti jínsiñe woun dari lun máma rügüñein lan jamûga láni Búngiu ugánu wabúseera wíchugun jun, buséntiwa jamûga wíchuguni wabágari guánarügü jun, le luweírin jínsiñe woun.

⁹ Nidújeñu, jarítagua jumúti ligáburi wawádigimari lúma ligáburi wâfaagun lun wawínwandun. Nadágimeintiwa meja wéyuagu áriebu lun mámbadiwa lan ijürügu lun ni ában jídaangiñe, sun awánja lan apûrichijei láni Búngiu ugánu jun.

¹⁰ Geféentün, geféenti gíñe Búngiu luágu reídei wamá meja lâu ában igáburi le jarúmati áni surú jídan, jugúya le afíñebei, míchugunga wagía lúgaaru lun ni ában lun líchugun wadúnrun.

¹¹ Subúdi jumúti gíñe ída líña lan wíchugun gurásu jun lúma derégüdaguaü lun jafíñen, cáda ában jídaangiñe, quei ladûga ában úguchili joun lirájüñü.

¹² Aríñagaadiwa jun lun buídu lan jóuserun quei lúnti lan jóuserun lánigu Búngiu le agúarubei jun lun gafánran jumá lídan larúeijan lúma luweírigun.

¹³ Ligía, súnwandan lubei weteíngiruni Búngiu, lugúndun dán meja le jagáambunbalin láni Búngiu ugánu le wapûrichijabei jun, resíbi jumúti queîsi ugánu láni Búngiu, máma queîsi ugánu jáni wügüriña. Áni inárüni luágu láni lan Búngiu ugánu, le íchugubalin ubáfu jun lun jagáburidun buídu, jugúya le afíñebei.

¹⁴ Nidújeñu, dan le jeíbaajanbalün jupaísanun, suséreti jun quei méme le asúseredubei joun tílana buri ligílisi to Judéaboun, ja lánigu Búngiu lídaangiñe Jesucrístu, eíbaaja jamútiña gíñe juríu ja japaísanun.

¹⁵ Juríu, jagía áfarubalin Wabúreme Jesúsu jilágubei, áfaragua jamáña profétagu, áni bugá jamutiwa gíñe bougudin luei jageíra. Magúndaanti Búngiu jáu, jáganiñu gíñe sun gürígia.

¹⁶ Dan le wabúseerun wadímurejan joun ja mámbaña juríu lun gíñe jasálbarun, májatiñá yebe juríu lun wadügüni. Láu igáburi le, gánwounguağüda jamúti jafígoun. Ánjeinti guetó, liábindügürüga lanárime ligáñi Búngiu jawágun.

Busényati Páblo lídin aríjaña Tesalónica

¹⁷ Nidújeñu, murúsun dan lárigiñe wígirunün (láu sun ajünja méme lan tídan wanígi) ouñwenbun wabúseerun wouđinya aríjaün.

¹⁸ Jóuchatiwá yebe wouđin, áu Páblo, sarágu weíyaasu yebe nouchun nídin, áni ságü nouchun nadügüni, mígirun lumútina Máfia.

¹⁹ Ladûga jugúya guánarü íchugubalin ugúndani woun, jugúyaba arúfudei lubuídun wesériwidun lun Wabúreme Jesucrístu le uágubei gayára lan weménigidun lun werésibiruni wafáyeiruaaja dánme le lagíribudun, áni jugúyaba wagúndaaragüle dánme le jaráramun ligíbugiñe.

²⁰ Jugúya lébunabei wagúndan, áni rújadün lébuna wadímurejan buíti joun ámu juágu.

3

¹ Dán meja le siñá wamaali awánda masúbudirunga ída líña lan sun cátei júma, ába warítangun luágu buídutima lan lun weréderun Aténas, áu lúma Silváno,

² lúma lun lídin wadúje Timotéo, le ában esériwiduti lun Búngiu lídan lapúrichijoún ugánu luágu Crístu le Wasálbaragüle, aríjaün. Oúnaja wamúti júmoun lun líderagunün arárama buídu lídan jafíñen, ru ligía gurásu jun,

³ lun úa lan ni ában eíguaduti larúna lueígiñe buri lénreengúnga le lasúfurirubei luágu lafíñerun luágu Crístu. Jugúya guánarügü subúdi jumúti luágu lúnti lan wagúrabajani asúfuriruni líbe le.

⁴ Dán meja le awánjagua lan júma, aríñagatiwa meja jun luágu lúnti lan wagúrabajani asúfuriruni luágu líri Jesucrístu, áni ítara líña lasúseredun, quei jasúbudiruni.

⁵ Ligía lébubei dán meja le siñánaali lan awánda, ába noúnajan álügüdaja ída jíña lan lídan jafíñen, ladüga nanúfude lueí jamuga línchajanün Máfia lun jígiruni jafíñen luágu Crístu, ába jamúga liábin wawádigimari jídan lun ni cátime.

⁶ Guetó, giríbujali Timotéo Tesalónicagiñe, áni barúti ugánu buíti woun luágu jafíñen lúma jínsiñejabu. Laríñajare woun luágu jarítagua jumá wawágu láu insiñeni súnwandan, luágu giñe luweírin jabúseerun jaríjiniwa, ítara giñe quei busén wamá waríjinün.

⁷ ítara líña lubeíti, nidújeñu, rújali ugánu le sarágu gurásu woun labádinagua sun lénreengúnga lúma idíjeri le wasúfurirubei guetó.

⁸ ítara líña quei iséri ibágari woun wasúbudiruni luágu derégüdagu jíña lan lúma Búngiu.

⁹ ¿Ída lubá funasan wíchugun eteíngiruni buídurügüti lun Búngiu juágu, lúma luágu sarágu ugúndani le rújumaalíbei woun?

¹⁰ Wéyuagu, áriebe, wayúmuragun lun Búngiu lun gayáraaya lan waríjinün, gúnfuli lámuga le mégeíbei lídan jafíñen.

¹¹ Buséntiwa lun líderaguniwa Wáguchi Búngiu lúma Wabúreme Jesucrístu lun gayára lan woúdin aríjaün,

¹² lun giñe laweíridagüdüni Búngiu jínsiñegua júngua lúma jínsiñejabu joun sun gürígia, ítara quei jínsiñe jumá woun.

¹³ Derégeguagüda lámugaün Wabúreme Búngiu júngua lun le gumúti, madúnrunga jugúyame ligíbugiñe dánme liábin Wabúreme Jesúsú jáu sun lánigu.

4

Igáburi le áubei lagúndaara Búngiu

¹ Nidújeñu, subúditi luwúyeri igáburi le áubei lagúndaara Búngiu jun, queísi warúfuduni jun, jagáburiduña ítara. Guetó, nidújeñu, ayúmuraguatiwa jun láu líri Wabúreme Jesucrístu lun ítaramemetima lan jagáburidun queísi labúseeruni Búngiu.

² Jarítaguatün luágu arúfudajani le wíchugubei jun láu lugúmadin Wabúreme Jesúsú.

³ Le labúseerúbei Búngiu, lun jabágaridun derégeguañu júngua lun, lun úa lan ni ában agámariduti mamárieidunga,

⁴ lun cáda lan ában láluajanun lúmari lau lubuídun arítaguni queísi labúseeruni Búngiu, lídan lubúdubu,

⁵ máma láu luríban ayúmajani quei jadügüni gürígia ja ibídiñejabubaña lun Búngiu.

⁶ Úa la ni ában adügüti wuríbani lun lidúje láu lagámaridunun lúmari, jéreti labeíchuni Búngiu le adügüti cátei le, queísi waríñaguni jun.

⁷ Máma lun wabágaridun lídan iwíyeni lagúara Búngiu woun lun lánigu wamá, busénti lun wabágaridun derégeguañu woúngua lun.

⁸ Ítara líña lubeíti, le amájaruti lerésibiruni arúfudajani le, máma lun ni ában wügüri lamájara, lun Búngiu lamájara, Búngiu le íchugubalin Sífiri Sándu woun.

⁹ Luágu jínsiñejabu joun lánigu Búngiu, úati ni cáta lun nabürüjani jun lugúndun arúfudajaali Búngiu guánarügü jun lun jínsiñegua jumá,

¹⁰ áni ítara líña jadügüni joun sun jidújeñu lueígiñe Jesucrístu ja lídaanbaña sun ubúругu Macedónia. Láu sun líra, nidújeñu, ayúmuraguatiwa jun lúntima lagánwoundun jínsiñejabu.

¹¹ Joúcha jumá jabágaridun darángilañu, beréseguñu lídan le lúnbei jadügüni. Ñadágimein jumá lun janúriragun júngua, quei waríñaguni jun,

¹² inébe jumámuga joun ja mafíñebaña luágu Jesucrístu, úa lámuga gíñe jemégeirun.

Liábin Crístu

¹³ Nidújeñu, mabúseerúntiwa lun jeréderun ibídiñounga jun cába lan asúsereda joun jiláaña, luei jajírudagun quei ja meménigidunbaña luágu níjein lan ában ibágari lárigiñe ouweni.

¹⁴ Ítara quei afíñe wamá luágu jilá lan Jesúsu áni sará ligía lídaangiñe ouweni, ítara líña gíñe afíñe wamá luágu lásaaragüdübaña lan Búngiu ja ouwegubaña afíñeñu luágu Jesúsu.

¹⁵ Ligía waríñagunbei jun queísi larúfudajan Wabúreme Jesúsu, luágu wagía lánme le wínwangilibei dánme liábin, mámaba wagía ñúdün jabáragiñe ja jiláguaañabaña.

¹⁶ Dánme le arárireina lan Wabúreme Jesúsu siélugiñe, ábame lagúarun joun jiláaña lun jásaarun, lagaambúba lumálali jábuti ánjeligu, lúma lumálali lifídun Búngiu. Gürígiameti ja ouwegubaña afíñeñu luágu Crístu, jagíaba ásaara furúmiñe.

¹⁷ Lárigiñeme, ábame wásaarun, wagía afíñetiña ja wínwangiñabaña, ábame wanügüniwa úara jáma lídoun juánriñu lun wadúnragun lúma Wabúreme Jesúsu garábalirugu. Ábameti weréderun lúma Wabúreme Jesúsu lun sun dan.

¹⁸ Ligíati rújuma lubei gurásu júngua láu dimúrei buri le.

5

¹ Ánjeinti luágu cába lan dan lasúsereda buri cátei le, nidújeñu, mabúseerúnwati nabürüjan jun.

² Subúdi jumáali buídu buídu luágu lachülürüba lan wéyu ligía dánme magúrabúniwa lan, queísi liábin ában íwerujati áriebe.

³ Dánme añája lan gürígia aríñaga. “Lídaañein dan sun cátei áni úati mégeiti”, ligíame liábin gürínguau jawágun sódini quei liábin agáriduni tun würi dageínatu, siñábeiti jeséfurun.

⁴ Ánjeinti jugúya, nidújeñu ja afíñebaña luágu Jesucrístu, máma lídaañadün lubúriga luágu cátei lánina Búngiu lun lárügüdünün luwéyuri liábin Crístu quei lárügüdün ában jíweruti.

⁵ Lídaañadün larúgounga sun jugúya, máma wagía lánina áriebe lúma lubúriga.

⁶ Ligía moún lubei lun maráanserun wamá quei ja mafíñebaña luágu Jesucrístu, lúnti deréñuma wamá lubá lagíribudun, lídan wagíame lubuídun wachügü.

⁷ Ja arúmugubaña, áriebe jarúmuga, ja abácharuadubaña, áriebe jabácharuada.

⁸ Ánjein wagía le lánina wéyuagu, lúnti lídan wamá lubuídun wachügü. Lúnti wadáuragun woúngua láu afíñeni lúma láu ínsiñeni queísi ladáuragun súdaara láu lanínguagu lun loúnigiruni. Lúnti gíñe jeménigi wamá luágu wasálbarun le ítarabei quei bunídi le áubei ladáurei súdaara lábulugu lun loúnigiruni.

⁹ Máma lun labeíchuniwa Búngiu lanúadajawa, lun wibíjini asálbaruni lídaangiñe Wabúreme Jesucrístu lanúadajawa.

¹⁰ Jiláti Jesucrístu wawágu lun wabágaridun úara lúma, wínwañu wagía yebe, jiláñu yebe wéyume le liábin.

¹¹ Ligía rúmeme jumá lubei gurásu lúma érei júniwagua ítara quei jadügüni guetó.

Laríñaguni Páblo joun afíñetiña ída lúba lan jagáburidun

¹² Nidújeñu, ayúmuraguatiwa jun lun inébe jamá ja ñadágimeinbaña jagánagua jun, ja abúgurubalün, adímureja jagía jun lídan líri Crístu.

¹³ Lúnti jínsiñe jamá jun sarágu luágu wadágimanu le jadügübei. Abágarida jumá lídan dan jáma jíbiri.

¹⁴ Aríñagatiwa gíñe jun, nidújeñu, lun jerérun joun ja májatiña jawádigimaridun, lun jíchugun gurásu joun ja magúraasunbaña, lun jidéraguniña ja débilibaña lídan jafíñen, lun gíñe gagúraasun jumá jabá súngubei.

¹⁵ Úa la ni ában afáyeiruti wuríbani luágu wuríbani. Joucharügü jumá jadügün buíti jagánagua, lúma joun sun gürígia.

¹⁶ Gúnda jumá súnwandan.

¹⁷ Ayúmuragua júma lun Búngiu sun dan.

¹⁸ Teínqui jumei luágu sun le asúsereduti —buíti, wuríbati, niján le labúseerúbei Búngiu júmagiñe, queísi afíñetiña luágu Jesucrístu.

¹⁹ Merédera jumei luwádigimari Sífiri Sándu tídan janígi.

²⁰ Mamájara jumá lun dimúrei le laríñagubei Búngiu jayúmulugugiñe jidújeñu lueígiñe Jesucrístu.

²¹ Joucha jumei sun arúfudajani aríja jumeime ánjein lúmagiñeti lubei Búngiu, ábame jeréderun lau le inárünibe.

²² Dise jumá luei sun luwúyeri wuríbani.

²³ Búngiu guánarügü, le íchugubei darángilaü, derégeguagüdalaün júngua lun le gumúti, areída loúme juwáni, janígi luma júgubu dayáru, jarúmañu, lubá liábin Wabúreme Jesucrístu.

²⁴ Úaraguati Búngiu le agúarubei jun lun lánigu jumá, lagúmuchubei ladügüni sun cátei buíti le jídan.

Lagúmujoún buri mábugaü lúma abíniruni

²⁵ Nidújeñu, ayúmuragua jumá lun Búngiu wawágu.

²⁶ Chúgua júma júngua lídan líri Wabúreme, arúfuda jumámugei luágu lídaañadiwa lan ában wámagua.

²⁷ Aríñagatina jun láu lugúmadin Wabúreme, lun jalíjanun gárada to joun sun wadújeñu lueígiñe Jesucrístu.

²⁸ Binílaün Wabúreme Jesucrístu. Ítaralá.

TIBÍAMAN LIGÁRADAN PÁBLO JOUN TESALÓNICANA

Labürüjan Páblo jáma líbirigu joun tílana ligílisi to Tesalónicaboun

¹ Áu Páblo lúma Silváno láu Timotéo, wabürüjañoun gárada to jun, jugúya tílana ligílisi to ubúruguboun Tesalónica ja lánigubaña Wáguchi Búngiu lúma Wabúreme Jesucrístu.

² Resíbi jumeí abíniruni lúma darángilaü jámagiñe.

Lagúseragüdübaña Búngiu gafígountiña dánme liábin Crístu

³ Nidújeñu, teínqui wamúti Búngiu súnwandan juágu, queísi lúnti lan wadügüni, lugúndun laweíriduña jafíñen sarágu, áni ínsiñeni le jídaanbei jubáruagua aweírideinatima líña súnwandan.

⁴ Adímurejatiwa buíti juágu tídan buri lilígilisin Búngiu, luágu gurásu lúma afíñeni le jarúfudubei lídan sun eíbaajoúni lúma idíjeri buri le jasúfurirubei lueígiñe Crístu.

⁵ Arúfuda lumúti lubuídun jawándun luágu úaragua lan Búngiu lídan ligáburi lagúseragüdün, láu lanügünün quei garíchatíña lun jebélurun lídoun larúeijan, le uágubei jasúfurira.

⁶ Ladüga gíñe úaragua lan Búngiu, lachülürüba wéyu lun lasúfuriragüdüniña ja asúfuriragüdübalün,

⁷ lúma gíñe lun líchugun eméraaguni jun, jugúya le asúfurirubei ítara quei wagía, lídaanme wéyu le lúnbei lachülaagun Wabúreme Jesúsú siélugiñe lídan wátu geméti jáu láni ánjeligu ja gabáfubaña.

⁸ Liábinba lun labeíchuniña ja masúbudirunbalin Búngiu, madügün jagía gásu láu ugánu luáguti asálbaruni le wabíjibeí lídaangiñe Wabúreme Jesúsú.

⁹ Agünrinchawagúni le magúmuchaditi, ligíaba jabeichúagüle, jabugúba díse lueí laríjin Búngiu lúma luweírigun lúma lubáfu.

¹⁰ Dánme le liábin Crístu, laríjuba luweírigun jádan lánigu, ábame laweíridun janígi sun ja afíñeñabaña luágu, áni jugúya, jádaanbadün gürígia jagía queísi afíñeedün lan luágu le waríñagubei jun luágu.

¹¹ Ligía lébubei súnwandan lan wayúmuragun juágu, amúriaja wagía lúma Wabúngiute lun jarúfuduni luágu garícha jumá lun jádaanbadün lan ja únbaña lagúara. Ayúmuruatiwa gíñe lun Búngiu lun lagúnfulirun sun jayúmajan lun buídu lan jigáburi, láu lubáfu, lúma buri sun wadágimanu le jadügübei ladüga jafíñen.

¹² Láu igáburi le, líchugúba uweíriguni lun líri Wabúreme Jesúsú lídan jibágari, ábame líchugún uweíriguni jun luágu lareídun Wabúngiute lúma Wabúreme Jesucrístu.

2

Le lúnbei lasúseredun lubáragiñe lagíribudun Jesucrístu uboúagun

¹ Guetóti, nidújeñu, libügürü liábin Wabúreme Jesucrístu, dánme liábin oúndaraguawa lúma,

² amúriajatiwa júma lun masáansirun jumáni ligáburi jarítangun ítara uménrengun, masústarun jugúyame luágu ni ában ugánu, o dimúrei buri le uáguti laríñawagua luágu lúmagiñeti lan Búngiu, ni tuágu gárada to uáguboun

jaríñaga luágu wámagiñetu lan, to aríñaguboun luágu chülüjali lan luwéyuri Wabúreme lun lagíribudun uboúagun.

³ Mígiraguagüda jumá júngua lun jeyeedúniwa ítara. Lugúndun lubáragiñeme lachülürün wéyu ligía, níjeinbei awúribujani lúma Búngiu, lachúlaaguba gíñe lágani Crístu, le lunbei lagünrinchawagún.

⁴ Ligía láganibei Búngiu, liñúraguba lúngua luágu sun cátei le luáguti Búngiu, lachülürüba gíñe añúura tídan lilígilisin Búngiu, camá jamuga Búngiu ligía, ligía guánarügü aríñagati luágu Búngiu lan.

⁵ ¿Maritagun jumútisan luágu aríñagañaja náni méja buri cátei le jun dán meja le anájeingua lan júma?

⁶ Subúdi jumúti gíñe ída líña lán meja nadímurejan luágu ában ubáfu le lúnbei leréderuni liábin lágani Crístu lubáragiñe lidáani.

⁷ Luwádigimariña wuríbani guetó, arámudagu, áni lúnti lagídarúniwa le eréderubalin lágani Crístu ligía lubáragiñe gayára lan láfuridun lídoun larúgounga.

⁸ Ligíaba larijóuniwa, áni lagünrinchagubei Wabúreme Jesúsu ágani ligía láu ában dimúrei, lúma láu luweírigun le áubei liábin.

⁹ Ladügaba Máfia liábin lágani Crístu ligía, lachülürüba láu sarágu ubáfu, ladügüba buri miláguru yéeti lun layéedaguniña gürígia.

¹⁰ Layúsuruba sun luwúyeri wuríbani lun layéejaniña ja lídaanbaña üma lun gürínguaü, quei mája jabeí lun jerésibiruni inárüni luáguti Crístu lun jasálbarun.

¹¹ Ligía líchugunbáliña Búngiu lídoun bulíeiguaü lun jeyeedúniwa lúma lun jafíñerun luágu iyéeni,

¹² lun jasiadirúniwa lun máfiougati sun ja májabaña jafíñerun luágu Crístu, jínsiñerügü ligía wuríbani joun.

Anúadajóutiña lun jasálbarun

¹³ Ánjein jugúya, wadújeñu jínsiñetiña lun Crístu, súnwandan teínqui wamúti Búngiu juágu lugúndun anúadaja lumútün lúmagiñe lagúmeserun dan lun jasálbaruba lan láu Sífiri Sándu le arúmadagüdúbarun janígi, lúma inárüni luágu wasálbarun lídaangiñe Jesucrístu, le uágubei jafíñera.

¹⁴ Ligía lagúarunbei Búngiu jun, lun jasálbarun láu ugánu le wapúrichijabei, lun gafánraanbadün lan lídan luweírigun Wabúreme Jesucrístu.

¹⁵ Ítara líña lubeíti nidújeñu, derégüdagu meme jumá, mabúlieidagun jugúyame lueí buri arúfudajani le rúwamaalíbei jun láu dimúrei lúma táu gárada.

¹⁶ Wabúreme guánarügü Jesucrístu lúma Wáguchi Búngiu, le arúfuda láalibei línsiñejabu woun láu lareídun,

¹⁷ ru ligía ámalijouni le magúmuchaditi woun lúma ában eménigini buíti, rúla dügüdaguaü tun janígi, derégüdagugüda laünme lun jaríñaguni lúma lun jadügüni sun le buídubei.

3

Amúriajati Páblo jáma lun jayúmuragun lun Búngiu luágu

¹ Lagúmujoún cátei, nidújeñu, ayúmuragua jumá wawágu, burúgua lámuga ugánu luáguti Wasálbaragüle furése lídan sun fulásu, resíbiwa ligíame láu ugúndani queísi lasúseredun jagánagua.

² Ayúmuragua jumá gíñe lun gayára lan weséfurun jaweí wügüríña wuríbatiña, lugúndun máma sun gürígia uboúagu afíñetiña luágu Crístu.

³ Ánjeinti Búngiu, gayáraati wafíñerun luágu, luágu lagúnfuliruba lan láu lerérun, lárügüdúbadün derégüdagu, goúnigilaünme tueí lisádarán Máfia.

⁴ Jeménigitiwa luágu Wabúreme Búngiu luágu adüga jumáni le waríñagubei jun áni luágu jadüga mémebei lan.

⁵ Íderagualaün Búngiu lun jasándiruni lísiñejabu jun, lúma lun gagúraasun jumá quei Crístu luágu jasúfurirun.

Lúnti wawádigimaridun

⁶ Nidújeñu, aríñagatina jun lídan líri Wabúreme Jesucrístu lun jadísedun lueí furúmieguarügü jídaangiñe le májati luwádigimaridun, le mabágaridunti úaragua lúma arúfudajani le jibíjubei wámagiñe.

⁷ Subúdi jumúti ída lúba lan luwúyeri wabágaridun jagánagua lun jafálaruni wáni jémpulu, merédetiwa mawádigimariga jagánagua.

⁸ Meígin wamúti jeígin, mafáyeirunga wameí. Lubáragiñe líra, ñadágimeintiwa, áfaagua wagía wéyuagu áriebe, lun mámabadiwa lan ában ijürügu lun ni ában jídaangiñe.

⁹ Láu sun garícha wamá yebe lun wamúriajan júma lun jíderaguniwa, ñadágimeinrügütiwa lun wíchugun ában jémpulu jun lun jafálaruni.

¹⁰ Dán meja le júma wamá, rúwamuti meja gumádi le jun. “Le májabei luwádigimaridun, meígalá.”

¹¹ Agáambatiwa luágu añájein lan jídaangiñe májatiña jawádigimaridun, jerédera madügünga ni cáta, eténira lun le moún lubei jeténirun lun.

¹² Waríñaguña joún buri gürígia jagía láu lugúmadin Wabúreme Jesucrístu lun jawádigimaridun darángilañu lun jagáñeirunun jeígan fein.

¹³ Nidújeñu, mabúchadalá juágu adüga buíti.

¹⁴ Ánjein ñi ában le madügünti gásu láu le waríñagubei tídan gárada to, aríja jumeí cátei lan, memétera jumá lúmoun, barü lámuga busíganu.

¹⁵ Manüga jumeí quei ágani, erérarügü jumá lun queísi idújei.

Lagúmujoún abíniruni

¹⁶ Wabúreme Jesucrístu méme le lánina darángilaü, rúla darángilaü jun lídan sun luwúyeri, súnwandan. Júmalá sun jugúya Wabúreme, súnwandan.

¹⁷ Áu Páblo, nabürüjañein mábugaü le jun láu guánarü nújabu lúma nilétüran. Ítara lúba jasúbudiruni luágu áu lan oúnajabarun gárada to.

¹⁸ Binílaün Wabúreme Jesucrístu sun jugúya. Ítaralá.

FURÚMIÑETU LIGÁRADAN PÁBLO LUN TIMOTÉO

Labürüjan Páblo lun Timotéo

¹ Áu Páblo, láni Jesucristu apóstolu áu, nouñajoún láu lugúmadin Búngiu le Wasálbaragüle lúma Wabúreme Jesucristu, le uágubei weménigida lun webélurun siélun.

² Nabürüjañoun gárada to bun, Timotéo, niraũ le tímatimaati lídan wafíñen luágu Jesucristu. Resíbibeí abíniruni, gudémejabu lúma darángilaũ lúmagiñe Wáguchi Búngiu lúma lúmagiñe Jesucristu le Wabúreme.

Ewéridjani lueí arúfudajani le maríchabei

³ Queí meja nayúmuragun bun dán meja le nídinbei Macedónia, reídeimemebá ubúrugu Éfeso lun baríñagun joun itaga gürígia lun marúfudajan jamá cátei le maríchabei,

⁴ meténi jagíame lún buri úraga le magúmuchaditi jawágu jenébaanfaangu binádu mútu. Cátei buri le, barürügüti sigénei le málati, ani míderagun lumútiña gürígia lun jesériwiduni Búngiu láu jafíñerun luágu.

⁵ Le lúnbei barúfudajani joun afíñetiña jagía, lun jínsiñegua jamá jámagua lugúndun jarúmaaru tan janígi, míchujali jarítangun dúru jawágu, áni buídujali jafíñerun.

⁶ Añájein, adíreirutiña lueí buri cátei le, ába jíchaagun jóungua lídoun buri sigénei málati.

⁷ Buséñtiña buri lun arúfudajatiña jamá lídan lúrudu le líchugubei Búngiu lun Moisés, úati gunfaráanda jamáni ni le guánarügü jaríñagubei ni le jarúfudajabei luágu lúrudu ligía láu sarágu afíñeni.

⁸ Subúdi wamúti luágu buídu lan lúrudu, yúsuwarügaali ligía quei lubúdubu.

⁹ Lúnti lasúbudirúniwa luágu máma lan joun ja adügübalin le buídubei ladügüwa lúrudu, lúrudu jóunti ja wuríbabaña, ja magáambadibaña, ja mebéresenbaña láu Búngiu, ja gafígounbaña, ja minébenbei Búngiu lúma cátei lánina Búngiu joun, ja áfaruti jáguchi o jáguchu jilágubei, joun sun ja gáfarajadibaña,

¹⁰ joun ja agámaridubaña mamárieidunga o ja agámaridubaña wügüriña jáledigu, joun ja íwerujabaña gürígia, joun ja yéebaña, jáma ja áfiñurubaña luágu iyéeni. Jóunti gíñe sun ja adügübaña ámu cátei múaradunti láu arúfudajani jarúmati.

¹¹ Arúfudajani jarúmati le, úarati láu ugánu buíti luáguti asálbaruni le loúnajabadina Búngiu, le weírigubei, le fuleísei láalibeí gürígia, apúrichija.

Eteíngiruni luágu lugúdemejabu Búngiu

¹² Teínqui numúti Wabúreme Jesucristu, le íchugubei ubáfu nun lun wadágimanu le, luágu lanügünina queísi ában wügüri derégüdagwati, lúma luágu líchugunina lun nesériwidun lun.

¹³ Adüga láali sun cátei lé buri nun láu sún meja anábagua náni, eíbaaja numútiña meja ja afálarubalin, adüga numúti meja sun le nuáraati lun nagúmuchaguagüdüni jafíñen. Ába gudéme nan lun Búngiu lugúndun mámagidina meja afíñeti luágu Jesucristu áni ibídiñetí meja nun ca lan nadügübei.

¹⁴ Ligía luweírinbei nasándiruni labínirunina Búngiu, úara lúma afíñeni lúma ínsiñejabuni le gíñe wawágubei luágu lídaañadiwa lan ában lúma Jesucristu.

¹⁵ Inárüni cátei le, le tímatimaati, áni lúnti jafíñerun súngubei luágu inárüni lan. luágu “liábin lan Jesucrístu ubouágun lun lasálbaruniña gafígountiña”, áu furúmiñeti jádaangiñe.

¹⁶ Ligía nagúdemedunbei lun Búngiu lun gayáraabei lan larúfuduni Crístu sun lugúraasun nuágu, áu le furúmiñebei jádan gafígountiña. Ítara líña niábin lun ábanbadina lan jémpulu joun ja lúnbaña jafíñerun luágu, lun jabíjini ibágari magúmuchaditi.

¹⁷ ¡Ligía rúwama lubeí uweíriguni lúma inébesei lun Búngiu le Warúeitebei lun sun dan, súnwandan, le mouwedadibei, siñá ligía larijiniwa, le Búngiu le ábanrügüti, le sábiu! Ítaralá.

¹⁸ Timotéo, niraü, rúnumuti gumádi le bun lun bageíndaguni luwúribun Búngiu buídu, queí meja lariñaguni Búngiu jayúmulugugiñe wadújeñu lueígiñe Jesucrístu bun, ragúñubeí inárüni lánina asálbaruni, adúgeina le basúbudirubei luágu richá lan.

¹⁹ Añájein gürígia, féridi jamúti jafíñen ladüga madügün jamá gásu láu le jasúbudirubei luágu richá lan.

²⁰ Ítara líña lasúseredun lun Himenéo lúma Alejandro ja nedéregerubaña lun Máfia lun jafúnrendeirun lun manábagun jamáni Búngiu.

2

Arúfudajani libügürü ayúmuraguni lun Búngiu

¹ Furúmiñeti cátei, amúriajatina lun ladügüniwa ayúmuraguni lun Búngiu jawágu sun gürígia.

² Lúnti wayúmuragun jawágu gumádimatiña, lúma jawágu sun lúrudugu lun gayára lan wabágaridun ában ibágari darángilati, le derégewati lun Búngiu, le gíñe inébewati lídan sun luwúyeri.

³ Buíti cátei le, gúndaati gíñe Búngiu le Wasálbaragüle láu,

⁴ le busénbei lun jasálbarun sun gürígia, lun gíñe jayábin lun jasúbudiruni inárüni lánina wasálbarun.

⁵ Ában rügüñein Búngiu, ában rügüñein gíñe gayára ladímurejan waweígiñe ligíbugiñe Búngiu, wügüri le Jesucrístubei.

⁶ Derégeguati Jesucrístu lúngua lun loúnwen lun lafáyeiruni lebégi jasálbarun sun gürígia, ában lasúbudirawagüdün cátei le lídan lidáni.

⁷ Lun cátei le, loúnajana Búngiu lun narúfudajan joun ja mámabaña juríu libügürü inárüni le, lun gayára lan jafíñerun luágu Crístu queísi Jasálbaragüle. Áu, queísi ában afíñeti luágu Crístu, inárüni naríñagubei, mayéejatina.

⁸ Ligía nabúseerúnbei lun jayúmuragun wügüriña lídan sun fulásu, iñúrañu jájabu láu tarúman anígi, úouga igáñi ni asígenejani jádan jáma jíbiri gürígia lídan le jayúmuragun lun Búngiu.

⁹ Manárimelá tuwéndegun jadáuragun würiña, lun máma lan láu amúriguni janárimeguti jaráanseragua jóungua, ni láu gólu, pérlas, o daüguaü séruburitu,

¹⁰ lun láu lan lubuídun igáburi jadáuragua jóungua quei lúnti lan jadügün würiña ja derégeguañabaña jóungua lun Búngiu.

¹¹ Lúnti maní jamá würiña dan le larúfudajóuniwa joun, lúnti jerésibiruni arúfudajani ligía láu ában ünabuni.

¹² Májatina lun tarúfudajan würi lídan jadámurin afíñetiña, ni lun tagúmadiruni würi wügüri, lúnti teréderun maníñu.

¹³ Lugúndun Adán ladügübei Búngiu furúmiñe, lárigiñe, ladügoun Éva.

¹⁴ Máma gíñe Adán leyéedubei Máfia, würi ayeedúaboun, áni láu tayeedúniwa, ába táburujan lídoun figóu.

¹⁵ Láu sun líra, jasálbaruba würiña láu jagúnfulirun láu le lúnbei jagúnfuliruni queísi úguchuru, ánjein ítara méme jafíñerun luágu Crístu, arúfuda jagía ísiñejabuni lúma arúmani láu igáburi buíti.

3

Ligáburi ída lúba lan jóuserun fádirigu

¹ Inárüni cátei le. Ánjein abúseera ában gürígia lun fádiribei lan, ában wadágimanu buíti labúseerúbei ladügün.

² Lun fádiribei lan ában gürígia, lúnti labágaridun ában ibágari le míchuti lúgaaru lun ladeinjouniwa lun. Lúnti túmari lan ábanrügü würi, lúnti gíñe lanügün ában ibágari sériuti, buíti lichügü, inébewa. Lúnti aráanseñu lan sun dan lun lerésibirun bisída lúbiñe, lúnti buídu lan larúfudajan,

³ moún lumuti gátadi lan, manígi wuríbu, mabúseerun ligíame seínsu le marúmaanti lagáñeirúniwa. Lubáragiñe líra, lúnti areída lan, dilí ligíame, manígi ligíame seínsu.

⁴ Lúnti gayára láníña tílana lúban agúmadira buídu, lun gíñe ladügün lun gagáambadi jamá lirájüñü, inébejabu.

⁵ Lugúndun ánjein magúmadirun lubáliña wügüri tílana lúban, ¿ída lubági gayára lan laríjin jáu tílana lilígílisin Búngiu?

⁶ Moún lumuti lubeíti fádiri lan ában iséri afíñeruti lueí lanáangun lúngua sarágu luágu lubára, ábame láburujan lábugiñoun íñarawaguni le gádaanbalin Máfia.

⁷ Lúnti buídu lan ligáburi, lúnti gíñe inébe lan joun ja mafíñebaña lueí ladímurejoún wuríba luágu, ábame láburujan tídon lisádarán Máfia lun lagúnrinchawagúniwa lubuídun líri.

Ligáburi ída lúba lan jóuserun ja esériwidubaña ligílisirugu

⁸ Ja gíñe esériwidubaña ligílisirugu lúnti wügüriña jamá ja inébewatiña, lúnti jagúnfulirun láu jerérun, moún lumuti jabácharuadun, ni lun línsiñedun seínsu joun.

⁹ Lúnti járúgüdüni inárüni lánina afíñeni le arúfuda láalibei Búngiu woun, buídu, lun gíñe jarúma tan janígi.

¹⁰ Lúnti jouchún, lárigiñeme, ánjein úa lubeí mégeiti luágu lubuídun jagáburi, ligíaba gayára lan jesériwidun ligílisirugu.

¹¹ Würiña ja esériwidubaña ligílisirugu, lúnti gíñe inébewa jamá, moún lumuti marásualugu jamá, lúnti sériu jamá, derégüda lídan sun cátei.

¹² Ában esériwiduti ligílisirugu, lúnti túmari lan ábanrügü würi, lúnti gíñe lagúmadiruniña lirájüñü buídu jáu sun tílana lúban.

¹³ Lugúndun esériwidutiña ligílisirugu ja adügübalin jawádigimari buídu, buídubei ladímurejoúniwa jawágu, áni ragútimaatiña anígi lun jadímurejan luágu jafíñen luágu Jesucrístu.

¹⁴ Agúrabatina nídin aríjabu madíse,

¹⁵ nabürüjaní buri cátei le bun lun ánjana lan adárasaragua, lun subúdi báni ída líña lan lun loúserun gürígia jádan lufámilian Búngiu, to lilígílisinboun Búngiu le wínwanbei lun sun dan. Lilígílisin Búngiu ágüdajabalin linárün, toúnigiteí inárüni ligía buídu.

¹⁶ Siñáti lasígenerúniwa luágu weírigu lan Wasálbaragüle Jesucrístu, le subúdigüda láalibei woun.

Arúfudaguati Búngiu lúngua queísi gürígia lídan Jesucrístu, arúfudaleí Sífiri Sándu luágu úaragua lan Jesucrístu.

Aríja jameí ánjeligu.

Apúrichijoúati luágu joun lílana sun fulásu,
afíñewa luágu lídan sun fulásu,
resíbiwa ligía siélu.

4

Ja lúnbaña jígiruni jafíñen

¹ Furáanguti laríñaguni Sífiri Sándu luágu lídoun lánme lagúmujoún dan, añájeinbaña lan gürígia ígiruti jafíñen luágu Crístu, jafálarame espíritugu ja ayéejatiña lúma arúfudajani le jámagiñeti máfianu.

² Jagáambajaba arúfudajani jámagiñe gürígia biángua tigíbu, yéetiña, ja masándirunbaña ni cáta tídan janígi camá jamuga churáwaaru láu ában gürábu súti.

³ Gürígia jagía, aríñagatiña luágu mabuídun lan lun jagámaridun gürígia, aríñaga jagía luágu níjein lan eígini moún lumuti leigín, láu sun ladúga lan Búngiu eígini buri ligía lun jeígini ja afíñebaña jáma ja subúdibalin inárüni, láu ateíngiruni lun Búngiu luágu.

⁴ Sun cátei le ladügübei Búngiu buíti, moún lumuti wamájarun lun ni cáta lídaangiñe, lúnti wánjarun lun sun le adúga láalibei, teínqui wameíme luágu.

⁵ Lugúndun láu wamúriajan lúma Búngiu lun labíniruni sun weígin, ñübinti lun labuídurun láu lerérun, lúma láu wayúmuragun lun luágu.

Ában esériwiduti buíti lun Jesucrístu

⁶ Ánjein barúfudaja cátei le joun wadújeñu lueígiñe Jesucrístu, ábanbadibu esériwiduti buíti lun Jesucrístu, áni tágüdañoúba buwáni láu buri dimúrei le lánina wafíñen, lúma arúfudajani buíti le falábaalíbei.

⁷ Meféridirabeí bidáani asígeneja luágu buri libídiegun úraga le ni cáitati ligíbugiñe Búngiu, lubáragiñe líra, áfaaguabá lun bagúnfulirun lúma Búngiu.

⁸ Láu sun ju lan lánjingichún úgubu, jútimaati bánjingichagun búngua lídan bagúnfulirun lúma Búngiu, lugúndun barúti cátei buíti woun lídan ibágari le lúma lídan ibágari le lúnbei wabíjini.

⁹ Inárüni cátei le, áni lúnti jafíñerun súngubei luágu.

¹⁰ Ligía lébubei wawádigimaridun, súfuri wagía anabúni, lugúndun rúwamaali lan weménigi luágu Búngiu le wínwanbei, le aráansejaalibei asálbaruni joun sun gürígia, áni ja afíñebaña luágu, jerésibirubei asálbaruni ligía.

¹¹ Ligía buri cátei lúnbei barúfudajani lun jagúnfulirun gürígia láu.

¹² Sériulá bigáburu lun manügüniwa ban quei ni cáta lueígiñe ñúraügídibu lan, lubáragiñe líra, lúnti ában ban jémpulu buíti joun ja afíñebaña, lídan ligáburu badímurejan lúma bouuserun, lídan ínsiñejabuni, lídan bafíñen luágu Búngiu, lúma lídan larúma bibágari.

¹³ Rúguabá búngua lun balíjanun Lerérun Búngiu lun adámurini, íchiga gurásu joun wadújeñu lídan jafálaruni, arúfudaja joun daríme lun nachülürün.

¹⁴ Yúsubeí ubáfu le líchugubei Búngiu bun dán meja le jíchugunbalin tábutigu ligílisi jájabu bábulugu, adímurejeina jagía dimúrei lúmagiñe Búngiu bun.

¹⁵ Derégeguabá búngua lún buri cátei le, lun gayára lan larijíniwa bawáanserun lídan cátei láni Búngiu.

¹⁶ Goúniguabá búngua, lúma láu le barúfudajabei, ítaramemebá derégüdagu lídan sun cátei. Ánjein badúga ítara, basálbaruba, sálba jagíame giñe ja agáambubalibu.

5

Ída lúba lan ligáburu louuserun Timotéo jáma afíñetiña

¹ Madeínjabá lun ában weíriei mútu, lubáragiñe líra, adímurejabá lun camá jamuga lun búguchi, ousera báñame wügüríña ñübürigiña queísi bamúleno.

² Oúsera báña weíyaaña würíña quei bouserunun búguchu, ousera báñame würíña irájüñü quei bitunu, láu lubuídun arítaguni.

³ Íderagua báña würíña ja jiláañabaña úmari, ja arijúabei luágu mégei jamá iderúni.

⁴ Ánjein garájüñü tubeí ában würi to jiláali túmari, gabaña tugúya, lúnti jafúnrendeirun irájüñü jagía lun jeténirun furúmiñe lun le jemégeirubei jafámilian lúma lun jáguyugüdüni ínsiñejabuni le jadúweirubei joun jagübürigu, lugúndun buíti cátei le, gúndaati gíñe Búngiu láu.

⁵ Würi to jiláali túmari, to eréderuboun tábugua le tímatimaati, rútumuti teménigi luágu Búngiu, merédeti gíñe tayúmuragun lun Búngiu áriebe, wéyuagu.

⁶ Ánjounti to edéregeraguboun túngua lun ugúndani lánina ubou le, jiláñu tíña lun cátei lánina Búngiu láu sun wíngangiru lan.

⁷ Aríñagabeí buri gíñe cátei le joun, úa lámuga ni cáta lun ladeinjouñ joun luágu.

⁸ Le marítagunti jawágu lánigu, játima lidújeñu, magúfulinjali lúma lafíñen, wuríbatimáatiti sügü láu ában gürígia le mafiñeti.

⁹ Lun labürüdüniwa tíri würi to jiláalibei túmari tídan gárada lánina íderawagúni, to rügúboun níjeinjali lúmagiñe ürüwa-wein irúmu táu, lun gíñe ábanrügügili lán meja túmari.

¹⁰ Lúnti tasúbudirúniwa luágu buíti le tadügübei queí buri jamúga ánjein meja agüriaja tubáliña tirájüñü buídu, ánjein buídu lubeí touserun jáma ja achülürübaña túbiñe, ánjein seríwi tubáliña idújeñu lueígiñe Crístu manáangunga túngua, ánjein íderagua tubáliña ja asúfurirubaña, o ánjein adúga tubeí furúmieguarügü ámu cátei buíti.

¹¹ Würíña ja jiláaña úmari ja ñübürigiña, mabürüdabeí jíri tídan gárada, lugúndun lachülürüba dan lúnya jabúseerun jámari. Ábameti jígiruni jesériwidun lun Búngiu ligílisirugu lúnya jamárieidun.

¹² Ábameti jadímurejan gürígia jawágu ladúga jadúraaguni jadáradun lúma Búngiu le lánina jesériwidun lúnrügü súnwandan.

¹³ Ába jayábin lun jamágualigudun, mámarügü jamágualigudun, ába gíñe marásualugu jamá, eméteja lídoun sun cátei, adímureja cátei le moún lumuti.

¹⁴ Ligía nabúseerúnbei lun jamárieidunya ja ñübürigiñabaña, lun garájüñü jamá, lun jouñirunun jában, lun míchugun jamá lúgaaru joun ja mafiñebaña lun jadímurejan wuríba jawágu.

¹⁵ Añájein würíña, ígira jamáali Búngiu, ába jafálaruni Máfia.

¹⁶ Ánjein añájein jabeí würíña ja jiláalibei jámari jádan lufámilian ában afíñeti würi o wügüri, lúnti líderaguniña, mígirun ligíame lun ában jamá ijürügu tun ligílisi, ítara lúba gayára lan jíderaguniña tílana ligílisi würíña ja busénbaña jíderawagún.

¹⁷ Fádirigu ja lábugiñeñounboun jaríaajan ligílisi, ja adügübalin jawádigimari buídu, lúnti inébewa jamá sarágu, játima gaffsiutebalin apúrichijani lúma arúfudajani.

¹⁸ Taríñajare Lerérun Búngiu. “Magüragua jumeí liyúma jilügün bágasu le lánina wadágimanu lueí lásiñerun leígin lídaangiñe tubúñe fulúwaaru le uágubei ladügüragua lun lagídaruni túra.” Aríñagatu gíñe. “Garíchati ñadágimeinti lun libíjin lafáyeiruaja.”

¹⁹ Madügabá gásu luágu líchugún lidúnrun ában fádiri ánjein úa jabeí biáma o ürüwa lun jíchugun fe luágu lidúnrun.

²⁰ Ánjaña ja asígirubaña lídan figou, lúnti badeínjan joun jagíbugiñe sun afiñetiña lun janúfudedun súnqubei lueí jafígounjan.

²¹ Ayúmraguatina bun ligíbugiñe Búngiu lúma Wabúreme Jesucrístu, lúma jagíbugiñe ánjeligu ja lanúadirubaña, lun bagúnfulirun lúma buri gumádi le, lun ában lan láu janügúniwa sun gürígia.

²² Míchigabádügabá gásu luágu líchugún lidúnrun ában fádiri ánjein úa jabeí biáma o ürüwa lun jíchugun fe luágu lidá ni ában queísi fádiri tídan ligílisi lídan loufudagun, lúnti batúriajani ligáburu buídu lueídügü gafígoun lan, larijívameti camá gúndaatibu láu lifígoun. Dísebá lueí sun le wuríbabei.

²³ Quei súnwandan lan gári lan burágeirugu, mátabá dúnarügü, gurába gíñe murúsun diweín.

²⁴ Lídan le báluajaniña wügüriña lun jesériwiduni Búngiu ligílisirugu, jarítaguabá luágu añájein lan gürígia arijúati jafígoun furáangu lubáragiñe jagúserun, añájein gíñe, marijinti jafígoun darí lárigiñe.

²⁵ Ítara méme líña gíñe, cátei buíti le jadügübei gürígia, arijúati furáangu, áni íbini marijín lan, siñáti leréderun arámudagu lun sun dan.

6

¹ Afíñetiña ja músubaña, lúnti weíri lan jinében jayúbudirigu joun, lun madímurejóun lan wuríba luágu líri Búngiu, ni luágu cátei le warúfudajabei.

² Ánjein añájein lubeí esériwidutiña gayúbudiritiña afíñetiña, moún lumuti lougua lan jinében joun ladúgarügü jadújeñu jamá lueígiñe Crístu. Lubáragiñe líra, lúnti jesériwiduniña buídutima, lugúndun ja erésibirubalin lubúidun jesériwidun, afíñetiña, idújeñu gíñe jínsiñegutiña. Arúfudajabei cátei le, apúrichijabeíme.

Arúfudajani maríchatu lúma irísini inárüni

³ Ánjein arúfudaja ában gürígia cátei maríchatu áni múaraanti lúma larúma arúfudajani le láni Wabúreme Jesucrístu le íderagubaliwa agúnfulira lúma Búngiu,

⁴ ában barügua túngua gürígia ligía, le ibídiñeti ni cáta lun. Ganígiti lasígenejan luágu buri dimúrei, lídaangiñeti asígenejani le liábin buri gimúgaü, gáñiguaü, anábajani, mafiñeni joun gürígia,

⁵ lúma buri wuríbu magúmuchaditi. Jíbiri gürígia ja, wuríbati jasáminan, ibídiñejabutiña lun inárüni, jarítaguatiña luágu lébuna lan lagáñeirun irísini agúnfuliruni lúma Búngiu. Dísebá jaweí gürígia ja ítarabaña.

⁶ Inárüni luágu ában lan oúnwenbun irísini agúnfuliruni lúma Búngiu lun le gufúrumabei láu le lúmabei.

⁷ Manügüntiwa ni cáta wámagua ñájoun ubouágun, siñábei gíñe wanügün ni cáta yágiñe,

⁸ ánjein geígin wabeí, ganáangun, lúnti gufúruma wamá láu líra.

⁹ Ánjaña ja busénbaña jarísidun, mawándun jamúti ouchawagúni, ába jáburujan tídoun lisádaraana sarágu lagübüri ayúmajani le málati, le ásiñeragüdübei gürígia jebélurun siélun, ába jóudin máfiougatin.

¹⁰ Línsiñegu seínsu ligía lílagülebei sun luwúyeri wuríbani, áni añájein sarágu gürígia ladüga jóuchun jabíjin seínsu, ába jígiruni jafíñen luágu Crístu, buíngüda jamáaliti jabágari guánarügü láu asúfuriruni.

Wuríbu buíti le láni afíñeni

¹¹ Ánjabuti amürü, Timotéo, queísi ában ban wügüri derégeñuti lun Búngiu, anúrjabá lueí buri cátei le. Barüba ában ibágari le lánina ísuruni, le lánina gúnfuli lúma Búngiu, le lánina afíñeni, le lánina ínsiñeni, le lánina gagúraasuni lúma areíduni.

¹² Áfaaguabá buídu luágu láni wafíñen fuleísei, ábame bagáñeiruni ibágari le magúmuchaditi, lun líra lagúara Búngiu bun dán meja le barúfudunbalin jagíbugiñe sarágu gürígia luágu aráanseñu bíña lan lun bafálaruni Crístu.

¹³ Guetó, ligíbugiñe Búngiu le íchugubei ibágari lun sun cátei, lúma ligíbugiñe Jesucrístu, lé meja gíñe geféenbei luágu le inárünibei ligíbugiñe Piláto,

¹⁴ buséntina lun bídin láu le nubeíbei bun táu sun tarúma banígi, úa lámuga cába lan uágu ladeinjoúa bun, darí liábin Wabúreme Jesucrístu.

¹⁵ Dánme lachülürün dan ligía, le lanúadajabei Búngiu, lagíribuduba Crístu ubouágan, Búngiu rügüñein weírigu, Súnti Gabáfu, Jarúeite urúeigu, Jabúreme abúremeinigu.

¹⁶ Ligía rügüñein mouwedadi, le abágaridubei lídan larúgounga le ñíjin lubeí mayárafadun lan ni ában. Maríjin lágili ni ában gürígia Búngiu, siñáti gíñe larijíníwa. ¡Rúalá uweíríguni lun, arúfudualá lubáfu lun sun dan! Ítaralá.

¹⁷ Ja gámabaña irísini lánina ubou le, aríñagabá joun lun manáangun jamá joúngua luágu, míchugun jameíme jeménigi luágu irísini ligía, lugúndun machourunti, lun jíchuguni jeménigi luágu Búngiu, le wínwanbei, áni rúleí sun cátei woun gíbe lun wagúndaarun luágu.

¹⁸ Aríñagabá joun lun jadügüni le buídubei, lun buídu lan jóuserun le tímatimaati, lun aráanseñu jamá lun jíchuguni lúma lun jafánreinruni le jámabei.

¹⁹ Ítara lúba jóúndaragun irísini joúngua siélu le adúrarubei lun sun dan, ítara lúba jabíjini ibágari tímatimaati le magúmuchaditi.

Lagúmujoún dimúrei lun Timotéo tidan gárada to

²⁰ Timotéo, touñigibeí le íchugúbei lábugiñe baríaajan. Magáambabá dimúrei buri le lánina lisúbudin ubou, ni sigénei le lánina cátei le gíridügübei subúdi,

²¹ añájein jádaangiñe ja afálarubalin luwúyeri subúdi le, ígira jamáali jafíñen. Biní lábu Búngiu. Ítaralá.

TIBÍAMAN LIGÁRADAN PÁBLO LUN TIMOTÉO

Labürüjan Páblo lun Timotéo

¹ Áu Páblo, láni Jesucrístu apóstolu áu, loúnajañadina Búngiu láu lugúndan lun gayáraabei lan nídin aríñagei ugánu buíti joun gürígia luágu ibágari le líchugubei joun ja lídaanbaña ában lúma Jesucrístu.

² Nabürüjañoun gárada to bun, Timotéo le nanügübei queísi niraũ le jínsiñebei nun, resíbibá abíniruni, gudémejabu, lúma darángilaũ lúmagiñe Wáguchi Búngiu, lúma lúmagiñe Wabúreme Jesucrístu.

Adímurejani luágu Crístu

³ Dan le nayúmuragun lun Búngiu buágu ságü nayúmuragun áriebe lúma wéyuagu, teínqui numúti Búngiu le únbei nesériwida láu tarúma nanígi quei jadügüni binádu nagübürigu.

⁴ Súnwandan narítangun luágu bayájun dán meja le nígirunibu, buséntina jamúga naríjinibu lun nabuínchun láu ugúndani.

⁵ Jarítaguatina luágu afíñeni inárüniti le buágubei, Lóida to bagütü, túma Euníce to búguchu, jagía meja gawágubalin afíñeni le furúmiñe, áni choúru numúti luágu níjein lan gíñe buágu.

⁶ Ligía naríñangunbei bun lun bayúsuruni méme ubáfu le líchugubei Búngiu bun dán meja le níchugunbalin nújabu bábulugu.

⁷ Rúlaali Búngiu Sífiri Sándu woun, áni máma anúfudei le líchugubei Sífiri Sándu, ubáfu lun wadügüni furúmieguarügü cátei, ínsiñeni, lúma ubáfu lun wasáminarun buídu líchugubei woun.

⁸ Mabúsigaribá lubeíti lun bapúrichijani le larúfudajabei Crístu, mabúsigaribá gíñe náu, áu le adaürübei lueígiñe. Lubáragiñe líra, aráanseñubá lun basúfurirun wáma luágu ugánu le lánina wasálbarun, lugúndun líchuguba Búngiu érei bun lun bawánduni.

⁹ Sálba lumútiwa Búngiu, wa ligía woun lun wanügün ában ibágari le derégewati lun, máma jamúga lueígiñe níjein lan cátei buíti wadüga, ladüga ítara líña lan laráanseruni lubáragiñe ladügüni ubouú lun larúfuduni lareídun lúma línsiñejabun woun lídaangiñe Jesucrístu.

¹⁰ Guetó larúfudei ínsiñeni le láu loúnajani Jesucrístu le Wasálbaragüle lun lagünrinchaguni lubáfu ouweni, ru ligía ubáfu woun lun wibíjini ibágari magúmuchaditi láu werésibiruni ugánu buíti luágu.

¹¹ Rúlumutina Búngiu lun napúrichijani ugánu le, oúnaja lána quei apóstolu lun narúfudajan joun ja mámabaña juríu.

¹² Ligía nasúfurirunbalin sun cátei le. Láu sun líra, úati nibúsigari nan, lugúndun subúditi nun ca lan uágu níchigei nafíñen, áni choúru numúti luágu gabáfu lan lun loúnigiruni le líchugubei lábugiñe naríaajan daríme lachülürün wéyu ligía lun lagíribudun Crístu ubouúgún.

¹³ Mígirabeí luwúyeri arúfudajani jarúmati le níchugubei bun, abágaridabá láu bafíñen luágu Crístu, arúfudeina ínsiñeni joun súngubei ladüga lídaañadiwa ában lúma Jesucrístu.

¹⁴ Láu lubáfu Sífiri Sándu le wádaanbei, goúnigibeí arúfudajani le líchugubei Búngiu lábun baríaajan lun madarúniwa lan iyéeni lídoun.

¹⁵ Queísi basúbudiruni, ígira jamáadina sun afíñetiña Ásiana nábugua, níjein Figélo jádan, lúma Hermógenes.

¹⁶ Gudémejabulá Búngiu joun lufámilian Onesíforo, lugúndun barüjeiti gurásu nun sarágu weíyaasu, úati gíñe nibúsigari lan láu nadaürüña lan,

¹⁷ lubáragiñe líra, dan le liábinbei ubúругu Róma, merédeti láluajanina darí ladárirunina.

¹⁸ Darí lámugei lugúdemejabu Búngiu lídaanme wéyu ligía le lagíribudagüle Wabúreme Crístu ubouágun. Subúsiiti gíñe bun buídu ída líña lan líderaguniwa ubúругu Éfeso.

2

Ában lisúdaaran Jesucrístu buíti

¹ Ánjeinti amürü, niraü, resíbibá érei lídaangiñe abíniruni le wibíjibeí láu lídaañadiwa lan ában lúma Jesucrístu.

² Le cátei lánina wafíñen le agáamba báalibeí naríñagun jagíbugiñe sarágu geféentiña arúfudajabeí joun wügüríña ja afíñewati jawágu, ja gayáarati jarúfudajani joun ámu.

³ Awándabeí lubeíti sáfuri quei ában lisúdaaran Jesucrístu buíti.

⁴ Úati súdaara le esériwiduti ádaraguti lúngua lídoun ámu cátei lueí le lánina súdaara, lugúndun gásu leréderun dayáругu lábugiñe lerénjan lugúmandan.

⁵ Ítara líña gíñe, ában gürígia le ádaraguti lúngua lídoun juráraü, siñábei lagáñeirun ánjein máfaagun quei lubúdubu.

⁶ Le ábunagubei, garíchatí lun ligía lan furúmiñe íbíjei lufánran lídaangiñe alúbajani.

⁷ Samínabá luágu ürüwa jémpulu le, ábame gunfaráandagüda láni Wabúreme súngubei bun.

⁸ Jarítaguabá luágu Jesucrístu. ligía ában gürígia wáledi, jádan linébaanfaangu urúei Davíd, áni sarágüda lumúti Búngiu lídaangiñe ouweni.

⁹ Niján ugánu le lánina asálbaruni le napúrichijabeí, áni lueígiñe napúrichijani, awándatina asúfuriruni darí lun nagürawagún láu güríngüri camá ában gürígia wuríbati áu. Siñáti leréderúniwa labúruchagun láni Búngiu ugánu,

¹⁰ ligía nawándunbalin sun cátei, luágu jáni ja anúadaja láñabaña Búngiu fuleísei, lun gíñe jayábin lun jabíjini asálbaruni lúma uweíriguni magúmuchaditi siélu ladüga lídan jamá ában lúma Jesucrístu.

¹¹ Inárüni cátei le.

Ánjein jiláadiwa lubeí lúma Crístu, wabágariduba gíñe lúma,

¹² ánjava awánda sáfuri lueígiñe, gafánraanbadiwa lídan larúeijan.

¹³ Ánjava múaran, ligía úaramemebei, lugúndun ítara líña ligáburi Búngiu.

Ában ñadágimeinti buíti

¹⁴ Jarítaguagüdabeí cátei le joun ja afíñebaña, áni aríñagabá joun ligíbugiñe Wabúreme lun masígenejan jamá luágu buri cátei luáguti dimúrei. Mabuídun buríti sigénei le lun ni cáta, añáwurijarügü lumútiña ja agáambajabaña.

¹⁵ Jouchábeí sun bubáfu lun barúfudagun búngua ligíbugiñe Búngiu queísi ában ñadágimeinti buíti, le úati cába lan uágu labúsigarida, le ayúsurubalin ugánu lánina inárüni quei lubúdubu.

¹⁶ Dísebá lueí dimúrei buri málati le lánina ubou le, lugúndun ja adímurejabaña ítara, jóúintimaaña lídoun wuríbani,

¹⁷ ábame labúruchagun jarúfudajan quei cánser. Niján le susérebei lun Himenéo lúma Filéto,

¹⁸ Ígira jamáali inárüni, jaríñaga luágu sügüjali lan lidáni ásaaruni lídaangiñe ouweni, jagünrinchaguñeiti jafíñen sarágu gürígia ítara.

19 Wagía afíñetiña, wagía lilígilisin Búngiu láu ébuu derégüdati le rúlaalíbei Búngiu, siñáti lánjingichúniwa. Bürüwati dimúrei lébei luágu ébuu ligía. “Subúdi lumútiña Wabúreme Búngiu lánigu”, áni. “Sun ja aríñagubaña luágu lánigu jamá Crístu, lúnti jadísedun luei wuríbani.”

20 Tídan ában múna weiritu, máma rügüñein umégeni gólu o pláta ñi, níjein gíñe le láuti fulánsu lúma láuti múa, níjein lúnti luweírín-ágei ayúsuruni, níjein lúnti furúmieguaügü yúsu.

21 Lun lúnti lan ában ayúsuruni weiriguti ában gürígia le derégeguati lúngua lun Búngiu, ju ligía lun, lúnti jarúma lan libágari, díse ligía luei sun le wíyebei, ítara lúba ju lan lun furúmieguaügü wadágimanu buíti.

22 Anúrjabá lubeíti luei jayúmajan wügüríña ñübürigiña, barüba ában ibágari le lánina ísuruni, afíñeni, ínsiñejabuni, lúma darángilaü, úara jáma sun ja agúarubalin Wabúreme Crístu táu anígi jarúmatu lun líderaguniña.

23 Madügabá gásu láu sigénei málati, subúdi báali luágu barü lan líra wuríbu.

24 Moún lumuti gádan láni wuríbu ában esériwiduti lun Crístu, lubáragiñe líra, lúnti buídu lan jáma sun gürígia.

25 Lúnti ában lan arúfudajati buíti ligía, lúnti gagúraasun lan jáma ja múradúntiña lúma, lúnti larúfuduni joun táu anígi únabugutu luágu marícha jamá, ladüga gayára lan lasáansiruni Búngiu ligáburi jasáminarun lun gayáraabei lan jánjarun lun le inárünibei.

26 Gayáraati jadáriragun jóungua lun jeséfurun tídaangiñe sádara to gádaanbaliña lurúma Máfia lun ladügüni labúseerun jáu.

3

Ída jába lan gürígia lídoun búrime lagúmujoún wéyu

1 Lúnti gíñe basúbudiruni luágu liábin buríba lan wéyu jénreenguti lídounme lagúmujoún dan.

2 Jóungua rügübei buri gürígia jabúseera buíti, jínsiñe seínsu joun, pánta jagía, barügua jóungua. Jadímurejaba wuríba luágu Búngiu, magáambun jabáña jagübürigu, meteíngiradibaña, minébeme cátei lánina Búngiu joun.

3 Mínsiñejabubaña joun jarájüñü, magúdemejabu, marásualugubaña, siñábei járügüdagun jóungua, janárimebaña, láganibaña sun le buídubei.

4 Jalúgurubaña jamádagu, jadügüba buri cátei mabuídunti mebéresenga jagía cába lan asúsereda lárigiñe, janárimebei janáangun jóungua, jáluajabei jagúndan guánarügü lubáragiñe jamúga jáluajani Búngiu.

5 Jafámuruba camá gúnfulitiña lúma Búngiu áni larijúba luágu iyéeni lan láu ligáburi jabágaridun.

Meméterabá jámoun jíbe gürígia ja.

6 Jádan buri gürígia ja, añájein já buri ebélurubaña jábiñoun mútu ayéedaña würiña ja débilitiña, já buri buínbaña láu figóu lúma láu sun luwúyeri ayúmajani.

7 Ába jafálaruniña yéetiña jagía lun jafúnrendeirun iséri cátei, siñáti jayábin lun gunfaráanda jamáni inárüni.

8 Ítara quei jawügürijoun Jánes lúma Jámbres, ja gabíñarajadibaña, lun Moisés, ítara líña gíñe jawügürijoun wügüríña ja lun inárüni. Wügüríña buri ja, wuríbati jasáminan, garábaguaaña luágun wafíñen.

9 Mawáanserunbaña sarágu, ladüga geféenbei sun ubou luágu ibídiougua lan jáu, quei lasúseredun joun bián jagúra ja awügürijóubaña lun Moisés.

Lagúmujoún dimúrei lúmagiñe Páblo lun Timotéo tídan gárada to

10 Ánjein amürü, falábaali narúfudajan buídu lúma ligáburi nagáburidun.

¹¹ Subúdi báali narítangun lúma nafíñen, aríja báali nugúraasun lúma nísiñejabu, lúma ída líña lan nawánduni eíbaajoúni lúma súfuri lúma líbiri lénreengun le nasúfurirubei lídan buri fulásu quei buri ubúругu Antioquía, Icónio lúma Lístra. Subúsiti gíñe bun ída líña lan leséfurunina Wabúreme Búngiu lídaangiñé buri sun cátei le.

¹² Inárüni luágu jeíbaajoúba lan sun ja busénbaña jabágaridun derégeguañu jóungua lun Jesucrístu.

¹³ Anjaña ja wuríbabaña jáma ja gayéjadibaña, jaríbadatimaaba, ítara mémejaba ayéjeja lúma ayeedúa.

¹⁴ Anjein amürü, ítaramemebá derégüdagu lídan le bafúnrendeirubei, le uágubei afíñeedibu lan. Subúdi bumúti luágu inárüni lan le bafúnrendeirubei ladüga gayára lan bafíñerun jawágu ja arúfudajabalin bun.

¹⁵ Subúdi bumúti Lerérun Búngiu lúmagiñe ñúraügidibu. Tídan Lerérun Búngiu, ladárirúa sun lichú áu le busénwabei lun gayára lan jasálbarun gürígia, láu jafíñerun luágu Jesucrístu.

¹⁶ Sun le bürüwañubei tídan Lerérun Búngiu, Búngiu guánarügü íchugubalin jarítangunrugun wügüríña lun jabürüdüni. Jútu líburu tugúya lun tarúfuduni le inárünibeí lúma gíñe lun tarúfuduni le maríchabei, adügatu lun jígiruni gürígia cátei le mabuídunbei luágu le buídubei, arúfudajatu joun gürígia lun jabágaridun surúñu.

¹⁷ Líburu tugúya, jemégenboun gürígia ja esériwidubaña lun Búngiu lun jadügüni sun luwúyeri wadágimanu le lúnbei jadügüni lun.

4

¹ Ligíbugiñe Búngiu lúma Wabúreme Jesucrístu, le lúnbei liábin quei urúei agúseragüdaña wínwangiña jáma jiláguaaña, nariñaguña bun lun bapúrichijani Lerérun Búngiu,

² aráanseñubá lun bapúrichijani, busén jagía gürígia jagáambuni, mabúseerun. Afíñegüda báña, adeínjabá, eréra amürüme, arúfudajabá joun láu gurásu.

³ Lugúndun lachülürüba dan dánme le mawándun jamáni gürígia arúfudajani jarúmáti, lubáragiñeme líra, jáluajabei arúfudajani le gúnfulibeí lúma luríban jayúmajan, ábame jálugun sarágu arúfudajatiña lun jarúfudajani lérügü jabúseerúbei jagáambun joun.

⁴ Íchugubei janágan luágun inárüni, ábame jadügün gásu láu sun luwúyeri úraga.

⁵ Anjein amürü, buídulá bisáminan súnwandan, awándabeí asúfuriruni, rúguabá búngua lun bapúrichijani ugánu le lánina asálbaruni, gúnfulibá buídu láu buwádigimari.

⁶ Áu, sandíguatina núngua luágu nadügüñein lan lagúmujoún le nuáraati lun Búngiu, yaráfaali lórate noúnwen.

⁷ Ageíndagua náali luwúribun Crístu buídu, eíbaguaadina chülü lúmoun lébeja, adüga náali sun le rúlaalíbei Búngiu nun lun nadügüni, areída náali arúfudajani le lánina wafíñen jarúmañu.

⁸ Guetó, lagúrabuñadina nafáyeiruaja le lebégi ában ibágari le lánina ísuruni, afáyeiruajaü le lúnbei líchuguni Nabúreme nun, le agúseragüdüti le úraguabei, lídaanme wéyu ligía. Áni mámarügüba nun líchigei afáyeiruajaü ligía, líchugubei gíñe joun sun ja agúrabajabaalin liábin láu ínsiñejabuni lun.

⁹ Jouchabá biábin aríjana furése.

¹⁰ Ígira láadina Démas, jínsiñetimaati cátei le lánina ubouú le lun, ñüdünjati ubúrugun Tesalónica. Ñüdünja Crescénate loúbawagun Galácia, ñüdüñ Títo loúbawagun Dalmácia.

¹¹ Lúcas rügũñein núma ya. Áluajabeí Márcos, banũgeime búmagua, gayáraabei líderagunina lídan wadágimanu.

¹² Oúnaja nan Tíquico ubúrugun Éfeso.

¹³ Dánme biábin, banũgounme cápa to nígiruboun lúbiñe Cárpo yágũta Tróas nun, barũbounme giñe buri líburu, nigáradan burítima.

¹⁴ Adũgaali Alejándro, le ñadágimeinbei gürábu, sarágu wuríbani nun, lafáyeirubei Búngiu quei ligáburu cátei le ladũgũbei.

¹⁵ Toúniguabá búngua lueí, lugúndun garábaguaali luágun ugánu le wapúrichijabei.

¹⁶ Dan le furúmiñeti nadímurejan nueígiñegua ligíbugiñe lúrudu, úati ni ában íderagutina, ígira jamútina súngubei. Agúrabatina lun mabájũdũn láni Búngiu cátei le joun.

¹⁷ Láu sun líra, íderagua lumútina Wabúreme Jesucrístu, ába líchugun érei nun, ítara líña lubeíti gayára lan napúrichijani ugánu le lánina asálbaruni, agáambagũdaneí joun sun gürígia ja mámabaña juríu. Ítara líña leséfurunina Nabúreme lueí yebe oúweni,

¹⁸ áni leséfurubadina lueí sun wuríbani, areída láname lubá larúejan siélu. ¡Rúalá uweíriguni lun súnwandan! Ítaralá.

Lagúmujoún buri mábugaü lúma abíniruni

¹⁹ Mábugaü tun Prísca lúma lun Aquíla lúma joun lufámilian Onesíforo.

²⁰ Reídeija Erásto ubúrugun Corínto, ígira numúti Trófimo láu sándi Miléto.

²¹ Joúchabá biábin lubáragiñe laríbougadun. Mábuga líña Eubúlo bun, Pudénte, Líno, Cláudia jáma sun wadújeñu lueígiñe Jesucrístu.

²² Búma lámuga Wabúreme Jesucrístu, biní laünme Búngiu sun jugúya ja alíjabarun gárada to. Ítaralá.

LIGÁRADAN PÁBLO LUN TÍTO

Labürüjan Páblo lun Títo

¹ Áu Páblo, le abürüjabarun gárada to, ában esériwiduti lun Búngiu áu, ában gíñe láni Jesucrístu apóstolu. Oúnaja lumútina lúntima níchugun dügüdaguaü lun jafiñen ja anúadaja láñabaña Búngiu quei lánigu, lun gíñe gayáraabei lan jasúbudiruni inárüni lánina wafiñen, gayára lámuga jabágaridun ában ibágari derégewati lun.

² Ítara lúba gayára lan jeménigidun lun jabágariduba lan súnwandan lúma Búngiu. Búngiu, le mayéjanbei, aríñaga lumúti luágu líchugubei lan ibágari magúmchaditi le woun lúmagiñe lubáragiñe ladügüni ubouú.

³ Guetóti, queísi chülüjali lan dan, subúdigüda láali ugánu lánina asálbaruni woun, ábati loúnajanina Búngiu le Wasálbaragüle, lun napúrichijani ugánu ligía.

⁴ Nabürüjañoun gárada to bun, Títo, le nanügübei queísi niraü le tímatimaati, lídan ában wafiñerun luágu Crístu. Ayúmajatina lun bibíjin abíniruni lúma darángilaü lúmagiñe Wáguchi Búngiu, lúma lúmagiñe Wabúreme Jesucrístu le Wasálbaragüle.

Luwádigimari Títo luágu ubouúju Créta

⁵ Léububei nígirunibu luágu ubouúju le gíribei Créta, lun baráanseruni le mégeigilibei lun laráanserún, lúma lun bíchugun fádirigu lídan ságü fulásu queísi nariñaguni bun.

⁶ Ában fádiri lúnti labágaridun buídu, úa lámuga ni cáta uáguti lererúa lun. Lúnti ábanrügü tan lúmari, lúnti afiñe jamá lirájüñü luágu Crístu, gagáambadi, lun gíñe buídu lan jóuserun lirájüñü luei gayára lan líchugúniwa jadúnrun.

⁷ Lábugiñeñein laríaajan fádiri luwádigimari Búngiu, ligía lúnti lubei labágaridun ában ibágari le úaraguati. Lúnti derégeguañu lan lúngua joun ámu, maríbanme lijéniute, moún lumuti gátadi lan, manígi ligíame wuríbu, mínsiñelá seínsu lun sarágu.

⁸ Lubáragiñe líra, lúnti aráanseñu lan súnwandan lun lerésibirun bisídatiña lúbiñe, lúnti ában lan wügüri le jínsiñejabuti lun le buídubei, lun buídu lan lichügü, buídume loúseruniña sun gürígia, derégeguañu lúngua lun Búngiu, láu ubáfu lun lárügüdagun lúngua.

⁹ Lúnti lárügüdün luágu ugánu inárüniti le uágubei gayára lan weménigidun, le arúfudajoubei lun, lun gayára lan líchugun dügüdaguaü joun ámu láu arúfudajani le richábei, lun gíñe lafiñeragüdüniña ja asígenerubalin.

¹⁰ Lugúndun añájein sarágu magáambaditiña, jádaantima jarásan juríu, ja arúfudajabaña libídiouniga áu, ayéeda jamáña gürígia.

¹¹ Lúnti ladaurúniwa jayúma ja, ladüga chagáguagüdatiña sarágu familia láu jarúfudajani le moún lubei, lun jagáñeirun seínsu láu múarani.

¹² Ariñagatí meja ában chu táu Crétana, le ní bubei guetó, jawágu lupáisanun. “Gürígia Crétana, súnwandan yé jama, machülaaguntiña, jalíluatiña, magúali.”

¹³ Áni inárüni lariñagubei. Ligía lubeíti, badeínja joun jére, lun jóudin láu arúfudajani le richábei luágu wafiñen,

¹⁴ lun gíñe mebéresen jamá láu buri úraga le jadágun juríu, ni láu le jariñagubei gürígia, játima íchugubalin janágan luágun inárüni.

¹⁵ Queísi lariñawagúniwa, jarúmati sun cátei joun ja jarúmabaña anígi, ánjein joun gürígia ja íchugubalin janágan luágun inárüni áni marúma tugúya janígi, madárirun jamúti ni cáta jarúma, wíyeti jasáminan, wíyetu gíñe janígi.

¹⁶ Aríñagatiña luágu subúdi lan Búngiu joun, láu buri cátei le jadügübei, arúfuda jamúti luágu ibídiñe lan Búngiu joun, lugúndun mínsiñejabutiña, magáambaditiña, mayáraatiña lun jadügüni le buídubei.

2

Arúfudajani inárüniti rúti ibágari buíti

¹ Ánjeinti amürü, Títo, lúnti barúfudajani luwúyeri igáburi le lúnbei jagáburiduni afíñetiña luágu Crístu, ában ibágari le úaraguabei lúma inárüni le lúmagiñebei Búngiu.

² Lúnti mátun jamá wügüriña weíyaaña mútu, inébewa jagíame, buídu jachügü, derégüdagu lídan jafíñen luágu Crístu, buin láu ínsiñejabuni lúma gurásu.

³ Würiña gíñe ja weíyaaña, lúnti gíñe buídu lan jóuserun queísi lánigu Búngiu, lúnti mamárasualugu jamá, mabácharuadun jagíame. Lúnti jíchugun jémpulu buíti láu jabágaridun lúma jerérun,

⁴ lun jarúfudajan joun würiña ñübürigiña jaweí lun jínsiñe jamá jámari joun, jínsiñe jarájüñü joun,

⁵ lun buídu lan jachügü, jarúma jagía, aráanseja jagía jábiñe, areída jagía, gagáambadi jagíame lun jámari. Lúnti ítara lan jabágari würiña, lun úa jamá ni ában adímurejatiña wuríba luágu ugánu le lání Búngiu luágu asálbaruni láu afíñeruni luágu Jesucrístu.

⁶ Arúfudajabá joun wügüriña irájüñü lun buídu lan jachügü,

⁷ rúba ában jémpulu buíti joun lídan sun cátei. Arúfudajabeí lérügü inárünibeí joun láu ában igáburi derégüdati,

⁸ adímurejeina láu ában igáburi magádieti le uáguti lásiñera ladárirún mégeiti. Ítara lúba janüğüba báganiñu busíganu luágu luríban jóuserun áni siñábei jadímurejan wuríba buágu.

⁹ Aríñagabá joun esériwidutiña lun gagáambadi jamá joun jayúbudirigu lídan sun cátei, moúnabagun jamáñame, lun buídu lan jesériwidun joun,

¹⁰ lun míwerujan jamá, lun jarúma lan jagáburi le gumúti jáma jayúbudirigu lun larijiniwa lídan ligáburi jabágaridun luágu buídu lan arúfudajani le luáguti Búngiu Wasálbaragüle.

¹¹ Arúfudajabeí cátei le, Títo, lugúndun arúfuda láali Búngiu lareídun woun, le ídaangiñebei gayára lan jasálbarun sun gürígia lídaangiñe luríban jagáburi.

¹² Arúfudaja láali Búngiu woun láu lareídun lun wígiruni wuríbani lúma ayúmajani lánina ubou, lun wabágaridun ában ibágari le buíti ligíbuagu ubou le, ragüguañu woúngua, derégeguañu woúngua lun Búngiu.

¹³ Niján luwúyeri igáburi le lúnbei wagáburidun lídan le wagúrabajaña lan lagúnfulirun lubuídun cátei le uágubei lariñaga Búngiu—lagíribudun Wabúngiute, Wasálbaragüle Jesucrístu ubouagun láu sun luweírigun.

¹⁴ Derégeguati lúngua lun loúnwen wawágu, lun lasálbaruniwa lídaangiñe sun wuríbani lúma lun larúmadagüdüniwa le gumúti, lun lání wamá, aráanseñu lun wadügüni le buídubei.

¹⁵ Ligía buri cátei le lúnbei barúfudajani, íchigeina dügüdaguaü, arérejeina láu sun ubáfu. Míchigabá lúgaaru lun banügüniwa quei ni cáta.

3

Cátei lé buri lúnbei jadügüni afíñetiña

¹ Jarítaguagüda báña afíñetiña luágu Crístu, luágu lúnti lan jagúnfulirun jáma gumádimatiña lúma jáma ja oúnajabaliña, lun gagáambadi jamá joun, aráanseñu jagíame lun jadügün furúmieguarügü cátei buíti,

² lun madímurejan jamá wuríba luágu ni ában, lun dilí lan jóuserun, areída jagíame, lun ünabugu jamá lídan jóuserúniwa sun gürígia.

³ Lugúndun wagía afíñetiña, ibídiouguati meja gíñe wáu, magáambadi wagía meja lun Búngiu, barútiwa meja ában üma wuríbati, lidámun meja sun luwúyeri ayúmajani wuríbati lúma ugúndani wagía. Jéchutiwa meja adüga wuríbani joun ámu, wabágariduña meja lídan gimúgaü, iyéreejabutiwa meja, iyéreegutiña meja wíbirigu woun.

⁴ Ánjeinti dan le larúfudunbalin Búngiu Wasálbaragüle lareíni lúma línsiñejabu joun gürígia,

⁵ ába lasálbaruníwa, máma jamúga ladüga wadügün som cátei buíti, ladüga wagúdeme lun. Sálba lumútiwa láu lachíbuni wafígoun, rúti Sífiri Sándu iséri ibágari woun lun gayáraabei lan wabágaridun queísi labúseerun.

⁶ Lugúndun rúlaali Búngiu Sífiri Sándu woun lídaangiñe Wasálbaragüle Jesu-crístu, lun wámabei lan láu sun luweírin lubáfu.

⁷ Láu larícharaguagüdüniwa Búngiu ligíbugiñe láu lareíni, gayáraabei werésibiruni ibágari magúmuchaditi le wagúrabajabei lúmagiñe Búngiu siélu.

⁸ Inárüni cátei le.

Buséntina lun barúfudajani buri cátei le láu ában éregu, lun ja lan afíñebaña luágu Búngiu, lun súnwandan lan jíchaagun jóungua lun jadügüni cátei le buídubei. Buíti cátei le, áni buíti lanügün joun sun gürígia.

⁹ Dísebá lueí sigénei buri le málati, úraga buri jawáguti binádu mútu, fáreinguaü buri, lúma buri wuríbu lueígiñe lilúrudun Moisés. Sún buri cátei líra, manügünti buíti lun ni ában.

¹⁰ Ánjein ñí lubei ában tílana ligílisi le adügübalin fáreinguaü, erérabá lun ában o bián weíyaasu, ánjein madügün gásu báu, ígirabeí lúngua.

¹¹ Subúdi báali luágu ígira láali lan wügüri ligía üma le surúbei láu luwúyeri labágaridun.

¹² Dánme nouñajani Artémas o Tíquico lan lun lárügüdüni bubára ñi, buséntina biábin aríjana Nicópolis lugúndun ñíba násügürei lidáani luríbouga.

¹³ Íderaguabeí Zénas, le subúdiabúbei lun lúrudu, lúma Apólos lídan sun le buáraati, rúbeíme le jemégeirubei joun lun jasígiruni jaweíyasun.

¹⁴ Furéndeí jamá gíñe sun wánigu lun jadügüni cátei le buídubei, ídeja jagíame dan le mégeiwa lan, ju lámuga jabágari lídan Crístu.

Mábugaü

¹⁵ Mábuga jáña sun ja númabaña bun, mábuga wáña joun ja jínsiñejabúbaña woun queísi idújeñu lueígiñe Crístu. Binílaün Búngiu sun jugúya ja alíjabarun gárada to. Ítaralá.

LIGÁRADAN PÁBLO LUN FILEMÓN

Labürüjan Páblo lun Filemón

¹ Áu Páblo, le nadaürüñabei lueígiñe napúrichijan luágu Jesucrístu, nabürüjañoun gárada to, úara lúma Timotéo, le wadúje lueígiñe Crístu, bun, Filemón, le weíribei ínsiñe woun, le gíñe woúba lídan wadágimanu.

² Gárada to, joúntu gíñe tílana ligílisi ja oúndaragubaña búbiñe, queísi tun wadúje Ápia, lúma lun Arquípo, le wámabei lídan áfaaguni lídan luwádigimari Crístu.

³ Resíbi jumá abíniruni lúma darángilaü lúmagiñe Wáguchi Búngiu lúma lúmagiñe Wabúreme Jesucrístu.

Línsiñejabu Filemón lúma lafiñen

⁴ Teínqui numúti Búngiu súnwandan lídan le narítangun buágu lídan nayúmragun lun,

⁵ lugúndun agáambaadina luágu ínsiñejabuni lúma afiñeni le buágubei lun Jesúsú lúma joun sun ja lánigubaña Búngiu.

⁶ Amúriajatina lúma Búngiu lun ja lan afiñeñabaña luágu Crístu ladüga bafiñen, lun jayábin lun gunfaráanda jamáni sun abíniruni le wabíjibe lúmagiñe Jesucrístu, buídu.

⁷ Nidúje, oúnwenbun nugúndan lúma dügüdaguau le nídaanbei luágu bínsiñejabu, lugúndun darángilajaru janígi ja afiñebaña luágu Crístu, bugúndun.

Lamúriajan Páblo ában fuleísei lun idámuni Onésimo

⁸ Láu sun garícha nan queísi ában láni Crístu apóstolu lun nariñaguni le lúnbei badügüni bun,

⁹ jímein numúti ayúmraguarügü nan bun luágu ínsiñejabuni le wádaanguabei woúniwagua. Áu Páblo, weíyaadina, guetó nadaürüña lueígiñe napúrichijan luágu Jesucrístu.

¹⁰ Amúriajatina ában fuleísei búma lun Onésimo, le ítarajalíbei queísi niraü lídan Jesucrístu lárigiñe lerésibiruni Crístu láu nadímurejan lúma ya furísunrugu.

¹¹ Lídan meja dan le sügüjalíbei, ában meja idámuni moúnti Onésimo bun, ánjeinti guetó, gebégiti bun queísi nun.

¹² Nouñajañein bun lárigoún, resíbibeí lubeíti láu ugúndani lugúndun láu nouñajani bun, queígubeirügü jamúga nouñajañoun lan nanígi, le luweírin línsiñe nun.

¹³ Gúndaatina jamúga lun leréderun núma ya, lún jamuga lesériwidun nun bewéñegua, sun anája lan adaürüwa lueígiñe napúrichijani ugánu le lánina asálbaruni.

¹⁴ Mabúseerúntina nadügün ni cáta magúndaga amürü láu, lun máma lan láuti afósuruni fuleísei le badügübei nun láu jamúga bígiruni núma, lun láuti lan bugúndan guánarügü.

¹⁵ Fágua lanúrunbei Onésimo bueí luágu átiri dan lun búmabei lan guetó lun sun dan,

¹⁶ guetó mámarügü queísi ában idámuni, queísi cátei buítimaati lueí idámuni —queísi ában idújei jínsiñeguti. Weíriti línsiñe nun, lúnti jínsiñetima lan bun, mámarügü queísi wügüri, queísi gíñe ában idújei lueígiñe Crístu.

¹⁷ Ánjein lubeíti barü bubáalina queísi ában boúba lídan wesériwidun lun Crístu, resíbibeí queísigubeirügü jamúga áu lan berésibirubei.

¹⁸ Ánjein adügaali lubeí dáñu bun, o ánjein dúwei lubálibu, agúburaja bána.

¹⁹ Áu Páblo, nabürüjañein murúsun cátei le láu nújabu lúma nilétüran. nafáyeirubei bun, láu sun, gayára lan jamúga narítaguagüdünibu luágu dúweigua ban gíñe búngua nun lugúndun áu lan asúbudiragüdübalin Wasálbaragüle bun.

²⁰ Ánja, nidúje, adügabeí fuleísei le nun queísi afiñeti luágu Crístu, ámalijaboún nanígi queísi idújei lueígiñe Crístu.

²¹ Nabürüjaña bun lugúndun choúru nan luágu bagáambadi, áni subúditi nun luágu badügüba lan sügü láu le uágubei namúriaja búma.

²² Aráansejabá gíñe ubáraü nubá, lugúndun agúrabatina luágu lídan lánme loúnabuni Búngiu jayúmuragun lun náfuridun furísunrugugiñe, lánjaruba lun nídin aríjaün.

Mábugaü lúma lagúmujoún abíniruni

²³ Mábuga líña Epáfras bun, le nouba furísunrugu lueígiñe lapúrichijan luágu Jesucrístu,

²⁴ mábuga líña gíñe Márcos bun, Aristárco, Démas, lúma Lúcas, ja ñadágimeinbaña úara núma.

²⁵ Binílaün Wabúreme Jesucrístu. Ítaralá.

GÁRADA JOUN JA ADÍMUREJABALIN HEBRÉO

Adímurejaali Búngiu lídaangiñe Liraü

¹ Lídan meja dan le sügüjalibei, adímurejati meja Búngiu joun binádu wagübürigu sarágu weíyaasu lúma lídan sarágu luwúyeri, jádaangiñe profétagu,

² guetó, lídoun buri lagúmujoún dan le, adímurejaali woun lídaangiñe Liraü. Lídaangiñe Liraü le, ladügei ubouú, áni rúlaali sun cátei lun.

³ Arúfuda lumúti Liraü Búngiu luweírigun Lúguchi luougua, ligía méme Búngiubei, ligía ágüdajabalin sun cátei láu lerérun le gabáfubei. Lárigiñe lachíbuni wafígoun, ába lañúurun lueígiñe loúnwenren lála Búngiu, le Súnti Gabáfu, siélu.

Weíriguti Liraü Búngiu sügü jáu ánjeligu

⁴ Ñúbinjali Liraü Búngiu lun weírigubei lan jaweí ánjeligu, resíbijali ában ubáraü íñugutimaati jaweí queísi lalágaante queísi Liraü Búngiu.

⁵ Maríñagunti Búngiu ni ában weíyaasu lun ni ában ánjeli.

Niraü amürü,
rúnaali ubáraü le bun ugúñe,
maríñagun ligía luágu ni ában ánjeli.

Áuba Búguchi,
amürüme nisáani.

⁶ Ánjeinti dán meja le loúnajaabalin Liraü le ábanrügüti ubouúgun, aríñagati. Judúgua jamá sun náni ánjeligu lun.

⁷ Laríñaga jawágu ánjeligu.

Adügatina lun ítara jamá náni ánjeligu camá garábali,
adüga áu lun ítara jamá camá wátu geméti,
oúnagüleigu jagía ja esériwidubadina.

⁸ Ánjeinti lun Liraü aríñagati Búngiu ítara.

Búngiu, lúntibei súnwandan bañúurun luágu bála lun barúeijan,
láu ában úraguni bagúmadija.

⁹ Jínsiñeti le richáguabei bun, iyéreeguti le wuríbabei bun,
ligía níchugunbei, áu le Bubúngiute, gíbetima ugúndani bídoun sügü jáu bíbirigu.

¹⁰ Áríñagati gíñe.

Amürü le Abúremein, lídan lagúmeseja, adüga bumúti ubouú,
láu bújabu badügei siélu.

¹¹ Lagúmuchuba siélu lúma ubouú, ánjein amürü, beréderuba lun sun dan.
Liábiba siélu lúma ubouú lun laweíyadun quei anáanguni,

¹² babáruchagubaña quei ában daüguaü,
jasáansirúaba quei anáanguni.

Ánjein amürü, ában mémebadibu, magúmuchunbei bibágari.

¹³ Maríñagunti Búngiu ni ában weíyaasu lun ni ában ánjeli.

Ñurúba lueígiñe noúnwenren darí lun nagáñeiragüdüñibu jawágu báganiñu,
ru náñame bújaburugun.

¹⁴ Sun ánjeligu, espíritugu esériwidutiña lun Búngiu jagía, oúnajoútiña lun jíderaguniña ja lúnbaña jerésibiruni asálbaruni lídaangiñe jafígoun.

2

Lúnti woúnigiruni wasálbarun

¹ Queí ítara líña lubeí luweírigun Liraü Búngiu, lúnti lubeí weténiruntima lun ugánu le agáamba wamáalibei luágu, lun madíreirun wamá lueí üma.

² Chourúati lilúrudun Búngiu lé meja íchugúbei joun gürígia jádaangiñe ánjeligu lídan meja ámu dan, áni ja adüraagubalin, madügün jagía gásu láu, áburujati ligáñi Búngiu jawágun láu iríchaü.

³ Gúbuméti wafáyeija luágu wafígoun ánjein moúnigirun wamá oúnwenbun asálbaruni le resíbi wamáalibei lúmagiñe Jesucrístu le Wasálbaragüle. Wabúreme Jesucrístu guánarügü adímurejabei luágu asálbaruni le furúmiñe, lárigiñe, ja agáambubalin, ában já sügüragüdüni woun láu ában achoúruruni luágu inárüni lan.

⁴ Ñurügüda láali gíñe Búngiu ugánu ligía woun láu buri seíni lúma sarágu buri miláguru lúma láu Sífiri Sándu le líchugubei woun láu amüñegueinarügü luwúyeri ubáfu queísi labúseeruni.

Jesucrístu quei libíriña

⁵ Míchugun lumúti Búngiu ubou líte le uágubei wadímureja lábun jagúmadijan ánjeligu,

⁶ lubáragiñe líra, laríñajare tídan Lerérun.

Búngiu, ¿cáteiñeinsan wügüri lun barítaguba lan luágu?

¿Cáteiñein wügüri goúwedaditi badíjeridunbei láu?

⁷ Rúbumuti ünabu jaweí ánjeligu luágu murúsun dan,

daüguagüda bumúti láu uweíriguni lúma inébesei, ru amürü ubáfu lun luágu sun cátei le badügübei,

⁸ rúbumuti sun cátei lábugiñoun lagúmadijan.

Dan lubeíti le líchuguni Búngiu sun cátei lábugiñoun lagúmadijan gürígia, mígirunti ni cáta lun mámabei lan lábugiñe. Láu sun líra, aríja wamúti luágu mámagili lan sun cátei ñüdünti láu le lubeíbei wügüri.

⁹ Ánjeinti lídan Jesucrístu, aríja wamúti lagúnfulirun sun dimúrei le, ligía meja ában gürígia le líchugubei Búngiu ünabu jaweí ánjeligu luágu murúsun dan. Láu luweírin línsiñejabu Búngiu woun, ánjati lun loúnwen Crístu jawágu sun gürígia, áni guetóti, daügu líña láu uweíriguni luágu ouweni le lasúfurirubei.

¹⁰ Sun cátei níjein lun Búngiu, áni lídaangiñeti gíñe, áni busénti Búngiu lun gafánran jamá sun lirájüñü lídan luweírigun. Ligía lúnti lubeí buga lasúfurirun Liraü Búngiu, le Jesucrístu, queísi ában gürígia lun ligíaba lan ában asálbaragülei gumúti láu asúfuriruni.

¹¹ Ja edéregerúabaña jarúma lun Búngiu lúma Liraü le edéregerubaliña ítara, sun jagía ában meme Úguchili—Búngiu.

¹² Ligía úa lubeí nibúsigari lan Liraü Búngiu lun lagúaruniña lamúlenu jáma lítunu dan le laríñagun lun Búngiu, queísi bürüwañu lan tídan Lerérun Búngiu.

Nadímurejaba buágu joun namúlenu jáma nítunu, nerémujaba luágu buweírigun lagánagua adámurini.

¹³ Aríñagati gíñe.

Neménigiduba luágu Búngiu.

Aríñagati gíñe.

Anája, jáma isáanigu ja líchugubaña Búngiu nun.

¹⁴ Ja jasáanigu ában família, ában meme jítaü jagía, ítara gíñe, wügüri meja gíñe garaüwarügüti Jesús, lun meja gayáraabei lan loúnwen, gayára lámuga lagünrinchaguni lubáfu Máfia le ídaangiñebei liábin ouweni joun gürígia.

¹⁵ Ítara líña gidá lumuti Jesucrístu janúfude gürígia, já meja aganoúbaña quei idámuni lun anúfudei lueí ouweni.

16 Masálriragunti Crístu queísi ánjeli lun líderaguniña ánjeligu, salíti queísi wügüri garaüwarügüti lun líderaguniña gürígia líledi, ja linébaanfaangu Abrahám, ja lúnbaña jafíñerun luágu.

17 Lúnti líra, gásu meja ítara lúba lan queísi libíriña, lun liábinba lan lun ábanbei lan fádiri íñutimaati, le úaraguati, láu gudémejabu joun gürígia, lun gíñe lachíbuni jafígoun gürígia láu ledéregeragun lúngua luágu gurúwa.

18 Áni queíti sáfuri lan, áni ouchagualeí Máfia, guetó gayáraati gíñe líderaguniwa lídan le woúchwagún.

Weírigutimaati Jesúsu lueí Moisés

3

1 Ítara líña lubeíti, nidújeñu derégeguatiña joúngua lun Búngiu, quei jádaangiñetün lan ja únbaña wájali lan Búngiu lun jaganoun lúma siélu, téni jumá buídu lun Crístu le loúnajabei Búngiu, le gíñe fádiri íñutimaati le lánina afíñeni le wawágubei.

2 Úaraguati Jesúsu lúma Búngiu lídan sun wadágimanu le únbei lanúadirei, queísi meja gíñe úaragua lan Moisés lídan sun lesériwidun jádan lufámilian Búngiu.

3 Gadünatimaati Jesúsu uweíriguni sügü láu Moisés ítara quei resíbitima lan le adügübei ában múna uweíriguni sügü táu múna to ladügüboun.

4 Sun múna adúgarügü lumútu som gürígia, áni Búngiu adügübalin sun cátei le njeinbei.

5 Ítara líñáti, úaraguati meja Moisés lídan lesériwidun jádan lufámilian Búngiu queísi ában esériwiduti lun Búngiu, wadágimanu lé meja ladügübei, ában liyáwa inárüni le lúnbei lasúbudiragüdúniwa lídan dan le lúnbei liábin.

6 Ánjeinti Crístu, úaraguati queísi isáani jádan lufámilian Búngiu, áni jádaangiñetiwa família jagía ánjava derégüdagu méme, ánjava gíñe afíñe darí lúmoun woúnwen, gúndaañu lídan eménigini le wawágubei.

Eméraaguni joun lumútuniña Búngiu

7 Ligía lubeíti, lúnti wagáambuni le laríñagubei Sífiri Sándu tídan Lerérun Búngiu.

Ánjein jagáamba le laríñagubei Búngiu ugúñe,

8 medéreatá janígi quei meja tedérerun janígi magáambaditiña ja ouchagubalin Búngiu lídan fulásu mageírawati.

9 Lídan bián-wein irúmu le jáubei ñi, jouchagua jamútina binádu jagübürigu lídan fulásu ligía, líña Búngiu, láu sun aríja jamáni buri cátei le nadügübei.

10 Ligía nagáñidunbei jáma gürígia jagía, ába naríñagun. “Súnwandan charárañu jamá tídan janígi, májatiña jafálaruni üma le narúfudubei joun.”

11 Ligía nagáñidunbei jáma, ába náfiñurun luágu mebélubaña lan lídoun fulásu lé yebe aráanse náalibei jabá lun jeméraagun ñi.

12 Nidújeñu, toúnigi jumá lueí tedérerun janígi lun jadísedun lueí Búngiu le wínwanbei láu mafiñerun jumá luágu.

13 Lubáragiñe líra, rújuma gurásu júniwagua ságü wéyu, sun níjangua lan dan. Toúnigi jumá lueí leyéedagunün figou, edéreragüdounme janígi,

14 lugúndun ánjava ítara méme derégüdagu darí woúnwen lídan afíñeni le wawágubei lúmagiñe furúmiñeti, gafánraanbadiwa lúma Crístu.

15 Níjangua dimúrei le, le gíñe woúnbei, wagía le wínwanbei lídoun buri dan le.

Ánjein jagáamba le laríñagubei Búngiu guetó,

medéreratá janígi quei jagúra ja magáambadibaña lun Búngiu.

¹⁶ ¿Cátañati agáambubalin lumálali Búngiu, lárigiñe, ába jagáñidagüdüni láu luríban jagáburi? Sun ja laságarubaña Moisés Ejíptogiñe.

¹⁷ ¿Cáti úma lagáñida Búngiu bián-wein irúmu? Jáma ja afígounjabaña, ja ouwegubaña lídan fulásu mageírawati, ába ligirúniwa jábu ñi.

¹⁸ ¿Cáti un láfiñura Búngiu luágu mebélubaña lan lídoun fulásu lé yebe aráanse láalibei joun lun jeméragun ñi? Joun ja adúraagubalin le lubeíbei.

¹⁹ Ítara líña lubeíti, goúnigi jumá lun jafíñerun meme darí lúmoun jóunwen, lugúndun ladüga mafíñeni le jawágubei binádu wagübürigu, siñá lubeí meja jebélurun lídoun fulásu le aráanse láalibei yebe Búngiu jabá.

4

¹ Guetó lubeíti níjeingua béna júnren woun lun gayára lan webélurun lídoun eméraguni le aráanse láalibei Búngiu woun siélu, lúnti goúnigi wamá, siñádügü liñeín lebélorun ában wádaangiñe, dánme lachúlürün óra lun woúnwen.

² Lugúndun apúrichijouáli giñe ugánu luáguti asálbaruni woun queísigubeirügü joun binádu wagübürigu, mesériwinti lun ni cáta joun jagáambuni ugánu ligía lugúndun agáamba jamúti, mafíñerunga luágu.

³ Ánjeinti wagía le afíñeelibei, wagíaba ebélura lídoun eméraguni le, le uágubei laríñaga Búngiu.

Ligía nagáñidunbei jáma,

ába náfiñurun joun luágu mebélubaña lan lídoun fulásu le aráanse náalibei yebe jabá lun jeméragun.

Ítara líña lerérun Búngiu jawágu binádu wagübürigu. Aráanserúati fulásu lánina eméraguni joun lúmagiñe wéyu le lagúmuchi Búngiu ladügüni uboú,

⁴ queísi labürüdüniwa tídan Lerérun Búngiu luágu lisédün wéyu.

Ába leméragun Búngiu lídaangiñe sun luwádigimari luágu lisédün wéyu.

⁵ Aríñawagúaya ligía tídan Lerérun tugúya ítara.

Mebélubaña lídoun fulásu le aráanse náalibei yebe jabá lun jeméragun.

⁶ Láu dimúrei buri le, subúdi wamúti luágu aráanserúañu lan fulásu lánina eméraguni jabá güriña, ja binádu wagübürigu, ja furúmiñebaña agáambeí ugánu lánina asálbaruni, mebélutiña ladüga mafíñeni le jawágubei lun Búngiu.

⁷ Ligía laráanserunbei Búngiu ámu dan lun gayáraabei lan jebélurun iséri güriña lídoun jeméragun, lugúndun adímurejati Búngiu lídaangiñe lé meja laríñagubei Davíd sarágu dan lárigiñe, tídan Lerérun Búngiu.

Ugúñe, láu jagáambuni le laríñagubei Búngiu,

medéreratá janígi lun.

⁸ Lun jamúga fulásu lan lé meja ñíjin lubeí lanügaña Josué Israelítagu fulásubei lánina eméraguni le uágubei ladímureja Búngiu, madímurejaanyati jamúga Búngiu sarágu irúmu lárigiñe jebélurun Israelítagu lídoun jageíra luágu “ugúñe lan dan” lun jagáambuni Búngiu, gayára lámuga jebélurun lídoun jeméragun.

⁹ Ítara líña lubeíti, níjeingua ában eméraguni le gumúti joun lánigu Búngiu,

¹⁰ lugúndun le ebéluruti eméragua lúma Búngiu siélu, eméraguati lueí luwádigimari ítara quei leméragun meja Búngiu lueí luwádigimari lárigiñe ladügüni uboú.

¹¹ Lúnti lubeíti wafíñerun le tímatimaati luágu Jesucristu lun gayára lan webélurun lídoun eméraguni siélu, faládügü liñálin ában wádaangiñe jáni já meja mafíñerunbaña jémpulu, ábame leféridirun.

¹² Lugúndun mítaraantu Lerérun Búngiu queísi ában cátei le jilálalibei, lubáragiñe líra, gabáfuti lun lasáansiraguni wagáburi. Belútu tídoun wanígi

queísi ában efeín to biángua tamána, belú tugúya chülü túmoun wawáni lúma wáni espíritu. Furáangügüda tumúti sun warítangun lúma sun wayúmajan, arúfuda tugúya cátañañadiwa lan.

¹³ Úati ni ában gürígia le ladügübei Búngiu lun gayára lan larámudangun lueí laríjin Búngiu, furáanguti sun cátei lun, le únbei lúmaba lan wagúsera.

Jesúsu wafádiriñebei le tímatimaati

¹⁴ Jesúsu le Liraü Búngiu, ligía wafádiriñebei le tímatimaati, le belújalibei siélun lun laráramun ligíbugiñe Búngiu abúyeija luágu wafúleisein. Ligía lunti lubeí derégüdagu méme wamá lídan ligáburi wafíñen.

¹⁵ Gayáraati gudémejabu lan Jesucrístu le wafádiriñebei woun luágu wadébilin, lugúndun ligía guánarügü súfuriti sun luwúyeri ouchwaguni quei wagía, mafígounjaanti.

¹⁶ Ligía lunti lubeí wayarafadun lun Búngiu le jínsiñejabúbei woun, láu afíñeni, lun gudémejabu lan woun, íderagua láwame láu lareíni lídan wemégeirun.

5

¹ Según wagáburi, wagía juríu, ságü ában fádiri le íñutimáabei anúadajoúati wadaangiñe lun ligíaba lan wachügüdüna ligíbugiñe Búngiu, lun gíñe líchuguni edéweejani lun Búngiu lueígiñe jóubadina gürígia, lúma adágaragüdüni luágu lifígoun lúma luágu jafígoun jíbiri gürígia.

² Quei débili lan fádiri guánarügü quei furúmieguarügü gürígia, gayáraati gudémejabu lan joun gafígountiña jáma acháragadutiña,

³ áni ladüga lidébilin guánarügü queísi furúmieguarügü gürígia, gásu gíñe ladágaragüdüni luágu lifígoun guánarügü queígubeirügü luágu jafígoun jíbiri gürígia.

⁴ Siñáti ladáagun ában gürígia lúngua fádirime le íñutimaabei láu láni lúngua, Búngiu anúadirubalin, rúleí ubáraü le lun queísi meja lasúseredun lun Aarón le meja furúmiñeti fádiri le íñutimaabei.

⁵ Ítara líña lasúseredun lúma Crístu, máma ligía íchaagubei lúngua fádirime íñutimaati láu láni lúngua, Búngiu íchugubalin ubáraü weíriguti le lun quei buga laríñaguni lun.

Niraü amürü,
rúnaali ubáraü le bun ugúñe.

⁶ Aríñagati gíñe tídan méme líburu to Lerérun Búngiu.

Fádiri amürü lun sun dan,
le líbe Melquisedéc.

⁷ Dán meja le laganoúnbei Crístu ya ubouágu, ayúmuraguati meja láu umálali jéreti lúma sarágu águiraü lun Búngiu le gabáfubei lun leséfuruni lídaangiñe ouweni le lúnbei lasúfurirun. Ába lagáambuni Búngiu ladüga derégeguñu líña lan Crístu lúngua lun lugúndan Búngiu.

⁸ Láu sun Liraü lan Búngiu Crístu, chülüti dan lun larúfuduni lagáambadi láu lawánduni asúfuriruni.

⁹ Nübinti lun ábanbei lan asálbaragülei le gumúti láu lasúfurirun, lun gíñe ligíaba lan íchigei asálbaruni le magúmuchaditi joun sun ja ñüdüntiña láu le lubeíbei.

¹⁰ Ába lanügüni Búngiu Crístu quei fádiri íñutimaati líbe Melquisedéc.

Wuríbani le líchugubei lígirúniwa afíñeni

¹¹ Gíbeti lunti waríñaguni jun luágu Crístu lúma Melquisedéc, jénreenguti laríñawagún furáangu, lugúndun siñá lan gunfaráanda jumáni.

¹² Sügüjali sarágu dan lúmagiñe jasálbarun, lunti jamúga gayáraajali lan jarúfudajani Lerérun Búngiu joun ámu, áni busén mémegidün narúfudajaniya

buri cátei létima ménreengúnbei lídaangiñe Lerérun Búngiu jun. Irájüñügidün lídan jafiñen, queísi irájüñü ja gásubaña játun míligi lubáragiñe jamúga jeígin eígin le dügüdati.

¹³ Afíñetiña ja buséngiñabaña larúfudajoúniwa cátei létima ménreengúnbei tídaangiñe Lerérun Búngiu joun, ítara jáña quei irájüñü ja gurágiña—úagili gunfaráanda jamáni Lerérun Búngiu buídu.

¹⁴ Ja weínamujañábaña lídan jafiñen, subúdi Lerérun Búngiu joun buídu, subúdi jamei arúfudajani le buídubei lúmoun le mabuídunbei.

6

¹ Queímoun méme lubeíti wabáruaguóun lídan wasúbudin luágu Lerérun Búngiu, ígira wamámugei arúfudajani le ménreengúnbei libügürü Crístu lun watúriajani lujúlilin-ágei. Marítagua wamá luágurügü lébu wafiñen, quei buri ligirún binádu igáburi le málati, lúma buri afíñeni luágu Búngiu,

² arúfudajani luágu badísei, líchugúniwa újabu jábulugu afíñetiña, jásaarun jiláaña lídaangiñe ouweni, lúma lagúmujoún lagúseragüdüniña Búngiu gürígia,

³ queímoun wabáruaguóun lídan wasúbudiruni lujúlilin-ágei Lerérun Búngiu, láu lubáfu wawágu.

⁴ Gürígia ja resíbi jamáalibei larúgounga ában weíyaasu, resíbi jamei Crístu queísi jasálbaragüle, resíbi jamei gíñe Sífiri Sándu,

⁵ geféentiña luágu ugúndani le jasándirubei láu jalíjanun Lerérun Búngiu, lúma lubáfu Búngiu le siélubei jawágu ya ubouágu—

⁶ ánjein jíchiga janágan luágun Crístu lárigiñe sun cátei líra, ába jagíribudun járigoún lídoun binádu jagáburi, siñaalime jaságüríjan, siñaalime gíñe lánigu jamá Crístu. Lun jamúga jíchuguni janágan luágun Liraü Búngiu lárigiñe jafiñerun luágu, queísigubeirügü jamúga jádaraguñeinya lan luágu gurúwa, jéjerajaña gíñe láu jagíbugiñe gürígia.

⁷ Gürígia ja eíbugubaña buídu lúma Crístu, ítara jáña quei múa le achúurubalin júya le áburujabei luágun, ában líchugun múa ligía ában alúbajani buíti joun ja ñadágimeinbalin, ladüga binílaali lán buga Búngiu múa ligía.

⁸ Gürígia ja íchugubaña janágan luágun Crístu, ítara jáña quei múa le ñí lumuti lájücha jíyu lúma lagübüri jíduru, úati ju lan lun ni cáta. Láburujaba lábun líñaragun Búngiu, ábame lagudún.

Eménigini le adügübei lun derégüdagu wamá

⁹ Láu sun wadímurejan ítara, nidújeñu jínsiñetiña nun, afíñetiwa luágu ítara júba lan quei múa le íchugubei inádiri buíti, áni jibíjubei sun abíniruni le ñübinbei woun luágu wasálbarun.

¹⁰ Lugúndun úaraguati Búngiu, áni mabúlieidun lubei le adüga jumáalibei, lúma ínsiñejabuni le arúfuda jumáalibei lun láu jíderaguniña jidújeñu luágu afíñeni, cátei le anjünjaguabei adügei.

¹¹ Buséntiwa lun ítara méme lan cáda ában jídaangiñe, arúfudei afíñeni le dari lúmoun joúnwen, lun gayáraabei lan jibíjini le jagúrabubei—lun jebélurun siélun.

¹² Mabúseerúntiwa lun jamágualigudun lídan cátei le lání Búngiu, busénrügütiwa lun jáyeijani jagáburi já meja afíñebaña buídu buídu luágu Búngiu, awánda jamei sun asúfuriruni luágu, ába jerésibiruni le uágubei laríñaga Búngiu luágu líchugubei lan jun.

¹³ Dán meja le laríñagubei Búngiu lun Abrahám luágu labínirubei lan, fiñúti luágu guánarügü líri ladüga úa lan ámu weírigutimáati luei lun láfiñurun luágu,

¹⁴ ába laríñagun. “Nabínirubadibu sarágu, níchuguba gíñe sarágu adügawaguni bun.”

¹⁵ Agúrabajati Abrahám láu gurásu, ába lerésibiruni le uágubei laríñaga Búngiu lun.

¹⁶ Dan le jáfiñurun gürígia, luágu ában le weírigutimáati jaweí jáfiñura, áni choúrujaña ligíati ában cátei láu fiñún, úaali ámu cátei lun laríñawagún.

¹⁷ Ligía lachoúrurunbalin Búngiu lerérun láu fiñún, lugúndun busén lan larúfuduni furáangu woun, wagía le lúnbei werésibiruni lalágaante Abrahám, luágu lagúnfulirubei lan lerérun luágu wasálbarun, masáansirunga ni cáta lídaangiñe.

¹⁸ Rúlaali Búngiu lerérun woun, rúleí láfiñurun luágu, bián cátei ligía, gayáraati wemenigidun luágu, ladüga siñá lan leyéejan Búngiu. Áni láu cátei ligía, sun ja ñübinbaña lun Búngiu lun jasálbarun, gayáraati janügün gurásu, gayáraati jasúbudiruni le tímatimaati luágu jasálbaruba lan áni jebéluruba siélun.

¹⁹ Ágüdaja lumútu eménigini le wawáni derégüdagu, choúruña, queísi lágüdajanun oúnguru ugúnein derégüdagu. Choúruwaña líña eménigiruni le wabíjibe buídu buídu, ragüña líña luágu Búngiu lídan fulásu sándutimáati siélu,

²⁰ le ñíjin lubei lebélera Jesúsu ában weíyaasu wawágu lun ladáruni úma wabá. Níjein ñi guetó afádirija wawágu ligíbugiñe Búngiu queísi ában fádiri iñutimáati le líbe Melquisedéc.

7

Jesúsu fádiri líbe Melquisedéc

¹ Melquisedéc le, urúei lídan meja fulásu le gíribei Sálem, lufádirinein gíñe Búngiu le iñutimáabei. Dan le lagíribudunbei Abrahám wuríburugugiñe lárigiñe lagáñeiruni wuríbu jawágu urúeigu, ába láfuridun Melquisedéc lubároun, ába labíniruni,

² ába líchuguni Abrahám ában lídaangiñe cáda díisi lídaangiñe le lagáñeirubei lídan wuríbu lun. Míni lan íri Melquisedéc lídan furúmiñeti cátei, “urúei richáguati” queí mejati lurúeite lubei Sálem, áni “darángilaü” míni lan Sálem, ítara líña lubeiti “lurúeite darángilaü” Melquisedécbei.

³ Ibídiñewati ca lan lagübürigubaña, ibídiñeti gíñe ca lan linébaanfaangubaña, ibídiñewati ni cáta libügürü lagüriajoun ni libügürü loúnwen, liyáwa Liraü Búngiu ligía, ában fádiri lun sun dan.

⁴ Aríja jumeíti luágu weírigu lán meja Melquisedéc. Abrahám guánarügü lé meja binádu wadúje, rulumuti ában lídaangiñe cáda díisi lun lídaangiñe le lagídarubei jaweí urúeigu lídan wuríbu.

⁵ Según lilúrudun Moisés, fádirigu ja linébaanfaangu Leví lúnti jagúburajani ában lídaangiñe cáda díisi jámagiñe gürígia lídaangiñe sun cátei, láu sun jadújeñu jamá, linébaanfaangu Abrahám jáledi.

⁶ Ánjeinti Melquisedéc, láu sun máma lan linébaanfan Leví, agúburaja lumúti ában lidíisin cátei luei Abrahám, lé buga erésibirubalin dimúrei lúmagiñe Búngiu. Ítara líña labíniruni Melquisedéc Abrahám,

⁷ áni siñáti lasígeneruni ni ában luágu weírigutima lan le abínijabei sügü láu le abínirúabei.

⁸ Ya wádan, fádirigu ja erésibirubalin cáda lidíisin cátei, wügüríña goúwedaditiña, ánjeinti luágu Melquisedéc, tadímurejan Lerérun Búngiu luágu quei luágu ában le wínwangili.

⁹ Áni gayáraati laríñawagún luágu Leví jáu sun fádirigu ja linébaanfaangu ja agúburajabalin cáda lidíisin cátei guetó, luágu fáyei jamáni gíñe lun Melquisedéc lídan óra le lafáyeirunbalin Abrahám lun,

¹⁰ lugúndun lídan ában oúbaü, barü lumutiña buga Abrahám linébaanfaangu ja magüriajoungiñabaña lídan lúgubu dan le láfuridunbei Melquisedéc lubároun.

11 Jádaangiñe fádirigu ja linébaanfaangu Leví jerésibirei Israelítagu lilúrudun Moisés, áni Aarón furúmiñetibeí jafádirin. Gürígia ja afálarubalin lúrudu ligía, lun jamúga gayára lan jasálbarun le tímatimaati lueígiñe, memégeirunwali jamúga lachúlaagun ámuya fádiri, máma líbe Aarón, líbe Melquisedéc.

12 Lugúndun dan le liábin fádiri lídaangiñe ámu adügawaguni, sáansiwati gíñe lúrudu lé buga lábugiñebei lafádirija.

13 Wabúreme Jesucrístu, queísi fádiri lídaangiñe ámu adügawaguni queísi Melquisedéc, sáansiguati gíñe lúrudu le lábugiñebei lafádirija. Tariñajare Lerérun Búngiu luágu lídaangiñeti lan ámu liraú Israél lueí Leví liábin Crístu—ában adügawaguni le úagilibei ni ában jádaangiñe afádirijati.

14 Lugúndun subúdiwati buídu luágu jádaangiñe lan linébaanfaangu Judá liábin Wabúreme Jesucrístu, áni mariñagunti Moisés ni cáta jawágu adügawaguni ja dan le ladímurejaanbei jawágu fádirigu.

15 Áni furángutimáati le dan le liábin Jesucrístu lun lafádirijan queísi Melquisedéc,

16 máma láu ában lúrudu le aríñagubei cába lan ídaangiñe adügawaguni liábin, liábin lun fádiribeí lan lugúndun gabáfu lan lun labágaridun lun sun dan.

17 Niján le lariñagubei Búngiu luágu Jesucrístu.

Ában fádiri amürü lun súnwandan,
le líbe Melquisedéc.

18 Gumúguati lubeíti binádu gumádi le lilúrudunbei Moisés, le lábugiñebei jafádirijan Levítagu, lugúndun nírein lan mégeiti luágu,

19 mabáfuti lúrudu ligía lun lasálbaruniña gürígia lídaangiñe jafígoun. Lewéñeguati, níjein ában iséri aráanseruni le buítimaati, le ídaangiñebei gayára lan wayárafadun lun Búngiu.

20 Áni láu ában fiñún ladügei Búngiu aráanseruni le lun Jesúsuba lan wafádiriñe.

21 Ja jíbiri fádirigu, máfiñurunwati dan le líchugunbei jafúlasun joun, ánjeinti luágu Jesúsú, le láubei fiñún líchugúa lufúlasun lun, lariñajare tídan Lerérun Búngiu.

Áu Búngiu le Abúremeinbei, fiñújadina bun,
masáansiragun nubeí narítapun.

“Ában fádiri amürü lun súnwandan,
le líbe Melquisedéc.”

22 Ligía Jesúsú lubeíti achoúrurubei ában darádu buítimaati lueí le furúmiñeti.

23 Já meja jíbiri fádirigu, chülütíña agíbedagua lugúndun quei ába lán buri jounwen, siñáti jasígirun,

24 ánjeinti Jesúsú, quei moúnwen lan, másügürünbei lifísiute queísi fádiri lúmoun ámu.

25 Ligía gayára lubeí lasálbaruniña ja ayárafadubaña lun Búngiu lídaangiñe le tímatimaati lun súnwandan, lugúndun gabágariti súnwandan lun layúmuragun lun Búngiu jawágu.

26 Jesúsú lubeíti fádiribeí íñutimáati le wabúseerúbei. Jarúma ligía, úati wuríbani lídan, ni figou, máma ligía ában jáma gafígountiña, iñurúa ligía íñutima lueí sun cátei siélu lun lañúurun luma Búngiu.

27 Mítaraanti quei jíbiri fádirigu íñutimaatiña ja gásubei jáfarun anímaalu lun jadágaragüdüniña quei sacrificísiu ságü wéyu, furúmiñe luágu jafígoun guánarügü, lárigiñe luágu jafígoun jíbiri gürígia. Lubáragiñe líra, adúga lumúti Jesúsú sacrificísiu ábanrügü weíyaasu dan le líchaagunbei lúngua lun loúnwen luágu jafígoun gürígia.

28 Wügüríña ja débilibañña, jagía líchugubaña lilúrudun Moisés queísi fádirigu, ánjeinti lárigiñe lidáani lúrudu, ába láfiñurun Búngiu luágu Liraü lun ladügüni fádirime, le buídubei adügün le gumúti lun súnwandan.

Jesúsu búyei lun ában iséri darádu

8

1 Le buítimaabei lídaangiñe sun le waríñagubei, luágu ítara líña lan wafádirin le íñutimaabei, áni ñurújali lueígiñe loúnwenren Búngiu siélu,

2 áni lesériwiduñña queísi fádiri lídan fulásu le sándutimáabei le ladügübei Wabúreme Búngiu yágüta siélu, máma fulásu le sándutimáabei le jadügübei gürígia ya ubouágu.

3 Sun fádiri íñutimaati líchugúniwa lun líchugun edéweejani lúma adágaragüdüni lun Búngiu, ligía gásu lubei giñe níjein lan som cátei lúnti ladágaragüdüni Jesucrístu lun Búngiu.

4 Lun jamúga yáñein lan Jesucrístu ubouágu, mámañein jamúga fádiri, lugúndun añájeingua fádirigu adágaragüdütiña le uágubei lariñaga lilúrudun Moisés.

5 Fádirigu ja, jadügüni jawádigimari láu buri cátei le liyáwarügüti lé buri siélubei. Subúdi wamúti luágu iyáwaü lan, lugúndun le lubábei ladügünun Moisés lúban Búngiu, ába lariñagun Búngiu lun. “Adügabeítia sun cátei queísi iyáwaü to narúfuduboun bun luágu wübü.”

6 Weíriguti lafádirijan Jesucrístu sügü láu jafádirijan fádirigu ubouágu, queísigubeirügü buítima lan darádu le uágubei labúyeija lúma Búngiu luágu jáni gürígia fuleísei ubouágu, áni buítimaati cátei le líchugubei iséri darádu ligía.

7 Lugúndun lun jamúga meja buídu lan furúmiñeti darádu le gumúti, le ladügübei Búngiu jáma binádu wagübürigu lídaangiñe Moisés, memégeirúnwati jamúga ábanya libíaman darádu.

8 Magúndaatí buga Búngiu laú furúmiñeti darádu ladüga mabáfu jamá binádu wagübürigu lun jagúnfulirun lúma darádu ligía. Ába lariñagun tídan Lerérun.

Lariñajare Jabúreme Búngiu. Lachülürüba wéyu lun nadügün iséri darádu jáma buri linásiñun Judá lúma Israél.

9 Mítaraanbei quei darádu le nadügübei jáma binádu jagübürigu le wéyu le nárügüdünbalin jájabu lun naságaruniña Ejíptogiñe, magúnfulirun jamúti meja nidáradun ligía, ligíati nígirunbáliña joúngua, líña lariñagun Búngiu.

10 Niján darádu le lúnbei nadügüni jáma linásiñun Israél lárigiñeme buri wéyu ligía, líña lariñagun Jabúreme.

Níchugubei nugúmadin lídoun jarítangun, ábame nabürüjani tídan janígi.

Áubati Jabúngiute, jagíame nánigu.

11 Memégeirúnwabei lun larúfudajoúniwa nuágu, maríñagunbei wügürí ni lun lidúje ni lun libíri lun jasúbudiruni Búngiu le Jabúremebei,

lugúndun jasúbudirubadina súngubei, lúmagiñe le ñúraütimaabei darí lúmoun le weíritimaabei jádaangiñe.

12 Ferúduna nubei wuríbani le jadügübei, nabúleidubei jafígoun lun sun dan.

13 Adímurejaali ligía Búngiu luágu ában iséri darádu, rúlaalírügü líña le furúmiñeti quei binádu, áni cátei le binádujalibei, mayúsurunwadügüyaali.

9

Lúban Búngiu to ubouáguna túma Lúban Búngiu to siéluna

¹ Lídan meja le furúmiñeti darádu le ladügübei Búngiu jáma binádu wagübürigu, rúmuti meja gumádi joun ída lúba lan jájuduragun lun, ñíñoun gíñe ában múna to sánduboun ya ubouágu to lúbanboun Búngiu.

² Ítara líña ligáburi taráanserún múna tugúya. Múnada, ñíñein bián rúmu, lídan furúmiñeti rúmu le gírubei Fulásu Sándu, ñíñein lébu sanúdelu lúma dábula le ñí tubei fein to biníwaboun.

³ Ñíñoun ában bélu labádinagua bián rúmu ligía, Fulásu le Sándutimáabei líribei libíaman rúmu.

⁴ Lídan rúmu ligía, ñíñein ában latárü gólu lun lágudajoún cupáli ñi, túma bágüsi to lánina darádu, gólu sun touba. Turágeirugu bágüsi tugúya, ñíñein ában ágeidinaü gólu le gádaanbalin eígini le gírubei maná, ñíñein gíñe luwénwen Aarón le ájüchagubei, lúma dübü le uágubei labürjóúa díisi gumádi le líchugubei Búngiu lun Moisés.

⁵ Tougiñe bágüsi tugúya, ñíñoun jayáwa querubínes, ja queísigubeirügübaña ánjeligu, arúfuda jamúti querubínes jagía luágu ñíñein lan Búngiu lídan fulásu ligía. Darúguatiña táu bágüsi tugúya, le ñí lubei ferúdunawa lan figou, láu jarúna. Mabúseerúntiwa wadímurejan sarágu luágu buri cátei le guetó.

⁶ Aráanseñu líña buri cátei ítara, belútiña fádirigu lídoun Fulásu le Sándubei ságü wéyu lun jafádirijan.

⁷ Ánjeinti lídoun Fulásu le Sándutimáabei, fádiri rügüñein íñutimáati ebélura ñíjin ában weíyaasu lídan írúmu, áni dan le lebéllurun, gásu lanügün játa anímaalu lun ladágaragüdün luágu lifígoun guánarügÜ lúma luágu jafígoun gürígia.

⁸ Láu cátei le, larúfudajaña Sífiri Sándu woun luágu sun lan seríwigili lan Fulásu le Sándubei lúma buri sun igáburi le adügübei ñi, madárarúngili úma lídoun Fulásu Sándutimáati.

⁹ Sun igáburi lé meja adügüwabei lábugiñe binádu lidáradun Búngiu, liyáwa iséri lidáradun Búngiu wáma le seríwigilibeí lídan dan le. Cátei lé buri meja íchugübei lun Búngiu, lúma cátei le adágarawagüdüwabei lun lábugiñe binádu darádu, siñáti meja larúmadagüdünun jawáni ja agúnfulirubaña lúma Búngiu ítara.

¹⁰ Lúrudu buri lánina binádu darádu luágu jagúnfulirun lúma Búngiu, luáguti eígini le lúnbei jeígin gürígia, uníñein le lúnbei játuni, lúma buri igáburi lánina arúmaduni, mabuíduragüdün lumútu buri cátei líra uwáni, lúntirügü lesériwidun darí lasáansiruni Búngiu sun cátei láu liábin Crístu.

¹¹ Láu liábin Crístu, guetó ligía fádiri íñutimáabei luágu iséri darádu le íchugubei ubuíduni woun sügü láu le binádubei. Lúban Búngiu le ñí lubei lafádirija, buítimaatu sügü táu tó meja ubouáguboun. úati mégeiti tuágu, ladüga máma jadüga gürígia múna to siéluboun, to uáguboun nadímureja.

¹² Belújali Crístu lídoun Fulásu Sándutimáati siélu le ñí lubei Búngiu, máma lun ladágaragüdün játa gábara jáma bágasu ñübürigiña luágu jafígoun gürígia, dagágüda lumúti líta guánarügü. Láu ábanrügü lebéllurun, ligía ibíjaali asálbaruni magúmuchaditi woun.

¹³ Inárüni luágu lábugiñe lan binádu darádu, gabáfuti meja játa bágasu jáma gábara, lúma jabálgín bágasu ñübürigiña, lé buri áturawagübei jawágun ja marúmanbaña, lun ledéregeruniña lúma lun larúmadagüdüniña bougudigiñe jabíti ligíbugiñe Búngiu.

¹⁴ Áni ánjein ítara líña lubeí, ¡gúbumégia gabáfutima lan líta Crístu! Lídaangiñe Sífiri Sándu le magúmuchadibeí, rúguati Crístu lúngua lun Búngiu quei ában adágaragüdüni luágu wafígoun le úati dáseiti luágu, áni jarúmagüda lumútu líta

wawáni, gidá lumútiwa lídaangiñe lidíjeri arítagni luágu wagúnfulirun lúma binádu darádu, adüga lumútiwa lun wabúseerun wesériwidun lun Búngiu le wínwanbei.

¹⁵ Ligía Jesucrístu lubei búyeibei lun ában iséri darádu le adüga láalibei Búngiu wáma. Loúnwenbei Crístu lun ferúdunawa lan figou le adügübeí lábugiñe binádu darádu, lun giñe ja lan únbaña wájali lan Búngiu lun lánigu jamá, gayára lámuga jerésibiruni labínirun Búngiu le laríñagubei luágu líchugubei lan queísi alágan.

¹⁶ Lugúndun dan le líchugun ában gürígia lújabu árigi tuágu ában gárada luágu alágan, mabáfutu gárada tugúya dari lun lasúbudirúniwa luágu jiláali lan gürígia ligía.

¹⁷ Mebégitu gárada tugúya dan le wíngwángili gürígia ligía, dari dan le jiláali.

¹⁸ Ligía giñe láu lubei léserun jítaü ladügüwa furúmiñeti lidáradun Búngiu jáma lumútuniña.

¹⁹ Subúdigüda lumúti Moisés sun lugúmadina lúrudu joun sun gürígia, lárigiñe, ába lanügün gamísa funátu lúma lilímun isópo, ába ladüdüragüdüni lídan dúna lúma játa bágasu ñübürigiña jáma gábara, ába labájichagunun lilíburuna lúrudu jáma giñe sun gürígia.

²⁰ Ábati laríñagun joun. “Niján jítaü le achoúrurubalin lidáradun Búngiu júma.”

²¹ Bajígua lumútu giñe Moisés Lúban Búngiu lúma sún buri cátei le ayúsurubei lídan jájuduragun lun.

²² Según lúrudu ligía, jarúmagüdüwati sun líbe-ágei cátei láu jítaü, áni úati ferúdunawa lan figou ánjein úa láwiyurun jítaü.

Lachíbuni loúnwen Crístu wafígoun

²³ Busénwati lubei mejati ladágaragüdüniwa játa anímaalu lun larúmadawagüdüni buri cátei le, sun líra, iyáwaü rügüñein lun cátei le inárüni le siélubei, le ñí tubei Lúban Búngiu tímatimaatu, áni busénwati ladágaragüdüniwa jítaü le buídutimaati sügü láu játa anímaalu luágu cátei lánina siélu.

²⁴ Mebéluti Crístu tídoun Lúban Búngiu tugúra to jadüga wügüriña ya ubouágu, to meja tiyáwarügüboun Lúban Búngiu to tímatimaatu siélu, siélun méme lebélera, le ñí lubei larúfudagua lúngua guetó ligíbugiñe Búngiu lun lafádirijan luágu wafúleisein.

²⁵ Belúti fádiri íñutimaati le juríu lídoun Fulásu Sándutimaati ában weíyaasu lídan irúmu lun ladágaragüdüni jítaü le máma líta, ánjeinti Crístu, míchaagunti lúngua quei adágaragüdüni sarágu weíyaasu lun lachíbuni figou.

²⁶ Lun jamúga ítara líña lan, gásu jamúga loúnwen sarágu weíyaasu lúmagiñe ladügün ubou. Masúseredunti ítara, lubáragiñe líra, dan le lagúnfuliruña lán buri dan, chülüguaali Crístu ábanrügü weíyaasu, íchaagueina lúngua lun lagídaruni figou.

²⁷ Ítara quei sun lan gürígia lúnti lan jounwen ábanrügü weíyaasu, lárigiñeme ábame jagúserawagüdüni,

²⁸ Ítara líña giñe líchaagun Crístu lúngua ábanrügü weíyaasu lun lagídaruni jafígoun gürígia. Lachülürüba wéyu lun lagíribudun Crístu ubouágun, mámaalime lun lagídaruni figou liábin, liábinba lun lanügüniña sun ja agúrabubalin liábin siélun lun jabíjini sun cátei lánina jasálbarun.

10

¹ Lilúrudun Moisés liyáwa rügüñein méja buri cátei buíti lé meja lúnbei lanügüni Crístu joun gürígia, le lásíñerubei lúrudu íchiga joun. Ja lubeiti ayárafadubaña lun Búngiu lídaangiñe játa anímaalu le adágaragüdüwabei lun Búngiu según lilúrudun Moisés, lé buri adágaragüdüwabei ságü irúmu, siñáti meja jadáriruni jabuídurun le gumúti ítara.

² Lun jamúga gayára lan labuíduragüdüniña lúrudu le gumúti ligíbugiñe Búngiu, ába jamúga madügünjali lan adágaragüdüni buri le, lugúndun ja adügübalin, láu jamúga jarúmadun ában weíyaasu lídaangiñe jafígoun lun súnwandan, masándiragunjaña jamúga jóungua láu dúru luágu figóu.

³ Seríwiti adágaragüdüni buri le lun larítaguagüdüniña luágun jafígoun ságü irúmu,

⁴ quei siñá lubei lagídaruni játa bágasu lúma játa gábara figóu.

⁵ Ligía laríñagunbei Crístu lun Búngiu dan le lebélorunbei ubouágun. Mabúseerúntibu adágaragüdüni ni anímaalu íchugúti bun, aráanserügütibu ában úgubu nun lun nedéregeruni bun.

⁶ Magúndaantibu láu buri jagudún anímaalu luágu latárü bun, ní buri láu adágaragüdüni lun ladáuragun figóu.

⁷ Ábati naríñagun. “Ñübinjadina ubouágun lun nadügüni bugúndan, Nubúngiute,

ítara queisi bürüwañu líña lan nuágu tídan Berérun.”

⁸ Furúmiñe, laríñaga luágu mabúseerun lan Búngiu, magúndan ligía, láu adágaragüdüni, ni jáu anímaalu íchugúti lun, ni anímaalu gudáwati luágu latárü, ni adágaragüdüni lun ladáuruni figóu, láu sun lán buri cátei le uágubei laríñaga Búngiu lídaangiñe Moisés joun gürígia lun jadügüni.

⁹ Laríñaga Crístu lárigiñe. “Ñübinjadina lun nadügüni bugúndan, Búngiu.” Laníchigu líra, ñübinjali Crístu ubouágun lun lagúmuchaguagüdüni igáburi le ladágaragüdüniwa anímaalu, lun líchaagun lúngua lewéñegua.

¹⁰ Ligía lugúndanbei Búngiu, lun larúmadagüdüniwa ligíbugiñe láu loúnwen Jesucrístu ában weíyaasu lun sun dan luágu wafígoun.

¹¹ Sun fádirigu juríu, ságü wéyu jadügüni buri ában méme adágaragüdüni, láu sun siñá lan lagídaruni adágaragüdüni ligía figóu.

¹² Ánjeinti Jesucrístu, ában rügüñein weíyaasu líchaagun lúngua luágu figóu lun sun dan, ábati lagíribudun siélun, ába lañúurun lueígiñe loúnwenren Búngiu.

¹³ Níjein ñi guetó agúrabaja líchuguniña Búngiu láganiñu lábugiñoun lubáfu.

¹⁴ Láu loúnwen ábanrügü weíyaasu, ába labuíduragüdüniña lánigu Búngiu, le gumúti, lun sun dan.

¹⁵ Choúru lumúti gíñe Sífiri Sándu cátei méme ligía woun, lugúndun laríñaga le laríñagunbei Búngiu.

¹⁶ Darádu le lúnbei nadügüni jáma lárigiñeme buri wéyu ligía, ítara lúba, líña laríñagun Búngiu.

Níchugubei nugúmadin tídoun janígi, ábame nabürüdüni jarítangunrugu.

¹⁷ Lárigiñe laríñaga.

Marítagundügüyaadináme luágu jafígoun ni luágu wuríbati buri le jadügübei.

¹⁸ Dan lubeíti le ferúdnawaali figóu lun sun dan, memégeirunwali ámu adágaragüdüni luágu figóu.

Lúnti wayárafadun lun Búngiu

¹⁹⁻²⁰ Ligía lubeíti nidújeñu, láu loúnwen Crístu luágu wafígoun, gayáraajali wayábin ligíbugiñe Búngiu manúfudeiga. Úaarú bélu lun teréderuniwa lueí webélorun lídoun Fulásu le Sándutimáabei, le ñí lubei Búngiu, gidá lumutu Crístu bélu tugúya láu loúnwen. Junrénti ában iséri üma woun lúmoun Búngiu, ában üma le anügübalíwa lídoun íbágari magúmuchaditi.

²¹ Jesúsu wafádiriñebei íñutimaati tídan Lúban Búngiu siélu,

²² ligía lúnti lubeí wayárafadun lun Búngiu láu tarúma wanígi, lúma láu sun wafíñen derégüdagú luágu. Jarúmagüda láaru wanígi lun masándiragun wamá

woungua láu dúru luágu figou lárigiñe lachibúniwa, badísejadiwa láu dúna jarúmati.

²³ Ítara méme wamá derégüdagu lídan wafiñen, masáansiragúnga, lugúndun gayára lan wemenigidun luágu Búngiu lun lagúnfuliruni lerérun lun líchuguni íbágarí magúmuchaditi woun.

²⁴ Lúnti gíñe wáfaagun wíderaguniña wíbirigu lun jínsiñejabu jamá, lúma lun jadügüni le buídubei.

²⁵ Moún lumuti wafálaruni jémpulu jáni ja jéchubaña lun mídin jamá lídan wadámuridagun, wagía afíñetiña, le lúnbei wadügüni, lun wíchugun gurásu joun wíbirigu, guetótima láu aríja wamáni luágu yaráfaali lan luwéyuri Wabúreme Jesucrístu lun lagíribudun ubouágun.

²⁶ Lugúndun ánjawa afígounja láu wíchuguni wanágan luágu Crístu lárigiñe wasúbudiruni luágu ligía rügüñein lan agídarei figou, úaali ámu luwúyeri lun wasálbarun lídaangiñe wafígoun.

²⁷ Ában rügáli cátei lun wagúrabajani, lun lagúseragüdüniwa Búngiu láu ában lanárime igáñi, ábame wagúnrichawagún jáu sun jíbiri láganiñu Búngiu lídan wátu geméti.

²⁸ Dan le ladüraaguni ában gürígia lilúrudun Moisés, áni añájein biáma o ürüwa geféentiña luágu, ába laríñagun lilúrudun Moisés luágu lúnti lan loúnwen gürígia ligía, magúdemejabuti lúrudu lun.

²⁹ Weíritimaati sáfuri le jadúnabei ja mebéresenbaña láu Liraü Búngiu, mebéresen jagía láu líta, anába jameí Sífiri Sándu le jínsiñejabubei joun. Líta Jesucrístu, ligía achoúrurubalin lidáradun Búngiu wáma, le adügübañiwa jarúma ligíbugiñe.

³⁰ Subúdi wamúti ligáburi Wabúreme Búngiu le aríñagubei. “Áu le lúnbei labeíchaguniña gürígia, áu le lúnbei lafáyeigüdüniña luágu jafígoun.” Aríñagati gíñe. “Nagúseragüdübaña numútuniña.”

³¹ ¡Fugiábu gürígia le uágunti láburuja ligáñi Búngiu le wínwanbei lun sun dan!

³² Jarítagua jumá luágu buri wéyu le sügüjalibei dán meja le jerésibirubalin larúgouna luágu Jesucrístu. Weíriti meja jasúfurirun lídoun meja dan ligía, áni awánda jumúti sun cátei láu gurásu.

³³ Añájein jídaangiñe, anabúatiña, ouserúa jagía wuríba ligíbugiñe guríriguaü ladüga jeíbugun lúma Crístu, jíbiri, sáfuritiña ladüga gamádagua jamá jáma ja wuríbabaña ouserúniwa.

³⁴ Gudémejabutün meja joun ja furísunrugubaña, ásta láu ugúndani ígiraguagüdatün júngua lun lagídarún le júmabei jueí, subúdiñu jumeín luágu níjein lan cátei júma siélu le buítimaati, le siñábei lagídarún jueí.

³⁵ Guetóti, meféridira jumeín lubeíti jeménigi luágu Búngiu, lugúndun jerésibiruba lan ában oúnwenbun afáyeiragülei siélu.

³⁶ Gagúraasun jumá, lun lárigiñeme lan jawánduni asúfuriruni queísi labúseerun Búngiu, gayára lámuga jerésibiruni le lúnbei líchuguni Búngiu jun, siélu.

³⁷ Taríñajare Lerérun Búngiu luágu lagíribudun Crístu ubouágun.

Málüjali ánjein ñübin le lúnbei liábin, madárasarunbei sarágu dan.

³⁸ Le nerésibirubei queísi richáguati nigíbugiñe, labágariduba láu lafíñerun nuágu, líña laríñagun Búngiu.

Ánjein leféridira lafíñen, magúndaanbadina lúma.

³⁹ Wagía, mítaraanbádiwa queí gürígia ja eféridirubalin jafíñen luágu Búngiu, ába jeféridirun, wasígiruba láu sun wafiñen luágu daríme wounwen, belú támuga wawáni siélu.

*Luáguti afíñeni***11**

¹ ¿Cáteigi afíñenibei? Afíñeni, achoúrurúni le gumúti luágu wabíjibei lan le wagúrabubei, lúma wachoúruruni le gumúti luágu nírein lán buri cátei láu sun maríjin wamáni.

² Niján luwúyeribei meja jafíñen jádaangiñe binádu wagübürigu luágu Búngiu, ába lagúndaarun jáma.

³ Láu wafíñen, wasúbudirei luágu Búngiu lan adügübalin ubouú láurügü lerérun, le lubeíti ubouú le waríjubei guetó, máma lídaangiñe cátei lé meja arijúabei ladügüwa.

⁴ Láu lafíñen Abél, dagágüda lumúti le labúseerúbei Búngiu sügü láu le ladágaragüdübei Caín, ligía lerésibirunbalin Búngiu queísi richáguati, ába lerésibiruni ladágaragüdün lun. Láu sun lubeíti jilá lan Abél, nijángua luwúyeri lafíñen queísi jémpulu woun.

⁵ Láu lafíñen Enóc, lanügüwa siélun moúnwenga, áni madárirúnwati lúgubu lugúndun barü lani meja Búngiu. Áni taríñajare Lerérun Búngiu luágu, luágu lubáragiñebei lán meja lanügün Enóc, gúndan lan Búngiu láu ya ubouúagu.

⁶ Ánjeinti wagía, siñáti gúndan lan Búngiu wáu ánjein mafíñen wabeí luágu, lugúndun lun wayárafadun lun, gásu wafíñerun luágu níjein lan áni líchuguba jafáyeiruája ja áluajabalin.

⁷ Láu lafíñen Noé, dan le lawísarunbalin Búngiu luágu ladágaruba lan ában oúnwenbun gúnran, láu sun maríjiñajagili lan gúnran, ába ladügüni le lubeíbei Búngiu, ába ládaragun ában oúnwenbun ugúnein lun lasálbarun jáu lufámilian. Arúfuda lumúti lafíñen Noé oúnwenbun mafíñeni le jawágubei jíbiri gürígia ubouúagu. Ába lanügüni Búngiu Noé queísi ában wügüri richáguati lúma, luágu lafíñen.

⁸ Láu lafíñen Abrahám, dan le lagúarunbei Búngiu lun lun lígiruni lageíra lun lídin lídoun ámu fulásu le lúnbei láni lan, ába ladügüni le lubeíbei Búngiu, ába láfuridun lageíragiñe, ibídiñounga lun jalíñounbei lan.

⁹ Ába laganouún lídan iséri fulásu ligía, láu sun teréncha lan ñi, ladüga lafíñen luágu lerérun Búngiu lun luágu líchugubei lan fulásu ligía lun. Laganouúa tídan múna adügütu láu jára anímaalú, ligía méme giñe jadügübei Isáac, le liraü, lúma Jacób, le libári, ladüga jalágaante lan fulásu ligía lúmagiñe Búngiu.

¹⁰ Adüga lumúti Abrahám sun líra ladüga agúrabaja lan lebélorun lídoun lubuídun ubúругu siélu le ladügübei Búngiu, le adúrarubei lun sun dan.

¹¹ Láu giñe tafíñen Sára, láu sun meja weíyaaru tan lun tagáraüdü, resíbi tumúti ubáfu lúmagiñe Búngiu lun tagáraüdü, garaütu ában irájü ladüga tafíñerun luágu lagúnfulirubei lan Búngiu le laríñagubei.

¹² Láu sun lubeíti weíyaali lan Abrahám lun garaü lan, ñübinti lun ganébaanfaangubei lan sarágu, quei warúguma ja siélubaña, quei giñe lágu buri ságoun le lárubei béya le siñábei labájüdü.

¹³ Jiláguatiña Abrahám jáma lirájüñü láu jafíñen luágu Búngiu, merésibirunga jameí sun le uágubei laríñaga Búngiu luágu líchugubei lan joun, subúdi jamúti luágu lídaanme lan dan le lúnbei liábin, lagúnfuliruba lan Búngiu láu lerérun, ába jagúndaaragun luágu. Subúdi jamúti luágu máma lan jageíra ubouú le, jayábin rügüña ebéluja queísi teréncha ya.

¹⁴ Gürígia ja arítagubaña ítara, arúfuda jamúti luágu jáluaja mémeña lan ában ageíraü lun jageírame.

¹⁵ Lun jamúga fulásu lan le ñígiñe lubeí jáfurida ageíraübei le jáluajabei, gayáraayati jamúga jagíribudun járiogún ñíjin.

16 Ában buga ageíraü buítimaati jabúseerúbei, ageíraü le siélubei. Ladüga níjein lan jarítagun luágu cátei le lánina siélu, ligía úa lubei nibúsigari lan Búngiu lun Jabúngiutebei lan, ába laráanserun ában fulásu joun siélu.

17 Dán meja le louchagunbalin Búngiu Abrahám láu laríñagun lun lun láfaruni liraü le Isáac jilágubei lun ladágaragüdüni lun, afíñe mémeti luágu Búngiu, rúguatí yebe lúngua lun ledéregeruni liraü le ábanrügüti,

18 láu sun aríñagaali lán buga Búngiu lun luágu sarágubaña lan linébaanfaangu lídaangiñe Isáac.

19 Subúdirügü liñáali Abrahám luágu gabáfu lan Búngiu ásta lun lásaaragüdüni Isáac lídaangiñe ouweni, áni ítagaraüyebe ladügüni Búngiu láu líchuguni Isáac lárigoún lun Abrahám lubáragiñe yebe láfaruni.

20 Afíñeti Isáac luágu ladügübei lán Búngiu le laríñagubei, ába laríñagun joun lirájüñü ja Jacób luma Esaú luágu labínirubaña lan Búngiu lídan dan le lúnbei liábin.

21 Láu lafíñen Jacób, dán meja le louwe lan, biní lumuti cáda ában jádaangiñe lirájüñü José, ába ladímurejan luágu luweírigun Búngiu, ragüñu luágu lígiri lubádun.

22 Láu lafíñen José, lubáragiñe loúnwen, aríñagati luágu jáfuriduba lan Israelítagu Ejíptogiñe, aríñaga ligía lun janügüni lábu jáma dánme le jígiruni fulásu ligía.

23 Láu jafíñen lagübürigu Moisés, dan le lagüriajoúnbei, ába jarámuduni luágu ürüwa játi, ladüga jaríjin luágu buídumeraü lan, janúfudetiña luei lúrudu le líchugubei urúei lun jañáradawagüdüniwa wügüríña irájüñü.

24 Láu lafíñen Moisés, dan le wügüríjali, májati lun lanügüniwa queisi tiraü liraü lurúeite Ejípto,

25 jímein lumúti lasúfurirun jáma lánigu Búngiu lubáragiñe laganouún buídu tídan lúban urúei, to lánina figou. Subúdi lumúti luágu madúra lan luwúyeri ugúndani ligía sarágu dan.

26 Rísitimaati lasándiragun lúngua láu lasúfurirun ünabuni lueígiñe Crístu le lúnbei liábin, sügü láu laganouún lídan sun lirísin Ejípto, lugúndun luágu afáyeiruaajaü le lúnbei líchuguni Búngiu lun, líchigei larítagun.

27 Láu lafíñen Moisés luágu Búngiu, ába lígiruni Ejípto, manúfudeiga luei ligáñi urúei, reídeiti derégüdagu lídan larítagun camá jamuga aríagu líña lun Búngiu le marijínbei.

28 Láu lafíñen Moisés ladügei fédu le gíribei páscua, ába loúnajan abájichaguei tubéneri jában Israelítagu láu jítaü lun dánme lan le lásügürün ánjeli le lánina ouweni, máfarun lámuga ni ában jaraü Israelítagu le íbugañaü.

29 Ladüga jafíñen Israelítagu luágu Búngiu, ába ladügün Búngiu üma joun lídaangiñe dúna le gíribei Barána Funáti, lun gayára lan jásügürün eíbugeina camá jamuga múa le mábeiti. Dánti le jabúseerúnbei Ejíptona lun gíñe jásügürün quei jagía, ába ladáuragun dúna jáu, ába jañáradagun.

30 Láu jafíñen Israelítagu luágu Búngiu, ába jamácharun geyégua láu lubárierun ubúругu Jericó ságü bináafin luágu sédü wéyu, ába leíguadun louba lubárierun ubúругu ligía.

31 Afíñetu Raháb, tó meja jóru, luágu Búngiu, ába tarámuduniña Israelítagu aríaajatiña túbiñe. Ladüga cátei le, máfarúnwatu lídan le jáfarawagún magáambaditiña lun Búngiu lídan fulásu ligía.

32 ¿Cába ámu cátei naríñaga? Louguabei dan nun lun nabürüjan luágu Gedeón, Bárac, Sansón, Jefté, David, Samuél luma jawágu profétagu.

³³ Láu jafíñen, siríguatiña buri fulásu, agúmadija jagía buídu, íderagua lumútiña Búngiu queísi laríñaguni joun. Darú lumuti Búngiu jayúma liñún jaweí,

³⁴ ñegútiña wátu geméti janárimeti, séfutiña lueí jáfarawagún jilágubei táu efeín. Ába jéredun ja mérebaña, ñübintiña lun gabáfubaña lan wuríburugu, ába jásiiragúniña jáganiñu.

³⁵ Ñiñanu würíña ásaaragüdüwatiña jadújeñu lídaangiñe ouweni joun.

Añájein gíñe jíbiri, jiláguatiña lídan luweírín asúfuriruni ladüga jamájan jíchuguni janágan luágun Búngiu lun jamúga gayáraabei lan jígirawagüdüniwa. Jímein jamúti jáfarawagún jilágubei luágu líri Búngiu lun gayáraabei lan jásiigürün lídaangiñe ouweni lídoun ában ibágari le buídutimaati siélu.

³⁶ Jíbiri, áfagatiña léjerajouñ jáu, abeichúni, agürawagúni láu güríngüri, lúma adaürüni furísunrugu.

³⁷ Áfarawagúatiña láu dübü, asíarajouátiña jamídan jámagua, ouchawagúatiña lun jígiruni Búngiu, áfarawagúatiña táu efeín, anúrajatiña jábiñegiñe, ába jeréderun eíbugañajádügü, darúgu jougua láurügü jára mudún lúma jára gábara, fugiábugu, láu idíjeri, ouserúa wuríba.

³⁸ Gürígia buri jagía ja ní lubei ubou madüna lumútiña, eíbugañajádügü jáña buga lídan buri fulásu mageírawati, áraabu, lídan buri lilúlun dübü weínamuti lúma lídan buri júyu le múaruguti.

³⁹ Sun jagía, láu sun buídu lan afíñeni le jawágubei ligíbugiñe Búngiu, merésibirun jamúti lé buga uágubei laríñaga Búngiu luágu líchugubei lan joun lumútuniña, ladüga machülü lan Wasálbaragüle ubouágun lídan jadáni,

⁴⁰ labúseerun Búngiu lun lídaanrügüba lan ában wáma jayábin lun jerésibiruni abíniruni le líchugubei Crístu joun lánigu.

12

Rúwamei waríjin luágun Jesúsu

¹ Ítara líña meja jagáburidun sun jíbe gürígia jagía lídan dan le sügüjalibei, láu jafíñen luágu Búngiu. Ában jémpulu jagía woun lun ítara méme lan wagáburi. Ibágari le, queísigubeirügü ában eíbaaguni, gidáwamei sun le erédejabiliwa wawáriua, lúma figou le agüragubalíwa, adüga wameí eíbaaguni le wabáragiñebei láu gurásu, láu sun wafíñen luágu Jesucrístu.

² Rúwamei waríjin luágun Jesúsu, le ídaangiñebei líabin wafíñen, le gíñe abuíduragüdübalin wafíñen le gumúti. Súfuriti Jesúsu luágu gurúwa, mebésesenga ligía láu nibúsigarídüna lan luwúyeri ouweni ligía, lugúndun subúdi lání luágu lásun lánme lasúfurirun, lagúndaaruba lan, ába lañúurun lueígiñe loúnwenren Búngiu.

³ Lídan le jouchawagúniwa, samína jumá lubeíti luágu lání Jesúsu jémpulu, luágu lawánduni sarágu súfuri jámagiñe gafígountiña, ligía mabúchadalá lubeí juágu, máburujan ligíame jarüna.

⁴ Machülügídün lúmoun ouweni lídan jageíndagun lúma figou queí ligía.

⁵ ¿Bulíei jumásan dimúrei le líchugubei Búngiu jun queísi lirájüñü? Láriñajare tídan Lerérun.

Niraü, míchigabá mabájüdüni luágu abeichúni le líchugubei Babúreme Búngiu buágu lídan le wuríba lan bigáburi, máburujan ligíame barüna dan le ladeínjan bun.

⁶ Lugúndun arúfudajati Búngiu joun ja jínsiñebaña lun, beílumutiña gíñe ja lerésibirubaña queísi lirájüñü.

7 Áfaga jumeí abeichúni lúmagiñe Búngiu, lugúndun louuseruñadün queísi lirájüñü. ¿Níjein funági isáani mabeíchun lumúti lúguchi?

8 Ánjaün mabeíchun lan Búngiu, queísi labeíchuniña sun lisáanigu, mámarügü jíña lisáanigu ja tímatimaatiña, bástadi jugúya.

9 Dán meja le ñübürigidiwa, beíjamutíwa meja wagübürigu, áni inébetiña meja woun. Lúntimaati wagáambuni Wáguchi le siélubei, lun gabágaribadiwa lan.

10 Jabeíchuniwa meja wagübürigu ya ubouágu lúnrügü murúsun ibágari le, lun jagüriajaniwa buídu según jabáfu, ánjeinti Búngiu, lun waságarun buíti lídaangiñe labeichúniwa, labeíchawa lun ladügüniwa lun buídu wamá ítara quei buídu lan.

11 Inárüni luágu úa lan abeichúni áuti wagúndaara lídan le werésibiruni, gárirügüti woun, ánjeinti ja afúrendeirubaña lídaangiñe abeichúni, ibíjatiña ában ibágari lánina ísuruni lúma darángilaü lídaangiñe abeichúni ligía, lárigiñe.

Mamájara wamá lun Búngiu

12 Rújuma lubeíti iséri érei lun jarüna le bucháalibei uágu lárigi asúfuriruni, lúma lún buri jigáchürügü le débiljalibei,

13 áluaja jumeí üma le surúbei. Mígira jumá lébuna chugéguaü lídan üma lueí jeíguadun ja débiligíñabaña lídan jafíñen, íderaguarügü jumáña lun jóudin jabáruaguóun lídan jafíñen.

14 Jóucha jumá lun lídan jumá darángilaü jáma sun gürígia, abágarideina ában ibágari le jarúmati, lugúndun le wíyebei igáburi, siñábei lachülürün lúmoun Búngiu.

15 Toúnigi jumá lueí níjein lan ában jídaangiñe meíbugunti buídu lúma Búngiu, ábame leféri diragüdüni jafíñen jíbiri queísi ladügüni jíduru gífiti le abíñaragubalin sun le agúurubei luágu.

16 Úa la ni ában jídaangiñe agámariduti mamárieidunga, míchugun ligíame mebéreseni luágu cátei le lánina Búngiu. Ligía cátei le meja ladügübei Esaú, ába lalúguruni lirícha queísi íbugañaü luágu ában asíedu eígini.

17 Subúsiti jun luágu lárigiñe lán buga ladügüni, buséngili yebe lerésibiruni labínirun lúguchi queísi íbugañaü, mabíjin láali, siñáali lasáansiraguni lúguchi le adüga lálalibei láu sun layájuajan Esaú láu igárigu.

18 Jugúya, mayárafaduntün lun cátei le gayáraabei jasándiruni queísi lasúseredun joun Israelítagu dán meja le jerésibiruni binádu lidáradun Búngiu jáma. Yaráfatiña meja lun wübü le Sión, le durúngubei láu wátu geméti, le ñí lubei níjein lán meja lubúriga lúma luríbouga,

19 magáambun jumúti gíñe lamúri fídu lúma lumálali Búngiu le adímurejabei joun. Ja agáambubalin umálali ligía, ayúmuraguatiña lun jebé lan ladímurejan joun.

20 Jadügünbalin líra lugúndun luweírin janúfude lueí lagúmadijan Búngiu, ladüga laríñajare. “Le íchuguti lugúdi luágu wübü, afarúalá jilágubei láu dübü o táu lan ában efeín, íbini ában lan anímaalu”, ladüga fulásu ligía, níjein Búngiu ñi.

21 Weíríti lanúfunejabu cátei le jaríjubei, darí lun laríñagun Moisés guánarügü. “Nadádagaruña láu anúfudei.”

22 Ánjein jugúya, lábugiñe iséri darádu, ñübinjadün lun cátei weíríti sügü láu le únbei jayábin já buga lábugiñebaña binádu darádu. Yaráfaadün lun wübü Sión le siélubei, lílanaadün lubúrugute Búngiu le wínwanbei, le ában Jerusalén le siélubei, le ñí lubei jagánawa sun ánjeligu, ja ájuduragubaña lun jíchugun uweíriguni lun Búngiu.

23 Lídaañadün jadámurin lirájüñü Búngiu ja bürüwañubaña íri siélu. Lun Búngiu le agúseragüdübaña sun gürígia jayárafada, lídaañadün ában jáma

ja ouwegubaña ja buídubaña igáburi ubouágu, áni buíngüda lumúti Búngiu lubuídun jagáburi siélu.

²⁴ Nübinjadün lun Jesúsu, le búyei lun iséri darádu, bajiwaguaadün láu líta Jesúsu lun lachibúniwa jifigoun, le ábanbei cátei weíritimaati sügü láu le labúseerúbei líta Abél—lun lagúseragüdüniwa Caín luágu láfaruni Abél jilágubei.

²⁵ Ligía mamájara jumá lubei jagáambuni Búngiu. Meséfujaña ligía meja Israelítagu ja mebéresenbaña láu Búngiu, dán buri meja lerérunbei joun lídaangiñe Moisés, le ábanbei lílana ubou, gúbume siñá lan weséfurun ánjein wíchiga wanágan luágun Búngiu lídan le ladímurejan woun lídaangiñe Liraü, le lílana siélu.

²⁶ Jíngígüda lumúti meja lumálali Búngiu ubou lídan dan ligíra, ánjeinti guetó laríñajare. “Nánjingichagüdübeiya mámarügü ubou, ásta gíñe siélu.”

²⁷ Dan le laríñagun “nánjingichagüdübeiya”, míni lan luágu lagídarúba lán buri cátei le márügüdünbei luágu ébuu derébuguti, ábame leréderun le siñábei lánjingichúniwa.

²⁸ Arúejani le líchugubei Búngiu woun siñáti lánjingichún. Rúwama lubeíti eteíngiruni lun Búngiu luágu líra, judúgua wamá lun láu inébesi luma gúnfuli queísi labúseerun,

²⁹ lugúndun lagúmuchaguagüdübei Wabúngiute sun cátei le mabuídunti queísi lagúmuchaguagüdüwátu geméti cátei.

13

Ída lúba lan wagúndaaragüdüni Búngiu

¹ Jínsiñegua méme jumá júmagua queísi idújeñu lueígiñe Jesucrístu.

² Mabúlieida jumei lun jebélaagüdüniña achülürütiña júbiñoun láu ugúndani. Sarágu jáña gürígia, rújaña ubáraü joun ánjeligu láu jadügüni cátei le, ibídiñoun joun.

³ Jarítagua jumá jawágu adaürütiña, queísigubeirügü jamúga gíñe jadaürüña lan jáma. Jarítagua jumá jawágu ja ouserúabaña wuríba, quei níjein lan gíñe ában úgubu juágu le gayáraati lasúfurirun.

⁴ Buíti cátei lun jagámaridun, áni lúnti júmagua jumá darí lun jóunwen. Ja asáansijatiña jámari lagúseragüdübaña Búngiu, lagúseragüdübaña gíñe ja adügübaña salúfuri.

⁵ Míchiga jumei jínsiñejabu luágun seínsu, gúnda jumá láu le júmati, lugúndun líchugubei Búngiu le jemegeirubei jun. Aríñagaali. “Natoúnigirubadibu, mígirun nábume.”

⁶ Gayáraati lubeíti waríñagun láu afíñeni.

Nabúreme Búngiu íderagubalina, manúfudebadina.

Siñáti jadügün gürígia ni cáta náu ánjeingubeirügü busén Búngiu.

⁷ Jarítagua jumá jawágun ja arúfudajañabaña jun, ja apúrichijabalin ugánu lání Búngiu jun, samína jumá luágu buíti le nübinjalibei lídaangiñe jabágari, falájumei jémpulu le lání jafíñen.

⁸ Masáansiragunti ligáburi Jesucrístu, ligía meme gúñaarü, ugúñe, luma súnwandan.

⁹ Mafálara jumá arúfudajani le ámuñegueinarügüti luei le larúfudajabei Jesúsu. Resíbitá wawáni érei lúmagiñe línsiñejabu Búngiu, siñáti terésibirun wawáni ni cáta lúmagiñe lúru du buri luáguti eígini. Igáburi ligía, miábinti lun ladügüba lan buíti joun ja afálarubalin.

¹⁰ Wagía afíñetiña luágu Crístu, ibíjatiwa gíñe ában latárü, le gurúwabei le uágubei louwe Crístu luágu wafígoun. Ja asígirubaña láu binádu jagáburi juríu, siñáti gafánran jamá lídan le líchugubei loúnwen Crístu.

¹¹ Jafádirin juríu le íñutimaabei belúgüda lumúti játa anímaalu lídoun Fulásu Sándutimaati quei adágaragüdüni luágu figoú, jágubu anímaalugu jagía, bougudi lueí ubúругu lágudúa.

¹² Ítara líña giñe jiláti Jesúsu bougudi lueí ubúругu lun lachíbuni wafígoun láu líta guánarügü.

¹³ Queímoun lubeíti lun Jesúsu, bougudin lueí fulásu, bougudin lueí binádu igáburi, asúfurireína ünabuni luágu líri queísi lasúfurirun wawágu.

¹⁴ Lídan uboú le, úati ni ában fulásu wáma le adúraruti lun sun dan, wáluajañein ubúругu le lúnbei ñíjinbadiwa lan lárigiñe ibágari le.

¹⁵ Ligía lúnti lubeí wíchugun eteíngiruni lun Búngiu súnwandan lídaangiñe Jesucrístu le wafádiriñebei. Eteíngiruni ligía, ligía luwúyeribei adágaragüdüni le labúseerúbei Búngiu wámagiñe. ¡Rúwama lubeíti uweíriguni lun láu wayúma!

¹⁶ Mabúlieida jumá jadügüni le buídubei, lúma lun jafánreinruni júmati jádan ja mabíjinbaña, lugúndun niján buri cátei le áubei lagúndaara Búngiu.

¹⁷ Gagáambadi jumá joun ja arúfudajabaña jun, derégegua jumá júngua joun, lugúndun jagía oúnigirubarun juwáni, áni quei jasúbudiruni, gásu jagúserun ligíbugiñe Búngiu luágu jatoúnigirunün. Joucha jumá lun medéreragüdüni jumáni jawádigimari, lugúndun mabuídunbei jamúga giñe líra jun.

¹⁸ Ayúmuragua jumá lun Búngiu wawágu, choúru wamúti luágu darángilañu líña lan warítapun quei busén wabeí buídu lan woúserun lídan sun cátei.

¹⁹ Amúriajatina júma lun jayúmuragun lun Búngiu lúnya gayáraabei lan nídin aríjaün madíse.

Abíniruni buri lúma lagúmujoún buri mábugaü

²⁰ Ayúmuraguatina lun Búngiu, le íchugubalin darángilaü, le giñe ásaraagüdübalin Wabúreme Jesucrístu lídaangiñe oúweni, lun líchuguni sun ubáfu le busénwabei jun, lun jadügüni lugúndan. Wabúreme Jesucrístu ában le atoúnigiruti lumútuniña buídu queísi ában atoúnigiruti mudún. Ítara líña ladüga líta, le achoúrurubalin lidáradun Búngiu, le adúrarubei lun sun dan, wáma.

²¹ Ayúmuraguatina giñe lun Búngiu lun luwádigimaridun jídan, lídaangiñe Jesucrístu, lun gayáraabei lan jíchugun ugúndani lun. ¡Uweíriguni lun Crístu lun sun dan! Ítaralá.

²² Nidújeñu, ayúmuraguatina jun lun jerésibiruni dimúrei le abürüja náalibei jun tídan murúsun gárada to.

²³ Niján ában ugánu jun— ¡furíjali wadúje Timotéo furísunrugugiñe! Ánjein ñübin yájoun, nanügübei númagua dánme le nídin aríjaün.

²⁴ Mábuga níña joun sun tábutigu ligílisi lúma joun sun jíbiri wadújeñu lídan wafíñen. Mábuga jáña wadújeñu ja Itálianu jun.

²⁵ Binílaün Búngiu sun jugúya, ítaralá.

LIGÁRADAN SANTIÁGO

Labürüjan Santiágo joun títana ligílisi buri ja chagágubaña

¹ Áu Santiágo, esériwiduti lun Búngiu lúma lun Wabúreme Jesucrístu áu, mábuga níña joun ja jadügawagubaña dúusu lirájüñü Israél ja chagágubaña lídan sun uboú.

Subúdi le ñübinbei lúmagiñe Búngiu

² Nidújeñu, lúnti gúndan jumá dan le jasúfurirun furúmieguarügü oúchawagúni.

³ Subúdi jumáli luágu dan lan le louchawagún jafíñen, furéndeitimaatün gagúraasuni.

⁴ Ítara líña lubeíti, maríbadalá jarítangun lueígiñe jóuchawagún, lubáragiñe líra, ígira jumeí oúchawagúni ligía lun líchugun lánwoun jugúraasun, lun loustarun lubuídun jigábury, úouga mégeiti luágu.

⁵ Dan le ibídiñe lan jun cába lan jadüga lídan ában lénreengunga, amúriaja jumá lúma Búngiu, ábame lasúbudiragüdüni jun cába lan jadüga. Rulumuti Búngiu subúdi le jamúriajan lánigu lúma joun, quei jamúriajani, maríñagunga ni cáta joun luágu.

⁶ Lúnti jamúriajan láu afíñeni luágu líchugubei lan Búngiu le jemégeirubei jun, máma láu liloúguan afíñeni, le lougua tafíñen, ítara líña quei ában lugúdi barána le lanügübei garábali lueígiñe ában oúbaü lun luágun ámu.

⁷ Gürígia le medéraguagüdünti lafíñen, marítagonalá luágu libíjuba lan ni cáta lúmagiñe Wabúreme.

⁸ Lugúndun gürígia le afíñe líñabei, mafíñen, siñáti lasígirun ában igábury le derégüdagwati luágu ni cáta.

⁹ Idújei le gudémebei, majírudalá luágu, gúndaalá luágu irisini le siélubei lubá.

¹⁰ Léti idújei le rísibei, manángualá lúngua luágu, gúndaalá luágu larúfuduni Búngiu lun luágu mebégi lan lirisin lun ni cáta lídan cátei le lánina siélu. Lugúndun ítara líña rísiti quei lufúlurin jíduru, le siñábei ladúrarun.

¹¹ Dan le láfuridun wéyu, ába lásüdün sarágu, ába lásaurün jíduru, ába leíguadun lufúlurin, ába lagúmuchun lubuídunmeraü. Ítara lúba gíñe rísiti. lachülürüba wéyu lun louñwen, ábame lígiruni sun láfaagun luágu seínsu.

Oúchawagúni lúma adúndeijoúni lun wuríbani

¹² Gúndaati gürígia le awándubalin oúchawagúni láu gurásu, lugúndun dánme le láfuridun láu buídu, libíjubei ibágari magúmuchaditi le uágubei laríñaga Búngiu luágu líchugubei lan joun ja jínsiñejabúbaña lun, queísi ában afáyeiruajaü, queísi ában rídi.

¹³ Dan le lebélorun lun ában gürígia lun ladügün cátei wuríbati, marítagonalá luágu Búngiu lan ádarubalin cátei ligía lídoun, lugúndun mebéluti lídoun Búngiu lun ladügün wuríbani, máda lumúti gíñe jádoun gürígia lun jadügüni.

¹⁴ Lubáragiñe líra, dan le lacháwajani luríban layúmajan mútu, ligía láburujan lídoun ladügün le wuríbabei.

¹⁵ Lídaangiñe buri luríban ayúmajani le, liábin figou, ában ibágari lánina figou barüti oúweni.

¹⁶ Nidújeñu jínsiñetiña nun, mayéedagua jumá júngua arítagua luágu lúmagiñe lan Búngiu liábin wuríbani.

17 Lubáragiñe líra, sun buíti le íchugúbei woun, le úabei mégeiti luágu, lúmagiñe Búngiu le adügübalin lilámpuna siélu liábin. Búngiu súnwandan ligía méme lan, úati sáansiguaü lídan quei lilámpuna siélu le gabúlubudadíbei.

18 Ligía lugúndaabei lun ladügüniwa lirájüñüme láu wafiñerun luágu lerérun le inárünibei, lun ítara wamá quei furúmiñeti alúbajani le íchugúti lun Búngiu lídaangiñe buri cátei le ladügübei.

Ligáburi agúnfuliruni lúma Búngiu le áubei lagúndaara

19 Ligía lubeíti, nidújeñu jínsiñetiña nun, cáda ában jídaangiñe lúnti aráanseñu lan lun lagáambun, áni lúnti jámaru lan lun ladímurejan lúma lun lagáñidun,

20 lugúndun güriía le gáñibei, madügün lumúti le áubei lagúndaara Búngiu.

21 Ígira jumeí lubeíti sun iwíyeni lúma luríban igáburi le jídaangilibei, resíbi jumeí ugánu le bunáwaalibei tídan janígi láu ünabuni, lugúndun gabáfuti ugánu ligía lun lasálbarunun juwáni.

22 Adüga jumeí le tariñagubei Lerérun Búngiu, máma lun agáambarügü jumáni. Ánjein jarítagua jubeí luágu buídurügü lan lúnrüü jagáambuni Lerérun Búngiu, jeyéedaguña júngua.

23 Le agáambarügübalin, madügün lumúti le lubeíbei, ítara líña quei ában güriía le aríagubei lúngua tídan ában isúbusein.

24 Aríja lumúti ída líña lan, áni quei lídin, ítara labúlieiduni ída líña lán buga.

25 Ánjeinti güriía le jéchubei atúriajei Lerérun Búngiu le úabei mégeiti lídan, áni furáangugüda láwa lueígiñe figou, mabúlieidun lubeí le lubeíbei, adüga lumúti le laríñagubei Lerérun Búngiu áni gúndaati le tímatimaati.

26 Güriía le jarítagubei luágu gúnfuli lan lúma Búngiu áni siñá lumutu liñéñe erédera, leyéedaguña lúngua áni úati ju lan ligáburi lagúnfulirun lun ni cáta.

27 Niján agúnfuliruni le jarúmabei, le áubei lagúndaara Wáguchi Búngiu. lun wíderaguniña magübürigujaaña jáma würiña ja jiláaña úmari lídan jadíjeri, lúma lun madáseirun wamá láu buri cátei wuríbati le láni ubou le.

2

Lúnti ában lan láu janügün sun güriía

1 Nidújeñu, queísi jugúya lan güriía ja afiñebaña luágu Wabúreme Jesucrístu le weírigubei, moún lumuti ámu lan janügün ában güriía jaweí jíbiri.

2 Queí buri jamúga, lun jamúga lebélorun ában wügüri lídoun jadámurin láu bágü gólu túma anáanguni fínutu, belú ligía gíñe ában gudémeti táu anáanguni juchécheeru,

3 ánjaün eténira lun le fínubei anáangun buídu, lun jaríñagun lun. “Ñurúba ya lídan ubáraü buíti”, jaríñaga lun le gudémebei. “Amürü, reídeibá rára, o ñurúba ya múarugu”,

4 janügüña ában güriía ámu lueí le ában, áni jagúseragüdüña láu luríban arítaguni.

5 Nidújeñu jínsiñetiña nun, agáamba jumeí cátei le. anúadaja láaña Búngiu ja gudémebaña lídan ubou le lun rísi jamá lídan jafíñen, lun gíñe jerésibiruni arúejani le uágubei laríñaga Búngiu joun ja jínsiñejabúbaña lun luágu líchugubei lan joun queísi jalágaante.

6 Ánjeinti jugúya, rújumutiña gudémetiña lídoun busíganu. ¿Máma funági rísiña ja wuríbabei jóuserunün, áni barújamaün adúruujeina ligíbugiñoun lúrodu?

7 ¿Máma jagía adímurejabaña wuríba luágu líri Crístu, le inébebei jun, le únbei jedéregeragua júngua?

⁸ Ánjein inárüni lubei luágu gúnfuli jumáni líñun-ágei lúrudu queisi tariñaguni Lerérun Búngiu. “Jínsiñelá gürígia bíledi bun quei bínsiñegua búngua”, buíti jadüga.

⁹ Ánjein máma lubei ában láu janüguniña sun gürígia, jadüguniña figou, dürügua jumúti lilúrudun Búngiu.

¹⁰ Lugúndun ánjein agúnfulira ában gürígia láu sun lúrudu, ígira lagúnfulirun ában lídaangiñe, gadúnrunti luágu ladüraaguni sun lugúmadin lúrudu.

¹¹ Lugúndun Búngiu méme le aríñagubei. “Madügabá salúfuri”, aríñagati giñe. “Máfarajabá.” Ánjein lubeiti madügün gürígia salúfuri, áni áfarajati, mídinti láu le lubei lúrudu.

¹² Jugúya, lúnti jadímurejan, agáburida jugúyame queisi lúntiña jagúserawagüdüñ láu lúrudu le furáangugüdbaliwa luei lubáfu figou.

¹³ Ja magúdemejabubaña joun ámu, magúdemejabubei giñe Búngiu joun lídaanme wéyu lánina agúseruni. Ánjaña ja gudémejabubaña, buídubei jáfuridun lídaanme lidáani agúseruni.

Afiñeni luma wadágimanu

¹⁴ Nidújeñu, ¿cásan ju lan lariñagun gürígia luágu afiñe lan luágu Crístu ánjein madügün ni cáta lun larúfuduni? ¿Gayáraati funági lasálbaruni afiñeni ligía?

¹⁵ Quei jamúga guetó, níjein ában idújei wügüri o würi emégeiruti anáanguni luma eíginí,

¹⁶ lariñaga ában jídaangiñe lun. “Buídulá lídin bun, darúguabá bougua, jou amürüme,” áni míchu lumúti le lemégeirubei lun, ¿cági ju lan líra?

¹⁷ Ítara líña lasúseredun luma afiñeni. ánjein marúfudun jamá gürígia láu cátei le jadügübei, afiñeni lábuguarügü, ítara líña quei ában cátei jiláali.

¹⁸ Fágua níjeinbei aríñaguti. “Amürü afiñetibu, áu adüga numúti le buídubei.” Áu Santiágo aríñagatina lun idújei ligía. “Arúfudabeiti bafiñen nun bougudin luei buíti le badügübei, narúfudeime nafíñen bun láu buíti le nadügübei.”

¹⁹ Afíñetibu luágu ában rügüñein lan Búngiu, buíti badüga, afíñetiña giñe máfianu luágu líra, adádagara jagía láu anúfudei luei.

²⁰ ¿Májatibu bafiñerun, ibídiougua táu amürü le, luágu jiláñu líña lan lafiñen gürígia ánjein marúfudun lan láu le ladügübei?

²¹ Resíbi lumúti Búngiu Abrahám, le binádu wáguchi, queisi richáguati ligíbugiñe luágu le ladügübei dan le lánjarun lún yebe láfaruni Isáac le líraü jilágubei queisi adágaragüdüni lun Búngiu.

²² Aríja báali luágu arúfuda lání Abrahám lafiñen láu cátei le ladügübei, áni ñübinti lafiñen lun dayárubei lan láu cátei le ladügübei.

²³ Ítara líña lagúnfulirun le bürüwañubei tídan Lerérun Búngiu. “Afiñeti Abrahám luágu Búngiu, áni luágu lafiñen, ába lerésibiruni Búngiu queisi wügüri richáguati ligíbugiñe.” Áni aríñawagúati luágu Abrahám, “lumáda Búngiu.”

²⁴ Aríja jumáali lubeiti, luágu resíbi lání giñe Búngiu wügüri luágu buíti le ladügübei, úara luma lafiñen, áni mámarügü luágu lafiñen.

²⁵ Ligía méme meja asúseredubei tun Raháb, to jóru lídan dan le sügüjalibei. resíbi lumútu Búngiu queisi richáguatu ligíbugiñe dán meja le tarúfuduni tafíñen luágu láu cátei le tadügübei—safá tumútiña loúnagülegu Josué, ába tíderaguniña lun jagíribudun lídaangiñe ámu üma.

²⁶ Ítara quei jiláñu líña lan úgubu ánjein úa tubei uwáni lídan, jiláñu líña giñe jafiñen ánjein marúfudun jumá láu cátei buíti le jadügübei.

3

Lúnti wabúgurunun wañéñe wayúmulugu

¹ Nidújeñu, moún lumuti añájein lan sarágu jídan ja adáagutiña jóungua arúfudajatiñame lánina Lerérun Búngiu lugúndun subúdi jumáli luágu wagía lan le arúfudajabei, derégüdatimaabei lan wagúserawagüdün.

² Sun wagía adügatiwa cátei charáti, ánjein níjein lubeí ában gürígia madügünti ni murúsun charáti lídan le laríñagubei, ában wügüri buíti le gumúti ligía, le gíñe gayáraabei labúguruni sun lúgubu.

³ Dan le wagürüni jayúma anímaalugu lun jagáambuniwa, gayáraati wabúguruni sun jágubu.

⁴ Aríja jumóun buri gíñe ugúnein, láu sún buri weínamu tan áni jéburiti garábali le ádjabarun, abúgura lumútu abúguruti láu ában liraúraü simúnu le ñíjin lumúti labúseera.

⁵ Ítara líña gíñe lasúseredun lúma wayúma, ában cátei ñúraúraüti, áni gayáraati ladügün sarágu buri cátei weínamuti. ¡Láu murúsun wátu geméti, gayáraati lágudún ában oúnwenbun áraabu!

⁶ Ítara líña wayúma quei ában wátu geméti. Gayáraati wadügün sarágu wuríbani láu, gayáraati lagádeiruni sun le wagíabei. Gayáraati líchuguniwa lídoun wuríbani lídan sun wabágari, Máfia guánarü lébunabei sun le.

⁷ Gayáraati lagídaruni wügüri jagáñi sun jawúyeri anímaalugu gáñitiña — dunúru, jéwe, jáma anímaalugu baránajana—áni adúga láali.

⁸ Úati ni ában lun gayára lan lagídaruni ligáñi wayúma. Ában wuríbatu ligía le mígiraguagüdünbei lúngua, áni buin líña láu peísini le gáfarajati.

⁹ Láu méme wayúma wadímureja buíti luágu Wáguchi Búngiu, láu gíñe wíñaraguaña gürígia ja ladúga Búngiu lenége.

¹⁰ Lídaangiñe méme ában iyúmaü láfurida dimúrei buíti lúma íñaraguni. Nidújeñu, moún lumuti ítara lan cátei le.

¹¹ ¿Gayáraati funági láfuridun dúna bímeti lúma dúna básuati lídaangiñe méme ában? Siñáti.

¹² ¿Gayáraatisan tagíindun ában tídibu fígi fáluma, ódi gayáraati tagíindun tídibu beíbei fígi? Siñáti giñéti láfuridun dúna bímeti lúma dúna básuati lídaangiñe méme ában.

Subúdi le inárünibe

¹³ Ánjein níjein lubeí ában chu táu jídan, gunfaráanda ligía, arúfudaleí láu lubuídun louserun, láu ünabugubuni le líchugubei lisúbudin lun.

¹⁴ Ánjein níjein lubeí gimúgaü tídan janígi, áni jadügüni cátei láu jarítangun juágun guánarügü, moún lumútiti janáangun júngua luágu jisúbudin, lugúndun iyéeni líra.

¹⁵ Mára niján luwúyeri subúdi le ñübinbei lúmagiñe Búngiu, ában subúdi le lánina ubou líra, le lánina jasáminan gürígia, le láni méme Máfia.

¹⁶ Lugúndun le ñí lumuti gimúgaü lúma marítawaguni jawágun ámu, níjein chagáguau ñi lúma sun luwúyeri wuríbani.

¹⁷ Ánjaña ja gámabalin subúdi le lúmagiñebei Búngiu, furúmiñe níjein ában ibágari jarúmati jawágu, gálumatiña, areídatiña, gagáambaditiña, gudémejabutiña, adúga jamúti le buídubei, ában lábu janügüniña sun gürígia, furángutiña.

¹⁸ Ja álujabalin darángilaü, bunáguatiña ílaü lun lalúbajoúniwa ában ibágari le richáguati jádan, lúma jádan ámu.

4

Gamádaguaü lúma ubou

¹ ¿Cá buri ueígiñe jabúseera jawúribujan, lúma jageíndagun? Ladüga buri lagübüri ayúmajani le jídaanbei súnwandan.

² Buséntün som cátei, queíti siñá jumani ibíja, ába jáfarajan. Gimúgatün luágu som cátei, queíti siñá jumani ibíja, ába jageíndagun. Mibíjin jumúti le jabúseerúbei lugúndun mamúriajan jumáni lúma Búngiu.

³ Ánjein jamúriaja, mibíjin jumúti lugúndun luríban jamúriajani, jabúseeruni lun jagástaruni luágu lagübüri jugúndan.

⁴ ¡Gürígia múaraantiña! ¿Ibídíñetísan jun luágu ánjein lan gamádagua jubeí lúma ubou, jáganiñein lan Búngiu?

⁵ ¿Jarítaguatúnsan luágu mála lan le taríñagubei Lerérun Búngiu luágu buri cátei le? ¿Jarítaguatün funági luágu Espíritu lan le lagánawagüdübei Búngiu wádan ában lan espíritu le lánina gimúgaü? Uá.

⁶ Íderagua lumútiwa Búngiu láu lareíni, láu líchuguni ubáfu woun lun wáfaruni gimúgaü le wádaanbei jílagubei. Taríñajare Lerérun Búngiu. “Rúlumuti Búngiu lanágan jawágun ja barüguabaña joúngua, áni íderagua lumútiña ja ünabugubaña, láu lareíni.”

⁷ Rúgua jumá júngua lábugiñoun leréreejan Búngiu, rára jumá derégüdagu láu lubáfu Búngiu, mabáfu lámuga Máfia juágu, ábame lanúrajan jueí.

⁸ Yaráfa jumá lun Búngiu, ábame giñe layárafadun jun. Jugúya le busénbei jesériwidun lun Búngiu lúma lun ubou, gafígounjadün, ítara líña lubeíti, jarúmagüda jumeí jigáburu túma giñe janígi.

⁹ Lídan le jayárafadun lun Búngiu, aságüríja jumá luágu jífígoun láu águiraü. Gáritá janígi luágu luríban jigáburu lúma Búngiu, sáansigualá jugúndan lun íruni luágu jífígoun.

¹⁰ Ünabuguagüda jumá júngua ligíbugiñe Búngiu, ábame líchugunün íñugu.

Adímurejani luágu idújei

¹¹ Nidújeñu, madímureja jumá wuríba jawágu jíbirigu. Le adímurejati wuríba luágu lidúje, o ladárirun lan lidúnrun, ladímurejaña wuríba luágu lilúrudun Crístu le aríñagubei luágu moun láni ladügüniwa, áni ladáriruña mégeiti luágu. Ánjein jadüga líra lubáragiñe jadügüni le lubeíbei lúrudu, jíchaaguña júngua queísi agúseragüdüti.

¹² Ában rügüñein agúseragüdüti, le íchugubalin lúrudu ligía, le Crístubei méme, lérügü gabáfubei lun lasálbajan o lun lagúnrinchagun. Ánjein bugúya, ¿cátabuñadíbugi lun badárirun lidúnrun ámu?

Machoúrurunwalá luágu jarúga

¹³ Guetó, agáamba jumeí cátei le, jugúya le aríñagubei. “Ugúñe o jarúga wouídiba lídan ítaga fulásu, ábame webélujan ñi ában írúmu, wawádigimaribei waseínsun lun wabíjin lánwoun.”

¹⁴ ¿Ída liñásan jasúbusiruni cába lan asúsereda jarúga? ¿Cáteiñeigi jibágari? Ítara líña quei jeméreedu le asálrágubei luágu murúsun dan, lárígiñe ába lagúmuchagun.

¹⁵ Aríñagarügütün jamúga. “Ánjein busén Búngiu, wabágariduba, ábame wadügüni le o líra.”

¹⁶ Ánjeinti jugúya, jadímurejan láu pántaü luágu cátei le jarítagubei lun jadügüni, áni sun pántaü le, mabuídunti.

¹⁷ Afíñetina luágu ánja jumá lun sun le, wel, le subúdiabubei lun ladügün buíti áni madügün lumúti, ladügüña figou.

5

Ewéridijani joun rísitiña

¹ ¡Agáamba jumeí cátei le, jugúya rísitiña le wuríbabei igáburi! Chülüjali óra lun jayájuajan, wágua jugúyame luágu buri lamíselu le lúnbei jasúfuriruni.

² Ñaláali buri jirisin, jou jamáaru jamútiri janáangun to fínuboun.

³ Gájüjali jigólun lúma jáni pláta, áni láu cátei méme le, arijúati jarügüren, ábame jagünrinchawagún lueígiñe camá jamuga láu wátu geméti. Oúndaraguaadün sarágu irisini lídoun buri lagúmujoún dan le.

⁴ ¿Ánti fáyeiti le míchu jubeí joun ja ñadágimeinbalin jichári? Ánjein jamúga gayáraati, lagúajaña jamúga fáyeiti ligía luágu jidúnrun, agáamba láali Búngiu jamúriajan ñadágimeintiña jagía juágu.

⁵ Rúguaadün júngua lun ában ibágari lánina wéndeí lúma ugúndani ya ubouágu, ibíja jumáali sun le jabúseerúbei quei jadíbunedagüdüniwa anímaalu lubá jáfarun, yaráfaali gíñe jagünrinchawagún sun jugúya.

⁶ Rújadün jadúnrun ja madúnrunbaña, áfaragua jumáña jilágubei, madügünga jagía ni cáta le lébuna jáfaraguniña.

Gurásu lúma ayúmuraguni lun Búngiu

⁷ Ligía lubeíti, nidújeñu, gagúraasun jumá daríme liábin Wabúreme Jesús. Ábunaguti le agúrabubei ladügün alúbajani buíti, lúnti lagúrabajani furúmiñeti júya luágun líla linádirigu lúma lagúmujoún júya luágun lun láfunadun.

⁸ Gagúraasun jumá gíñe, máburujan ligíame jarüna, lugúndun madíseeli liábin Wabúreme.

⁹ Nidújeñu, mequéjera jumá jawágu jidújeñu lueígiñe Jesucristu, magúserawagüdüñ jumámuga, yaráfaali lidáani Búngiu lun lagúseragüdüñ.

¹⁰ Nidújeñu, barü jumaña profétagu já meja adímurejabaña lídan líri Wabúreme queísi ában jémpulu lánina gurásu luágu asúfuriruni.

¹¹ Wagía, barü wamutiña ja awándubalin asúfuriruni queísi gürígia gúndaatiña. Agáambaadün luágu lugúraasun Job, áni subúdi jumáali gíñe ída líña lan fuleísei láni Búngiu lagúmujoún óra, lugúndun areídati Búngiu, gudémejabu.

¹² Lougíñe sun cátei, nidújeñu, máfiñura jumá ni luágu líri siélu, ni luágu líri múa, ni láu ámu luwúyeri áfiñuruni lun jachoúruruni jerérun. Dánme le jaríñagun “ánja”, lun ánja lan, dánme gíñe le jaríñagun “uá”, lun gíñe uá lan, míchugun lámuga Búngiu jidúnrun.

¹³ Ánjein lasúfuriruña lubeí ában jídaangiñe, lúnti layúmuragun lun Búngiu.

¹⁴ Ánjein sándiñein lubeí, lúnti lagúarun joun tábutigu ligílisi lun jayúmuragun lun Búngiu luágu, lúma lun jájurudaguni láu áili lídan líri Wabúreme.

¹⁵ Dánmeti le jayúmuragun láu afíñeni, ábame lareídagun sánditi, áni ánjein gíñe afígounjaali lubeí, ferúduawabei lifígoun.

¹⁶ Ligía, gúfese jumeí lubeí jifígoun joun jidújeñu lueígiñe Jesucristu, áni ayúmuragua jugúyame jawágu lun jareídagun. Weíríti lubáfu ayúmuraguni lun Búngiu le ladügübei gürígia le buíti táu sun lanígi.

¹⁷ Proféta Elías ában meja wügüri quei wagía, dan le lamúriajanbei lídan layúmuragun lun Búngiu lun májuyun lan júya, reídeiti júya májuyunga ürüwa-irúmu-dimí.

¹⁸ Lárigiñe, dánya le layúmuragun, ábaya lájuyun júya, ábaya tájüchün sun inádirigu ubouágu.

¹⁹ Nidújeñu, ánjein egéyeda ában jídaangiñe lueí ũma le richábei, liábin ámu lun lagíribudagüdüni,

²⁰ subúdi jumeí luágu furúmieguarügü lan agíribudagüdüti le afigounjabei lídaangiñe luríban lémeri, lasálbaruboun lan luwáni afigounjati ligía lueí tídin máfiougati, áni ferúdunagüdaleíme sarágu lifígoun gürígia lé yebe acháragadubei.

FURÚMIÑETU LIGÁRADAN PÉDRO

Labürüjan Pédro joun afñetiña ja chagágubaña bougudi luei jageira

¹ Áu Pédro, ában láni Jesucrístu apóstolu áu, nabürüjañoun gárada to jun, jugúya lánigu Búngiu ja chagágubaña bougudi luei jageira loubawagu Pónto, Galácia, Capadócia, Ásia, lúma Bitínia.

² Nidújeñu, anúadaja láadün Búngiu Úguchili lúmagiñe meja binárü lun lánigu jumá, áni subúdi lumúti meja luágu lachülürüba lan ában wéyu lun ítara lúba lan, ladüga ligía lan lugúndaanbei. Ligía larúmadagüdañajañoun lubei Sífiri Sándu janígi láu líta Jesucrístu, adügalaün lun gagáambadi jumá. Ibíja jumá lubeiti sarágu abíniruni lúma darángilaü lúmagiñe Búngiu.

Loúchawagüba jafñen, ábame liábin buíti lídaangiñe

³ Rúwama uweíriguni lun Búngiu, le Lúguchibei Wabúreme Jesucrístu, luágu luweírin lugúdemejabu woun. Rújali iséri ibágari woun queísi lirájüñü láu lásaaragüdüni Crístu lídaangiñe ouweni lúnya labágaridun.

⁴ Queísi lirájüñü wabei, gayáraati weménigidun le gumúti luágu wabíjubei lan ubuíduni le aráanse láalibei wabá, gayáraati weménigidun luágu werésibirubei lan alágan le areídañu lubei Búngiu wabá, siélu—ában alágan le lúnbei ladúrarun lun sun dan, le siñábei ladáseirun, le siñábei leféridiruni lubuídun.

⁵ Góunigi lumútiwa Búngiu láu lubáfu lugúndun afíñe wamá luágu, lun gayáraabei lan wabíjini asálbaruni lídaangiñe asúfuriruni lánina ubou le, le aráanseñu lubei wabá lárigiñeme lagúmuchun ubou.

⁶ Ligía lébubei buin jíña lan láu ugúndani, láu sun lúnti lán funa jasúfurirun sarágu ouchawagúni luágu murúsun dan.

⁷ Lúnti jasúfuriruni ouchawagúni ladüga ítara líña lan jafñen quei gólu—lúnti louchúniwa láu wátu geméti lun larijiniwa ca lan luwúyeribei. Afíñeni le awánduti ouchawagúni ligía, buíti sügü láu gólu, lugúndun gagúmuchaditi gólu. Láu lubeiti jawánduni loúchawagún jafñen, ladímurejaba Jesucrístu buíti juágu dánme le lagíribudun ubouagun, jibíjuba gíñe uweíriguni lúma inébesi lúmagiñe.

⁸ Jínsiñeti Jesucrístu jun láu sun maríjin jumágili lan, áni láu sun maríjin jumágili lan, rújumaali jeménigi luágu, áni gúndaatün láu ában oúnwenbun ugúndani le siñá jumuti aríñaga láu dimúrei.

⁹ Ladüga méme luweírin jafñen luágu Crístu, jerésibiruñein tasálbarun juwáni.

¹⁰ Lídan meja dan le sügüjalibei, adímurejatiña meja profétagu luágu cátei le lúnbei líchuguni Búngiu jun láu lareíni, ába jáfaagun lun gunfaráanda jamáni luáguti asálbaruni le, le uágubei ladímureja Sífiri Sándu jádaangiñe.

¹¹ Subúdigüda lumútija láni Crístu Espíritu joun wügüriña jagía le lúnbei lasúfuriruni Crístu lubáramegiwa, lúma uweíriguni le lúnbei liábin lárigiñe. Jagiati, ábaja jóuchun jasúbudiruni cátei lan gürígia ligía, lúma ídaba lan lasúsereda cátei le, le uágubei laríñaga Sífiri Sándu le jádaanbei joun.

¹² Ába lasúbudiragüdüni Búngiu joun luágu mámaba lan lídan jadáni lagúnfulirúa buri cátei le, luágu lídaanba lan wadáani. Asálbaruni lé meja uágubei jadímureja, ligía méme le uágubei japúrichija gürígia jun lídoun buri dan le, láu lubáfu Sífiri Sándu le ñübinbei siélugiñe. Ásta ánjeligu, buséntiña jamúga gíñe gunfaráanda jamáni buri cátei le.

Buséti Búngiu lun wabágaridun ában ibágari le jarúmati

¹³ Quei jagúrabajañein lubeí jerésibiruni jalágaante siélu, gidájumei samínaü málati jarítangunrugugiñe, lubáragiñe líra, derégüdagulá jarítangun, rújumei sun jeménigi luágu asálbaruni le lúnbei líchuguni Búngiu jun láu lareíni dánme le lagíribudun Jesucrístu ubouágun.

¹⁴ Queísi isáanigu gagáambaditiña, mabágarida jumá queí meja ligáburí jabágaridun lubáragiñe meja jasúbudiruni Búngiu.

¹⁵ Lubáragiñe líra, abágarida jumá ában ibágari jarúmati le gumúti, lugúndun Búngiu le agúarubei jun lun lánigu jumá, jarúmati lídan sun cátei.

¹⁶ Tariñajare Lerérun Búngiu. “Jarúma jumá, lugúndun áu, jarúmatina.”

¹⁷ Queíti janügüni Búngiu quei Júguchi, Búngiu le ábanbei lábu ligáburí lagúseragüdüni jagáburí sun gürígia, lúnti júaradun lúma láu ában goúnigi sun dan le lúnbei jabágariduni ya ubouágu.

¹⁸ Sálba láadün Búngiu lídaangiñe lagübüri ibágari lé meja jafúnrendeirubei jámagiñe binádu jagübüriugu, áni subúdi jumúti buídu luágu máma lan láu cátei gagúmuchaditi lafáyeirúa lebégi asálbaruni le, queísi buri gólu o pláta,

¹⁹ Láu líta Crístu le gebégibeí sügü láu sun cátei lafáyeirúa. Derégewati Crístu lun loúnwen luágu wafígoun queí ában mudún le buídubei lídan sun luwúyeri, sálba wamámuga.

²⁰ Lúmagiñe lubáragiñe buga ladügüni Búngiu ubou, ába laráanserun lun Crístuba lan Wasálbaragüle, luágu lubeíti wafúleisein lachülaagua Crístu lídoun lagúmujoún dan le, lun lasálbaruníwa.

²¹ Lídaangiñe Crístu, ába jiyábin lun jafíñerun luágu Búngiu le ásaaragüdübalin Crístu lídaangiñe ouweni, ru ligía uweírigin lun, ítara líña jiyábin lun jafíñerun luágu, rújumeíme sun jeménigin luágu.

²² Guetó, láu gagáambadi jumá lun linárün Búngiu láu lubáfu Sífiri Sándu, jarúmaaru janígi lun gayáraabei lan jínsiñedun jidújeñu lueígiñe Jesucrístu jun le tímatimaati. Lúnti lubeíti jínsiñegua jumá júngua láu sun tarúman janígi, lúma láu sun jére,

²³ lugúndun iséri gürígia jugúya. Mámaadün jasáanigu agübüriugu ja goúwedaditiña, lirájüñüjadün Búngiu láu jagáambuni lerérun le íchugubei ibágari, le gíñe adúrarubei lun sun dan.

²⁴ Tariñajare Lerérun Búngiu.

Ítara jáña sun gürígia quei jíduru,
liábin jaweírigin quei lufúlurin jíduru.

Dan le lásaurün jíduru, ába láburujan lufúlurin,

²⁵ ánjein Lerérun Búngiu, duráti lun sun dan.

Áni dimúrei le, ligía ugánu le lánina asálbaruni le uágubei laríñawagúa jun.

2

¹ Ligía, queísi lirájüñüjadün lubeí Búngiu, ígira jumeí lubeíti sun luwúyeri wuríbani, sun eyéeni, biángua lan igíbu, gimúgaü, lúma sun luwúyeri marásualugu.

² Ítara quei jabúseeruni irájüñü figígiña míligi jarúmati lun gayáraabei lan jaweínamudun, ítaralá gíñe busén jumá lun jatúriajani Lerérun Búngiu buídu lun gayáraabei lan ledérebugudun jafíñen luágu Crístu.

³ Subúdiadün murúsun luáguti luweírigin lubuídun loúseruníwa Crístu, lúnti líchugun subúdi ligía ában oúnwenbun ayúmajani jídoun lúntima jasúbudiruni Crístu.

⁴ Ayárafajoúa jumá lubeíti lun Crístu le gabágaribeí. Rútiña gürígia mebéreseni luágu, ánjeinti lun Búngiu, ítara líña Crístu queí ában dübü le gebégiti sarágu, le

lanúadirunbei lun ligíaba lan ébuu tun lilígilisin, áni sun ja afiñebaña luágu Crístu, jagía lilígilisinbaña Búngiu.

⁵ Ítara líña lubeíti, ígiraguagüda jumá júngua lun Crístu le rúlaalíbei ibágari magúmuchaditi jun, lun tadügüniwa ában témpulu buítu lun Búngiu jídaangiñe, lun gíñe ítara jumá quei fádirigu ja derégeguatiña joúngua lun Búngiu, ja íchugubalin cátei le áubei lagúndaara lun, lídaangiñe Jesucrístu.

⁶ Ligía gíñe tariñagunbei Lerérun Búngiu. Nounajañein Crístu lun ligíaba lan dübü le weírigutimaabei tuágu nilígilisin lídan fulásu le giríbei Sión.

Áni ja afiñerutiña luágu, buídubei lídin joun.

⁷ Weíríti lebégi Crístu jun, jugúya le afiñebei luágu, ánjeinti joun ja mafiñebaña, mebégiti quei dübü le únbei jamájara ábunagutiña. Láu sun líra, gúnfulijali le tariñagubei Lerérun Búngiu.

Dübü le únbei jamájara ábunagutiña, ñübinja lun ligíaba lan furúmiñeti lídan bunáguä.

⁸ Joun ja mafiñebaña luágu Crístu, gúnfuliti gíñe le aríñawagúbei.

Ában dübü achúgeraguágülei ligía, le eíguadagüdüti gürígia.

Ja madügünbaña gásu láu ugánu lánina asálbaruni lídaangiñe Crístu, chugéguatiña luágu, fériditiña gíñe lun sun dan, queísi laráanseruni Búngiu.

Ja lánigubaña Búngiu

⁹ Ánjeinti jugúya le afiñebei luágu Crístu, ában familia anúadajoúatiña jugúya, fádirigu ja esériwidutiña lun urúei le Búngiu, gürígia lánigu Búngiu ja derégeguaaña joúngua lun. Ítara líña cátei le, lun jadímurejan luágu buri cátei buíti le ladügübei Búngiu, le aságarubalün lídaangiñe lubúriga lun lídoun luweírin larúgounga le líchugubei Búngiu.

¹⁰ Mibíjintün meja ában abúremein lun latoúnigirunün, guetó lánigujadün Búngiu. Úatiña meja gudémejabutiña jun, ánjein guetó, gudémejabuti Búngiu jun.

Abágarida jumá lun jesériwidun lun Búngiu

¹¹ Nidújeñu jínsiñetiña nun, jugúya queísi teréncha lídan ubou le, aganoútiña bougudi lueí jageíra, ayúmuraguátina jun lun mígiraguagüdün jumá júngua lun lagübüri buri ayúmajani le ageíndagubei túma juwáni.

¹² Buídulá jouserun jádan ja ibídiñejabubaña lun Búngiu, ítara lúba, láu sun lan adímureja jamá wuríba juágu guetó camá jamuga wuríbatün, jaríjubei buíti le jadügübei, ábame jíchugun uweíriguni lun Búngiu dánme lachülürün wéyu lun lagúseragüdün.

¹³ Queísi lánigu jumá Wabúreme Crístu, ayúmuraguátina jun lun úaragua jumá lúma sun gumádi ya ubouágu. Gúnfuli jumá lúma lugúmadin urúei, quei ligía lántima íñubei ufúlasun,

¹⁴ gúnfuli jumá gíñe lúma jagúmadin gumádimatiña ja loúnajabaña lun jafáyeiragüdüniña ja múaradúnbaña lúma lúru, lúma lun jíchugun uweíriguni joun ja adügübaña buíti.

¹⁵ Busénti Búngiu lun jadügüni le buídubei, lun jámanichagüdüniña ja ibídiouguabaña áu, ja busénbaña jadímurejan wuríba juágu.

¹⁶ Queísi lirájüñü jumá Búngiu, ousera jumá queísi gürígia ja mámabaña idámuni lun ni ában gürígia, máma lueígiñe líra lun jadügüni le wuríbabeí, lubáragiñe líra, abágarida jumá queísi lidámun Búngiu.

¹⁷ Inébe jamá sun gürígia jun queísi lubúdubu, jínsiñe jamá jidújeñu lueígiñe Jesucrístu jun, inébelá Búngiu jun, inébelá urúei jun.

Jémpulu luáguti lasúfurirun Crístu

18 Umúsuniña, inébe jamá jiyúbudirigu jun queísi lubúdubu, mámarügü ja buídubaña júma, ásta gíñe ja wuríbabaña.

19 Lugúndun labínirubei Búngiu gürígia le awándubei asúfuriruni le mébunati láu larítangun luágu Búngiu.

20 Ánjaün adüga cátei wuríbati, jafáyeira luágu, málati gagúraasun jumá luágu líra, ánjaün asúfurira lueígiñe jadügün cátei buíti, ába jawánduni láu gurásu, buíti líra ligíbugiñe Búngiu.

21 Lun luwúyeri igáburi le lagúara Búngiu juágu, quei sáfuri lubeí Crístu juágu láu gurásu, íchiga ában jémpulu jun lun jafálaruni.

22 Madügünti Crístu ni ában figou, meyéerangun ligía gürígia ni ában weíyaasu.

23 Dan le janábuni, moúnabunti láu anábajani, dan le jasúfuriragüdüni, masíadirun lumútiña, lubáragiñe líra, derégeguarügüti lúngua lun Búngiu le agúseragüdübei lau ísuruni.

24 Barü lumuti Crístu guánarügü wafígoun luógu luágu gurúwa lun weréderun quei jiláñu lun figou, lun wabágaridun ában ibágari le lánina ísuruni. Buleíseiwati lun wareídagun.

25 Ítara jíña meja quei mudún ja féridijaña, ánjein guetó, ñübinjadün lun Crístu le oúnigirubalün queísi jouniri mudún, toúnigiloún juwáni.

3

Ligáburi jabágaridun maríetiña

1 Ítara gíñe jugúya würiña gámaritiña, derégegua jumá júngua joun júmarigu, lun ánjein lan mánjagiña lubeí lun ugánu lánina asálbaruni, gayára lámuga jayábin lun jafíñerun luágu Crístu, maríñagunga jugúya ni cáta joun luágu asálbaruni,

2 láurügü jaríjini lubuídun jouseruniña láu inébesi lúma larúman igáburi.

3 Mámala láu buri cátei bouguditi jibíti jewéndeda, quei buri lanárime aroúraguni, arígeilaü lúma buri bängüli le gólu, anáanguni wéndegutu,

4 tídaanlá janígi jewéndeda, le ábanbei ubuíduni le meféridirawadibei. Ában igáburi bímeti, darángila, ligía cátei gebégibei sarágu ligíbugiñe Búngiu.

5 Ítara liñá meja ligáburi jewéndedun würiña já meja derégeguañabaña jóungua lun Búngiu lídan meja dan le sügüjalibei. Jeménigitiña meja luágu Búngiu, derégegua jagía jóungua joun jámarigu.

6 Ítara tiñá meja Sára. gagáambaditu lun Abrahám, ába tagúarun lun, “nabúreme” lun tarúfuduni linében tun. Jiyábinba lun ítara jumá quei tugúya ánjein jadüga le buídubei, manúfudeiga lueí ni cáta.

7 Jugúya gíñe wügüriña, áfaagua jumá lun gunfaráanda jumániña júmarigu. Rújumei jafúlasun joun, mámarügü lueígiñe mére tántima würi, lugúndun gíñe rúlaani Búngiu ibágari méme magúmuchaditi le líchugubei jun láu lareíni, joun. Adüga jumeí ítara, úa lámuga ni cáta lun leréderunün lueí jayúmurangun lun Búngiu.

Ja asúfurirubaña lueígiñe jadügüni le buídubei

8 Abágarida jumá sun jugúya lídan úarani lúma láu gudémejabu jídaangua, jínsiñegua jugúyame júngua queísi idújeñu lueígiñe Jesucrístu. Areída jumá, únabu ligíame janáangun júngua.

9 Máguyugüda jumá wuríbani luágu wuríbani, ni anabúni luágu anabúni, lubáragiñe líra, águyugüda jumá abíniruni, lugúndun lun jerésibirun abíniruni lúmagiñe Búngiu lagúaraün. Lugúndun taríñajare Lerérun Búngiu.

10 Le busénti labágaridun ában ibágari buíti, lúma gíñe ában ibágari lánina ugúndani,

lúnti loúnigiruni liyúma lueí ladímurejan wuríbani, maríñagun ligíame iyéeni.

¹¹ Lúnti ladisedun lueí wuríbani lun ladügüni buíti, láluajani darángilaü lun labágariduni súnwandan.

¹² Lúnti ítara lan ligáburi, ladüga toúnigi lumútiña Wabúreme Búngiu ja richáguabaña ligíbugiñe, agáambaleí jayúmuragun lun.

Ánjein ja adügübaña wuríbati, magúndaati Búngiu jáu.

¹³ ¿Cábagi gayára ladügün wuríbati jun, ánjaün íchaagua júngua lun jadügüni buíti súnwandan?

¹⁴ Ani íbini jasúfurirun ladüga lísurun jibágari, gúnda jumá ladüga fuleíseiwa jumá lídan le jasúfurirun luágu Crístu. Manúfude jumá lueí ni ában, madíjeri ligíame jarítangun.

¹⁵ Deréeguarügü jumá júngua le gumúti lun Crístu quei Jabúreme, aráanseñu jumá súnwandan lun joúnabuniña ja álügüdütün ca lan ueígiñe jeménigida luágu Crístu, láu maweíriguni lúma láu inébesei.

¹⁶ Buídulá jóuserun, darángilañu támuga janígi, lun ja lan adímurejabaña wuríba luágu lubuídun jigáburi queísi afíñetiña luágu Crístu, nibúsigari jamámuga luágu jerérun guánarügü.

¹⁷ Buítimaati lun jasúfurirun lueígiñe jadügün buíti, ánjein ítara líña lubeí labúseeruni Búngiu, sügü láu lun jasúfurirun lueígiñe jadügün wuríbati.

¹⁸ Jarítagua jumá luágu luweírin lasúfurirun Crístu dán meja le loúnwenbei luágu wafígoun ában weíyaasu lun sun dan. Buíti meja Crístu, ába lasúfurirun wawágu, wagía le wuríbabei, lun lanügüniwa lun Búngiu. Áfarúati jilágubei, wínwantu láni Espíritu.

¹⁹ Quei Espíritu, ñüdünti gíñe apúrichija joun espíritugu ja lídaanbaña jafúlasun jiláaña.

²⁰ Espíritugu jagía, gürígia ja wínwanbaña lídan meja lidáani Noé, magáambaditiña meja gürígia jagía lun Lerérun Búngiu láu sun arúfuda láni Búngiu luweírin lugúraasun joun lídan le lagúrabajani tagúmuchún árca to ladügüboun Noé. Mánjatiña jagáambuni Búngiu, ába jasálbarun wídürügü gürígia lídaangiñe luweírin gúnran ligía.

²¹ Dúna ligía, ítara líña quei lidúnarina badísei guetó, le ídaangiñebei wanügüwa lun wasálbarun. Máma lun larúmadun úgubu abásteruni, arúfudarügü lumúti luágu jarúmaaru tan wanígi ligíbugiñe Búngiu láu wafíñerun luágu Crístu, luágu gíñe sálbaadiwa lan láu lásaarun Crístu lídaangiñe ouweni lúnya labágaridun.

²² Múdeiti Crístu siélun, áni níjein guetó ñun lueígiñe loúnwenren Búngiu jáu sun ánjeligu jáma sun jíbiri ubáfu siélu lábugiñe lubáfu.

4

Wesériwidun láu ubáfu le líchugubei Crístu woun

¹ Ligía, ítara quei súfuri lubeí Crístu ya ubouágu wawágu, lúnti gíñe aráanseñu wamá lun wasúfurirun láu gurásu luágu.

² Le súfurijalibei luágu Crístu, ígira láali figou lun labágariduni líbiri libágari queísi lugúndan Búngiu, máma lun líchugun ugúndani lun lagübüri ayúmajani.

³ Lídan meja dan le sügüjalibei, adüga jumúti meja luríban buri cátei le jínsiñebei joun ja ibídiñejabubaña lun Búngiu, jaganouña meja lídan ibágari nibúsigarídünati, gúnfulitün meja lúma luríban jayúmajan, abácharuada, adáagua fédu, átagua sarágu, ájuduragua joun sándu, le moúnbei ladügüniwa. Buídurügaali dan le abágarida jumáalibei ítara.

⁴ Guetó, weíriti janígi já meja jumádagubaña láu mafála jumáaña lan lídan lagübüri ibágari le, ligía jadímurejanbei wuríba juágu.

⁵ Ánjeinti jagía, jagúfesseruba ligíbugiñe Búngiu, le aráanseñubei lun lagúseragüdüniña wínwangiña jáma jiláguaaña, madíse.

⁶ Ligía apúrichijoua lubeí meja luáguti asálbaruni joun ja jiláguañábaña guetó, lun gayáraabei lan gabágari tan jawáni láu libágari Búngiu, láu sun jilá lan jágubu queísi lasúseredun joun sun gürígia.

⁷ Yaráfaali lagúmuchun ubouú, ligía lúnti lubeí aráanseñu jumá, ragügua jugúyame júngua, derégegua jugúyame júngua lun ayúmuraguni lun Búngiu.

⁸ Lougiñe sun cátei, níjeinlá sarágu ínsiñeni jídan joun jíbirigu, lugúndun ánjaün jínsiñejabu, ferúduna jubeí jafígoun ámu juágu, láu sun gíbe lan.

⁹ Resíbi jumáña gürígia júbiñe láu sun jugúndan.

¹⁰ Rújali Búngiu ában ubáfu lun ságü afíñeti luágu Crístu, ítara liña lubeíti, seríwi jumá joun jíbirigu láu ubáfu le rúlaalíbei Búngiu jun, queísi oúniri buítiña lánina ubáfu buri le líchugubei Búngiu.

¹¹ Le gabáfubei lun lapúrichijan, lúnti ladügüni queísi ában le adímurejati dimúrei lúmagiñe Búngiu. Le esériwiduti, adügaleí láu sun érei le líchugubei Búngiu lun. Sun cátei le jadügübei, adüga jumeí lídan ában igáburi le lúnti líchugúniwa uweíriguni lun Búngiu láu, lídaangiñe Jesucrístu. Búngiu le Súnti Gabáfu, ligía le lúnbei lerésibiruni uweíriguni lun sun dan. Ítaralá.

Wasúfurirun queísi lánigu Crístu

¹² Nidújeñu jínsiñetiña nun, maweíridalá janígi láu buri lidíjeri ouchawagúni le jibíjubei, camá jamuga ába cátei ámuti asúseredubei jun.

¹³ Lubáragiñe líra, gúnda jumá luágu gafánran jumá lídan lasúfurirun Crístu, lun gayáraabei lan jabuínchun láu ugúndani dánme le lagíribudun Crístu ubouúgun láu sun luweírigun.

¹⁴ Fuleíseiwatün ánjaün anabúa lueígiñe lánigu jumá Crístu, lugúndun arúfuda lumúti líra luágu níjein lan Sífiri Sándu, le weírigubei, jídan.

¹⁵ Ánjein asúfurira ában jídaangiñe, lun máma lan lueígiñe láfarajan, o lueígiñe lan líwerujan, ni lueígiñe ladüraaguni líbiri lúrudu, ni lueígiñe leméterun lídoun cátei le miábinti lun, mídin.

¹⁶ Ánjeinti asúfurira mútu lueígiñe lánigu lan Crístu, moún lumuti lanügün busíganu, lúnti líchugun eteíngiruni lun Búngiu luágu lánigu lan Crístu.

¹⁷ Chülüjali dan lun lagúmeserun luweírín asúfuriruni, jámagiñe guánarügüba lánigu Búngiu lagúmesera. Ánjeinti lagúmeseruña lubeí asúfuriruni ítara wámagiñe, weírítimaabei jasúfurirun ja mánjabaña jerésibiruni lerérun Búngiu.

¹⁸ Ánjeinti jénreengu lubeí jasálbarun ja buídubaña, ¿cábagi asúsereda joun ja wuríbabaña, jáma ja gafígounbabaña?

¹⁹ Ja lubeíti asúfurirubaña queísi labúseeruni Búngiu, lúnti ítara méme jamá adügei le buídubei, derége jamoúnme jawáni lújaburugun Búngiu le adügübañiña, lugúndun gayáraati weménigidun luágu Búngiu lun lagúnfulirun láu lerérun.

5

Lerérun Pédro joun afíñetiña

¹ Níchuguñein nerérun jun, jugúya ja ábutigubaña lídan jadámurin afíñetiña, queísi ábuti lan gíñe áu quei jugúya, áni geféentina gíñe luágu lasúfurirun Crístu, áni gabárabadina gíñe quei jugúya lídan uweíriguni le lúnbei liábin.

² Toúnigi jumáña lirájüñü Búngiu ja lábugiñebaña jaríaajan queísi jounigiruniña jouniri mudún mudún. Adüga jumeí láu ugúndani queísi

labúseeruni Búngiu, máma ladüga jafósuruña lan, adüga jumeí ladüga busén jumá jesériwidun lun Búngiu, máma ladüga línsiñegu seínsu.

³ Moúsera jumá camá jamuga jabúriña ja lábugiñebaña jaríaajan jugúya, jóucharügü jumá lun ában jumá jémpulu buíti joun.

⁴ Ítara lúba, dánmeti le liábin Jesucrístu, le jóuniri mudún le tímatimaati, jibíjuba ában uweíriguni le weíriguti le ladúraruba lun sun dan, le mítaraanbei quei rídi le láuti ubánaü le gásaürati.

⁵ Jugúya gürígia ñübürigiña, rúgua jumá júngua lábun jagúmadin weíyaaña mútu. Lúnti jesériwidagun súngubei jóunigua láu manáanguni únguaü, lugúndun taríñajare Lerérun Búngiu.

Magúndaanti Búngiu jáu ja barüguabaña jóungua, áni íderagua lumútiña ja manáangunbaña jóungua, láu lareíni.

⁶ Rúgua jumá lubeíti júngua ünabu lábugiñe lújabu Búngiu le gabáfubei, lun gayára lan líchuguni uweíriguni jun dánme le lachülürün dan ligía.

⁷ Madíjeri jumá luágu ni cáta, ígira jumeí sun cátei lun Búngiu, lugúndun laríjiña jáu le tímatimaati.

⁸ Agáguduañu jumá, ragüguañu jumá júngua, lugúndun eíbugañajádügü líña Máfia le jágani queísi líñún gáñiti áluaja cába lan lagúnrinchagua.

⁹ Mígiraguagüda jumá júngua lun, derégüdagu jumá lídan jafíñen, subúdiñu jumeí luágu ligía méme lan gíñe jasúfurirubei jidújeñu lueígiñe Crístu lídan sun fulásu.

¹⁰ Lárigiñeme súfurijadün lan luágu murúsun dan, ladügübadün Búngiu lun úa lan mégeiti luágu lubuídun jigáburu, derégüdagu lídan jafíñen, surúñu, láu ubáfu lun jawánduni sun cátei. Ligía méme Búngiu le íchugubalin sun abíniruni woun, le gíñe agúarubei woun lun gafánran wamá lídan luweírigun le magúmuchadibei, lídan ában lúma Jesucrístu.

¹¹ Ligía le Súnti Gabáfu lun súnwandan. Ítaralá.

Lagúmujoún buri mábugaü

¹² Noúnajañoun tiraüraü gárada to jun lúma Silváno, le nanügübei queísi ában idújei úaraguati, lun níchugun dügüdaguaü lun jafíñen, geféen áume jun luágu abíniruni lan le jerésibirubei, larúfuduñsun cátei. Ligía méme Búngiein lan línsiñejabu Búngiu jun le tímatimaati. Madísedagua jumá lueí línsiñejabu Búngiu ligía.

¹³ Mábuga jáña afíñetiña ja Babilóniabaña jun, ja gíñe lanúadajabaña Búngiu lun lánigu jamá queísi lanúadajanün. Mábuga líña gíñe Márcos jun, le ítarabei camá jamuga niraü.

¹⁴ Chúgua jumá júngua lídan líri Wabúreme, arúfuda jumámugei luágu lídaañadiwa lan ában wámagua.

Darángila jumá sun jugúya le lánigu Jesucrístu. Ítaralá.

TIBÍAMAN LIGÁRADAN PÉDRO

Labürüjan Pédro joun afñetiña

¹ Áu Simón Pédro, ában esériwiduti lun Jesucristu áu, ában gíñe lání apóstolu. Nabürüjañoun gárada to jun, jugúya le ñübinjalibei lun gafánran jumá lídan luweírín asálbaruni le wabíjubei lídaangiñe Wasálbaragüle Jesucristu, le méme Wabúngiute, lugúndun úragua lan.

² Ibíja jumá sarágu abíniruni lúma darángilaü lueígiñe jasúbudiruni Wáguchi Búngiu lúma Wabúreme Jesús.

Igáburi le lúnbei jóuseruni afñetiña

³ Rúlaali Búngiu sun le wemégeirubei woun lun wabágaridun lúma lun wesériwidun lun, láu lasúbudiragüdüni Jesucristu le agúarubei woun lun gafánran wamá lídan luweírigin lúma lubuídun cátei le ladügübei.

⁴ Gúnfuliti Búngiu láu lerérun, lídaangiñe Jesucristu, láu líchuguni le buídutimaabei lúma le weíritimaabei woun. Láu líra, gabáfu wamá lun wanúrajan lueí lagübüri ayúmajani lánina ubou le, ibíja wamámugei ligáburi Búngiu wádan.

⁵ Ligía lúnti lubeí jáfaagun lun jíchugun lubuídun igáburi lánwoun jafíñen,

⁶ subúdi luágu Búngiu lánwoun lubuídun jigáburi, ragüguaü únguaü lánwoun jisúbudin luágu Búngiu, gurásu lánwoun ragüguaü únguaü, edéregeraguni únguaü lun Búngiu lánwoun gurásu,

⁷ areíduni lánwoun edéregeraguni únguaü lun Búngiu, ínsiñejabuni lánwoun areíduni.

⁸ Ánjein níjein buri lubeí igáburi líra jídan le tímatimaati, mámabei luágu ni cáta jisúbudin luágu Crístu, áni líchuguba jibágari sarágu cátei buíti lun Crístu.

⁹ Ánjeinti le mítaraanbei ligáburi, ítara líña queísi ában maríjinti o ában lan madíse taríjin, bulíeilá luágu chibáwaali lan binádu lifígoun.

¹⁰ Ligía lubeíti nidújeñu, quei wájali lubeí Búngiu jun, anúadajalaün lun lánigu jumá, áfaagua jumá lun lájüchün buri cátei le jídan, ánjein jadüga ítara, máburujabadün lídoun féridi.

¹¹ Ítara lúba úa lan ni cáta ásiñeragüdüti jebélurun lídoun larúeijan Wabúreme Wasálbaragüle Jesucristu, le magúmuchadibei.

¹² Ligía narítaguagüda mémebadün lubeí luágu, láu sun subúdi jumáali lan, áni jeíbuguña lan lídan inárüni ligía.

¹³ Láu sun líra, sun wínwangidina lan, afíñetina luágu buídu lan lun nagúaruni jarítangun lun luwúyeri íbágari le lúnbei jabágariduni queísi lánigu Crístu.

¹⁴ Subúdigüda láali Wabúreme Jesucristu nun luágu yaráfaali lan wéyu lun noúnwen,

¹⁵ ítara líña lubeíti, nadügübei nuáraati lun íbini lánme lárigiñe jiláadina lan, lun súnwandan lan jarítangun luágu buri cátei le.

Já buri aríjubalin luweírigin Crístu

¹⁶ Arúfudajani le wíchugubei jun luágu lagíribudun Wabúreme Jesucristu ubouágun láu sun luweírín lubáfu máma meja úraga, aríja wamúti meja luweírigin láu wágu.

¹⁷ Aríja wamúti dan le líchugunbei Búngiu Úguchili inébesi lúma uweírigin lun, ába laríñagun lumálali Búngiu lun lídaangiñe uweírigin lánina siélu. “Níraü le jínsiñebei nun le, le áubei oúnwenbun lan nugúndan.”

¹⁸ Agáamba wamúti ladímurejan Búngiu ítara luágu Wabúreme Jesucrístu dán meja ñíñadiwa lan lúma Wabúreme luágu wübü le biníwabei.

¹⁹ Níjein gíñe ában cátei choúrutimaati wáma luágu liábin Wasálbaragüle ubouágun—ligía ugánu le jabúrújabei profétagu. Buíti jadúga lun jatúriajani jerérun wügüriña jagía, ladúga líchuguba lan larúgounga tun janígi queísi ában lámpu le adúnraaguti lídan ában fulásu le búrigati. Lesériwiduba jerérun woun ítara daríme dan le lagíribudun Crístu ubouágun, le ítara lúbabei queísi larúgadun dan le táfuridun warúguma to lánina bináafin—wasúbudirubei sun cátei lídaanme dan ligía.

²⁰ Lougíñe sun cátei, lúnti jasúbudiruni luágu úa lan ni ában gayáraati ladáriruni laníchigu cátei le bürü jamaalíbei profétagu láu lání lúngua. Busénwati lubáfu Sífiri Sándu lun gunfaráandawa lan,

²¹ lugúndun madímurejaantiña meja wügüriña jagía láu jáni jóungua. Jagía, queí meja wügüriña jabei derégeguatiña jóungua lun Búngiu, dimúrei buri lúmagíñeti Búngiu jadímurejabei lugúndun Sífiri Sándu lan adúndejabaliña.

2

Ja arúfudajabaña iyéeni

¹ Añájein meja yéetiña jádan warásan ja aríñagubaña luágu profétagu jamá, ítara lúba gíñe añájeinbaña lan jídan, jádaruba iyéeni lagánagua arúfudajani le inárünibei lun lagádeiruni jafíñen. Jarúfudubeiti yéetiña jagía láu luwúyeri jabágaridun luágu máma lan Crístu Jabúremebei, láu sun jilá lan Crístu lun lasálbaruniña. Láu cátei líra, janügüba agúnrichaguni furése joun guánarügü.

² Gíbeebaña afálarutiña lídan liwíye jémeri, áni ladímurejóuba wuríba luágu úma le inárünibei jadúga.

³ Láu línsiñe seínsu joun, jaságaruba seínsu jueí láu jarúfudajan le málabei, le ñübinbei lídaangiñerügü jachügü, choúruti luágu jagúseragüdúwaba lan luágu luríban jadúga, yaráfati jeféridirun queísi laráanserúniwa jabá lúmagíñe binárü.

⁴ Úati ferúduna láníña Búngiu ánjeligu já meja afígounjabaña, ába lachágaraguniña máfiougatin, ába lígiruniña adaürúwa lídan lubúriga ñi agúrabajei wéyu lánina lagúseragüdüniña.

⁵ Úati gíñe ferúduna láníña Búngiu mútu wuríbatiña já meja aganoúbaña ubouágu lídan lidáni Noé. Ába louñajani gúnran jawágu gürígia jagía, Noé rügüñein le apúrichijabei joun gafígountiña lun jasáansiruni jagáburi, jámaya sédü gürígia lánwoun asálbara.

⁶ Darí lumuti gíñe meja jadúnrun gürígia ja aganoúbaña ubúругu Sodóma lúma Gomórra. Ába láguduni fulásu buri ligía darí lun ladágun balígime, lun larúfudajan joun gürígia wuríbatiña ja lúnbaña jayábin járigiñe ca lan lafáyeijabei figóu.

⁷ Séfu lumúti meja Lot, ában meja wügüri buíti, le weíribei lidíjeri luágu liwíye jagáburi gürígia wuríbatiña lídan fulásu ligía.

⁸ Ságüja wéyu lasúfurirun wügüri buíti ligía tídan lanígi láu laríjini lúma lagáambuni cátei buri wuríbati le jadügübei.

⁹ Sun le, ában jémpulu luágu ligáburi lasálbaruniña Búngiu ja derégeguabaña jóungua lun lueí ouchawagúni, ígira láña ja wuríbabaña lábugiñe asúfuriruni lubá jasíadirúniwa lun sun dan lídaanme wéyu lánina agúserawagüdüni.

¹⁰ Lasúfuriragüdatimabaña Búngiu ja afálarubalin liwíye jayúmajan, ru jagía mebéreseni luágu le lubeíbei Búngiu. Arúfudajatiña magáambaditiña ja jagánaguabaña, barüguatiña jóungua, mebéresentiña láu ni cáta, marúfudun jagía inébesei joun ja weírigubaña, anábarügü jamána.

¹¹ Ánjañati ánjeligu, láu sun jéretima jamá, gabáfu jagía sügü jáu arúfudajatiña jagía, míchuguntiña jadúnrun ánjeligu wuríbatíña ligíbugiñe Búngiu, láu anabúni.

¹² Ánjaña arúfudajatiña ja, ítara jáña queísi anímaalugu úati gunfaráanda jamá, jagüriajoún lun járügüdün lun jafarún. Adímurejatiña wuríba luágu buri cátei le úati gunfaráanda jamáni, jóúweguba queísi jóúwegun anímaalugu,

¹³ asúfurireina lueígiñe jasúfuriragüdün ámu. Nibúsigarídünati jabágaridun, adáagua jamúti lagübüri jayúmajan lídan larúgounga, ligíbugiñe laríjin sun ubouú, dari lun júaradagun júma lídan jufédun queísi jamúga gürígia buítiña, wíyeti jabágari.

¹⁴ Siñáti jaríjin ában würi lun úa lan suámei jamánun, mabúchati jawágu adáagua figouú. Acháwaja jamútiña débilitiña lídoun figouú, bíbutiña luágu meménijabuni. Chouruti luágu jagünrinchagúba lan.

¹⁵ Féridiña jáña, lugúndun jígiruni úma le surúbei. Falá jamuti láni proféta Baláam, le liraú Beór, jémpulu, lé meja álugubei lagáñeirun seínsu láu ladügüni le wuríbabei.

¹⁶ Ábati ladeínjan ában burígü maríñagaditi lun luágu lifígoun, adímureja ligía lun láu jamálali gürígia, ába mígirun láni lun lasígirun láu lilülün láu.

¹⁷ Ítara jáña arúfudajatiña yéetiña ja queísi w-élu mábeiti, queísi buri juánriñu le lanügün garábali, siádiwaaña lun jásügürün sun dan lídan luweírín-ágei lubúriga máfiougati.

¹⁸ Lugúndun aríñagatiña dimúrei buíduburiti, le málati, aríñaga jagía luágu gayára lan jagúnfulirun, ja afálarubaliña, lúma luríban jayúmajan, adúga jameí furúmiegurügü iwíyei le jabúseerúbei. Ítara líña jacháwajaniña ja sun líñabei jaséfurun lídaangiñe binádu luwúyeri jabágaridun lánina bulíeiguaü, lun jagíribudun járijoún lídoun liwíye ibágari.

¹⁹ Aríñagatiña joun jánigu luágu jabágariduba lan ában ibágari le ñí lumuti gayára lan jadügüni le jabúseerun, ánjeinti jagía guánarügü idámuniñanu lun Máfia, lugúndun sun gürígia lidámuñein cátei le árügüdübalin.

²⁰ Ja subúdi jamáalibei Wabúreme Jesucrístu le Wasálbaragüle, ani séfujaña lídaangiñe iwíyei le lánina ubouú le, ánjañaya áburuja lídoun buri cátei le lúnya lárügüdüniña, wuríbatimaabei le lúnbei gádan lániña sügü láu meja furúmiñe.

²¹ Buítimaati jamúga meja joun lun masúbudirungubei jamáni úma le surúbei, sügü láu lárigiñe lan jasúbudiruni, ába jígiruni lerérun Búngiu joun.

²² Jawágu lagúnfulira linárün dimúrei le. “Léchun oúnli lun leíginiya lewéraján, léchun búiruju le sun liñábei lágoun jarúmati, lúnya lágoun lídan gubégubeti.”

3

Lagíribudun Wabúreme Jesucrístu ubouúgun

¹ Nidújeñu jínsiñetiña nun, nuján tibíaman gárada nabürüjan jun. Tídan biángubei gárada, jóúchatina lun narítaguagüdünün luágu arúfudajani inárüniti le furéndeí jumáalibei, lun gayáraabei lan jasáminarun buídu luágu.

² Jarítagua jumá luágu buri cátei lé meja jaríñagubei profétagu, lúma luágu lugúmadin Wabúreme Jesucrístu le Wasálbaragüle, lé meja warúfudajabei wagía apóstolugu jun.

³ Lídaangiñe sún buri cátei le waríñagubei, rútima jumeí le jarítangunrugun. luágu lídoun lánme lagúmujoún dan, añájeinbaña gürígia éjerajatiña láu buri cátei luáguti Búngiu, jabágariduba queísi laríñaguni luríban jayúmajan joun,

⁴ ábame jaríñagun. “¿Másan jaríñajare luágu liábinyaba lan Crístu ubouúgun? ¿Jalíñañeinsan? Lúmagiñe jóúwegun furúmiñetiña afíñetiña luágu Jesucrístu, ítara mémegili sun cátei queí meja lúmagiñe ladügünbei ubouú.”

⁵ Mabúseeruntiña jasúbudiruni luágu ladügüni Búngiu sun cátei lídan lídáani lun ladügüniwa. Adüga lumúti meja siélu lúma ubouú lúmagiñe binárü láu lugúmadin, adügaleí múa lídaangiñe dúna, geyégu líña gíñe múa ligía láu dúna.

⁶ Ába lachülürün dan lun lagünrinchaguni Búngiu ubouú meja ligíra láu lidúnarina gúnran.

⁷ Ánjeinti siélu lúma múa le guetóbei, lareíduñein Búngiu lubáme wéyu dánme le lagúseragüdün. Lídaanme wéyu ligía, lágudubei Búngiu siélu lúma ubouú le gumúti láu lugúmadin. Ja madügünbaña gásu láu Búngiu, jágudúba lídan wátu ligía.

⁸ Mabúlieida jumeí gíñe, nidújeñu jínsiñetiña nun, luágu ítara líña lan ában wéyu ligíbugiñe Búngiu quei mílu irúmu, mílu irúmu quei ában wéyu.

⁹ Máma jamúgattia lugúndun ladárasarun lagúnfulirun Búngiu láu lerérun, queísi jarítangun sarágu, gagúraasunrügüti jabá gürígia lugúndun mabúseerúnti lun leféridirun ni ában jádaangiñe, labúseerun lun jaságürijan sun gürígia lídaangiñe jafígoun, gayára lámuga jasálbarun.

¹⁰ Lachülürüba wéyu ligía lun lagíribudun Wabúreme Jesucrístu ubouúangun dánme le magúrabúniwa lan, queísi lachülürün jíweruti áriebu. Ábanmeti lagúmuchagun siélu láu ában lanárime ireíni, rürüguagüdaleíme wátu geméti sun cátei le ñíbei—játi, warúguma, wéyu—gudáme ubouú láu sun cátei le lídaanbei.

¹¹ Queísiti lagünrinchaguba lan sun cátei ítara, lúnti lubeíti jarúma lan jabágaridun, derégeguañu júngua lun Búngiu le gumúti,

¹² agúrabañu jumeí lachülürün luwéyuri Búngiu, adügañu jumeí le juáraati lun jóufudajani. Lídaanme wéyu ligía, lagünrinchaguba siélu láu wátu geméti, ábame larürüdagun sun cátei.

¹³ Ánjeinti wagía, agúraba wamúti iséri siélu lúma iséri ubouú le uágubei laríñaga Búngiu woun, sun cátei ñi, úaraguabei, áni buídubei gíñe.

¹⁴ Ligía lubeíti, nidújeñu jínsiñetiña nun, sun anjünja lan agúrabajeí buri cátei le, jóucha jumá lun ladárirunün Búngiu lídan úaraguni ligíbugiñe, jarúmañu, úouga mégeiti juágu.

¹⁵ Subúdi jumeítia luágu lagúrabaja rügüña lan Wabúreme Jesucrístu jasálbarun gürígia lubá lagíribudun ubouúangun. Ítara líña gíñe labürüjan wadúje Páblo le jínsiñebei woun sarágu, jun, láu subúdi le líchugubei Búngiu lun.

¹⁶ Adímurejati tídan sún buri ligáradan luágu buri cátei le, láu sun nújein buri lan tídaangiñe, jénreenguti gunfaráandawa tan. Játi ibídouguabaña áu jáma ja louguabaña afíñe, garábaguati laníchigu labürüjan Páblo según jagía, ítara quei jadüga tún buri tíbiri líburu to Lerérun Búngiu. Jeféridiruba lun sun dan ladüga cátei le.

¹⁷ Ligía lubeíti, nidújeñu jínsiñetiña nun, queísi subúdi jumáli lubeí buri cátei le lubáramegiwa, toúnigigua jumá júngua lueí jeyéedunün gürígia wuríbatiña, ígiragüdei arúfudajani le inárüniti luáguti Búngiu jun.

¹⁸ Jóucha jumá lúntima jasúbudiruni Wabúreme Jesucrístu le Wasálbaragüle, awáanse jugúyame lídan línsiñejabu. ¡Uweíriguni lun, guetó lúma súnwandan! Ítaralá.

FURÚMIÑETU LIGÁRADAN APÓSTOLU JUAN

Dimúrei le lánina ibágari

¹ Wabürüjaña jun luágu Búngiu Irájü lé buga níjeinjalibei dan le lagúmeserunbei sun cátei. Ába liabin Búngiu Irájü ubouágun queísi ában gürígia, aríja wamúti láu wágu, agáamba wameí ladímurejan. Aríja wamúti sun le ladügübei, gurú wagía luágu láu wájabu. Ligía le ídaangiñebei liábin sun ibágari, ligía gíñe le gíribei “Dimúrei”.

² Ába liábin ubouágun, quei nubeíbei jun, aríja wamúti, geféen wagía luágu, áni guetó wabürüjaña jun luágu. Níñein Búngiu Irájü lúma Búngiu Úguchili lúmagiñe furúmiñeti dan, ába liábin ubouágun queísi gürígia lun gayáraabei lan wasúbudiruni.

³ Wafúraanguagüdúñein lubeíti jun le aríja wamáalibei ladügün, lúma le agáamba wamáalibei laríñagun, lun gayáraabei lan jafíñerun le tímatimaati, lídan jumámuga ában wáma lídan cátei lébei, lídaañadünme gíñe ában lúma Búngiu Úguchili lúma Jesucrístu le Búngiu Irájü, queísi wagía.

⁴ Ítara lúba dayárubei lan wagúndan, sun wagía.

Ítara líña Búngiu queísi lámpu

⁵ Niján ugánu le larúfudajabei Crístu woun, le gíñe wíchugubei jun guetó. luágu ítara líña lan Búngiu queísi ában lámpu, mánti ni cáta lúma lubúriga.

⁶ Ánjawa aríñaga luágu lídaañadiwa lan ában lúma áni madügün wamúti le laríñagubei, lídaañagidiwa lubúriga, áni weyéedaguña woúngua láu waríñagun luágu lídaañadiwa lan ában lúma, lugúndun múaran lan wagáburi lúma linárün.

⁷ Ánjein úaragua lubeí wagáburidun lúma linárün, lídaañadiwa larúgounga, áni inárüni luágu lídaañadiwa lan ában wámagua, áni chibá lumuti líta Jesucrístu sun wafígoun.

⁸ Ánjawa aríñaga luágu mafígoun wamá, weyéedaguña woúngua, maríchatí le waríñagubei.

⁹ Ánjein wagúfesera wafígoun, gayáraabei weménigidun luágu Búngiu luágu ladügübei lan le úaraguabei –ferúduna lubeí wafígoun, jarúmagüda lówame lídaangiñe sun wuríbani.

¹⁰ Ánjawa aríñaga luágu madügüngidiwa lan figou, wadügüñein Búngiu camá yéeti, áni merésibirun wamágili lerérun tídan wanígi.

2

Adímurejati Crístu lueígiñe wafúleisein ligíbugiñein Búngiu

¹ Nirájüñü, nabürüjañein buri cátei le jun lun mafígounjan jumá. Láu sun líra, ánjawa afígounja, ladímurejaba Wabúreme Jesucrístu lueígiñe wafúleisein ligíbugiñe Wáguchi Búngiu, ladüga ligía rügüñein richágua ligíbugiñe Búngiu.

² Lídaangiñe Jesucrístu ferúdunawa lan wafígoun, áni mámarügü wafígoun, ferúdunawati gíñe jafígoun sun ja afíñebaña luágu.

³ Ánjein wagúnfulira lugúmadin Búngiu, wasúbudirubei luágu chülüjadiwa lan asúbudirei Búngiu.

⁴ Ánjein aríñaga ában gürígia. “Subúdi numúti Búngiu”, áni magúnfulirunti táu lugúmadin, yéeti gürígia ligía, ibídiñegili Búngiu lun.

⁵ Ánjeinti gürígia le adügübalin le lubeíbei Búngiu, chülújali Búngiu ínsiñeda lun buídu buídu, ítara líña wasúbudiruni luágu lídaañadiwa lan ában lúma.

⁶ Le aríñaguti luágu lídaañein lan ában lúma Búngiu, lúnti labágaridun queí meja labágaridun Jesucrístu ya ubouágu.

Le iséri gumádi

⁷ Nidújeñu, mámatia iséri gumádi le nabürüjabei jun, ligía méme binádu gumádi le júmabei lúmagiñe dan le jagáambubalin ugánu luáguti Crístu, lun jagáburidun úragua lúma ugánu ligía.

⁸ Guetó narítaguagüdüñadün luágu gumádi le lagúarubei Jesucrístu iséri gumádi, áni gumádi ligía, lun jínsiñegua wamá woúniwagua. Ítara líña meja labágaridun Jesucrístu, jabágariduña giñe ítara lugúndun jeíbuguña lan lídan larúgounga le linárünbei Búngiu, mámaañadün lídan lubúriga.

⁹ Le aríñaguti luágu leíbuguña lan lídan larúgounga áni iyéreeguti lidúje lun, lídaangili lubúriga, ibídiñegili Crístu lun.

¹⁰ Le jínsiñejabuti joun lidújeñu lueígiñe Jesucrístu, lídaañein larúgounga, subúditi Crístu lun, áni úati ni cáta lun láburugüdüni lídoun figou.

¹¹ Ánjeinti le iyéreejabuti lun lidúje, ítara líña queísi gürígia le eíbugubei lídan lubúriga, ibídiñeti lun jalíñounbei lan lugúndun darú lani lubúriga laríjin.

¹² Nirájüñü, nabürüjaña jun lugúndun ferúduna láali Búngiu jifígoun ladüga Crístu.

¹³ Agübürigu, nabürüjaña jun lugúndun subúdi jumáli lan Jesucrístu lé meja níjeinjalíbei lúmagiñe furúmiñeti dan. Nñübürigiña, nabürüjaña jun lugúndun gáñei jumáli lan wuríbu luágu Máfia.

Nabürüjanbei jun, nirájüñü, lugúndun subúdi jumáli lan Búngiu Úguchili.

¹⁴ Nabürüjaña jun, agübürigu, lugúndun subúdi jumáli lan Jesucrístu lé meja níjeinjalíbei lúmagiñe furúmiñeti dan. Nabürüjanbei jun, nñübürigiña, lugúndun jére jumá, áni resíbi jumáli lerérun Búngiu tídan janígi, lugúndun giñe gáñei jumáli lan wuríbu luágu Máfia.

¹⁵ Mínsiñedalá ligáburi ubouú jun, ní buri cátei le lánina ubouú. Siñáti lajínsiñedun cátei lánina ubouú jun, jínsiñeme Búngiu jun,

¹⁶ lugúndun úati ni cáta lídaangiñe cátei le líchugubei ubouú nñübinti lúmagiñe Búngiu, lúmagiñe guánarügü ubouú líabin. Luríban jayúmajan gürígia, ayúmajani lun jabíjini cátei le jaríjibei le uágubei jarítagua luágu buídu lan, lúma pántaü luágu cátei le jabíjibei, ligía buri cátei le líchugubei ubouú.

¹⁷ Áni ubouú, agúmucheina líña láu buri sun luríban ayúmajani le lídaanbei, ánjeinti le adügüti lugúndan Búngiu, labágariduba lun sun dan.

Inárüni lúma iyéeni

¹⁸ Nirájüñü, chülújali lagúmujoún dan. Agáambaadün luágu iníte lan Lágani Crístu, quei chülüguaaña lubeí sarágu láganiñu Crístu guetó, ligía wasúbudirunbalin luágu lagúmujoúnjali lán buri dan le.

¹⁹ Wádaangiñe jáfurida, láu sun, lídan lan linárün cátei máma meja wánigu jagía, lugúndun lun jamúga meja wánigu jamá, jeréderuña jamúga meja wáma. Jíchugunbalin janágan luágu Crístu ítara lun laríjiniwa furáangu luágu máma lan wánigu le tímatimaati.

²⁰ Ánjeinti jugúya, rúlaali Crístu Sífiri Sándu jun, áni subúditün sun jugúya lun.

²¹ Nabürüjanbei lubeíti jun, lugúndun subúdi jumáni inárüni lánina wasálbarun, máma lugúndun ibídiñe lan jun, áni subúdi jumúti luágu siñá lan líabin ni murúsun arúfudajani múaraanti lídaangiñe inárüni.

22 Ja arúfudajabalin le múaraanbei, ja aríñagubaña luágu máma lan Jesúsu Crístubei le louñajabei Búngiu ubouágun lun lasálbaruniña gürígia, jagía láganibaña Crístu, mafiñetiña ni luágu Búngiu Úguchili, ni luágu Búngiu Irájü.

23 Sun ja májabaña lun jasúbudiruni Jesúsu queísi Búngiu Irájü, ibídiñegili Búngiu Úguchili joun, ja aríñagubaña luágu Jesúsu lan Búngiu Irájü, subúditi gíñe Búngiu Úguchili joun.

24 Ligía, areída jumeí lubeí ugánu le jagáambubei lúmagiñe furúmiñeti, tídan janígi. Ánjein jadüga ítara, jeréderuba gíñe lídan ában lúma Búngiu Irájü lúma lúma Búngiu Úguchili,

25 jerésibiruba gíñe ibágari le magúmchaditi, queísi laríñaguni Jesúsu woun.

26 Ligía nerérunbei jun jawágu láganiñu Crístu jagía já yebe busénbaña jayéedagunün.

27 Níjein Sífiri Sándu júma le líchugubei Crístu jun, memégeiruntün lubeíti ámu lun larúfudajan jun luágu linárün Búngiu, lugúndun arúfudaja lumúti Sífiri Sándu sun cátei jun, áni inárüni larúfudajabei, máma iyéeni.

28 Ítara líña lubeíti, nirájüñü, ítara méme jumá lídan ában lúma Crístu lun dánme lan le liábin, gayára lámuga wasúbudiruni luágu buídu wamá lúma, úa lámuga busíganu wawágu ligíbugiñe.

29 Queísi subúdi jumáni luágu richágua lan Crístu lídan sun cátei, lúnti gíñe jasúbudiruni luágu lirájüñü lan Búngiu sun ja richáguabaña ligíbugiñe.

3

Lirájüñü Búngiu

1 Aríja jumá luweírin wínsiñe lun Búngiu Úguchili, darí lun gayára lan lagúarúniwa woun “lirájüñü Búngiu”, áni inárüni luágu lirájüñü wamá. Ligía siñá jabáliwa lánigu ubouú gunfaráanda lugúndun ibídiñetí meja Jesucrístu joun lídan linárün cátei dán meja le ya lan ubouágu.

2 Nidújeñu jínsiñetiña nun, lirájüñüjadiwa Búngiu guetó, áni marúfudúngili woun cátabadiwa lan lídaanme lagúmujoún, subúdirügü wamúti luágu dánme lan le lagíribudun Crístu, ítara wába lan quei ligía, lugúndun waríjubei ítara quei lubeí.

3 Áni sun le agúrabajabálin buri cátei le, jarúmagüda lumúti ligáburi ítara quei jarúma lan ligáburi Crístu.

4 Ánjeinti sun le afígounjabei, dürügua lumúti lilúrudun Búngiu, lugúndun luágu cátei figoubei ladúraawagún lilúrudun Búngiu.

5 Subúdi jumáli luágu lun lan lagídaruni Jesucrístu wafígoun liábin ubouágun, luágu gíñe úa lan ni murúsun figou luágu.

6 Sun lubeíti le lídaanbei ában lúma, máma lídaañein figou, áni sun le lídaanbei figou, maríjin lágili Jesucrístu, masúbudirun lágili gíñe.

7 Nirájüñü, mayéedawagua jumá, ában gürígia richáguati ligíbugiñe Búngiu adüga lumúti le richábei, queísi richágua lan Jesucrístu.

8 Ánjeinti le eíbugubei lídan figou, lánigu Máfia, lugúndun afígoujati Máfia lúmagiñe furúmiñeti dan, ába liábin Liraü Búngiu lun lagünrinchaguni luwádigimari Máfia.

9 Úati ni ában le liraüti Búngiu asígiruti lídan figou, lugúndun níjein ibágari le líchugubei Búngiu lun lídan, siñáti lasígirun lídan figou lugúndun liraü lan Búngiu.

¹⁰ Subúdiwati cátaña lan lirájüñübaña Búngiu lúma cátaña lan lirájüñübaña Máfia, lugúndun furúmieguarügü le madügünbalin le buídubei, o mínsiñejabu lan lun lidúje lueígiñe Jesucrístu, máma lánigu Búngiu.

Jínsiñe jamá wíbirigu woun

¹¹ Niján ugánu le jagáambubei lúmagiñe furúmiñeti dan. lun jínsiñegua wamá wámagua.

¹² Moún lumuti ítara wamá quei Caín, lé meja lánigubei Máfia, ába láfaruni lamúlen. ¿Cági ueígiñe láfarei? Lugúndun wuríba lán meja le ladügübeí Caín, áni buíti le ladügübeí lamúlen, ligía lagímugajanbei.

¹³ Nidújeñu, maweíridalá janígi ánjaün eyéereguda joun lánigu ubouú.

¹⁴ Wagía, ítara wáña meja queísi jiláaña, guetó ibíjaadiwa ibágari magúmchaditi, áni subúdi wamúti líra lugúndun jínsiñetiña wadújeñu lueígiñe Jesucrístu woun. Le mínsiñejabuti lun lidúje, jiláñu mémegili.

¹⁵ Sun le iyéreejabubei lun libíri, gáfarajati, áni subúdi jumúti luágu úa lan ni ában gáfarajati lun gayára lan gabágari lan le magúmchaditi.

¹⁶ Subúdi wamúti cátei lan ísiñenibeí. luágu líchuguni Jesucrístu libágari wawágu. Lúnti giñéti wánjarun lun wíchuguni wabágari jawágu wíbirigu.

¹⁷ Ánjein níjein lubeí lúma ában gürígia lun lawínwandun, áni laríja luágu níjein lan lemégeirun lidúje áni míderagun lumúti, ¿ída lubági níjein lan ínsiñeni tídan lanígi lun Búngiu?

¹⁸ Nirájüñü, moún lumuti wayumárurügü lan wínsiñejabu, lúnti ában lan ínsiñejabuni le gumúti, lun larijín lídan cátei le wadügübeí.

Eménigini ligíbugiñe Búngiu

¹⁹ Ánjawa jínsiñejabu le gumúti, gayáraabei wasúbudiruni luágu lánina wamá afíñeni le inárüntibeí, gayáraabei giñe wasúbudiruni luágu buídu lan weréderun ligíbugiñe Búngiu.

²⁰ Ánjoun jamúga íchiga wanígi dúru wawágu luágu som cátei, subúditimaati luáguti dúru ligía lun Búngiu, lugúndun subúdi lan sun cátei lun.

²¹ Ánjoun madárirun wanígi dúru wawágu, nidújeñu, gayáraabei wayábin ligíbugiñe Búngiu láu weménigi luágu,

²² luágu líchugubei lan sun le wamúriajabei lúma woun, lugúndun gúnfulijadiwa láu lugúmadin áni adúga wamáali le áubei lagúndaara.

²³ Lugúmadin Búngiu, lun wafíñerun luágu Jesucrístu le Liraü, lun giñe jínsiñegua wamá wámagua queísi meja laríñaguni Jesús woun.

²⁴ Ja agúnfulirubaña láu lugúmadin Búngiu agánawatiña lídan Búngiu, agánawa ligía Búngiu jádan. Subúdi wamúti luágu agánawa lan wádan luágu Sífiri Sándu le rúlaalíbeí woun.

4

Láni Búngiu Espíritu lúma láni lágani Crístu espíritu

¹ Nidújeñu jínsiñetiña nun, mafíñera jumá joun sun ja aríñagubaña luágu Búngiu lan adímurejabei jayúmulugugiñe, jóucha jumáña lun jarijini ánjein Sífiri Sándu lubeí le jádaanbei o máma lan ligía. Lugúndun labuínchuña ubouú jáu yéetiña ja aríñagubaña luágu Búngiu lan adímurejabei jayúmulugugiñe áni jayéeni.

² Láu igáburi le, gayáraati jasúbudiruni le gámabalin Sífiri Sándu. sun le aríñaguti luágu quei lan gürígia le tímatimaati liábin Crístu ubouúagun, níjein Sífiri Sándu lídan áni láu lubáfu Sífiri Sándu ladímureja.

³ Ánjeinti le aríñaguti luágu iyéeni lan, luágu mayábin lan Crístu ubouúagun queísi gürígia, úati Sífiri Sándu lídan, espíritu le láganibeí Crístu, ligía espíritu le

lídaanbei gürígia ligía. Agáambaadün luágu liábinba lan espíritu ligía, níjeinjali ubouágu.

⁴ Nirájüñü, lánigu Búngiu jugúya, gáñei jumáña yéetiña jagía ja busénbaña jagáraguagüdünün luei arúfudajani le inárüntibei, gáñei jumáña lugúndun gabáfutimaati Sífiri Sándu le jídaanbei sügü láu láni Máfia espíritu le jádaanbei.

⁵ Lánigu ubouú jagía, lánina ubouú cátei le jarúfudajabei, ligía lébubei jagáambuniña ja gíñe lánigubaña ubouú.

⁶ Ánjein wagía, lánigu Búngiu wagía. Le subúdiabubei lun Búngiu, agáamba lumútiwa, le mámabei lánigu Búngiu, májati lagáambuniwa. Ítara líña lubeíti gayáraati wasúbudiruni cátaña lan erésibirubalin linárün Búngiu lúmoun cátaña lan erésibirubalin iyéeni.

Ligáburu Búngiu lun larúfuduni ínsiñejabuni

⁷ Nidújeñu jínsiñetiña nun, lúnti jínsiñegua wamá wámagua lugúndun lúmagiñe Búngiu liábin ínsiñejabuni. Sun le jínsiñejabubei, liraü Búngiu, áni subúditi gíñe Búngiu lun.

⁸ Le mínsiñejabuti, ibídiñegili Búngiu lun, lugúndun ligáburu Búngiu lun larúfuduni ínsiñejabuni.

⁹ Arúfuda lumúti Búngiu wínsiñe lun láu loúnajani Liraü le ábanrügüti ubouágun lun loúnwen, lun gabágari wamá lídaangiñe.

¹⁰ Niján ínsiñenibei. máma luágu wagía lan jínsiñejabubei lun Búngiu, luágu ligía lan jínsiñejabubei woun, ába loúnajani Liraü le ábanrügüti lun loúnwen, lun lébuname ferúdnawa lan wafígoun.

¹¹ Nidújeñu jínsiñetiña nun, ánjein jínsiñeediwa lubei lun Búngiu ítara, lúnti gíñe jínsiñegua wamá wámagua.

¹² Úagili ni ában aríjiti Búngiu, láu sun líra, ánjawa jínsiñegua wámagua, níjein Búngiu wádan, áni ítara líña warúfuduni wínsiñejabu le gumúti lun Búngiu láu wínsiñejabu wámagua buídu.

¹³ Rúlaali Búngiu Sífiri Sándu woun lun lachoúrurun luágu lídaañadiwa lan, áni wadaañein lan gíñe.

¹⁴ Wagía guánarügü aríja wamáali Liraü Búngiu, aríñaga wamei luágu lun lan lasálbaruniwa loúnajei Búngiu ubouágun.

¹⁵ Furúmieguarügü le afiñerubei luágu Liraü lan Búngiu Jesúsu, labágariduña lídan Búngiu, áni labágariduña gíñe Búngiu lídan.

¹⁶ Ítara líña wayábin asúbudirei lúma afiñera luágu jínsiñe wamá lun Búngiu. Ligáburu Búngiu lun larúfuduni ínsiñejabuni, le abágariduti lídan ínsiñejabuni, labágariduña lídan Búngiu, áni labágariduña gíñe Búngiu lídan.

¹⁷ Ítara líña wayábin lun jínsiñe lan Búngiu woun le gumúti, ábame manúfude wamá lídaanme wéyu le lúnbei lagúseragüdüniña Búngiu sun gürígia ladüga wagáburiduña lan ya ubouágu queísi Jesucrístu.

¹⁸ Ánjein jínsiñe Búngiu woun le gumúti, manúfudebadíwa luágu le lúnbei ladügüni woun, láu luweírin línsiñe Búngiu woun, gidáti sun anúfudei waweí. Ánjein janúfude wabeí luei Búngiu, ladüga wagúrabajaña lan láburujan ligáñi wawágun. Ligía, ánjein janúfude lubei ában gürígia, machülügilirügü líña Búngiu ínsiñeda lun le tímatimaati.

¹⁹ Wagía, jínsiñeti Búngiu woun lugúndun wínsiñedun lun furúmiñe.

²⁰ Ánjein aríñaga ában gürígia. “Jínsiñeti Búngiu nun”, áni mínsiñeti libíri lun, yéeti gürígia ligía, lugúndun ánjein mínsiñe libíri ában gürígia lun, le aríja lumúti, siñábei gíñe jínsiñe lan Búngiu lun, le maríjin lubei.

21 Rúlaali Crístu gumádi le woun. le jínsiñejabuti lun Búngiu, lúnti gíñe jínsiñe lan libíri lun.

5

Wagáñeiruni wuríbu lúma ubouú

1 Sun ja afiñebaña luágu Jesúsu lan Crístubei le loúnajabei Búngiu, jagía lirájüñübaña Búngiu, áni sun ja jínsiñejabubaña lun Wáguchi Búngiu jínsiñejabubaña gíñe joun lirájüñü Wáguchi Búngiu.

2 Subúdi wamúti luágu dan lan le jínsiñe lan Búngiu woun áni adüga wameí le lubeíbei, jínsiñe jamá gíñe lirájüñü Búngiu woun.

3 Ladügüniwa le lubeíbei Búngiu, ligía ínsiñejabunibei lun, áni majürüti lugúmadin,

4 lugúndun sun le liraübei Búngiu, mabáfuti cátei lánina ubouú luágu. Wafíñen, ligía cátei le íchigubei ubáfu woun lun wagáñeirun luágu cátei lánina ubouú.

5 Le afiñebei luágu Jesúsu lan Liraübei Búngiu, ligía rügüñein gayára lagáñeirun luágu cátei lánina ubouú.

Geféenwa lan luágu Liraü Búngiu

6 Jesucrístu ligía ñübinbei láu bián seíni luágu ligía lan Liraübei Búngiu. bián seíni ligía, dúna le lánina labásterun, lúma jítaü le lánina loúnwen. Mámarügü láu dúna, láu dúna lúma jítaü. Áni Sífiri Sándu guánarügü geféenti luágu cátei le, ligía arúfudubalin sun inárüni woun.

7 Añájein ürüwa geféentiña luágu cátei le siélu. Búngiu Úguchili, Búngiu Irájü, lúma Búngiu Sífiri Sándu, áni ában méme jagía,

8 níjein gíñe ürüwa cátei geféenti múarugu luágu Jesúsu lan Liraübei Búngiu. Sífiri Sándu, dúna le lánina labásterun Jesúsu, lúma jítaü le lánina loúnwen.

9 Resíbi wamúti le jariñagubei wügüriña, gúbuméti lúnti lan werésibiruni le lariñagubei Búngiu guánarügü luágu Liraü lan Jesucrístu.

10 Le afíñeti luágu cátei le, choúru lumúti tídan lanígi luágu inárüni lan, le mafiñebei, adüga lumúti Búngiu camá yéeti, lugúndun mafiñen lan luágu le lariñagubei Búngiu luágu Liraü.

11 Le lariñagubei Búngiu, luágu rújali lan ibágari magúmuchaditi woun, áni lídaangiñe lan Liraü líabin ibágari ligía.

12 Le níjeinbei Liraü Búngiu lúma, níjein gíñe ibágari le lúma, ánjeinti le úabei Liraü Búngiu lúma, úati gíñe ibágari le lúma.

Lagúmujoún buri lerérun Juan tídan gárada to

13 Nabürüjañein cátei le jun, jugúya le afíñebei luágu Liraü Búngiu, lun jasúbudiruni luágu gabágari jumá le magúmuchaditi.

14 Jeménigitiwa luágu Búngiu, lugúndun subúdi wamúti luágu ánjawa lan amúriaja furúmiegurügü cátei queísi labúseerun, lagáambubadiwa.

15 Áni ítara quei wasúbudiruni luágu agáamba láni Búngiu wayúmuragun, subúdi wamúti gíñe luágu loúnabubadiwa lan.

16 Ánjein aríja ában gürígia luágu ladügüña lan ában libíri ában figouú le mámabei lúnti lanügüni lídoun féridi lun sun dan, lúnti layúmuragun lun Búngiu, ábame líchugun Búngiu ibágari lun gürígia ligía. Níjein figouú anügüti gürígia lídoun féridi magúmuchaditi, málati lun layúmurawagúniwa lun Búngiu luágu figouú ligía.

17 Sun wuríbani figouú, máma sun figouú lun lanügüni gürígia lídoun féridi magúmuchaditi.

¹⁸ Subúdi wamúti luágu gürígia lan le anügübalin Búngiu queísi Lúguchi, meíbugunti lídan figoú, lugúndun toúnigi lumúti Liraü Búngiu, siñáti ladügün Máfia ni cáta lun.

¹⁹ Subúdi wamúti luágu lánigu wamá Búngiu, luágu lábugiñeñanu lan lubáfu Máfia sun ja lánigubaña uboú.

²⁰ Subúdi wamúti gíñe luágu ñübinjali lan Liraü Búngiu uboúagun, áni rújali lan gunfaráandaü woun lun wasúbudiruni Búngiu le tímatimaati. Wabágariduña le tímatimaati lídan ában lúma Búngiu, queísi lídaañadiwa lan ában lúma Liraü, le Jesucrístubei. Ligía Búngiubei le tímatimaati, ligía gíñe le íchugubei ibágari le magúmuchaditi woun.

²¹ Nirájüñü, mafálara jumáña búngiugu ja mámabaña Búngiu. Ítaralá.

TIBÍAMAN LIGÁRADAN APÓSTOLU JUAN

Inárüni lúma ínsiñeni

¹ Áu le weíriei mútu, nabürüjañoun gárada to bun, nítu to lanúadiruboun Búngiu lun lániguboun lan, lúma joun birájüñü. Jínsiñetün nun le tímatimaati, áni mámarügü áu, sun gíñe ja afálarubalin Crístu, jínsiñetün gíñe joun sarágu.

² Jínsiñetün woun ladüga jínsiñe lan larúfudajan Crístu le lúnbei wáma lan súnwandan, woun, áni níjein arúfudajani ligía tídan wanígi.

³ Búngiu Úguchili, lúma Wabúreme Jesucrístu le Liraü Úguchili, jabínirubadün, jíchugubei jagúdemejabu lúma jadárangilan jun lídan jabúruchaguagüdüni larúfudajan Crístu lúma ínsiñejabuni.

⁴ Oúnwenbun nugúndan láu nadárirun jádaangiñe birájüñü abágarida queísi lubúdubu, ítara queísi laríñagun Wáguchi Búngiu woun lun wabágaridun.

⁵ Guetóti nítu, ayúmuraguatina bun lun jínsiñegua wamá wámagua. Máma gumádi iséri le nabürüjabei bun, ligía méme le wámabei lúmagiñe furúmiñeti dan, dan le wagáambubei luágu Crístu.

⁶ Míni lan ínsiñeni, lun wabágaridun según lugúmadin Búngiu, áni lugúmadin Búngiu lun wabágaridun lídan ínsiñeni, queísi wagáambuni lúmagiñe furúmiñeti dan.

Ja ayéejabaña

⁷ Añájein sarágu ayéejatiña ubouágu ja mafíñebaña luágu quei lan gürígia tímatimaati liábin Jesucrístu ubouágun. Le ítarabei, ligía le yébebi, le láganibei Crístu.

⁸ Duári jumá jaweí, lueí jeféridiruni le ñübinbei jun lídaangiñe juwádigimari luágu Crístu, resíbi jumeíme fáyeiti le gumúti luágu, siélu.

⁹ Furúmieguarügü le oufudajati sarágu lídoun iséri arúfudajani, áni merédeti láu le larúfudajabei Crístu lun, úati Búngiu lúma, ánjeinti le eréderuti láu larúfudajan Crístu, níjein Búngiu Úguchili lúma Búngiu Irájü lúma.

¹⁰ Ánjein achülüra ában gürígia júmoun máma láu arúfudajani le, merésibira jumeí júbiñe, mabúsurun jugúyame lun,

¹¹ lugúndun le abúsuruti lun, gádan lumúti gíñe wuríbani le ladügübei.

Lagúmujoún buri dimúrei

¹² Níjein sarágu cátei lúnti naríñaguni jun, mabúseerúntina abürüjarügü náni jun, agúrabatina nídin aríjaün lun nayánujan júma, lun lagúndun wagúndan.

¹³ Mábuga jáña tirájüñü bamúlelua bun, to gíñe lanúadiruboun Búngiu. Ítaralá.

TÜRÜWAN LIGÁRADAN APÓSTOLU JUAN

Buíti ladímurejoún luágu wüqürri le gírabei Gáyo

¹ Áu le weíriei mútu, nabürüjañoun gárada to bun, numáda Gáyo, le jínsiñebei nun le gumúti.

² Numáda jínsiñeti nun, nayúmragun lun Búngiu lun buídu lan lídin sun cátei bun, lun gíñe magádie ban ítara queísi buídu lan lídin bun lídan beíbugun lúma Crístu.

³ Oúnwenbun nagúndaarun dan le jayábinbei jádaangiñe wadújeñu lueígiñe Jesucrístu, ába jabájüdagun nun luágu bugúnfulin quei babágariduña lubei úaragu lúma larúfudajan Crístu.

⁴ Úati ámu cátei agúndaaraguagüdütina queísi dan le nagáambun luágu jabágariduña lan nirájüñü lídan úarani lúma larúfudajan Crístu.

⁵ Numáda jínsiñeti nun, buíti bouuserun lídan esériwiduni le badügübei joun wadújeñu lueígiñe Jesucrístu, joúntima ja lílana ámu fulásu.

⁶ Abájüdagutiña ligíbugiñe adámurini le yábei luágu bínsiñejabu joun. Adügabei fuleísei le. íderagua báña láu le jemégeirubei lun jasígiruni jaweíyasun lídan ában igáburi le áuti lagúndaara Búngiu.

⁷ Furítiña lun jesériwidun lun Crístu, merésibiruntiña ni cáta jámangiñe ja ibídiñejabubaña lun Búngiu.

⁸ Ligía lúnti lubei weténirun joun, lun wíderaguniña lídan lapúrichijoún lerérun Búngiu.

Luríban louuserun Diótrefes

⁹ Abürüjatina buga ában gárada joun tílana ligílisi, májati Diótrefes lídin láu le wabeíbei lugúndun busénti ábuti lan jádan súnwandan.

¹⁰ Ánjana lubeíti ñüdün, neréruba lun luágu le ladügübei, adáagua marásualugu lúma iyéeni wawágu. Bougudin luei líra, merésibirun lumútiña wadújeñu ja achülürütiña, áni mája ligía lun jerésibiruniña ámu, ja erésibirutiña, ába labúguniña lídaangiñe adámurini le táni ligílisi.

¹¹ Numáda jínsiñeti nun, mafálarabei jémpulu wuríbati le, adügamemebei le buídubei. Le adügüti buíti, lánigu Búngiu, ánjein le adügüti wuríbati, ibídiñegili Búngiu lun.

Lubuídun láni Demétrio jémpulu

¹² Buíti jadímurejan súngubei luágu Demétrio, áni inárüni luágu buídu lan ligáburi. Geféentiwa gíñe luágu cátei le, áni subúdi jumúti luágu inárüni lan le waríñagubei.

Lagúmujoún buri dimúrei

¹³ Gibeti yebe lúnti naríñaguni bun, mabúseerúntina abürüjarügü náni,

¹⁴ lugúndun agúrabatina naríjinibu madíse, ábameti wayánujan.

¹⁵ Darángilabá. Mábuga jáña umádagu yána bun, rubei wamábugaü lun cáda ában jádaangiñe wamádagu ja ñíbaña.

LIGÁRADAN JÚDAS

Labürüjan Júdas joun ja únbaña wájali lan Búngiu lun lánigu jamá

¹ Áu Júdas, esériwiduti lun Crístu áu, áni lamúlen gíñe Jacóbo, nabürüjañoun gárada to joun ja únbaña wájali lan Búngiu lun lánigu jamá, ja jínsiñebaña lun, ja areídañu lubáña Jesucrístu séfuñu luei buri cátei lánina ubou le.

² Resíbi jumá sarágu gudémejabu, darángilaü, lúma ínsiñeni lúmagiñe Búngiu.

Ja arúfudajabaña iyéeni

³ Nidújeñu jínsiñetiña nun, weírijali nabúseerun nabürüjan jun luágu asálbaruni le wabíjibe, dándu jugúya queísi áu, guetó sandíguatina núngua luágu lúnti lan nabürüjan jun lun nayúmragun jun lun jáfaagun luágu afíñeni le ledéregerubei Búngiu ában weíyaasu lun sun dan joun lánigu.

⁴ Naríñagubalin le jun lugúndun añájein lan arúfudajatiña yéetiña ádaragutiña jóungua jagánaguoun. Gürígia buri jagía, arúfuda táña Lerérun Búngiu lúmagiñe binárün luágu lúnti lan jasúfuriruni lafáyeiragüle jaríban, buídu. Wügüríña wuríbatíña jagía, minébenti Búngiu joun, arúfudaja jagía luágu gayára lan jadügün gürígia furúmieguarügü cátei mabuídunti, mabeíchun lubáña lan Búngiu lueígiñe, ladúga luweírín lareíni, ayéedagua jagía gíñe luágu Jesucrístu, Wabúreme le ligíarügüti, le únbei wesériwida.

⁵ Láu sun subúdi jumáali lan, buséntina narítaguagüdünün luágu láu lan sun sagá láníña meja Búngiu lumútuniña Israelítagu Ejíptogiñe, lárigiñe, ába lagúmchaguagüdüniña ja mafíñerunbaña jádan.

⁶ Ánjeligu ja mareídunbalin jabára, ígirarügü jameí jábiñe siélu lun jagárabaagun luágun Búngiu, añájein adaürüwañu lurúma Búngiu, gürágu lídan lubúriga láu güríngüri magúmchaditi, agúrabajei oúnwenbun wéyu le lánina agúseruni.

⁷ Ja lílana buri ubúruugu Sodóma luma Gomórra, lúma fulásu buri le yaráfabei lun, ába jagárabaagun luágun Búngiu queísigubeirügü ánjeligu ja, ába jíchaagun jóungua lun salúfuri, ába jígiraguagüdün jóungua lun sun luwúyeri wuríbani darí lun lagámaridun wügüri wügüri líledi, würi würi tíledi. Ába lagúmchaguagüdüniña Búngiu láu wátu geméti. Reídeitiña queísi ewéridiruni joun sun gürígia, arúfudei ligáburí ída lúba lan lafáyeijan Búngiu luágu figou.

⁸ Ánjeinti láu sun jémpulu líra, wügüríña buri gíñe ja jagánaguabaña, láu jafálaruni arúfudajani le maríchabei, wíyedaguatiña jóungua, májatiña lun lugúmadin Búngiu, anába jamáña ubáfu buri ja íñugutimaabaña.

⁹ Ánjeinti arcánjel méme Miguél, dan le lasígenejanbei lúma Máfia lueígiñe lúgubu Moisés, mouchunti lun líñaragun láu anabúni, aríñagarügüti lun. “Ébecha lábu Wabúreme Búngiu.”

¹⁰ Ánjaña wügüríña ja, adímurejatiña wuríba luágu buri cátei le úabei gunfaráanda jamáni, lé buri cátei le jasúbudirubei luágurügü jasándiruni queísi jasúbudiruni anímaalu úouga gunfaráanda jamá, ligía buri cátei le jadügübei, ába janügün gürínguaü jawouguoun láu jóuserun.

¹¹ ¡Fugiábugu jagía! Falá jamaali láni Caín jémpulu, arúfudajatiña iyéeni quei Baláam lun jagáñeirun seínsu, áni magáambaditiña, férídi jagía queísi Coré le ouwebei luágu lumágaambadin lun lerérun Búngiu.

¹² Nibúsigaridünatiña lídan buri jufédun le lánina jínsiñegua júmagua, le ñí lubei jeíga, gurá jagía láu ugúndani, minébenejábuga. Ítara jáña queísi jóuniri

mudún ja jóunguarügübei jóunigiragua. Ítara jáña queísi juánriñu magánati dúna le lanügübei garábali, tídibu wéwe to magínduntu lídan tidáani, ítara jáña queísi tídibu wéwe to ájulutu láu sun tílagüle, úaali ju jamá.

¹³ Ítara jáña queí lanárime buri lugúdi barána, arúfudei jagáburigu le nibúsigarídünati quei jacútaü. Ítara jáña quei warúguma buri ja féridi jamáli jémeri, íñarawagúaaña lun jeréderun lídan líwurin-ágei lubúriga lun sun dan.

¹⁴ Enóc gíñe le jasédün gürígia lárigiñe Adán, adímurejaali dimúrei lúmagiñe Búngiu jawágu arúfudajatiña yéetiña ja dan le lariñagunbei. “Arija numúti Nabúreme liábin jáma sarágu mílu jádaangiñe láni ánjeligu

¹⁵ lun lagúseragüdüniña sun ja wuríbabaña luágu sun wuríbani le adüga jamáalibei, lúma luágu buri dimúrei deréti le aríñaga jamáalibei luágu. Lasiadirubaña sun gafígountiña jagía luágu le jadügübei.”

¹⁶ Arúfudajatiña yéetiña jagía ja jagánaguabaña, magúfurumaditiña, ganígi jagía jadímurejan luágu cátei le jadügübei ámu, lún rügüñein jagúnfulirun lúma lagübüri jayúmajan jabúseera. Aríñagatiña dimúrei buri íñuguti, adímureja jagía buíti jawágu buri gürígia lúnrügu jaságarun cátei buíti jóungua jádaangiñe.

Lererún joun afíñetiña

¹⁷ Jugúyati nidújeñu jínsiñetiña nun, jarítagua jumá luágu le lariñagubei Jesucristu jádaangiñe láni apóstolugu luágu buri cátei le lúnbei lasúseredun.

¹⁸ Jaríñajare. “Lídoun buríme lagúmujoún dan, añájeinbaña gürígia éjerajatiña láu buri cátei le láni Búngiu, agánawa jagíame úaragua lúma jagúndan le wíyebei.”

¹⁹ Jadüga buri ja, níjein lubei fánreinguaü, falá jamuti jagúndan le lánina ubou, úati Sífiri Sándu jádan.

²⁰ Ánjaün jugúya, nidújeñu jínsiñetiña nun, derégüdagu méme jumá lídan jafíñen le jarúmabei. Ayúmuragua jumá lun Búngiu láu lubáfu Sífiri Sándu.

²¹ Mabúlieida jumei luágu jínsiñe jumá lun Búngiu, agúraba jumei wéyu le lúnbei líchuguni Wabúreme Jesucristu íbágaru magúmuchaditi woun láu lugúdemejabu.

²² Afíñegüda jumáña ja louguabaña afíñe.

²³ Sálba jumáña jíborigu camá jamuga jaságaruñanu lídaangiñe wátu geméti lánina máfiougati, gudéme jamá jíbiri gafígountiña jun, láu sun, goúnigi jumá luei jadügüni wuríbani le jadügübei, iyéeregulá jaríban jun queísi gamísa wíyetu, luei gíñe jeíguadun lídoun luríban úma quei jagía.

Lagúmujoún buri ladímurejoún luágu luweírigun Búngiu

²⁴⁻²⁵ Búngiu le ábanrügübei, le sábiubei, le Wasálbaragüle lídaangiñe Wabúreme Jesucristu, gabáfuti lun loúnigirunün luei jeíguadun lídoun figou, lun gíñe larúfudunün jarúmañu, buin láu ugúndani ligíbugiñe, le weírigubei. Rúwalá íñuguni lun, lúma uweíriguni, ubáfu lúma gumádi lídaangiñe Wabúreme Jesucristu, méja, guetó, lúma súnwandan. Ítaralá.

CÁTEI LÉ BURI LARÚFUDUBEI BÚNGIU LUN JUAN

Cátei arúfudúati buri lun Jesucrístu

¹ Niján buri cátei le larúfudubei Búngiu lun Jesucrístu lun lasúbudiragüdüni joun lánigu cátei lé buri lúnbei lasúseredun madíse. Subúdigüda láali Jesucrístu cátei le lun Juan le esériwidubei lun, láu loúnajani láni ánjeli lúmoun lun larúfuduni lun.

² Ariñaga láali Juan inárüni luágu sun le laríjubei, geféenti luágu láni Búngiu ugánu lúma luágu le aríñaga lálalibei Jesucrístu.

³ Gúndaatiña gürígia ja alíjabalin jáma ja agáambubalin laliijoún ugánu le, le erésibirúabei lúmagiñe Búngiu, adüga jagía gásu láu cátei le bürüwañubei ya, ladüga yaráfaali dan lun lasúseredun.

Labürüjan Juan joun títana sédügubei ligílisi

⁴ Áu Juan, nabürüjaña joun títana sédü ligílisi to Ásiaboun. Resíbi jumá abíniruni lúma darángilaü lúmagiñe Búngiu le wínwanbei lúmagiñe lubáragiñe furúmiñeti dan, wínwan ligía guetó, wínwan ligíame sun dan. Resíbi jumá gíñe abíniruni lúma darángilaü jámagiñe sédü espíritugu ja ligíbugiñebaña lála,

⁵ lúma lúmagiñe Jesucrístu le aríñagubalin cátei le inárüti, le furúmiñebei ásaaruti lídaangiñe ouweni áni gabáfu ligía jawágu urúeigu ja ubouágubaña. Jínsiñetiwa lun Crístu, áni chibá laadiwa lídaangiñe wafígoun láu líta,

⁶ adüga láadiwa urúeigumé lúma fádirigumé lun wesériwidun lun Lubúngiute, le méme Lúguchibe. ¡Rúalá uweírighuni lúma ubáfu lun, lun súnwandan! Ítaralá.

⁷ ¡Aríja jumá, liábinba Crístu juánriñurugu, jaríjubei sun gürígia ásta gíñe ja áfarubalin! Jayájuba sun gürígia ja ubouágubaña dánme le jaríjini luágu wuríbani le adüga jamáalibe. Ítara lúba.

⁸ “Áu lagúmesejabei sun cátei, áu lagúmuchagülebei, quei létüra ‘A’ lúma ‘Z’”, líña lariñagun Búngiu le Súnti Gabáfu, le wínwanbei lúmagiñe lubáragiñe furúmiñeti dan, wínwan ligía guetó, wínwan ligíame sun dan.

Layáwadagun Crístu lun Juan

⁹ Áu Juan, jidúje lueígiñe Jesucrístu áu, gafánraantina júma lídan larúeijan Búngiu, súfurijadina úara júma luágu Crístu, resíbijadina gíñe gurásu lúmagiñe Crístu. Reídeitina adaürüwa luágu ubouju le gíribei Pátmos lueígiñe napúrichijani Lerérun Búngiu, lúma lueígiñe napúrichijan luágu Jesucrístu.

¹⁰ Luágu ában wéyu dimáasu, ába neréderun lábugiñe lubáfu Sífiri Sándu, ába nagáambun ában umálali reínti nanágangiñe quei lumálali fídu,

¹¹ lariñaga umálali ligía nun.

—Áu furúmiñebei lúma agúmujoúni, quei létüra ‘A’ lúma ‘Z’. Abürüjabeí sun le baríjubei, ábame boúnajanun gárada tugúya joun títana sédü ligílisi to loúbawaguboun Ásia. Éfeso, Esmírna, Pérgamo, Tiatíra, Sárdis, Filadélfia lúma Laodicéa.

¹² Ába nagáragun lun naríjin ca lan adímurejabei nun, ába naríjin sédü lébu sanúdelu gólu,

¹³ labádinagua sédü lébu sanúdelu ligía ába naríjin ában camá jamuga Wügüri Garaüwarügüti—le Jesucrístubei—táu ában anáanguni chÜlütü luágun lugúdi, lúma ában bélii gólu yaráfa lun laníguagu.

¹⁴ Jarúti lídiburi quei líyu mudún, quei moúru, ítara líña lágu quei wátu geméti.

¹⁵ Miríti lugúdi quei brónse le íríchawagúaaali, le dáwaali lídoun órno, reínti lumálali quei lireín leíbaagun sarágu dúna.

¹⁶ Ñíñanu sédù warúguma lídan lújabu le loúnwenren, ñíñoun ában efeín gágiritu liyúmulugugiñe, biángua tamána. Ítara líña ligíbu quei wéyu dan le lásüdün láu sun lére.

¹⁷ Dan naríjínbalin, ába náburujan lubádu lugúdi camá jiláadina. Ába líchuguni lújabu le loúnwenren nuágu, ába laríñagun nun.

—Manúfudedaguabá, áu le lagúmesejabei sun cátei, áu lagúmehaja.

¹⁸ Áu le wínwanbei, jilátina, guetó wíwantina lun sun dan. Níjein ligélen ouweni núma, lúma ligélen fulásu le ñí jabei jiláguaaña.

¹⁹ Abürüjabei lubeíti le baríjubei, le guetóbei lúma le lúnbei liábin.

²⁰ Niján laníchigubei jawáguti sédù warúguma ja baríjubaña lídan nújabu le nouwenren, lúma sédù lébu sanúdelu gólu. sédù warúguma, jagía sédù jouniri tílana sédù ligílisi, sédüti lébu sanúdelu, jagía sédù ligílisi.

2

Ugánu joun tílana sédù ligílisi. Ugánu joun tílana ligílisi Éfeso

¹ ‘Babürüja lun jouniri tílana ligílisi to Éfesoboun, baríñagame lun lun laríñagun joun gürígia jagía. “Ítara líña naríñagun, áu le jáubei sédù warúguma lídan nújabu le nouwenren, le gíñe eíbugubei labádinagua sédù lébu sanúdelu le gólu.

² Subúdi numúti sun le jadügübei, subúdi numúti lidére juwádigimari lúma jagúraasun, áni subúdi numúti luágu siñá lan jáfaguniña ja wuríbabaña. Subúdi numúti luágu jóuchagua jumáaña lan ja aríñagubaña luágu apóstolugu jamá áni máma apóstolugu jagía, áni daríjumaali luágu ye jamá.

³ Gagúraasunjadün, áni sáfuri jugúya sarágu lídan juwádigimari nuágu, mabúcharunga juágu.

⁴ Láu sun líra, níjein ában cátei jadüga magúndaantina láu. maweírinjali nínsiñe jun quei meja furúmiñe.

⁵ Ligía lubeíti, jarítagua jumá ída jíña lán meja, sáansi jumeí jigáburi, adüga jumeí cátei lé meja jadügübei furúmiñe. Ánjein madügün jumá ítara, nídinba juágu furése, ábame nagídaruni lébu jisáandelun lídaangiñe lufúlasun, ábame mámaadün lan tílana nilígilisin, ánjein gubeírügü jasáansira jigáburi, ligíaba madügün náni ítara.

⁶ Láu sun líra, luáguñein jáni fuleísei, liyéreegun cátei lé buri jarúfudajabei nicoláitagu jun lúma buri cátei le jadügübei, le gíñe iyéreegubei nun.

⁷ Le garígeirugubei lun lagáambun, agáambaleí le laríñagubei Sífiri Sándu joun tílana buri ligílisi. Ja ásiiragúbalin wuríbani, neígagüdübaña lídaangiñe lin tídibu wéwe to lánina ibágari, to lufúlasunruguboun Búngiu.”

Ugánu joun tílana ligílisi to Esmírnaboun

⁸ ‘Babürüja lun jouniri tílana ligílisi to Esmírnaboun, baríñagame lun lun laríñaguni joun gürígia jagía. “Ítara líña naríñagun, áu le furúmiñeti lúma agúmujoúni, lé meja ouwebei áni wínwanyaali.

⁹ Subúdi numúti sun le jadügübei, subúdi numúti jasúfurirun lúma jugúdeme, láu sun lídan lan linárün cátei, rísi jumá. Subúdi numúti gíñe luágu adímureja jamá ja aríñagubaña luágu juríu jamá wuríbati juágu, máma ámu cátei jagía lueídügüya lánigu jamá Máfia.

¹⁰ Manúfude jumá lueí le lúnbei jasúfuriruni, ládaraguba Máfia fiú jídaangiñe furísunrugun lun louchawagúniwa jafíñen sun jugúya, áni jasúfuriruba sarágu

luágu díisi wéyu. Derégüdagu jumá lídan jafíñen nuágu darí jóunwen, ábame níchuguni íbágari magúmuchaditi jun, jafáyeiruájame.

¹¹ Le garígeirugubei lun lagáambun, agáambaleí le laríñagubei Sífiri Sándu jóun buri tílana ligílisi. Ja ásiiragúbalin wuríbani, másügürünbaña lídaangiñe libíaman ouweni.”

Ugánu joun tílana ligílisi to Pérgamoboun

¹² ‘Babürüja lun jóuniri tílana ligílisi to Pérgamoboun, baríñagame lun lun laríñagun joun gürígia jagía. “Ítara líña nariñagun, áu le gámabarun efeín to gágiriboun, to biánguaboun amána.

¹³ Subúdi numúti sun le jadügübei, subúdi numúti gíñe luágu Máfia lántima gabáfubei jádan gürígia ja ní lubei jagánawa, áni láu sun líra, númamemeñadün. Mígirun jumágili jafíñen nuágu, ní íbini lídan dan le láfarúnbei Antipás le geféenbei buíti nuágu ní lídan fulásu le ní jubei, le ní lubei lagúmadija Máfia.

¹⁴ Láu sun líra, níjein buri cátei jadüga, magúndaantina láu. luágu añájein lan fiú gürígia júma yára Pérgamo ja májabaña jígiruni cátei lé meja larúfudajabei Baláam, le íchugubei dimúrei lun Balác lun lafigoungüdüniña Israelítagu láu jeígin eígin le adágarawagüdüti joun sándu, lúma láu jabágaridun lídan salúfuri.

¹⁵ Ítara méme gíñe, añájein ja májabaña jígiruni cátei lé buri jarúfudajabei nicoláitagu júma ní, cátei le iyéeregubei nun.

¹⁶ Ligía, sáansi jumei lubei jigáburí, ánjein madügün jumá ítara, nídiba juágu madíse, ábame nageíndagun jáma gürígia ja adügübalin cátei buri le, táu efeín to áfuriduboun niyúmulugugiñe.

¹⁷ Le garígeirugubei lun lagáambun, agáambaleí le laríñagubei Sífiri Sándu jóun buri tílana ligílisi. Le ásiiraguti luágu wuríbani, neígagüdüba lídaangiñe maná le arámudúañubei lun lun líchugun érei tun luwáni, ábame níchugun ában dübü jarúti lun láu ában íri iséri búrwawañu luágu le íbidiñeti ní ca un lueídügüya lun le erésibirubalin.”

Ugánu joun tílana ligílisi to Tiatíraboun

¹⁸ ‘Babürüja lun jóuniri tílana ligílisi to Tiatíraboun, baríñagame lun lun laríñagun joun gürígia jagía. “Ítara líña nariñagun, áu le Liraü Búngiu, le ítarabei águu quei wátu geméti, liábin lugúdi quei brónse le írichawagúaaali.

¹⁹ Subúdi numúti sun le jadügübei, subúdi numúti jísiñejabu, jafíñen, jesériwidun láu jugúraasun, subúdi numúti gíñe luágu jadügüña lan cátei buíti guetó luei meja furúmiñe.

²⁰ Láu sun líra, níjein ában cátei jadüga magúndaantina láu. Jígirunun Jezabél to aríñaguboun luágu proféta tan áni máma líña, lun teyéeduniña gürígia láu tarúfudajan joun nánigu lun jaganoun lídan salúfuri lúma lun jeígin eígin le adágarawagüdüti joun sándu.

²¹ Rújadina dan tun lun tasáansiruni tigáburí, májagiru tígiruni tisálufurin.

²² Ninárün jáu luágu náburugüdaaru lan láu sándi lun jasúfurirun ja adágubaña salúfuri túma ánjein mígirun jamá jadáaguni cátei lé buri tadáagubei,

²³ ábame náfaraguniña tirájüñü jílagubei, ítara lúba jasúbudiruni sun nánigu luágu subúdi náni lében arítagni lúma tében anígi, ábame nafáyeiruni cára ában jídaangiñe segün le ladügübei.

²⁴ Ja jíbiri ja Tiatíraña, ja mafálarubalin arúfudajani ligía, machülügiña gíñe asúbudirei le únbei jagúara lujúlilin láni Máfia cátei le arámudaguabei, míchubadina ámu anügüni jawágu.

²⁵ Ragújumei lubuídun jigáburí darí niábin.

²⁶ Ja ásiiragúbalin wuríbani, adüga méme jameíme le nabúseerúbei ladügün darí lun jóunwen, níchuguba ubáfu joun luágu buri fulásu,

²⁷ Ítara quei líchugun Núguchi Búngiu ubáfu nun. Ábame jedéraagüdüni jagúmadiruni fulásu buri quei láu ában murúsun gürábu, ábame jamúrugudaguni wuríbani queísi soúdiere le láuti múa.

²⁸ Níchuguboun gíñe warúguma to lánina bináafin joun.

²⁹ Le garígeirugubei lun lagáambun, agáambaleí le laríñagubei Sífiri Sándu jóun buri tílana ligílisi.”

3

Ugánu joun tílana ligílisi to Sárdisboun

¹ ‘Babürüja lun jóuniri tílana ligílisi to Sárdisboun, bariñagame lun lun laríñagun joun. “Ítara líña naríñagun, áu le jáubei sédü espíritugu lání Búngiu jáma sédü warúguma. Subúdi numúti sun le jadügübei, subúdi numúti luágu jiláñu jíña lan lún buri cátei le nuáguti, láu sun aríñawagúa lan luágu wíwan jumá.

² Agágudúa jumá, rújuma érei lún buri cátei le níjeinguabei, lubáragiñe loúnwen, aríja náali luágu múaran lan le jadügübei ligíbugiñe Búngiu.

³ Jarítagua jumeí lubeíti le arúfudajóubei jun, falájumei, sáansi jumeíme jigáburi. Anjaün magágudun, nídiba juágu quei liábin ában jíweruti ibídiñoun óra jun.

⁴ Láu sun líra, añájein fiú gürígia jagánagua ñi Sárdis ja múaradungiñábaña lúma wuríbani, jagía jeíbuguba núma táu anáanguni jarútu ladüga yúuti joun.

⁵ Ja ásiiragúbalin wuríbani, jadáüraguba anáanguni jarútu, áni magídarun nubeí jíri tídaangiñe líburu to gáubalin jíri ja lúnbaña jabíjini ibágari magúmchaditi, arúfudarügü nubáña quei nánigu ligíbugiñe Núguchi Búngiu lúma jagíbugiñe lání ánjeligu.

⁶ Le garígeiruguti lun lagáambun, agáambaleí le laríñagubei Sífiri Sándu joun tílana buri ligílisi.”

Ugánu joun tílana ligílisi to Filadélfiaboun

⁷ ‘Babürüja lun jóuniri tílana ligílisi to Filadélfiaboun bariñagame lun lun laríñagun joun. “Ítara líña naríñagun, áu le sándubei, le gíñe inárünibeí, le gámabalin ligélen urúei Davíd, le úabei ni ában gayáraati ladáuruni le nánjunrenchubei, siñá lánjunrenchuni ni ában le nadáurubei.

⁸ Subúdi numúti sun le jadügübei. Rújadina ában béna júnren jigíbugiñe le lásiñerun ni ában adáura, ladüga láu sun lougua lan jére, adügaadün gásu láu nugúmadin, áni meyéeraguntün luágu nánigu jumá.

⁹ Aríja jumá, nadügüba lun jayábin lánigu Máfia ja yéebaña, ja aríñagubaña luágu juríu jamá áni mabágariduntiña queísi lánigu Búngiu, ábame nájuduraguagüdüniña jigíbugiñe lun jasúbudiruni luágu jugúya lan numútuniñabaña jínsiñetiña nun, ninárün jáu.

¹⁰ Areída jumáli nugúmadin lun gagúraasun jumá, ligía nareídubadün lubeí lueí lidáni oúchawagúni le lúnbei liábin luágu sun ubouú lun jouchúniwa sun ja ubouúagubaña.

¹¹ Madísebei niábin, mígira jumeí ni ában lun lagídaruni jafíñen nuágu, meféridirun jumámuga ni cátei lídaangiñe le lúnbei níchuguni jun.

¹² Ja ásiiragúbalin wuríbani, níchugubaña quei wagábu tídan Lúban Nubúngiute, máfuridundügüyaañame ñígiñe, ábame nabürüdüni líri Nubúngiute jawágu lun lasúbudirúniwa luágu lánigu jamá, lúma líri ubúrugú le lání Nubúngiute, le iséri Jerusalén le ñübinbei siéluigiñe lúmagiñe Nubúngiute, nabürüdübei gíñe iséri níri jawágu.

¹³ Le garígeiruguti lun lagáambun, agáambaleí le laríñagubei Sífiri Sándu jóun buri tílana ligílisi.”

Ugánu joun tílana ligílisi to Laodicéaboun

¹⁴ ‘Babürüja lun jóuniri tílana ligílisi to Laodicéaboun, baríñagame lun lun laríñagun joun. “Ítara líña naríñagun, áu le inárünibeí, le gaféenbeí buídu, le aríñagubalin inárüni, le idaangiñebei liábin sun cátei le ladügübeí Búngiu.

¹⁵ Subúdi numúti sun le jadügübeí, subúdi numúti luágu madíli jumá lídan jesériwidun nun, másü jugúya. ¡Dilígubeíjadün jamúga o sújuma!

¹⁶ Quei bachárügü jubeí, madílitün, másü, newérebabadün niyúmulugugiñe.

¹⁷ Aríñagatün luágu rísi jumá, luágu buídu lan dan jun, luágu memégeirun jumá ni cáta, áni maríjin jumúti luágu fugiábu jumá, gudémetün, maríjintün, surúsu jíña.

¹⁸ Ligía níchugunbei dimúrei jun lun jagáñijan gólu le afínujóúaali láu wátu geméti númagiñe, lun rísi jumá le tímatimaati, lun gíñe jagáñijan anáanguni jarútu núma lun jadáuragun láu jasúrusujan, lúma árani lun jíchuguni lídoun jágu lun jaríjin.

¹⁹ Ébecha numútiña ja jínsiñebaña nun láu iderei, arúfudaja áu joun. Lúnti lubeíti sériu jumá, sáansi jumeíme jigáburi.

²⁰ Anája bénabu, nagúajaña, le agáambuti numálali, ába lánjunrenchuni béna nubá, nebéluruba lúmoun, ábame neígin lúma, jou ligíame núma.

²¹ Ja ásiiragúbalin wuríbani, níchuguba ubáraü joun númagua luágu nála le lála urúei, ítara quei násiiraguni wuríbani, ába nañúurun lúma Núguchi luágu lála.

²² Le garígeiruguti lun lagáambun, agáambaleí le laríñagubei Sífiri Sándu joun tílana buri ligílisi.”

4

Ájuduraguni lun Búngiu, siélu

¹ Lárigiñe sun cátei le, ába naríjin ában béna júnren siélu, liábinti umálali le ítarabei quei lumálali fídu, lé buga adímurejabei nun, ába laríñagun nun.

—Weínba ñájoun, narúfudaali cátei lé buri lúnbei lasúseredun lárigiñe buri le bun.

² Lídan óra ligía, ába neréderun lábugiñe lubáfu Sífiri Sándu, ába naríjin ában lála urúei siélu láu Búngiu ñun luágu.

³ Ítara líña camá ában dübü miríti, le jáspe o cornalína, ñíñoun ában jerémuuru geyégu láu jalaü ligía, mirítu quei ában dübü le esmerálda.

⁴ Geyégu láu lála urúei ligía aríjayatina ában weín-gádürü lála urúei, ñíñanu weín-gádürü gürígia ja weírigutiña ñun luágu, táu jadáuragun jarútu lúma rídi gólu jábulugu.

⁵ Lueígiñe lála Búngiu ligía áfurijati labíríjanouga lúma wayújururu, ligíbugiñe lála, ñíñein sédü lámpu geméñu, jagía sédü láni Búngiu Espíritugu.

⁶ Ñíñein gíñe ában cátei ligíbugiñe lála camúga ában barána le láuti bídiriu jarúgoungati.

Lamídaangua, geyégua láu lála Búngiu, ñíñanu gádürü cátaña gabágaritiña buin láu águu, dándu jagíbugiñe quei janáangiñe.

⁷ Le furúmiñeti jádaangiñe, ítara líña quei ában liñún, le jabíaman, ítara líña quei ában bágasu wügüri, le jürüwan, ítara líña ligíbu quei ligíbu ában wügüri, le jagádürün, ítara líña quei ában ágila ájamajatu.

⁸ Gádürügubei jagía, sísiñein arúnaü luágu cáda ában jádaangiñe, buin jáña láu águu jawágu, dándu bougdigiñe quei múnadagiñe jabíti, wéyuagu áriebu jáu agúaraja.

Sáandu, sáandu, sáandu,
Wabúreme Búngiu, le Súnti Gabáfu,
le wínwanbei lúmagiñe lubáragiñe furúmiñeti dan, wínwan ligía guetó, wínwan
ligíame sun dan.

⁹ Ságüti jíchugun cátaña gabágaritiña ja inébesei lúma eteíngiruni lun Búngiu le
ñúnbei luágu lála, le gabágaribei lun sun dan,

¹⁰ ábaja jájuduragun wein-gádürü weíyaaña mútu jagía ligíbugiñe, ába
jarúfuduni jínsiñejabu lun Búngiu le gabágaribei lun sun dan, ába jíchuguni
jarídin ligíbugiñe, ába jagúarajan.

¹¹ Wabúreme, Wabúngiute, garíchatibu lun berésibiruni uweíriguni, inébesei,
lúma ubáfu,

ladüga Amúrü adügübalin sun cátei,
láu bugúndan badügei, láu giñe bugúndan níjein lubei sun le níjeinbei.

5

Líburu lúma Mudún

¹ Ábati naríjin ában líburu lújaburugu Búngiu le ñúnbei luágu lála, abürüjóúatu
líburu tugúya turágeirugu lúma tigíbuagu, darúatu láu sédü séyu.

² Ába naríjin ában ánjeli gabáfuti, ába lálügüdajan láu umálali reínti.

—¿Ca garíchabei lun ladáranunun líburu lúma lun lajeíridunun tiséyun?

³ Úati ni ában garíchatibu lun ladáranunun líburu tugúya, ni íbini lun laríjin
tuágun, ni siélu, ni múarugu, ni lábugiñe múa, úati ni ában garíchatibu.

⁴ Ába nayájun sarágu ladüga úa lan ni ában garíchatibu lun ladáranunun líburu
tugúya, ni lun lalíjanun, ni íbini lun laríjinun.

⁵ Ábati laríñagun ában jádaangiñe weíyaaña mútu nun.

—Jebé bayájun, ladüga Jesucristu, le “líñún” le jádaangiñebey ladügawagun
Judá, le linébaanfan urúei Davíd, sirígua lálali wuríbani lun gayára lan
ladáranunun líburu lúma lun lajeíriduni sédü tiséyun.

⁶ Lamídaanguati lála Búngiu jáma gádürü cátaña gabágaritiña jagía jáma
weíyaaña mútu jagía, ába naríjin ában Mudún rára, camá jamuga áfarúaaali.
Sédüñein ligáanchun, sédü lágu, águu buri ligía, láni Búngiu sédü Espíritugu ja
oúnajoúbaña lídoun sun ubou.

⁷ Níbinti Mudún ligía, le Jesucristubei, ába lanügünun líburu tugúya
lújaburugugiñe Búngiu.

⁸ Dan le lárügüdünbarun líburu, ába jájuduragun gádürü cátaña gabágaritiña
jagía jáma wein-gádürü weíyaaña mútu jagía ligíbugiñe. Cáda ában jádaangiñe
weíyaaña mútu jagía, níñoun ában gidára lúma, lúma cópu le gólu buin láu cupáli,
le liyáwabei jayúmuragun lánigu Búngiu.

⁹ Niján urému iséri le jerémujabei.

Garíchatibu lun banügünun líburu, lun bajeíridunun tiséyun,
ladüga áfarúaa ban, ába bagáñijaniña gürígia lídaangiñe sun rása, sun luwúyeri
dimúrei, fulásu lúma néchaani.

¹⁰ Adüga báña urúeigumé jáma fádirigumé
lun jesériwidun lun Wabúngiute,
lúma lun jagúmadijan ubouágu.

¹¹ Lídan le naríagun, ába nagáambuni jamálali sarágu ánjeligu geyégu láu lála
lúma geyégu jáu cátaña gabágaritiña jagía, jáma weíyaaña mútu jagía. Níñanu
míñun míñun ánjeligu,

¹² jaríñaga láu umálali jéreti.

Yúuti ubáfu lúma irisini, subúdi lúma érei,
uweíriguni lúma inébesei, lúma eteíngiruni lun Jesucristu, Mudún le áfarúbei.

¹³ Agáamba numúti gíñe jaríñaguni sun cátei le ladügübei Búngiu siélu, le múarugubei, le lábugiñebei múa, lúma le baránajabei, lúma sun cátei lé buri lídaanbei.

Rúalá eteíngiruni, inébesi, uweíriguni, lúma ubáfu lun Búngiu le ñúnbei luágu lála, lúma lun Mudún, lun sun dan.

¹⁴ Ába jaríñagun gádürü cátaña gabágaritiña jagía.

—¡Ítaralá!

Ába jájuduragun wein-gádürü weíyaaña mútu jagía ligíbugiñe le gabágaribei lun sun dan.

6

To sédü séyu

¹ Ábati naríjin dan le lajeíridúnbarun Mudún furúmiñetu tídaangiñe sédü séyu tugúya, ába nagáambun laríñagun ában jádaangiñe cátaña gabágaritiña jagía láu ában umálali camá lumálali wayújururu.

—¡Jigábu baríja!

² Ába naríjin ában gabáyu jarúti, le waríñubei luágu, ñíñoun ában arco lújaburugu to áuboun lageíndagua. Rúati ában rídi lánina ásiiraguni lun ladüga lúnbei lan lagáñeiruniña láganiñu. Furíti ageíndagua, ába lásiiragun lídan sun cátei.

³ Dan lajeíridunbarun Mudún tibíaman séyu, ába nagáambun laríñagun jabíaman cátaña gabágaritiña jagía.

—¡Jigábu baríja!

⁴ Ába láfuridun ában gabáyu funáti, ába líchugúniwa ubáfu lun le waríñubei luágu gabáyu ligía lun lagídaruni darángilaü ubouágugiñe, lúma lun láfaraguágüdüniña wügüriña jámagua jilágubei, ába tíchugún ában oúnwenbun efeín lun.

⁵ Dan lajeíridúnbarun Mudún türüwan séyu, ába nagáambun laríñagun jürüwan cátaña gabágaritiña jagía.

—¡Jigábu baríja!

Ába naríjin ában gabáyu wuríti, ñíñein ában baláansu lújaburugu le waríñubei luágu.

⁶ Ába nagáambun laríñagun ában umálali jamídaanguágiñe cátaña gabágaritiña jagía.

—Ábanrügüla kílo türígu luágu lebégi ában wéyu wadágimanu, ürüwa kílo sebáda ligía méme ebégi, áni touñigi jumeíme aili lúma bínu buídu.

⁷ Dan lajeíridúnbarun Mudún tigádürün séyu, ába nagáambun laríñagun jagádürün cátaña gabágaritiña jagía.

—¡Jigábu baríja!

⁸ Ába naríjin ában gabáyu amariyu, le waríñubei luágu, ouweni líribei, lárigi lárigi liábin jafúlasun jiláaña. Ába libíjin ubáfu luágu ligádürün murúsun lídaangiñe ubou lun láfarajan láu wuríbu, láu ilámaü, láu sándi, lúma jáu anímaalugu janárimetiña ja ubouágubaña.

⁹ Dan lajeíridúnbarun Mudún tiseíngün séyu, ába naríjinun jawáni ja áfarawagúbaña lueígiñe japúrichijani Lerérun Búngiu, lúma luágu jadímurejan buíti luágu Jesucrístu, lábugiñeñanu latárü.

¹⁰ Jaríñaga láu umálali jéreti.

—¿Darísan ídame, Wabúreme le gúnfuliti láu lerérun, darísan ídame bagúseragüdaña ja mísiñejabúbaña bun ubouágu, luágu woúnwen? ¿Ídamésan bafáyeigüdaña luágu jáfaruníwa jilágubei?

¹¹ Ába jabíjin anáanguni jarútu, ába laríñawagún joun lun jeméraagun luágu murúsun dan dari jóustarun jabíriña lídan esériwiduni lun Crístu ja lúngiñabaña jáfarawagúniwa quei jagía.

¹² Lídan le naríjinbei, ába lajeíridunun Mudún tisísín séyu, ába ladágarun ában oúnwenbun járabaganáli. Ába láuridun wéyu quei lúdu, ába láfunadun játi camá jítaü,

¹³ ába jeíguadun warúguma ja siélubaña lun múarugun quei táburujan mángu tueígiñe tídibu dan le lánjingichunun garábali.

¹⁴ Ába lagúmuchagun siélu quei ában gárada dan le tabáruchawagún, ába ladíñuragunga sun wübü lúma uboujú lídáangiñe jabára.

¹⁵ Ába jarámudagun urúeigu ja lánina ubou lídan júyu lúma buri labádinagua dübü le luágubei wübü, úara jáma ja weírigubaña, gurúnelugu, rísitiña, gabáfutiña, jáma sun idámuni, jáma wügüriña ja mabúremetiña.

¹⁶ Jaríñagati lun wübü lúma lun dübü.

—Jeígua jumá wawágun, arámuda jumáwa lueí laríjin Búngiu le ñúnbei luágu lála, lúma lueí lanárime ligáñi Mudún.

¹⁷ Chülüjali weíríti wéyu le lúnbei larúfuduni Búngiu ligáñi. ¿Cábasan gayára lawánduni?

Seíni jawáguti Israelítagu

7

¹ Lárigiñe sun cátei le, ába naríjin gádürü ánjeligu rára luágu gádürü larígei ubouú, ágüdaajei gádürügubei garábali lun máfurun lan ni murúsun luágun múa, ni luágun barána, ni luágun ni ában tídibu wéwe.

² Aríjatina gíñe ábanya ánjeli ñübinti lueígiñe oubaü le ñígiñe lubeí láfuara wéyu láu liséyun Búngiu le wínwanbei. Ába lagúaragun ánjeli ligía láu umálali jéreti joun gádürü ánjeligu ja abíjubaña ubáfu lun jadügün wuríbani lun múa lúma barána.

³ —Madüga jumá wuríbani lun múa, ni lun barána, ni lún buri tídibu wéwe daríme wíchuguni liséyun Búngiu luágu jerébe lánigu.

⁴ Agáamba numúti átiriñanu lan. san bián-wein-gádürü mílu jádaangiñe linébaanfaangu Israel.

⁵ Dúusu míluñanu jádaangiñe ladügawagun Judá,

dúusu mílu jádaangiñe ladügawagun Rubén,

dúusu mílu jádaangiñe ladügawagun Gad,

⁶ dúusu mílu jádaangiñe ladügawagun Áser,

dúusu mílu jádaangiñe ladügawagun Neftalí,

dúusu mílu jádaangiñe ladügawagun Manasés,

⁷ dúusu mílu jádaangiñe ladügawagun Simeón,

dúusu mílu jádaangiñe ladügawagun Leví,

dúusu mílu jádaangiñe ladügawagun Isacár,

⁸ dúusu mílu jádaangiñe ladügawagun Zabulón,

dúusu mílu jádaangiñe ladügawagun José,

jáma dúusu mílu jádaangiñe ladügawagun Benjamín.

Sarágu güriñia jarútu jadáüragun

⁹ Lárigiñe cátei le, ába naríjin sarágu güriñia lídaangiñetiña sun fulásu, sun rása, sun luwúyeri dimúrei lúma néchaani, rára jáña ligíbugiñe lála Búngiu

ligíbugiñe Mudún. Gíbetiña gürígia jagía darí lun siñá lan jabájüdü, jarútu jadáüragun táu tubána fáluma jájaburugu.

¹⁰ Ába jagúarajan sun jagía láu umálali jéreti, ába jaríñagun.

Weíríti Búngiu, le ñúnbei luágu lála,

weíríti Mudún, luágu asálbaruni le rújamaalíbei woun.

¹¹ Rára jáña sun ánjeligu geyégu láu lála lúma geyégu jáu weíyaaña mútu, jáma gádürü cátaña gabágaritiña jagía, ába jelémuchun dagá jagíbu múarugu ligíbugiñe Búngiu, ába jájuduragun lun,

¹² ába jaríñagun.

¡Ítaralá! Rúalá uweírigu, lichú áu, eteíngiruni,

inébesei, ubáfu lúma érei

lun Wabúngiute lun sun dan. Ítaralá.

¹³ Ábati lálügüdüna ában jádaangiñe weíyaaña mútu jagía.

—¿Cátañasan ja, ja jarúbaña adáüragun? ¿Jalíagiñésan jayábin?

¹⁴ Naríñaga lun.

—Amürü jamúga aríñagei nun.

Laríñaga nun.

—Ja sáfurijañabaña sarágu ja, ja chibá jamaalíbei jafígoun láu líta Mudún, jarúmagüda jamoún janígi láu.

¹⁵ Ligía ligíbugiñeñanu lubei lála Búngiu esériwida lun, wéyuagu áriebe tídan lúban to siéloboun, loúnigirubaña Búngiu láu leréderun jáma.

¹⁶ Máfagun jáñame ilámaü, ni mágürabu, másürün láñame wéyu, mañáurijan láñame lárouga,

¹⁷ ladüga loúnigirubaña lan Mudún le lubádubei lála Búngiu, ábame lanügüniña lárün dúna le íchugubei ibágari magúmuchaditi, ábame larágajani Búngiu sun águiraü lueígiñe jágu.

8

Tisédüñ séyu lúma lágei cupáli le gólu

¹ Dan lajeiridúnbarun Mudún tisédüñ séyu to tuáguboun líburu, ába ñi lan maníguaü siélu quei buri luágu dimí óra.

² Ába naríjiniña sédü ánjeligu ja rárabaña ligíbugiñe Búngiu, ába líchugúniwa sédü fídu joun.

³ Lárigiñe, ábaya liábin ában ánjeli, ába laráramun ligíbugiñe latárü, ñíñein ában lágei cupáli gólu lújaburugu, ába líchugún bürübün cupáli lun, lun ladágaragüdüni úara lúma jayúmuragun sun ja lánigu Búngiu ligíbuagu latárü gólu le ligíbugiñebei lála Búngiu.

⁴ Ába lamúdeirun lugúmulalin cupáli ligía úara lúma jayúmuragun lánigu Búngiu lun ligíbugiñoún Búngiu.

⁵ Ábati lanügüni ánjeli ligía lágei cupáli, ába labuínchagüdüni láu leñégura wátu lídaangiñe wátu geméti le luágubei latárü, ába lachürüni luágun ubou, ába lagaambún wayújururu, ireíni, labirijaníga, lúma ában jarabaganáli.

Lé buri fídu

⁶ Ábati jaráanserun sédü ánjeligu ja láubaña sédü fídu lun jínwiruni.

⁷ Ába línwiruni furúmiñeti ánjeli lifídun, ába lasáliragun lúbara júya le deréguati lúma wátu geméti, láu gíñe jítaü, ába lachágarúniwa luágun ubou. Ába lágudun lürüwan murúsun lídaangiñe ubou, ígirúati bián murúsun mágudúnti, gudáwati gíñe lürüwan murúsun lídaangiñe buri tídibu wéwe lúma jíduru.

⁸ Ába línwiruni jabíaman ánjeli lifídun, ába lachágarúniwa ában cátei camá jamuga ában oúnwenbun wübü durúnguati baránajoun, ába lasálriragun lürüwan murúsun lídaangiñe barána jítaüme.

⁹ Jiláguatiña sun úduraü ja lídaanbaña barána le asálriragubei lun jítaüme, gürínguatú gíñe sun ugúnein to ñíboun lídan barána ligía.

¹⁰ Ába línwiruni jürüwan ánjeli lifídun, ába teíguadun ában oúnwenbun warúguma siéluigiñe, durúngu quei ában tóchi. Táburuja luágun lürüwan murúsun lídaangiñe dúna lúma líseesen dúna.

¹¹ Igífi tíribei warúguma tugúya, ába lagífidun lürüwan dúna, ába jóúwegun sarágu gürígia ladüga lagífidun dúna ligía.

¹² Ába línwiruni jagádürün ánjeli lifídun, ába lagürinchagun lürüwan murúsun lídaangiñe líbiri wéyu, láu sun játi, jáma warúguma. Le oúbaü le agürinchagubei jawágu, ába labúridun, marúgoungadunti wéyuagu ni áriebu.

¹³ Lárigiñe, ába naríjin ában dunúru weíríti ájamaja lamídaangua siélu, aríñageina ligía láu umálali jéreti.

—¡Fugiábugume ja aganoúbaña uboúagu luágu ürüwa lanárimeníga lé buri lúnbei láburuja jawágun dánme jínwiruni ja jíbiri ürüwa ánjeligu jafídun!

9

¹ Ába línwiruni jaseíngün ánjeli lifídun, ába naríjin ában warúguma eíguadutu siéluigiñe lun múarugun, ába líchugún ligélen júyu le mébejabei tun.

² Ába tánjunrenchuni júyu ligía, ába láfuridun gumúlali ñígiñe camá lídaangiñe ában oúnwenbun órno, ába labúrigadagüdüni gumúlali ligía wéyu lúma garábali.

³ Lídaangiñe gumúlali ligía ába jachülaagun chigágaru, ába jájamajani sun uboú, ába jabíjin chigágaru jagía ubáfu líbe jabáfu águru ja uboúagubaña.

⁴ Ába laríñawagún joun lun madügün jamá wuríbani lun jíduru le uboúagubei, ni lún buri nádü, ni lun tídibu wéwe, lueídügü joun gürígia ja úabei liseíni Búngiu jeréberugu.

⁵ Majoúati lun jáfaraguniña chigágaru jagía gürígia, lueídügü lun jásüjaniña gürígia luágu seíngü játi, ítara líñati ligári jásüjan quei jásüjan águru.

⁶ Lídaanne buri wéyu ligía, jáluajabei gürígia oúweni, madárijabei, busén jagía yebéme jóúwegun, ladíseduba oúweni jaweí.

⁷ Chigágaru jagía, jenége gabáyu ja aráanseñubaña lubá wuríbu, ñíñein ában cátei jábulugu camá jamuga ában rídi le gólu, ítara líña jagíbu quei ligíbu wügüri.

⁸ Ítara líña jádiburi quei jádiburi würíña, liábin jári, quei lári liñún.

⁹ Darúgu líña jágubu láu ában cátei camá gürábu, ítara líña lamúri jarúna quei tamúri sarágu cárü to jáutu gabáyu dan le teíbaagun wuríburugu.

¹⁰ Gálitiña quei jáli águru le gágiriti. Ñíñein ubáfu luágu jáli lun jadügün wuríbani joun gürígia luágu seíngü játi.

¹¹ Ñíñein ában jábuti chigágaru jagía, le ánjeli le láni júyu le mébejabei. Abadón líribei ánjeli ligía lídan hebréo, lídan güriégu, Apolión o Agünrinchaguti.

¹² Sügüja furúmiñeti lanárimeníga, mégeigili bián.

¹³ Ába línwiruni jasísin ánjeli lifídun, ába nagáambun ában umálali lídaangiñe gádürü larígei latárü gólu le ligíbugiñebei Búngiu.

¹⁴ Ába laríñagun umálali ligía lun jasísin ánjeli le láubei fídu.

—Farára báña gádürü ánjeligu ja güráñubaña láru oúnwenbun dúna le Eufrátes.

¹⁵ Ába jafáragadún gádürü ánjeligu jagía lun jáfaragun ában jádaangiñe cáda ürüwa gürígia jilágubei, ladüga aráanserúaña lubá óra ligía, wéyu ligía, játi ligía, lúma írúmu ligía.

¹⁶ Ába nagáambuni átiriñanu lan jasúdaaranigu ja luágutiña gabáyu. bián-san míñun.

¹⁷ Ítara líña ligáburi jayáwadagun gabáyu jagía jáma ja waríñubaña jawágu nun. Níñein ában cátei janíguagu, funáti licólorun, dínkuti, lúma amariyu. Ítara líña jábulugu gabáyu jagía quei jábulugu liñún, áfurijati wátu geméti, gumúlali, lúma sáfuru jayúmulugugiñe.

¹⁸ Ába láfaraguniña úrúwa wuríbani le áfuridubei jayúmulugugiñe gabáyu jagía ában jádaangiñe cáda úrúwa gürígia jilágubei, úrúwa wuríbani ligía. wátu geméti, gumúlali, lúma sáfuru.

¹⁹ Jayúmuluguñein gabáyu jagía jabáfu, lúma luágu jáli, ítara líña jáli camá jéwe gábuluguti, láu gíñe jadüga wuríbani.

²⁰ Ja jíbiri gürígia ja mouwegunbaña láu wuríbani le, mígirun meme jamúti jadáaguni cátei lé buri meja jadügübei, mígirun jamei jájuduragun joun espíritugu wuríbatíña lúma joun sándu ja gólu, pláta, brónse, dübü, wéwe—ja siñáti jaríjin, ni jagáambun, ni jeíbugun.

²¹ Mígirun jamei jáfarajan, jabíñarajan, jasálufurijan, lúma jíwerujan.

10

Ánjeli táu tiraúraü líburu

¹ Ábati naríjin ábanya ánjeli gabáfuti, ába larárirun siélugiñe lídan juánriñu táu ában jerémuru lougiñe lichügü. Miríti ligíbu quei wéyu, liábin lúruna camá durúngu líña.

² Níñoun ában tiraúraü líburu junréngu lújaburugu. Ába líchuguni lugúdi le louñwenren lougiñe barána, le lubaüna lougiñe múa.

³ Ábati lagúaragun láu umálali jéreti quei ában liñún dan le lówoujan, dánti le lagúaragunbei, ába lagaambúniwa ladürügüdün sédü wayújururu.

⁴ Lárigiñe ladürügüdün sédü wayújururu ligía, ába yebe nabürüjaali lan le laríñagubei, ába nagáambun laríñagun ában umálali nun siélugiñe.

—Maríñagabeí le laríñagubei sédü wayújururu, mabürüjabeí gíñe.

⁵ Ánjeli bugáti le naríjubei lougiñe barána lúma lougiñe múa, ába liñúrui lújabu le louñwenren siélun,

⁶ ába láfiñurun luágu le gabágaribeí lun sun dan, le adügübalin ubou láu sun siélu, barána lúma sun cátei le lídaanbei, ába laríñagun.

—Úadügüyáali darásaü.

⁷ Dánme le lachülürün dan lun lagúmeserun jasédün ánjeli ínwirei lifídun, gúnfuljalíme laráansejan Búngiu lé meja arámudaguabei, quei le laríñaguni meja joun profétagu ja esériwidubalin.

⁸ Ábaya ladímurejan umálali lé buga nagáambubei siélugiñe, ába laríñagun nun.
—Beíba, banügounme tiraúraü líburu to daráguboun, to lújaburuguboun ánjeli le rárabeí lougiñe barána lúma múa.

⁹ Ába nídin, ába namúriajanun líburu tugúya lúma ánjeli ligía, ába laríñagun nun.

—Jan, jouñboun, bímebei basándirunun biyúmulugu, tagífidame burágeirugu.

¹⁰ Ába nanügünun tiraúraü líburu tugúya lújaburugugiñe ánjeli ligía, ába neíginun, bímeti nasándirunun niyúmulugu camá síruudu, lárigiñe neíginun, ába tagífidun nurágeirugu.

¹¹ Ába laríñawagúniwa nun.

—Lúnti bídinya aríñagei le lúnbei lasúseredun lun sarágu fulásu, néchaani, luwúyerigu dimúrei, lúma joun urúeigu.

11

Ja bián geféentiña

¹ Ábati líchugúniwa ában mabúru nun lenége ában wéwe le amísuraagülei, ába laríñagun Búngiu nun.

—Sarába, amísurajaboun lilígilisin Búngiu lúma latárü, abájüda báñame átiriñanu lan ja ájuduragutiña ñi.

² Mamísurajabei bürürü le bougudibei tibíti ligílisi ladüga derégewaali joun ja terénchabaña lun Búngiu, ja lúnbaña jagünrinchaguni ubúругu le sándubei luágu bián-wein-bián játi.

³ Ábame nouñajan bián geféentiña lun jadímurejan nuágu luágu mílu bián-san ürüwa-wein wéyu, táu jadáuragun lúdu.

⁴ Bián geféentiña jagía, jagía gayáwabalín bián tídi bu wéwe to olívo lúma bián lébu sanúdelu le ligíbugiñebei Búngiu, le Labúremebei sun ubouú.

⁵ Ánjein ñi abúseerúti ladügün wuríbani joun, ába jígiragüdüwón wátu geméti jayúmulugugiñe, ába jáguduniña jáganiñu gumúgubei. Ítarati louweba furúmieguarügü le buséti ladügün wuríbani joun.

⁶ Gabáfutiña geféentiña jagía lun jadáuruni siélu lun májuyun lan júya sun dan niján lan Búngiu adímureja jayúmulugugiñe, gabáfutiña gíñe lun jadügüni dúna jítaüme, lun gíñe jasúfuriragüdüni ubouú láu sun luwúyeri wuríbani, ságü jabúseerun.

⁷ Dánme le gumú jamaali jawádigimari, lageíndaguba anímaalu le áfuridubei lídaangiñe júyu le mébejabei jáma, ábame jeféridiruni wuríbu, ábame láfaruniña jilágubei.

⁸ Ábame jeréderun riwágu lídan lémeri oúnwenbun ubúругu le Jerusalén le ñi lubei ládarawagúa Jesúsu luágu gurúwa, fulásu meme le, camá Sodóma lúma Ejipto.

⁹ Ábame jariáguniña gürígia ja lídaangiñetiña sun fulásu, sun rása, sun luwúyeri dimúrei, lúma néchaani luágu ürüwa wéyu dimí, mígirunbaña lun jábunún.

¹⁰ Ábame jagúndaaragun ja ubouúagubaña láu jóúwegun, daríme lun jedéweegun cátei jámagua, le jagúndan, ladüga berése jamá meja bián lánigu Búngiu jagía joun.

¹¹ Ába naríjin, áu Juan, luágu lárigiñe lan ürüwa wéyu dimí ligía, ába láguyuguagüdüniña Búngiu, ábaya jásaarun, áni sun ja aríjubaliña, weíríti janúfudedagun.

¹² Ába jagáambun bián geféentiña jagía ában umálali jéreti siélugiñe le aríñagubei.

—Weínjuma ñájoun siélu.

Ába jamúdeirun siélu lídan ában juánriñu, aríagu jáganiñu joun.

¹³ Lídan óra ligía, ába ladágarun ában oúnwenbun járabaganáli, ába tagúluludun ában múna tídaangiñe ságü díisi to ubúruguboun, ába jóúwegun sédü mílu gürígia ladüga járabaganáli ligía. Ja jíbiri gürígia, ába jíchugun inébesei lun Búngiu le siélubei ladüga luweírín janúfude.

¹⁴ Sügüja libíaman lanárimeníga, madísebei le ában.

Le lisédün fídu

¹⁵ Ába línwiruni jasédün ánjeli lifídun, ába lagaambúniwa laríñagun umálali buri jéreti siélugiñe.

Chülújali lidáani Wabúreme Búngiu lúma lidáani Crístu lun jarúeijan lídan sun ubouú, áni jarúeijaba sun dan.

16 Ábati jélemuchunga weín-gádürü gürígia ja weírigutiña, ja ñúnbaña luágu jála le lála urúei, láu jagíbu múarugu, ába jájuduragun lun Búngiu.

17 Ába jaríñagun.

Teínqui wáña bun, Wabúreme Búngiu,

amürü le Súnti Gabáfu,

amürü le wínwanbei lúmagiñe lubáragiñe furúmiñeti dan, wínwan amürü guetó,
wínwan amürüme sun dan.

Teínqui wamútibu ladüga ragübaali lan oúnwenbun bubáfu.

áni guméseedibu arúeija.

18 Gáñiburija néchaanigu,

chülüja wéyu lun babeíjan,

chülüja gíñe dan lun bagúseragüdüniña jiláguaaña,

ábame bíchuguni jafáyeiruaja báni profétagu joun,

jáma jíbiri ja derégeguabaña jóungua bun, jáma sun jawúyerigu gürígia ja
íchubaña inébesi lun bíri.

Chülüja óra lun bagünrinchaguniña ja agünrinchagubalin uboú.

19 Ábati tánjunrenchun lúban Búngiu to siéluboun, ába tarijín gáfu to lágei lidáradun Búngiu jáma lumútuniña ñi tídan lúban. Ába ñi lan labírijaníga, ireíni, wayújururu, ában jarabaganáli, lúma lábburujan lúbara júya deréguati le weínamuti.

12

Würi lúma anímaalu le dragón

1 Ábati lasálriragun ában oúnwenbun seíni siélu. ában würi darúgu líña wéyu táu camá jamuga ában dínugu, láu játi lábugiñe tugúdi, lúma ában rídi jáu dúusu warúguma tábulugu.

2 Würi tugúya dageínañoun, tagúaraja láu igári le lánina agáriduni, ladüga súfuritu lun tagüriajan.

3 Ábaya lasálriragun ábaya seíni siélu. ában oúnwenbun anímaalu le dragón funáti, sédüñein lábubugun, díisi ligáanchun, lúma ában rídi luágu cáda lábubugun.

4 Ába ladúrugudun dragón ligía ában jádaangiñe ságü ürüwa warúguma láu líli, ába lajúruniña múarugun. Ába laráramun dragón ligía tigíbugiñe würi to lúnboun tagüriajan, lun leígini tiraü dánme le tagüriajan.

5 Ába tagüriajan würi tugúya ában wügüri irájü le lúnbei ledéraagüdün lagúmadijan lídan sun fulásu queísi láu ában murúsun gürábu. Ába lagídarúniwa tiraü tueí, ába lanügüniwa lun Búngiu luágun lála.

6 Ába tanúrajan würi tugúya lídoun fulásu mageírawati le ñí lubei aráanseeli lan Búngiu ubáraü tubá, lun toúnigirúniwa ñi luágu mílu bián-san ürüwa-wein wéyu.

7 Lárigiñe, ába ñi lan ában wuríbu siélu, ñí lubei lageíndagua árcanjel Miguél jáu láni ánjeligu lúma dragón. Ageíndaguati dragón jáu láni ánjeligu,

8 ába jeféridiruni wuríbu, ába mabáraaña lan siélu.

9 Ába lubeíti laságarún oúnwenbun dragón, le binádu jéwe ligíra le gírubei Máfia, o Satanási, le ayéejabalin sun uboú, siélugiñe. Ligía jáu sun láni ánjeligu, ába jachágarún múarugun.

10 Ábati nagáambun laríñagun ában umálali jéreti siélugiñe.

—Gáñei láali Búngiu Máfia láu luweírin lubáfu. Chülújali asálbaruni joun gürígia uboúagun, chülújali larúeijan Búngiu lúma lagúmadijan Crístu, ladüga sagáwaali le íchugubei jadúnrun wadújeñu lueígiñe Jesucrístu, le íchigañajábei jadúnrun wéyuagu, áriebu ligíbugiñe Wabúngiute.

¹¹ Sirígua jamáali láu loúnwen Mudún, le Jesucrístubei, lúma láu jíchugun fe luágu láni Búngiu ugánu luágu asálbaragülei, manúfudeduntiña lueí jeféridiruni jabágari, aráanseñu rügütiña lun joúnwen.

¹² Gúndaalá lubeíti siélu, gúnda jumá jugúya le aganoúbei ñi. ¡Áni fugiábugu ja aganoúbaña uboúagu, lúma baránaja! Ñüdünja Máfia júmoun láu oúnwenbun igáñi, ladüga subúdi lumúti luágu murúsun rügáli lan lidáani.

¹³ Dánti laríjinbei dragón luágu fíwaali lan uboúagun, ába leíbaajanun würi tó buga agüriajaboun.

¹⁴ Ába líchugún bián larúna dunúru le weínamuti tun würi tugúya lun gayára lan tájamarun lídoun fulásu mageírawati díse lueí dragón ligía, le ñíba lubeí tóunigirúa luágu úrúwa írúmu dimí.

¹⁵ Ába lewérajan dragón ligía sarágu dúna liyúmulugugiñe lun lañáradaguagüdünun würi tugúya.

¹⁶ Ába líderagunun múa würi tugúya, ába lánjunrenchun múa, ába lachúruni sun dúna le lígiragüdübei dragón liyúmulugugiñe.

¹⁷⁻¹⁸ Gañitimaati dragón túma würi tugúya, ába lídin ageíndagua jáma tirájüñü ja ñüdübaña láu le lubeíbei Búngiu, falájamei ugánu le láni Jesucrístu.

13

Ja mónsturugu

¹ Ába naráramun láru béya, ába naríjin lamúdeirun ában mónsturu baránajagiñe, sédüñein lábulugu, dísi ligáanchun. Ñíñein rídi luágu cáda ligáanchun lúma ában íri le áubei lanábaguei Búngiu luágu cáda lábulugu.

² Mónsturu ligía lenége geígusi, ítara líña lugúdi queísi lugúdi óso, liábin liyúma camá liyúma liñún. Ába líchuguni dragón lubáfu lúma lála lun, lúma sarágu ubáfu lun lagúmadijan.

³ Ñíñein ában chaúnti luágu ában lídaangiñe lábulugu mónsturu ligía, weíríti lún yebe láfaruni jílagubei, ába lareídagun lichaúntin. Weíríti janígi sun gürígia láu mónsturu ligía.

⁴ Ába jájuduragun lun dragón luágu líchugun gumádi lun mónsturu, ába gíñe jájuduragun lun mónsturu, ába jaríñagun.

—Úati ni ában quei mónsturu le, ¿cába gayára láfaruni?

⁵ Ígirúati gíñe mónsturu ligía lun ladímurejan dimúrei buíti luoúgua lúma lun lanábaguni Búngiu, lúma lun lagúmadijan luágu bián-wein-bián játi.

⁶ Ába ladügün ítara, adímurejati wuríbati luágu Búngiu, anábaleí líri, lúban, jáma ja siélubaña.

⁷ Ígirúati gíñe lun lageíndagun jáma lánigu Búngiu darí lásiiragúniña, ába líchugúniwa ubáfu lun jawágu sun rása, fulásu, luwúyerigu dimúrei lúma néchaani.

⁸ Ába jájuduragun sun ja aganoúbaña uboúagu lun mónsturu ligía, ja úabaña jíri bürúwañu lúmagiñe ladügün uboú tidan líburu to lánina íbágari, to lúmaboun Jesucrístu, le Mudún le oúwebei.

⁹ Le garígeiruguti lun lagáambun, agáambalá.

¹⁰ Ja adáürütiña ámu, jadáürawagúba gíñe, ja áfarajatiña táu efeín, jáfarawagúba gíñe táu efeín. Ligía busén jabeí lánigu Búngiu gurásu lúma afíñeni.

¹¹ Lárigiñe, ábaya naríjin ábanya mónsturu lamúdeirun múarugugiñe. Ñíñein bián gánchu luágu camá ligáanchun mudún, áni ítara líña ladímurejan camá ában dragón.

¹² Ñíñein sun ubáfu le láni furúmiñeti mónsturu lúma lun ladügüni cátei lueígiñe loúbadina furúmiñeti mónsturu. Ába ladügün lun jájuduragun sun gürígia ja ubouáguabaña lun furúmiñeti mónsturu, le lareídagugüdübei lueígiñe chaünti le luágubei.

¹³ Adügati giñe oúnwenbun buri miláguru, áburujagüdati wátu geméti siélugiñe lun múarugun jagíbugiñe gürígia.

¹⁴ Lídaangiñeti miláguru buri le únbei líchugúa ubáfu lun ladügüni lueígiñe loúbadina furúmiñeti mónsturu, ába leyéeduniña ja aganoubaña ubouágu, ába ladügagüdün ában liyáwa mónsturu le gawágubalin chaünti ába lareídagun, joun.

¹⁵ Ába libíjin jabíaman mónsturu ubáfu lun líchugun ibágari tun liyáwa furúmiñeti mónsturu lun tadímurejan lúma lun táfaraguniña sun ja májuduraguntiña tun.

¹⁶ Adügati giñe lun sun lan gürígia—weínamujaña, ñübürigiña, rísitiña, gudémetiña, idámuni, máma idámuni—lun labürüdün líri mónsturu luágu jájabu le jóunwenren o luágu lan jerébe.

¹⁷ Úati ni ában gayáraati lagáñijan ni cáta ni lalúgurajan ánjein úa líri mónsturu o linúmerun líri luágu.

¹⁸ Buséntitia cátei le lichú áu, le gunfaráandati, atúriajaleí linúmerun mónsturu, le ábanbei quei líri wügüri, áni niján número le asálirubei lídaangiñe lilétürana íri ligía. sísi-san ürüwa-wein-sísi.

14

Jerémujan ja san bián-wein-gádürü mílu

¹ Lárigiñe líra, ába naríjini Jesucrístu, le Mudún, rára lábulugu wübü le Sión, le siélubei. Ñíñanu san bián-wein-gádürü mílu gürígia lúma, ja bürüwañubei líri Mudún lúma líri Lúguchi jeréberugu.

² Lárigiñe, ába nagáambun ában amúri ñübinti siélugiñe camá lamúri barána, camá giñe ladürügüdün ában wayújururu le jéreti, ítara líña giñe camá jamuga tamúri sarágu gidára.

³ Ába jerémujan gürígia jagía ában urému iséri ligíbugiñe lála Búngiu lúma jagíbugiñe gádürü cátaña gabágaritiña jagía, lúma jagíbugiñe gürígia ja weírigutiña. Úati ni ában gayára lumúti laníchigu lerérun urému ligía gunfaráanda jaweídügüya san bián-wein-gádürü mílu ja asálbarúabaña jádaangiñe ja ubouáguabaña—

⁴ jagía ja mádaragúnbaña jóungua jámoun würíña, reídeitiña jarúmañu, falájamei Mudún le ñíjin lumúti lídin, sálbawatiña jádaangiñe gürígia quei furúmiñeti edéweejani lun Búngiu lúma lun Mudún.

⁵ Madárirúnwati ni murúsun iyéeni luágu jayumáru ladüga jarúmatiña ligíbugiñe Búngiu.

Ugánu buri le jíchubei ürüwa ánjeligu

⁶ Ábati naríjin ábaya ánjeli ájamaja lamídaangua siélu, ñíñein ugánu le magúmchaditi lúma lun lapúrichijani joun ja aganoubaña ubouágu—joun sun néchaanigu, rása, luwúyerigu dimúrei lúma sun fulásu.

⁷ Laríñaga láu umálali jéreti.

—Inébelá Búngiu jun, ru jugúyame uweírigu lun, chülüja dan lun lagúseragüdün. Judúgua jumá lun le adügübalin siélu lúma ubou, barána lúma líseesen dúna.

⁸ Ába liábin ábanya ánjeli lárigi, ába laríñagun.

–Jeígua, jeígua Babilónia to weíriguboun, ladüga tabácharuadágüdüni sun néchaani láu bínu le lánina liwíye tayúmajan.

⁹ Ába liábin ábanya jürüwan ánjeli, ába laríñagun láu umálali jéreti.

–Le ájuduraguti lun mónsturu lúma tun liyáwa, ígira ligíame lun labürüdüniwa líri mónsturu luágu lújabu o leréberugu,

¹⁰ látubei bínu le lánina lanárime ligáñi Búngiu le lúnbei lábujurjan le gumúti luágun, ábame lasúfurirun láu wátu lúma súfuru ligíbugiñe Jesucrístu lúma jagíbugiñe ánjeligu ja sándubaña.

¹¹ Laweínruba lugúmulalin wátu le asúfuriragüdübaliña lun sun dan, úabei eméraguni ni wéyuagu ni áriebu joun ja ájuduragubaña lun mónsturu lúma tun liyáwa, o ja bürüwañubei líri jawágu.

¹² Ligía lébubei lúnti lan gagúraasun jamá lánigu Búngiu ja ñüdümbaña láu le lubeíbei áni falájamei Jesúsú surúñu, lun ítara meme jamá derégüdagú lídan jafíñen darí lúmoun jóúnwen.

¹³ Ábati nagáambun laríñagun ában umálali ñübinti siélugiñe nun.

–Abürüjabeí le. “¡Gúnda jamá ja ouwetiña láu jafíñen luágu Jabúreme Jesucrístu!” Lúmagiñe óra ligía, jeméraguba lídaangiñe jawádigimari, ábame lídin le jadügübei úara jáma, líña Sífiri Sándu.

Lalúbajouñiwa múa

¹⁴ Ábati naríjin ában juánriñu jarúti, ligíbuagu juánriñu ligía, ñun líña ában lenége Jesucrístu, le Wügüri Garaüwarügüti. Ñíñein ában rídi gólu lálubugú túma ában alúbagülei jamánatu lújaburugu.

¹⁵ Ába láfuridun ában ánjeli tídaangiñe lúban Búngiu to siéluboun, ába lagúaragun láu umálali jéreti lun le ñúnbei ligíbuagu juánriñu.

–Dáboun balúbagüle, ladüga chülüja dan lun alúbajani, ladüga funáli nádü.

¹⁶ Ába lásügüragüdünnun le ñúnbei luágu juánriñu lalúbagüle múarugugíñe, ába lalúbajan.

¹⁷ Ábayati láfuridun ábaya ánjeli tídaangiñe lúban Búngiu to siéluboun táu gíñe lalúbagüle jamánatu.

¹⁸ Ábaya láfuridun ábanya ánjeli lídaangiñe latárü, ánjeli ligía, gabáfuti luágu wátu geméti le luágubei latárü ligía. Ába lagúarun lun le táubei lalúbagüle láu umálali jéreti, ába laríñagun lun.

–Dáboun balúbagüle to jamánaboun, alúbajaboún tirésini beíbei to múaruguboun, ladüga funáaru.

¹⁹ Ába lásügüragüdünnun ánjeli ligía lalúbagüle múarugugíñe, ába lalúbajanun beíbei to múaruguboun, ába líchugunun lídoun ában ágei weíruti lun taríbichawagüniwa. (Míni lan líra, lanárime abeichúni le lúnbei liábin lúmagiñe Búngiu.)

²⁰ Ába taríbichawagún beíbei bougudi libíti ubúrugú, ába láfuridun jítaü lídaangiñe tágei chülü lúmoun líñun jafúrenun gabáyu, ürüwa-san kilómetro geyégu.

15

Ánjeligu jáma jagúmujoún sédü ígei

¹ Ába naríjin ábanya oúnwenbun seíni siélu, weírigüdati anígi. sédü ánjeligu jáu jagúmujoún sédü ígei, ja áubaña lagúmuchá ligáñi Búngiu.

² Aríjatina gíñe camá jamuga ában barána le bídiriu láu wátu geméti lídan, ñíñanu ja agáñeirubaliña luágu mónsturu, túma liyáwa, lúma luágu linúmerun líri, rára jáña lubádu barána le bídiriu ligía táu gidára to líchuguboun Búngiu joun.

³ Ába jerémujani lerémun Moisés lé meja esériwidubei lun Búngiu, lúma lerémun Mudún, le ítarabei.

Weíríti áni buíti sun le adüga báalibei,
Wabúreme Búngiu, Súnti Gabáfu,
surúñu líña sun le badügübei, úaragua,
amürü le Lurúeitebei sun néchaani.

⁴ ¿Cábasan manúfude bueí, Wabúngiute?

¿Cábasan madímurejan buíti buágu?

Amürü rügüñadibu mafígounjan,
jayábinba lílana sun fulásu, ábame jájuduragun bun,
ladüga arijúaali luágu buídu lan sun le badügübei.

⁵ Lárigiñeti sun cátei le, ába naríjini fulásu le sándutimaabei tídan lúban Búngiu siélu, fulásu le ní lubei lerédera Búngiu, júnren lubéneri.

⁶ Ába jáfuridun sédü ánjeligu ja jáubaña sédü ígei jagía, ñígiñe. Táuñanu janáangun líno to jarúmatu, mirí, liábin jabélitin, gólu luágu janíguagu.

⁷ Ába liábin ában jádaangiñe cátaña gabágaritiña jagía, ába líchugun ában cópu gólu lun cáda ában jádaangiñe sédü ánjeligu jagía, buin líña cáda cópu láu luweírin ligáñi Búngiu le gabágaribei lun sun dan.

⁸ Ába labuínchun fulásu le sándutimaabei láu gumúlali le ñübinbei lídaangiñe luweírigun Búngiu lúma lubáfu. siñátiti lebélorun ni ában ñíjin darí jagúmuchun sédü ígei ja jámabaña sédü ánjeligu jagía.

16

Cópu buri le lágei ligáñi Búngiu

¹ Ábati nagáambun laríñagun ában umálali jéreti joun sédü ánjeligu jagía lídaangiñe fulásu le sándutimaabei.

—Jeíba áturei cópu buri láu lanárime ligáñi Búngiu uboúagun.

² Ába lídin furúmiñeti ánjeli, ába láturuni licópun uboúagun, ába lasárirun gumeín gáriti jawágu sun ja gawágubalin líri mónsturu, judúgua jagía lun.

³ Ába láturuni jabíaman ánjeli licópun baránajoun, ába lasáriragun barána queísi játa jiláaña, ába jóúwegun sun cátaña ja gabágaribaña lídan.

⁴ Ába láturuni jürüwan ánjeli licópun luágun buri dúna lúma líseesen dúna, ába lasáriragun jítaüme.

⁵ Ába nagáambun laríñagun láni dúna ánjeli.

—Úaragatibu láu bagúseragüdün ítara, Búngiu sándu, amürü le wínwanbei lúmagiñe lubáragiñe furúmiñeti dan áni wínwan amürü guetó,

⁶ ladüga jagía, aseíñeigüda jamúti játa profétagu jáma ja derégeguabaña jóúngua bun, guetóti gurágüdaadibu jítaü joun, yúuti joun.

⁷ Agáambatina giñe laríñawagun lueígiñe latárü.

—Ánja Wabúreme Búngiu le Súnti Gabáfu, agúseragüdaadibu láu ísuruni lúma úaraguni.

⁸ Ába láturuni jagádürün ánjeli licópun luágun wéyu, ába libíjin wéyu ubáfu lun lachúraruniña gürígia láu lísü,

⁹ ába jachúrarun súngubei. Láu sun lira, masáansiragunti jagáburi, madímurejan jagía buíti luágu Búngiu, anábagnarügü jameí Búngiu le gabáfubei jawágu ígei ja.

¹⁰ Ába láturuni jaseíngün ánjeli licópun luágun lála mónsturu, ába leréderun larúeijan lábugiñe lubúriga. Ába buri jágüragunun gürígia jañéñe láu igári.

11 Ni ítara, masáansiragunti jagáburi lun jígiruni wuríbati léñaja jadügübei, anábagnarügü jameí Búngiu le siélubei luágu jagárigu lúma jagúmein.

12 Ába láturuni jasísin ánjeli licópun luágun oúnwenbun dúna le Eufirátes, ába lamábeidun lun ñi lan úma lun jásügürün urúeigu ja ñübinbaña lueígiñe oúbaü le ñígiñe lubei laboucha wéyu.

13 Ábati naríjin jáfuridun ürüwa espíritugu wuríbatiña liyúmulugugiñe dragón, liyúmulugugiñe mónsturu, lúma liyúmulugugiñe proféta le yébebei, ítara jáña espíritugu wuríbatiña jagía quei júa.

14 Espíritugu jagía máfianu ja adáagubaña miláguru, ába buri jáfuridun oúndaragúaña sun urúeigu ja ubouagubaña lubá wuríbu le lánina oúnwenbun luwéyuri Búngiu le Súnti Gabáfu.

15 (“Tóunigi jumátia ladúga sódinibei niábin quei liábin jíweruti áriebe. Gúndaabei le agágudúañubei, nuján lanáangun luágu, lun meíbugun lan surúsu lueí jaríjini gürígia le mabúseerun lubei lun jaríjini luágu,” líña laríñagun Jesucrístu.)

16 Ábati jóundaraguniña urúeigu lídan fulásu le gíribei Armagedón lídan dimúrei le hebréo.

17 Ábati láturuni jasédün ánjeli licópun garábalirugun, ába láfuridun ában umálali lídaangiñe fulásu le sándutimaabei le siélubei. Lumálali Búngiu ligía, le ñúnbei luágu lála ñi, laríñaga.

–Adügüwaali.

18 Ába ñi lan labírijaníga, ireíni, lúma wayújururu, ába lánjingichun múa láu ában jarabaganáli, jéreti sügü láu sun jarabaganáli le dagáalibei lúmagiñe ñi jamá gürígia ligíbuagu ubou.

19 Ába lafánreinragun ubúruugu weíruti le Babilónia lídan ürüwa murúsun, ába buri lagúluludun ubúruugu le ubouagubei, ába larítangun Búngiu luágu ubúruugu weíruti le Babilónia lun lájuluchagüdüni bínu le lánina abeichúni le loúnajabei lun lídan ligáñi.

20 Sun ubouju lúma sun wübü, ába lagúmuchagun.

21 Ába giñe láburujan oúnwenbun buri lúbara júya deréguati siélugiñe jawágun gürígia, júrüburiti chülú lúmoun san líburu, ába janábaguni gürígia Búngiu luágu, ladúga ában lan abeichúni janárimeti.

17

Tasádirúniwa oúnwenbun jóru

1 Ábati liábin ában jádaangiñe sédü ánjeligu ja láubaña sédü cópu, ába laríñagun nun.

–Jigábu, narúfudaali tabeichún oúnwenbun jóru to ñúnboun ligíbuagu barána bun.

2 Agánawaaña urúeigu ja ubouagubaña lídan salúfuri túma, bachárua jagía ja ubouagubaña láu bínu le lánina tisálufurin.

3 Ába lanügünina ánjeli ligía lídoun ában fulásu mageírawati le ayáwadagubei nun láu lubáfu Sífiri Sándu, ába naríjin ában würi waríñu luágu ában mónsturu funáti, búrüwañu líña sun luwýeri dimúrei le anábaguti Búngiu tuágu, sédüñein lichügü mónsturu le uágubei tañúura, dísi ligáanchun.

4 Würi tugúya, gúchu lúma funáti ticólorunbei tanáangun, liábin tuwénden, gólu, dübü buíduburiti, lúma pérla. Ñíñein ában cópu gólu tújaburugu buin láu tisálufurin lúma liwíye tadáagun.

⁵ Bűrúwañu líña ában íri teréberugu láu ában aníchigu arámudaguati. Íri le teréberugubei. “Babilónia to weíriboun, jáguchu jóru lúma sun luwúyeri iwíyeni uboúagu.”

⁶ Ába nasúbudiruni luágu bacháruañoun lan würi tugúya láu játa ja lánigu Búngiu jáma ja áfarawagúbaña lueígiñe jadímurejan luágu Jesucrístu. Dan naríjinbalin cátei le, ába laweíridun nanígi.

⁷ Ábati laríñagun ánjeli ligía nun.

—¿Cá uágu laweírida banígi? Nasúbudiragúdaali míni tan würi to bun, láu sun mónsturu le anügübarun, le sédübei ichügü, díisi ligíanchun.

⁸ Mónsturu le baríjubei, gabágariti meja, áni guetó úaali, láu sun líra, lamúdeiruba lídaangiñe júyu le mébejabei lubáragiñe lídin lídoun lagúmujoún loúnwen. Ja aganoubaña uboúagu, ja úabei jíri bűrúwañu tídan líburu to lánina íbágarí lúmagiñe ladügün uboú, laweíriduba janígi dánme jaríjini mónsturu le meja gabágaribei áni úaali, ábaya liábin.

⁹ Níjein cátei ya joun ja gayáraabei gunfaráanda jamáni. Sédü ichügü ligía, míni lan sédü wúbü le uágubei ñun tan würi tugúya,

¹⁰ sédü méme ichügü ligía, míni lan gíñe sédü urúeigu. Seíngü jádaangiñe urúeigu jagía, gumújali jarúeijan, ában jádaangiñe, larúeijaña guetó, le ában, miábingili. Dánme liábin jagúmujoún, larúeijaba murúsurügü dan.

¹¹ Le mónsturu le meja gabágaribei áni úaali guetó, ligía jawídünbei urúeigu, láu sun ligía lan ában jádaangiñe sédü, lárigiñeme, ábame lídin lídoun lagúmujoún loúnwen.

¹² ‘Díisi gánchu le baríjubei, díisi urúeigu ja magúmeserungiñabaña arúeija, jabíjuba jabáfu urúeigu luágu ában óra úara lúma mónsturu.

¹³ Ában lábu jarítangun urúeigu jagía, jíchugubei jabáfu lúma jarúeijan lun mónsturu.

¹⁴ Jageíndaguba lúma Jesucrístu, láfaragubaña jilágubei, ladüga Jabúreme sun abúremein ligía, Jarúeite gíñe sun urúeigu, áni jagáñeiruba gíñe sun lánigu ja lanúadajabaña Búngiu áni derégüdagu méme jáña lídan jafíñen luágu, úara lúma.

¹⁵ Ába gíñe laríñagun ánjeli ligía nun.

—Barána le baríjubei, le igíbuagubei tañúura jóru, fulásu buri, luwúyerigu dimúrei, lúma néchaani.

¹⁶ Áni díisi gánchu le baríjubei luágu mónsturu, le méme díisibei urúeigu, teyéreeguduba jóru joun, ábame jígirunun fiwañu, surúsu, jeígubei tügürügü, ábame jágudunun láu wátu geméti.

¹⁷ Rúlaali Búngiu tídoun janígi lun jadügüni le labúseerubei láu júaradun lun jedéregeruni jabáfu queísi urúeigu lun jíderaguni mónsturu daríme lagúnfulirun le laríñagubei Búngiu.

¹⁸ Würi to baríjuboun, tugúya weíriti ubúругu le agúmadirubaliña lurúeitegu uboú, le gíribei Babilónia.

18

Teíquadun Babilónia

¹ Lárigiñe sun cátei le, ába naríjin ábanya ánjeli larárirun siélugiñe láu sarágu ubáfu, ába larúgoungadun uboú láu límirin.

² Lagúaraguati láu umálali jéreti.

—Gumúgua, gumúgua Babilónia to weíriboun, guetó jábiñejaru máfianu, jarámudaguagüle sun jawúyeri espíritugu wuríbatíña, jádibu dunúru wíyetiña queísi wadúbi.

³ Ladüga sun lan néchaanigu bacháruuaña láu bínu le lánina tisálufurin, áni agánawaaña lurúeitegu uboú túma lídan tisálufurin, alúgurajatiña buri ja uboúagubaña, rísijaña lídaangiñe luwénden toúseragun túngua.

⁴ Ábayati nagáambun laríñagun ábanya umálali ñübinti siélugiñe.

—Furíjuma Babilóniagiñe, jugúya le nánigu, mafánran jumámuga lídan tifígoun lúma lídan tabeichúniwa.

⁵ Gíbeguaali tifígoun darí lun lachülürün siélu, áni jarítaguaali Búngiu luágu luríban toúserun.

⁶ Adüga jumá tun Babilónia quei tadüga joun ámu, fáyei jumóun dóbüli lueí le tadügübei. Rújuma ában uníñein le jéretimaati bián weíyaasu tun sügü láu le tíchugubei joun ámu.

⁷ Súfurigüda jumóun quei méme tedéregeragun túngua lun anáanguni únguaü lúma lun agünrinchaguni, ladüga aríñaga tan tídan tanígi. “Ñun nína ya quei ában urúei, máma nugúya ában jíñáru mámaritu, masúfurirubadina gíñe.”

⁸ Ligía liábinba lubeí tabeichún lídan ában meme wéyu—ouweni, íruni, ilámaü—ábame tagudún láu wátu geméti, ladüga gabáfuti Wabúreme Búngiu le asíadirubarun.

⁹ Lurúeitegu uboú ja aganoúbaña túma lídan salúfuri lúma irísini, jayájuba, gudémegua tugúyame joun dánme jaríjini gumúlali le lánina tagudún.

¹⁰ Ábame jeréderun díse, le janúfudei lueí tabeichún, ábame jaríñagun.

—¡Fugiábu Babilónia, ubúругu le weírubei, Babilónia ubúругu le gabáfubei, lídaanrügü murúsun óra liábin babeichun!

¹¹ Ja alúgurajatiña buri ja uboúagubaña, ayájuatiña gíñe, gudémegua ligía ubúругu ligía joun ladüga úaaña lan cába lan agáñije ebégidinaü le janáajabei—

¹² ebégidinaü lé buri gólu, pláta, dübü buíduburitu, pérlas, gamísa to líno to fínutu, séda, colóru buri güchu lúma funáti, lúma gíñe sun luwúyeri fuláansu le jémeti, ílagu láuti jari léfan, fuláansu buíduburiti, brónse, gürábu, lúma dübü miríti,

¹³ canéla, cátei lé buri jémeti, cupáli, mírra, ibíñei, bínu, aili, fulúwaaru fínutu, lúma türígu, barütiña gíñe anímaalugu ja lúntiña janáajan ílagu, mudún, bágasu, gabáyu, cárü, ásta músu, o gürígia lun jalúgurajoún.

¹⁴ Jaríñaguba lun ubúругu ligía.

—¡Úaaru frúta buri to seméboun búma to jínsiñeñajáboun bun sarágu, féridi báali gíñe sun irísini lúma wéndei le búmañajabei, féridiwaali lun sun dan!

¹⁵ Jáñaja alúgurajabálin buri cátei le áni rísijaña lídan ubúругu le, jeréderuba díse le janúfude lueí labeichún, ayájuajeina, aságürijeina.

¹⁶ Ábame jaríñagun.

—¡Fugiábu ubúругu weíruti! Ítara liñá meja quei ában würi táu tadáüragun to líno fínutu túma anáanguni to colóru güchu lúma funáti, láu tuwénden gólu, dübü buíduburiti lúma pérta.

¹⁷ ¡Lídan murúsun óra gumúja sarágu irísini!

Sún buri tarúne ugúnein, pasajéругu, mádulungu, jáma sun ja ñadágimeinbaña baránaja, díseti jeréderun.

¹⁸ Dánti le jaríjini lugúmulalin lágudun ubúругu, ába jagúaragun.

—¿Cásan meja ámu ubúругu ñíbei quei oúnwenbun ubúругu le?

¹⁹ Ába jíchaagun múa jábulugu, ayájuaja, aságürija, agúaragua.

—¡Fugiábu Babilónia lé buga weírubei! Rísijañá yebe sun ja gagúnebaña wapóru baránaja láu lirísini, áni lídaanrügü murúsun óra gürínwagua.

²⁰ Gúnda jumá láu le asúseredubei lun Babilónia, amürü siélu, júma jugúya apóstolugu, jáma profétagu, jáma sun ja lánigu Búngiu, ladüga adügaali Búngiu gúsei jun láu lasíadiruni.

²¹ Ábati liñúrun ában ánjeli gabáfuti ában dúbü le ítarabei quei ában mulí, ába láguruni baránajoun, ába laríñagun.

—Ítara lúba laráriragüdúniwa Babilónia, ubúru le weíribei, mar-ijíndügüyáwalime.

²² Magaambúndügüyáwalime tamúri gidára, fídu, bémerirugu, úaañame gíñe ñadágimeintiña bídan ni ca uwúyeri, magaambúnjalime gíñe lamúri dúbü le mulí bídan.

²³ Madúnraagúnjalime larúgounga lámpu bídan, magaambúndügüyáwalime areínjani le lánina maríei bídan, láu sun gabáfugüda bániña meja báni alúgurajatiña lídan sun ubou, eyéedagua báña sun néchaani láu babíñarajan.

²⁴ Dariwaali játa profétagu, jáma ja lánigu Búngiu, lúma játa sun ja áfarawagúañabaña ubouagu, dariwaali játa sun jagía lídan ubúru le meja Babilónia.

19

¹ Lárigiñe cátei le, ába nagáambuni jamálali sarágu gürígia, jagúarajan. ¡Alelúya! Weíríti Wabúngiute le Súnti Gabáfu, ligía asálbarubaliña lánigu.

² Agúseragüdati láu úarani lúma ísuruni, siádi láaru ouñwenbun jóru to agádeirubalin ubou láu tisálufurin, águyugüda láali jáfarawagún lánigu tuágu.

³ Ábaya jagúarajan.

—¡Alelúya! Magúmubei lamúdeirun tugúmulalin.

⁴ Játi weín-gádürü gürígia ja weírígutiña, jáma gádürü cátaña gabágaritiña jagía, ába jélemuchun chülü múarugun, judúguatiña lun Búngiu le ñúnbei luágu lála, ába jaríñagun.

—¡Ítaralá! ¡Alelúya!

⁵ Ábati lagaambún laríñagun ában umálali yaráfa lueígiñe lála Búngiu. Rújuma uweíríguni lun Búngiu, sun jugúya ja esériwidubalin, áni inébelá jun, weíyaaña, ñübürigiña.

Fédu siélu

⁶ Agáambayatina camá jamuga jamálali sarágu gürígia, camá lamúri sarágu dúna lúma wayújururu jéreguti, agúaraja.

¡Alelúya! Guméseeli Wabúreme Búngiu le Súnti Gabáfu agúmadija.

⁷ Gúndaagua wamá, buínwama láu ugúndani, ru wagíame uweíríguni lun, ladüga chülüja óra lun lídan jamá ában lánigu Jesucrístu lúma, le gumúti. Aráanseña quei ában adári lubá tamárieidun,

⁸ táu tanáangun líno to fínutu, jarúma, áni mirí.

Míni tan líno fínutu, ibágari le surúti, le jabágari lánigu Búngiu.

⁹ Ábati laríñagun ánjeli nun.

—Babürüja. “Gúnda jamá ja amísurajoúbaña lídoun fédu le lánina lúaradun Jesucrístu jáma lánigu.”

Ába laríñagun nun.

—Dimúrei buri inárüniti le laríñagun Búngiu le.

¹⁰ Ába nájuduragun ligíbugiñe ánjeli ligía, ába laríñagun nun.

—Madügabei le, esériwiduti áu lun Búngiu quei amürü jáma bibíriña ja afálarubalin láni Jesúsugánu derégüdagüña, lun Búngiu lun bájuduragun.

Ugánu le lanügübei Jesúsugánu lídoun larúgounga, ligía lébubei sun le jaríñagubei profétagu.

Le aweínjabalin gabáyu jarúti

¹¹ Ábati naríjini siélu junréñu, ába lasáliragun ában gabáyu jarúti, léti aweínjabalin, Gúnfuliti lúma Inárüni, ligía líribei, ladüga láu ísuruni lagúmadija, láu gíñe ísuruni lageíndagua.

¹² Ámirijati lágu camá ligémeri wátu, ñíñein sarágu rídi lábulugu, ñíñein gíñe ában íri bürüwañu luágu, ligía rügüñein asúbudirei.

¹³ Anáanguni to luáguboun, feíndiwatu láu jítaü. Lerérun Búngiu líribei.

¹⁴ Jafálareiti súdaara ja siélubaña táu jadáüragun líno to fínutu, jarútu, jarúma, waríñu jagía jawágu gabáyu jarútiña.

¹⁵ Ñíñoun ában efeín jamánatu liyúmulugugiñe lun láchaünguniña néchaani táu, ábame ledéragüdüni lagúmadijan quei láu ában gürábu. Lagúseragüdübaña quei le aríbichagubarun beíbei láu lugúdi, gurágüdaleíme bínu le lánina lanárimel ligáñi Búngiu joun.

¹⁶ Bürüwañu líña íri le tuágu lanáangun lúma luágu liyáda. “Jarúeite sun urúeigu, Jabúreme sun abúremeigu.”

¹⁷ Ába naríjin ában ánjeli rára lídan wéyu, le agúaragubei láu érei joun sun dunúru ja ájamajabaña juánriñurugu.

—Jigoúgu, oúndaragua jumá lun oúnwenbun ladíneragüdün Búngiu,

¹⁸ Jou jumámuga jágürügü urúeigu, gumádimatiña, jáma wügüríña ganígitiña, jágürügü gabáyu jáu sun ja aweínjabaliña, jágürügü sun jawúyeri wügüríña dándu ja jóunguatiña quei ja idámuni, dándu ñübürigiña quei weínamujaña.

¹⁹ Ábati naríjini mónsturu jáma lurúeitegu ubou jáu jánigu oúndaraguaaña lun jageíndagun lúma le waríñubei luágu gabáyu jarúti jáma lánigu.

²⁰ Ába ladaürün mónsturu úara lúma proféta yéeti lé buga adügübei miláguru ligíbugiñe mónsturu. Láu buri miláguru ligía, ayéeda láaña proféta ligía ja ígiraguagüdübaña jóungua lun labürüdün líri mónsturu jawágu, judúgua jagía tun liyáwa. Dánduti mónsturu quei proféta yéeti ligía, ába jagurún wínwañu lídoun lagúnu le láubei wátu geméti lúma sáfuru.

²¹ Ja jíbiri, ába jáfarawagún táu efeín to liyúmuluguboun le waríñubei luágu gabáyu, ába jaquímuledun sun dunúru buídu láu jágürügü.

20

Le mílu irúmu

¹ Lárigiñe, ába naríjin ában ánjeli larárirun siélugiñe láu ligélen júyu le mébejabei, lúma ában oúnwenbun güríngüri lújaburugu.

² Ába lárügüdüni ánjeli ligía dragón, le binádu jéwe, le Máfiabei áni Satanási, ába lagüraguni luágu mílu irúmu.

³ Ába láguruni lídoun júyu le mébejabei le ñí lubei ladáürei. Ába lichugún ában séyu luágu béna lun mayéejandügüya láaña lan néchaanigu darí lásügürün mílu irúmu. Lárigiñeme mílu irúmu ligía, lígiragüdüwaba luágu murúsun dan.

⁴ Ába naríjini jála buri ja ibíjubaña ubáfu lun jagúseragüdün, ñun jáña luágu. Aríja numútiña gíñe jawáni já meja adürürübaña ichügü lueígiñe japúrichijani Lerérun Búngiu lúma lueígiñe jadímurejan luágu Jesucristu, ja májuduragunbaña lun mónsturu ni tun liyáwa, mígirun jagía lun lichugún líri luágu jerébe o luágu lan jarüna. Ába naríjin jásaarun lídaangiñe oúweni lúnya jabágaridun, ába jagúmadijan úara lúma Crístu luágu mílu irúmu.

⁵ Ánjeinti ja jíbiri jiláguaaña, másaaruntiña lídaangiñe oúweni daríme lárigiñe mílu irúmu. Niján furúmiñetibei ásaaruni lídaangiñe oúweni.

⁶ ¡Gúndaatiña áni lánigu Búngiu jagía ja gafánraanbaña lídan furúmiñeti ásaaruni lídaangiñe oúweni! Mabáfuti libíaman oúweni jawágu, lubáragiñe líra,

fádirigubaña láni Búngiu lúma láni Crístu, ábame jagúmadijan úara lúma Crístu luágu mílu irúmu.

⁷ Dánme sügüjali mílu irúmu ligía, ligíame lígirawagüdün Máfia lídaangiñe júyu le mébejabei,

⁸ ábame láfuridun lun layéejaniña néchaanigu lídan sun ubouú. Láfuriduba ayéedaña ubáfu buri le Gog lúma Magóg, ábame loúndaraguniña jánigu, ja gíbebaña quei liságounte barána, lun wuríbu.

⁹ Ítara líña lubeíti, ába jáfuridun súdaara jagía lídaangiñe sun ubouú, ába jegéyedaguni fulásu le ñí jabei lánigu Búngiu lúma ubúrugu le jínsiñebei lun Búngiu, le Jerusalénbei. Ába loúnajan Búngiu wátu geméti siélugiñe, ába láguduniña gumúgubei.

¹⁰ Máfiati le ayéedubaliña, ába lágurúniwa lídoun lagúnu le láubei wátu geméti lúma súfuru, le ñíjin lubei jágurúa mónsturu lúma proféta yéeti. Jasúfuriruba ñi wéyuagu, áriebu lun sun dan.

Wísiyu ligíbugiñe oúnwenbun jalaü jarúti

¹¹ Ábati naríjin ában oúnwenbun jalaü jarúti, ñíñein Búngiu ñun luágu. Ába lagúmuchagun siélu lúma ubouú ligíbugiñe, ába marijínjali lan.

¹² Ába naríjiniña jiláguaaña, weínamujaña jáma ñúbürigiña rára ligíbugiñe Búngiu, ába tadárawagún líburu buri túma ábanya líburu to líburu to lánina ibágari. Ába jagúserawagüdün jiláguaaña luágu buri cátei lé meja jadügübei, según le bürüwañubei tidan líburu buri tugúya.

¹³ Sarátiña sun ja añáradagubaña dúnarugu, sun ja jiláguañabaña, ába jásaarun lídaangiñe ouweni, ába jagúserawagüdün luágu buri cátei lé meja jadügübei.

¹⁴ Ába lágurúniwa ouweni lúma jabára jiláguaaña lídoun lagúnu le láubei wátu geméti. Lagúnu láuti wátu geméti ligía, ligía libíamabei ouweni,

¹⁵ ñíjin jagurúa ja úabei jíri tidan líburu to lánina ibágari lun jasúfurirun ñi gumúgua dan.

21

Iséri siélu lúma iséri ubouú

¹ Lárigiñe, ába layáwadagun iséri siélu lúma ában iséri ubouú nun, gumúgua buga furúmiñeti siélu lúma furúmiñeti ubouú áni úaali buga barána.

² Áu Juan, aríja numúti ubúrugu biníwati le iséri Jerusalén, larárirun siélugiñe lúmagiñe Búngiu. Aráanseñu líña quei ában adári dáüguañu lubá tadári.

³ Ába nagáambun laríñagun ában umálali jéreti siélugiñe.

—Aríjabá, agánawati Búngiu jádan gürígia guetó. Laganouba jáma, jagíaba lánigu, Búngiu mémeba jáma lun ligía lan Jabúngiute.

⁴ Larágajabei sun jáguira, úaalíme ouweni ni ayájuni ni íruni ni igárigu, ladüga sügüja sún meja cátei le níjeinbei.

⁵ Ábati laríñagun Búngiu.

—Aríjabá, adüga numúti sun cátei isérime.

Aríñagati gíñe.

—Babürüja, ladüga inárüniti dimúrei buri le, áni gayáraati lafíñerún luágu.

⁶ Lárigiñe, ába laríñagun nun.

—Súnja nadügüni sun cátei le. Áu lagúmesejabei sun cátei, áu gíñe lagúmujoúnbei, quei létüra 'A' lúma 'Z'. Le mágürabuti, níchuguba lun lun látun lídaangiñe líseesen dúna le íchugubei ibágari, mafáyeijaanga luagu.

⁷ Ja ásiiragúbalin wuríbani jerésibirubei sun le lúnbei jabíjini quei jalágaante quei nirájüñü, áume Jabúngiute, jagíame nirájüñü.

⁸ Ánjañati ja janúfudebaña, ja mafíñebaña, ja iyéreejabúbaña, ja gáfarajadibaña, ja adáagubaña salúfuri, ja abíñarajabaña, ja ájuduragubaña joun sándu, jáma ja yéebaña, jágurúba lídoun lagúnu le sübei láu wátu geméti lúma sáfuru, le libíamabei ouweni, ligíaba jalágaante.

Iséri Jerusalén

⁹ Ábati liábin ában jádaangiñe sédü ánjeligu ja láubaña sédü cópu buin jáu sédü jagúmujoún ígei, ába laríñagun nun.

—Jigábu, narúfudaali jageíra lánigu Jesucrístu bun.

¹⁰ Ába layáwadaguagüdüni Sífiri Sándu ában wübü nun, weíriti, íñu, ába larúfuduni oúnwenbun ubúrugun biníwati le Jerusalén nun, larárirun siéluigiñe lúmagiñe Búngiu.

¹¹ Ámirijati ubúrugun ligía láu larúgounga Búngiu, ítara líña límirin quei límirin ában dübü buídumeraüti, quei dübü le jáspe, jarúgoungati quei bídiriu.

¹² Níñein ában baríeru weíriti, íñu, láu dúusu béna geyégu láu ubúrugun ligía, ában ánjeli luágu cáda béna, lúma jíri dúusu türíbu ladügawagun Israél bürüwañu luágu buri béna.

¹³ Ürüwañein béna lueígiñe le ñígiñe lubei laboucha wéyu, ürüwa lueígiñe nóрте, ürüwa lueígiñe sur lúma ürüwa lueígiñe oubaü le ñígiñe lubei lálüda wéyu.

¹⁴ Baríeru ligía, ligíbuaguñein dúusu dübü lidérebuguñein, láu jíri dúusu láni Crístu apóstolugu bürüwañu luágu.

¹⁵ Níñein ában mabúru gólu lúma ánjeli le adímurejabei núma lun lamísurajani ubúrugun, lubéneri, lúma lubárierun.

¹⁶ Ubúrugun ligía, ába lábu lidábuberen lúma limígifen. Ába lamísurajani ánjeli ligía ubúrugun láu lumáburu, bián-mílu bián-san kilómetros luweírín, ába lábu limígifen lúma líñun, lúma lidábuberen.

¹⁷ Lárigiñe, ába lamísurajani baríeru, ürüwa-wein-gádürü méetros luweírín según jamísuraagüle gürígia le layúsurubei ánjeli ligía.

¹⁸ Láu dübü le jáspe ladügüwa baríeru ligía, ubúruguti ligía, láuti gólu le tímátimaati, miríti queisi bídiriu le jarúmati.

¹⁹ Wéndegüdáwati lébu baríeru ligía láu sun luwúyeri dübü buíduburiti. le furúmiñeti, láu jáspe, le libíaman, láu safíro, le lürüwan, láu ágata, le ligádürün, láu esmerálda,

²⁰ le liseíngün, láu ónise, le lisísín, láu cornalína, le lisédün, láu crisólito, le liwídün, láu berílo, le linéfun, láu topásio, le lidísín, láu crisoprása, le liúnsun, láu jasínto, léti lidúusun, láu amatísta.

²¹ Dúusugubei béna ligía, dúusu pérlas, cáda béna láu ábanrügü pérla ladügüwa. Léti úma buri láni ubúrugun ligía, láuti gólu jarúgoungati quei bídiriu.

²² Maríjintina ni ában ligílisi lídan ubúrugun lídan, ladüga añájein Wabúreme Búngiu le Súnti Gabáfu lúma Jesucrístu ñi, mabúseerúnwatu ligílisi le ñi jabei.

²³ Memégeirunti ubúrugun ligía larúgounga lúmagiñe wéyu ni lúmagiñe játi, ladüga le guánarü larúgounga Búngiu rúti larúgounga lun, léti Jesucrístu, ligía lilámpunbei ubúrugun ligía.

²⁴ Jeíbuguba sun néchaanigu ja sálbawañabaña lídan lilámpun ubúrugun ligía, ábame janügüni lurúeitegu ubou jaweírigin ñíjin, lun jíchuguni lun Búngiu.

²⁵ Madáurawagunbei lubéneri wéyuagu, úabei gíñe áriebu ñi.

²⁶ Lanügüba jaweírigin néchaanigu ñíjin, láu sun jarísín,

²⁷ mebélubei ni cáta wíyeti ñíjin, ni le adügüti cátei le wuríbati o gayéeraguati. Ja rügübaña bürüwañubaña íri tídan líburu to lánina ibágari to lúmaoun Jesucrístu, jagía rügübaña ebélura.

22

¹ Ábati larúfudun ánjeli ligía ában dúna jarúmati nun, le íchugubei ibágari, jarúgougati quei bídiriu, lídaangiñe lála Búngiu lúma lála Jesucrístu láfurida.

² Níñein dúna ligía lamídaangua lémeri ubúругu ligía, áni luágu bián louba dúna ligía ñi laweírida buri tídíbu wéwe le íchugubei ibágari, le agíndubei dúusu weíyaasu lídan irúmu. Ságü játi lagíndun, léti lubána, seríwiti lun lagáranijoún joun néchaanigu.

³ Úaalíme ni cáta ñi lun lábugiñe lan líñaragun Búngiu. Níbei lála Búngiu lúma lála Jesucrístu lídan ubúругu ligía, ábame jájuduragun lánigu lun.

⁴ Jagágibudaguba lúma Búngiu, níbei gíñe líri jeréberugu.

⁵ Úaalíme áriebe ñi, ja aganoúbaña ñi, memégeirunbaña ligémeri lámpu ni ligémeri wéyu, ladüga larúgougadagüdüba Wabúreme Búngiu jáu, ábame jagúmadijan sun dan.

Madíseeli liábin Jesúsu

⁶ Lárigiñe, ába laríñagun ánjeli ligía nun.

—Inárüñiti dimúrei buri le, áni gayáraati lafíñerúniwa luágu, áni Wabúreme Búngiu méme le íchugubei dimúrei joun profétagu oúnaja láadina lun narúfuduni le lúnbei lasúseredun joun lánigu madíse.

⁷ —¡Arija jumá! ¡Anáte madíse! líña laríñagun Jesucrístu.

¡Gúndaalá le adügübei gásu láu ugánu le láni Búngiu le bürüwañubei tídan líburu to!

⁸ Áu Juan, agáamba numúti, aríjaneí buri cátei le, áni lárigiñe naríjini lúma nagáambuni, ába nájuduragun lubádu lugúdi ánjeli le arúfudubalin nun.

⁹ Ába laríñagun nun.

—Madügabeí le, esériwiduti lun Búngiu áu quei amürü jáma bibíriña ja profétagu, jáma sun ja adügübaña gásu láu le bürüwañubei tídan líburu to, lun Búngiu lun bájuduragun.

¹⁰ Aríñagati gíñe nun.

—Marámudabeí láni Búngiu ugánu le bürüwañubei tídan líburu to ladüga yaráfaali dan lun lagúnfulirún.

¹¹ Ígirabeí le wuríbabei lun lasígirun adáagua wuríbani, le wíyebei, lun lasígirun lídan liwíye, ánjeinti le buídubei, buídumemelá, áni le wügüri le derégeguabei lúngua lun Búngiu, gúnfulimemelá.

¹² —Ánja, madíseeli niábin, líña laríñagun Jesucrístu, áni barü numuti afáyeiruaajaü le lúnbei níchuguni lun cáda ában según buri cátei le ladügübei.

¹³ Áu furúmiñetibeí lúma agúmujoúni, lagúmeseja sun cátei lúma lagúmujoún quei létüra ‘A’ lúma ‘Z’.

¹⁴ Gúndaatiña ja achíbubalin jafígoun lun garícha jamá lun jeígin lídaangiñe lin tídíbu wéwe le íchubei ibágari, gayára lámuga jebélurun lueígiñe lubéneri ubúругu.

¹⁵ Ánjaña ja mafíñeradibaña luágu Jesucrístu, ja abíñarajabaña, ja adáagubaña salúfuri, ja gáfarajadibaña, ja ájuduragubaña joun sándu, jáma sun ja jínsiñejabúbaña lun eyéeraguni, jeréderuba bougudi.

¹⁶ —Áu Jesúsu, oúnaja náali náni ánjeli lun lasúbudiragüdüni sún buri cátei le joún buri tílana ligílisi. Áu linébaanfan urúei Davíd, áu gíñe queísi warúguma to lánina bináafin.

¹⁷ Aríñagati Sífiri Sándu jáma ja lánigubaña Jesucrístu.

—Jigábu lun Jesucrístu lun basálbarun.

Le gíñe agáambubei, aríñagalá.

—Jigábu lun Jesucrístu, sálba bámuga.

Le mágürabubei, ánjein busén, ñübinlá, gurála lídaangiñe dúna le íchugubei ibágari, mafáyeijaanga luágu.

¹⁸ Sun ja agáambubalin láni Búngiu ugánu le bürüwañubei tídan líburu to, wéridi numútiña lueí cátei le. le íchuguti lánwoun cátei le, lagánwoundagüdübaña Búngiu ígei ja uágubaña labürüjoúa tídan líburu to, luágu.

¹⁹ Le gíñe agídaruti som cátei lídaangiñe láni Búngiu ugánu le bürüwañubei tídan líburu to, lagídarubei gíñe lufánran lídaangiñe lín tídibu wéwe le íchugubei ibágari, lúma lídaangiñe ubúругu sándu lé buri bürüwabei uágu tídan líburu to.

²⁰ Le asúbudiragüdübalin buri cátei le, aríñagati.

—Ánja, madíseeli niábin.

Ítaralá. ¡Jigábu Wabúreme Jesús!

²¹ Binílaün Wabúreme Jesucrístu sun jugúya. Ítaralá.